


Ălənžil n-Ŷisa
Ălmasex: Kitab
Ălmuqăddăs



Tamasheq: New Testament

**Ălənžil n-Yisa Ālmasex: Kitab Ālmuqăddăs
Tamasheq: New Testament**

copyright © 2003 Wycliffe Bible Translators, Inc.

Language: (Tamasheq)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 18 Apr 2025 from source files dated 29 Jan 2022
b95f369b-a236-5ca8-8cab-11f74279d73c

Contents

Mätti	1
Marqəs	64
Luqa	101
Exya	163
Ijitän n-inəmmuřal	208
Käl-Roma	265
1 Käl-Kurənta	293
2 Käl-Kurənta	321
Käl-Gälasya	339
Käl-İfäsus	350
Käl-Fəlibb	359
Käl-Kuləs	366
1 Käl-Täslonika	373
2 Käl-Täslonika	379
1 Timoti	382
2 Timoti	390
Titus	395
Fälyamon	398
Yäbranitän	400
Yaquub	420
1 Bətrus	426
2 Bətrus	434
1 Exya	439
2 Exya	446
3 Exya	447
Hudd	449
Tänäfalilt	451

Älönzil n-Ŷisa Älmasex wa iktäb Mätti

Ättarex n-Ŷisa Älmasex (Luqa 3:23-38)

¹ Ättarex n-ŶisaÄlmasex wa n-ahäya n-ännäbi Dawəd d-ahäya n-Ibrahim da:

² Ikräš Ibrahim Isxaqq,

Isxaqq ikräš Yaqub,

Yaqub ikräš Yähuda d-ayətma-s wi iyyädnen.

³ Yähuda ənta, təkraš-as hänne-s Tamar, Faris d-Zira.

Ikräš Faris Xäšrun,

ikräš Xäšrun Aram,

⁴ ikräš Aram Aminädab,

ikräš Aminädab Nasun,

ikräš Nasun Sälmun.

⁵ Ikräš Sälmun d-hänne-s Rahab Boğaz,

ikräš Boğaz d-hänne-s Rutt Ŷubäyd,

Ŷubäyd ənta, ikräš Yasa.

⁶ Yasa ənta a oräwän ämänokal Dawəd.

Dawəd ənta, ikräš d-hänne-s n-Urya Suläyman,

⁷ Suläyman ənta ikräš Raxäbyäm,

Raxäbyäm ikräš Abya,

Abya ikräš Asaf,

⁸ Asaf, ikräš Yähušäffat,

Yähušäffat ikräš Yoram,

Yoram ikräš Uzya,

⁹ Uzya ikräš Yotam,

Yotam ikräš Axaz,

Axaz ikräš Ezekya,

¹⁰ Ezekya, ikräš Mänase,

Mänase ikräš Amon,

Amon ikräš Yozya,

¹¹ Yozya ikräš Yäxunya d-ayətma-s wi iyyädnen.

Äzzäman-wen-däğ a däğ-əttəkfälän käl-Işrayil

s-äkall wa n-Babilun.

¹² Darät atəkfəl-wen-däğ ad-ikräš Yakonya Äşşälat,

Äşşälat ikräš Zurubabil,

¹³ Zurubabil ikräš Abihud,

Abihud, ikräš Ilyakim,

Ilyakim ikräš Yazur,

¹⁴ Yazur ikräš Ässäddiq,

Ässäddiq, ikräš Yahim,

Yahim ikräš Ŷəlihud,

¹⁵ Ŷəlihud ikräš Ŷəlyazär,

Ŷəlyazär, ikräš Mittän,

Mittän, ikräš Yaqub.

¹⁶ Yaqub-en-däğ a äshäyāwän Yusəf wa n-ähaləs n-Märyäma ta toräwät Ŷisa wa s-itawänna Älmasex.

¹⁷ Ƴur-äzzäman wa n-Ibrahim tökköd äzzäman wa n-Dawöd, okäynät mārāwāt əzzurəyaten d-əkközät; Ƴur-äzzäman wa n-Dawöd tökköd äzzäman wa n-atəkfəl n-käl-Işrayil s-äkall wa n-Bäbilun, okäynät mārāwāt əzzurəyaten d-əkközät; Ƴur-äzzäman daƳ wa n-atəkfəl n-käl-Işrayil s-äkall wa n-Babilun tökköd äzzäman wa n-tiwit n-Älmasex, mārāwāt əzzurəyaten d-əkközät a okäyenen.

*Tiwit n-Ƴisa Älmasex
(Luqa 2:1-7)*

¹⁸ Ənta da əmmək wa s-iwa Ƴisa Älmasex: ma-s Märyäma, ittar-tät ähaləs s-isəm-net Yusəf mäšan dāƳ-a-wa itäjj MässinäƳ s-tärna n-Unfas Šaddijän, təkraš ənniyät härwa wär toher d-Yusəf isəftaƳ.

¹⁹ Yusəf-i n-anəmmutär-net, ähaləs n-ämaƳdal a ämoos, inhäy a-s tanfust-den-däƳ Ƴas, ässosäm, wär t-illa ere dāƳ-ija isälan ed wär-irha ad-tät-ikšəf. Təssəba n-a-wen-däƳ a fäl t-dd-ijjäš ənniyät n-ad-hin-izjär isälan-net dāƳ-ufär.

²⁰ Izinəzjum dāƳ-a-wen-däƳ a-s has-dd änfäläl änjälos n-Emäli dāƳ-täharjit, inn'-as: «Yusəf Ägg-Dawöd, wär täksudäd adubən n-Märyäma fäl-a-s ənniyät wa la, Unfas Šaddijän a-s əssəbab-net,

²¹ ad-təkrəš alyad, təjəd-as isəm Ƴisa fäl-a-s ənta a madän-iƳləs taməttenet dāƳ-ibäkkadän-net.»

²² A-wa iket-net ija i-ad-itbət a-wa innä ännäbi n-MässinäƳ iyyän a-s innä:

«Innä Emäli:

²³ <Säjdät!

Ad-təkrəš tämawađt wärät təzzey meddən ənniyät, təkraš alyad, iwär-t isəm Imanuwil>.

Imanuwil, älmäƳna-net: MässinäƳ, izzäƳ-dd jere-näƳ.»

²⁴ Inkär-dd Yusəf dāƳ-eđəs, ämešäl a-wa has-innä änjälos n-Emäli, izzəzläy-dd Märyäma,

²⁵ mäšan wär dār-s oher isəftaƳ har təjräw eƳäf-net, təkraš alyad, äswär-t isəm Ƴisa.

2

Imusänän wi dd-fälnen ijəj, əmmaƳän i-Ƴisa

¹ Äzzäman wa d-ämoos Harudəs ämänokal n-teje ta n-Älyähudəyät ad-iwa Ƴisa dāƳ-taƳrəmt ta n-Bätlehäm hät teje-ten-däƳ. Äzzäman-en-däƳ daƳ ad-dd-osän imusänän dd-fälnen emäynäj, əkkan-dd Yärussälam,

² sastanän äddinät d-ämänokal n-käl-Älyähud wa s-iket iwa s-ənhäyän atär-net a-s dd-izjär s-emäynäj; əlläƳen-asän a-s ass ad-dd-jän i-ad-t-əƳbədän.

³ Isl' ämänokal Harudəs i-mäjräd-wen-däƳ Ƴas, iššəwwäš ənta d-käl-Yärussälam iket-däƳ-näsän.

⁴ Äsdäw-dd darät-a-wen e d t-illäm ämänokal n-käl-tikutawen d-älƳalim n-Ättäwrät, issəstän-tän d-edägg wa dāƳ-mad-iwəy Älmasex.

⁵ Ənnän-as: «Bätlehäm ta hät teje ta n-Älyähudəyät a dāƳ-mad-iwəy fäl-a-s iktab ännäbi iyyän a-s, inna MässinäƳ:

⁶ <Ya Bätlehäm, kämm-i hät teje ta n-Älyähudəyät, tidət, wär təkned təmƳäre jer-tiƳärmaten ti n-käl-Älyähud mäšan, kämm-i-däƳ əndärrät ad-dd-mad-izjär ämänokal

wa madän-izar i-tamøtte-nin ta n-käl-Işrayil, isəssiğəd-tät.» »

⁷ Islä Harudəs i-a-wen ɣas, ikkäs-dd imusänän-winnin s-takše, ad-tän-ikann asəstan d-əzzāman wa dāɣ-hasän-dd-ānfaläl atär wa s-ənnän ənhayän-t.

⁸ Issəgl'-en ɗarät-a-wen, dāɣ-a-s hasän-inna: «Äkkät Bätlehäm, təkənəm asəstan d-alyaɗ, afäl t-təjrāwäm, əqqəlät-ahi-dd, təjəm dāɣ-i isälan i-ad-t-äkkäɣ, ärkäɣäɣ-as näkk-dāɣ.»

⁹ Əslän i-a-wa inna, əglän. A əndərrän, atär-wənnin ənhayän s-eməynäjä-da-dāɣ, äzzar-asän har tanämhäla n-ehän wa iha alyad.

¹⁰ Ənhayän atär-en, əknän tedäwit.

¹¹ Əjjäsän ehän wa jənnəj-ənhayän atär, ənhayän alyad d-ma-s Märyäma, ärkäɣän-as, ad-t-ɣabbädän. Orän ɗarät-a-wen tisətwar-näsän, əkkäsän-as-dd tibəddar n-oräɣ d-matälxer d-teldədt.†

¹² Əllan-t dihen-dāɣ a-s tän-issəlmäd Mässinäɣ dāɣ-täharjit s-udaynet i-ad-əqqəlän Harudəs. Jän tabarät tiyyät säla ta dd-jän, əqqəlän äkall-näsän.

Ajiwəɗ s-Mişra

¹³ Əglän imusänän ənnin ɣas, änfaläl-dd änjälos n-Emäli i-Yusəf dāɣ-täharjit, inn'-as: «Yusəf, ənkär, ədkəl alyad d-ma-s, jawad s-äkall wa n-Mişra, təzzäɣad dihen-dāɣ har aşäl wa d-hak mad-ännäɣ täddoobed ad-dd-təqqələd fäl-a-s alyad-i, itammäɣ-as Harudəs i-ad-t-änɣ.»

¹⁴ Inkär, iɗkäl alyad d-ma-s, ähona s-Mişra ehäd-wen-dāɣ,

¹⁵ izzäɣ dihen har äba Harudəs. Ij'-a-wen i-ad-itbət a-wa innä ännäbi iyyän a-s innä, innä Emäli:

«Əɣreɣ-dd Rure-ɣ i-ad-dd-izjär Mişra.»

Aratän wi issänɣa Harudəs

¹⁶ İlmäd Harudəs a-s əssəs-wädän-t imusänän ed wär t-dd-olesän uɣəl ɣas, ikäf s-aɗkär. Omär älwäqq-wen-dāɣ s-ad-ämmätän ilyadän wi hənən Bätlehäm d-attayän-net t-əllanen daw-əssin iwətyan ed täqqän-ten-dāɣ a togdähät d-ta s-has-ənnän imusänän, änfalälän-asän-dd atär dāɣ-s.

¹⁷ Ämoos a-wen-dāɣ ijän a ässiitbätän a-wa innä ännäbi Yirmiya† a-s inna dāɣ-əlkəttab n-Mässinäɣ:

¹⁸ «Ij' eməsli n-tisnant dāɣ-ayrəm wa n-Rama, ja tahäla d-tikäləlen.

A-wa Rähila hallät ilyadän-net,

äbä-dd a tät-isəssisumän,

ed ilyadän-net, ämmun iket-dāɣ-näsän.»

Iqqäl-dd Yusəf äkall wa n-Işrayil

¹⁹ Äba Harudəs ɣas, änfaläl-dd änjälos n-Emäli i-Yusəf dāɣ-täharjit dāɣ-äkall wa n-Mişra, inn'-as:

²⁰ «Ədkəl alyad d-ma-s ämära, təqqələd äkall wa n-Işrayil ed äddinät wi s-käla tattarän iji n-iman-net, äba-tän.»

²¹ Inkär Yusəf, iɗkäl alyad d-ma-s, iqqäl äkall wa n-Işrayil.

²² Mäsän, islä a-s Erkilyas ägg Harudəs a ämnakälän dāɣ-edägg n-ti-s fäll-teje ta n-Älyähudəyät ɣas, igdäl-as əmməttəsü ad-tät-äkk i-ad-dāɣ-s izzäɣ. Änfaläl-as-dd Mässinäɣ dāɣ-täharjit, inn'-as ad-äkk teje ta n-Galila.

† **2:11 2:11** Aɗutän-wi-dāɣ, itawänn'-asän day: Miri (myrrhe dāɣ-Təfränsit). † **2:17 2:17** A-wa ännäbi dd-äzzarän i-ɣisa, äloläy dāɣ-isälan-net säɗisät timaɗ n-awätay dat-tiwit-net.

²³ Iwwäd-in teje-ten ɣas, izzäy däɣ-tayrəmt s-isəm-net Nəşirät. Ija a-wen i-ad-itbət a-wa ənnän ännäbitän fäll-Ŷisa a-s ənnän:

«Ad-t-iwär isəm: U-Nəşirät.»

3

*Älxuṭbät wa ija Exya wa n-Enəsselmäɣ
(Marqəs 1:1-8; Luqa 3:1-18; Exya 1:19-28)*

¹ Išilan-win-däy d-izzäy Ŷisa tayrəmt ta n-Nəşirät, ad-issəntä Exya wa n-Enəsselmäɣ ämaşal-net, ijanna i-äddinät däɣ-tenere n-teje ta n-Älyähudəyät:

² «Utabät fäl-a-s Təmmənəya n-Mässinäɣ, tohäz-käwän-dd.»

³ A-wen-däy işlän Exya, a däɣ-əsəwəl ännäbi Saya,† a-s innä:
«Ad-t-iməl ähaləs äsiḡären däɣ-tenere,
ijanna i-äddinät:

«Äknät tabarät i-Emäli,
səsiḡədät data-s ibaran-net.» »

⁴ A-s itäj a-wen-däy, ilsa Exya asälso iknan s-eläm n-amnəs warän amzadän, ijbas s-taməntəka n-eläm, iddar s-tašwalt d-torawät.

⁵ Tisən-t-dd äddinät dd-falnen aɣrəm wa n-Yärussälam d-teje ta n-Älyähudəyät iket-net d-idäggan iket-näsän wi ohäznen ejänš wa n-Ŷurdəni,

⁶ ad-tilɣun ibäkkadän-näsän dat-tamətte, isalmaɣ-tän Exya däɣ-ejänš wa n-Ŷurdəni.

⁷ Ijräh-in Exya a-s tamətte ta t-dd-təkkät, han-tät äddinät äjootnen la taggayt ta n-käl-faris d-ta n-käl-sadus ärhanen ad-tän-isəlmäɣ, innäd-dd sār-sän, inn'-asän: «Ya taššälen-i-däy! Wädden tənnäm təmsädäm! Ʒyya, a tärham ad-tətəwəselmäɣam i-ad-təfələm daw-äššäreɣa n-Mässinäɣ wa s-išwar fälla-wän dd-oḡa? Ləɣätät-ahi, mi käwän-issəlmädän s-a-wen?

⁸ Sətbətät tätubt-näwän s-timaşalen ähuuskätnen,

⁹ wär täsfälläm fäll-tənnä n-a-s əzzurəyät n-Ibrahim a tämoosäm ed afäl täqqäl s-isälan n-əzzurəyät ɣas, Mässinäɣ, äddoobät ad-isəmməskəl tihun-ti-däy hannäyäm, ixlək-dd däɣ-snät əzzurəyät n-Ibrahim.

¹⁰ Äjät ənniyät fäl-a-s emm n-tutäla äru d-insa fäll-ikewän n-ihəşkan, e d t-illäm ahəşk wärän itirəw aratan iha älfäyda, ad-hin-ättänkäd, itwəjār-in däɣ-efew.

¹¹ Näkk, aman a däɣ-käwän-salmaɣäɣ i-ad-umas a-wen ašämol n-tätubt-näwän mäšan, ilkam-ahi ähaləs hi-ijan mijraw wa-däy s-wär-änhäjjäy wäla-däy d-ad-əḡəsäɣ issal n-tifädelen-net, ənta, Unfas Šäddijän d-efew a däɣ-käwän-mad-isəlmäɣ,

¹² ittaf tesäyt-net ta s-mad-hin-izuzzär allon-net, isədəw əttäɣam wa oläɣän däɣ-ejänd-net, irməs ahoşär wa wär-ih' älfäyda, ijär-t-in däɣ-efew ähijäljälän härkuk.»

*Atwəsəlməy n-Ŷisa däɣ-aman
(Marqəs 1:9-11; Luqa 3:21-22)*

¹³ Däɣ-a-wen-däy a dd-ifäl Ŷisa teje ta n-Galila, ikkä-dd Exya i-ad-t-isəlmäɣ däɣ-ejänš wa n-Ŷurdəni

† **3:3 3:3** A-wa ännäbi dd-äzzarän i-Ŷisa, äloläy däɣ-isälan-net əssayät timad n-awätay dat-tiwit-net.

¹⁴ māšan, unjāy Exya s-a-wen, ānn-ak, inn'-as: «Nākk a āmiḡatārān s-ad-hi-səlmāḡād dāḡ-aman, ḡas əndek e-d il' əmmək n-a-s kāyy a hi-dd-itakkān i-a-wen?»

¹⁵ Inn'-as Ƴisa: «Āmāra-dāḡ, əqbəl s-a-wen ed əmmək-wen-dāḡ a-s mad-nāmašāl a-wa oḡādān, irha Māssināḡ.» Ij'-as Ƴisa mājrād-wen-dāḡ ḡas, issəlmāḡ-t Exya.

¹⁶ Ātwāsālmāḡ Ƴisa, diha-dāḡ dd-izjār aman, ad-dd-āmerān išənnawān dāḡ-təssəba-net, inhāy Unfas Šāddijān n-Māssināḡ har fälla-s dd-āzzubbāt dāḡ-ānnuḡ n-tedābert mällāt.

¹⁷ Dāḡ-tamāzāyyat-ten-dāḡ ad-dd-ijmāḡ emāsli išənnawān, innān: «A-wa Rure-ḡ wa əkneey tārha, ənta a dāḡ-āsriwān iman-in.»

4

Āžžurrāb Iblis Ƴisa

(Marḡəs 1:12-13; Luḡa 4:1-13)

¹ Oḡād Unfas Šāddijān Ƴisa ḡarāt-a-wen s-tenere i-ad-t-ižžurrəbət Iblis.

² Ija dihen əkkozāt timərwen n-ehād d-ašāl, āzum, wār-ikša, wār-iswa. Šāmad tokay tāqqān-ten-dāḡ, ad-ālluz.

³ Ālwāqq-wen-dāḡ ad-t-ohāz Iblis-i n-ālmuzārrib, inn'-as:

«Šāmad kāyy a-s Rure-s n-Māssināḡ, ānn i-tihun-ti-dāḡ ad-umasnāt tijəlwen!»

⁴ Inn'-as Ƴisa: «Iktab dāḡ-mājrād n-Māssināḡ a-s:

«Tāmudre n-āgg-adəm, wār təmdā fāl tetāte ḡas, iddāret daḡ s-e d t-illām mājrād dd-izjarān emm n-Māssināḡ.» »

⁵ Iwwāy-t Iblis ḡarāt-a-wen s-ayrəm wa šāddijān n-Yārussālam, ij'-e fäll-afälla n-ehān n-āmudd wa māqqārān, inn'-as:

⁶ «Šāmad kāyy a-s Rure-s n-Māssināḡ, āyy iman-nāk s-ākall ed iktab dāḡ-mājrād n-Māssināḡ a-s:

«Ad-sār-k dd-amār Māssināḡ ānjālosān-net əkbəlān-kāy dāḡ-ifassān-nāsān i-ad-wār hak-rəssəl wāla-dāḡ tāhunt tiyyāt ḡas.» »

⁷ Inn'-as Ƴisa: «Iktab daḡ dāḡ-mājrād n-Māssināḡ a-s:

«Wār-e tarəməd Emāli-nāk, Māssināḡ.» »

⁸ Iwwāy-t daḡ Iblis s-aḡaḡ iyyān iknan aḡkul, issəkn'-e əddəwəlān n-āddunya iket-net d-ālxurmāt-nāsān, inn'-as āmāra:

⁹ «Hakkāḡ-kāy a-wa-dāḡ iket-net, afāl dat-i tār-kāḡād, tāḡbādād-ahi.»

¹⁰ Inn'-as Ƴisa: «Iblis, ajəj-ahi; iktab dāḡ-mājrād n-Māssināḡ a-s:

«Āḡbəd Emāli-nāk Māssināḡ, ənta ḡas a fälla-k ilan ālxidmāt.» »

¹¹ Oyy'-e Iblis ḡarāt-a-wen, osān-t-dd ānjālosān āssaḡāt-wen-dāḡ, āxdāmān-as.

Sānto n-āmašāl n-Ƴisa dāḡ-tayrəmt ta n-Qāfārnaxum

(Marḡəs 1:14-15; Luḡa 4:14-15)

¹² Islā Ƴisa atārməs n-Exya wa n-Enəsselmāḡ ḡas, ikkā teje ta n-Galila.

¹³ Izjār tayrəmt ta n-Nāširāt, iglā izzāḡ ta n-Qāfārnaxum, a-wen tayrəmt hat asālim n-əjānš wa n-Galila dāḡ-attayān n-teje ta n-Ḳabilun d-ta n-Naftali;

- 14 ämoos a-wen a ässiitbätän mäjräd wa ija ännäbi Saya† a-s innä:
 15 «Ya käl-Zabilun, ya käl-Naftali!
 Kāwāneḍ-i hānen asālim d-ejānš wa n-Galila,
 Kāwāneḍ-i hin-əllanen i-ejānš wa n-Ŷurdəni, säjdät!
 Kāwāneḍ-i n-kāl-teje ta n-Galila əzzāḡān inəzzulam,† säjdät!
 16 Tamətte ta häť tihay, ämlāwlāw-dd fälla-s ännur mäqqārān,
 äddinät day wi s-kāla əzzāḡān tihay ti hānen tamättant,
 ašāl-i, äzzubbät-dd fälla-sān ännur.»
 17 Ŷur-dihen-dāḡ ad-issənta Ŷisa ämašal-net, ixatṭāb, ijanna i-äddinät:
 «Utabät fäl-a-s Təmmənəya n-Mässināḡ, tohāz-dd.»

Inəṭṭulab n-Ŷisa wi äzzarnen
(Marqəs 1:16-20; Luqa 5:1-11)

- 18 Irjaš Ŷisa ašāl iyyān dāḡ-asālim n-ejānš wa n-Galila a-s inhäy əssin ayəťmatān: Simyon wa s-itawānna Bəťrus d-ānḡa-s Idris, təjjarān tātart-nāsān dāḡ-aman ed iməhhuyya n-imānan a ämoosān,
 19 inn'-asān: «Ēlkəmät-ahi, ad-kāwān-ājāḡ meddən sār-i dd-sadawnen äddinät i-ad-tān-äyləsāḡ.»
 20 Oyyān titarren-nāsān älwāqq-wen-dāḡ, əlkāmān-as.
 21 Illa-hin i-dihen, olās day Ŷisa ahānay n-əssin ayəťmatān iyyād: Yaquḡ d-ānḡa-s Exya, han turāť n-aman əntāneḍ d-abba-nāsān Zābdi, samākrasān titarren-nāsān; iḡr'-en-dd s-iman-net əntāneḍ-dāḡ.
 22 Oyyān abba-nāsān hakd turāť n-aman dihen-dāḡ, əlkāmān-as älwāqq-wen-dāḡ.

Äzozāy Ŷisa imarhinān dāḡ-teje ta n-Galila
(Luqa 6:17-19)

- 23 Älliil Ŷisa teje ta n-Galila iket-net, isaḡra äddinät dāḡ-ihānan n-äddin wi n-kāl-Älyāhud, ixatṭāb isālan n-Älənžil n-Təmmənəya n-Mässināḡ, izizuy äddinät dāḡ-turhənnawen-nāsān d-älyibān-nāsān.
 24 Intāj isəm-net dāḡ-äkall iket-net har äwwāḍ Surya. Tamawayān-dd sār-s imarhinān d-inayyabān d-iməlsān d-wi təjräw tašākärkärät d-inəbdan, izizuy-tān iket-dāḡ-nāsān.
 25 Dāḡ-asikəl-net, təlkam-as tamətte täjjeet han äddinät dd-falnen teje ta n-Galila d-tidbi ti n-mārawät; iyyāḍ, Yārussālam d-Älyāhudəyät d-illa-hin i-Ŷurdəni sihen ad-dd-falān.

5

Älxuṭbät wa ija Ŷisa fäll-afälla n-taḍayť

- 1 Inhäy Ŷisa əjut n-tamətte ta has-təlkämät ḡas, iwwān taḍayť tiyyät, äqqima, əkkān-t-dd inəṭṭulab-net, äqqimān edes-has;
 2 idkāl mäjräd, ad-tān-isayra, ijann'-asān:

Tisundad
(Luqa 6:20-23)

- 3 «Təndəḍ i-wi äzoznen iman-nāsān dat-Mässināḡ ed Təmmənəya n-Mässināḡ ti-nāsān.
 4 Təndəḍ i-wi äsninnen dāḡ-iman-nāsān

† 4:14 4:14 A-wa ännäbi dd-äzzarān i-Ŷisa, älolāy dāḡ-isālan-net əssayät timaḍ n-awätay dat-tiwit-net. † 4:15 4:15 — Ŷur-kāl-Älyāhud, ere wārān ämoos ägg-Älyāhud s-alāšāl meḡ ere wārān ilkem i-äddin-nāsān, iket-net, änāzzalim a ämoos. A-wen-dāḡ a fäl tiwsaten ti iyyāḍnen iket-nāsān, ti n-inəzzulam. — Ašāl-i-dāḡ, änāzzalim, äkafār (ere wārān issen s-Mässināḡ).

ed ad-ismaḍän ulhawän-näsän.

⁵ Təndəḍ i-wi äzednen ha tazidert

ed ad-əkusən äkall.

⁶ Təndəḍ i-wi inaqq laḗ d-fad n-asəḗbat n-iqqud

ed ad-äyyäwänän dāḗ-a-wa s-tammāḗän.

⁷ Təndəḍ i-wi s-ha tāhanint ulhawän-näsän

ed ad-hasän-aḍən Mässināḗ tāhanint.

⁸ Təndəḍ i-wi s-šäddijän ulhawän-näsän

ed ad-ənhəyän Mässināḗ.

⁹ Təndəḍ i-wi n-käl-älḗafyät

ed ad-tän-iwār isəm: dāgg-Mässināḗ.

¹⁰ Təndəḍ i-wi tamäḍraynen dāḗ-təssəba n-iqqud-näsän

dāḗ-erhet n-Mässināḗ

ed Təmmənəya n-Mässināḗ, ti-näsän.

¹¹ Təndəḍ-awän e-d käwän-gaggärän äddinät,

tiḗəzzəbun-käwän,

jannen fälla-wän s-bahu

e d t-illäm a läbasän dāḗ-äddimmät-in.

¹² Däwätät, talwəm dāḗ-iman-näwän ed ad-ijat

marušät-näwän dāḗ-älžännät,

älḗizabät-wen-dāḗ käwän-säknen äddinät ašäl-i-dāḗ,

a əssəknän i-ännäbitän wi hawän-dd-äzzarnen.»

Imumənän, tesəmt d-ännur a ämoosän i-äddunya

(Marqəs 9:50; Luqa 14:34-35)

¹³ «Käwäneḍ a-s tesəmt n-äddunya māšan, tesəmt, afäl tät-təjmäd temḍe-net, ma s-tät-e-isəsməm äwadəm? Ad-äbas t-illa a tənfa ar ad-hin-täḍf, əfkəlfəkəlän-tät äddinät.

¹⁴ Käwäneḍ a-s ännur n-äddunya. Aḗrəm ya iwarän afälla n-aḍay wär mad-iffär;

¹⁵ äddinät, wär särmisän tefätelt təzzar, əjən-tät daw-äkoss, änn-ak, əsadəf əsikakän a fäll-tät-e-siləyän i-ad-äsimaläwläw ännur-net ehän d-a-wa t-ihän iket-net.

¹⁶ A-wen-dāḗ a fäl, imləwləwet ännur-näwän käwäneḍ-dāḗ, s-əmmək-en-dāḗ, dat-äddinät i-ad-ənhəyän imärkedän-näwän, səmḗärän Abba-näwän-i ihän isənnawän.»

Alämär wa äynayän d-wa ärəwän

¹⁷ Inn'-asän ḗisa daḗ: «Wär teḗalät näkk, oseḗ-dd i-ad-hin-əkkəsäḗ a-wa innä alämär wa n-ännäbi Mosa d-a-wa ənnän ännäbitän wi iyyäḍnen, asəḗbat-net a-s dd-oseḗ wädden anäxas-net.

¹⁸ Äsidätteḗ-awän a-s ad-iba isənnawän d-äkall, wär-äba wäla-dāḗ tahnəqqet wäla tätbäqqet tiyyät ḗas dāḗ-alämär n-Mässināḗ a ikkäs wär-itbet a-wa dāḗ-s ätwännän iket-net.

¹⁹ A-wen-dāḗ a fäl ere änmäšräyän i-alämär wa dāḗ-sän ojarän təmməḍrit, meḗ ittär ad-isənnəməšrəy äwadəm iyyän s-a-wen-dāḗ, äwadəm-en, ənta a madän-umas wa ojarän iba n-təfärre dāḗ-Təmmənəya n-Mässināḗ māšan, ere itamašälän a-wa innä alämär, isalmaq äddinät a-wa inna i-ad-t-ämašälän əntäneḍ-dāḗ, äwadəm-en, ad-umas ämizär dāḗ-Təmmənəya n-Mässināḗ.

²⁰ Əkkasäḗ-käwän dāḗ-tayḍärt n-a-s afäl wär-ojer iqqud-näwän wa n-älḗulam n-Äḗḗäwrät d-käl-faris, xəram-awän uješ n-Təmmənəya n-Mässināḗ.»

*Adkär, iji n-iman, kəssən d-tenäšše
(Luqa 12:57-59)*

²¹ «Wädden, təslam a-s imḡarän-näwän wi n-ibda, ätwänn'-asän, inna Mässinäḡ: «Wär jed iman ed ere ijän iman däḡ, iwär-t uḡlem dat-Mässinäḡ»,

²² mäšan näkk, ənneḡ-awän a-s: ere ijjäš adkär fäll-əḡḡa-s däḡ, iwar-t uḡlem, ere innän i-əḡḡa-s: «Amäros», äniihäjjä s-ad-ämawäy s-äššäreḡa wa mäqqārän s-itawänna Sinhidrin† i-ad-itwəšräḡ; ere daḡ innän i-əḡḡa-s: «Təkšäfäd», äniihäjjä d-ad-t-äkš efew wa n-žohännäma.

²³ Afäl təkkeḡ ehän n-ämudd wa mäqqārän, täwwayäd takute-näk, afäl älwäqq wa d-sänsed takute-näk fäll-tasəskärt ta n-tikutawen har dd-təkkeḡ a-s ikka härät jere-k d-əḡḡa-k,

²⁴ wär ketäd, äyy'-et dədi-däḡ, əqqəl əḡḡa-k har hak-änš təzzar, təjəd takute-näk i-Mässinäḡ.

²⁵ Kunta irwas-käy äwadəm, išk'-ak s-əlxəkum, uf'-ak ad-där-s tənəmknäd šik iket-di d-hin-tiwəḡäm əlxəkum ed əlxəkum, afäl t-in-täwwäḡäm, ad-käy-äj ere wa käy-äsiwārän uḡlem däḡ-ifassän n-əḡḡ-äššäreḡa, äj'-ik äḡḡ-äššäreḡa däḡ-ifassän n-älgomi, äj'-ik älgomi däḡ-takärmüt.

²⁶ Äsidätteḡ-ak a-s edäḡḡ-en, afäl t-təjjäšäd, wär t-dd-mad-təzjäräd a təkkeḡ wär dd-təssəmdäd timḡal n-har tämma ta käy-irwäs.»

Isälan n-əzzəna

²⁷ «Wädden, təslam a-s ätiwänna: «Wär jed əzzəna»,

²⁸ näkk ənneḡ-awän a-s ere ijän däḡ-tamäḡt wär-ädobän akäyad n-derhan, isälan əmdän, izn'-et däḡ-uh-net.

²⁹ Käyy, kunta tiḡḡ-näk ta n-aḡil a käy-isifun abäkkäḡ, kukkərət-tät-dd, təjrəd-tät-in fälla-k härwa wär tämešäläd abäkkäḡ-wen-däḡ, ed uf'-ak, iji n-tiḡḡ təjjəšäd älzännät, uhən tətwejäräd-in däḡ-temse təmda taḡəssa-näk.

³⁰ Kunta daḡ äfuss-näk wa n-aḡil a käy-isifun abäkkäḡ, ənkəḡ-t, təjrəd-t-in fälla-k härwa wär tämešäläd abäkkäḡ-wen-däḡ, ed uf'-ak, iji n-äfuss təjjəšäd älzännät, uhən təjjäšäd temse təmda taḡəssa-näk.»

Isälan n-aməzzi

(Mätti 19:9; Marḡəs 10:11-12; Luqa 16:18)

³¹ «Təssanäm a-s ätwännä: «Ere irhän azəmməzzi n-hänne-s, äkf'-et-tät təkärḡe n-aməzzi təzzar»

³² mäšan, näkk, ənneḡ-awän: ere äzmäzzäyän hänne-s s-wädden arāmas a tät-ija tikər-as, ij'-et temäznit; ere daḡ wa ädobänän tamäḡt dd-tämmiizzäyät, izna.»

Isälan n-tihuḡawen s-bahu

³³ Darät-a-wen-däḡ, inn'-asän: «Təslam a-s ätiwänna i-imḡarän-näwän wi n-ibda: «Wär mad-tärzəd tafləst, a-wa häḡäd s-Mässinäḡ s-ad-t-täjəd, äj'-e»,

³⁴ mäšan, näkk, ənneḡ-awän: wär heḡäm fäw. Wär heḡäm s-išənnawän ed əntänəḡ a-s tasäqqaymut n-təmmənukəla n-Mässinäḡ,

³⁵ wäla s-äkall ed ənta a-s isəkkukal n-iḡarän-net wäla s-Yärussälam ed ənta a-s aḡrəm wa n-Mässinäḡ-i n-ämänokal mäqqārän,

³⁶ wäla fäll-əḡäf-näk ed wär täddobed ad-səmlələd wäla ad-səkwələd wäla-däḡ iyyän ḡas däḡ-amḡadän-näk.

† 5:22 5:22 A-wa älzəməyät n-inušämän d-imizärän n-käl-Işrayil wa itirən äššäreḡa, əntänəḡ a-s älgallitän, osayän daḡ tamətte d-əlxəkum d-äddin.

³⁷ E-d käwän-issəstän äwadəm d-härät, ännät-as: «Ëyya» i-tidət, tənnəm: «Äbo» i-bahu, a tässewäḏäm fäll-a-wen-däx, Iblis a dd-ifal.»

Ukəs n-eyə d-älxär
(Luqa 6:29-30)

³⁸ Inn'-asän daḡ: «Təslam a-s ätiwänna: «Tiṭṭ a təzzälät tiṭṭ, esen a itəzzälän esen»,

³⁹ mäšan, näkk, ənney-awän: əlxənät i-ere hawän-irhan a läbasän; afäl hak-istäx äwadəm fäll-täjomäst-näk ta n-aḡil, səgdəl-as daḡ ta iyyädät.

⁴⁰ Afäl hak-iška äwadəm s-əlxəkum däx-təssəba n-tanäkəbbat-näk, äyy-as-in daḡ anäkəbba-näk i-ad-wär-ija a-wen,

⁴¹ afäl käy-äshäššäl ägg-əlxəkum aḏkul n-äzuk har əḏḏəkuḏ n-kelumetär, awəy-as-t har əssin kelumetärän;

⁴² ere käy-idälän, təkfəd-t, wär tənneḏäd fäll-ere däx-k ittarän ämarwas.»

Ärhät äddinät
(Luqa 6:27-28, 32-36)

⁴³ «Təslam a-s ätiwänna: «Ärh änhäraj-näk, təknəsäd ašanjo-näk»

⁴⁴ mäšan, näkk, ənney-awän: ärhät išənja-näwän. [Äjät älhimmät i-wi hawän-tajjänen terk tittar, äjät a olayän i-wi där-wän okäḏnen], ädälät Mässinäx i-wi käwän-saməḏraynen, tiḡəzzəbun-käwän.

⁴⁵ Dihen, ad-itbət a-s aratän n-Abba-näwän-i ihän išənnawän a tämoosäm; ənta, isajmaḏ-dd täfukt-net fäll-äddinät wi läbasnen hakd wi oläḡnen, isasaway-dd akäsa-net fäll-iməḡdalän hakd inämäšrayän.

⁴⁶ Afäl wär tärhem ar imärhan-näwän, ma käwän-ibḏan d-äddinät wi iyyäḏnen, əndek marušät-näwän? Inarmasän n-tiwse-däx, a-wen, tajjän-t.

⁴⁷ Afäl wär təjjəm isofan ar i-ayətma-wän, ma käwän-iḡlayän d-äddinät wi iyyäḏnen? Wädden inəzzulam†-däx, a-wen, tajjän-t.

⁴⁸ Umasät äddinät əmdanen, wär iwer älxib ed Abba-näwän-i ihän išənnawän, imda, wär t-illa älxib t-iwarän.»

6

Isälan n-tikutawen

¹ «Äjät ənniyät, wär-itumaset iqqud-näwän i-Mässinäx a jam i-ad-käwän-in-əjrähän äddinät ed afäl a-wen-däx a tajjä, wär mad-təkrəšäm marušät ḡur-Mässinäx-i n-Abba-näwän ihän išənnawän.

² E-d təkkatäd, wär wetäd täsinsäḡt data-k šund a-wa təjjän älmunafeyän däx-ihənan n-äddin wi n-käl-Älyähud d-tišarriten i-ad-tän-aməlän äddinät; äsidätteḡ-awän a-s marušät-näsän, imdä-dd ḡur-təmmal-ten-däx tän-tajjän äddinät.

³ A änihäjjän a-s, käyy, e-d təkkatäd, äj'-e däx-ufär, wär-ilämmädet wäla-däx äfuss-näk wa n-täšälje a-wa ikfa wa n-aḡil,

⁴ dihen, ad-tumas takute-näk a ištärän, äkf'-ik Mässinäx-i n-Abba-näk ihannäyän wäla a-wa ištärän, timzal n-emärked-näk.»

Tamädilt n-Mässinäx
(Luqa 11:2-4)

† 5:47 5:47 — ḡur-käl-Älyähud, ere wärän ämoos ägg-Älyähud s-aläsäl meḡ ere wärän ilkem i-äddin-näsän, iket-net, änəzzalim a ämoos. A-wen-däx a fäl tiwsaten ti iyyäḏnen iket-näsän, ti n-inəzzulam. — Ašäl-i-däx, änəzzalim, äkafär (ere wärän issen s-Mässinäx).

⁵ «E-d tæddaläm Mässinäx, wär tolehäm d-älmunafexän-i s-e-d tumadän, tøjraz-asän tebädde dāx-ihānan n-äddin wi n-käl-Älyähud d-ammas n-tišarriten i-ad-tän-in-öjrahän äddinät. Äsidättey-awän a-s marušät-näsän, imdä-dd xur-tømmal-ten-dāx tän-täjjän äddinät.

⁶ Käyy, e-d tæddaläd Mässinäx, öjjöš ider n-ehän-näk, tøjfeläd-t-dd fäll-iman-näk, tædlöd Abba-näk-i ättunkälän ed Abba-näk-i ihannäyän wäla a-wa ijän dāx-atunkөл, ad-hak-äj erhet-näk.

⁷ E-d tæddaläd Mässinäx, wär täsjätäd mäjräd wärän infa härät šund a-wa täjjän inəzzulam† -i xur-ija a-s asjöt n-mäjräd-en-dāx a dd-madän-isəmmənənnäq äfuss n-Mässinäx, äkf'-en a-wa dāx-s öttärän.

⁸ Wär där-sän tolehäm, a-wa s-tämiḡatäräm, issan-t Abba-näwän iket-net härwa wär dāx-s t-tötteräm.»

Älmital n-tamädilt n-Mässinäx

⁹ «E-d tæddaläm Mässinäx, ännät:

<Abba-nänäx-i ihän išənnawän,

¹⁰ səmḡärnet äddinät isəm-näk wa šäddijän.

Taset-dd Təmmənəya-näk,

äjät erhet-näk fäll-ärori n-äkall,

s-əmmək wa s-ija dāx-išənnawän.

¹¹ Äkf'-anäx isudar wi s-nämiḡatär ašäl-i-dāx,

¹² äns-anäx uḡlemän-nänäx

s-əmmək wa s-nənašš i-inaḡlamän-nänäx.

¹³ Wär toyyed Iblis äžžurräbät-anäx

isiḡəw-anäx dāx-abäkkäq,

agəz-anäx dāx-s,

[ed Təmmənəya, tärna hagd älxurmät, i-näk härkuk. Amin!]>

¹⁴ Afäl naššäm i-äddinät wi käwän-ḡallämnen, ad-hawän-in-änsḡ day Abba-näwän-i ihän išənnawän,

¹⁵ mäšan afäl wär nəššəm i-äddinät wi käwän-ḡallämnen, wär hawän-in-e-änsḡ day Mässinäx-i n-Abba-näwän ibäkkäḡän-näwän.»

Isälan n-äzum

¹⁶ «Ašäl wa d-tuzamäm i-ad-täxbədäm Mässinäx, wär täsbänzäzäm šund a-wa täjjän älmunafexän-i sawärnen tekenḡart idmawän-näsän i-ad-səlmədän äddinät a-s äzumän; äsidättey-awän a-s marušät-näsän, imdä-dd xur-tømmal-ten-dāx tän-täjjän äddinät,

¹⁷ änn-ak, käyy, e-d täzumäd, ördəb-in, sänḡəläd aḡutän

¹⁸ i-ad-wär-iləmməd äwadəm a-s täzumäd i-ad-täxbədäd Mässinäx ed igdäh-ak a-wa dāx s-Abba-näk-i ättunkälän, ihannäy a-wa ijän dāx-atunkөл, ad-hak-äj erhet-näk.»

Isälan n-ärrəzäx wa n-tidət

(Luḡa 12:33-34)

¹⁹ «Wär tøjmeräm ärrəzäx i-äddunya ed täddoobät tukmadt d-tenekt ad-t-täksḡ, äddooben day imäkrädän ad-t-akrən.

²⁰ Änn-ak, a-wa jammäräd, öjmär-t i-älžännät-i wär ha tukmadt wäla tenekt wäla imäkrädän t-äržänen wäla-i t-okärnen.

† 6:7 6:7 — Xur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änäzzalim a ämoos. A-wen-dāx a fäl tiwsaten ti iyyäḡnen iket-näsnät, ti n-inəzzulam. — Ašäl-i-dāx, änäzzalim, äkafär (ere wärän issen s-Mässinäx).

21 Ädduuttät a-s inözjam n-ulh n-äwadəm, wär töffilän edägg wa dāx-itwār tōla-net.»

Tihay d-ännur
(Luqa 11:34-36)

22 «Titt n-ägg-adəm a-s tefätelt n-tayəssa-net, afäl tolay titt-näk, ad-hannäy tayəssa-näk iket-net,

23 mäšan afäl ijraw härät tittawen-näk, adiš tayəssa-näk daḡ, wär hönnöy härät. Yas kunta käyy ännur wa hak-ämoosnät tittawen-näk, iha tihay, adiš tidət-dāx a-s, ad-kāy-ärməsnät tihay ässuksäḍnen.»

Iba n-inözjam
(Luqa 16:13; 12:22-31)

24 «Wär t-illa äwadəm äddooben ad-ixdam i-əssin imālan: iyyät-i-dāx, ad-akəḍ d-iyyän, ärh wa iyyädän meḡ daḡ ikf'-iman-net i-iyyän, iksən wa iyyädän. Wär-äddoobät äwadəm ad-ixdam i-Mässināḡ, ošal daḡ ḍarät terše n-azrəf.

25 A-wen-dāx a-fäl hawän-janneḡ: wär käwän-järräwnet inözjam n-a-wa mad-təkšəm d-a-wa mad-təswəm d-a-wa mad-təlsəm; iman-nāwän, ajän wädden ojarän tetäte? Ässexät n-tayəssa-nāwän daḡ, wädden ojar isəlsa?

26 Səjrähät ḡas igḍad-wi əlläynen dāx-älhāwa, wär tədumun, wär təjlubun, wär təggärän dāx-ijändän mäšan, ässodär-tän Abba-nāwän-i ihän isənnawän. Ajän wädden tufäm-tän s-a äjjeen!

27 Əndek ḡas dāx-wän wa äddooben s-inözjam-net ad-isiwəḍ tayrəst-net wāla s-a ogdähän d-emm n-asənnan?

28 Adiš, mafäl käwän-əjrawän inözjam n-a-wa mad-təlsəm? Säḡret-kāwän tāboyt n-išəkraš härät, ənhəywät-tät-ak, daggäl, wär zətt, wär zəmməy

29 mäšan äsidätteḡ-awän a-s wāla ämänokal Suläyman hakd terše-net iket-net, wär kāla ojar tāboyt-i-dāx asəssihäḡ n-ašäl.

30 Yas kunta Mässināḡ isalsa teyəšše n-išəkraš s-ašäl-i-dāx təbdaj, ašəkka ad-hin-tiyar, täry s-əmmək-wen-dāx, äb' ättäma n-ad-wär hawän-izəzmäy käwäned? Təmmətkit ija immun-nāwän!

31 Wär käwän-ḡälläbnet inözjam har dd-təqqəlām jannem: <Ma mad-näkš? Ma mad-nəsəw? Ma mad-näls?>

32 Inözjam šund-win-dāx, inəzzulam a dāx-sän ošalnen, ḡälläbän-tän. Käwäned, Abba-nāwän-i ihän isənnawän, wär t-illa a-s tämiḡatäräm s-wädden, issan-t.

33 Ədgəzät s-tizarät dāx-umäḡ n-Təmmənəya n-Mässināḡ d-iqqud dāx-isālan-net, dihen, ad-hawän-in-isiwəḍ Mässināḡ a-wa iyyädän iket-net.

34 Wär käwän-ḡälläbnet inözjam n-ašəkka ed hak ašäl d-a-wa äwwäy dāx-inözjam, hak ašäl-dāx, təgdäh-as tämäḡatert-net.»

7

Wär tozəmäm äwadəm
(Luqa 6:37-38, 41-42)

1 «Wär tozəmäm äwadəm i-ad-wär käwän-itizəm äwadəm

2 fäl-a-s, a-wa s-tozämäm äddinät wi iyyädnen a-s käwän-e-azəmän käwäned-dāx; a-wa s-kätäm äddinät wi iyyädnen a-s käwän-e-əkətən əntäned-dāx.

3 Mafäl hannäyäd tezəwt ta hät titt n-änḡa-k, a-s ija a-wen, wär hönnöyäd afäḡot wa ihän titt ta-näk?

4 Meḡ daḡ, əndek əmmək wa s-mad-tənnəd i-əŋŋa-k: <Äyy-ahi ad-əkkəsäḡ tezewt däḡ-tiṭṭ-näk>, a-s ija a-wen, käyy iman-näk, iha afäḡot tiṭṭ ta-näk.

5 Älmunafey yaden! Əkkəs-in afäḡot wa ihän tiṭṭ-näk təzzar, dihen, ad-tudabed ahänay, tudabed ukəs n-tezewt ta häť tiṭṭ n-əŋŋa-k.

6 Əllan-t äddinät-i s-däḡ-a-wa täjjän, wär-əzleyän d-iyyädan, wär tän-təkfem a šäddijän ed häłän ad-käwän-dd-əqqəlän, aḡwən fälla-wän; iyyäḡ, wär-əzleyän d-əlxənžärän, wär daw-sän-in-jeräm tisḡalen-näwän ed ad-tänät-əfkəlfəkəlän.»

Ädölät Mässinäḡ
(Luḡa 11:9-13; 6:31)

7 «Ädölät Mässinäḡ, ad-käwän-äkf; əmmäḡät, ad-təjrəwäm; äḡrät-t, ad-hawän-äkawän.

8 Ere idälän, ad-ikrəš, ere immäḡän ad-ijrəw; ere iḡrän Mässinäḡ däḡ-tämäḡatert t-tärmasät, ad-has-tät-ikkəs.

9 Əndek däḡ-wän wa s-e-d däḡ-s ittär rure-s tajəlla ad-t-äkf tähünt?

10 Meḡ wa s-e-d t-idäl däḡ-emän, ad-t-äkf taššält?

11 ḡas, kunta käwäned-i n-inälläbäsän, təssanäm isuf n-a-wa oläḡän i-aratän-näwän, äb' äṭṭäma n-ad-wär käwän-ikfa Abba-näwän-i ihän išənnawän a-wa ufän, afäl t-däläm däḡ-s.

12 Tajjät i-äddinät a-wa s-tärhäm ad-hawän-t-tajjän ed a-wen-däḡ a innä alämär wa n-ännäbi Mosa d-ännäbitän wi iyyäḡnen.»

Zäbo wa härəwän d-wa kärruzän
(Luḡa 13:24)

13 «Əjjəšät tämudre ta n-tidət s-emm wa kärruzän fäl-a-s ill'-ee zäbo härəwän, olwan, ənta a tilal təššəm n-äddinät mäšan, ajilal-net, əlhəllak,

14 a-s ija a-wen, emm wa kärruzän d-zäbo wa sädidän, wär-əjjətän äddinät wi sär-s tajjäsnen mäšan, tämudre ta n-tidət a-s itiḡəd.»

Hak äwadəm d-imojjan-net
(Luḡa 6:43-44)

15 «Äḡəzät iman-näwän däḡ-ännäbitän wi n-bahu-i s-a-s käwän-dd-tisən, jan iman-näsän ikərwatän wär ih' äššar, a-s ija a-wen, tiḡəs ənsaynen a ämoosän.

16 Wär hawän-təmtəllənet, ad-tän-təzzəyäm s-timašalen-näsän. Ajän ewärwär, itiirəw-dd läḡnəb? Meḡ ajän ajärof itiirəw-dd tehäyne?

17 Ahəšk oläḡän, ad-dd-arəw aratän oläḡnen mäšan erk ahəšk, wär dd-e-arəw a säl aratän läbasnen.

18 Ahəšk oläḡän, wär-itirəw aratän läbasnen, ahəšk daḡ läbasän, wär-e arəw aratän oläḡnen.

19 E d t-illäm ahəšk wärän itirəw aratän ih' älfäyda, ad-hin-ättänkäd, itwəjär-in däḡ-efew.

20 Əmmək-wen-däḡ daḡ a-s ännäbitän wi n-bahu, timašalen-näsän a-s tän-e-təzzəyäm.»

Äddinät wi ḡarränen isəm n-Emäli s-bahu
(Luḡa 13:25-27)

21 «Wädden äddinät iket-näsän wi hi-jannänen: <Emäli, Emäli>, a he-əjjəšnen Təmmənəya n-Mässinäḡ. Təmmənəya n-Mässinäḡ, wär tät-e-ijjəš ar ere wa itamašalän erhet n-Abba-nin-i ihän išənnawän.

22 Ašäl wa ilkämän, ad-dd-əggədän äddinät äjjootnen, ənnən-ahi: <Emäli, Emäli! Wädden mäjräd wa däḡ-nälöläy i-äddinät, käyy a t-ijän

däx-imawän-nänäx? Wädden nəkkäs alšinän däx-äddinät s-isəm-näx? Wädden nəja tikunen äjjootnen s-isəm-näx?»

²³ Äddinät-en, ašäl-en, ad-hasän-ännäx s-afälla: «Näkk ya wär käwän-əzzeyäx, ajəjat-ahi, inämäšrayän a tämoosäm.» »

Isälan n-ihānan wi n-əssin
(Marqəs 1:22; Luqa 6:47-49)

²⁴ «Ere islän i-mäjräd-wa-däx s-iket t-jeḡ, ad-itamašal a-wa ənnəḡ, ad-aläh d-āhaləs ijrahän härät iḡāšän äkall har iwwäḍ tähunt i-ässas, idäy fälla-s ehän-net.

²⁵ Ij' akäsa, ärtäynät timḍəl d-anji fäll-ehän-en mäšan, wär-oḍa ed iday fäll-tähunt.

²⁶ Mäšan wa islän i-mäjräd-in, äqqima wär t-ämešäl, oläh d-ere irmas iba n-tayətte idäyän ehän-net däx-tasənjit.

²⁷ Ij' akäsa, ärtäynät timḍəl d-anji fäll-ehän-en, oḍa, älhahäm-in s-iyyəät.»

²⁸ Iḍäs älxuḡbät-wen-däx ija ḡisa tamətte, əqqälän-dd äddinät ḡas oran imawän

²⁹ fäll-əjjärüzät-i-däx hasän-ija a-wa isäḡra ed isayr'-en s-älxikmät n-ere issanän a-wa iha wädden šund älyulam wi n-Äḡḡawrät.

8

U-jəri wa äzozäy ḡisa
(Marqəs 1:40-45; Luqa 5:12-16)

¹ Ätrarä-dd ḡisa taḍayt ḡas, təlkäm-as tamətte täjjeet.

² Däx-a-wen-däx ad-has-dd-ilkäḍ ähaləs ijraw jəri, irkäḡ data-s, inn'-as: «Älyalim, afäl tärhed a-wen-däx, täddoobed ad-hi-šəšdəjad.»

³ Izzäl äfuss-net, iḍäs-t, inn'-as: «Ärheex-t, išdaj.» Šäddij däx-jəri älwäqq-wen-däx.

⁴ Inn'-as ḡisa ḍarät-a-wen: «Wär jed isälan i-äwadəm wäl' iyyän n-a-s näkk a käy-äzozäyän, əgləw, səkən iman-näx i-u-tikutawen, təjəd takute ta s-inna ännäbi Mosa däx-isälan n-təšədje n-käl-jəri i-ad-umas a-wen tajuhe i-tamətte n-a-s təzzäyäd.»

Änaxdim n-käbtän wa äzozäy ḡisa
(Luqa 7:1-10)

⁵ Ijjäš ḡisa ḍarät-a-wen ayḡrəm wa n-Qäfärnaxum, ilkäḍ-as käbtän iyyän, ad-t-ilaqqäd, ijann'-as:

⁶ «Älyalim, änaxdim-in insa ḡur-ehän, təbdan-t tiḡzurt d-tisnant.»

⁷ Inn'-as ḡisa: «Ad-t-asäḡ, zuzəyäḡ-t.»

⁸ Äwwežäb-as käbtän, inn'-as: «Aha-aha älyalim! Wär-änhäjjäḡ d-ad-təkkəd ehän-in, təjjəšäd-t, änn ḡas täfert, ad-izzəy änaxdim-in

⁹ fäl-a-s näkk-i-hi, əllan-t imänokalän daw-t-əlleḡ, leḡ daḡ näkk əssärdusa daw-i t-əllanen; e-d ənneḡ i-iyyəän: «Əgləw», ad-igləw; e-d ənnəḡ i-wa iyyäḍän: «Əyyäw», ad-hi-dd-ass. Akli-nin daḡ e-d has-ənnəḡ: «Äj a-wa», ad-t-äj.»

¹⁰ Islä ḡisa i-mäjräd-wen-däx ija käbtän ḡas, ijräz-as älxal-net; innäḍ-dd ḍarät-a-wen s-äddinät wi has-əlcamnen, inn'-asän: «Äsidätteḡ-awän a-s, wälä däx-äkall wa n-Išrayil, wär käla ənhäyäḡ ere s-ogdäh immun-net d-wa n-ähaləs-i-däḡ.

¹¹ Ässiilmädäx-käwän a-s ilkam ad-dd-asən äddinät äjjootnen, dd-falnen emäynäj d-atāram ənxəymən d-lbrahim d-Isxaqq d-Yaqub dāx-amājaru wa madän-äj dāx-Təmmənəya n-Mässināx.

¹² A-s ij'-a-wen, äddinät wi s-äniihäjja a-s əntāneḍ a ännuflāyenen dāx-Təmmənəya n-Mässināx, ad-hin-ətwəjarän dāx-tihay ti n-ajāma, ad-hallän, ziməkärkizän isenän fäl tämujriḗt.»

¹³ Innä Ḡisa ḍarät-a-wen i-käbtän: «Əgləw, ijrāw-ak Mässināx a-wa s-tomänäd.» Izzāy änaaxdim-net ässaḡät-wen-dāx.

*Äzozäy Ḡisa tadäggalt n-Bəṭrus d-imarhinän äjjootnen
(Marḡəs 1:29-34; Luḡa 4:38-39)*

¹⁴ Ifäl Ḡisa dihen, ikkā ehän wa n-Bəṭrus. A-s hin-iwwäḍ, tənša tadäggalt n-Bəṭrus, tärmās-tät tenäde.

¹⁵ İḍäs afuss-net, tärḡa fälla-s tenäde, təbdäd, täsmājarät-t.
(Marḡəs 1:32-34; Luḡa 4:40-41)

¹⁶ Toḍa täfukt ḡas, ämewāyän-dd sār-s iməlšan äjjootnen, innä täfert ḡas, əzzayän; äzozäy dāx dihen e d t-illām ere ärhinän.

¹⁷ İjā a-wen i-ad-itbət a-wa innä ännäbi Saya† a-s innä:
«İḍkäl fälla-nāx älḡibän-nänāx,
äzozäy-anāx dāx-turhənnawen-nänāx.»

*Kəssən n-iman
(Luḡa 9:57-62)*

¹⁸ İnhäy Ḡisa ayliḡəli wa t-dd-ja tamətte s-əjut ḡas, innä i-inəṭṭulab-net, ad-əjləyän ejänš s-ašrut wa iyyädän.

¹⁹ İlkäḍ-as-dd älḡalim n-Äṭṭäwrät iyyän, inn'-as: «Älḡalim, e-s təkkeḍ-dāx, əlkamāx-ak.»

²⁰ Inn'-as Ḡisa: «İbäggan lan tihaliwen, igḍaḍ lan iskak mäsän, Ägg-ägg-adəm, wār ila wāla edägg dāx-issənsä eḡäf-net.»

²¹ İggäd-dd ähaləs iyyän irhan alkum-has, inn'-as: «Älḡalim, äkf'-ahi turhajät n-ad-ägläx əḗkəx abba-nin, əqqələx-dd, əlkəmāx-ak.»

²² Inn'-as Ḡisa: «Əlkəm-ahi, təyyəd fälla-k inəmmuttan ad-əḗkən inəmmuttan-näsän.»

*İssəbdäd Ḡisa aḍu-i-dāx mäqqārən fäll-ejänš
(Marḡəs 4:35-41; Luḡa 8:22-25)*

²³ Änmäjjāš Ḡisa turäft n-aman d-inəṭṭulab-net ḍarät-a-wen,

²⁴ wār-əhojän a-s aḍu-i-dāx äššoohen-da-dāx dd-inkärän, ad-tibhilibəhılınät tinäzzämären i-turäft siha d-siha. A-s itäj a-wen-dāx, Ḡisa ənta, itṭas.

²⁵ Əssənkärän-t inəṭṭulab-net dāx-eḍəs, ənnän-as: «Älḡalim, agəḗ-anāx, nəhläk.»

²⁶ İnkär-dd, inn'-asän: «Ma käwän-ässirmāxän? Təmmətkit ija immun-nāwän!» İbdäd älwäqq-wen, äsmähäḍ fäll-aḍu d-ejänš, sämməḍ-in a-wen-dāx iket-net.

²⁷ Əqqälän-dd ḡas inəṭṭulab oran imawän, jannen: «Uwwuww! Wa äwadəm s-wāla aḍu d-ejänš, sajadän-as, ma ämoos?»

*İməlšan wi n-əssin äzozäy Ḡisa
(Marḡəs 5:1-20; Luḡa 8:26-39)*

† 8:17 8:17 A-wa ännäbi dd-äzzarän i-Ḡisa, älöläy dāx-isälan-net əssaḡät timaḍ n-awätay dat-tiwit-net.

²⁸ Äsjän Үisa d-inөтtulab-net fäll-ašrut n-ejänš wa n-teje ta n-Gadara җas, өlkäqän-as-dd өssin imөлšan өzзaynen tiҗөнneren, janen tälläbäst-ta-däҗ s-äbas t-illa ere ihälän ad-dd-äҗ tiҗten-däҗ hän.

²⁹ Enhäyän Үisa җas, äҗwätten alšinän, ad-jannen: «Ya Rure-s n-Mässinäҗ, ma däҗ-näҗ tärhed? Äjän tissust-nänäҗ a-s dd-tosed iket-di dd-tiwөd täqqän n-a-wen?»

³⁰ Dann tahrut n-өлxөнžärän däҗ-attayän n-dihen,

³¹ дәлän alšinän Үisa, өnnän-as: «Kunta takkäsäd-anäҗ däҗ-äkall, suk-anäҗ tahrut ta n-өлxөнžärän.»

³² Inn'-asän: «Äҗläт!» Эзjärän alšinän meddөн-өnnin, өjjäšän өlxөнžärän, ad-dd-titrөktөrikän, wa-däҗ n-afälla n-taḗayт, tiḗөwän däҗ-өjänš, tättän-tän aman.

³³ Ošälän imäḗanän-näsän s-ayrөm, jän isälan n-a-wa ijän d-a-wa dd-išreyän fäll-imөлšan wi n-өssin i-äddinät.

³⁴ A өndärrän, ayрөm iket-däҗ-net da-däҗ dd-izjärän s-Үisa, өnhäyän-t äddinät җas, ad-t-tөddälän däҗ-ad-ifөл äkall-näsän.

9

Äzozäy Үisa anäbdon iyyän (Marqөs 2:1-12; Luqa 5:17-26)

¹ Ijjäš Үisa ḗarät-a-wen turäft n-aman, ijläy өjänš s-tayрөmt ta-net.

² Diha-däҗ hin-өwwäḗän a-s äddinät-da-däҗ, ämisawäyän änanbdon insan fäll-asөftäҗ. Inhäy Үisa immun-näsän җas, innä i-anäbdon: «Alyaḗ-in, wär төkkesäd äтtäma, ibäkkäqän-näk, ätwänšän-ak.»

³ Diha-däҗ d-innä a-wen-däҗ, a dd-өggädän älyulam n-Äтtäwrät, ad-jannen däҗ-iman-näsän: «Wa өnta, äskafär.»

⁴ Ilmäd Үisa җur-iman-net a-wa ihän inөzjam-näsän, a-wen-däҗ a fäl hasän-inna: «Ma itajjän erk өnniyät-wa-däҗ däҗ-ulhawän-näwän?»

⁵ Ma өjärän täräҗse jer-ad-tөnnөd i-äwadөm: «Ätwänšän-ak ibäkkäqän-näk», d-ad-has-tөnnөd: «Эbdөd, өrjөš?»

⁶ Ašäl-i, ässiilmädäҗ-käwän a-s Ägg-ägg-adөm, ijraw fäll-äröri n-äkall turhajät n-tenäšše n-ibäkkäqän.» Innä Үisa ḗarät-a-wen i-anäbdon: «Эbdөd, өḗkөл asөftäҗ-näk, өqqөл ehän-näk.»

⁷ Ibdäd, iqqäl ehän-net.

⁸ Tärmäҗ tamөtte ta төnhäyät a-wa ijän, ad-tiimөлөн äddinät Mässinäҗ-i ikfän дәgg-adөm tädabit togdähät d-a-wa-däҗ.

Iyrä-dd Үisa Mätti i-ad-umas änättalib-net (Marqөs 2:13-17; Luqa 5:27-32)

⁹ Ifäl Үisa dihen ḗarät-a-wen, inhäy änarman n-tiwse s-isөm-net Mätti äqqiima däҗ-edägg n-älxidmät-net, iyr'-e, inn'-as: «Эlkөm-ahi»; ibdäd Mätti, ilkäm-as.

¹⁰ Äsmäjarät Mätti Үisa s-ehän-net ḗarät-a-wen. Itayäyma Үisa däҗ-edägg wa n-imөnsiwän a-s erk äddinät han inarman n-tiwse äjjootnen da-däҗ, osän-dd, änyäymän дәr-s өnta d-inөтtulab-net.

¹¹ Enhäyän-t härät däҗ-käl-faris төllanen dihen җas, өnnän i-inөтtulab-net: «Ma isaharän älyalim-näwän imөnsiwän d-inarman n-tiwse d-erk äddinät-wi-däҗ?»

¹² Isl'-asän Үisa җas, innä: «Äddinät äsoxätnen, wär-ämҗatärän s-läxtur; imarhinän a sär-s ämiҗatärnen.»

13 Inn'-asän daḡ: «Ma ämoos älmäḡna n-a-wa s-inna Mässinäḡ dāḡ-mäjräd-net:

<Ojār a-s ḡur-i la tāhanint idəm uhən tikutawen.>

A-wen älmäḡna-net a-s, näkk, wār dd-ämešäläḡ s-äddinät wi ordänen iman-näsän iqqud, inäsbäkkadän a-s dd-ämešäläḡ i-ad-tän-äḡlösäḡ.»

Isälan n-äzum

(Marqəs 2:18-22; Luqa 5:33-39)

14 Osän-dd inəṭṭulab n-Exya ḡisa qarät-a-wen, ənnän-as: «Mafäl näkkäneḡ d-käl-faris nətuḡam dehiyyän, a-s ija a-wen, inəṭṭulab wi-näk, wār tuzamän?»

15 Issäḡläy-tän ḡisa tangalt dāḡ-hasän-inna: «Ajän käl-tuksest ilzam-tän äzum tän-äzizäkänžärän a ikka ämazlay ill'-e jere-sän? Elkamän išilan-wi dāḡ-tän-mad-ifəl ämazlay, dihen, ad-əjrəwän s-äzum.

16 Wār t-illa ere itəgğatän tikəst i-temälsit wäššärät s-taswəḡt n-tabdoḡt täynayät; afäl ija a-wen, ad-dd-tärkəb taswəḡt ta täynayät temälsit, täj amənd ojārän wənnin.

17 Äddinät, wār təjjən aman n-läḡnəb äynaynen, äxxiimmärnen dāḡ-ijdad; ere ijän a-wen har käfän aman-ənnin dāḡ-ijdad, ad-has-səbbuqqen ijdad-net, ifut dāḡ-läḡnəb hakd-dāḡ dāḡ-ijdad. Aman n-läḡnəb äynaynen, äxxiimmärnen, iddidän äynaynen a dāḡ-tän-itajj äwadəm, dihen, wār-e ifut mässi-sän dāḡ-wi wäla wi.»

Isälan n-elle-s n-Žayrus d-taməḡt ta dd-izajjār ašni

(Marqəs 5:21-43; Luqa 8:40-56)

18 Ämmiijräd ḡisa i-tamətte dāḡ-isälan-win-dāḡ a-s a əndərrän-dāḡ, iyyän dāḡ-imännähädän n-tayrəmt-en-dāḡ da-dāḡ t-dd-osän, irkäḡ data-s, inn'-as: «Talyaḡt-in, iket tät-äba mäšan nidawet sär-s, sənsəd fälla-s äfuss-näk, ad-dd-təddär.»

19 Ibdäd ḡisa, äddew dār-s ənta d-inəṭṭulab-net.

20 Iḡla har šik-dāḡ taməḡt tiyyät lat märaw iwətyan d-əssin ijamməḡ-tät ašni da-dāḡ dd-mälät qarə-s, ḡäs afär n-eräswäy-net

21 ed a-s täjj a-wen-dāḡ, janna dāḡ-iman-net: «Afäl ḡäsäḡ wäla-dāḡ eräswäy-net, ad-əzzəyāḡ.»

22 Innəḡ-dd sär-s ḡisa, inhäy-tät, inn'-as: «Talyaḡt-in, wār təkkesäd äṭṭäma, äzozäy-käm immun-näm.» Təzzäy taməḡt ässaḡät-wen-dāḡ.

23 A-s hin-iwwəḡ ḡisa d-inəṭṭulab-net ehän n-emännähäd, inhäy iməwatän n-tiḡnab ti n-uḡəf n-iba d-äddinät wi hasän-hallänen, äsikäläl a-wen-dāḡ iket-net, ja tākat dāḡ-išənnawän.

24 Omär s-ad-əzjārän äddinät fälla-s ed inn'-asän: «Tarat, wār tät-äba, eḡəs ḡas a ja.» Jän-t tekäškäšt.

25 Təzjār fälla-s tamətte ḡas, ijjäš ehän wa dāḡ-tənsa talyaḡt, irmäs-tät-dd s-äfuss, tənkar-dd.

26 Əntäjän isälan n-a-wen-dāḡ dāḡ-teje-ten-dāḡ iket-net.

Iməddorḡal wi n-əssin äzozäy ḡisa

27 Ašäl iyyän, irjaš ḡisa a-s t-äḡrän əssin iməddorḡal, äsiḡären, jannen-as: «Ya Ägğ-Dawəd, adən-anäḡ tāhanint!»

28 Iwwəḡ-in ḡisa ehän wa ikka, əjjäšän-t-dd fälla-s iməddorḡal ənnin n-əssin ḡas, inn'-asän: «Ak tidət-dāḡ a-s təflasäm a-s äddobəḡ ad-aräḡ tiṭṭawen-nəwän?» Ənnän-as: «Äḡalim, nəflas a-wen.»

29 Idäs ḡisa tiṭṭawen-näsän, inn'-asän: «Itwəjjet-awän a-wa dār-ogdäh immun-nəwän.»

³⁰ Ämeränät tiṭṭawen-näsän mäšan, ikna asəmmähəḍ dəḡ-sän, inn'-asän: «He käwəneḍ! Wār jem isālan n-a-wa ijän dəḡ-əwadəm wäl' iyyän»,
³¹ mäšan, əzjārən ehän fälla-s ḡas, əffäyän isālan dəḡ-əkall iket-net.

Isālan n-amälšon wa äzozäy ʒisa

³² Diha-dəḡ d-əglän iməddorḡal, a-s amälšon iyyän s-ikras alšin wa t-ihän iləs-net da-dəḡ sār-s dd-əwwäyän äddinät.

³³ Ikkäs dəḡ-s ʒisa alšin wa t-ihän, ad-itamäjräd. Təḡḡäl-dd tamətte ḡas tor' emm, janna: «Wār kälä ätwänhäy šund a-wa-dəḡ dəḡ-əkall wa n-Işrayil.»

³⁴ Mäšan, käl-faris əntäneḍ a jannen: «A-wa tärna n-Iblis-i n-ämänokal n-alšinän a-s itakkäs alšinän dəḡ-äddinät.»

Təmyḡare n-tāhanint ta oḡän ʒisa i-tamətte

³⁵ Ällil ʒisa ḡarät-a-wen iḡärman d-tidbi iket-näsnät, isaxra dəḡ-ihānan n-äddin wi n-käl-Älyähud, ixatṭäb Älənžil wa n-Təmmənəya n-Mässinäḡ, izizuy äddinät dəḡ-turhənnawen d-älḡibän.

³⁶ Inhäy ʒisa tamətte ta täjjet has-təlkämät ḡas, täḡḡ'e tāhanint-net; inhäy fälla-sän aləḍḍeš d-ezārri, olähän-as ḡas d-tihatten wären la amāḍan.

³⁷ Innäḍ-dd s-inəṭṭulab-net, inn'-asän: «Ašəkrəš äḡḡolät, əttäḡam ijjet mäšan, wār-əjjətän inaxdimän t-oläyner.

³⁸ Äḍälät mässi-s n-ašəkrəš i-ad-dd-išəmmişəl inaxdimän oläyner ašəkrəš-net.»

10

Ämašal wa issäḡläf ʒisa inəmmušal-net
(Marḡəs 3:13-19; Luḡa 6:12-16)

¹ Iḡrā-dd ʒisa ḡarät-a-wen inəṭṭulab-net wi n-märāw d-əssin, ikf'-en tärna n-ukəs n-alšinän dəḡ-äddinät d-azuzi n-äddinät dəḡ-turhənnawen d-älḡibän.

² Ismawän n-inəṭṭulab wi n-märāw d-əssin äsnäfrän da: Simyon wa sitawänna Bəṭrus d-əḡḡa-s Idris; Yaḡub wa n-äḡḡ Zäbdi d-əḡḡa-s Exya;

³ Fəlibb d-Bärtälämma; Tomi d-Mätti wa n-änarmas n-tiwse; Yäqub äḡḡ Älfa d-Tade;

⁴ Simyon wa n-Käna d-Yähudəs wa n-Isxaryut-i t-e-isəssäḡḡärän.

Äšmašäl ʒisa inəṭṭulab-net i-ad-äxṭəbän
(Marḡəs 6:7-13; Luḡa 9:1-6)

⁵ Əntäneḍ-den-dəḡ inəṭṭulab wi n-märāw d-əssin äšmašäl ʒisa s-innä: «Wār təkkem tiwsaten ti n-inəzzulam,† wār təjješäm aḡrəm n-käl-Sämari;

⁶ wār təkkem ar tamətte ta n-käl-Işrayil tässujjalät šund tihatten.

⁷ Dəḡ-tekle-näwän, äxṭəbät i-äddinät a-s Təmmənəya n-Mässinäḡ, tohäz-dd.

⁸ Zuzəyät imarhinän, sənkaräm-dd inəmmuttan, šəšdəjäm äddinät wi ijrāw jəri, təkkəsäm alšinän dəḡ-iməlšan; ännuxmät n-Mässinäḡ wa təjrawäm bännan, äkfät-t i-äddinät bännan.

⁹ Wār tiwəyät oräḡ, wälä azrəf, wälä totəyya dəḡ-färtəmatän-näwän,

† **10:5 10:5** — ʒur-käl-Älyähud, ere wärän ämoos äḡḡ-Älyähud s-aläsäl meḡ ere wärän ilkem i-äddin-näsän, iket-net, änəzzalim a ämoos. A-wen-dəḡ a fäl tiwsaten ti iyyäḡner iket-näsnät, ti n-inəzzulam. — Ašäl-i-dəḡ, änəzzalim, äkafär (ere wärän issen s-Mässinäḡ).

¹⁰ wär tiwəyät šakkoš, wäla anäkäbba säl wa təlsäm, wäla tifädelen säl ti säläm, wäla tāborit ed, wär t-ih' äššäk a-wen, hak ānaxdim-däx, ārhuj-as ālxaxq n-tide-net.

¹¹ Ayrəm d-tadābayt təjjäšäm-däx, səstənät d-ere wa s-ānihäjjä ad-γur-s təzzubbem, təzzubbem γur-s har ašäl wa d-tässawäḏäm tekle.

¹² Ehän təjjäšäm-däx, ājrät fälla-s ässälam;

¹³ afäl käwän-āsbärräkän məssaw-s, sänsät fälla-sän ālxer wa täwwayäm; kunta daγ wär käwän-āsbärräkän məssaw-s, āglät d-ālxer-nāwän.

¹⁴ Ehän, wäla ayrəm, tosäm-däx, har wär käwän-āsbärräkän məssaw-s, meγ unjäyän s-asjəd i-mäjräd-nāwän, əzjārät-t, täbbäkbäkäm idarän-nāwän i-ad-wär käwän-iləttäγ wäla āboqqal-net.

¹⁵ Äsidätteγ-awän a-s ehän-en-däx, meγ ayrəm-en-däx, ašäl wa ilkämän, tojär tisanat ta t-madät-tärməs ta tärmäsät iyärman wi n-Sodoma d-Gomora.»

Ilkam älyizabät

(Marqəs 13:9-13; Luqa 21:12-17)

¹⁶ Inn'-asän daγ: «Ēnhəywät, näkk da-däx käwän-āšimašälän i-ad-talähäm d-tihatten əllanen jer-tiγəs; udayät i-iman-nāwän šund taššälän, ijješet-käwän ālyafyät wa ihän tidäberen.

¹⁷ Agəzät iman-nāwän däx-dägg-adəm; ad-käwän-əjən däx-ifassän n-əlxəkum, əjən däx-wän tiwit däx-ihānan n-äddin wi n-käl-Älyāhud.

¹⁸ Däx-təssəba n-isəm-in wa käwän-iwarän, ad-hawän-aškən äddinät s-gəfärän d-imānokälän, tättärmäsäm-dd sār-sän, māšan ad-umas a-wen əssəbab fäl tämoosäm tjuhawen-in, təjəm isälan-in i-tiwsaten ti n-inəzzulam.

¹⁹ Afäl təttärmäsäm, wär täšawwašät däx-isälan n-a-wa mad-tənnəm d-əmmək wa s-tän mad-tənnəm, ed afäl tābokäm i-mäjräd, ad-käwän-itwək f a-wa mad-tənnəm,

²⁰ fäl-a-s wädden käwänəḏ a maden-ämmäjräd, Unfas wa n-Abba-nāwän a madän-ämmäjräd däx-idäggan-nāwän.

²¹ Ad-isəttärməs āwadəm āḡa-s i-ad-ämmät, isəttärməs abba rure-s i-ad-ämmät, ānnäbdädän aratan d-imārawän-näsän, əjən iman n-imārawän-näsän;

²² ad-där-wän akəḏän äddinät iket-näsän däx-äddimmät n-isəm-in wa käwän-iwarän māšan ere ibdädän s-āššahät däx-immun-net, ad-iγləs.

²³ Afäl käwän-āqquzäben äddinät däx-ayrəm iyyän, jawädät-asän s-iyyän; äsidätteγ-awän a-s, a-s dd-e-säγləyäm iyärman n-Işrayil iket-näsän, iqqal-dd Ägg-ägg-adəm.»

²⁴ «Wär t-illa ānätḡalib ufan ālyalim-net wäla akli ufan mässi-s,

²⁵ igdäh γas i-ānätḡalib, ad-ättiiläl ālyalim-net, ättiiläl daγ akli mässi-s. Kunta äddinät wäla mässi-s n-ehän, jān-as isəm Abälzäbil, a-wen Iblis, āb' äḡḡāma n-a-wa he-ənnən fäll-inalkimän-net; ad-fälla-sän ənnən a ojarän a-wa ənnän fäll-mässi-s n-ehän.»

Uksadät Mässinäγ wädden dägg-adəm

(Luqa 12:2-7)

²⁶ «Ēnneγ-awän: Dägg-adəm, wär tän-täksuḏäm. Wär t-illa a ättunkälän s-wädden ad-dd-infiləl, wär t-illa a iffarän s-wädden ad-dd-iffukkär.

²⁷ A-wa hawän-janneγ däx-takše, ānnät-t s-afälla dat-äddinät iket-näsän; a-wa hawän-āsmätäktäkäx, säqqəyyät-t fäll-afälla n-ihānan.

²⁸ Wār täksudām dāgg-adəm-i wāren äddoobāt ar tenäxe n-tayəssa, wār-äddoben tenäxe n-iman; änn-ak, uksadāt Wa äddoben ad-ihlök iman hakd tayəssa dāx-zohännäma.

²⁹ Yur-wān, wādden igdaḍ əssin, tämma ḡas a nazzän? Hakd a-wen-dāx, wār-ilkem ad-dāx-sän oḍa iyyän, a ikkäs Abba-nāwän wār otes s-a-wen,

³⁰ wāla amḡadän n-iḡāfawän-nāwän, äḍḍinän.

³¹ Wār tärmeḡām, tojāräm abrök n-igdaḍ älqim.»

(Luqa 12:8-9)

³² «Ere äsjäyhän dāgg-adəm a-s näkk a t-ilän, ad-səjjəyhäx näkk-dāx Abba-nin-i ihän išənnawän a-s äwadəm-en, i-nin;

³³ ere daḡ wa hi-äkkuddälän dat-dāgg-adəm, ad-t-əkkuddäläx näkk-dāx dat-Abba-nin-i ihän išənnawän.»

Täkoba wādden älxer

(Luqa 12:51-53; 14:26-27)

³⁴ Oläs daḡ, inn'-asän: «Wār teḡalät älyafyät ad-dd-äwwäyäx s-äkall, täkoba, wādden älyafyät a sār-s dd-äwwäyäx.

³⁵ Näkk, oseḡ-dd i-ad-ibḍəw ähaləs d-ti-s, təbḍəw talyaḍt d-ma-s, təbḍəw tamäḍt d-taḍäggalt-net,

³⁶ umasän käl-ehän n-äwadəm išənja-net.

³⁷ Ere hi-äsoofän ti-s meḡ ma-s, a-di, wār-änhäjja ad-umas änätḡalib-in, ere daḡ wa hi-äsoofän rure-s meḡ elle-s, wār-änhäjja ad-umas änätḡalib-in.

³⁸ Ere wa wārän äsdāw i-aḍkul n-tajəttewt-net ta n-tamättant, ilkəm-ahi, a-di, wār-änhäjja d-ad-umas änätḡalib-in.

³⁹ Ere wa wārän idgeḡ ar dāx-igguz n-iman-net dāx-äddunya-ta-dāx, ad-ifut dāx-älžännät, mäšan, wa irdän äfota dāx-iman-net dāx-äddunya-ta-dāx, dāx-äddimmät-in, äwadəm-en, ad-iḡləs dāx-älaxärät.»

Hak äwadəm d-a-wa has-jän imojjan-net

(Marḡəs 9:41)

⁴⁰ Inna daḡ: «Ere käwän-äsbärräkän, näkk a äsbärräk, wa hi-äsbärräkän, wa hi-dd-äšmašälän a äsbärräk.

⁴¹ Ere äsbärräkän ännäbi dāx-təssəba n-a-wa s-iqqäl ännäbi, əlkamän dāx-s imraš šund wi mad-ijrəw ännäbi; ere äsbärräkän ere oḡadän dat-Mässinäx dāx-təssəba n-iqqud-net, ilkam ad-ijrəw imraš šund wi mad-ijrəw ere oḡadän dat-Mässinäx.

⁴² Ere wa issəswän wāla-dāx alkas n-aman sämmednen i-iyän dāx-inəḡḡulab dāx-təssəba n-a-wa s-ämoos änätḡalib-in, äsidätteḡ-awän a-s, wār t-e-ijmäḍ marušät n-emärked wa ämešäl.»

11

Isəstanän wi ija Exya wa n-Enəsselmäx dāx-isälan n-ḡisa

(Luqa 7:18-35)

¹ Issəmdä ḡisa asəmmətär n-inəḡḡulab-net wi n-māraw d-əssin ḡas, ifäl dihen, ad-isaxra äddinät, ixatḡab dāx-iḡarman wi n-teje-ten-dāx.

² Iha Exya takärmüt a-s islä ijitän n-Älmasex, äšmašäl sār-s härät dāx-inəḡḡulab-net

³ i-ad-has-t-dd-səstənän kunta ənta a-s Wa s-ätwännä ilkam ad-dd-ass meḡ ilkam ere säl ənta. Osän-t-dd inəḡḡulab-win-dāx, əlläḡen-as a-wa innä Exya.

⁴ Äwwežäb-asän ḡisa, inn'-asän: «Ḥḡḡəlät Exya, suḡəläm-as a-wa s-təsläm d-a-wa tənḡäyäm;

⁵ ännät-as: imëddoryal hannäyän; inëbdan rajjäsän, wi ijräw jëri tişdajän, imzaj sallän; inëmmuttan nakkärän-dd; tiläqqiwen, sallänät i-Älönzil.

⁶ Tëndöđ i-ere wa däx-i wärän ij' äşşäk.»

A-wa innä Yisa fäll-Exya wa n-Enësselmäx

⁷ Eglän meddën-winnin dd-ämeşälnen xas, ädwännät Yisa i-tamötte däx-isälan n-Exya, inn'-asän: «Ak, a-s tözjäm s-tenere, ma tönhäyäm? Ak tezëwt äsiwälawäl ađu a tönhäyäm? Äbo!

⁸ Adiš ma tökkäm i-ad-t-tönhöyäm? Ak ähalës äsisahäxän aşäl a tönhäyäm? Enhöywät-tän-ak äddinät wi sasahäxnen aşäl, ihänan n-imänokalän a əzzaşän?

⁹ Adiš ma tökkäm i-ad-t-tönhöyäm? Ak ännäbi a tönhäyäm? Tidöt lab a-s ännäbi, ässiilmädäx-käwän a-s ere ojärän tumast n-ännäbi a tönhäyäm.

¹⁰ Enta-en-däx a fäl innä əlkəttab n-Mässinäx:

«Enhöy! Äzizäräx-ak anämmaşul-in wa he-iknən tabarät-näk.»

¹¹ Äsidätteş-awän a-s wär torew tamädt ähalës wär-ojer Exya wa n-Enësselmäx mäşan hakd-a-wen-däx, wär t-illa ere t-wärän ojer däx-Tëmmənöya n-Mässinäx.

¹² Yur-aşäl wa dd-osa Exya har aşäl-i-däx, ija amjär äşşooohen fäll-ujəş n-Tëmmənöya n-Mässinäx; amjär-en, wär däx-s ikärrəş aşäl ar äddinät wi əkfärnen

¹³ fäl-a-s, ännäbitän wi dd-äzzarnen i-Exya iket-näsän, hakd-däx alämär wa n-ännäbi Mosa, äloläy a-wen-däx iket-net däx-isälan n-Tëmmənöya n-Mässinäx hundäx har aşäl-i-däx n-äzzäman wa n-Exya wa n-Enësselmäx.

¹⁴ Kunta fäw ad-täqbəläm s-a-wen-däx, ällexeş-awän a-s däx-ännäbitän, ənta a-s ännäbi Yəli wa s-ätwänna ilkam ad-dd-aləs uşəl.

¹⁵ Ämära, ere ilän timəzzujen s-islä-däx, isäjdet!»

¹⁶ Oläs day Yisa, inn'-asän: «Ak, mi dār-mad-sənnəfäqqäş əzzurəyyät ta-däx? Tänişäqqa xas d-älzämayät n-aratän janen ayşəf däx-təşəre, jannen iyyäđ i-wi iyyäđnen:

¹⁷ «Enhöywät, käwänəđ, wär lem asəşar; nəwät-awän taşänibt, tunjäyäm s-dällol! Nəşär-awän tiswal n-tişnant mäşan, wär tətşefäm iba!»

¹⁸ Exya, äzzäman wa dd-osa, wär-itətt imənsiwän olaşnen, wär-isəş aman n-läşnəb äxxiimmärnen, ənnän fälla-s äddinät: «Ih'-e alşin»,

¹⁹ işräy-t-dd Ägg-ägg-adəm, ənta itihär dār-wän a-wa tättäm d-a-wa säşşäm, xas tənnäm däx-s: «Wa ənta, insäy, iräş aman n-läşnəb wi äxxiimmärnen, inarמשän n-tiwse d-älfusaş wi iyyäđnen a-s imidiwän-net.» Äsidätteş-awän a-s:

«Şarho wa dd-ifälän Mässinäş, ijitän n-awadəm a t-isatbatän.» »

Işärman wi fäll-äsmäqqa Yisa (Luqa 10:13-15)

²⁰ Äsmäqqa Yisa dərät-a-wen fäll-işärman wi däx-ija tikunen äjjootnen mäşan, äşşärän-as ulhawän-näsän, unjäyän ätubän.

²¹ Inn'-asän: «Iməşkay käl-Qorazin d-käl-Bäşşäyda, älmäşşibät xas a fälla-wän maden-iđəw ed ənnär işärman wi n-Tir d-Şäyda əzzäşän

inөzzulam† a dāx-jānāt tikunen-ti-dāx jānen ɣur-wān, āru d-əlsān šakutān, əblənbulun dāx-ezəd fāl təmyāre n-tātubt-nāsān.

²² A-wen-dāx a fal hawān-janneɣ a-s ašāl wa ilkāmān, ad-kāwān ijjəš äddäyyāt ojārān wa ijjāšān iɣārman wi n-Tir d-Sāyda.

²³ Kāwāneɗ-i-š əzzāɣnen aɣrəm wa n-Qāfārnaxum, ma tāɣelām? Tor-dam a-s aɣrəm-nāwān ad-itimɣar har awəɗ išənnawān? Xāram-awān! Änn-ak, ad-təhələm ider, wār kāwān-dd-e-tawāɣ a sāl temse ed tikunen ti jānen ɣur-wān, ənnar janāt dāx-aɣrəm wa n-Sodoma, āru d-ätubān imuzāɣān-net, äqɣayəm aɣrəm-nāsān iday har ašāl-i-dāx.

²⁴ A-wen-dāx a fāl hawān-janneɣ, a-s ašāl wa ilkāmān, ad-kāwān-ijjəš äddäyyāt ojārān wa ijjāšān aɣrəm wa n-Sodoma.»

Älyibadāt n-Ÿisa i-Abba-net (Luqa 10:21-22)

²⁵ Iɗkāl Ÿisa mäjräd, innä: «Abba, kāyy-i n-Emāli n-išənnawān d-äkall, timələɣ-kāy fāl-a-s härätān-wi-dāx, təffārāt-tān i-iməssorha d-imusānān n-äddunya-ta-dāx māšan, täsnāfalälād-tān-dd wāla i-aratān.

²⁶ Tidət Abba, kāyy a tiimələɣ ed ädduuttāt a-s ənta-den-dāx erhet-nāk wa ähusken.»

Ämašal wa s-dd-osa Ÿisa d-täsonfat ta ihakk

²⁷ Innä Ÿisa i-äddināt ɗarāt-a-wen: «Wār t-illa a-s wädden ij'-e Abba-nin dāx-ifassān-in, wār t-illa ere hi-ijan muzəyāt imdan kunta wädden Abba, wār t-illa dāx ere ijan muzəyāt imdan i-Abba kunta wädden näkk-i n-Rure-s-i t-dd-ifälān d-ere wa s-ärheɣ ad-has-t-zuzəyāɣ.»

²⁸ Inn'-asān dāx: «Eyyäwät iket-dāx-nāwān kāwāneɗ-i äsifägga äzuk wa tällinjem, ad-hawān-sunfäɣ,

²⁹ mašälāt erhet wa-nin, təyyəm-ahi ad-kāwān-säɣrāɣ ed näkk, äzeedäɣ, hahi-tazidert, wār hi-iha əkkəbru; ənta-den-dāx a-wa hawān-ha täsonfat n-iman-nāwān, täɣləsām.

³⁰ A-wa fälla-wān ärheɣ, wār-äzzay, amišəl n-erhet-in dāx, i fäsuusān.»

12

Isālan n-ašāl wa n-əssəbət-i n-täsonfat (Marqəs 2:23-28; Luqa 6:1-5)

¹ Ašāl iyyān n-əssəbət-i n-ašāl wa n-täsonfat, iräs Ÿisa d-inəttulab-net išəkraš n-älkāma. Eɣlan dāx-a-wen-dāx a-s älluzān inəttulab, ad-nakkäɗān tiɣāɣānen n-älkāma, taffāzān tiblalen-nāsnāt.

² Ənhäyān-tān härät dāx-kāl-faris ɣas, ənnān i-Ÿisa: «Ənhəy, äɣtəl inəttulab-nāk ed išl'-en a wārān itətwəjj dāx-ašāl wa n-əssəbət-i n-täsonfat.»

³ Inn'-asān: «Adiš kāwāneɗ wār täɣrem dāx-əlkəttab a-wa ij' ämänokal Dawəd ašāl wa d-älluz ənta d-ejhān-net?

⁴ Ätwānn'-anāɣ, ijjāš ənta d-ejhān-net ehān n-Mässināɣ, ad-tattān tijəlwen-ti n-tikutawen s-innä alāmār wa n-ännābi Mosa, wār t-illa ere s-xälal tetäte-nāsnāt a sāl käl-tikutawen? Tijəlwen-tin-dāx, wār has-xälalnāt ənta wāla ejhān-net māšan, älluz ɣas, ikš'-enāt ənta d-meddən wi dār-äddew.

† 11:21 11:21 – ɣur-kāl-Älyāhud, ere wārān ämoos ägg-Älyāhud s-aläšäl meɣ ere wārān ilkem i-äddin-nāsān, iket-net, änāzzalim a ämoos. A-wen-dāx a fāl tiwsaten ti iyyäɗnen iket-nāsnāt, ti n-inөzzulam. — Ašāl-i-dāx, änāzzalim, äkafār (ere wārān issen s-Mässināɣ).

⁵ Ajän wär täyrem dāḡ-alāmār a-s ašāl wa n-əssəbət-i n-tāsonfat, käl-tikutawen wär hasän-āmoos anməšri i-a-wa innä alāmār afäl əxdāmān dāḡ-ehän n-āmudd wa mäqqārān, ed əjrawān s-ad-ənmešrəyān i-fārəḏān wi ātiwāxtāsnen i-ašāl wa n-əssəbət-i n-tāsonfat.

⁶ Ässiilmädāḡ-kāwān a-s ehän n-āmudd wa mäqqārān, ill'-e jere-wān ere t-ojārān.

⁷ Xäxx, ənnar təssanām älmāḡna n-a-wa innä Mässināḡ a-s innä: <Ojār a-s ḡur-i la tāhanint idəm uhən tikutawen>, iket-di-š, wär sədlimām bānna inəṭṭulab-wi-dāḡ wāren əḡšed härät.

⁸ Ägg-ägg-adəm, a ännihəḏān dāḡ-a-wa s-ila ägg-adəm s-ad-t-äj d-a-wa s-wār ila s-ad-t-äj dāḡ-ašāl wa n-əssəbət-i n-tāsonfat.»

Äzozäy Ȳisa ähaləs s-äqqur äfuss-net dāḡ-ašāl wa n-əssəbət-i n-tāsonfat

(Marqəs 3:1-6; Luqa 6:6-11)

⁹ Ifäl Ȳisa dihen, ikk' ehän n-äddin wa n-käl-Älyāhud.

¹⁰ Diha-dāḡ d-t-ijjāš a-s ähaləs iyyān da-dāḡ s-äqqur äfuss-net. Əggädänd äddinät iyyād s-Ȳisa, ənnān-as: «Ak xälal meḡ xāram ad-izuzəy äwadəm iyyān dāḡ-ašāl wa n-əssəbət-i n-tāsonfat?» Äsaru ḡas fäl t-əssəḏlāmān a-s tammāḡān.

¹¹ Äwwežāb-asän Ȳisa, inn'-asän: «Əndek dāḡ-wān wa s-afäl toḏa tehäle ta n-iiyāt ila dāḡ-anu dāḡ-ašāl wa n-əssəbət-i n-tāsonfat, ad-dāḡ-s tät-äy har akəy ašāl-en təzzar?

¹² Uhən kāwāneḏ, wär təjrehām a-s ägg-adəm ufa arəzzej s-a äjjeen? Ässiilmädāḡ-kāwān a-s wär t-illa a ässixrāmān iji n-a olayān dāḡ-ašāl wa n-əssəbət-i n-tāsonfat.»

¹³ Innä Ȳisa ḏarāt-a-wen i-ähaləs wa s-äqqur äfuss-net: «Əzzəl äfuss-nāk.» İzzäl ähaləs äfuss-net, izzäy, oläh äfuss-net ässaḡāt-wen-dāḡ d-äfuss-net wa iyyäḏān wär-ijrew härät.

¹⁴ Əzjārān käl-faris edägg-en ḡas, änmānhäyān jer-iman-nāsän dāḡ-isālan n-əmmək wa s-mad-əjən iman-net. İlmäd Ȳisa a-wa läbasän has-kittəwān ḡas, ifäl dihen, iglä.

Ȳisa a-s änämmašul n-Mässināḡ wa s-ätwānna

¹⁵ Dāḡ-tekle-net, əlkāmān-as-dd imarhinān äjjootnen, äzozäy-tän iket-dāḡ-nāsän.

¹⁶ Härwa wär-ifel dihen-dāḡ, äsmätār-tän hullan d-ad-wär jen isālan n-ere wa ämoos i-äwadəm wäl' iyyān.

¹⁷ Ämoos a-wen inna a ässiitbātān a-wa innä ännäbi Saya† a-s innä, innä Mässināḡ:

¹⁸ «Ənta da änaxdim-in wa äsnäfrānāḡ,

ənta a əknəy tārha,

ənta a dāḡ-äsriwān iman-in.

Ad-fälla-s sänsāḡ Unfas-in,

isəssiḡəd inəzzulam† dāḡ-iqqud i-Mässināḡ.

¹⁹ Wār t-mad-ijjəš äjaḏ,

wār mad-isäqqəy bānna,

wār t-illa ere has-madān-isəll äsiḡäyya

† 12:17 12:17 A-wa ännäbi dd-äzzarān i-Ȳisa, äloläy dāḡ-isālan-net əssayāt timaḏ n-awätay dat-tiwit-net. † 12:18 12:18 – Ȳur-käl-Älyāhud, ere wārān ämoos ägg-Älyāhud s-aläšäl meḡ ere wārān ilkem i-äddin-nāsän, iket-net, änäzzalim a ämoos. A-wen-dāḡ a fäl tiwsaten ti iyyäḏnen iket-nāsän, ti n-inəzzulam. — Ašäl-i-dāḡ, änäzzalim, äkafār (ere wārān issen s-Mässināḡ).

däy-tišarriten bännan.

²⁰ Wār mad-ärz wāla-däy tezewt
a-wa-däy has-ija iba n-äddäywa
Wār mad-isəmməkət wāla-däy tefätelt,
ad-isəjär ättāma äddinät wi əbrärnen,
äj iqqud däy-edägg iket-net.

²¹ Isəm-net a madän-isəjär inəzzulam ättāma.»

*Tärna ta n-Ÿisa, wār toher härät d-ta n-Iblis
(Marqəs 3:20-30; Luqa 11:14-23; 12:10)*

²² Äwwayän-dd äddinät s-Ÿisa qarät-a-wen amälšon äsidäryäl alšin wa
t-ihän, ikras daḡ iləs-net; äzozäy-t, oläs ahänay, ad-itamäjräd.

²³ Eqqälän-dd äddinät ḡas oran imawän, äkuunän, jannen: «Äm-
mukkän ənta-i-däy a-s Ägg-Dawəd wa s-ätwänna!»

²⁴ Əslän käl-faris i-a-wen ḡas, ənnän: «A-wa Abälzäbil, Iblis wa n-
ämänokal n-alšinän a t-ihan; ənta a t-ikfän tärna ta s-itakkäs alšinän däy-
äddinät.»

²⁵ İlmäd Ÿisa ḡur-iman-net a-wa zinəzjumän, inn'-asän: «E d t-illäm
əddəwəl s-dd-əqqälän məssaw-s əknasän jer-iman-näsän, ad-t-iba, umas
timšar; ayərəm daḡ wāla ehän wa s-dd-əqqälän məssaw-s əknasän jer-
iman-näsän, wär-e ähaj ibdad.

²⁶ Afäl dd-iqqäl Iblis isattäy iməššerəkän-net siha d-siha, iman-net ḡas a
iknas; ere iknasän d-iman-net ya, wār t-illa əmmək s-əhoja ibdad.

²⁷ Kunta daḡ tənnäm näkk, tärna n-Abälzäbil wa n-ämänokal n-alšinän
a-s tän-takkäsäy däy-äddinät, adiš, inəttulab wi-näwän, ma ämoos isəm
wa s-tän-takkäsän däy-äddinät? Inəttulab-näwän-en-däy, a-s ilkam ad-
äjjayhən fälla-wän, sədləmän-käwän,

²⁸ mäšan, kunta näkk, tärna n-Unfas n-Mässinäy a-s takkäsäy alšinän
däy-äddinät, äniihäjja a-s ässiilmäd-käwän a-wen a-s Təmmənəya n-
Mässinäy, təll'-ee jere-wän.

²⁹ Wār t-illa ere äddooben ujəš n-ehän n-əhaləs n-anäkfor, awəy ilälän
n-ehän-net ar s-ad-t-ikrad təzzar; dihen, ad-udabät teräzze n-ehän, awəy
a-wa t-ihän.

³⁰ Ere hi-wärän irha-däy, a-di, ašänjo-nin; ere daḡ wa hi-wärän itilal
s-asdu, ašəmmähəš ḡas a t-išlan.»

Abäkkad wa s-wär t-təlla tenäšše-net amäylo

³¹ Inn'-asän daḡ: «Ässiilmädäy-käwän a-s abäkkad ämešäl ägg-
adəm d-asəkkufär ija-däy, äddoobät Mässinäy ad-has-t-in-änš mäšan
ere äskafärän däy-isälan n-Unfas Šäddijän-däy, wär-ilkem ad-has-in-
ätiwänša.

³² Ere innän a läbasän fäll-Ägg-ägg-adəm-däy, äddoobät ad-ijrəw
tenäšše n-a-wen mäšan, ere wa innän a läbasän däy-isälan n-Unfas
Šäddijän, wär-ilkem ad-has-in-ätiwänša däy-äddunya wāla äläxärät.»

*A-wa ijänna ägg-adəm a isalmadän s-a-wa ihän ulh-net
(Luqa 6:43-45)*

³³ Oläs daḡ, inn'-asän: «Ahəšk olayän, a-s mad-t-tasəd, arätän-net daḡ
i olaynen; erk ahəšk daḡ, a-s t-mad-t-tasəd, arätän-net daḡ, i läbasnen;
ahəšk, arätän-net a-s ititwəzzəy.

³⁴ Ya käwäned-i n-taššälen-i-däy! Käwäned-i n-inälläbäsän, əndek
əmmək wa s-äddoobät ad-dd-izjär mäjräd olayän imawän-näwän? A-wa
iḡkärän ulh n-ägg-adəm a dd-izajjärän emm-net.

³⁵ Äwadəm-wa oläxän, milyaw n-ulh-net a dāx-dd-itakkäs a-wa oläxän māšan, enälläbäs ənta, tälläbäst n-ulh-net a dāx-dd-itakkäs a-wa läbasän.

³⁶ Ässiilmädäx-käwän a-s ašäl wa ilkämän e-d t-tölläm taxxalt d-tašujəšt inna äwadəm, ad-tät-izəl dat-Mässinäx.

³⁷ Iyyät-i-däx, ad-käy-ixləs mäjräd-näk, mex daḡ, mäjräd-näk iman-net, a käy-madän-isiḡəw, iwär-käy udlem.»

Irrum wa jän käl-faris i-Ḡisa
(Marqəs 8:11-12; Luqa 11:29-32)

³⁸ Äwwežäbän-as iyyäḡ dāx-älḡulam n-Ätṭäwrät d-käl-faris, ənnän-as: «Äḡalim, äj data-näx iji n-Mässinäx, nənhäy.»

³⁹ Äwwežäb-asän, inn'-asän: «Əzzurəyät-ta-däx n-tenälläbäst n-temäznit, wär täksud Mässinäx; wär təmmäx ḡas ar ad-ətwəjjən ijitän n-Mässinäx data-s māšan, təlmədet a-s wär-ilkem dāx-s iji n-Mässinäx säl wa n-ännäbi Yunəs.

⁴⁰ Əmmək-wa-däx s-käla ikkäs Yunəs kərəḡ išilan d-kərəḡ ihəḡan dāx-täsa n-emän wa mäqqārən, əmmək-wen-däx daḡ a-s mad-ikkəs Ägg-ägg-adəm kərəḡ išilan d-kərəḡ ihəḡan dāx-ider n-äkall.

⁴¹ Ašäl wa n-tebädde, ad-dd-ənkärän käl-aḡrəm wa n-Nəniba, səḡləmän käl-əzzurəyät-ta-däx, ed ašäl wa d-hasän-ixtəb ännäbi Yunəs, ätubän. Säjdät! Ašäl-i-däx, ənhəywät-ak, ill'-ee jere-wän ere ojärän Yunəs, māšan hakd-a-wen-däx, tunjäyäm s-ad-tutabäm.

⁴² Ašäl wa n-tebädde, ad-dd-tənkär təmänokalt ta s-käla täxkäm dāx-äkall wa n-ajus s-isəm-net Saba, täjjäyh fäll-käl-əzzäman-i-däx, səḡləm-tän dāx-äššäreḡa ed, ənta təfäl-dd äkall ujejän i-ad-səjəd i-iməjridän n-tayətte wi itäjj ämänokal Suläyman. Säjdät! Ašäl-i-däx, ənhəywät-ak, ill'-ee jere-wän ere ojärän ämänokal Suläyman, māšan hakd a-wen-däx, tunjäyäm s-asjed-has.»

Əlhəllak wa ihän iba n-tätubt təmdat
(Luqa 11:24-26)

⁴³ Oläs daḡ, inn'-asän: «E-d izjär alšin äwadəm, ad-äkk tinariwen i-ad-däx-snät immäx i-edägg dāx-ässunfa māšan, ad-has-t-iba;

⁴⁴ afäl has-t-äba, ad-änn i-iman-net: «Näkk-i-däx, ma hi-idḡazän, əḡḡələḡet ḡas ehän-in wa dd-fäläx.» Afäl dd-iqqäl edägg wa ifäl s-tizarät, ad-t-dd-ass wär t-ih' äwadəm, ifraḡ, ämmujnät.

⁴⁵ Iḡləw älwäqq-wen, awəy-dd əssa alšinän iyyäḡ t-ojärnen tälläbäst, əjjəšan äwadəm-ənnin-däx, əzzäxän dāx-s; umas a-s talḡa n-äwadəm-en ta täzzarät, təššäm i-ta təšräyät.» Inn'-asän ḡarät-a-wen: «Ənta-den-däx a-wa dār-mad-taläh talḡa n-əzzurəyät-ta-däx n-tenälläbäst.»

Anna d-ayətma n-Ḡisa
(Marqəs 3:31-35; Luqa 8:19-21)

⁴⁶ Ämmiijräd Ḡisa i-tamətte dihen-däx a-s ma-s d-ayətma-s da-däx dd-əbdädnen dat-emm n-ehän, äšmäšälän-dd sār-s äwadəm i-ad-hasän-t-dd-iḡär.

⁴⁷ Osä-dd äwadəm-en Ḡisa, inn'-as: «Anna-näk d-ayətma-k, əbdadän-ak dat-emm n-ehän, ärhan ahänay-näk.»

⁴⁸ Äwwežäb Ḡisa i-äwadəm-en, inn'-as: «Mi iqqalän anna-nin, mi iqqalän ayətma-ḡ?»

⁴⁹ Izzäl äfuss dāx-tanämhəla n-inəṭṭulab-net təzzar, innä: «Ənhəywät-tän-ak, anna-nin d-ayətma-ḡ!

⁵⁰ E d t-illäm ere itamašalän erhet n-Abba-nin-i ihän išənnawän, ənta a-s aňŋa-ɣ, ənta a-s wälätma-ɣ, ənta a-s ma-ɣ.»

13

¹ Izjār Ƴisa ašäl-wen-däɣ, ikk' asälim n-ejänš, äqqima.

² Täddew-dd sär-s tamətte täjjeet, ijjäš-as turäft n-aman, äqqima däɣ-s, täqqimä-dd tamətte ənta təbdad däɣ-asälim n-aman, täsijäd-as.

³ Issäɣläy-tän tangalen äjjootnen. Ij'-asän tiyyät däɣ-hasän-innä:

Tangalt ta n-änäsdamu
(*Marqəs 4:1-9; Luqa 8:4-8*)

⁴ «Käla izjār änäsdamu iyyän i-ad-iddumət ašəkrəš-net.

Älwäqq wa d-itidumut, ođänät tiblalen tiyyäd däɣ-äbara, äkkukkären-tänät-dd igdaɣ, əksän-tänät.

⁵ Ođa ašär iyyän jer-tihun, äffoqqät-dd šik ed wär-intem däɣ-äkall,

⁶ täsmäqqät-dd täfukt jənnəj-s, təssärɣa isəffuqqa, äqqur-in a-di iket-net ed wär-əntemän ikewän-net däɣ-härät.

⁷ Ođa ašär iyyän däɣ-tabəŋŋənt, tədwäl-dd fälla-s tabəŋŋənt, təzmäd-as.

⁸ Ođa ašär wa iyyädän däɣ-äkall olayän, ikräš aratan, ijä tiboläsen s-tiyyäd temede n-tablalt a tänät-iwarän, tiyyäd sädisät timərwen, tiyyäd kərədät timərwen.

⁹ Ere ilän timəzzujen s-islä-däɣ, isäjdət!»

Äddälil n-tangalen
(*Marqəs 4:10-12; Luqa 8:9-10*)

¹⁰ Əssəstänän-t inəŋtulab-net ɗarät-a-wen d-äddälil wa fäl isaxlay äddinät tangalen.

¹¹ Äwwežäb-asän, inn'-asän: «Käwäned, təjrawäm turhajät n-ujreh n-əddəraj wa n-isälan n-Təmmənəya n-Mässinäɣ mäšan, äddinät wi iyyädnen, wär jen a-wen.

¹² Äwadəm wa s-išwär ifhäm härät, ad has-iwwaɣ musnät har isəssikəy mäšan, wa s-wär t-illa a ijah, wär t-in-ikka härät, änn-ak, ad-däɣ-s əmahäɣ wäla a-wa əndərrän ittäf.

¹³ Ənta-den-däɣ a-wa fäl saɣläyäɣ äddinät tangalen i-ad-:

<Əswaɗän, wär hənniyän;
äsijädän, wär səllən;
wär t-illa daɣ a jarrähän.> »

¹⁴ Ämoos a-wen a ässiitbätän a-wa fälla-sän inna ännäbi Saya† a-s innä, innä Mässinäɣ:

«Äddinät! Ad-salläm, wär jərrəhäm;
ad-təkyadäm, täsibäläläyäm, wär t-illa a hannäyäm.»

¹⁵ Ənta daɣ a innän a-s, innä Mässinäɣ:

«Tamətte-ta-däɣ, täsɣär-ahi ulh-net;
täzmäzzaj'-ahi iman-net,
täsdärɣäl-ahi iman-net
i-ad-äbas hannay, äbas sall,
i-ad-wär jərräh härät
fäl iba n-tärha-i-däɣ ja n-ad-sär-i dd-tənnäɣ,
tutab, zuzəyäɣ-tät.»

† 13:14 13:14 A-wa ännäbi dd-äzzarän i-Ƴisa, äloläy däɣ-isälan-net əssayät timaɣ n-awätay dat-tiwit-net.

16 Inna ʁisa ɖarät-a-wen i-inəttulab-net: «Təndəɖ-awän käwäneɖ ed hannäynät tittawen-näwän, sallänät day timəzzujen-näwän.

17 Ässiilmädäx-käwän a-s, äsdärhänän ännäbitän äjjootnen d-imaɣdalän ahänay n-a-wa hannäyäm mäšan, wär t-ənheyän; äsdärhänän mäšallät n-a-wa s-sälläm mäšan, wär has-əslen.»

*Älmäxna n-tangalt ta n-änäsdamu
(Marqəs 4:13-20; Luqa 8:11-15)*

18 Säjdät ämära i-älmäxna n-tangalt ta n-änäsdamu:

19 «Äbara wa dāx-oɖänät tiblalen, ənta a-s äddinät wi sallänen i-isälan n-Təmmənəya n-Mässinäx mäšan, wär tän-järrähän, as'-en-dd Iblis, ilbəydd dāx-ulhawän-näsän a-wa s-əslän.

20 Tihun ti jer-oɖänät tiblalen, əntänätəɖ a-s äddinät wi s-e-d isla iyyän dāx-sän i-mäjräd n-Mässinäx, ad-ihliləy, iqbəl-t šik mäšan,

21 wär t-itəyy ikraš ikewän dāx-ulh-net; ad-äj äzzäman əndärrän äkoyäd dāx-s, mäšan afäl dd-tosa tissust meɣ osä-dd älyizabät dāx-təssəba n-mäjräd n-Mässinäx, ad-hin-ibbuɖtəl a-wa s-omän.

22 Tabəŋənt ta jer-oɖänät tiblalen, ənta a-s äddinät wi s-e-d isla iyyän dāx-sän i-mäjräd n-Mässinäx, ad-has-izməɖ dāx-ulh-net s-tärha n-wälät-äddunya d-eyläl n-tärha n-ajmur-net, wär t-illa a sār-s dd-isaxsal.

23 Äkall wa oläxän dāx-oɖänät tiblalen, ənta a-s äddinät wi s-e-d isla iyyän dāx-sän i-mäjräd n-Mässinäx, ad-t-ijrah, ijješ-as-t älfäyda. Tarəw-dd sār-s tiyyät tablalt teməɖə n-tablalt, tarəw-dd sār-s tiyyät säɖisät timərwen n-tablalt, tarəw-dd sār-s day tiyyät käraɖät timərwen n-tablalt.»

Isälan n-əttäxam d-terk teyəšše

24 Issäxläy-tän-dd ʁisa day tangalt tiyyät dāx-hasän-innä: «Təmmənəya n-Mässinäx, tänifäqqa d-ähaləs iyyän infärän əttäxam olaxän dāx-ašəkrəš-net.

25 Ija ehäɖ, əttäsän äddinät ɣas, osä-dd ämiksän iyyän ašəkrəš wa n-älkäma äddomät ähaləs-ənnin, infär dāx-s erk idommän, iglä.

26 Äsfäqqät-dd ašəkrəš wa n-əttäxam wa oläxän, oräw, tədwäl-dd day terk teyəšše edes-has.

27 Ənhäyän inaxdimän n-mässi-s n-ašəkrəš terk teyəšše ta dd-tədwälät ɣas, osän-t, ənnän-as: «Mässi-näx, ajän wädden käyy əttäxam olaxän ɣas a tənfaräd dāx-ašəkrəš-näk, əndek siha s-dd-ha terk teyəšše ta t-hät ämära?»

28 Inn'-asän: «A-di imojjan n-ere hi wärän irha.» Ənnän-as inaxdimän-net: «Adiš, nəlbəyet-tät-in?»

29 Inn'-asän: «Aha-aha! Wär jem a-di, ed afäl təttäräm ad-hin-təlbəyäm terk teyəšše, ham miši n-ad-hin-təlbəyäm day älkäma.

30 Äyyät-tän ad-ədwəlän issənän-essän har äzzäman wa n-amili n-išəkraš, dihen, ad-ännäx i-wi tiləynen išəkraš, ad-dd-əlbəyän terk teyəšše s-tizarät, əjən-tät tikärrad, təzzar, särxən-tät, sədwən-ahi-dd ɖarät-a-wen älkäma, əjən-t dāx-əjänd-in.» »

*Təmmənəya n-Mässinäx, a əndärrän a-s sänta, timɣar
(Marqəs 4:30-32; Luqa 13:18-19)*

31 Issäxläy-tän-dd day ɖarät-a-wen tangalt tiyyät, inn'-asän: «Təmmənəya n-Mässinäx, toläh d-temätəwt äddomät äwadəm dāx-ašəkrəš-net.

³² Temätäwt-ten-däx, ənta a tojarät tömmətkit dəx-idommän məšan, tədwäl-dd, täqqäl ahəšk ojarän tiyəššawen n-ašəkrəš iket-nəsənät har zattän igdađ iskak-nəsän dəx-iləktan-net.»

(Luqa 13:20-21)

³³ Issäyläy-tän-dd tangalt tiyyät dađ, inn'-asän: «Təmmənəya n-Mässinäx, toläh d-takmöttet n-täzza tössärtäy tamäđt d-kärađ ännäfəyatän n-ejel n-älkäma i-ad-ikəf iket-net.»

(Marqəs 4:33-34)

³⁴ Tangalen a dəx-issäxra Ƴisa isəlan-wi-dəx iket-nəsän, wär t-illa a inna i-tamətte s-wädden tangalen a dəx-hasän-t-inna.

³⁵ Āmoos a-wen a əssiitbätän a-wa innä ännäbi n-Mässinäx iyyän, innä Mässinäx:

«Ad-säxləyəx äddinät tangalen,
əjəx isəlan s-ad-dd-təxlək äddunya-dəx, ättunkälän.»

Älməxna n-tangalt ta n-əttəxam d-terk teyəšše

³⁶ Ifäl Ƴisa tamətte, ijjäš ehän ɣas, əkkän-t-dd inəttulab-net, əttärän dəx-s ad-hasän-arr tangalt ta n-terk teyəšše.

³⁷ Inn'-asän: «Ägg-ägg-adəm ənta, a äddomen əttəxam wa oləxän,

³⁸ äddunya a-s ašəkrəš-net; əttəxam wa oləxän a-s aratan n-Təmmənəya n-Mässinäx, terk teyəšše a-s aratan wi n-Iblis.

³⁹ Iblis a-s əmiksän wa äddomen terk teyəšše dəx-ašəkrəš, amili n-išəkraš a-s səmdo n-äddunya, ənjəlosän a-s imalayän n-ašəkrəš.

⁴⁰ Əmmək-wen-dəx s-dd-tatəlbay terk teyəšše, tämməđkäl, tətwejər-in dəx-efew, əmmək-wen-dəx a he-ijən ašäl wa d-tamənd äddunya.

⁴¹ Ašäl-en, ad-išəmmişəl Ägg-ägg-adəm ənjəlosän-net i-ad-hin-aləmän dəx-Təmmənəya-net äddinät wi šinməšrəynen imidiwän-nəsän d-wi tamašalnen a läbasän, əđkəlän-tän,

⁴² əjrən-tän-in dəx-tahəst-i dəx-tän wär mad-išləw ar tahəla, ziməkərkizän isenän fäl təmujrizt.

⁴³ Ašäl-en, äddinät wi oɣädnen dat-Mässinäx, ad-fälla-sän əj Mässinäx ännur-net, əjən asməxməx wa təjj täfukt dəx-Təmmənəya n-Abba-nəsän.

Ere ilän timəzzujen s-islə, isəjdet!»

Wär t-illa a-s wädden tojar-t Təmmənəya n-Mässinäx

⁴⁴ Inn'-asän Ƴisa dađ: «Təmmənəya n-Mässinäx, toläh d-əjänd n-orəx inbalän dəx-ašəkrəš iyyän. Təgla tanfust har ašäl wa d-fälla-s ođa əhaləs iyyän. A-wa-dəx has-ja tedəwit, ikn'-e ufär i-ad-wär sər-s iləmməd əwadəm wäl' iyyän. Iglä dərat-a-wen, ättužžär-in a-wa ila iket-net i-ad-udabät akəraš n-ašəkrəš-en-dəx dəx-inbal orəx-wənnin-dəx.»

⁴⁵ Oläs dađ, inn'-asän: «Təmmənəya n-Mässinäx, toläh d-u-maməla itamməxän i-timəxwanen n-tiləllaten,

⁴⁶ ijrəw tiyyät təknet əlləllu ɣas iglä, ättužžär-in a-wa ila iket-net, iqqäl-dd, izžənš'-et.»

⁴⁷ Inn'-asän dađ: «Təmmənəya n-Mässinäx, toläh d-tätart jərän iməhhuyya n-imənan dəx-əjənš i-ad-sər-s dd-ərməsän tulaten n-imənan əjjootnen,

⁴⁸ təđnəy tätart ɣas, əntəšän-tät-dd s-asəlim n-aman, ad-biđdun imənan s-iyyən-iyyən, hak iyyän d-əzzənəf-net. Jän wi əfrännen dəx-deketän-nəsän, jərän-in fälla-sän wi hasän wär iha əlfəyda.

⁴⁹ A-wen-dəx dađ a madän-əj ašäl wa d-tamənd äddunya, a dd-asən ənjəlosän, əbđəwän iməxdalän d-inəlləbasän,

⁵⁰ əjrən-in inälläbäsän dāḡ-tahəst ta-dāḡ tən-wär mad-işləw ar tahäla, ziməkärkizän isenän fäl tämujrizt.»

⁵¹ Issəstän Ƴisa inəṭṭulab-net ɗarät-a-wen, inn'-asän: «Ak a-wa hawän-ənneḡ, təjrahäm-t meḡ?» Ƴännän-as: «Ƴyya, nəjrah-t.»

⁵² Inn'-asän: «E d t-illäm älḡalim n-Äṭṭäwrät iknan afäham n-a-wa ämoosän isälan n-Təmmənəya n-Mässinäḡ, irɗa sār-sän, ad-has-iwwäɗ musnät äynayän fäll-wa ärəwän ila, afäl ija a-wen, ad-aläh d-abba n-eyewən dd-itakkäsän härätän äynaynen d-i ärəwnen dāḡ-ijändän-net.»

Äşyārän käl-Näşirät ulhawän-näsän i-Ƴisa
(Marqəs 6:1-6; Luqa 4:16-30)

⁵³ Issəmda Ƴisa tənna n-tangalen-tin-dāḡ ḡas, ifäl dihen,

⁵⁴ ikkä taḡrəmt ta dāḡ-idwäl. Issäḡra dihen dāḡ-ehän n-äddin wa n-käl-Älyähud, äkunän äddinät iket-näsän dāḡ-a-wa isayra, əqqälän-dd ḡas oran imawän, jannen: «Wa, əndek siha s-t-dd-ha təḡuləma-ta-dāḡ d-tikunen ti itäj?»

⁵⁵ Ajän wädden a-wa rure-s n-mənizye wa-dāḡ nəzzäy? Wädden ma-s, Märyäma? Ayətma-s: Yaqub, Yusəf, Simyon d-Hudd?

⁵⁶ Ajän wädden šätma-s da-dāḡ t-əllänen jere-näḡ? Ƴas əndek siha s-t-dd-iha a-wa-dāḡ itäj iket-net?»

⁵⁷ Jän-as a-wen-dāḡ s-t-əzzayän asäkor, unjäyän sār-s omänän. Inn'-asän: «Ännäbi, wär t-illa edägg s-wädden ätiwäsämḡär dāḡ-s ar dāḡ-äkall-net d-ḡur-käl-ehän-net.»

⁵⁸ Igdäl-as iba n-immun-näsän ad-ḡur-sän äj tikunen äjjootnen.

14

Tamättant n-Exya wa n-Enəsselmäḡ
(Marqəs 6:14-29; Luqa 9:7-9)

¹ Äzzäman-en-dāḡ ad-dd-iwwäɗ mawmaw n-Ƴisa Harudəs wa n-ämänokal n-teje ta n-Galila.

² Issäḡrä-dd käl-əlxəkum-net, inn'-asän: «Ähaləs-wa-hi s-sälläḡ, Exya wa n-Enəsselmäḡ dd-olasän tanäkra jer-inəmmuttan, a-wen-dāḡ a t-ikfän tärna n-tikunen ti itamaşal.»

³ Innä Harudəs a-wen fäl-a-s ənta iman-net a ästärmäsän Exya, ij'-e dāḡ-tišəm təzzar ij'-e dāḡ-takärmüt, dāḡ-təssəba n-Harudəyät ta n-hänne-s n-ənḡa-s Fəlibb dāḡ-s ohäḡ Harudəs.

⁴ Äzzäman-en-dāḡ ad-äsmäqqa Exya fäll-Harudəs, inn'-as: «Wär hak-xälal ad-tärkəbäd hänne-s n-ənḡa-k.»

⁵ Ad-itammäḡ ya Harudəs i-äsaru fäl t-issänḡa mäşan, äksuɗ tamətte ed iket-net təssan a-s Exya, ännäbi a ämoos.

⁶ Təḡla tanfust har aşäl wa n-isəkta n-tiwit n-ämänokal Harudəs. Aşäl-en, dāḡ-äzzäho wa ijän, təggäd-dd elle-s n-Harudəyät, ad-dalläl dat-imäjarän wi-dd-osänen; ijräz a-wen i-ämänokal.

⁷ Dāḡ-tedäwit-net, iḡr'-et-dd, ijjäş-as ärkäwäl n-ad-tät-äkf a-wa dāḡ-s mad-təttär, a ämoos-dāḡ.

⁸ Təḡlä talyaɗt, təttär äddäbara dāḡ-ma-s, təntäj-tät-dd ma-s, tənn'-as, änn'-as: «Ärheey dāḡ-k eyäf n-Exya insa dāḡ-azäwa.» Təḡlä tamawaɗt, ja isälan dāḡ-ämänokal.

⁹ Ƴnxäsän iman n-ämänokal mäşan, äbas äddoobät uḡəl s-a-wa inna, ed ihäɗ-as s-ad-tät-äkf a-wa dāḡ-s mad-təttär, a ämoos-dāḡ, dat-imäjarän-net. Omär ɗarät-a-wen s-ad-itwəjj a-wa tärha.

¹⁰ Issəglä äwadəm wa inakkäḍän iḡafawän n-käl-takärmuṭ wi länen s-tamättant, inkäḍ-dd eḡaf n-Exya,

¹¹ äwwäy-t-dd insa däḡ-azäwa; ikf'-e i-talyaḍt, täwwäy-t talyaḍt i-ma-s.

¹² Osän-dd inəṭṭulab n-Exya ḍarät-a-wen, əḍkälän tafəkka-net, əḗkän-tät; əkkän Ḣisa, jän däḡ-s isälan.

*Səmmos afdän n-ähaləs wi äsyäwän Ḣisa
(Marḡəs 6:30-44; Luqa 9:10-17; Exya 6:1-14)*

¹³ Əjjäšan isälan n-iba n-Exya Ḣisa ḡas, ifäl teje-ten-däḡ däḡ-turäft n-aman, ikkä tenere n-iman-net mäšan, əslän-t äddinät ḡas, fälän-dd iḡärman, älliilän asälim n-ejänš, əlkamän-as.

¹⁴ Izjār-dd Ḣisa turäft n-aman, inhäy tamətte-ta-däḡ täjjet has-dd-təlkämät ḡas, täḡḡ'-e tähanint-net, ad-däḡ-sän izizuy wi n-inaxyabän.

¹⁵ Ja takkäşt ḡas, ohäzän-t-dd inəṭṭulab-net, ənnän-as: «Äḡalim, tenere a nəha, ij'-anəḡ ehäḍ, səfəl iman-näk tamətte, ad-täkk tidbi-ti ohäznen žänš-dd a təkša.»

¹⁶ Inn'-asän Ḣisa: «Wär ämḡatärän s-ad-əkkən edägg. Un, šäksät-tän käwäned iman-näwän.»

¹⁷ Ənnän-as: «Wär nəṭṭef ar səmmosät tijəlwen d-əssin imänan.»

¹⁸ Inn'-asän: «Awəyät-ahi-dd a-wa təṭṭäfäm.»

¹⁹ Omär ḍarät-a-wen s-ad-äqqaymən äddinät fäll-teyəšše, idkäl tijəlwen ti n-səmmosät d-imänan wi n-əssin, äjozäy išənnawän, ämmoy i-Mässinäḡ; äfräsfäräs tijəlwen, änkäḍnäkd imänan təzzar, ikfä a-wen-däḡ iket-net i-inəṭṭulab-net, äzunän-t jer-äddinät.

²⁰ Əksän iket-däḡ-näsän har əyyəwänän, äsdäwän-dd a-wa dd-təjläš tamətte, osän-t idnäy märaw deketän d-əssin n-tijəlwen d-imänan.

²¹ Səmmos afdän n-äwadəm däḡ-wär äḍḍinnät tiḍeḍen wäla aratan a ikšan ašäl-wen-däḡ.

*Räjjoš n-Ḣisa fäll-aman
(Marḡəs 6:45-52; Exya 6:15-21)*

²² Izzəlzäm Ḣisa ḍarät-a-wen inəṭṭulab-net uješ n-turäft ta n-aman i-ad-has-izarän s-efäyy n-ejänš wa iyyäḍän, ad-isagla ənta tamətte.

²³ Issəglä tamətte ḡas, iwwän taḍayt tiyyät, ad-itəddal Mässinäḡ. A-s toḍa täfukt, wär dd-äqqima däḡ-edägg-ənnin-däḡ, ar ənta ḡas.

²⁴ A-s ija a-wen, turäft n-aman ta däḡ-əglän inəṭṭulab täsisägdäh ejänš mäšan, inkär-dd fälla-sän aḍu äwwiḡwäḡän turäft, bähhlänät-as tinäzzämären siha d-siha.

²⁵ Igl' ehäḍ ḡas, ilkäm-asän-dd irjaš fäll-aman.

²⁶ Ənhäyän-t inəṭṭulab, ikk'-en-dd irjaš fäll-aman ḡas, ärmäḡän, ad-jannen: «Os'-anəḡ ämättänkul iyyän», ad-naḍḍäwän iḡäran.

²⁷ Ässewäl-asän šik, inn'-asän: «Meddən, änsət ənniyät-näwän, näkk a-wa; wär tärməḡäm.»

²⁸ Iggäd-dd Bəṭrus däḡ-a-wen-däḡ, innä i-Ḣisa: «Äḡalim, kunta käyy a-wa, amär s-ad-käy-in-äkkäḡ, näkk-däḡ, ärjašäḡ fäll-aman.»

²⁹ Inn'-as Ḣisa: «Əyyäw!» Izjār-dd Bəṭrus turäft n-aman, ikkä-dd Ḣisa irjaš fäll-aman.

³⁰ Inhäy Bəṭrus əşşuhu n-aḍu fäll-ejänš ḡas, irmäḡ, əqqälän-t aman alämäz älwäqq-wen-däḡ, ad-isaxärat, ijanna: «Ya Äḡalim! Agəz-ahi.»

³¹ Irmäs-t-dd Ḣisa s-äfuss, inn'-as: «Təmmətkit ija immun-näk, ma itajjän äššäk däḡ-ulh-näk.»

³² Əjjäšan-dd turäft fäll-inəṭṭulab wi iyyäḍnen ḡas, ibdäd aḍu.

³³ Ğnhäyän wi äqqimänen dāḡ-turäft a-wen ḡas, ärkäḡän data-s, önnän-as: «Tidöt-dāḡ a-s käyy a-s Rure-s n-Mässinäḡ.»

Äzozäy Ȳisa imarhinän dāḡ-teje ta n-Žännäḡarät
(Marḡəs 6:53-56)

³⁴ Täsjän turäft n-äman-näsän älwäqq-wen-dāḡ dāḡ-teje ta n-Žännäḡarät.

³⁵ Ğzzäyän-t käl-ayrəm-en ḡas, ošälän, jän isälan dāḡ-attayän-en, ad-sär-s dd-tiwöyän äddinät e d t-illäm ere ärhinän.

³⁶ Laqqädän käl-ayrəm Ȳisa dāḡ-ad-tän-äyy, ad-äḡəsän kud-dāḡ afär n-eräswäy-net, ed ere t-iḡäsän-dāḡ, ad-izzöy.

15

Alkum i-agna
(Marḡəs 7:1-13)

¹ Osän-dd käl-faris iyyäḡ d-härät dāḡ-älḡulam n-Äṡṡäwrät dd-falnen Ȳarussälam Ȳisa,

² önnän-as: «Mafäl tinmöšröyän inöṡṡulab-näk i-agna wa hanāḡ-dd-öyyän imärawän-nänāḡ? Tattän wär-ässerädän ifassän-näsän s-ömmək wa s-t-ifrāḡ agna-nänāḡ.»

³ Äwwežäb-asän Ȳisa, inn'-asän: «Ad-käwän-söstönāḡ: käwäneḡ-š, mafäl tinmöšröyäm i-alämär wa n-Mässinäḡ, tajjäm agna-näwän jönnöj-s?»

⁴ Wädden Mässinäḡ innä:

«Sömyär ti-k d-ma-k»,

innä dāḡ:

«Ere äbodärän ti-s meḡ ma-s, adiš, ämmätet.»

⁵ Tössanäm s-a-wen-dāḡ iket-net mäšan, iyyäḡ dāḡ-wän, saḡren äddinät a-s äddoobät äwadəm ad-änn i-ti-s d-ma-s: «A-wa s-äsidärhänāḡ ad-käwän-ödhäläḡ sär-s, jeḡ-t takute i-Mässinäḡ.» Ija ḡur-wän a-s ere innän a-wen-dāḡ i-imärawän-net, ad-äbas t-iwar älxäqq-näsän.

⁶ Ğnhöywät ḡas a-wa käwän-išlän: täsbäṡṡäläm-in a-wa inna Mässinäḡ, jäm a-wa hawän-inna agna-näwän dāḡ-edägg-net.

⁷ Älmunafexän yaden! Tidöt a-wa fälla-wän innä ännäbi Saya† a-s innä, innä Mässinäḡ:

⁸ «Tamötte ta-hi, iḡlay-net ḡas

a-s hi-tässiimḡär

ulh-net, uḡej-ahi;

⁹ Älyibadät-wa hi-täj d-tikutawen ti hi-täj,

mäläyāḡna ḡas

ed a-wa säḡren fäll-ismawän n-Mässinäḡ,

wär ämoos ḡas ar färöḡän dd-äḡtasän i-iman-näsän.» »

A-wa isamäḡasän ägg-adəm
(Marḡəs 7:14-23)

¹⁰ Iḡrä-dd Ȳisa tamötte s-iman-net ḡarät-a-wen, inn'-as: «Säjdät, töjrahäm a-wa hawän-janneḡ:

¹¹ wädden a-wa itajjāšän emm n-ägg-adəm a t-isamäḡasän, a-wa dd-itëffälän ammas n-ulh-net ijänna s-ëmm-net a t-isamäḡasän dat-Mässinäḡ.»

† 15:7 15:7 A-wa ännäbi dd-äzzarän i-Ȳisa, äloläy dāḡ-isälan-net össayät timäḡ n-awätay dat-tiwit-net.

12 Ohäzän-t-dd inəṭṭulab-net, ənnän-as: «Käyy ya, a-wa tənneḍ, ikma käl-faris hullan.»

13 Inn'-asän Ƴisa: «E d t-illäm emäyt s-wädden Abba-nin-i ihän išənnawän a t-äddomen, ilkam, ad-hin-ättälbäy.

14 Äyyät käl-faris d-iman-näsän, olähän Ƴas d-imalwayän däryalnen; emədderyəl ya ilwayän amidi-net, ejaḍäl Ƴas a əkkan issənän-essän däx-anu.»

15 Iggäd-dd Bəṭrus, inn'-as: «Fassär-anäx tangalt-ta-däx jed. »

16 Inn'-asän Ƴisa: «Ƴas käwəneḍ-däx, wär t-illa a təjrahäm härwa?

17 Ajän wär təjrehäm a-s əsənk esäk? A-wa isuk əwadəm emm-net, təsa-net Ƴas a itakk, ijär-t-in ḍarät-a-wen däx-təkoyt

18 mäšan, mäjräd wa dd-izajjārən emm n-əwadəm, ulh-net a dd-itəffal, ənta-den-däx a-wa t-isaməḍasän dat-Mässinäx

19 fäl-a-s ulh n-əgg-adəm, a dd-itəffal erk ənniyät, iji n-iman, əzzəna, iba n-täkrakıḍt, tikra, tajuhe n-bahu, təkkuḍfära.

20 Əntəneḍ-den-däx härätän wi saməḍasnen əwadəm, wädden tetäte wär-əsseräd ifassän-net.»

Äzozäy Ƴisa elle-s n-taməḍt tiyyät (Marqəs 7:24-30)

21 Ifäl Ƴisa edəgg-en ənta d-inəṭṭulab-net Ƴas, ikkä teje ta hän iḅarman wi n-Tir d-Säyda.

22 Ill'-ee dihen-däx a-s šik-däx, taməḍt tiyyät ila äkall wa n-Xäna da-däx t-dd-tosät, ad-t-laqqäd, saḅarat, jann'-as: «Älyalim! Ya Ägg-Dawəd, aḍən-ahi təhanint; elle-x təllubbäḍ, issəkn'-et əlšin wa tät-ihän aḅäna.»

23 Wär t-illa a has-inna Ƴisa. Eḅgädän-dd sār-s inəṭṭulab-net, ənnän-as: «Säḍəl-anäx taməḍt-ta-däx, təsḅäf-anäx, e-s nəkka-däx, təseḅarät ḍaranäy!»

24 Inn'-asän Ƴisa: «Näkk tamətte ta n-käl-Işrayil-i toolähät d-tihatten əssujjalnen a-s hi-dd əšmašäl Mässinäx. A-wa sä əntəneḍ, wär hi-sār-s-dd-əšmašäl.»

25 Mäšan hakd a-wen-däx, təkku'-e-hi-dd taməḍt, tärkäx data-s, tənn'-as: «Älyalim, əkkəs-ahi tekəriḍt.»

26 Äwwežəb-as Ƴisa, inn'-as: «Wär-ənhäjjä ad-dd-ikkəs əwadəm amənsi daw-aratän, ijär-t-in i-iyyəḍan?»

27 Tənn'-as taməḍt: «Älyalim, tidət mäšan, a-wen wär-ikkəs a-s afäl əlwəqq wa d-itätt məssi-s n-ehän, äddooben iyyəḍan ad-äkkämen a-wa ititrekkin.»

28 Ja mäjräd-wen-däx Ƴas, inn'-as Ƴisa: «Taməḍt! Immun-näm, tidət-däx a-s i məqqārən; äjet a-wa tətäräd.» Təzzäy elle-s däx-taməzäyyat-ten-däx.

Äzozäy Ƴisa imarhinän äjjootnen

29 Ifäl Ƴisa teje-ten-däx Ƴas, ikkä əsəlīm n-əjənš wa n-Galila, iwwän dihen taḍayt tiyyät äqqima fälla-s.

30 Əkkän-t-dd äddinät äjjootnen äwwaynen inəbdan d-iməddorḅal d-inəyabän d-äddinät s-əkradän ilsawän-näsän d-imarhinän äjjootnen, əssənsän-tän daw-iḍarən-net; äzozäy-tän iket-däx-näsän.

31 Äkunän äddinät däx-a-wa ija ed hannäyän a-s, wi s-käla əkräsän ilsawän-näsän, taməjradän; inəyabän, tazžäyän; inəbdan, rajjäšän; iməddorḅal, hannäyän. Tənhäy tamətte a-wen Ƴas, ad-t-timəl, janna: «Təmmal i-Emäli wa n-Işrayil.»

*Äsyäwän Ƴisa əkkoz afdän n-äwadəm
(Marqəs 8:1-10)*

³² Ikkäs-dd Ƴisa inəttulab-net s-takše, inn'-asän: «Naqq'-ahi tähanint n-tamətte-i-däx; a ilan kərađ išilan, təlcam-ahi, äbas əttafän äddinät a əkšän, wär-äddobey ad-tän-sägläx ällužän s-əmmək-wa-däx, ad-hasän-indär ad-hin-awəđän ihänan-näsän fäl iba n-ässhät.»

³³ Ənnän-as inəttulab-net: «Əndek diha d-mad-nəjrəw tijəlwen äššikšänen tamətte jat əjut-wa-däx däx-tenere-ta-däx?»

³⁴ Inn'-asän: «Maniket tijəlwen təttafäm?» Ənnän-as: «Əssayät, nəttaf däx härät n-imänan.»

³⁵ Äsyäyma Ƴisa tamətte iket-net,

³⁶ idkäl qarät-a-wen tijəlwen ti n-əssayät d-a-wa t-əkfän däx-imänan, ämmoy i-Mässinäx, äfräsfäräs annin-däx iket-net təzzar, ikf'-e i-inəttulab i-ad-t-užanän jer-äddinät.

³⁷ Təkša tamətte ta təllät dihen-däx hundäx har təyyəwän iket-däx-net, äsdäwän-dd inəttulab a-wa dd-əjläšän äddinät, osän-t idnay əssa deketän.

³⁸ Əkkoz afdän n-äwadəm däx-wär äđdinnät tiđeden d-aratän a ikšän ašäl-wen-däx.

³⁹ Issəglä Ƴisa tamətte qarät-a-wen təzzar, ijjäš turäft n-aman, ikkä teje ta n-Magadan.

16

*Edäwänne wa ija Ƴisa d-käl-äddin
(Marqəs 8:11-13; Luqa 12:54-56)*

¹ Ašäl iyyän, osän-dd härät däx-käl-faris d-käl-sadus Ƴisa, jän-as asəstan däx-otasän irrum-net, i-ad-əjrəwän əsarü fäl t-əssədlämän, ənnän-as: «Äj data-näx iji n-Mässinäx hanäx-issətbätän a-s tidət-däx a-s Mässinäx a käy-dd-äšmašälän.»

² Äwwežäb-asän, inn'-asän: [«Ajän wädden e-d täbok täfukt i-əjadäl har tənähayäm a-s šäggax, ad-tənnəm: «Ašəkka, wär-e iwət ajənnä.»

³ Afäl äffaw har tənähayäm ajənnä ikannä-dd, ad-tənnəm: «Ašäl-i, ad-iwət ajənnä, ənhəywät-ak, käwal-dd.» Käwäned-i s-e-d təkyađäm išənnawän, ad-təlmədäm a-wa dd-imalän, mafäl hawän-indar ad-täyrəm išmal n-äzzämanän wi jänen, təfhəməäm älmäxna-näsän?]

⁴ Käl-əzzurəyät-ta-däx, tenälläbäst n-temäznit, wär təmmäx Ƴas ar i-ad-ətwəjjən ijitän n-Mässinäx data-s mäšan, təlmədət a-s wär däx-s ilkem iji n-Mässinäx säl wa n-ännäbi Yunəs.» Inn'-asän Ƴisa a-wen Ƴas, ifäl-tän, iglä.

*Təmmətkit n-immun n-inəttulab
(Marqəs 8:14-21)*

⁵ Ijläy Ƴisa ənta d-inəttulab-net ejänš s-ašrut wa iyyäđän. Əglan fäll-əjänš-en-däx a-s dd-əktän inəttulab-net a-s wär-əwweyän äzzad däx-tijəlwen.

⁶ Əjläyän ejänš Ƴas, inn'-asän Ƴisa: «He käwäned! Agəzät iman-näwän däx-täzza ta n-käl-faris d-käl-sadus.»

⁷ Inn'-asän Ƴisa a-wen Ƴas, ad-tinmənnin jer-iman-näsän: «A-wa, a-wa däx s-wär nəwwey tijəlwen a fäl hanäx-itajj mäjräd-wa-däx.»

⁸ Ilmäđ Ƴisa Ƴur-iman-net a-wa däx-zinəzjumän, inn'-asän: «Mafäl tinmənnim? «A-wa, a-wa däx s-wär nəwwey tijəlwen a fäl hanäx-itajj mäjräd-wa-däx», təmmətkit ija immun-näwän.

⁹ Adiš, käwāneḏ har ämära-däḡ, wär t-illa a tøjrahäm? Ajän töttewäm-in sëm mosät tijelwen-ti täzunäm i-sëm mos afdän n-ähaləs? Maniket deketän dd-täsdawäm däḡ-a-wa dd-töjläš tamötte?

¹⁰ Adiš töttewäm-in əssayät tijelwen-ti s-äsyāwänäḡ əkkoḡ afdän n-ähaləs, maniket deketän dd-töjläš tamötte?

¹¹ Ma hawän-igdalän ad-təfhämäm a-s wädden tijelwen a däḡ-hawän-ässewäläḡ? A hawän-ənnəḡ: «Agəḡät iman-nāwän däḡ-täzza ta n-käl-faris d-käl-sadus.» »

¹² Inn'-asän Ƴisa a-wen ḡas, əfhämän a-s wädden isälan n-täzza ta n-tijelwen a däḡ-hasän-ässewäl, änn-ak, ämmijräd-asän däḡ-isälan n-ad-əgəḡän iman-näsän däḡ-a-wa säḡren käl-faris d-käl-sadus.

*Tajuhe ta ija Bəḡrus däḡ-isälan n-Ƴisa
(Marḡəs 8:27-30; Luqa 9:18-21)*

¹³ Ikkä Ƴisa ḡarät-a-wen aḡrəm s-itawänna Qäyşara wa n-Fəlibb. Dihendäḡ ad-issəstän inəṭṭulab-net, inn'-asän: «Ma jannen äddinät, mi ämoos Ägg-ägg-adəm?»

¹⁴ Ənnän-as: «Iyyäd jannen: käyy a-s Exya wa n-Enəsselmäḡ; iyyäd jannen: käyy a-s ännäbi Ƴəli; iyyäd fəw a jannen: käyy a-s ännäbi Yirmiya† meḡ iyyän däḡ-ännäbitän dd-olasän uḡəl.»

¹⁵ Inn'-asän: «Käwāneḏ-š, ma tənnäm, mi ämoosäḡ?»

¹⁶ Iggäd-dd Bəḡrus, inn'-as: «Käyy a-s Älmaseḡ wa n-Rure-s n-Mässinäḡ-i iddärän.»

¹⁷ Inn'-as Ƴisa: «Simyon ägg Exya, tənḡəḡ-ak ed isälan wi s-iket tänjed, wädden ad-dd-təkkaşad däḡ-eḡäf-näk, Abba-nin-i hän isənnawän a hak-tän-dd-äsnäfalälän.

¹⁸ Näkk daḡ, ənnəḡ-ak: isəm-näk Bəḡrus,† ässiilmädäḡ-käy a-s fäll-tähunt-ten-däḡ, ad-mad-ädyäḡ älkänisät-in s-älaxarät wälä Iblis, wär fälla-s mad-ikreš ašäl;

¹⁹ ad-käy-äkfäḡ isyar n-Təmmənəya n-Mässinäḡ, a təgdäläd fäll-ärori n-äkall, ad-itwəgdəl däḡ-isənnawän, a täqbäläd fäll-ärori n-äkall, ad-itwäqbəl däḡ-isənnawän.»

²⁰ Äsmähäd Ƴisa ḡarät-a-wen s-äşşahät däḡ-inəṭṭulab-net i-ad-wär-ənnen i-äwadəm wäl' iyyän a-s ənta a-s Älmaseḡ.

*Issəlmäd Ƴisa inəṭṭulab-net s-tamättant-net d-tanäkra-net
(Marḡəs 8:31-9:1; Luqa 9:22-27)*

²¹ Ƴur-aşäl-wen-däḡ, ad-issəntä Ƴisa asəlmad n-inəṭṭulab-net a-s ilzam-t ad-äkk Ƴärussäläm, inhəy däḡ-s tersəmmawen äjjootnen jer-ifassän n-inušämän wi n-Işrayil d-imänokalän n-käl-tikutawen d-älḡulam n-Äṭṭäwrät; ad-əjön iman-net məşan, aşäl wa s-kəraḡ ḡarät tamättant-net, ad-dd-inkär jer-inəmmuttan.

²² Ij'-asän Ƴisa məjräd-wen-däḡ ḡas, ikkäs-t-dd Bəḡrus s-takše, ad-itikləwləw fälla-s, ijann'-as: «Äḡalim, oḡəḡ-käy Mässinäḡ! A-wen ya, wär t-illa əmmək s-käy-irmäs.»

²³ Ikna Ƴisa akäyad däḡ-Bəḡrus, inn'-as: «Şənkəş fäll-i Iblis-wa, käyy əssəbab n-anməşri a hi-təmoosad ed inəzjam-näk, i n-dägg-adəm wädden i n-Mässinäḡ.»

† 16:14 16:14 A-wa ännäbi dd-äzzarän i-Ƴisa, äloläy däḡ-isälan-net säḡisät timad n-awätay dat-tiwit-net. † 16:18 16:18 Älmäḡna n-isəm-net däḡ-Tälyunanit: Tähunt.

Alkum i-Ŷisa Ālmasex
(*Marqəs 8:34-9:1; Luqa 9:23-27*)

²⁴ Inna Ŷisa ɗarāt-a-wen i-inəttulab-net: «Ere irhän alkum-hahi-däx, adiŝ, iksənet iman-net, äjet fäll-tamättant šund ta n-tajəttewt təzzar, ilkəmet-ahi.

²⁵ Wa wärän itəttär ar əmmək s-ogəz iman-net däx-əddunya-ta-däx, ad-ifut däx-älžännät məšan, wa irdän äfota däx-iman-net däx-əddunya-ta-däx, däx-əddimmät-in, ad-ijjəŝ älzännät.

²⁶ Ma s-infa ägg-adəm ad-irbäx əddunya iket-däx-net, a-s ija a-wen, äfota däx-älaxärät? Ajän ma t-illan s-əddoobät äwadəm ad-t-äkf i-ad-sär-s ixləs iman-net däx-temse?

²⁷ Ašäl wa dd-mad-iqqəl Ägg-ägg-adəm däx-älxurmät n-Abba-net äddeew d-änjəlosän-net, ašäl-en, hak äwadəm d-a-wa has-jän imojjan-net.

²⁸ Ässiilmädäx-käwän a-s han-käwän äddinät əbdadnen diha-däx, wär-əba, wär-ənheyän Ägg-ägg-adəm ijaŝ Təmmənəya-net.»

17

Tihusay n-älxurmät n-Ŷisa Ālmasex
(*Marqəs 9:2-13; Luqa 9:28-36*)

¹ Sädis išilan ɗarāt a-s inna a-wen-däx, iyrä-dd Bətrus d-Yaqub d-Exya wa n-änṇa-s n-Yaqub s-edes, ikka dār-sän taɗaxt tiyyät šəjreet.

² Əllan-t dihen-däx a-s ijjaŝ data-sän ini äynayän, ämmuttäy, äsmäxmäx idəm-net šund täfukt, jän-dd imälsan-net təməlle ta n-ännur äsimäxmäxän.

³ A əndärrän ännäbi Mosa d-ännäbi Ŷəli da-däx hasän-dd-änfalälnen, falän-dd išənnawän, ad-taməjradän d-Ŷisa.

⁴ Iggäd-dd Bətrus, innä i-Ŷisa: «Älxalim, ufa ad-nəzzäx xas diha-däx, kunta tärɗed s-a-wen, ad-əkrəsäx kərəɗ ihəktan: wa-näkk, wa n-Mosa d-wa n-Ŷəli.»

⁵ Härwa-däx ämmiijräd a-s, tejäräkt tiyyät täsimäxmäxät da-däx tänd-d-təlsät s-tele-net, ijmäd-tät-dd eməsli innän:

«A-wa Rure-x wa əkneex tərha, ənta a däx-əsriwän iman-in, säjdät-as!»

⁶ Əslän inəttulab i-eməsli-wen-däx xas, hän-dd äbbunbəyän iket-däx-näsän a-wa-däx hasän-təja tərəmməxt.

⁷ Ikk'-en-dd Ŷisa, issənsä ifassän-net fälla-sän, inn'-asän: «Wär tərmeṅäm, ənkärät-dd.»

⁸ A-s dd-əɗkälän idmawän-näsän, wär t-illa ere hannäyän ar Ŷisa.

⁹ Ätrarän-dd taɗaxt xas, inn'-asän Ŷisa: «Wär jem isälan n-a-wa hawän-dd-änfalälän ašäl-i-däx i-äwadəm wäl' iyyän, har ašäl wa dd-mad-inkär Ägg-ägg-adəm jer-inəmmuttan.»

¹⁰ Əssəstänän-t ɗarāt-a-wen, ənnän-as: «Mafäl jannen älyulam n-Ättäwrät a-s ännäbi Ŷəli a ilan s-ad-dd-ass təzzar, išrəy-t-dd Ālmasex?»

¹¹ Äwwežäb-asän, inn'-asän: «Tidət, ännäbi Ŷəli a ilan s-a-dd-ass, isəssiṅəd härät iket-net,

¹² məšan, ässiilmädäx-käwän a-s ännäbi Ŷəli, äru dd-osa, äkkuddälän-t dagg-adəm, jän-as a-wa s-ärhän. A-wen-däx has-jän a-s ilkam daṅ, ad-t-əjən i-Ägg-ägg-adəm.»

¹³ Inn'-asän a-wen ɣas, əfhämän inəttulab a-s Exya wa n-Enəsselmäx a-s hasän-ihä ti-net.

*Äzozäy Ƴisa alyad n-amälšon
(Marqəs 9:14-29; Luqa 9:37-43a)*

¹⁴ Älwäqq wa dd-iqqäl Ƴisa d-inəttulab-net tamətte, ikk'-e-hi-dd ähaləs iyyän, irkäx data-s a t-ilaqqäd, ijann'-as:

¹⁵ «Älɣalim, adən tähanint i-rure-x, tøjraw-t tašäkärkärät t-saknet aɣäna hullan. E-d t-tärmäs, ad-itidəw däx-efew, itidəw däx-aman dehiyyän.

¹⁶ Äwwäyäx-t-dd s-inəttulab-näk mäšan, indär-asän ad-t-zuzəyän.»

¹⁷ Innäd-dd Ƴisa ɖarät-a-wen s-inəttulab-net, inn'-asän: «Ya əzzurəyät-i-däx wärät tomen s-Mässinäx, tänimäšräy-as, hundäx har əmme əlley jere-wän, əşbaräx-käwän? Awəyät-ahi-dd alyad.»

¹⁸ Os'-e-hi-dd alyad, äsmähäd Ƴisa däx-alšin i-ad-t-izjär; izjär-t, izzäy ässaɣät-wen-däx.

¹⁹ Əkkäsän-dd inəttulab ɖarät-a-wen Ƴisa s-ässaɣät d-wär ɣur-s t-illa äwadəm s-takše, ənnän-as: «Alšin-wənnin-hi, mafäl hanäx-indär ad-t-nəkkəs däx-alyad?»

²⁰ Inn'-asän: «Təmmətkit-i ija immun-näwän a hawän-igdälän s-a-wen; ənnar wädden a-wen, ässiilmädäx-käwän a-s afäl ogdäh immun-näwän d-temätäwt ta tojərät təmmətkit däx-idommän har tənnäm i-aɖax-wa-däx: <Haan däx-edägg wa hed, təddəkäd dihen>, ad-äj a-wa has-tənnäm; ad-äbas t-illa fäw a hawän-indarän. [

²¹ Alšin daɣ šund wa-hi, wär t-itəkkəs ar tamädilt n-Mässinäx d-äzum.]]»

*Äsihe wa s-əssin d-itajj Ƴisa isälan n-tamättant-net d-tänäkra-net
(Marqəs 9:30-32; Luqa 9:43-45)*

²² Älwäqq wa dd-iqqäl Ƴisa d-inəttulab-net teje ta n-Galila, inn'-asän: «Ägg-ägg-adəm, išwar ättermäs, ijješ ifassän n-ägg-adəm,

²³ ad-əjən iman-net mäšan, ašäl wa n-käraɖ, ad-dd-inkär jer-inəmmuttan.» Ənxäsän iman n-inəttulab a-s hasän-innä a-wen-däx.

Isälan n-tiwse

²⁴ Ijjäš Ƴisa d-inəttulab-net tayrəmt ta n-Qäfärnaxum ɣas, osän-dd in-armasän n-tiwse n-ehän n-ämudd wa mäqqärän Bətrus, ənnän-as: «Ajän älɣalim wa-näwän, wär-ihəkk tiwse ta n-ehän n-ämudd wa mäqqärän?»

²⁵ Inn'-asän Bətrus: «Ihakk'-et lab.» Ijjäš-dd Bətrus ehän fäll-Ƴisa ɣas, iššəšwär-as Ƴisa, issəstän-t, inn'-as: «Ma torded Simyon, mi ilan s-ad-itəzəl tiwse i-imänokalän n-äddunya: ak iməjarän meɣ käl-äkall a lanen s-ad-hasän-əzəlän tiwse?» Inn'-as Bətrus: «Iməjarän.»

²⁶ Inn'-as Ƴisa: «Adiš käl-äkall, wär tän-təlzem.

²⁷ Ämära, i-ad-wär näqqen iɣäfawän n-äddinät n-ehän n-ämudd wa mäqqärän rammäsnen tiwse, äkk ejänš, tərməsäd-dd däx-s emän iyyän, tarəd emm-net, ad-däx-s tøjrowäd ärriyal n-azrəf, təkkəsät-t-dd, təzləd fölla-näx näkk d-käyy.»

18

*Tärha n-mijraw
(Marqəs 9:33-37; Luqa 9:46-48)*

¹ Ohäzän-dd inəttulab Ƴisa älwäqq-wen, ənnän-as: «Ma ämoos äwadəm wa ojärän däx-Təmmənəya n-Mässinäx?»

² Iyrä-dd Ƴisa ara əndärrän s-iman-net, ij'-e jere-sän,

³ inn'-asän: «Ässiilmädäy-käwän a-s a tökkäsäm wär tutabäm, talöhöm d-aratän, xäram-awän ujəš n-Təmmənəya n-Mässinäy.

⁴ Ere wa äsräsän iman-net har aläh d-ara-wa-däy, ənta a-s wa ojārän däy-Təmmənəya n-Mässinäy;

⁵ ere daḡ wa äsbälälän ara šund wa-däy, däy-äddimmät-in, näkk a äsbäläl.»

*Wär jem a he-isiḡəwän äwadəm däy-abäkkad
(Marqəs 9:42-48; Luqa 17:1-2)*

⁶ «Aratän daḡ wi sār-i omännən, ere hasän-ämoosän əssəbab n-tanməšrayt-däy, äwadəm-en, iššäm-as-in, ad-tətwäqqən təhünt ta mäqqārät s-itəzzad älkäma däy-err-net, itwəjär-in däy-ider n-əjärew wa səmmän, əksən-t aman.

⁷ Tamäskoyt äddunya däy-təssəba n-tinməšrayen ti däy-s tajjänen fäl-a-s, wär t-illa əmmək fäw s-mad-täqqayəm äddunya-ta-däy wär däy-s änmäšräyän äddinät, mäšan, amäskoy äwadəm wa madän-umas əssəbab n-tanməšrayt-ten-däy.

⁸ Käyy, kunta äfuss-näk meḡ aḡär-näk a käy-isifun abäkkad, adiš, ənkäd-t-in, təjrəd-t-in fälla-k härwa wär tämešäläd abäkkad-wen-däy, ed uf'-ak, ad-təjjəšäd älzännät jeed äfuss, meḡ aḡär, uhən leed əssin ifassän-näk d-əssin idarän-näk, tətwəjäräd-in däy-efew wa s-härkuk ähijäljäl;

⁹ kunta daḡ tiṭṭ-näk a käy-isifun abäkkad, adiš, kukkərət-tät-dd, təjrəd-tät-in fälla-k härwa wär tämešäläd abäkkad-wen-däy, ed uf'-ak, ad-təjjəšäd älzännät jeed tiṭṭ, uhən ad-leed sänatät tiṭṭawen, tətwəjäräd-in däy-žohännäma, temse ta s-härkuk təhijäljäl.

¹⁰ He käwäneḡ! Wär läkkähät wäl' iyyän däy-aratän-win-däy ed ijmaḡ-t äššäk a-s əbdadän änjəlosän-näsän hak ässaḡät dat-Abba-nin-i ihän išənnawän i-ad-tän wär-itəḡḡis härät. [

¹¹ Ägg-ägg-adəm, osä-dd i-ad-iḡləs äddinät wi ässujjälnen.]»

*Isälan n-tehäle ta tässujjälät
(Luqa 15:3-7)*

¹² Inn'-asän ḡisa ḡarät-a-wen: «Ad-käwän-səstənäḡ: ma tənnäm? Kunta ila äwadəm teməḡe n-tehäle, har däy-snät tässujjäl tiyyät, ma he-äj? Wädden ad-äyy ti n-təzzayät timərwen d-təzzayät əfradnät fäll-tiḡayen, isəssəjjəl ta hin-oḡän?

¹³ Afäl-tät dd-ijräw, ad-äj tedäwit tojärät ta ija a-s ila ti n-təzzayät timərwen d-təzzayät wären ässujjäl.

¹⁴ Emmək-wen-däy daḡ a-s mad-äddäwät Abba-näwän-i ihän išənnawän ed wär-irha fäw ad-iba wäl' iyyän ḡas däy-aratän-net.

*Isälan n-tenäšše jer-imumənän däy-älkänisät
(Luqa 17:3)*

¹⁵ Afäl käy-idläm äḡḡa-k, äkk'-e, səlmədäd-t s-a-wa hak-iḡšäd jere-wän əssin-ewän ḡas. Afäl hak-äsjäd, adiš jed-t däy-tabarät ta toläḡät, wär t-illa daḡ a idasän temiḡt-näwän

¹⁶ mäšan, afäl unjäy s-asjəd-hak, əqqəl-t-dd täddewäd d-äwadəm, meḡ əssin, däy-təssəba n-ad-äjjayhän äddinät i-a-wa itawännən iket-net ed <Härät iket-net, ufa ad-ila sänatät meḡ kərəḡät tijuhaben.>

¹⁷ Afäl jed a-wen-däy uhən-däy har ämära-däy, unjay s-asjəd-hawän, sərrəwrəw-as s-älkänisät. Afäl has-təmməjräd älkänisät har unjäy s-asjəd-has, umaset data-k šund änäzzalim n-amäjar, meḡ šund änaras n-tiwse.

18 Äsidätteḡ-awän a-s a-wa təkṛädäm fäll-ärori n-äkall-i-däḡ, ad-itwəkṛəd ašäl wa ilkämän, a-wa toräm daḡ fäll-ärori n-äkall-i-däḡ, ad-ämar daḡ ašäl wa ilkämän.

Tartit däḡ-tamädilt n-Mässinäḡ

19 Ässiilmädäḡ-käwän daḡ a-s fäll-ärori n-äkall-i-däḡ, edägg däḡ-änmärdän əssin däḡ-wän fäll-talḡa, a tämoos-däḡ, har dälän Abba-nin-i ihän išənnawän, ad-äj a-wa däḡ-s əttärän

20 fäl-a-s edägg iket-net däḡ-äžžimmäḡän əssin, meḡ käraḡ inəṭṭulab-in, däḡ-äddimmät n-isəm-in, əlley jere-sän.»

Tenäšše d-iba-net

21 Ohäz-t-dd Bəṭrus älwäqq-wen, inn'-as: «Äḡalim! Har maniket ihändäggan d-hi-təwar tenäšše i-ənḡa-ḡ hi-iḡdallämän? Ak, ajän əgdähän əssa ihändäggan?»

22 Inn'-as ḡisa: «Äbo, wär-ənney har əssa ihändäggan, a hak-janneḡ, našš'-as har əssayät timərwen janen əssa inəḡfusän.»

23 Issäḡläy-tän ḡisa tangalt, inn'-asän: «Təmmənəya n-Mässinäḡ, täniḡäqqa d-ämänokal dd-issäḡrän äddinät wi irwäs i-ad-has-siḡənən a-wa tän-irwäs, əzəlän-as.

24 Han isälan n-a-wen-däḡ a-s dd-ittəlwäy änaxdim-net iyyän irwas azrəf-i-däḡ äjjen.

25 Mäšan ma n-əmmək! Indär-as ad-izəl azrəf-wen-däḡ ḡas, omär mässi-s s-ad-hin-änš ənta d-hänne-s d-aratän-net d-a-wa ila däḡ-ilälän iket-net i-ad-inmiwəḡ ənta d-ehäre-net.

26 Isl' änaxdim i-a-wen ḡas, ošäl s-mässi-s, irkäḡ dat-mässi-s, ad-t-ilaqqäd, ijann'-as: <Ya mässi-ḡ, əšbär fäll-i tene-ta-däḡ, təkḡəd-ahi täqqän täynayät i-ad-hak-əzəläḡ ehäre-näk iket-däḡ-net.>

27 Täḡya tähanint-net mässi-s ḡas, äsdärfät, inš'-as-in a-wa t-irwäs iket-net.

28 Mäšan, diha-däḡ dd-izjär änaxdim-ənnin-däḡ fäll-mässi-s, ad-ämmoqqäs d-iiyän däḡ-imidiwän-net dār-ännixdäm irwas härät n-azrəf, äkbättät-t s-täkorsäyt, oḡay-as, ijann'-as: <Əzəl-ahi ehäre-in wa käy-ihän.>

29 Irkäḡ-as amidi-net, ad-t-ilaqqäd, ijann'-as: <Əšbär fäll-i, ad-hak-əzəläḡ ehäre-näk.>

30 Unjäy s-ad-has-isəjəd, ilwäy-t, äswäjj'-e däḡ-takärmüt i-ad-tät-iha har has-izəl a-wa t-irwäs iket-net.

31 Ənhäyän inaxdimän wi iyyäḡnen dār-ännixdäm a-wa ija amidi-näsän ḡas, əknän iman-näsän tisanant, əḡlän, jän isälan n-a-wa ijän iket-net däḡ mässi-sän.

32 Issäḡr'-e-hi-dd mässi-s, inn'-as: <Käyy änaxdim n-enälläbäs a tämoosäd! Ajän wädden təlḡädäd-ahi ḡas, oyyeḡ-ak-in a-wa käy-ärwäsäḡ iket-net.>

33 Adiš, ma hak-igdalän, ad-taḡənäd tähanint šund ta hak-oḡänäḡ i-amidi-näk?»

34 Ijjäš-t aḡkär hullan fäll-akli-net-wen-däḡ, issäḡrä-dd ḡärditän-net i-ad-t-in-əjārän däḡ-takärmüt, äqqayəm ihannäy däḡ-s aḡäna har izəl a-wa t-irwäs has-in-oyya ihənnin iket-däḡ-net.»

35 Innä daḡ ḡarät-a-wen: «Əlmədät a-s šund a-wen-däḡ a hawän-mad-äj Abba-nin-i ihän išənnawän, afäl wär tənmənsim jer-iman-näwän s-ulh imdan.»

19

Aməzzi d-iba-net (Marqəs 10:1-12; Luqa 16:18)

¹ Issəmdä Yisa tənna n-isālan-win-däx ɣas, ifäl teje ta n-Galila, ikkä tidbi ti hin-əllanen i-ejäñš wa n-Ŷurdəni däx-teje ta n-Älyähudəyät;

² əlkämän-as-dd äddinät äjjootnen, äzozäy däx-sän wi ärhinnen.

³ Däx-a-wen-däx ad-dd-əbdädän käl-faris iyyäd data-s, orämän-t s-asəstan däx-innä a wärän itətwənn, ənnän-as: «Däx-a-wa innä alämär-nänäx, ak ajän xälal i-əhaləs, ad-izəmməzzəy hənne-s fäl-äsaru, a ämoos-däx?»

⁴ Äwwežəb-asän, inn'-asän: «Adiš kəwəneḍ wär täxrem däx-əlkəttab n-Mässinäx edəgg wa däx-ätwänna a-s:

<S-tizarät a-s dd-ixläk Ämaxlak äddunya, əhaləs d-tamäḍt a dd-ixläk.> »

⁵ Inn'-asän daḡ:

« <Təssəba n-a-wen-däx a fäl mad-ifəl əhaləs ti-s d-ma-s, asäx d-hənne-s, umasän fäll-əssin-essän, tiyyät taḡəssa.

⁶ Ad-äbas ämoosän əssin äddinät, ämoosän tiyyät taḡəssa.>

A-wen-däx a fäl, a-wa osäx Mässinäx i-ad-umas iyyän härät, wär t-ibəḍḍəwet ägg-adəm.»

⁷ Ənnän-as: «Adiš mafäl ijanna ännäbi Mosa a-s:

<Afäl irha əhaləs azəmməzzəy n-hənne-s, ilzam-t ad-tät-əkf təkarḍe n-aməzzi təzzar, izəmməzzəy-tät?» »

⁸ Inn'-asän Yisa: «A-wa hawän-innä ännäbi Mosa, inn'-awän-t däx-təssəba n-təxart-i jän ulhawän-nəwän; ənnar wädden a-wen, s-tizarät a-s dd-täxläk äddunya, wädden a-wen a dd-əzzəbbät Mässinäx.

⁹ Ässiilmädäx-kəwän a-s ere hin-äzməzzäyän hənne-s a-s, ija a-wen, wädden tikra a has-təja, oläs adubən n-iiyyät, izna.»

¹⁰ Əggädän-dd inəṭṭulab-net, ənnän-as: «Şəmad a-wen-däx a ijan, adiš, ufa ɣas, äqqiima äwadəm wəla adubən.»

¹¹ Inn'-asän Yisa: «Wädden äddinät iket-nəsän a äddobätnen ujreh n-mäjräd-wa-däx, wi ikfa Mässinäx turhajät-net ɣas, a t-jarrähnen.

¹² Tidət, wädden äddinät iket-nəsän a əjrawnen turhajät-ten-däx n-ad-äqqaymən wär-ədobänän: iyyäd, a-s dd-əwän-däx, əjrawän s-a-wen; iyyäd, əgdälän-asän-t imidiwän-nəsän-i tän-jänen imudäšan, əkkäsän-tän däx-meddən; iyyäd daḡ, unjäyän s-adubən däx-təssəba n-Təmmənəya n-Mässinäx.

Ere äddoben ujreh n-mäjräd-wa-däx, ijrähət-t.»

Ija Yisa əlbəraka däx-aratän (Marqəs 10:13-16; Luqa 18:15-17)

¹³ Ämmewäyän-dd ḍarät-a-wen aratän s-Yisa i-ad-tän-isəwär ifassän-net, ittär-asän däx-Mässinäx a däx-sän ijän əlbəraka; ənhäyän inəṭṭulab äddinät wi tän-dd-əwwäyən ɣas, äkläwləwän fälla-sän.

¹⁴ İxtäl-tän Yisa, inn'-asän: «Äyyät aratän ad-hi-dd-əkkən, wär tän-in-təwweɣäm fäll-i, fäl-a-s, Təmmənəya n-Mässinäx, äddinät wi ḍär-sän äniḑäqqänen a-s tät-ihakk.»

¹⁵ Äswär-tän ifassän-net ḍarät-a-wen, ija däx-sän əlbəraka təzzar, ifäl edəgg-en.

*Äddunya meɣ ālaxārät
(Marqəs 10:17-31; Luqa 18:18-30)*

¹⁶ Iglä ʒisa har šik-däɣ āhaləs iyyän da-däɣ t-dd-ikkän, inn'-as: «Äɣalim, ma ämoos emärked wa s-leɣ s-ad-t-äjäɣ i-ad-əjrəwäɣ tämudre ta täɣlälät?»

¹⁷ Inn'-as ʒisa: «Mafäl hi-sastanäd d-emärked s-täddobed iji-net? Milɣaw, Mässinäɣ ɣas a olaɣän. Ämära, kunta tärhed ad-təjrəwäd tämudre täynayät, adiš, mašäl alämärän n-Mässinäɣ.»

¹⁸ Inn'-as ämawað: «Win-š alämärän, ma ämoosän?» Inn'-as ʒisa: «Ēntäneð da: Wär jed iman, wär jed əzzəna, wär tokeräd, wär täjjəyhäd s-bahu,

¹⁹ səmɣär ti-k d-ma-k, tärhed anhäraj-näk s-tärha ta jed i-iman-näk.»

²⁰ Innä ämawað-en i-ʒisa: «Äɣdaläɣ i-a-wen-däɣ iket-net; ma t-illan daɣ hin-oðanäɣ?»

²¹ Inn'-as ʒisa: «Kunta tärhed ad-dd-təmdəwäd s-iba n-älɣib dat-Mässinäɣ, əgləw, tužžär-in ehäre-näk, təkfed-t i-tiläqqiwen i-ad-təkrəšäd ärrəzäɣ däɣ-älžännät; dihen, əqqəl-dd, əlkəm-ahi.»

²² Isl' ämawað i-a-wen-däɣ ɣas, ənxäsän iman-net, inkär iglä ed a-wa ila däɣ-ehäre, tikunen.

Tämudre ta täɣlälät d-ärrəzäɣ wa n-tidət

²³ Innä ʒisa ðarät-a-wen i-inəttulab-net: «Äsidätteɣ-awän a-s izzəwät ad-ijjəš ere irzaɣän Təmmənəya n-Mässinäɣ.

²⁴ Ojär täräɣse ta ija ad-ijjəš amnəs s-titt n-änazmay uhən, ad-ijjəš ere irzaɣän Təmmənəya n-Mässinäɣ.»

²⁵ Ēslän inəttulab i-a-wen ɣas, əqqänän iɣäfawän-näsän, ənnän-as: «Adiš mi madän-iɣləs?»

²⁶ Ikyäd däɣ-sän ʒisa, inn'-asän: «A-wen, wär t-äsmäkkänän dägg-adəm, mäšan Mässinäɣ ənta, äddoobät-t ed wär t-illa a has-indarän.»

²⁷ Iggäd-dd Bətrus, inn'-as: «Näkkäneð-i-š-i oyyänen a-wa nəla iket-net nəlkäm-ak, əndek isälan-nänäɣ, ma s-ilkam ad-t-nəjrəw?»

²⁸ Inn'-asän ʒisa: «Äsidätteɣ-awän a-s ašäl wa dd-mad-təzzubbət äddunya-ta täynayät-i däɣ-mad-ixkəm Ägg-ägg-adəm däɣ-älxurmät-net fäll-härät iket-net, ad-täqqayməm käwäneð-i hi-əlkämnen fäll-märawät tisäqqima n-təmmənukəla d-sänatät, təšräɣäm tiwsaten ti n-märawät d-sänatät n-Işrayil.

²⁹ Ere oyyän ihänan-net d-ayətma-s d-šätma-s d-ti-s d-ma-s d-məddana-s d-išekraš-net däɣ-äddimmät-in, ilmədet a-s ad-ijrəw a-wa hin-oyyä ija temeðe n-anəðfus, ijrəw daɣ tämudre ta täɣlälät.

³⁰ Älwäxla a-s a äjjeen däɣ-wi äzzarnen ašäl-i-däɣ, ad-ijjəš ajilal, a äjjeen daɣ däɣ-wi hänen ajilal ašäl-i-däɣ, ad-izar.»

20

Isälan n-mässi-s n-ašəkrəš d-inaxdimän-net

¹ Issäɣläy-tän ʒisa tangalt ðarät-a-wen, inn'-asän: «Təmmənəya n-Mässinäɣ, tänifäqqa d-āhaləs ilan ašəkrəš-net; äffaw-t ɣas, ifäl ehän-net, immäɣ i-inaxdimän issäxdäm ašəkrəš-net n-läɣnəb.

² Änmännäk ðär-sän fäll-timɣal n-ärriyal n-azrəf i-ašäl təzzar, ässok'-en ašəkrəš-net i-ad-t-əxdəmän.

³ Ij' agdəlset ɣas, oläs azäjor, ijrəw iyyäd äqqimnen ädiwännən wär-išla härät, idkäl-tän;

⁴ ǝntǝnǝd-dǝχ, inn'-asǝn: <Ǟglǝt kǝwǝnǝd-dǝχ tǝxdǝmǝm dǝχ-ašǝkrǝš-in wa n-lǝχnǝb, ad-kǝwǝn-ǝkfǝχ ǝlχaqq n-tǝde-nǝwǝn>;

⁵ ǝglǝn, ǝxdǝmǝn. Tǝjǝ tarǝhut χas, olǝs ađkul n-iyǝǝđ, olǝs dǝχ iji n-a-wen s-tezzar.

⁶ Tǝglǝ takkǝšt χas, izjǝr dǝχ, inhǝy iyyǝđ ǝbdadnen wǝr tǝn-išla hǝrǝt, inn'-asǝn: <Kǝwǝnǝd ma s-tǝbdadǝm ašǝl iket-net, wǝr t-illa a kǝwǝn-išlan?>

⁷ Ǟnnǝn-as: <Wǝr t-illa ere hanǝχ-ikfan ǝššǝχǝl.> Inn'-asǝn: <Ǟkkǝt kǝwǝnǝd-dǝχ ašǝkrǝš-in, tǝxdǝmǝm dǝχ-s.>

⁸ Todǝ tǝfukt χas, issǝχrǝ-dd mǝssi-s n-ašǝkrǝš ǝnazraf-net, inn'-as: <Ǟχǝr-dd inaxdimǝn, tǝzǝd-asǝn, sǝnt s-wi dd-ǝšrǝynen har tǝkkǝd wi dd-ǝzzarnen.>

⁹ Ǟjrǝwǝn wi dd-osǝnen šǝmad tǝgla takkǝšt timzǝl-nǝsǝn; hak iyyǝn ijraw ǝrriyal n-azrǝf wa ǝmoosǝn timzǝl n-ašǝl.

¹⁰ Osǝn-dd đarǝt-a-wen wi dd-ǝzzarnen s-ǝlχidmǝt ija χur-sǝn a-s, ad-ǝjǝrǝn inaxdimǝn-wi dd-ǝšrǝynen timzǝl mǝšǝn, ǝjrǝwǝn ǝntǝnǝd-dǝχ ǝrriyal n-azrǝf šund wa ǝjrǝwǝn inaxdimǝn wi n-tišrayǝt dǝχ-ǝlχidmǝt.

¹¹ Ǟjrǝwǝn timzǝl-nǝsǝn χas, ǝbjǝnjǝnǝn fǝll-mǝssi-s n-ašǝkrǝš, ad-has-jannen:

¹² <Ajǝn wǝdden inaxdimǝn-wi dd-ǝšrǝynen, iyyǝn n-ǝssaχǝt χas a jǝn ǝxdǝmǝn, a-s ija a-wen nǝkkǝnǝd, ašǝl imdan a nǝja nǝxdǝm, siknǝnniwǝt-anǝχ tǝfukt. χas ǝndek ǝmmǝk wa s-ila a-s ad-dǝr-sǝn nagdǝh timzǝl?>

¹³ Innǝ mǝssi-s n-ašǝkrǝš i-iyǝn dǝχ-sǝn: <Amidi-nin, wǝr-ǝkšǝχ ǝlχaqq-nǝk, wǝdden ǝrriyal n-azrǝf a fǝll-nǝnnǝfhǝm, ǝkfǝχ-ak-t, ma tǝrhed dǝχ?>

¹⁴ Ǟrmǝs ehǝre-nǝk, tǝglǝd. Ma dǝχ-kǝy-ikma a-s ǝsisǝgdǝhǝχ-kǝy dǝχ-azrǝf-in kǝyy-i dd-ǝzzarǝn, tajǝđ dǝχ-i erk asǝwǝđ, d-wa dd-išrǝyǝn?

¹⁵ Ajǝn wǝdden a-wa ehǝre-nin s-ǝddoobǝχ ad-has-ǝjǝχ a-wa s-ǝrheχ. Ma dǝχ-kǝy-ikma a-s olǝχǝχ? »

¹⁶ Innǝ χisa đarǝt-a-wen: «Ǟlmǝđǝt a-s s-ǝmmǝk-wen-dǝχ a-s ǝddinǝt wi hǝnen ajilal, ad-izarǝn mǝšǝn, wi ǝzzarnen, ad-ǝjjǝšǝn ajilal.»

*Ǟsihe wa s-kǝrađ d-itajj χisa isǝlan n-tamǝttant-net d-tanǝkra-net
(Marqǝs 10:32-34; Luqa 18:31-34)*

¹⁷ Ǟlwǝqq wa d-irmǝs χisa tamdujt ta n-Yǝrussǝlam, ikkǝs-dd inǝtǝulab-net s-takšǝ, inn'-asǝn:

¹⁸ «Ǟnhǝywǝt, nǝkkǝnǝd-da-hi ǝjozǝynen, nǝkka Yǝrussǝlam-i-dǝχ mad-ǝttǝrmǝs Ǟgg-ǝgg-adǝm i-ad-ijǝš ifassǝn n-imǝnokalǝn n-kǝl-tikutawen d-ǝlyulam n-Ǟtǝawrǝt; ad-t-siđǝwǝn dǝχ-ǝššǝreχa-nǝsǝn, ǝχtǝsǝn-as tamǝttant,

¹⁹ ǝjǝn-t dǝχ-ifassǝn n-inǝzzulam†-i t-maden-ǝj tekǝškǝšt, ǝjǝn dǝχ-s tiwit s-ǝbǝrtǝk, ǝšlǝbǝn-t fǝll-tajǝttewt i-ad-ǝmmǝt mǝšǝn, ašǝl wa n-kǝrađ đarǝt tamǝttant-net, ad-dd-inkǝr jer-inǝmmuttan.»

*A-wa tǝttǝr ma-s n-dǝgg-Zǝbdi dǝχ-χisa
(Marqǝs 10:35-45)*

²⁰ Dǝχ-a-wen-dǝχ, ad-dd-tosa hǝnne-s n-Zǝbdi χisa, ǝnta d-mǝddana-s wi n-ǝssin, tǝrkǝχ data-s, tǝnn'-as tǝrha a dǝχ-s tǝttǝr hǝrǝt iyyǝn.

† 20:19 20:19 – χur-kǝl-Ǟlyǝhud, ere wǝrǝn ǝmoos ǝgg-Ǟlyǝhud s-alǝšǝl meχ ere wǝrǝn ilkem i-ǝddin-nǝsǝn, iket-net, ǝnazǝalim a ǝmoos. A-wen-dǝχ a fǝl tiwsaten ti iyyǝđnen iket-nǝsnǝt, ti n-inǝzzulam. — Ašǝl-i-dǝχ, ǝnazǝalim, ǝkǝfǝr (ere wǝrǝn issen s-Mǝssinǝχ).

²¹ Inn'-as Үisa: «Ma tärhed?» Tənn'-as: «Ғessin ilyadän wi leex, əntəneḍ da, äj'-ahi ärkäwäl n-a-s ašäl wa dd-mad-täqqələd dāḡ-Təmmənəya-näk, ad-säqqayməd iyyän daw-aḡil-näk, säqqayməd wa iyyadän daw-täšalje-näk.»

²² Äwwežäb-as Үisa, inn'-as: «Käwäneḍ, wär төssenäm a dār-sästanäm. Ajän näkk, kara n-tisnant wa s-ilkam ad-t-äswäḡ, täddoobem tesäse-net?» Ғinnän-as dägg-Zäbdi: «Näddoobät-t.»

²³ Inn'-asän Үisa: «Tidət lab a-s ad-tənhəyäm älyizabät šund wa mad-ənhəyäḡ mäšan, dāḡ-isälan wi n-taḡimit daw-aḡil-in d-täšalje-nin, wädden näkk a ihakkän a-wen; Abba-nin a t-ihakkän i-wi s-t-äsmäjnät.»

Mijraw wa n-tidət

²⁴ Ғislän inəṭṭulab wi iyyadnen n-märaw i-a-wen ḡas, ijjäš-tän älhäm fäll-ayətma-win-dāḡ n-əssin.

²⁵ Iḡr'-en-dd Үisa iket-näsän s-iman-net, inn'-asän: «Təssanäm a-s imänokalän äxkämän fäll-käl-äkall-näsän s-äššahät; käl-əlxəkum daḡ, wär lämməḍän fäll-käl-äkall

²⁶ mäšan, käwäweḍ, wär jem a-wen; wa dāḡ-wän irhän mijraw, umaset änaxdim i-imidiwän-net,

²⁷ ere dāḡ-wän irhän täzert, umaset akli n-imidiwän-net təzzar,

²⁸ s-əmmək wa s-Ägg-ägg-adəm, wär dd-ämesäl s-äddunya i-ad-has-əxdəmän äddinät, ämesäl-dd sār-s i-ad-ixdəm ənta iman-net, äkf iman-net, ämmät i-ad-isəddärfət äddinät äjjootnen dāḡ-ibäkkadän-näsän.»

Iməddorḡal wi n-əssin äzozäy Үisa

(Marḡəs 10:46-52; Luḡa 18:35-43)

²⁹ A-s dd-izjār Үisa d-inəṭṭulab-net taḡrəmt ta n-Žärriko, төlkäm-as tamətte täjjeet.

³⁰ Iḡla har a əndärrän, əssin iməddorḡal da-dāḡ, äqqiimän dāḡ-asälim n-zäbo wa dd-ija. Ғislän a-s Үisa a okayän ḡas, ad-saḡären, jannen: «Ya Ägg-Dawəd, aḍən-anäḡ tähanint!»

³¹ Үattäl-tän tamətte i-ad-hin-susəmän mäšan, äsḡären dāḡ-išənnawän: «Ya Äḡalim, Ägg-Dawəd, aḍən-anäḡ tähanint!»

³² Isl'-asän Үisa, ibdäd, iḡr'-en-dd, inn'-asän: «Ma s-tärham ad-hawän-t-äjäḡ?»

³³ Ғinnän-as: «Äḡalim, arr tiṭṭawen-nänäḡ i-ad-nənhəy.»

³⁴ Täny'-e tähanint-näsän, idäs tiṭṭawen-näsän, ämeränät ässaḡät-wen-dāḡ, oläsän ahänay; əlkämän-as ḍarät-a-wen.

21

Ujəš n-Үisa i-ayrəm wa n-Yärussälam

(Marḡəs 11:1-11; Luḡa 19:28-40; Exya 12:12-19)

¹ Ohäz-in Үisa d-inəṭṭulab-net Yärussälam, iha ämära taḡrəmt ta n-Bätfaži, edes i-taḍaḡt ta täsijätät ihəškan wi n-əzzäytun, äšməšäl əssin dāḡ-inəṭṭulab-net,

² inn'-asän: «Äkkät tadäbayt ta n-data-wän, төjjašäm-tät ḡas, ad-dāḡ-s төjrəwäm tešəḍt төkrafät s-t-illa äza-net edes-has; arät-tät-dd, төlwəyäm-ahi-tät-dd ənta d-äza.

³ Ere hawän-innän härät, ännät-as: «Äḡalim a dāḡ-sän ilan əššäḡəl,» afäl has-tənnäm a-wen, ad-hawän-dd-äyy tešəḍt hakd d-äza-net.»

⁴ Ämoos a-wen a ässiitbätän a-wa innä ännäbi n-Mässinäḡ a-s innä:

5 «Ännät i-käl-Yärußsälam:
 Enhəywät, ikk'-iwän-in ämänokal-nəwän,
 ikk'-iwän-in s-əmmək wärän inbej titt,
 ešed ɣas a inay
 ara n-tešədt ɣas a inay.»

6 Əglän inəttulab, jän a-wa hasän-inna Ƴisa;

7 wätän-as-dd tešədt d-äza-net, əstäjän-asän isəlsa-näsän təzzar, inäy Ƴisa äza.

8 Ad-fattäy ya tamətte iket-net, isəlsa fäll-tabarät-ta ija, nakkädän-dd iyyäd iledledän däx-ihəşkan, säns'-en-tän däx-zäbo-wa ija i-asəmyar-net.

9 Täseɣarät tamətte-ta has-täzzarät hakd ta has-təlkämät, janna:

«Ozana!

Näkfet Mässinäy semɣar

däx-təssəba n-Ägg-Dawəd,

Ija Mässinäy älbäraka däx-wa dd-osän däx-isəm n-Emäli,

Imɣaret isəm n-Emäli däx-işənnawän iket-däx-näsän!»

10 Ijjäş-dd Ƴisa Yärußsälam ɣas, ämramär aɣrəm iket-däx-net, hak äwadəm-däx, ibdad, ijanna i-amidi-net: «Ma ämoos äwadəm-wa hanäx-dd-ijjäşän?»

11 Ad-janna tamətte ta təlkämät i-Ƴisa: «A-wa Ƴisa, ännäbi wa dd-ifälän Näşirät ta n-Galila.»

Işšəşdäj Ƴisa ehän n-ämudd wa mäqqärän

(Marqəs 11:15-19; Luqa 19:45-48; Exya 2:13-22)

12 Ijjäş Ƴisa ɟarät-a-wen ehän n-ämudd wa mäqqärän ihän Yärußsälam, ad-däx-s isattäy ättužžar d-imäžänšan-näsän, äsbäräxwäl tisəskar ti n-käl-amähaş n-izärfan, ijjar-in tisəqqima n-ättužžar n-tidäberən,

13 isattäx-tän, ijann'-asän: «Wädden iktab a-s, innä Mässinäy:

<Ehän-in, ad-umas ehän n-tittar>;

māšan kəwəneɟ jəm-t, tasəssihärt n-imäkrädän.»

14 Iha Ƴisa ehän n-ämudd-en-däx a-s t-dd-osän iməddorɣal d-inəbdan, äzozäy-tän.

15 Əggädän aratän hanen ehän n-ämudd-en-däx, ad-saɣären, jannen:

«Ozana!

Näkfet Mässinäy semɣar däx-təssəba n-Ägg-Dawəd!»

Enhäyän imänokalän n-käl-tikutawen d-älɣulam n-Ättäwrät tikunen-ti s-iket tänät-ija, əslän i-a-wa jannen aratän ɣas, ijjäş-tän älhäm fäll-Ƴisa.

16 Əggädän-dd sār-s, ənnän-as: «Ajän käyy, wär selləd i-a-wa jannen aratän-wi-däx?» Inn'-asän Ƴisa: «Salläx-asän.» Oläs, inn'-asän: «Ajän wär täyrem a-wa innä Mässinäy däx-əlkəttab-net, a-s innä:

<Imawän n-aratän d-imärkäsän

ad-dd-zajjār təmmal i-Mässinäy.> »

17 Ifäl Ƴisa edägg-en ɣas, odwa tadəbayt ta n-Bitanya.

Ahəşk wa ilxän Ƴisa

(Marqəs 11:12-14, 20-26)

18 Äffäw, iqqäl Ƴisa Yärußsälam däx-a-s älluz.

19 Däx-tekle-net, inhäy ahəşk n-aşar ixtan däx-asälim n-zäbo, ikk'-e-hi-dd māšan, wär fälla-s ijrew ar ifärketän, wär t-hen aratän. Imməjräd i-ahəşk, inn'-as: «Ija Mässinäy a-s wär-ilkem ad-torawäd!» Äqqur-in ahəşk-en s-iyyät älwäqq-wen-däx.

20 Enhäyän inəttulab a-wen ɣas, äqqänän iɣäfawän-näsän ad-jannen: «Əndek əmmək wa s-hin-äqqur aşar wa-däx s-iyyät?»

²¹ Inn'-asän Yisa: «Äsidättey-awän a-s afäl itbat immun-nāwän, wär t-illa äššäk t-ihan, ad-tudabem iji n-a-wa jeḡ i-ašar-wa-däḡ, tēglēm fāw har afäl tēnnām i-aḡaḡ wa-däḡ: <Tälbäy-dd däḡ-edägg wa hed, täḡtēd däḡ-ejärew wa sēmmän dihen>, ad-äj a-wa tēnnām.

²² A däḡ-dälām Mässinäḡ s-ulh omanän-däḡ, ad-hawän-t-äkf.»

Mäjräd wa ija Yisa d-imänokalän n-käl-tikutawen däḡ-ehän n-ämudd (Marqəs 11:27-33; Luqa 20:1-8)

²³ Ijjäš Yisa ehän n-ämudd wa mäqqārän, isayra tamette dihen a-s t-dd osän imänokalän n-käl-tikutawen d-inušämän n-Išrayil, ənnän-as: «Mi käy-ikfän turhajät n-amišəl n-tikunen-ti-däḡ? Mi käy-ikfän tärna-ta-däḡ s-täjjäd a-wa täjjäd?»

²⁴ Äwwežäb-asän Yisa, inn'-asän: «Ad-hawän-äjäḡ näkk-däḡ asəstan iyyän, afäl hi-täwwežäbäm, ad-hawän-älläḡeḡ näkk-däḡ ere wa hi-ikfän turhajät ta s-tamašäläḡ a-wa täjjäḡ.»

²⁵ Inn'-asän: «Mi dd-äšmašälän Exya wa n-Enəsselmäḡ i-ad-isəlmäḡ äddinät däḡ-aman? Ak Mässinäḡ a t-dd-äšmašälän meḡ dägg-adəm ḡas?» Inn'-asän a-wen ḡas, əqqälän-dd, ämmiizäḡän jer-iman-näsän, jannen: «Afäl has-nənnä: <Mässinäḡ a t-dd-äšmašälän>, ad-hanäḡ-änn: <Adiš, mafäl wär tomenäm s-a-wa hawän-innä.»

²⁶ Afäl has-nənnä daḡ dägg-adəm ḡas a t-dd-äšmašälän, ad-fälla-näḡ tiḡəw tamette-ta-däḡ ed təkkaš iket-net äššäk a-s Exya ännäbi n-Mässinäḡ a ämoos.»

²⁷ Əqqälän-t-dd, ənnän-as: «Wär nəssen.» Inn'-asän Yisa: «Adiš näkk-däḡ, wär hawän-e-älläḡeḡ ere wa hi-ikfän tärna ta s-täjjäd a-wa täjjäḡ.»

Aratän wi n-əssin

²⁸ Innä Yisa ḡarät-a-wen i-äddinät wi has-äsijädnen: «Ma tēnnām däḡ-tanfust-ta-däḡ? Ätwänna, käla t-illa ähaləs ilan əssin aratän. Ašäl iyyän, iḡrä-dd däḡ-sän wa iššämän, inn'-as: <Alyaḡ-in, ašäl-i, äkk ašəkrəš wa n-läḡnəb, täxdəmän däḡ-s.»

²⁹ Inn'-as rure-s, wär-igla mäšan, a əndärrän ḡarät-a-wen, ämmujräz, ikk' ašəkrəš, ixdəm däḡ-s.

³⁰ Iḡrä-dd daḡ wa s-əssin, inn'-as a ənnin-däḡ innä i-wa äzzarän. Inn'-as rure-s, igla mäšan, a-s dd-təšräy tanfust, wär-igla.

³¹ Ämära, əndek däḡ-sän wa ämešälän erhet n-abba-net?» Ənnän-as äddinät: «Un, wa äzzarän.» Inn'-asän Yisa: «Äsidättey-awän a-s käwäned-i hannäyäḡ, ad-hawän-izarän käl-tiwse d-tälkäxbaten uješ n-Təmmənəya n-Mässinäḡ.

³² Exya, a-s käwän-dd-osa, issəkn'-iwän tabarät ta n-iqqud mäšan, tunjäyäm tomänäm s-a-wa hawän-innä, a-s ija a-wen käl-tiwse d-tälkäxbaten, omänän sār-s; täjjihäm i-a-wen-däḡ iket-net mäšan, wär tätubäm, tamənäm s-a-wa hawän-innä.»

Inaxdimän wi n-inälläbäsän (Marqəs 12:1-12; Luqa 20:9-19)

³³ Issäḡläy Yisa tamette tangalt tiyyät däḡ-innä: «Säjdät! Käla t-illa ähaləs ilan təfärre-net, ij'-as afäraj, ija däḡ-s ašəkrəš n-läḡnəb, ija daḡ däḡ-ašrut-net iyyän, edägg wa däḡ-iḡimməw läḡnəb, iday däḡ-s edägg n-soro i-ämagaz-net; ifär-t ḡarät-a-wen i-inəsduma iyyäd təzzar, ikk' äkall iyyän.

³⁴ Täwwäḡ-dd täqqän n-amili n-ašəkrəš ḡas, äšmašäl-dd s-inəsduma inaxdimän-net, i-ad-has-dd-awəyän folät-net däḡ-a-wa dd-orāw ašəkrəš;

³⁵ māšan, ānaxdim sār-sān dd-āšmašāl-dāḡ, ad-t-ārməsān, ad-tithəkken meḡ jän iman-net meḡ t-əkfān sāmājori n-tihun.

³⁶ Olās-dd daḡ ašəmmišel n-inaxdimān iyyād sār-sān, issəlškām-asān-dd daḡ i-ājootnen ojārnen wi sār-sān āšmašāl s-tizarāt; jän-asān a ənnin-dāḡ jän i-wi hasān-dd-āzzarnen.

³⁷ A-s təšrāy tanfust, rure-s iman-net a sār-sān dd-āšmašāl ed, inna dāḡ-iman-net: <Ēnta ya i n-rure-ḡ, ānihājja s-ad-t-səmyārān.>

³⁸ Māšan, ənhāyān inəsduma rure-s wa dd-imalān ḡas, ānmānnān jer-iman-nāsān: <Ēnhəywāt-ak, amākkasu-net; əyyāwāt, nājet iman-net i-ad-hanāḡ-dd-tāqqəl tākasit-net.>

³⁹ Osā-dd ḡas, ərmāsān-t, əzjārān dār-s ašəkrəš, āḡān-t kərəf.»

⁴⁰ Inn'-asān ḡisa: «Ma tordam, wi-dāḡ inaxdimān, ma hasān-mad-āj māssi-s n-ašəkrəš afāl tān-dd-osa, ənta iman-net?»

⁴¹ Ēnnān-as āddināt: «Adiš, afāl dd-osa iməkkərukaḡ-wi-dāḡ, wār hasān-e-aḡən tāhanint, ad-tān-ilhəs iket-dāḡ-nāsān, aləs tefert n-ašəkrəš-net i-iyād t-e-əkfənen folāt-net afāl dd-āwwāḡ āzzāman wa n-amili n-ašəkrəš.»

⁴² Inn'-asān ḡisa: «Adiš kāwāneḡ, kāla wār tāḡrem edāgg wa innān dāḡ-əlkəttab n-Māssināḡ a-s:

<Tāhunt ta hin-jārān ālbānnatān s-ənnān wār tənfa hārāt, ənta a-s a-s təšrāy tanfust,

tāmoos tāhunt ta tufāt n-aḡmār hakkāt āššahāt ehān;

a-wen iket-net Māssināḡ ad-t-ijān i-ad-umas

tāqqān n-eḡāf dat-tiṭṭawen-nānāḡ.> »

⁴³ Inn'-asān ḡisa: «Janneḡ-awān āmāra a-s dāḡ-təssəba n-a-wen-dāḡ a fāl, Təmmənəya n-Māssināḡ, ad-dāḡ-wān tāttārmās, tətəwəkf i-tamətəte tiyyāt madāt-tāmašāl a-wa hasān-tənnā dāḡ-erhet n-Māssināḡ.» [

⁴⁴ Tāhunt-ta-hi, ere fälla-s oḡān, ad-ārrāzrāz; ere fäll-toḡa daḡ, ad-t-təlkəz.]

⁴⁵ Ēslān imānokālān n-kāl-tikutawen d-kāl-faris i-tangalen-tin-dāḡ tān-issāḡlāy ḡisa ḡas, əlmādān a-s əntāneḡ-en-dāḡ a-s iha ti-nāsān.

⁴⁶ Ēttārān ad-t-ərməsān māšan, āksuḡān tamətəte ed, təkkaš āššāk a-s ḡisa, ānnābi a āmoos.

22

Isālan n-amājaru wa māqqārān

(Luḡa 14:15-24)

¹ Issāḡlāy ḡisa daḡ tamətəte tangalen dāḡ-isālan n-Təmmənəya n-Māssināḡ, innā:

² «Təmmənəya ta n-Māssināḡ, āddoobāt āwadəm ad-tāt-isənnəfāqq d-tanfust n-āmānokāl isidubunān rure-s. Ašāl wa d-itājj a-wen, āsmājarāt-dd āddināt ājootnen s-ehān-net.

³ Āmmujnāt-dd hārāt iket-net ḡas, āšmašāl inaxdimān-net s-āddināt wi dd-iḡra s-azli ašāl-wen-dāḡ; māšan, unjāyān iket-dāḡ-nāsān s-ad-dd-asən.

⁴ Olās sār-sān ašəmmišel n-eklan sāl winnin-dāḡ āzzarnen, inn'-asān: <Āḡlāt, ānnāt i-āddināt: tāwwāḡām-ahi, imənsiwān, āmmujnen, əssānḡāḡ-awān a-wa iddāren iket-net jer-wa n-iwan hakd wa n-taḡsiwen; əyyāwāt šik, kāwāneḡ ḡas a-s iqqal azli āmāra.>

⁵ Wār jen teḡare ta tān-dd-ija hārāt, iḡlā hak iyyān dāḡ-əššāḡəl-net: wa ikkān ašəkrəš-net, wa ikkān mamāla-net;

⁶ əḡḡādān-dd iyyād fāw, ərmāsān hārāt dāḡ-inaxdimān wi dd-āšmašāl āmānokāl, āsmāḡrāyān iyyād, jän iman n-iyād.

⁷ Æjjäšän isälan ämänokal ɣas, ijjäš-t älhäm, iyrä-dd ejhän n-össärdusa-net, issögl'-en i-ad-өлhösän imäjjan n-iman-win-däɣ, sөntösän aɣrөm-näsän.

⁸ Innä ɗarät-a-wen i-inaxdimän-net iyyäɗ: <Imөnsiwän wi n-azli, өskärän-dd, mäšan äddinät wi dd-äsmäjareɣ sär-sän, wär ɗär-sän änhäjjan,

⁹ äglät ämära, ilalät tišarriten n-aɣrөm ti ɗäɣ-tazämmaɣän äddinät, ere ɗär-tämмоqğäsäm-däɣ, sömmөjorum-t-dd s-ehän-in.>

¹⁰ Ällilän inaxdimän tišarriten iket-däɣ-näsnät, äsdäwän-dd a-wa өjräwän ɗäɣ-äddinät iket-net jer-wi n-erk äddinät hakd-däɣ wi n-imөssorha, iɗnäy ehän tamөtte.

¹¹ Ijjäš-dd ämänokal fäll-tamөtte i-ad-tät-isөbbärrök. Äzjazza tamөtte, ijräh-in a-s ih'-et ähalөs wärän ija isөlsa wi s-änihäjja s-ad-tän-äj ere ihan azli, wär-ässahäɣ ašäl.

¹² Issäɣr'-e-hi-dd, inn'-as: <Mändam! Ændek өmmök wa s-dd-tөjjäšäɗ edägg-wa-däɣ a-s wär tässahäɣäɗ ašäl?> Wär t-illa a has-inna ähalөs-en.

¹³ Inna ämänokal i-inaxdimän-net iyyäɗ: <Ärmөsät-t, tökrөdäm iɗarän-net hakd ifassän-net, töjrөm-t-in ɗäɣ-tihay ti n-ajäma i-ad-ihall, ižimökärkiž isenän fäl tämujrižt.>

¹⁴ Tidөt, ätwäɣrän-dd äddinät äjjootnen mäšan, wär өjjөtän wi өnnөfrännen.»

*Isälan n-tiwse i-ämänokal Qäyšär
(Marqөs 12:13-17; Luqa 20:20-26)*

¹⁵ Änmäkkäsän käl-faris s-takše ɗarät-a-wen, ad-tattärän өmmök s-äswännän Үisa a wärän itөtwөnn i-ad-t-sөttärmөsän.

¹⁶ Äšmašälän-dd sär-s härät ɗäɣ-inөtтуlab-näsän äddewnen d-iyyäɗ la taggayt ta n-käl-Harudөs; osän-t-dd, өnnän-as: «Äɣalim, nөssan a-s tidөt ɣas a janned, wär säɣrid ar tabarät ta n-tuksөɗa n-Mässinäɣ, wär täkkuläɗ d-a-wa jännen äddinät, wär tän-täzmäzläyäɗ;

¹⁷ ämära, läɣät-anäɣ, ɗäɣ-a-wa hannäyäɗ: ak iwar-anäɣ ad-nөzөл tiwse i-ämänokal wa mäqqärän Qäyšär meɣ?»

¹⁸ Ilmäɗ Үisa ɣur-iman-net erk өnniyät n-asөstan wa t-jän ɣas, inn'-asän: «Älmunafөɣän yaden! Mafäl hi-tižärrubum?»

¹⁹ Inn'-asän ɗarät-a-wen: «Säknät-ahi-dd ärriyal n-azrөf wa s-tөzzäläm tiwse», өkfän-as-t-dd.

²⁰ Inn'-asän: «Mi län ättaşwer d-isөm wa t-iwärän?»

²¹ Ænnän-as: «I n-ämänokal Qäyšär.» Inn'-asän: «Adiš, suɣөлät i-ämänokal wa mäqqärän a-wa fälla-wän ila, tökfөm ɗäɣ Mässinäɣ a-wa fälla-wän ila.»

²² Iqqän älwizab-wen-däɣ tän-ikfa iɣäfawän n-äddinät. Fälän Үisa ɗarät-a-wen, өglän.

*Äwwežäb Үisa ɗäɣ-isälan n-tanäkra jer-inөmmuttan
(Marqөs 12:18-27; Luqa 20:27-40)*

²³ Ašäl-wen-däɣ iman-net ad-dd-өbdäɗän data-s äddinät la taggayt ta n-käl-sadus-i jännänen a-s wär tölkem tanäkra jer-inөmmuttan, afäl äba äwadөm, өmdän isälan-net; өssөstänän-t,

²⁴ өnnän-as: «Äɣalim, inn'-anäɣ ännäbi Mosa: <Afäl ädobän ähalөs, äba-t wär-oher ara d-hänne-s, idubөnet-tät äñña-s i-ad-ikrөš өzzurөyät i-äñña-s wa äba, i-ad-wär hin-itolөm isөm n-wa äba fäll-ärori n-äkall.>

²⁵ Ämära, əkkəs-anəx dəx-təqqän n-eyäf. Käla hanəx-hän əssa ayətma; ädobän dəx-sän wa n-amäqqar, äba-t wär ikreš ara. Täqqimä-dd hänne-s i-ənğa-s wa has-ilkämän

²⁶ mäšan, äba-t ənta-dəx wär-oherän ara, təqqimä-dd i-wa s-kärađ darät-a-wen; təgla tanfust s-əmmək-wen-dəx har wa n-əssa.

²⁷ Darät iba-näsän iket-näsän, äba tamäđt ənta-dəx.

²⁸ Nässistän-käy: ašäl wa n-tanäkra jer-inəmmuttan, əndek dəx-əssa ayətma-win-dəx wa s-mad-tumas hänne-s ed, ənhayän-tät adubən iket-näsän?»

²⁹ Inn'-asän Yisa: «Tidət-dəx a-s käwäneđ toškam ed a-wa ənnän əlkəttabän hakd-dəx a-wa dər-togdäh tärna n-Mässinäx, wär t-illa a dəx-s təfhamäm.

³⁰ Ašäl wa ilkämän, meddən hakd tiđeden, ad-äbas tidubunän ed ad-taläh tämudre-näsän d-ta n-änjəlosän wi hənən išənnawän.

³¹ Ämära, dəx-isəlan wi n-tanäkra n-inəmmuttan, ajän wär təxrem a-wa hawän-inna Mässinäx, a-s innä:

³² <Näkk a-s Mässinäx n-Ibrahim d-Isxaqq d-Yaqub>? A-wen, älməxna-net a-s äddinät-win-dəx, han älžännät, tiimələn Mässinäx; ənnär wär-ədderän, wär təjjən a-wen. Mässinäx, wädden inəmmuttan a-s ämoos Mässinäx, ämoos-t i-wi əddärnen.»

³³ Ijrəz a-wen-dəx issəxra Yisa i-tamətte ta has-təsijädät.

Alämär wa ufän

(Marqəs 12:28-34; Luqa 10:25-28)

³⁴ Əslän käl-faris i-əmmək wa s-əssodäf Yisa käl-sadus imawän-näsän xas, əžžəmməxän-dd əntəneđ-dəx sər-s.

³⁵ Iggäd-dd iyyän dəx-sän n-älxalim n-Ättəwrät, ija i-Yisa asəstan dəx-otas irrum-net.

³⁶ Inn'-as: «Älxalim, ma ämoos xur-Mässinäx alämär wa ojärän?»

³⁷ Inn'-as Yisa: «Alämär wa ojärän da:

<Ad-tärhəd Emäli-näk Mässinäx s-ulh-näk imda, tärhəd-t s-iman-näk əmdan, tärhəd-t s-tayətətte-näk iket-net.>

³⁸ Ənta-den-dəx alämär wa äzzarän dəx-alämärän, ənta dəx a ojärän dəx-alämärän.

³⁹ Ill'-ee dəx wa s-əssin wärän dər-s izley:

<Ad-tärhəd ənhərəj-näk s-əmmək wa s-tärhed iman-näk.>

⁴⁰ Alämärän-win-dəx n-əssin a iṭṭafän a-wa innä alämär n-Mässinäx d-a-wa ənnän ännəbitän iket-net.»

Yisa Ämasex, ojär tumast n-ahäya n-Dawəd

(Marqəs 12:35-37; Luqa 20:41-44)

⁴¹ Inhäy Yisa azəmməx wa fälla-s dd-jän käl-faris xas, issəstän-tän, inn'-asän:

⁴² «Ak ma tordam, Ämasex, mi iqqal? Mi s-ämoos Rure-s?» Ənnän-as: «Dawəd.»

⁴³ Inn'-asän Yisa: «Kunta Ämasex rure-s n-Dawəd, adiš, mafäl has-ijanna Dawəd s-məjräd ija Unfas Šəddijän dəx-əmm-net: <Emäli?»

⁴⁴ Dawəd en-dəx a imməjrädän s-tärna n-Unfas Šəddijän, innä:

<Inna Emäli Mässinäx i-Emäli-nin: Əyyäw, xayəm daw-axil-in har əjəx išənja-näk daw-iđarän-näk.>

45 ʒas kunta Dawəd iman-net iɣarr Älmaseɣ s-isəm <Emäli>, əndek əmmək wa s-äddoobät ad-umas rure-s?»

46 Wär tän-ijješ ere t-ikfan älwizab n-asəstan-wen-däɣ hasän-ija; ijräw däɣ-sän älyafyät ɣur-ašäl-wen-däɣ, äbas t-illa-i däɣ-sän ihälän asəstan-net ɖarät-a-wen.

23

Issədläm ʒisa älyulam n-Ättäwrät d-käl-faris
(Marqəs 12:38-39; Luqa 11:43, 46; 20:45-46)

1 İdkäl ʒisa mäjräd ɖarät-a-wen, imməjräd i-tamətte d-inəttulab-net, innä:

2 «Älyulam n-Ättäwrät d-käl-faris a iwar ättäfässir n-Ättäwrät ta n-Mosa i-äddinät.

3 Tamašalät a-wa hawän-jännen iket-net, mäšan, he käwäneɖ, wär tətəläläm ijitän-näsän fäl-a-s a-wa jännen, wär-oher härät d-a-wa tadjän.

4 Tadjän färəɖän n-Mässinäɣ äzuk sawarän üzərhan n-äddinät, šahäššälän-tän amišel-näsän, a-s ija a-wen, wär tän-iha ad-hasän-ilälän s-aggay-näsän wäla-däɣ s-emm n-assəkäd.

5 A-wa tamašalän iket-net, i n-təssəba ɣas n-ad-tän-in-əjrähän äddinät, šalläjän ikətban ojärnen wi n-äddinät, tadjän isəlsa ähobätnen,

6 ärhan taɣimit däɣ-idäggan wi ännufläyenen däɣ-imjora d-ihänen n-äddin wi n-käl-Älyähud,

7 ijrəz-asän ad-hasän-tadjän äddinät isofan däɣ-tišärriten, titwäɣrin s-isəm: <Älyalim, älyalim!>

8 Käwäneɖ, wär jem a-wen, wär tärɖem titwäɣrim s-isəm: <Älyalim> ed Älyalim-näwän, iyyän ɣas, käwäneɖ, ayətmatän a tämoosäm.

9 Wär täɣrem äwadəm wäl' iyyän s-isəm <Abba> ed Abba iyyän ɣas a lam, a t-ämoosän, Abba-näwän wa ihän išənnawän.

10 Wär tärɖem ɣarrän-käwän äddinät s-isəm: <Ämänokal>, ed wär lem ar iyyän n-Ämänokal, a t-ämoosän: Älmaseɣ.

11 Wa ojärän däɣ-wän, umaset akli n-imidiwän-net.

12 Ere idkälän iman-net-däɣ, ad-irəs mäšan, wa äsräsän iman-net, ad-t-ıdkəl Mässinäɣ.»

Iməskay käl-faris d-älyulam n-Ättäwrät
(Marqəs 12:40; Luqa 11:39-42, 44, 47-51; 20:47)

13 «Iməskay käwäneɖ-i n-älyulam n-Ättäwrät d-käl-faris, älmunafəɣän yaden! Ənhəywät ɣas, käwäneɖ a ititəbbun Təmmənəya n-Mässinäɣ i-äddinät; älwäxla, a-s wär tät-təjjəšäm, äddinät daɣ wi ärhanen ujəš-net, gaddäläm-asän s-a-wen.

[

14 Iməskay käwäneɖ-i n-älyulam n-Ättäwrät d-käl-faris, älmunafəɣän yaden! Käwäneɖ a itihäɣän a-wa ihän ifassän n-tinuɖafen, tadjäm imaddän šəjrootnen i-ad-käwän-in-əjrähän äddinät, ilkam däɣ-wän äššərəɣa səmmän.]

15 Iməskay käwäneɖ-i n-älyulam n-Ättäwrät d-käl-faris, älmunafəɣän yaden! Wär t-illa edägg wär təkəkəm fäll-äkall wäla fäll-aman i-ad-däɣ-s dd-təjrəwäm äwadəm iyyän ɣas jəm däɣ-äddin-näwän mäšan, igdäh-as ɣas ad-hawän-ilkəm i-ad-t-səmmuttəyäm, umas, u-žohännäma s-tojər ämära tälläbäst ta ija ta jəm s-əssin ihändäggan.

16 Iməskay kăwăneḍ-i n-imalwayän dăryalnen. Jannem: afäl ihăḍ äwadəm s-ehän n-ämudd wa măqqārăn, wăr t-iwer ärkăwäl n-tahuḍe-net măšan, afäl ihăḍ s-orăḡ wa t-ihän, iwar-t ärkăwäl n-tahuḍe ta ija.

17 Tidət-dăḡ a-s irmas-kăwän iba n-tayətte, dăryalăm. Ajän, ehän n-ämudd wa măqqārăn, ma izlay d-orăḡ wa t-ihän? Wădden təšədje-ta-dăḡ ija ehän n-ämudd, a dd-torăwăt əlləllu wa ija orăḡ wa t-ihän?

18 Jannem daḡ: ere ihăḍän s-isəm n-edăgg wa n-tikutawen, wăr t-iwer ärkăwäl n-tahuḍe-net măšan, afäl ihăḍ s-takute-ta tənsăt fäll-edăgg-en, iwăr-t ärkăwäl n-tahuḍe ta ija.

19 Iməddoryal yaden! Ajän wădden tihusay n-edăgg wa n-tikutawen a äshăskən takute ta fälla-s isänsa äwadəm.

20 Tidət a-s ere wa ihăḍän s-isəm n-edăgg wa n-tikutawen, ihăḍ daḡ s-a-wa fälla-s insän iket-net,

21 wa ihăḍän daḡ s-ehän n-ämudd wa măqqārăn, adiš, Măssinäḡ-i n-Măssi-s n-ehän-en a ihăḍ.

22 Wa ihăḍän s-išənnawän, wădden tasăqqimit ta fäll-ăminakäl Măssinäḡ a-s ihăḍ, Măssinäḡ iman-net a ihăḍ.

23 Iməskay kăwăneḍ-i n-ălyulam n-Ătṭăwrăt d-käl-faris, älmunafəḡän yaden! Hakkăm s-iqqud a-wa ämoosän tāmukăst-năwän dăḡ-wăla ənnăḡnaḡ d-ăkamən d-tiyəššawen-ti iyyăḍnen măšan, tăsisändărăm dăḡ-amišəl n-a-wa ifrăḍ alămăr dăḡ-isălan n-ălyădalăt n-ulh, d-tăhanint, d-immun s-Măssinäḡ; hărătän-win-dăḡ a-s änihăjja a-s təssəntăm săr-sän, səlکمăm-asän amišəl n-wi iyyăḍnen olăḡnen.

24 Imalwayän dăryalnen a tămoosăm, šänšašăm a-wa săssăm i-ad-wăr dăḡ-s dd-itayiməy wăla ešš iyyän ḡas uhən-dăḡ, a-wa hin-sitrəjjim dăḡ-tisatten-năwän, ogdăh d-amnəs təmyäre.

25 Iməskay kăwăneḍ-i n-ălyulam n-Ătṭăwrăt d-käl-faris, älmunafəḡän yaden! Kannăm ašəšdaj n-afälla n-karatän d-ikassän-năwän, a-s ija a-wen, ammas n-ulhawän-năwän, ixla; šašdajăm tiḡəswen-năwän, a-s ija a-wen, ammas n-ulhawän-năwän, wăr-iḍney ar tikra d-əwwəli.

26 Ya käl-faris-i n-iməddoryal, sirədăt ammas n-karatän d-ikassän-năwän i-ad-išdajän təzzar, ad-saradăm afälla-năsän.

27 Iməskay kăwăneḍ-i n-ălyulam n-Ătṭăwrăt d-käl-faris, älmunafəḡän yaden! Tolăhăm ḡas d-tizəska wăššarnen s-ăshăskăt äwadəm afälla-năsnăt, a-s ija a-wen, ammas-năsnăt, wăr t-ihä ar iḡăsan n-măḡsoy d-mărkăhaw isamăḍasän.

28 Ēnta-den-dăḡ a-wa dăr-toolăhăm; saknem äddinăt älmăt a-s tăḡdalăm, a-s ija a-wen, ammas n-ulhawän-năwän, wăr-iḍney ar təlmənuḑăḡa d-tăxărme.

29 Iməskay kăwăneḍ-i n-ălyulam n-Ătṭăwrăt d-käl-faris, älmunafəḡän yaden! Kăwăneḍ a salmadnen äddinăt s-idăggan wi dăḡ-əḡkän ännăbitän, sahaskem izəkwan wi n-imayḍalän wi n-ibda äba;

30 išl'-iwän a-wen-dăḡ măšan, jannem: <Ēnnăr nəzzaḡ dăḡ-ăzzăman n-abbatän-nănäḡ, wăr dăr-sän nətumas imăjjan n-iman n-ännăbitän-wi s-əssänḡălän ašni-năsän.>

31 Jannen a-wen-dăḡ uhən-dăḡ wăr hin-təjrehăm a-s asətbat ḡas a tajjäm n-a-s, tămoosăm ihăyawän n-abbatän-năwän-wi janen iman n-ännăbitän.

32 A-wa əssəntän abbatän-năwän ḡas a hin-samdem.

33 Taššălen a tămoosăm, wăr təzleyăm d-tanăḡwăt. Lăḡătăt-ahi ḡas əndek əmmək wa s-mad-tăḡləsăm dăḡ-ḡohännăma?

³⁴ Däx-tössöba n-a-wen-däx a fäl sär-wän-in-äsimäšäläx härät däx-ännäbitän d-iməssorha d-älxulam n-Ättäwrät; ad-təjəm iman n-iyyəđ, təsləbäm iyyäđ, təjəm tiwit s-ibärtäkän däx-iyyəđ däx-ihānan n-äddin-nāwän, täqquzzəbum iyyäđ s-aḡrəm-aḡrəm

³⁵ i-ad-däx-wän ədmənän iman n-e d t-illām ämaydal s-jam iman-net bännan fäll-ārori n-äkall-i-däx, ḡur-ašni n-Xäbälla wa n-ämaydal äba hundäx har ašni n-Zäkärya wa n-ägg Bäräyka-i s-ätwäjjän iman-net jer-edägg wa šaddijän ihän ehän n-ämudd wa mäqqārän d-edägg wa däx-raqqänät tikutawen.

³⁶ Äsidätteḡ-awän a-s äddinät-win-däx äba, ədmanän iman-näsän däx-käl-əzzurəyät-ta-däx.»

*Tahäla n-Ḣisa fäll-Yärussälam
(Luqa 13:34-35)*

³⁷ Innä Ḣisa ɗarät-a-wen: «Yärussälam, ya Yärussälam! Tamäskoyt kämm-i täjjät iman n-ännäbitän, hakkäd sämmäjori n-tihun inəmmušal wi sär-m dd-äšmašäl Mässinäx, əndek ḡas a-wa-däx wär jeḡ däx-utär n-asdu n-imuzäḡän-näm šund a-wa täjj tekəzzit i-ikärtän-net daw-tafriwen-net mäšan, təssəndäräm-ahi.

³⁸ Ämära, ənhəywät, isälan əmdän, ad-kāwän-äyy Mässinäx d-iman-nāwän, umas ehän-nāwän timšar.

³⁹ Ässiilmädäx-kāwän, wär t-ih' äššäk a-wen, äbas ilkam ad-hi-tənhayäm hundäx har ašäl wa d-mad-taləsäm tənna n-a-s: «Naməlet wa dd-osän s-isəm n-Emäli!» »

24

*Teräzze n-ehän n-ämudd wa mäqqārän
(Marqəs 13:1-2; Luqa 21:5-6)*

¹ Älwäqq wa d-ifäl Ḣisa ehän n-ämudd wa mäqqārän, ohäzän-t-dd inəttulab-net, äddoqqen-as tihusay n-akäros wa ija ehän n-ämudd wa mäqqārän.

² Islä i-təmmal ta täjjän i-ehän-en ḡas, inn'-asän: «Wädden hannäyäm tihusay n-edey-wa-däx? Äsidätteḡ-awän a-s ilkam ašäl d-wär mad-däx-s dd-täqqayəm wäla-däx tähunt tiyyät warät tamidit-net ed, ad-ättäxtäx iket-däx-net.»

*Išmal n-sämdo
(Marqəs 13:3-23; Luqa 21:7-24; 17:22-24)*

³ Ikkä Ḣisa ɗarät-a-wen taɗaxt ta tässidwälät ihəškan wi n-əzzäytun, äqqima. Ohäzän-t-dd inəttulab-net, ənnän-as däx-tenere n-iman-näsän: «Älḡalim, läḡät-anäx, härätän-win-däx s-tənned, əmme d-mad-əjən? Əkkəs-anäx däx-taxdärt n-išmal n-uḡəl-näk d-täməddawt n-äddunya.»

⁴ Äwwežäb-asän Ḣisa, inn'-asän: «He kāwäneđ, äjät ənniyät; wär kāwän-išäšket äwadəm wäl' iyyän

⁵ fäl-a-s, ad-kāwän-dd-asən äddinät äjjootnen äwwaynen isəm-in, änn hak iyyän däx-sän: «Näkk a-s Älmasex», šiškən s-a-wen-däx äddinät äjjootnen.

⁶ Ad-təsləm i-isälan n-imjārän d-mähewəl n-imjārän, wär täxweläm ed ilzam ad-äj a-wen mäšan, sämdo n-äddunya ənta, wär-ija härwa.

⁷ Ad-təknəs tawset tamidit-net, iknəs əddəwəl amidi-net, äj laz, iškəđkəđ äkall däx-idäggan äjjootnen,

⁸ sánto n-tämöddawt n-äddunya ɣas a-wa, oläh d-sánto n-tizzurt ta rämmäsät tamädt s-išwar tøjraw eɣäf-net.

⁹ Ad-kāwän-äqqəzzəbun äddinät, əjən iman-nāwän kərəf, akədnät dār-wän tiwsaten iket-däɣ-näsnät, däɣ-äddimmät n-isəm-in wa kāwän-iwarän.

¹⁰ Ad-təjməd tuksəda n-Mässinäɣ ulhawän n-i äjjootnen däɣ-wän, tənmäɣdäräm jer-iman-nāwän, tənmäkyədam jer-iman-nāwän,

¹¹ asən-dd ännäbitän n-bahu äjjootnen, šənnəməšrəyän äddinät äjjootnen.

¹² Ad-äj iba n-iqqud təmɣäre ta-däɣ fäl ad-tismaɗ tārha n-Mässinäɣ däɣ-ulhawän n-äddinät äjjootnen

¹³ māšan, ere wa äkoyädän däɣ-alkum-hahi däɣ-immun-net har ašäl wa d-imda a-wen-däɣ iket-net, ad-iɣləs.

¹⁴ Ad-ətwəjjən isälan n-Älənžil n-Təmmənəya n-Mässinäɣ i-tiwsaten n-äddunya iket-däɣ-näsnät i-ad-əslənät i-isälan-win-däɣ təzzar, təmdəw äddunya.»

Erk äzzāmanän wi dd-malənen

¹⁵ Inna Ƴisa daɣ: «Afäl ašäl wa d-tənhäyäm änaɣas wa n-eməkkärekaɗ s-innä ännäbi Danyäl har dd-ijjäš edəgg wa šäddijän ihän ehän n-ämudd wa mäqqārän ad-t-isamādas, [ašäl-en, äwadəm wa iɣarrän isälan-wi-däɣ, ijrähət älmäɣna-näsän!]

¹⁶ Ašäl-en, wi hänen teje ta n-Älyähudəyät, jawadnet däɣ-azzal s-ašrut wa n-iɗayän;

¹⁷ wi dd-ogäz ašäl-en əwarän afälla n-ihānan, wär dd-təzəbbutnet i-ad-ədkəlän a hasän-ihan ammas n-ehän, jawadnet däɣ-azzal.

¹⁸ Wi dd-ogäz ašäl-en han išəkraš, wär dd-täqqälnet ɗara-sän i-ad-ədkəlän isəlsa-näsän.

¹⁹ Timəskay tiɗeden ti mad-ijrəw ašäl-en-däɣ lanät ənniyät meɣ siɗudnät, ed ad-täzzäwät talɣa-näsnät.

²⁰ Ettärät däɣ-Mässinäɣ ad-wär itəmzəyyit ajiwəɗ-nāwän d-äzzāman wa n-akäsa meɣ tajrəst meɣ d-ašäl n-əssəbət-i n-täsonfat.

²¹ Äzzāman-en, ad-täj tissust täsuksäɗät s-ad-dd-täxläk äddunya-däɣ, wär kälä ätiwänhäy šund ənta fäll-ärori n-äkall; ad-təmdəw äddunya daɣ, wär-ilkem ad-ija a dār-s olähän.

²² Afäl wär-ifneɣ Mässinäɣ däɣ-täqqän n-tisnant ta hät išilan-en-däɣ, wär t-illa ere madän-iɣləs; māšan ad-išəkšəl Mässinäɣ täqqän n-tizzurt-ten-däɣ däɣ-təssəba n-äddinät wi äsnäfrän i-əlyəllas.

²³ Dihen, afäl hawän-innä äwadəm: «Ənhəywät-t-ak Älmaseɣ, ənta da meɣ: «Ənta den», wär t-təflesäm.

²⁴ Ad-dd-asən älmaseɣän n-bahu d-ännäbitän n-bahu, əjən ijitän d-härätän äsuksäɗnen, šiškən ənnär ämmukkän a-wen wälä äddinät wi äsnäfrän Mässinäɣ.

²⁵ He kāwänəɗ, əkkasäɣ-kāwän däɣ-tayɗärt härwa wär jen härätän-win-däɣ.

²⁶ Ere hawän-innä: «Ənhəywät, Älmaseɣ wa n-Ämaɣlas, osä-dd, iha tenere-ta», wär təkem dihen; meɣ daɣ afäl hawän-ätwänna: «Ih' ehän iyyän dihen», wär t-təflesäm.

²⁷ Ägg-ägg-adəm, ad-aläh ass-net d-essam-i s-e-d issäm däɣ-emäynäj, ad-itwənhəy asmäɣmäɣ-net däɣ-atāram.

²⁸ Dihad t-təlla tamäɣsoyt, ad-itajj ellay.»

Uxəl n-Ŷisa Ālmasex
(*Marqəs 13:24-27; Luqa 21:25-28*)

²⁹ Āssewäd Ŷisa fäll-a-wen, innä:
« <Təm̄da ɣas tisan̄t n-išilan-win-däx,
ad-əlsənät tihay täfukt,
iba tēmölle n-ewär;
ətrækken-dd etran,
ənhəynəhəyän iməşsuha wi hānen išənnawän.>

³⁰ Ālwäqq-wen-däx, a dd-e-tənfiləl tamātart ta sālmadät s-ass n-Āgg-ägg-adəm däx-išənnawän, ad-šoršənät tiwsaten ti wārnen ārori n-ākall, ad-t-ənhəynät, imal-dd, inay tijärāken, təlcam-as tärna-net d-älxurmät-net.

³¹ Dihen, ad-išəm̄išəl ānjālosän-net i-ad-sāhədän täsinsäyt s-afälla, sədwen-dd sār-s e d t-illām ere āsināfrän Mässinäx däx-e d t-təllām tamdujt, səntən däx-ašrut iyyän, səmdəwän-dd s-ašrut wa iyyädän.»

Ājät ənniyät
(*Marqəs 13:28-31; Luqa 21:29-33*)

³² «Səjrähät ɣas əmmək wa s-idaggäl ašar: wādden e-d t-tənhäyäm a-s dd-inšār har lāmmedän ifärketän-net, ad-tənnəm, os'-anäx äzzāman wa oläxän;

³³ əmmək-wen-däx daɣ a-s afäl tənähäyäm išmal-wi-däx s-hawän-ənnex har jän, adiš əlmədät a-s Āgg-ägg-adəm, ohäz-dd uxəl-net, os'-iwän fāw.

³⁴ Āsidätteɣ-awän a-s wär-e takəy əzzurəyät-ta-däx, wär jen härätän-win-däx s-hawän-ənnex iket-däx-näsän.

³⁵ Ojār täräɣse ija ad-ib' išənnawän d-ākall, uhən ad-iba tənna-nin.»

Ŷaymät täsidäwäm i-ass n-Āgg-ägg-adəm
(*Marqəs 13:32-37; Luqa 17:30, 34-36*)

³⁶ Innä Ŷisa daɣ ɖarät-a-wen: «Āmāra, däx-isālan n-ašäl d-ässaxät wa d-mad-əjən härätän-win-däx, wär t-illa ere t-issanän; wär t-əssenän ānjālosän wi hānen išənnawän wāla Āgg-ägg-adəm; Abba ɣas, a t-issanän.

³⁷ Ass n-Āgg-ägg-adəm, ad-aläh a-wa däx-s-e-ijən d-a-wa ijän däx-išilan wi n-ännäbi Nox.

³⁸ Äzzāman wa n-Nox, dat-anji wa n-ɖuf, tayāwanän äddinät, sassän, tidubunän, sidubunän har ašäl wa d-ijjāš Nox turäft n-aman ta mäqqärät s-has-innä Mässinäx ad-tät-ikən.

³⁹ Wär t-illa a-s tən-ha tijya-net har fälla-sän dd-oɖän aman wi n-anji wa n-ɖuf, olām-tän-in iket-däx-näsän. Šund a-wen-däx ijän a madän-āj ašäl wa dd-mad-dd-ass Āgg-ägg-adəm.

⁴⁰ Ašäl-en, ad-äddewän əssin meddən däx-tenere, ämmäɖkäl iyyän, itwəyy-dd iyyän,

⁴¹ ad-taddāhnät sənātät tiɖeɖen däx-iyyän edägg, tammäɖkäl tiyyät, tətəwəyy-dd tiyyät.

⁴² A-wen-däx a fäl, ɣaymät tokayäm ed wär təssenäm ašäl n-ass n-Emälināwän.

⁴³ Wādden kəwāneɖ iman-nāwän təssanäm a-s ənnär issan məssi-s n-ehän älwäqq wa s-t-dd-itis emäkräɖ s-ehäɖ i-ad-ärz ehän-net, iket-di, wär-itəttəs i-ad-has-ärz emäkräɖ ehän-net.

⁴⁴ A-wen-däx a fäl, ɣaymät täsidäwäm, täɣtafäm ed, Āgg-ägg-adəm, ad-dd-ass s-ässaxät d-wär fälla-s jem.

*Tangalt ta n-ānaxdim wa olāḡān d-wa n-enällābās
(Luqa 12:41-48)*

⁴⁵ Ānaxdim wa n-āmaḡdal ijrāhān hārāt, ənta a mad-isāḡləf mās-si-s tēla-net i-ad-ānnihād fäll-inaxdimān-net wi iyyādnen, isamānsaw-tān e-d ija ālwāqq n-a-wen.

⁴⁶ Təndəḡ i-ānaxdim wa mad-ijrəw mās-si-s āddunkāt dāḡ-ālxidmāt wa dāḡ-t ija, ālwāqq s-t-dd-osa-dāḡ.

⁴⁷ Āsidätteḡ-awān a-s ānaxdim-en, ad-t-isāḡləf mās-si-s tēla-net iket-net,

⁴⁸ māšan, erk ānaxdim ənta, ad-ānn dāḡ-iman-net: <Nākk, mās-si-ḡ, āhoja-hin fäll-i, ābas dd-iqqal>.

⁴⁹ ad-iḡannāy imidiwān-net wi iyyādnen tiwit, itatt, isass ənta d-imāswan n-əlxəmār,

⁵⁰ ānaxdim-wen, ilkam ad-t-dd-iḡdār mās-si-s dāḡ-ašāl d-āssaḡāt d-wār fälla-s ija, ilməd s-erk əššāḡəl wa t-išlān a ija a-wa-dāḡ,

⁵¹ afāl t-dd-osa, ad-t-iqquzzəbət, isārtəy-t d-ālmunafəḡān dāḡ-tihay ti n-ajāma wār-iha ar tahāla d-azəmmākārkəz n-isenān fāl tāmujrizt.»

25

Tangalt ta n-timawaḡen

¹ Ija ḡisa i-āddināt tangalt tiyyāt daḡ dāḡ-hasān-innā: «Təmmənəya ta n-Māssināḡ, tānifāqqa d-mārāwāt timawaḡen wāren əzzey meddēn əḡkālneḡ tiftəl-nāsnāt s-ehād i-ad-əlkəḡnāt i-āmaḡlay s-edāgg-wa-dāḡ itājj azli.

² Səmmosāt dāḡ-timawaḡen-tin-dāḡ, ijrāw-tānāt iba n-tayətte, səmmosāt ti iyyādnen, timəssorha.

³ Ālwāqq wa d-gilləwnāt, əḡkālneḡ ti ijrāw iba n-tayətte tiftəl-nāsnāt māšan, wār dāḡ-snāt jenāt aman n-kārānzil hasnāt-əḡdāhnen.

⁴ Ti n-timəssorha əntānāteḡ, jānāt aman dāḡ-butəlān s-edes, āwwāynāt-tān.

⁵ Ad-simāqqulnāt ya ḡarāt a-wen i-āmaḡlay. Tāqqālnāt-as, tāqqālnāt-as har āḡḡāšnāt, ilḡād-tānāt-in eḡəs iket-nāsnāt.

⁶ Šāmad igl' ehād ad-ija eḡāri innān: <Āmaḡlay ya, iwwāḡ-dd, səlkəḡāt-as.>

⁷ Ēnkārnat-dd timawaḡen iket-nāsnāt, əḡkālneḡ tiftəl-nāsnāt.

⁸ Ēḡḡādnāt-dd ti ijrāw iba n-tayətte, ənnānāt i-ti n-timəssorha: <Nākkānāteḡ ya, tiftəl-nānāḡ, išwar āmmutnāt, ākfəmət-anāḡ-dd hārāt n-aman.>

⁹ Ēnnānāt-asnāt ti n-timəssorha: <A fāw, wār nāddobāt ed a-wa nəḡḡaf dāḡ-aman, wār hanāḡ-igdeh iket-nānāḡ, ākkəmət u-mamāla, žānšəmət-dd aman i-iman-nākmāt.>

¹⁰ Ēḡlānāt i-ad-dd-žənšənāt aman, osā-dd āmaḡlay ḡara-snāt. Ānmājjašnāt dār-s ti n-timəssorha āsdāwnen i-a-wen, ammas n-ehān təzzar, āḡḡubben ishar n-edāgg.

¹¹ A əndārrān ḡarāt-a-wen, əqqālnāt-dd ti ijrāw iba n-tayətte, ad-takāwkawnāt ashār, jānnenāt: <Māndam, māndam! Arr-anāḡ-in emm n-ehān.>

¹² Māšan, inn'-asnāt mās-si-s n-edāgg: <Āḡafyāt-nākmāt, wār kāmāt-əzzeyāḡ.> »

¹³ Innā ḡisa ḡarāt-a-wen i-inəḡḡulab-net: «A-wen-dāḡ a fāl, ḡaymāt tokayām ed wār təssenām ašāl wāl' āssaḡāt wa s-dd-mad-dd-ass Emāli.»

*Tangalt ta n-isuf wi itäj Mässināχ
(Luqa 19:11-27)*

¹⁴ Olās daχ Ƴisa, innā: «Təmmənəya n-Mässināχ, tänifäqqa d-isālan n-āhaləs iyyän dd-ijjāš ənniyāt n-asikəl, əssawāđ tekle χas, issāχrä-dd inaxdimän-net, ij' ehäre-net iket-net jer-ifassän-nāsän i-ad-sār-s äxdəmän;

¹⁵ ikf'-iyyän səmmos ibəlχan n-orāχ, wa iyyādän, ikf'-e əssin ibəlχan, wa s-kärad, ikf'-e iyyän n-ablāχ; hak iyyän-dāχ, ikf'-e s-a-wa dār-togdāh tardast-net təzzar, əssokäl.

¹⁶ Šik-dāχ a-s hin-ämmummälät wa n-səmmos ibəlχan, orāχ-net, irbāχ fälla-s səmmos ibəlχan iyyād.

¹⁷ Wa n-əssin daχ, ija šund a-wen-dāχ, irbāχ fäll-wi-net, əssin iyyād daχ.

¹⁸ Wa n-iyyän n-ablāχ n-orāχ, iglä, iχāš-as anu, təzzar inbäl dāχ-s a-wa t-ikfa məssi-s.

¹⁹ Ahoja-hin məssi-sän dāχ-asikəl har ašäl wa dd-iqqäl; osä-dd χas, iχrä-dd inaxdimän-net i-ad-has-əjən älmeđan n-a-wa tän-issäχläf.

²⁰ Os-e-hi-dd wa n-səmmos ibəlχan n-orāχ, äwway daχ səmmos ibəlχan wi dd-irbāχ; inna i-məssi-s: «Məssi-χ, səmmos ibəlχan n-orāχ wi hi-təssäχläfäd, əntäneđ da, ärbāχāχ-dd fälla-sän səmmos iyyād.»

²¹ Inn'-as məssi-s: «Ehoyd! Änaxdim ifranän ha tafləst a tämoosäd; šāmad h'-ik tafləst dāχ-a-wärän əjjət, adiš ad-käy-säχləfāχ a äjjeen. Ƴyyāw χayəm edes-in, ad-nahār tedāwit ta jeχ.»

²² Osä-dd đarät-a-wen wa n-əssin ibəlχan n-orāχ, inna i-məssi-s: «Məssi-χ, əssin ibəlχan-wi hi-təssäχläfäd, ärbāχāχ-dd fälla-sän əssin iyyād.»

²³ Inn'-as məssi-s: «Ehoyd! Änaxdim ifranän ha tafləst a tämoosäd; šāmad h'-ik tafləst dāχ-a-wärän əjət, adiš ad-käy-säχləfāχ a äjjeen. Ƴyyāw χayəm edes-in, ad-nahār tedāwit ta jeχ.»

²⁴ Išräy-dd wa n-iyyän n-ablāχ, innā i-məssi-s: «Məssi-χ, əssanāχ a-s käyy eməššehi a tämoosäd, tijlubud a wär täddomed, tiləyəd ašəkrəš dāχ-wär tənferäd härät,

²⁵ jeχ-ak tuksəđa-ta-dāχ fäl təgled χas, əgleχ näkk-dāχ, jeχ anu i-ablāχ n-orāχ wa hi-təssäχläfäd, ənbälāχ-t dāχ-s; ənta da, ərməs təla-nāk.»

²⁶ Inn'-as məssi-s: «Käyy wa-hi, erk änaxdim n-eməssendəd a tämoosäd! A-s təssänäd a-s tijlubeχ a wär-äddomeχ, tiləyəχ ašəkrəš dāχ-wär ənferäχ härät,

²⁷ mafäl wär jed azrəf-in dāχ-bänk i-ad-ättälläχäχ härät fälla-s afäl dd-äqqäläχ?»

²⁸ Inna i-äddinät đarät-a-wen, ad-dāχ-s ahāχän ablāχ n-orāχ wa iṭṭäf, əkfən-t i-wa n-māraw ibəlχan.

²⁹ Ässiilmädāχ-kāwän a-s äwadəm wa ilän härät ad-has-iwwađ, ijat a-wa ila məšan, wa wärän ila härät, ad-dāχ-s ättärmäs wäla a-wa iṭṭäf.

³⁰ «Ämära, amälχon wa-hi, ərməsät-t, təjrəm-t-in dāχ-tihay ti n-ajāma wär iha ar tahäla d-azəmmäkärkəz n-isənän fäl tämujrizt.» »

Äššäreχa wa n-tilkamät

³¹ Innä Ƴisa daχ: «Ašäl wa dd-mad-iqqəl Ägg-ägg-adəm dāχ-älxurmät-net äddew d-änjəlosän-net, ad-äqqayəm fäll-tasäqqaymut-net ta n-älxurmät i-ad-immukəl.

³² Ašäl-en, ad-dd-äqqaymənät data-s tiwsaten n-äddunya iket-dāχ-näsnät, izəmmäzłəy äddinät s-əmmək wa s-izamäzłay aməđan tahrut i-ad-ibdəw tihatten d-išulaχ.

³³ Dihen, ad-äj tihatten daw-aχil-net, äj išulaχ daw-täšalje-net.

³⁴ Tihatten ti t-əllänen daw-aγil-net, ad-hasnät-änn ämänokal: <Eyyäwmät, kämäteḍ-i n-timəssundaḍ n-Abba-nin, uhənmät təmmənəya ta hakmät-əsməjnät Abba a dd-täxlāk äddunya.

³⁵ Ašäl wa d-älluzäḡ, kämäteḍ a hi-əswäyänän, a-s äffudäḡ, kämäteḍ a hi-issəsəwän, a-s hakmät-ämjareḡ, täsbärräkmät-ahi,

³⁶ a-s ḡäluläḡ, təssəlsämät-ahi, a-s ärhinäḡ, təssəfärmät-ahi, a-s heḡ takärmüt, jämät-ahi-dd äsafu.>

³⁷ Afäl inn' ämänokal a-wen-däḡ, ad-has-ənnən imayḍalän wi t-əllänen dihen: <Emäli, əmme d-käy-nənhäy tälluzäd, nəššəkš'-ik? Əmme d-käy-nənhäy täffudäd, nəssəsəw'-ik?

³⁸ Əmme hanäḡ-dd-tämjared har käy-näsbärräk? Əmme d-ḡäluläd har käy-nəssəlsa?

³⁹ Əmme d-tärhinäd meḡ əmme d-təjjäšäd takärmüt har hak-in-nəja äsafu?>

⁴⁰ Dihen, ad-hasän-änn ämänokal: <Äsidätteḡ-awän a-s hak ässaḡät d-jäm a-wen-däḡ i-iyyän däḡ-ayətma-ḡ däḡ-äddunya, kud-däḡ wa əndärrän däḡ-sän, šund näkk a-s t-jäm.>

⁴¹ Ad-dd-innäḍ ämänokal ḍarät-a-wen s-wi wärnen täsalje-net, änn'-asän: <Käwänəḍ iməḡyan ilyan Mässinäḡ a tämoosäm, äflät dat-i, äkkät temse ta täḡlälät tämmujnet i-Iblis d-änjälösän-net,

⁴² fäl-a-s käwänəḍ, älluzäḡ data-wän, wär hi-təššəkšäm; äffudäḡ, wär hi-təssəsəwäm;

⁴³ ämjareḡ-awän, wär hi-täsbärräkäm; ḡäluläḡ, wär hi-təssəlsäm; ärhinäḡ, əjjäšäḡ takärmüt mäšan, wär hi-dd-jem äsafu.>

⁴⁴ Afäl hasän-inna ämänokal a-wen, ad-has-ənnən əntänəḍ: <Emäli, əmme käy-nənhäy tälluzäd? Əmme käy-nənhäy täffudäd, meḡ ḡäluläd, meḡ tämijared-anäḡ-dd, meḡ tärhinäd, meḡ hed takärmüt näqqim wär hak-nəkna härät?>

⁴⁵ Ad-hasän-änn ämänokal: <Äsidätteḡ-awän a-s ed wär jem a-wen i-iyyän däḡ-ayətma-ḡ däḡ-äddunya, kud-däḡ wa əndärrän däḡ-sän, šund näkk a-s wär t-jem.>

⁴⁶ Äywa, wi-hi əntänəḍ, ad-hin-ətwəjārän däḡ-tisnant ta täḡlälät mäšan, imayḍalän əntänəḍ, ad-əjjəšan tämudre ta täḡlälät.»

26

Utär n-asäḡdär n-Ḣisa

(Marḡəs 14:1-2; Luḡa 22:1-2; Exya 11:45-53)

¹ Ija Ḣisa mäjräd-wen-däḡ ḡas, innä i-inəṭṭulab-net:

² «Təssanäm a-s əssin išilan a hin-äqqimänen i-ämudd wa n-Faška-i däḡ-mad-ättärmäs Ägg-ägg-adəm, itwəšləb fäll-tajəttewt.»

³ Däḡ-isälan n-a-wen-däḡ a däḡ-dd-əžžəmmäḡän imänokalän n-käl-tikutawen d-inušämän n-Işrayil däḡ ehän n-Qayäf wa n-ämänokal n-käl-tikutawen.

⁴ Änmännakän dihen fäll-əmmək wa s-mad-säḡdärän Ḣisa, əjən iman-net däḡ-ufär

⁵ mäšan, ənnän, wär-ufa ad-äj a-wen däḡ-ašäl wa n-ämudd i-ad-wär təjj tamdərwayt däḡ-tamətte.

Tamädṭ ta təssänḡälät aḍutän fäll-Ḣisa

(Marḡəs 14:3-9; Exya 12:1-8)

⁶ Ämjarät Ḣisa ašäl iyyän däḡ-taḡrəmt ta n-Bitanya i-ehän n-ähäləs s-isəm-net Simyon wa s-käla t-ijrāw jəri.

⁷ Ill'-e gur-s dihen-däx, äsiḡämär däx-edägg wa n-imənsiwän, a-s t-dd-tosa tamädt täwwayät butəl n-aḡutän lanen älqim ad-tän-sanḡal fäll-eḡäf n-Ḣisa.

⁸ Ənhäyän inəṭṭulab-net a-wen, wär hasän-ijrez, ähnäffen däx-iman-näsän ad-jannen: «Šäḡsad yaden!

⁹ Aḡutän-wi-däx, mafäl wär hin-ənšən, umas älqim-näsän takute i-tiläqqiwen.»

¹⁰ İlmäd Ḣisa a-wa kittəwän, inn'-asän: «Ma s-naxxäsäm iman n-tamädt-i-däx? Tihusay n-härät, təj'-ahi-t!

¹¹ Tiläqqiwen ya, əllanät gur-wän härkuk, a-s ija a-wen, näkk, ilkam ad-käwän-äfläḡ.

¹² Asanḡal wa fäll-i ja aḡutän-wi-däx, ašəšwar a dd-ja i-äddinät däx-isälan n-ämukən n-taḡəssa-nin i-ažəkka.

¹³ Äsidätteḡ-awän a-s edägg däx-ätwäxṭäbän isälan n-Älənžil däx-äddunya-ta-däx, ad-däx-s ətwəsuxəlän isälan n-a-wa təja, i-ad-tät-kittəwän äddinät.»

Anu n-taydärt wa iḡäš Yahudəs

(Marḡəs 14:10-11; Luqa 22:3-6; Exya 12:1-8)

¹⁴ Däx-a-wen-däx, a dd-iggäd Yahudəs Isxaryut wa n-iiyän däx-inəṭṭulab wi n-märäw d-əssin, ikk' imänokalän n-käl-tikutawen,

¹⁵ inn'-asän: «Ma hi-hakkäm afäl hawän-əssäḡdäräḡ Ḣisa?» Ässeḡänän-as kərədät timərwen n-ärriyal n-ažrəf, əkfän-as-tän.

¹⁶ Ad-itammäḡ Yähudəs gur-älwäqq-wen-däx i-tašləlt s-hasän-t-ästärmäs.

Ämudd wa n-Faška

(Marḡəs 14:12-21; Luqa 22:7-14, 21-23; Exya 13:21-30; 1 Kur. 11:23-25)

¹⁷ Ašäl wa äzzarän n-ämudd wa n-Faška, däx-tamäksänät tijəlwen-ti wär ha täzḡa, ənnän inəṭṭulab i-Ḣisa: «Äḡalim, əndek diha d-tärhed ad-nəsəssikəy imənsiwän n-ämudd wa n-Faška?»

¹⁸ Inn'-asän: «Əjjəšät aḡrəm, təkəkəm ehän n-mändam, tənnəm-as, inn'-ak älḡalim: <täqqän-in, tohəž-dd; ad-səssikəyāḡ näkk d-inəṭṭulab-in ämudd wa n-Faška däx-ehän-näk.> »

¹⁹ Jän inəṭṭulab a-wa hasän-innä Ḣisa, əḡlän ad-siməjnun imənsiwän wi n-Faška.

²⁰ İj' ehäd ḡas, änyäyma Ḣisa d-inəṭṭulab wi n-märäw d-əssin däx-edägg wa n-imənsiwän.

Äsfäkkär-dd Ḣisa ämaydar-net

²¹ Tamänsawän dihen-däx a-s hasän-innä: «Äsidätteḡ-awän a-s iiyän däx-wän a hi-madän-isəssäḡdär.»

²² Əkmän-tän iman-näsän a-s hasän-innä a-wen-däx, ad-has-jannen s-iiyän-iiyän: «Äḡalim, ajän näkk?»

²³ Äwwežäb-asän, inn'-asän Ḣisa: «Wa dər-i madän-imzəyyət iji n-äfuss däx-äkoss, ənta a hi-madän-isəssäḡdär.

²⁴ Tidət-däx a-s Ägg-ägg-adəm, ad-t-iba ed a-wen-däx a ənnän əlkəttäbän n-Mässinäḡ däx-isälan-net mäšan, amäskoy äwadəm wa t-madän-isəssäḡdär! Äwadəm-en, iššäm-as-in, ad-wär dd-ijješ äddunya.»

²⁵ İggäd-dd Yähudəs wa t-madän-isəssäḡdär, innä ənta-däx: «Älfäqqi-nin, äwadəm wa s-jänned, adiš näkk?» Inn'-as Ḣisa: «Käyy iman-näk, tənned-tän.»

*Tasäktot šaddijät**(Marqos 14:22-26; Luqa 22:15-20; 1 Kur: 11:23-25)*

²⁶ Tattän dihen-däx a-s idkäl Yisa tajella, ämmoy i-Mässinäx tēzzar, irz'-et, äzun-tät jer-inēttulab-net, inn'-asän: «Uhənät, äksät, a-wa taḡessa-nin.»

²⁷ Idkäl-dd day kara han aman n-läxnäb äxxiimmärnen, ämmoy i-Mässinäx tēzzar, ikf'-asän-t, inn'-asän: «Uhənät, äswät iket-nāwän;

²⁸ a-wa ašni-nin wa ämoosän ärkāwāl n-tassaḡt ta täynayät d-Mässinäx. Ašni-nin, ad-inḡel däx-tēssəba n-tenäšše n-ibäkkadän i-äddinät äjjootnen.

²⁹ Ässiilmädäx-kāwän a-s, wär-ilkem ad-əsweḡ ad-dd-ijmaḡän ara n-läxnäb hundäx har ašäl wa d-mad-aləsäḡ näkk d-kāwāneḡ tesäse-net, s-älxal äynayän däx-Təmmənəya ta n-Abba-nin.»

*Ilkam ad-ikkuddəl Bətrus Yisa**(Marqos 14:27-31; Luqa 22:31-34; Exya 13:36-38)*

³⁰ Äwwäy Yisa d-inēttulab-net isuhay n-təmmal n-Mässinäx dd-əzjarnen əlkəttab wa n-Äzzäbur, əglän ḡarät-a-wen, əkkän taḡayt ta tässidwälät ihəškan wi n-əzzäytun.

³¹ Əwwädän-in dihen ḡas, inn'-asän: «Xorəzzəma wa-hi madän-irməs, ad-dd-arəw akuddəl-nāwän hahi ehäḡ-i-däx, täjawädäm iket-däx-nāwän, təyyəm-ahi-dd näkk ḡas fäl-a-s iktab däx-əlkəttab a-s:

<Ad-əwətäx amāḡan, iba-t,

ämmähäšnät tihatten iket-näsnät.> »

³² Inn'-asän day: «Afäl dd-ənkäräx jer-inəmmuttan, ad-hawän-izaräx s-teje ta n-Galila.»

³³ Iggäd-dd Bətrus, innä i-Yisa: «Näkk iman-in, kud äjewädän imidiwän-in wi iyyädnen iket-näsän däx, wär mad-äjawädäx, äyyäx-käy, fäw!»

³⁴ Inn'-as Yisa: «Äsidätteḡ-ak a-s wär mad-äj ekäz kərəḡ iḡoran ehäḡ-i-däx s-wädden täkkudələd-ahi har kərəḡ ihändäggan.»

³⁵ Inn'-as Bətrus: «Näkk ḡas, kud-däx tamättant a tihräx dār-k, wär käy-mad-əkkuddələx.» Abəraj-wen-däx ija Bətrus, a jän day inēttulab wi iyyädnen iket-däx-näsän.

*Ässayät wa ikkäs Yisa däx-ašəkrəš wa n-Žätsämmani**(Marqos 14:32-34; Luqa 22:39-46)*

³⁶ Äddew dār-sän Yisa ḡarät-a-wen s-ašəkrəš iyyän iknan asədwal n-ihəškan s-isəm-net Žätsämmani, əwwädän-in ḡas, inn'-asän: «ḡaymät, täqqələm-ahi diha-däx, ad-ədələx Mässinäx, əqqələx-kāwän-dd.»

³⁷ Iššenkäš-in fälla-sän, äddeew d-Bətrus d-məddana-s n-Zäbdi wi n-əssin; ḡur-ässayät-wen-däx, ad-t-əssəntän iman-net təkma, ixwäl.

³⁸ Innä i-inēttulab wi dār-äddew: «Äḡyan iman-in, äḡyan har išwar hi-äba, wär hanäx-iläqqädət eḡəs.»

³⁹ Iššenkäš-in day fälla-sän a əndärrän, irkäx, äsqäs timme-net äkall, ad-itəddal Mässinäx, ijanna: «Ya Abba-nin, kunta ämmukkän a-wen-däx, səssijəj-ahi tissant-ta-däx! Hakd a-wen-däx, äjet erhet wa-näk wädden wa-nin.»

⁴⁰ Iqqäl-dd Yisa inēttulab-net wi n-kərəḡ, ogäz-tän-dd əḡtasän; issenkär Bətrus, inn'-as: «ḡas kāwāneḡ, indār-awän wälä-däx ad-dār-i tahərəm iyyän n-ässayät ḡas däx-wär kāwän-ilḡed eḡəs!

⁴¹ Ænkärät, ədələt Mässināx i-ad-kāwān-agəz dəx-tändärbaten n-Iblis; ägg-adəm, tidət-dəx, a-s əsidärhän amişəl n-a äjjeen ähuusken māšan, igdal-as iba n-əşşahät n-tumast-net amişəl n-a-wa irha.»

⁴² Oläs-dd dəx əsihe wa s-əssin, išşənkäš-in fälla-sän, ad-itəddal Mässināx, ijanna: «Abba-nin, kunta wär t-illa fāw əmmək s-äyläsəx dəx-tisnant-ta-dəx, adiş, äjet erhet-näk.»

⁴³ Oläs-tän uşəl, ogəz-tän-dd, ij'-asän eðəs aləxad-wa-dəx fäl hasän-indär wāla ad-arən tişşawen-näsän.

⁴⁴ Ifäl-tän dəx əsihe wa s-käraḍ, idäl dəx Mässināx s-əmmək-wənnin-dəx.

⁴⁵ Iglä, iqqäl-tän-dd, issənkär-tän, inn'-asän: «Şas kāwāneḍ təşşasäm, sinfum härwa? Ænkärät-dd ämära, ässaşät n-atärməs-in, ohəz-dd. Ägg-ägg-adəm, ad-itwəşdär, ijješ ifassän n-inəşbäkkadän,

⁴⁶ ənkärät, äglät-anəx; os'-anəx wa hi-e-isəşşəşdärän.»

Atärməs n-Şisa

(Marqəs 14:43-53; Luqa 22:47-53; Exya 18:2-11)

⁴⁷ Wär-issəmdä Şisa tənna n-a-wen-dəx a-s Yähudəs, wa n-iyyan dəx-inəşşulab-net wi n-märəw d-əssin da-dəx, əsiläl tamətte təjjeet dd-əşimaşälän imənokalän n-käl-tikutawen d-inuşämän n-Işrayil; əşləjän iyyäd tikobawen, äwwayän iyyäd iboriyan.

⁴⁸ Tamətte-ten-dəx, ij'-as Yähudəs wa n-əməşdar tamätart dəx-has-inna: «Ähaləs wa s-hi-tənhäyäm har t-osəsəx dəx-idmarän-in, ənta a-s Şisa, ärməsät-t.»

⁴⁹ Osä-dd Yähudəs, oşäd iman-net s-Şisa, inn'-as: «Älfäqqi-nin, jeş-ak əsafu!» Osäs-t dəx-idmarän-net.

⁵⁰ Inn'-as Şisa: «Amidi-nin, äj ya a-wa s-dd-tosed». Toḍa tamətte fäll-Şisa əlwäqq-wen-dəx, tərməs-t.

⁵¹ Iggäd-dd iyyän dəx-inəşşulab-net, ilbəy-dd təkoba-net, iştäf-dd sār-s taməşşujt n-akli n-ämənokal n-käl-tikutawen.

⁵² Iştal-t Şisa, inn'-as: «Suşəl təkoba-näk dəx-titar-net; ere iknäsän s-təkoba, ad-ämmät s-təkoba.

⁵³ Ädoobəş təşäre n-Abba-nin ämära-dəx, afäl t-əşreş dəx, şik-dəx a-s mad-sār-i dd-işəmmişəl mārəw əjhanän n-ənjələsän d-əssin hi-ohəşnen tinahəşen

⁵⁴ māšan afäl ija a-wen, əndek əmmək wa s-mad-itbat a-wa fäll-i ənnän ännäbitän dəx-əlkəttabän n-Mässināx.»

⁵⁵ Innä Şisa i-tamətte ḍarät-a-wen: «Ajän näkk änaştaf a ämoosəx a-s hi-dd-takkäm d-tikobawen d-iboriyan i-ad-hi-tärməsäm? Wädden hannäyäm-ahi hak əşäl äqqiiməş dəx-ehän n-ämudd wa məqqārän saşreş, mafäl wär hi dəx-s tərməsäm?

⁵⁶ Māšan, əlmədät a-s a-wa ijän iket-net, ija i-ad-itbət a-wa ənnän ännäbitän dəx-əlkəttabän.» Äjewəḍän inəşşulab-net iket-näsän, oyyän-t-dd ənta şas jer-işənja-net.

Tebädde n-Şisa dat-əşşəreşə wa məqqārän

(Marqəs 14:53-65; Luqa 22:54-55, 63-71; Exya 18:12-14, 19-24)

⁵⁷ Təlwəş tamətte ta tərməsät Şisa s-Qayäf wa n-ämənokal n-käl-tikutawen-i s-a-s itəjj a-wen-dəx äşşimməşän şur-s əlşulam n-Äşşəwrät d-inuşämän n-Işrayil.

⁵⁸ Tamøtte-en, ij'-as-dd Bøtrus alkum šøjren har tøjjäš ammas n-äxalla n-ehän n-ämänokal n-käl-tikutawen; osä-dd Bøtrus, ijjäš ønta-däx, igla äqqima edes i-gärditän, ad-isimäqqul i-ajilal n-tanfust-ta-däx.

⁵⁹ Eggädän-dd imänokalän n-käl-tikutawen d-käl-Sinhidrin† wi tirønen äššärexa iket-näsän, ad-tammäxän i-tajuhe n-bahu ønnän fäll-Ÿisa i-ad-t-sidøwän däx-äššärexa, sønnøhøjjen-t d-tamättant;

⁶⁰ ønnän fälla-s bahutän äjjootnen mäšan, wär tän-iha a ibdadän fäll-härat. Eggädän-dd øssin äddinät äjjøyhnen s-bahu,

⁶¹ ad-jannen: «Ähaløs-i-däx, näjjøyha a-s inna, äddoobät ad-änd ehän n-ämudd wa mäqqärän n-Mässinäx, idøy-dd iyyän äynayän däx-edägg-net däx-kärad išilan.»

⁶² Isl' ämänokal n-käl-tikutawen i-a-wen xas, ihä-dd ibdad, immøjräd, innä i-Ÿisa: «Ma tønned däx-a-wa fälla-k itawännen? Mäjräd!»

⁶³ Wär t-illa a has-inna Ÿisa. Inn'-as ämänokal n-käl-tikutawen älwäqq-wen: «Jaräx-käy s-idøm n-Mässinäx-i iddärän, läxät-anäx kunta käyy a-s Älmasex wa n-Rure-s n-Mässinäx.»

⁶⁴ Inn'-as Ÿisa: «Käyy iman-näk, tønned-tän; ässiilmädäx-käy day a-s xur-ašäl-i-däx, ad-tønhøyäm Ägg-ägg-adøm, äqqiima daw-axil n-Wa ilän tärna iket-net, taløsøm-t day ahänay, iqqal-dd, ifal-dd isønnawän, inay tijäräken.»

⁶⁵ Isl' ämänokal n-käl-tikutawen i-a-wen-däx xas, ijjäš-t älhäm, wa-däx fäl, irmäs err n-eräswäy-net, äsxärrawät-t fäll-iman-net, innä: «A-wa äskafär, wädden salläm-as a-s äskafär; ma nøtajj i-tijuhawen day? Igdäh-anäx a-wa däx-inna mex ma tønnam?»

⁶⁶ Ènnän-as: «Wa ønta, änihäjja d-tamättant!»

⁶⁷ Ad-fälla-s situfän, dabbäxän-as, dazžän däx-s iyyäd,

⁶⁸ jannen-as: «Èyyaa Älmasex, luløy ya, tälläxed-anäx mi hak-istäxän?»

Akuddäl n-Bøtrus i-Ÿisa Älmasex

(Marqø 14:66-72; Luqa 22:56-62; Exya 18:15-18, 25-27)

⁶⁹ A-s itäjj a-wen-däx, äqqiima Bøtrus däx-tøfärre n-ammas n-äxalla. Tos'-e-hi-dd tänaxdimt tiyyät, tøn'n-as: «Käyy-i-däx hannäyäx, käla täddewäd d-Ÿisa wa n-Galila?»

⁷⁰ Äkkuddäl Bøtrus a-wen dat-äddinät iket-näsän, inn'-as: «Wär-øssenäx a däx-hi-tässewäläd.»

⁷¹ Innä Bøtrus a-wen xas, äškätaräš s-emm n-äxalla n-ehän, tønhøy-t day tänaxdimt tiyyät, ad-janna i-äddinät wi t-øllanen dihen: «Hannäyäm-t ähaløs-wa-däx, käla äddew d-Ÿisa wa n-Näširat.»

⁷² Ad-itøhhað Bøtrus isønnawän d-äkall, ijanna: «Ähaløs-wa-däx s-hi-jännem, wär t-øzzeyäx.»

⁷³ A øndärrän darät-a-wen, økkän-t-dd äddinät øbdadnen däx-ammas n-äxalla-en-däx, ønnän-as: «Ijmað-t äššäk a-s käyy-däx, iyyän däx-äddinät wi n-Ÿisa, temäsläxt-näk iman-net a täsdättet a-wen.»

⁷⁴ Ad-itähhað Bøtrus, ilaqqän iman-net siha d-siha, ijanna: «Ènney-awän, ähaløs wa s-hi-jännem, wär t-øzzeyäx.» Diha-däx d-innä a-wen-däx, ad-iwät ekäz äxora.

⁷⁵ Iktä-dd Bøtrus mäjräd wa s-käla has-t-ija Ÿisa, a-s has-inna: «Wär mad-iwøt ekäz äxora ašäl-i-däx s-wädden täkkuddäläd-ahi har kärad ihändäggan.» Izjär darät-a-wen, ad-ihall a-wa-däx has-ja tissant.

† 26:59 26:59 A-wa älzämaxät n-inušämän d-imizärän n-käl-Išrayil wa itirøn äššärexa, øntäneð a-s älqallitän, osaxän day tamøtte d-ølxøkum d-äddin.

27

*Tebädde n-ÿisa dat-Bilatös**(Marqös 15:1; Luqa 23:1-2; Exya 18:28-32)*

¹ Äffäw ɣas, əžžəmmäɣän imänokalän n-käl-tikutawen d-inušämän n-Işrayil, eṭṭäfän iyyän n-emm däɣ-isälan n-iji n-iman n-ÿisa,

² ərmäsän-t, jän däɣ-s tişem təzzar, əlwäyän-t s-Bilatös wa n-gəfär.

*Imməntäl Yähudəs i-iman-net**(Ijitän 1:18-19)*

³ Inhäy Yähudəs-i t-issäyḍärän a-s äššäreɣa n-tamättant a əɣtäsän i-ÿisa ɣas, ämmujräz a-wa ija; ikk' imänokalän n-käl-tikutawen d-inušämän n-Işrayil, ässoɣäl-asän kəraḍät timərwen n-ərriyal n-azrəf wi t-əkfän.

⁴ Os'-en-dd, inn'-asän, «Ofex abäkkad, ÿisa, wa jex däɣ-ifassän-näwän, wär t-illa a iɣšad.» Ennän-as: «Un, ma näkkul? A-wen əššäɣəl-näk.»

⁵ Irmäs Yähudəs azrəf-ənnin, ijär-asän-t-in däɣ-ehän n-ämudd wa mäqqärän təzzar, iglä, ässeläy aɣan, ija tärsəm däɣ-err-net, imməntäl i-iman-net.

⁶ Əkkəmen-dd imänokalän n-käl-tikutawen azrəf wa hin-ijär mäšan, ənnän: «Wär hanäɣ-xälal iji n-azrəf-wa-däɣ fäll-wa n-ehän n-ämudd wa mäqqärän, ed ənta a-s ätwäjjän iman n-ähaləs.»

⁷ Əžžəmmäɣän däɣ-isälan n-a-wa mad-əjən i-azrəf-en, ohärän emm, ənnän, ad-sär-s žänşən ašəkrəš n-ähaləs iyyän hin-ižanşen iləkkan, i-ad-umas edägg-en, tižəska i-imäjarän.

⁸ Däɣ-təssəba n-äddäbara-wen-däɣ a fäl har ašäl-i-däɣ, təfärre-ten-däɣ, iwär-tät isəm: «Ašəkrəš wa n-ašni.»

⁹ Amoos a-wen-däɣ jän a ässitbätän a-wa innä ännäbi Yirmiya,† a-s innä däɣ-əlkəttab-net:

«Ärmäsän kəraḍät timərwen n-ərriyal n-azrəf, älqim-wen-däɣ a-s t-ədkäḍän käl-Işrayil, ənta-den-däɣ a-wa dār-ässagdähän älqim n-ägg-adəm,

¹⁰ əžžənşän sār-s ašəkrəš wa n-i n-iləkkan s-əmmək wa s-hi-tän-innä Emäli.»

*Ämewäy ÿisa s-Bilatös**(Marqös 15:2-5; Luqa 23:3-5; Exya 18:33-38)*

¹¹ Älwäqq wa dd-ibdäd ÿisa dat-Bilatös wa n-gəfär, issəstän-t, inn'-as: «Ak, käyy a-s ämänokal n-käl-Älyähud meɣ?» Inn'-as ÿisa: «Käyy iman-näk, tənneḍ-tän.»

¹² Əggädän-dd imänokalän n-käl-tikutawen d-inušämän n-Işrayil, ad-t-sadlamän siha d-siha mäšan, wär t-illa a hasän-inna.

¹³ Innä gəfär i-ÿisa: «Ajän käyy, wär selləd i-tikunen ti fälla-k titwənninen?»

¹⁴ Wär t-təlla täfert dd-təzjarät emm n-ÿisa, iqqän a-wen eɣäf n-gəfär.

*Bäryäbbas wa n-emäjj n-iman**(Marqös 15:6-15; Luqa 23:13-25; Exya 18:39-19:16)*

¹⁵ Äzzäman-en, hak ämudd n-Faška, äsiwäyy'-in gəfär u-takärmüt wa däɣ-s tətṭär tamətte.

¹⁶ A-s itäjj a-wen-däɣ, ih' ähaləs s-isəm-net Bäryäbbas takärmüt, isəm-net iyyän ÿisa ənta-däɣ, wär t-illa ere s-wädden issan fäll-terwidəma-net.

† 27:9 27:9 A-wa ännäbi dd-äzzarän i-ÿisa, äloläy däɣ-isälan-net säḍisät timaḍ n-awätay dat-tiwit-net.

17 Inhäy Bilatəs tamətte-ta dd-təžžəmmäxät sär-s ɣas, inn'-asän: «Läxätät-ahi, əndek jer-meddən-wi-däx n-əssin wa s-tärham a hawän-t-in-səwwəyyäx? Ma tässofäm Bärɣäbbas meɣ ʃisa wa s-itawänna Älmaseɣ?»

18 Ij'-asän Bilatəs asəstan-wen-däx fäl-a-s issan a-s təmyäre n-tismiten-näsän ɣas a fäl ästärmäsän ʃisa.

19 Äqqiima Bilatəs härwa däx-edägg wa däx-iɣattäs äššäreɣa a-s dd-täšmašäl hənne-s äwadəm sär-s i-ad-wär-isəmtətil iman-net d-iman n-ähaləs wärän iɣšed härät ed tənn'-as, əndähaɗ, əgdälän-as imänawnäwän n-ähaləs-en-däx eɗəs.

20 Əggädän imänokalän n-käl-tikutawen d-inušämän n-Israyil, äšhäššälän tamətte i-ad-təttär däx-gəfär ad-hasän-dd-isəwwəy Bärɣäbbas, ämmät ʃisa.

21 Oläs daɣ gəfär, inn'-asän: «Əndek jer-meddən-wi-däx n-əssin wa s-tärham ad-hawän-t-in-səwwəyyäx?» Ənnän-as: «Bärɣäbbas.»

22 Inn'-asän Bilatəs: «ʃisa-š wa s-itawänna Älmaseɣ, ma has-e-äjäx?» Ənnän-as iket-däx-näsän: «Itwəşləbet fäll-tajəttewt!»

23 Inn'-asän Bilatəs: «Mafäl, ma iɣšäd t-äsiinähəjjän d-taməttant?» Äşɣäyyän daɣ s-äşşahät: «Itwəşləbet fäll-tajəttewt.»

24 Inhäy Bilatəs a-s wär t-illa a infa mäjräd-net ed, təssəntä tamətte amdərway n-əššənju ɣas, idkäl-dd äkoss han aman, ässeräd ifassän-net dat-tamətte təzzar, inn'-asän: «Ähaləs-i-däx ya ämaɣdal, täjjihäm a-s wär däx-i əɗmenän iman-net; oyyeɣ jere-wän där-s.»

25 Tənn'-as tamətte iket-net: «Əyya, nərɗa s-a-wen; əɗmənnət iman-net däx-näx näkkäneɗ d-ihäyawän-nänäx.»

26 Äswäyy'-asän-in Bilatəs Bärɣäbbas, äswäjjä tiwit n-ebärtäk däx-ʃisa təzzar, ikf'-asän-t i-ad-itwəşləb fäll-tajəttewt.

Jän əssärdusa ʃisa tekäškäšt
(Marqəs 15:16-20; Exya 19:2-3)

27 Əlwäyän əssärdusa wi n-gəfär ʃisa s-ammäs n-ehän wa n-gəfär, iɣläyɣäläy-t-dd dihen ejhän n-əssärdusa imdan,

28 əkkäsän däx-s isəlsa-net, əssəlsän-t anäkäbba šəggäɣän,

29 jän-as älmät, korona, a-wen, takənbut šund ta n-imänokalän təzət däx-isənnänän, jän älmät tāborit ta n-təmmənukəla däx-äfuss-net wa n-aɣil, ad-rakkäɣän data-s, ɗazzän, jannen-as: «Ämänokal n-käl-Älyähud, nəj'-ak gärdəbu!»

30 Situfän fälla-s, tihäɣän däx-s tāborit ta jän däx-äfuss-net, təggatän-t sär-s fäll-eɣäf.

31 Əssəgdähän däx-tekäškäšt ta tän-təşlät ɣas, əkkäsän-dd fälla-s anäkäbba-wənnin šəggäɣän, əsoɣälän-as isəlsa-net təzzar, əglän där-s i-ad-itwəşləb fäll-tajəttewt.

Atwəşləb n-ʃisa fäll-tajəttewt
(Marqəs 15:21-32; Luqa 23:26-43; Exya 19:17-27)

32 Əglän där-s a-s ämmoqqäsän d-ähaləs n-tadäbayt ta n-Qərwan s-isəmənet Simyon; äšhäššälän-t alənji n-tajəttewt ta fäll-mad-itwəşləb ʃisa.

33 Əkkän d-ʃisa edägg s-itawänna: Gälgota, a-wen älmäɣna-net: «Edägg wa n-akärkor.» Əwwädän-in edägg-en ɣas,

34 əssärtäyän əssärdusa asməd d-asəfar iyyän ifannäzän tissant i-ad-has-t-səswən, mäšan, äkräbbät-t ɣas, unjäy sär-s.

³⁵ Ɖşlăbăn-t ɵssărdusa făll-tajəttewt ɣas, jăn tisăɣeren i-ad-užanăn isəlsa-net jer-iman-năsăn; ämoos a-wen a ässiitbătăn a-wa s-kăla tăn-innă ännăbi iyyăn a-s innă:

«Ăžunăn isəlsa-nin jer-iman-năsăn

jăn tisăɣeren făll-anăkăbba-nin.»

³⁶ Ɖssəmdăn a-wen-dăɣ ɣas, əqqimăn, jăn ənniyăt i-Ÿisa,

³⁷ ɵttəytăyăn älləx jənnəj-s i-ad-əlmədăn äddinăt äddălil wa săr-s dd-orăwăn tamăttant. Älləx-en, iktab fălla-s:

«A-WA ŸISA WA N-ĂMĂNOKAL N-KĂL-ĂLYĂHUD».

³⁸ Aşăl-en, ämizăyyen ɵssin inaxtafăn atwəşləb d-Ÿisa; ätwăşləb iyyăn daw-aɣil-net, ätwăşləb wa iyyăđăn daw-tăşalje-net.

³⁹ Iqqăl Ÿisa tekăşkăşt i-äddinăt-wi tikəynen, gaggărăn-t, siwliwilăn iɣăfawăn-năsăn,

⁴⁰ jannen-as: «Ɖyyaa, kăyy-i innăn tăddoobed terăzze n-ehăn n-ămudd wa măqqărăn taləsăd-t edey dăɣ-kărađ išilan, äɣləs iman-năk ya ämăra! Kunta tidət-dăɣ a-s kăyy a-s Rure-s n-Măssinăɣ, zubbət-dd tajəttewt!»

⁴¹ Ad-đazzăn dăɣ-s đay imănokălăn n-kăl-tikutawen d-ălyulam d-Ăţţăwrăt d-inuşămăn n-Işrayil, jannen:

⁴² «Wădden iɣləs äddinăt wi iyyăđnen, iɣləset ya iman-net ämăra. Ikkəset-dd iman-net făll-tajəttewt, dihen ad-nəfləs a-s ɵnta a-s ämănokəl n-Işrayil;

⁴³ wădden oman s-Măssinăɣ, iɣləset-t Măssinăɣ ya ämăra kunta ɵnta irh'-e, ed innă, ɵnta a-s Rure-s.»

⁴⁴ Ɖggăđăn-dd đay inaxtafăn wi ätwăşləbnen edes-has, ad-t-gaggărăn ɵntăneđ-dăɣ s-ɵmmək-en-dăɣ.

Tamăttant n-Ÿisa

(Marqəs 15:33-41; Luqa 23:44-49; Exya 19:28-30)

⁴⁵ Ɖlsănăt tihay ärori n-ăkall iket-dăɣ-net wa-dăɣ n-tarăhut hundăɣ har tezzar.

⁴⁶ Təjă tezzar ɣas, äşɣărăt Ÿisa s-afălla, innă dăɣ-tawalt-net:

«Yălləy, Yălləy,

lama săbăxtani?»

A-wen älmăɣna-net:

«Măssi-ɣ Măssinăɣ, Măssi-ɣ Măssinăɣ,

mafăl hi-təyyəd d-iman-in

dăɣ-tisnant-ta-dăɣ?»

⁴⁷ Ɖslăn-as äddinăt əbdadnen dihen, wăr-əfhemăn a-wa ijănna ɣas, ad-jannen: «Săjdăt-as, ännăbi Ÿəli a iɣarr!»

⁴⁸ Oşăl-dd iyyăn dăɣ-săn älwăqq-wen-dăɣ, issəlmăɣ təduft təttalăt făll-ăbori dăɣ-bənegăr tezzar, ässok'-et-dd emm n-Ÿisa i-ad-tăt-isuməm, infəw-t a-wen dăɣ-fad

⁴⁹ măşan, ɵnnăn-as imidiwăn-net: «Ɖşləy-as, äyy'-e ad-nənhəy kunta ad-t-dd-ass ännăbi Ÿəli, iɣləs-t.»

⁵⁰ Äşɣărăt Ÿisa đay s-ăşşahăt, tezzar, ɵjmăđăn-t iman.

⁵¹ Diha-dăɣ d-ija a-wen a-s ärido wa ibđăn edăgg n-ămudd wa şăddijăn d-wa iknăn təşşədje dăɣ-ehăn n-ămudd wa măqqărăn da-dăɣ a-s iqqărrowăt dăɣ-ammas, wa-dăɣ n-afălla-net har ider-net; äşkăđkăđ äkall, äşşoren iđaxăn;

⁵² ämerănăt tižəska, ɵnkărăn-dd inəmmuttan n-imumənăn äjjootnen

⁵³ ɖarät-tanäkra n-Ÿisa jer-inəmmuttan. Äjjəyhän äddinät äjjootnen tän-ənhaynen a-s dd-əjjäšan aɣrəm wa šäddijän n-Yäruusaläm ɖarät tanäkra-näsän jer-inəmmuttan.

⁵⁴ Inhäy käbtän iyyän n-käl-Roma d-əssärdusa wi jänen ənniyät i-Ÿisa a-wa ijän d-aškədkəd wa ija äkall ɣas, ärmäxän, ad-jannen: «Tidət-däx a-s ähaləs-i-däx, Rure-s n-Mässinäx.»

⁵⁵ Əbdadnät daɣ tideden äjjootnen dihen, əswadnät däx-ijəj däx-a-wa ijän iket-net. Tideden-tin-däx a-s käla ədhälnät Ÿisa, äddewnät dār-s wa däx n-a ifäl teje ta n-Galila har əntänäteɖ-da-däx;

⁵⁶ h'-enät Märyäma ta n-Muläzɖaləyät d-Märyäma ta n-ma-s n-Yaqub d-Yusəf, h'-enät daɣ ma-s n-dägg-Zäbdi.

Azəkka n-Ÿisa

(Marqəs 15:42-47; Luqa 23:50-56; Exya 19:38-42)

⁵⁷ Tokäy takkäšt ɣas, osä-dd ägg-ehäre iyyän la taɣrəmt ta n-Arimata n-anätṭalib n-Ÿisa s-isəm-net Yusəf.

⁵⁸ Ənta-en-däx a ikkän Bilatəs, ittär däx-s turhajät n-ad-dd-ikkəs tafəkka n-Ÿisa fäll-tajəttewt, istär-tät; irɖ'-as Bilatəs s-a-wen.

⁵⁹ Ikkäs-dd Yusəf tafəkka n-Ÿisa fäll-tajəttewt, ikn'-et, issəls'-et tefit

⁶⁰ təzzar, issəns'-et däx-azəkka äynayän s-äru t-iɣaš i-iman-net däx-esäwäl; äšxäränɣarät-t-dd ɖarät-a-wen tähunt mäqqoorät, äṭṭubbät sār-s emm n-azəkka təzzar, iglä.

⁶¹ A-s itäjj a-wen-däx, təbdad Märyäma ta n-Muläzɖaləyät d-tanəmmäxrut-net ta iyyäɖät, äqqimänät tissənen dat-azəkka-en-däx, hannäynät a-wa ijän iket-net.

⁶² Äba Ÿisa däx-ašäl wa n-dat-wa d-siməjnun käl-Älyähud i-ašäl wa n-əssəbət-i n-täsonfat. Ašäl wa ilkämän i-wen n-əssəbət wa n-täsonfat, əkkän imänokalän n-käl-tikutawen d-käl-faris Bilatəs, ənnän-as:

⁶³ «Ämänokal-nänäx, nəkittəw a-s äwadəm wa išinməsrəyän äddinät, a-s iddär, innä, afäl t-äba, käraɖ išilan ɖarät-tamättant-net, ad-dd-inkär jer-inəmmuttan.

⁶⁴ Närha däx-k, ad-səwwəjjəd ənniyät i-azəkka-net hundäx har akəyən käraɖ išilan-win-däx s-innä, dihen, wär mad-akrən inəṭṭulab-net tafəkka-net, əffärän-tät təzzar, ənnən i-tamətte a-s inkär-dd jer-inəmmuttan. Afäl jän a-wen, ad-tajär tanməšrayt ta jän ta ija ənta iman-net.»

⁶⁵ Inn'-asän Bilatəs: «Äjät a-wa s-tärhäm. Ənhəywät, härät däx-əssärdusa-dədi, səwwəjjəm-tän ənniyät i-azəkka s-əmmək wa s-tärhäm.»

⁶⁶ Əkkän azəkka, əssəbdädän data-s əssärdusa təzzar, əknän-t äṭabbu i-ad-wär-itədubut äwadəm wäl' iyyän arr-net.

28

Inkär-dd Ÿisa jer-inəmmuttan

(Marqəs 16:1-11; Luqa 24:1-12; Exya 20:1-10)

¹ Täbboqqät tifawt n-ašäl wa n-ɖarät wa n-əssəbət-i n-täsonfat ɣas, təkka Märyäma ta n-Muläzɖaləyät azəkka täddeew d-Märyäma ta iyyäɖät n-tanəmmäxrut-net.

² A əndärrän, äzzubbät-dd änjälos n-Emäli dd-ifalän išənnawän, äškäɖkäd äkall s-äššahät, äšxäraräd-in tähunt ta härät emm n-azəkka, äqqima fälla-s.

³ Änjälos-i-däx, äsimäxmäx šund essam, jan isəlsa-net təməlle-i-däx mäqqarät.

⁴ Ija a-wen ɣas, jän əssärdusa wi jänen ənniyät i-azəkka tarəmmeyt-ta-däx fäl dd-hän äbbunbəyän šund ämmun.

⁵ Imməjräd änjalos i-tiɖeden, inn'-asnät: «Wär tärmeɣmät; əssanəɣ a-s ʎisa wa ätwäsläbän fäll-tajəttewt a-s tamməɣmät;

⁶ äbas t-illa diha, inkär-dd jer-inəmmuttan s-əmmək wa s-tän-innä, əyyäwmät, ənhəymät edägg wa s-käla däx-s insa.

⁷ Šəwənkətmät ämära, təjəmət isälan n-tanäkra-net jer-inəmmuttan i-inəttulab, tälləɣätmät-asän daɣ a-s äzzar-awän iket-näwän s-Galila ed dihen-däx ad-t-mad-tənhəyəm. Ənta-den-däx mäjräd wa s-dd-ämešäləɣ i-ad-hakmät-t-in-səssiwəɖäɣ.»

⁸ Fälnät šik azəkka, tärtay-asnät tarəmmeyt d-təmyäre n-tedäwit, ošälnät i-ad-əjənät jänät isälan däx-inəttulab-net.

⁹ Wär t-illa a hin-əjrahnät a-s hasnät-dd-ilkäɖ ʎisa iman-net, ij'-asnät əsafu. Ohäznät-t-dd, ärkäɣnät data-s, ad-timəllutnät i-iɖarän-net, ɣäbbädnt-t.

¹⁰ Inn'-asnät: «Wär tərmeɣmät, əqqəlmät ayətma-ɣ, tənnəmət-asän a-s, äzzarəɣ-asän s-teje ta n-Galila-i-däx hi-mad-ənhəyən.»

Utär n-akuddəl n-tanäkra n-ʎisa jer-inəmmuttan

¹¹ Härwa hanät zäbo, əglanät a-s əkkän əssärdusa wi jänen ənniyät i-azəkka aɣrəm, äwwayän isälan n-a-wa ijän iket-net i-imänokalän n-käl-tikutawen.

¹² Əslän imänokalän n-käl-tikutawen d-inušämän n-Işrayil i-isälan-win-däx ɣas, änyäymän fäl a-wen. Inkär älzämaɣät-näsän ɣas, əkfän azrəf äjjeen i-əssärdusa təzzar, ənnän-asän:

¹³ «Ere käwän-issəstänän, ännät-as: osän-anəɣ-dd inəttulab n-ʎisa s-ehäd, nəttas, okärän tafəkka-net, əglän där-s.»

¹⁴ Ənnän i-əssärdusa: «Afäl əjjäšan isälan gəfär, ad-t-nəsəsmäɖ fälla-wän, täɣləsäm.»

¹⁵ Ärmäsän əssärdusa azrəf-näsän, əglän däx-əššəɣəl-näsän, jän a-wa hasän-ätwännän. Ämoos a-s isälan-win-däx a əfläsän käl-Älyähud har ašäl-i-däx.

Ämašal wa mäqqärän issäɣläf ʎisa inəttulab-net

(Marqəs 16:14-18; Luqa 24:36-49; Exya 20:19-23; Ijitän 1:6-8)

¹⁶ Əkkän inəttulab wi n-märaw d-iyän taɖaxt ta hät teje ta n-Galila hasän-ija ʎisa tasəssihärt, ogäzän-t-in fälla-s.

¹⁷ Ənhäyän-t ɣas, ärkäɣän-as, ad-t-ɣabbädän mäšan, hakd a-wen-däx, han-tän iyyäɖ däx-s janen äššäk.

¹⁸ Ohäz-dd ʎisa älzämaɣät wa n-inəttulab-net, inn'-asän: «Wär t-illa jer-işənnawän d-äkall a-s wädden əjrawəɣ fälla-s tärna;

¹⁹ a-wen-däx a fäl ämära, äglät; äkkät tiwsaten n-äddunya iket-däx-näsnät, səttuləbäm däx-snät äddinät, səlmäɣäm-tän däx-aman s-isəm n-Abba d-Rure-s d-Unfas Šäddijän,

²⁰ säɣrəm-tän amišəl n-a-wa s-hawän-omärəɣ iket-net. Näkk-da, ad-där-wän äddewəɣ, ədhaləɣ-käwän hak ašäl har təmdəw äddunya.» Amin!

Ālənžil n-Ŷisa Ālmaseş wa iktāb Marqəş

Āmaşal wa dd-āssawāḍ Eşya wa n-Enəsselmāş
(Mātti 3:1-12; Luqa 3:1-17; Eşya 1:19-23)

¹ Sānto n-Ālənžil n-Ŷisa Ālmaseş wa n-Rure-s n-Māssināş da:

² Ēnta-en-dāş a fäll-innä ānnābi Saya† dāş-əlkəttab-net:

«Ēnhəy! Āzizārāş-ak, inna Māssināş,
ānāmmaşul-in wa he-iknən tabarāt-nāk.

³ Ānāmmaşul-en, āşeyārāt dāş-tenere, ijanna:

«Āknāt tabarāt n-Māssināş,
şessişədāt ibaran-net.» »

⁴ Ēmmək-wen-dāş a-s dd-osā Eşya wa n-Enəsselmāş, ixaṭṭāb, ijanna i-āddināt: «Utabāt, tətşwəşelmāşām dāş-aman i-ad-təjrəwām tenāşşe n-ibākkaḍān.»

⁵ Ijanna a-wen-dāş, ad-sār-s dd-zajjārān āddināt ājjootnen dd-falnen teje ta n-Ālyāhudəyāt d-aşrəm wa n-Yārussālam, safākkarān-dd a-wa āmeşālān dāş-ibākkaḍān dat-tamətte, isalmaş-tān dāş-aman n-ejānş wa s-itawānna Ŷurdəni.

⁶ Ils' Eşya emāls iknan s-elām n-amnəs warān amşadān, ijbās s-taməntəka n-elām, iddar s-taşwalt d-torawāt.

⁷ Ixaṭṭāb, ijanna i-tamətte: «Ad-hi-dd-işrəy-i hi-øjārān tārna, ij'-ahi tifut ta-dāş s-wār-ānhājāş wāla-dāş d-ad-əddunkuş i-ad-arāş issal n-tifādelen-net.

⁸ Nākk, aman a dāş-kāwān-salmaşāş, māşan ənta, Unfas Şāddijān a dāş-kāwān-e-isəlmāş.»

Atşwəşelmaş n-Ŷisa
(Mātti 3:13-17; Luqa 3:21-22)

⁹ Işilan-win-dāş a dāş-dd-ifāl Ŷisa taşrəmt ta n-Nāşirāt hāt teje ta n-Galila, ikkā-dd Eşya, issəlmāş-t dāş-aman n-ejānş wa n-Ŷurdəni.

¹⁰ Diha-dāş dd-izjār aman, ad-inhāy işənnawān a-s dd-āmerān, āzzubbāt-dd fälla-s Unfas Şāddijān dāş-ānnuş n-tedābert mällāt,

¹¹ ijmād-dd emāşli işənnawān, innān:
«Kāyy-i-dāş a-s Rure-ş wa əkneeş tārha,
kāyy a dāş-āsriwān iman-in.»

Āżżurrāb Iblis Ŷisa
(Mātti 4:1-11; Luqa 4:1-13)

¹² Şik ḍarāt-a-wen, oşād Unfas n-Māssināş Ŷisa s-tenere,

¹³ ijā dāş-s əkkəzāt timərwen n-aşāl, itizārrib-t Iblis, irtay d-iwāşsan, āxdamān-as ānjālosān.

Sānto n-āmaşal n-Ŷisa Ālmaseş
(Mātti 4:12-17; Luqa 4:14-15)

¹⁴ İttārmās Eşya wa n-Enəsselmāş şas, ikkā Ŷisa teje ta n-Galila, ad-dāş-s ixaṭṭāb isālan n-Ālənžil n-Māssināş.

† 1:2 1:2 A-wa ānnābi dd-āzzarān i-Ŷisa, ālolāy dāş-isālan-net əşşayāt timād n-awātay dat-tiwit-net.

¹⁵ Ijanna i-äddinät: «Täqqän täwwäq! Təmmənəya n-Mässināx, tohäz-dd; utabät, tamənäm s-isälan n-Älənžil.»

*Inəttulab n-Ÿisa wi äzzarnen
(Mätti 4:18-22; Luqa 5:1-11)*

¹⁶ Älliil Ÿisa asälim n-ejänš wa n-Galila a-s inhäy Simyon d-änña-s Idris, təjjarän titarren-näsän däx-aman ed iməhhuyya n-imānan a ämoosän.

¹⁷ Inn'-asän Ÿisa: «Elkəmət-ahi, ad-kāwän-äjäx meddən sār-i dd-sadawnen äddinät i-ad-tän-äxləsäx.»

¹⁸ Oyyän titarren-näsän älwäqq-wen-däx, əlkämän-as.

¹⁹ Illa-hin i-dihen a əndərrän, inhäy Ÿisa dagg-Zäbdi: Yaqub d-änña-s Exya, samäkrasän titarren däx-turäft-näsän ta n-aman,

²⁰ iyr'-en-dd ässağät-wen-däx. Oyyän abba-näsän Zäbdi däx-turäft ta n-aman ənta d-inaxdimän, əlkämän-as.

*Amälšon wa äzozäy Ÿisa däx-Qäfərnaxum
(Luqa 4:31-37)*

²¹ Əkkän tayrəmt ta n-Qäfərnaxum; ij'-en ašäl wa n-əssəbət-i n-təsonfat dihen ɣas, ikka Ÿisaehän n-äddin wa n-käl-Älyähud, ad-däx-s isayra tamətte.

²² Əqqälän-dd äddinät ɣas oran imawän fäl əjjäruzät-i-däx hasän-ija a-wa isayra, ed isayr'-en s-älxikmət n-ere issanän a-wa iha wädden, šund əlxulam wi n-Ättəwrät.

²³ Ehän n-äddin-en, ih'-ee əhaləs ih' əlšin, inhäy Ÿisa ɣas, ad-isayərat, ijanna:

²⁴ «Ya Ÿisa wa n-Nəşirät, ma däx-näx tərhed? Ajän əhəlak-nənəx a-s dd-tosed? Əssanəx ere wa təmoosäd, käyy-i-däx a-s: Wa Šəddijän dd-əšmašäl Mässināx.»

²⁵ Äsmähäd däx-s Ÿisa, inn'-as: «Əttəf emm-nək, təzjərad əhaləs-i-däx!»

²⁶ Äššəkädkäd əlšin əhaləs s-əşşahät, əşyərät däx-işənnawän təzzar, izjər-t.

²⁷ Issärməx a-wa ijän äddinät, əqqälän-dd hak iyyän isastan amidi-net, ijanna: «Ma ämoos a-wa? Ma təmoos teɣəre-ta-hi täynayät, täşsohet? Wa ənta wəla əlšinän e-d fälla-sän əsmähäd, ad-əjən a-wa inna.»

²⁸ Šik-däx a-s intäj isəm-net däx-teje ta n-Galila iket-däx-net.

*Äzozäy Ÿisa tađəggalt n-Simonyon d-imarhinän äjjootnen
(Mätti 8:14-17; Luqa 4:38-41)*

²⁹ Izjər-dd Ÿisaehän n-äddin wa n-käl-Älyähud ɣas, äddew d-Yaqub d-Exya s-ehän wa n-Simonyon d-Idris.

³⁰ A-s hin-əwwädän ehän, tässinsa tenäde tađəggalt n-Simonyon. Əlläɣenas sār-s äddinät älwäqq-wen-däx.

³¹ Os'-e-t, irmäs-tät-dd s-əfuss, issəbdäd-tät, tərza fälla-s tenäde, təbdäd, ad-tän-simjurut.

³² Tođa täfukt ɣas, əmewäyän-dd imarhinän d-iməlšan iket-näsän,

³³ äddew-dd ayərəm iket-net dat-əmm n-ehän-wen-däx iha.

³⁴ Äzozäy däx-sän i äjjootnen əjrawnät təkmoten wären oleh, ikkäs daɣ əlšinän äjjootnen däx-äddinät. Əlšinän əntəneḍ, wər tän-itəyy əmmijrädän ed əssanän ere wa ämoos.

*Ämašal n-Ÿisa s-teje ta n-Galila
(Luqa 4:42-44)*

³⁵ Eməğär n-aşäl wa iyyädän, härwa janät tihay, inkär Ƴisa, ikkä tenere n-iman-net, ad-itəddal Mässinäğ.

³⁶ Kälä has-itammäğ Simyon d-imidiwän-net

³⁷ har t-əjrəwän, ənnän-as: «Tamətte iket-net a hak-təmmağät.»

³⁸ Inn'-asän: «Näkket tidbi ti n-data-näğ i-ad-hasnät-äxtəbəğ əntänäteḍ-däğ, ed a-wen-däğ a-s dd-əmeşäläğ.»

³⁹ Issäğläy-dd teje ta n-Galila iket-net, ixatṭäb däğ-ihänan n-äddin wi n-käl-Älyähud, itakkäs alšinän däğ-äddinät.

Äzozäy Ƴisa ähaləs ijraw jəri (Mätti 8:1-4; Luqa 5:12-16)

⁴⁰ Osä-dd ähaləs ijraw jəri Ƴisa, irkäğ data-s, ad-t-ilaqqäd, ijann'-as: «Afäl tärhed a-wen-däğ, täddobed ad-hi-šəşdəjad.»

⁴¹ Täny'-e tähanint-net, izzäl äfuss-net, idäs-t, inn'-as: «Ärheəğ-t, išdaj.»

⁴² İzzäy däğ-jəri älwäqq-wen-däğ, šäddij.

⁴³ İkn'-e Ƴisa asəmmətär təzzar, issəgl'-e məšan,

⁴⁴ inn'-as: «Wär jed isälan i-äwadəm wäl' iyyän, əgləw, səkən iman-näk i-u-tikutawen, təjəd takute ta s-innä alämär wa n-Mosa däğ-isälan n-təşədje-näk i-ad-älläğät i-äddinät a-s təzzeyäd.»

⁴⁵ Məšan, igl' ähaləs-ənnin-däğ ğas, wär t-illa ere dār-ämmoqqäs s-wädden ija däğ-s isälan, äbas äddobät Ƴisa ad-ijjəş ağrəm wäl' iyyän ar s-ufär. Äqqima däğ-tenere ad-sär-s dd-təffalän äddinät išrutän n-äkall iket-net.

2

Äzozäy Ƴisa ähaləs ibdanän (Mätti 9:1-8; Luqa 5:17-26)

¹ Härät n-işilan ḍarät-a-wen, oläs-dd Ƴisa uğəl n-Qäfärnaxum. Əslän äddinät a-s ih' ehän wa däğ-itizəbbut ğas,

² əkkän-t-dd s-əjut har äbas t-illa edägg wälä-däğ dat-əmm n-ehän.

³ Ämmiijräd-asän dihen-däğ a-s t-dd-osän əkkoğ meddən ämisawäynen anäbdon iyyän,

⁴ məšan, igdäl-asän əjut n-tamətte ad-t-sänsən dat-Ƴisa. Äğläyän, äwwänän afälla n-ehän, əkkäsän-in əjobän-wi äsiitəxnen ehän däğ-tanämhala n-edägg wa däğ-ibdəd Ƴisa, ästärarän-dd s-axäbabu wa jän anäbdon, insa fäll-asəftäğ-net.

⁵ İnhäy Ƴisa immun-näsän ğas, innä i-anäbdon: «Alyad, ätwänşän-ak ibäkkadän-näk.»

⁶ Edägg-en, han-t härät däğ-älyulam n-Äṭṭäwrät. Əslän i-a-wa inna ğas, äbjänjänän,

⁷ ad-jannen: «Wa ma t-äsihälän məjräd-wa-däğ? Äskafär! Mi äddoben tenäşşe n-ibäkkadän säl Mässinäğ?»

⁸ İlmäd Ƴisa ɣur-iman-net älwäqq-wen-däğ a-wa däğ-zinəzjumän, inn'-asän: «Mafäl tajjäşän erk inəzjam şund-wi-däğ ulhawän-näwän?»

⁹ Ma ojärän täräğse jer-ad-tənnəd i-anäbdon: «Ätwänşän-ak ibäkkadän-näk,» d-ad-has-tənnəd: «Əbdəd, əḍkəl asəftäğ-näk, ärjəş.»

¹⁰ Aşäl-i, ässiilmädäğ-käwän a-s Ägg-ägg-adəm, ijraw fäll-ärori n-äkall turhajät n-tenäşşe n-ibäkkadän.» İnnä Ƴisa i-anäbdon ḍarät-a-wen:

¹¹ «Ənneğ-ak, əbdəd, əḍkəl asəftäğ-näk, əqqəl ehän-näk.»

12 Ibdäd, idkäl asəftäx-net ässaḡät-wen-däḡ, iglä hannäyän-t äddinät iket-däḡ-näsän. Äqqiimän-dd ḡas, tof'-en tākunt n-a-wa ijän, tiimələn Mässinäḡ, jannen: «A-wa ijän ašäl-i-däḡ, wär käla t-nənhäy.»

Iyrä-dd ḡisa Lewi i-ad-umas änätṭalib-net
(Mätti 9:9-13; Luqa 5:27-32)

13 Oläs ḡisa azäḡor, ikk' asälim n-ejänš wa n-Galila, ad-t-dd-takkän äddinät äjjootnen, isayr'-en.

14 Iglä däḡ-a-wen-däḡ a-s inhäy Lewi ägg Älfa, äqqiima däḡ-edägg n-älxidmät-net, ämoos änarmas n-tiwse, inn'-as ḡisa: «Älkəm-ahi!» Ibdäd Lewi, ilkäm-as.

15 Ḋarät-a-wen, äsmäjärrät Lewi ḡisa s-ehän-net. Itayäyma ḡisa däḡ-edägg wa n-imənsiwän a-s erk äddinät han inarmasän n-tiwse äjjootnen has-əlcamnen da-däḡ; osän-dd, äḡäyämän dār-s ənta d-inəṭṭulab-net.

16 Ənhäyän älḡulam n-Äṭṭawrät n-tagḡayt ta n-käl-faris a-s ohar ḡisa d-erk äddinät d-inarmasän n-tiwse ḡas, ənnän i-inəṭṭulab-net: «Mafäl itihär älḡalim-näwän imənsiwän d-inarmasän n-tiwse d-erk äddinät?»

17 Isl'-asän ḡisa ḡas, inn'-asän: «Äddinät ässoxätnen, wär-ämḡatärän s-läxtur; imarhinän a sār-s ämiḡatärnen. Näkk, wär dd-ämešäläḡ s-äddinät-wi ordänen iman-näsän iqqud, inäsbäkkädän a-s dd-ämešäläḡ.»

Isälan n-äzum
(Mätti 9:14-17; Luqa 5:33-39)

18 Ašäl iyyän d-äzumän inəṭṭulab wi n-Exya d-käl-faris, osän-dd äddinät ḡisa, ənnän-as: «Mafäl inəṭṭulab wi n-Exya d-käl-faris tuḡamän, a-s ija a-wen wi-näk əntäneḡ, wär tuḡamän?»

19 Inn'-asän ḡisa: «Ajän käl-tuksest, ilzam-tän äzum a ikk' ämazlay ill'-e jere-sän? A ikk' ämazlay ill'-e jere-sän, wär tän-ilzem ad-uḡamän.

20 Älkamän išilan wi tän-e-ifəl, dihen, ad-əjrəwän s-äzum.

21 Wär t-illa ere itəḡḡatän tikəst i-temälsit wäššärät s-taswəḡt n-tabdoḡt täynayät. Afäl ija a-wen, wär-e ähaj a-s dd-e-təsär taswəḡt ta täynayät fäll-temälsit ta wäššärät, täjj amənd ojärän wənnin.

22 Wär t-illa daḡ ere itajjän aman n-läḡnəb äynaynen, äxxiimmärnen däḡ-ijdad. Ere ijän a-wen har käfän aman-ənnin däḡ-ijdad, ad-has-səbbuqqen ijdad-net, ifut ḡarät-a-wen däḡ-läḡnəb hakd-däḡ däḡ-ijdad. Aman n-läḡnəb äynaynen äxxiimmärnen, iddidän äynaynen a däḡ-tän-itajj äwadəm.»

Isälan n-ašäl wa n-əssəbət-i n-täsonfat
(Mätti 12:1-8; Luqa 6:1-5)

23 Ašäl iyyän n-əssəbət-i n-ašäl wa n-täsonfat, iräs ḡisa d-inəṭṭulab-net išəkraš n-älkäma ad-däḡ-sän dd-nakkädän inəṭṭulab-net tiḡäḡänen n-älkäma.

24 Ənhäyän härät däḡ-käl-faris a-wa tän-išlän ḡas, ənnän-as: «Ənhəy, ma isawäjjen inəṭṭulab-näk a wärän-itətwəjj däḡ-ašäl wa n-əssəbət-i n-täsonfat?»

25 Inn'-asän ḡisa: «Adiš käwəneḡ, käla wär täḡrem däḡ-əlkeṭṭab a-wa ija Dawəd a-s ämḡatär, älluḡ ənta d-imidiwän-net.

26 Ätwänn'-anäḡ, ijjäš ehän n-Mässinäḡ däḡ-äzzäman wa d-ämoos Äbyatär ämänokal n-käl-tikutawen, ikša däḡ-tijəlwen-ti ämoosnen takute i-Mässinäḡ, s-wär t-illa ere s-t-təlla tetäte-näsnät a säl käl-tikutawen, ikfa däḡ-snät daḡ meddən wi dār-s äddewnen.»

²⁷ Inn'-asän day: «Wädden ägg-adəm a dd-ixläkän i-əssəbət, änn-ak, əssəbət a dd-ixläkän i-tənoflayt n-ägg-adəm.

²⁸ A-wen-däx a fäl Ägg-ägg-adəm, a ännihädän däx a-wa s-ila ägg-adəm d-a-wa s-wär ila s-ad-t-äj, däx-aşäl wa n-əssəbət-i n-täsonfat.»

3

Äzozäy Yisa ähaləs s-äqqur äfuss-net (Mätti 12:9-14; Luqa 6:6-11)

¹ Oläs Yisa dərät-a-wen uješ n-ehän n-äddin wa n-käl-Älyähud. Ill'-e dihen ähaləs s-äqqur äfuss-net.

² Jan-as käl-faris ənniyät, tassänän ihäl ad-t-izuzəy däx-aşäl n-älxibadät, əjrəwän ya əsaru s-t-əssədlämän.

³ Innä Yisa i-ähaləs wa s-äqqur äfuss-net: «Eyyäw, əbdəd däx-amməs n-älzəməxät.»

⁴ Innä i-älzəməxät dərät-a-wen: «Ak a xälälän däx-aşäl wa n-əssəbət-i n-täsonfat iji n-emärked, mex iji n-a läbasän, igguz n-iman, mex iji n-iman?» Wär t-illa ere has-innan hərət.

⁵ Issäxläy-tän-dd asəwəq n-ađkär irtayän d-tisnant fäl təssəba n-təxart-i jän ulhawän-nəsän, innä dərät-a-wen i-ähaləs: «Ezzəl äfuss-näk». İzzäl äfuss-net, izzäy.

⁶ Ezzərän käl-faris edəgg-en xas, änmänhäyän d-taggayt ta n-käl-Harudəs däx-isälan n-əmmək wa s-mad-əjən iman n-Yisa.

Äzozäy Yisa äddinät äjjootnen däx-tamətte

⁷ Äddew Yisa dərät-a-wen d-inəttulab-net s-asälim n-əjäns wa n-Galila, täddew-dd sār-s tamətte täjjeet dd-falät teje ta n-Galila d-ta n-Älyähudəyät,

⁸ İyyəd falän-dd Yärussälam, İyyəd äkall wa n-Iduma d-äkall wa İwərän aşrut wa n-emäynäj n-əjäns wa n-Yurdəni d-ixərman wi n-Tir d-Säyda d-älzəməxät äjjeen dd-ikkan daw-mäsällät n-hərätän wi itäj.

⁹ Innä Yisa i-inəttulab-net älwəqq-wen, ad-has-səmməjnun turəft n-aman İjjäs i-ad-wär t-täsnäkmäm tamətte

¹⁰ fäl-a-s äzozäy däx-sän i äjjootnen hundäx har äməra-däx, əqqälän-dd äddinät hak İyyän İtikəl amidi-net fäl tərha n-ad-t-ədəsən.

¹¹ İməlsän əntəneq, e-d t-ənhäyän, ad-ärkäxän data-s, saxären, jannen: «Käyy a-s Rure-s n-Mässinäx»

¹² məşan, İkann däx-sän asəmmähəq i-ad-wär-əlläxən ere wa ämoos.

İnəmmuşal wi n-məraw d-əssin (Mätti 10:1-4; Luqa 6:12-16)

¹³ İwwän Yisa dərät-a-wen tədəxt, İxra-dd s-İman-net İnəttulab wi s-İrha, əkkän-t-dd.

¹⁴ Äsnäfrän däx-sän məraw d-əssin wi s-İrha i-ad-t-əllan xur-s, əşwər-tän İsem İnəmmuşal wi n-İnaxtabän n-Älənzil,

¹⁵ İkf'-en day tərna n-ukəs n-əlşinän däx-äddinät.

¹⁶ Əntəneq-da wi n-məraw d-əssin əsnäfrän: Simyon wa əşwər İsem Bətrus;

¹⁷ Yaqub d-ənna-s Exya, wi n-dəgg-Zəbdi s-İj' İsem Boyərnažəs, a-wen əlməxna-net: dəgg-əjjaj;

¹⁸ İdris d-Fəlibb d-Bərtälamma d-Mätti d-Tomi d-Yaqub wa n-ägg Älfa d-Tade d-Simonyon wa n-əşşazəx

¹⁹ d-Yähudəs İsxaryut-i t-e-İsəssəxdərän.

Torda n-käl-ehän n-ÿisa
(Mätti 12:22-37; Luqa 11:14-23; 12:10)

²⁰ Iqqäl-dd ÿisa ehän ȝas, oläs-dd fälla-s älzämaȝät tidawt har äbas ijraw änta d-inəttulab-net wäla älwäqq s-ässokän härät imawän-näsän.

²¹ Eslän käl-ehän-net i-a-wen ȝas, äkkän-t-dd i-ad-t-ärmösän fäl-a-s jannen: «A-wa, immar-t härät.»

Ehän s-əknasän məssaw-s, wär-e ähaj

²² Eǵǵädän älyulam n-Ättäwrät wi dd-fälnen Yärussälam, ənnän: «A-wa Abälzäbil, Iblis wa n-ämänokal n-alšinän a t-ihan, ənta a t-ikfän tärna ta s-itakkäs alšinän däȝ-äddinät.»

²³ Iȝr'-en-dd ÿisa, issäȝläy-tän tangalt däȝ-hasän-inna: «Enderk əmmək wa s-tordam a-s Iblis äddoobät, ad-dd-iqqəl isattäȝ Iblis?»

²⁴ Afäl dd-əqqälän käl-iiyän n-əddəwəl əknasän jer-iman-näsän, əddəwəl-en, wär-e ähaj ibdad.

²⁵ Ehän däȝ s-dd-əqqälän məssaw-s əknasän jer-iman-näsän, ehän-en, wär-e ähaj ibdad.

²⁶ Afäl ibdäd Iblis i-iməššerəkän-net, ad-tän-ikannäs, wär-e ähaj ibdad, sämdo-net ȝas a ikka.

²⁷ Wär t-illa ere äddoben uješ n-ehän n-ähaləs n-anäkfor, awəy ilälän-net ar s-ad-t-ikrad təzzar, dihen, ad-udabät ad-awəy a-wa ihän ehän-net.»

Abäkkad wa s-wär t-təlla tenäšše-net

²⁸ «Äsidätteȝ-awän a-s abäkkad of'-ägg-adəm d-asəkkufär ija-däȝ, äddoobät Mässinäȝ ad-has-t-in-änš,

²⁹ mäšan äwadəm wa äskafärän däȝ-isälan n-Unfas Šäddijän, wär-ilkem ad-has-in-ätiwänša, ed iwär-t uđlem n-abäkkad iȝlalän.»

³⁰ Ij'-asän ÿisa mäjräd-wa-däȝ fäl a ənnin s-ənnän: «Ih'-e alšin.»

Anna d-ayətma-s n-ÿisa wi n-tidət
(Mätti 12:46-50; Luqa 8:19-21)

³¹ Osän-dd ayətma-s n-ÿisa äddeewän d-ma-s, əbdädän dat-emm n-ehän, äšmašälän-dd sār-s äwadəm i-ad-hasän-t-dd-iȝär.

³² A-s itäj a-wen-däȝ, äqqiima ÿisa jer-tamətə has-jat afäraj; ənnän-as äddinät: «Təbdad ma-k d-ayətma-k [d-šätma-k] dat-emm n-ehän, sastanän dār-k.»

³³ Inn'-asän: «Enderk anna-nin d-ayətma-ȝ [d-šätma-ȝ]?»

³⁴ Issäȝläy-dd tamətə ta täqqiimät akäyad-net, innä: «Eñhəywät anna-nin d-ayətma-ȝ, əntäned-da-däȝ.

³⁵ E d t-illäm ere itamašälän erhet n-Mässinäȝ, ənta a-s äñña-ȝ d-wälätma-ȝ d-ma-ȝ.»

4

Tangalt ta n-änäsdamu
(Mätti 13:1-9; Luqa 8:4-8)

¹ Oläs ÿisa däȝ asəȝär n-tamətə däȝ-asälim n-ejänš wa n-Galila. Təddew-dd sār-s tamətə täjjeet, ijjäš-as turäft n-aman, äqqiima däȝ-s, täqqimä-dd tamətə ənta təbdad däȝ-asälim n-aman, täsijäd-as.

² Issäȝra äddinät härätän äjjootnen s-tangalen. Däȝ-a-wa tän-issäȝra, inn'-asän ašäl iyyän:

³ «Säjdät! Kälä izjär änäsdamu iyyän i-ad-iddumət ašəkrəš-net.

⁴ Älwäqq wa d-itidumut, ođänät tiblalen tiyyäđ däx-äbara, äkkukären-tänät-dd igdađ, əksän-tänät.

⁵ Ođa ašar iyyän jer-tihun, äffoqqät-dd šik ed wär-intem däx-äkall,

⁶ täsmäqqät-dd täfukt jənnəj-s, təssärxa isəffuqqa, äqqur-in a-di iket-net ed wär-əntemän ikewän-net däx-härät.

⁷ Ođa ašar iyyän däx-tabəññənt, tədwäl-dd fälla-s tabəññənt, təzmäd-as, iyräy-in.

⁸ Ođa ašar wa iyyäđän däx-äkall olağan, ikräš aratan; ijä tiboläsen s-tiyyäđ kərəđät timərwen n-tablalt a tänät-iwarän, tiyyäđ sädisät timərwen, tiyyäđ temede.»

⁹ Inn'-asän ɗarät-a-wen: «Ere ilän timəzzujen s-islä-däx, isäjdet!»

*Äddälil wa fäl isayra Yisa tamətte s-tangalen
(Mätti 13:10-17; Luqa 8:9-10)*

¹⁰ Izjār-dd Yisa älzəməxät xas, əssəstänän-t inəttulab-net wi n-märəw d-əssin, d-äddinät wi sār-s dd-saxlaynen d-älməxna n-tangalen ti ija.

¹¹ Inn'-asän: «Kəwəneđ, təjrawəm turhajät n-ujreh n-əddəraj wa əmoosän isəlan n-Təmmənəya n-Mässinəx məšan, äddinät wi iyyäđnen n-ajəma, a-wa s-e-əslən iket-net, tangalen a däx-has-e-əslən i-innin:

¹² <Ad-əswađän, wär hənneyän,
äsijäđän, wär sellən;
i-ad-wär t-illa a jarrähän,
i-udağ ad-utabän s-Mässinəx,
əjrəwän tenäšše.> »

*Älməxna n-tangalt ta n-änəsdamu
(Mätti 13:18-23; Luqa 8:11-15)*

¹³ Inn'-asän dağ: «Xas ta-däx tangalt, wär tät-təjrehəm? Adiš əndek əmmək wa s-mad-təjrahəm tangalen ti iyyäđnen?

¹⁴ Änəsdamu, ənta a-s ənaxtab n-məjräd n-Mässinəx.

¹⁵ Äddinät iyyäđ, olähän d-äbara wa däx-ođänät tiblalen. E-d əslän i-məjräd n-Mässinəx, šik a-s tän-dd-itis Iblis, isəttəw-asän-t-in.

¹⁶ Äddinät iyyäđ, olähän d-tihun-ti jer-ođänät tiblalen; e-d əslän i-məjräd n-Mässinəx, ad-əhləyləyän, äqbəlän-t šik

¹⁷ məšan, wär t-təyyən ikraš ikewän däx-ulhawän-nəsän, ad-əjən äzzəman əñđərrän äkoyäđän däx-s məšan afäl dd-tosa tissust meğ osä-dd älxizabät däx-təssəba n-məjräd n-Mässinəx, ad-hin-əbbuṭṭəlän a-wa s-omänän.

¹⁸ Äddinät iyyäđ, əntəneđ a-s tabəññənt ta jer-ođänät tiblalen, ad-əslən i-məjräd n-Mässinəx

¹⁹ məšan, ad-has-əzmədän däx-ulhawän-nəsän s-tərha n-wälät-äddunya d-eyläl n-tərha n-ajmur-net d-derhanän iyyäđ äjjootnen, wär t-illa a sār-sän dd-isaxsal.

²⁰ Äddinät wi iyyäđnen, əntəneđ a-s äkall wa oləğan däx-ođänät tiblalen. Əntəneđ a-s e-d əslän i-məjräd n-Mässinəx, ad-t-äqbəlän, ijəš-asän-t älfäyda; tarəw-dd sār-sän tablalt tiyyät kərəđät timərwen n-tablalt, tiyyät sädisät timərwen, tiyyät temede n-tablalt.»

*Tangalt ta n-tefätelt
(Luqa 8:16-18)*

²¹ Inn'-asän Yisa dağ: «Äwadəm, wär-isərmis tefätelt təzzar, äj'-et daw-əkoss meğ daw-tešejit, änn-ak, edägg idkalän a fäll-tät-e-isäns.

22 Wār t-illa a iffarän s-wädden ad-dd-infiləl, wār t-təlla takše s-wädden ad-dd-təffukkär.

23 Ere dāx-wän ilän timəzzujen s-islä-dāx, isäjdet!

24 Äjät ənniyät i-a-wa s-salläm fäl-a-s, a-wa dār-ogdäh asjed wa täjjäm i-Mässinäx ad-dār-mad-agdäh daḡ ajäraw-näwän ḡur-s.

25 Äwadəm wa s-išwār ifhäm härät, ad-has-iwwaḡ musnät har isəssikəy mäšan, wa s-wār t-illa a ijarah, wār t-in-ikka härät, änn-ak, ad-dāx-s ämahäḡ wäla a-wa əndärrän ittäf.»

Tangalt ta n-temättäwt
(Mätti 13:31-35; Luqa 13:18-19)

26 Inn'-asän daḡ: «Sänto n-Təmmənəya n-Mässinäx, oläh d-a-wa s-e-d äddomät äwadəm ašəkrəš-net,

27 jer-itṭas wäla okay, jer-ehäḡ wäl' ašäl, ad-idaggäl ädomm dāx-ašəkrəš, itifäqqut-dd, dāx-a-s, wār təha tijya n-a-wen mässi-s ed,

28 äkall a dd-madän-arəw d-iman-net teyəšše s-tizarät, ḡara-s teḡäḡänt, təzjār-dd tejent n-älkäma teḡäḡänt.

29 Diha-dāx d-mad-inhəy mässi-s n-ašəkrəš a-s inḡa älkäma, ad-dd-mad-iḡkəl älgori-net i-illuy-net.»

30 Inn'-asän ḡarät-a-wen: «Ma dār-mad-nəsəssiläh sänto n-Təmmənəya n-Mässinäx? İndek ḡas tangalt täsisäjrähät sänto-net?

31 Sänto n-Təmmənəya n-Mässinäx, oläh d-temätäwt ta tojärät təmmətkit dāx-idommän. A-s tät-itidumut äwadəm, wār t-təlla temätäwt dāx-äddunya tät-tojärät təmmətkit,

32 mäšan, hakd a-wen-dāx, afäl tät-äddomät äwadəm, ad-dd-täjj tadäwla-i-dāx mäqqärät, tajär tiyəššawen iket-näsnät təššəjrət, təkrəš iləktan-i-dāx mäqqornen har wäla-dāx igḡaḡ, kallän daw-tele-net.»

33 Tangalen äjjootnen olähnen d-ti-dāx, s-älxal äsisäjrähän a-s issäḡra ḡisa äddinät;

34 wār t-illa a inna i-tamətte s-wädden tangalen a dāx-hasän-t-innä mäšan, e-d änmäjrəw d-inəṭṭulab-net dāx-edägg ištärän, ad-hasän-äffässär älmäḡna n-tangalen-tin-dāx iket-näsnät.

Ässasäm ḡisa aḡu d-ejäns
(Mätti 8:23-27; Luqa 8:22-25)

35 Toḡa täfukt ḡas, innä i-inəṭṭulab-net: «Nəjləyet ejäns s-ašrut wa n-emäynäj.»

36 Fälän tamətte, əglän dār-s inəṭṭulab dāx-turäft n-aman ta dāx-äqqiima, äddeewnät dār-sän daḡ turfen n-aman tiyyäḡ.

37 Əglan a-s dd-inkär aḡu-i-dāx äššoohen, ad-tibhilibəhilmät tinäzzämären i-turäft har išwar təḡnay aman.

38 A-s itäjj a-wen, ässoomät ḡisa adäfor, itṭas dāx-ajilal n-turäft n-aman. Əssənkärän-t inəṭṭulab dāx-edəs, ənnän-as: «Äḡalim! Ajän wār käy-təssärmäḡ tamättant-nänäḡ?»

39 Inkär-dd, äsmähäḡ fäll-aḡu, innä i-ejäns: «İsmad! Əzjəw!» İbdäd-in aḡu, sämmeḡ-in a-wen-dāx iket-net.

40 Inn'-asän ḡarät-a-wen: «Ma-käwän ässiirmäḡän? Ma ija immun-näwän?»

41 Jän inəṭṭulab tarəmməḡt-ta-dāx fäl dd-əqqälän ḡas, tinmənnin: «Ma ämoos äwadəm-wa-dāx s-wäla aḡu d-ejäns, sajadän-as?»

5

*Äzozäy Ƴisa amälšon iyyän
(Mätti 8:28-34; Luqa 8:26-39)*

- ¹ Ƴwwäðän-in ašrut n-ejänš wa iyyäðän, a-wen däx-äkall wa n-Gadara.
- ² Diha-däx dd-izjār Ƴisa turäft n-aman, ad-has-dd-ilkäð amälšon dd-izjarän tižeska.
- ³ Dihen-däx ad-izzaç, wär t-illa äwadəm äddoben akärad-net wäla-däx s-tišəm.
- ⁴ Akärad has-jän äddinät s-tifren hakd tišəm-däx, ad-tänät-dd-isäqqötös, wär t-illa fäw ere äddoben a däx-s ännähäd.
- ⁵ Ehäd d-ašäl iha tižeska, meç ošal fäll-iðayän, inaððäw iğäran, išašar iman-net s-tihun.
- ⁶ Ojja Ƴisa däx-ijøj ças, ošal-dd sär-s, irkäx data-s,
- ⁷ idkäl emäsli-net, innä: «Ƴisa, Rure-s n-Mässinäx wa iknä n-aðkul, ma däx-i tärhed? Fäl Mässinäx, wär hi-täqquzzäbed.»
- ⁸ Alšin wa t-ihän a ijannen a-wen ed isamähað Ƴisa fälla-s i-ad-t-izjār.
- ⁹ Issəstän-t Ƴisa, inn'-as: «Mi isəm-näk?» Inn'-as ähaləs: «Isəm-in: ejhän ed nəjjət.»
- ¹⁰ Ad-laqqädän alšinän wi t-hänen Ƴisa i-ad-tän-wär-ikkəs däx-äkall.
- ¹¹ A-s itäj a-wen-däx, iðan ehäre n-əlxənžärän fäll-tasäja n-taðayt hat attayän-en-däx.
- ¹² Ad-laqqädän alšinän Ƴisa, jannen-as: «Suk-anäx əlxənžärän i-ad-tän-nəjjəš.»
- ¹³ Ird'-asän s-a-wen. Ƴzjārän alšinän ähaləs, əjjäšan əlxənžärän, ad-dd-titrəktərikän a iwwäðän əssin afdän n-əlxənžär, wa-däx n-afälla n-taðayt, tiðəwän däx-ejänš, tattän-tän aman.
- ¹⁴ Ƴnhäyän imäðanän n-əlxənžärän a-wa ijän ças, äjewäðän. Ošälän, jän isälan däx-käl-açrəm d-attayän-net. Ad-dd-tišəl tamətte, tiwnifit-dd a-wa ijän.
- ¹⁵ Osän-dd äddinät edägg wa iha Ƴisa, ogäzän-dd amälšon wa s-käla t-ih' ejhän n-alšinän, äqqiima, ij' isəlsa, təh'-e ðay tijya n-iman-net.
- ¹⁶ Jän däx-sän äddinät wi äjjəyhnen i-a-wa ijräwän amälšon d-əlxənžärän isälan ças,
- ¹⁷ ad-təddalän Ƴisa d-ad-ifəl äkall-näsän.
- ¹⁸ Älwäqq wa d-itajjäs Ƴisa turäft n-aman, ikk'-e-hi-dd ähaləs wa s-käla t-hän alšinän, ad-t-ilaqqäd d-ad-där-s idaw.
- ¹⁹ Wär has-irða Ƴisa s-a-wen, änn-ak, inn'-as: «Ƴgləw, əqqəl ehän-näk, diha t-əllän išäqqayän-näk, tälläxed-asän təmyäre n-a-wa hak-ija Emäli d-əmmək wa s-hak-oðän tähanint.»
- ²⁰ Iglä, ad-itajj isälan n-təmyäre n-a-wa has-ija Ƴisa däx-teje ta jät isəm: «Ta n-märaw iğärman». Ere has-islän-däx, ad-dd-iqqəl ças äkun däx-isälan-net.

*Isälan n-elle-s n-Žayrus d-tamäðt ta dd-izajjār ašni
(Mätti 9:18-26; Luqa 8:40-56)*

- ²¹ Izjār Ƴisa darät-a-wen s-asälim n-ejänš wa iyyäðän, diha-däx dd-äsjanän däx-asälim n-aman, ad-sär-s dd-täddew tamətte täjjeet.
- ²² Os'-e-hi-dd dihen iyyän däx-älfäqqitän n-ehän n-äddin wa n-käl-Älyähud n-tayrəmt-en s-isəm-net Žayrus, inhäy Ƴisa ças, irkäx data-s,
- ²³ ad-t-itəddal, ijann'-as: «Talyaðt-in, täbok i-iba, nidawet sär-s, sənsəd fälla-s ifassän-näk, ad-təzzəy, təddär.»

- 24 Äddew dār-s Ƴisa, təlcam-as daƳ tamətte täjjeet t-täsinäkmämät.
- 25 Tamətte-en, h'-et tamädt ijammäđ ašni a ilan mārāw iwətyan d-əssin,
- 26 təkna ahānāy n-aƳāna jer-ifassān n-läxturtān, täsmälkäw-in a-wa təla iket-net mäšan, wār t-illa fāw a-hin-ifnažān dāƳ-turhənnā-net, änn-ak, tiwwađt Ƴas ad-dd-tajj fälla-s.
- 27 Təsl' isālan n-Ƴisa Ƴas, təjjäš-dd tamətte s-đarāt, đās erāswāy-net,
- 28 ed a-s täjj a-wen-dāƳ, janna: «Wāla erāswāy-net, kud-t-đāsāƳ, ad-əzzəyāƳ.»
- 29 Diha-dāƳ d-đās erāswāy-net, ad-iktäl ašni wa tāt-dd-izajjārān, tofrāy ässaƳāt-wen-dāƳ dāƳ-taƳəssa-net a-s təzzāy dāƳ-tizžurt-net.
- 30 Ilmäd Ƴisa Ƴur-iman-net, älwäqq-wen-dāƳ, fäl tārna ta t-dd-təjmädät, innäd-dd s-tamətte, innä: «Mi idāsān isəlsa-nin?»
- 31 Ğnnān-as inəttulab-net: «Ajān wār hənnəyād tamətte ta käy-täsinäkmämät a-s jänned: <Mi hi-idāsān?> »
- 32 IssäƳläy-tān-dd akāyad-net i-ad-inhəy ta t-təđāsāt.
- 33 Tənhāy tamädt älafu wa təjrāw Ƴas, tək'k'-e-hi-dd, täšikäđkäd a-wa dāƳ has-ja tarəmməxt, tođa data-s, tənn'-as tidət iket-net.
- 34 Inn'-as Ƴisa: «Talyađt, äzozāy-kām immun-nām, əgləw dāƳ-älxer, təzzeyād dāƳ-tizžurt-nām.»
- 35 Ämmiijräd Ƴisa hārwa a-s dd-osān äddināt dd-falnen eƳewən n-älfäqqi n-ehān wa n-äddin, ənnān-as: «Elle-k, äba-tāt. Ma s-salāyyaƳād ÄƳalim daƳ?»
- 36 Wār hin-ijreh Ƴisa a-wa jännen, innä i-älfäqqi n-ehān wa n-äddin: «Wār tärmeƳād, amən Ƴas.»
- 37 Igdäl Ƴisa i-äddināt iket-nāsān ad-dār-s idawān a-s təggädäd Bətrus d-Yaqub d-Exya wa n-əñña-s.
- 38 A-s hin-əwwäđān eƳewən n-emännähäđ n-ehān wa n-äddin, wār hin-ogežān ar tamətte tədgažāt; äsikäläl, äššurša a-wen-dāƳ, dāƳ-išənnawān.
- 39 Ijjäš-in fälla-sān, inn'-asān: «Ma käwān-idgažān, hallām? Tarat, wār tāt-äba, eđəs Ƴas a ja.»
- 40 Jān-t tekäškäšt. Izzəzjār-tān iket-dāƳ-nāsān, wār dd-äqqima dihen ar d-ti-s d-ma-s n-talyađt, d-inəttulab wi dār-dd-äddew. Ijjäš đarāt-a-wen edägg wa dāƳ-tənsa talyađt,
- 41 irmäs-tāt-dd s-äfuss, inn'-as: «*Talita kumi*», a-wen älmäƳna-net: «Talyađt, ənney-am, ənkär-dd.»
- 42 Təbdäd talyađt ässaƳāt-wen-dāƳ, tärjäš. Talyađt-en-dāƳ, la mārāw iwətyan d-əssin. Ğqqälān-dd äddināt Ƴas oran imawān fäl tihusay n-a-wa dāƳ ijān.
- 43 Ikn'-en-dāƳ Ƴisa asəmmətār i-ad-wār jen isālan n-a-wa ijān dāƳ-äwadəm wäl' iyyān təzzar, inn'-asān ad-tāt-əkfen a təkša.

6

Iba n-immun n-käl-taƳrəmt ta n-Nəširät (Mätti 13:53-58; Luqa 4:16-30)

- 1 Ifäl Ƴisa dihen, äddew d-inəttulab-net s-taƳrəmt ta dāƳ-idwäl.
- 2 Ašäl wa n-əssəbət-i n-täsonfat, ijjäš ehān n-äddin wa n-käl-Älyāhud, ad-dāƳ-s isayra. Äsijädān-as äddināt äjjootnen äkuunnen dāƳ-a-wa ijanna, əqqälān-dd Ƴas oran imawān, jannen: «Ähaləs-wa-dāƳ, əndek siha s-t-dd-iha a-wa itäj? Mi t-ikfān təlƳuləma d-tädabit n-iji n-tikunen ti itäj?»

³ Ak a-wa, ajän wädden Yisa wa n-mönizye n-rure-s n-Märyäma n-änḡa-s n-Yaqub d-Yusef d-Hudd d-Simyon? Wädden šätma-s da-däx əzzäḡnen jere-näḡ.» Jän-as a-wen-däx s-t-əzzayän asäkor, unjäyän sär-s omänän.

⁴ Inn'-asän: «Ännäbi, wär t-ill' edägg s-wädden ätiwäsämḡär däx-s, ar däx-äkall-net, d-ḡur-imärawän-net d-däx-ehän-net.»

⁵ Igdäl-as a-wen-däx, ad-ḡur-sän äj tikunen säl härät däx-imarhinän fäll-ässinsa ifassän-net, əzzäyän.

⁶ Tof'-e tākunt n-iba n-immun-näsän. Issäḡläy-dd ḡarät-a-wen däx-attayän n-tidbi-en-däx, isayra äddinät.

*Äšmašäl Yisa inəṭṭulab-net s-əssin-əssin
(Mätti 10:5-15; Luqa 9:1-6)*

⁷ Iyrä-dd Yisa inəṭṭulab-net wi n-märaw d-əssin ḡarät-a-wen, äšmašäl-tän s-əssin-əssin däx-a-s tän-ikfa tärna fäll-alšinän.

⁸ Äsmätär-tän, inn'-asän: «Wär təḡkeläm däx-asikəl-näwän a säl tāborit; wär täwweyäm äzzad, wäla šäkköš, wäl' azrəf,

⁹ asəsät tifädelen-näwän, wär jem əssin iräswäyän.»

¹⁰ Inn'-asän daḡ: «Ehän təjjäšäm-däx, təzzäḡäm däx-s har ašäl wa d-tässawäḡäm tekle.

¹¹ Edägg tosäm-däx, wär käwän-äsbärräkän mössaw-s, unjäyän s-asjəd-hawän, əzjərät-t, tābbäkbäkäm tifädelen-näwän i-ad-wär tänät-iləttäḡ wäla-däx äboqqal-net. Ilkam, ad-äjjäyh a-wen fälla-sän.»

¹² Əglän inəṭṭulab, ad-xaṭṭäbän i-äddinät i-ad-utabän,

¹³ takkäsän daḡ alšinän äjjootnen däx-äddinät, šawwäyän inəbdan s-əzzäyt, zizuyän-tän.

*Tamättant n-Exya wa n-Enəsselmäḡ
(Mätti 14:1-12; Luqa 9:7-9)*

¹⁴ Isl' ämänokal Harudəs mawmaw n-Yisa ed ih' isəm-net imawän n-äddinät iket-näsän. Jannen iyyäḡ däx-sän: «A-wa Exya wa n-Enəsselmäḡ a dd-inkärän jer-inəmmuttan, a-wen-däx a t-ikfän tädabit n-tikunen-ti itamašal.»

¹⁵ Jannen iyyäḡ: «Äbo, a-di ännäbi Yəli», jannen wi iyyäḡnen: «A-wa iyyän däx-ännäbitän wi n-ibda.»

¹⁶ Islä Harudəs i-a-wen ḡas, innä ənta: «A-wa Exya wa s-əssəfräsäḡ eḡäf-net, ənta a dd-oläsän tanäkra jer-inəmmuttan.»

¹⁷ Äzzäman-en, Harudəs iman-net a omärän s-ad-ättärmäs Exya, ijješ tišəm, itwəjär-in däx-takärmüt, däx-təssəba n-Harudəyät ta n-hänne-s n-änḡa-s Fəlibb däx-s ohäḡ Harudəs,

¹⁸ fäl-a-s innin, inn'-as Exya: «Wär hak-xälal, ad-tärkəbäd hänne-s n-änḡa-k.»

¹⁹ Təkšär ya Harudəyät Exya fäl a-wen-däx, ad-tattär tamättant-net mäšan, wär hənnəy tašləlt s-ja a-wen.

²⁰ Äksuḡ daḡ Harudəs Exya ed, issan a-s ähaləs oḡadän n-eməššeddəj a ämoos, oḡaz-t däx-təssəba n-a-wen-däx. E-d has-äsjäd ämmijräd, ad-t-əkmun iman-net kud-däx, ijraz-as asjəd-has.

²¹ Han a-wen-däx a-s dd-tosa taməntelt ta s-taqqäl Harudəyät a ija a-wa-däx. Ašäl d-tajjän iməšlan wi n-isəkta n-tiwit n-Harudəs, äsmäjarät-dd Harudəs käl-əlxəkum-net d-kumändatän n-əlxəkär-net d-imizärän n-teje ta n-Galila,

²² tøjjaš-dd elle-s n-Harudəyāt, ad-dallāl data-sän, ijrāz a-wen i-Harudəs d-iməjarän-net. Iyrä-dd ämänokal talyaḏt, inn'-as: «Ettär dāḡ-i a-wa tārhed, ad-ham-t-äkfäḡ.»

²³ Ad-has-itəhhaḏ s-ad-tāt-äkf a-wa dāḡ-s təttär, kud-irha umas täzune n-äkall-net.

²⁴ Təzjār talyaḏt, tənnä i-ma-s: «Ma dāḡ-s mad-əttäräḡ?» Tənn'-as ma-s: «Ettär dāḡ-s eḡäf n-Exya wa n-Enəsselmäḡ.»

²⁵ Täqqäl-dd ämänokal šik, tənn'-as: «Arheḡ ad-hi-təkfəd ämära-däḡ eḡäf n-Exya wa n-Enəsselmäḡ insa dāḡ-azāwa.»

²⁶ Ənxäsän iman n-ämänokal hullan mäšan, äbas äddoobät uḡəl s-a-wa inna, ed ihäḏ-as s-ad-tāt-äkf a-wa dāḡ-s mad-təttär, a ämoos-dāḡ, dat-iməjarän-net, wär-irha daḡ ad-ärz dāḡ-tənnä-net i-talyaḏt.

²⁷ Äšmašäl ässaḡät-wen-dāḡ əssärdasi dāḡ-wi jänen ənniyät i-ehän-net i-ad-dd-ifrəs eḡäf n-Exya. Ikk' əssärdasi takärmüt ta ih' Exya, ifräs-dd eḡäf-net,

²⁸ iwwäy-t-dd insa dāḡ-azāwa, ikf'-e i-talyaḏt, təkf'-e talyaḏt i-ma-s.

²⁹ Əslän inəṭṭulab n-Exya taməttant-net ḡas, əḡlän, əḏkälän-dd tafəkka-net, əzkän-t.

*Uḡəl n-inəṭṭulab wi äšmašäl ḡisa
(Mätti 14:13-14; Luqa 9:10)*

³⁰ Əqqälän-dd inəṭṭulab wi äšmašäl ḡisa, jän dāḡ-s isälan n-a-wa jän d-a-wa əssäyrän iket-net.

³¹ Inn'-asän: «Näkket edägg n-iman-nänäḡ, sunfəm a əndärrän.» Ij'-asän mäjräd-wen-dāḡ, fäl-a-s igdäl-asän, əjut n-emerjaš n-äddinät wälä ässaḡät s-ässokän härät imawän-näsän.

³² Əjjäšan turäft n-aman, əkkän tenere n-iman-näsän.

³³ Ənhäyän-tän äddinät äjjootnen a-s əḡlän, əzzäyän-tän ḡas, fälän-dd iyärman iket-näsän, ošälän-dd har hasän-əzzarän fäw s-edägg wa əkkän.

³⁴ Izjār-dd ḡisa turäft n-aman, inhäy əjut wa jän äddinät ḡas, täḡḡ'-e tähanint-näsän ed, olähän ḡas d-tihatten wären la aməḏan, ad-tän-isaxra härätän äjjootnen.

*Äsyāwän ḡisa səmmos afḏän n-ähäləs
(Mätti 14:15-21; Luqa 9:11-17; Exya 6:1-14)*

³⁵ Toḏa täfukt ḡas, osän-t-dd inəṭṭulab-net, ənnän-as: «Näkkäneḏ, edägg n-tenere a nəha, ij'-anäḡ ehäḏ;

³⁶ səḡləw äddinät, ad-əkkən tidbi d-imäzzaḡän wi ohäznen, žənšən-dd a əkšän.»

³⁷ Äwwežäb-asän ḡisa, inn'-asän: «Un, äkfät-tän a əkšän.» Ənnän-as: «Ajän a tārhed ad-näkk aḡrəm i-ad-dd-nəžänš tijəlwen n-sänatät timaḏ n-ärriyal n-azrəf i-ad-nəšäkš tamətte-ta-dāḡ?»

³⁸ Inn'-asän: «Əssənät-dd maniket tijəlwen läm.» Əlmädän-dd, ənnän-as: «Səmmosät tijəlwen d-əssin imänen.»

³⁹ Omär-asän ḏarät-a-wen s-ad-əbdəwän äddinät, säqqaymən-tän fäll-teyöšše ta dalet.

⁴⁰ Täqqima tamətte s-temeḏe-temeḏe n-äwadəm, səmmosät-səmmosät timərwen n-äwadəm.

⁴¹ Iḏkäl ḡisa tijəlwen ti n-səmmosät d-imänen wi n-əssin, äjozäy išənnawän, ämmoy i-Mässinäḡ; äfräsfäräs tijəlwen, änkäḏnäkäḏ imänen wi n-əssin təzzar, ikfä a-wen-dāḡ iket-net i-inəṭṭulab-net i-ad-t-užanän jer-äddinät iket-näsän.

⁴² Əkšän iket-dāḡ-näsän har əyyəwänän.

⁴³ Äsdawän-dd inoṭṭulab a-wa dd-əjläšän, osän-t idnäy märaw deketän d-össin n-tijəlwen d-imānan.

⁴⁴ Səmmos afdän n-āhaləs a əksānen ašäl-wen-däḡ.

Irjaš Ȳisa fäll-aman

(Mätti 14:22-27; Exya 6:16-21)

⁴⁵ Äsraräd Ȳisa darät-a-wen inoṭṭulab-net s-ujəš n-turäft ta n-aman, izarän-as s-efäyy n-ejānš wa iyyädän, ebre n-tayrəmt ta n-Bäṭsäyda, ad-isagla ənta tamətte.

⁴⁶ Fäl-t tamətte ḡas, iwwän taḡayt tiyyät, ad-itəddal Mässinäḡ.

⁴⁷ A-s ijä ehäd, təha turäft n-aman ta hän inoṭṭulab ammas n-ejānš, a-s ija a-wen Ȳisa ənta, ih' asālim n-aman.

⁴⁸ Ojj'-en äsimäḡatär-tän aḡu šāmad igla ehäd, ikk'-en-dd irjaš fäll-aman har dāroḡ tən-okāy.

⁴⁹ Ənhäyän-t ikk'-en-dd irjaš fäll-aman ḡas, äḡelän ämättānkul iyyän, ad-naddāwän iḡəran.

⁵⁰ Hannäyän-t mäšan, indär-asän a t-əzzəyän a-wa-däḡ hasän-təja tarəmmeyt. Ässewäl-asän šik, inn'-asän: «Əfləsät-ahi, näkk a-wa, wär tärmeḡäm.»

⁵¹ Ijjäš-dd fälla-sän turäft n-aman ḡas, ibdäd aḡu. Ämoos-asän a-wa ijän tākunt-i-däḡ mäqqärät.

⁵² Indär-asän ujhə n-asjət wa ija i-tijəlwen fäl täḡart-i-däḡ jän ulhawän-näsän.

Äzozäy Ȳisa imarhinän däḡ-teje ta n-Žännäšarät

(Mätti 14:34-36)

⁵³ Ijläy Ȳisa d-inoṭṭulab-net ejānš, äsjänän däḡ-äkall wa n-Žännäšarät.

⁵⁴ Diha-däḡ dd-əzjārän däḡ-turäft n-aman, ad-əzzäyän äddinät Ȳisa,

⁵⁵ ad-tišələn däḡ-äkall iket-net, tazāwen-dd sār-s imarhinän fäll-tišija s-edägg wa s-əslän ih'-e i-ad-tän-izuzəy.

⁵⁶ Edägg osa-däḡ, jer-iḡərman, tidbi, wāla ässukän, ad-dd-awəyän äddinät imarhinän-näsän, tattārän ad-äḡəsän kud-däḡ afär n-eräswey-net ed, ere t-iḡäsän-däḡ, ad-izzəy.

7

Isālan n-alkum i-agnatän

¹ Əžžəmmäḡän-dd käl-faris d-härät däḡ-älḡulam n-Äṭṭāwrät dd-falnen Ȳarussālam s-Ȳisa.

² Əjrähän-in däḡ-a-wen-däḡ a-s tattän iyyäd däḡ-inoṭṭulab-net, wär-ässerädän ifassän-näsän.

³ Iqqän a-wen iḡäfawän-näsän fäl-a-s käl-faris d-käl-Älyähud iket-näsän, ämoosän äddinät əlkamnen i-älḡadatän wi hasän-dd-oyyän imārawän-näsän: wär hasän-t-təlla tetäte ar s-ad-ässerädän ifassän-näsän har taymärt təzzar.

⁴ Afäl əkkän ässuk har t-dd-fälän, wär hasän-t-təlla tetäte ar s-ad-ässerädän telämäkt-näsän iket-net. Lan daḡ äḡadatän äjjootnen s-əlkamän säl wi-däḡ: ašəšdaj n-ikassän d-iḡsas d-iḡerän d-isəftay.

⁵ Əssəstänän käl-faris d-älḡulam n-Äṭṭāwrät Ȳisa, ənnän-as: «Mafäl inoṭṭulab wi-näk, wär-əlkemän i-agna wa hanäḡ-dd-oyyän imārawän-nänäḡ? Tattän wär-ässerädän ifassän-näsän.»

⁶ Inn'-asän Yısa: «Ämunafeyän! Tidət-däx a-wa fälla-wän innä ännäbi Saya,[†] a-s innä, inna Mässinäx:

<Tamətə-ta-hi, idlay-net xas

a-s hi-tässiimxär

ulh-net, ujəj-ahi;

⁷ semxar wa hi-jän äddinät, mälayäxna ed

a-wa saxren dägg-adəm fäll-i,

wär-ämoos xas ar färədan dd-äxtasän i-iman-näsän.>

⁸ Emmək-wen-däx a-s, käwäneḍ-däx, təšläyäm i-alämär wa n-Mässinäx, tətṭäfäm älyadät n-dägg-adəm.»

⁹ Inn'-asän daḡ: «Käwäneḍ, jərəm-in alämär wa n-Mässinäx, jəm agna-näwän däx-edägg-net.

¹⁰ Wädden, innä ännäbi Mosa:

<Səmxär ti-k d-ma-k>,

innä daḡ:

<Ere äbodärän ti-s meḡ ma-s, ämmätet.>

¹¹ Təssanäm s-a-wen-däx iket-net mäšan käwäneḍ-da-däx, iyyäd däx-wän, saxren äddinät a-s, äddoobät äwadəm ad-änn i-abba-net d-anna-net: <A-wa s-äsidarhän ad-käwän-ədhələx sār-s, jəx-t takute i-Mässinäx>,

¹² ija xur-wän a-s ere innän a-wen-däx i-imärawän-net, ad-äbas t-iwar älxəqq-näsän.

¹³ A-wa säxrem d-a-äjjeen dār-s äñifəqqän a-s hin-täsbəṭṭäläm a-wa inna Mässinäx, jəm a-wa hawän-inna agna-näwän däx-edägg-net.»

¹⁴ Iyrä-dd Yısa tamətə s-iman-net daḡ, inn'-as: «Səjdät-ahi iket-däx-näwän, təjrähäm a-wa hawän-janney:

¹⁵ Wār t-illa a itajjšän emm n-ägg-adəm äddooben asəmmädəs-net, a-wa dd-itəffälän ammas n-ulh-net ijänna s-emm-net a t-isamädəsän dat-Mässinäx.

[¹⁶ Ere däx-wän ilän timəzzujen s-islä-däx, isəjdet.]>

¹⁷ Ifäl Yısa tamətə xas, iqqäl ehän, əssəstänän-t inəṭṭulab-net dihen d-älməxna n-tangalt ta ija.

¹⁸ Inn'-asän: «Adiš käwäneḍ har ämära-däx, wär təjrehäm a-s əsink, esək? Ajän wär hənnəyäm a-s, wär t-illa a isuk äwadəm emm-net äddooben a t-isəmmädəs

¹⁹ fäl-a-s, a-wa dd-itəffälän ajäma, wär-itəkk ulh-net, täsa-net a itakk, izjār dərät-a-wen, əj'-e-hin däx-təkoyt.» Emmək-wen-däx a-s isaxlal Yısa imənsiwän iket-näsän.

²⁰ Inn'-asän daḡ: «A-wa dd-itəffälän ulh n-ägg-adəm, a t-isamädəsän dat-Mässinäx,

²¹ fäl-a-s ammas n-ulh n-ägg-adəm a dd-itəffal erk ənniyät wa n-abjənjən, iba n-täkrakidət, tikra, iji n-iman,

²² əzzəna, täkkärdädt, təlläbäst, amsud, asəmmädəs n-iman, erk derhan, asəkkufär, əkkəbru, taxxalen.

²³ Əntäneḍ-den-däx härätän wi samädəsən ägg-adəm, ed ammas n-ulh-net a dd-təffälän.»

*Elle-s n-taməjart ta əzozäy Yısa
(Mätti 15:21-28)*

[†] 7:6 7:6 A-wa ännäbi dd-əzzarän i-Yısa, äloläy däx-isälan-net əssayät timad n-awätay dat-tiwit-net.

²⁴ Ifäl Ƴisa dihen, ikkä teje ta n-Tir. Iwwäd-in Ƴas, ijjäš ehän iyyän, fäl-a-s wär irha ad-fälla-s əlmədän äddinät mäšan, hakd-a-wen-däx, wär-işter ass-net.

²⁵ Şik-däx a-s t-təslä tamädt tiyyät s-ih' alşin elle-s, tək-k'e-hi-dd, tärkäx data-s.

²⁶ Tamädt-en, wär tät-len käl-Älyähud, ti n-teje ta n-Finisyä hät äkall wa n-Surya. Tos'-e-hi-dd Ƴas, təttär däx-s ad-ikkəs alşin däx-elle-s mäšan,

²⁷ inn'-as Ƴisa: «Äyy aratan ad-äyyawänän təzzar ed, wär-änhājja ad-dd-ikkəs äwadəm amənsi daw-sän, ijär-t-in i-iyyədan.»

²⁸ Täwwežäb-as tamädt, tənn'-as: «Älɣalim, tidət mäšan a-wen wär hin-ikkəs a-s iyyədan, äddooben ad-tattän a-wa dd-sitrəkkin aratan.»

²⁹ Inn'-as Ƴisa: «Əgləw, däx-təssəba n-a-wa-däx tənne, a fäl, elle-m, izjār-tät alşin.»

³⁰ Täqqäl ehän-net, togəz-in elle-s, tənsa fäll-teşejit, izjar-tät alşin.

Äzozäy Ƴisa ähaləs mäzzəjän s-ikras iləs-net (Mätti 15:29-31)

³¹ Ifäl Ƴisa teje ta n-Tir, ikka ta n-Säyda, ihäl ebre n-əjänş wa n-Galila däx-a-s ijlay teje ta n-märəw iɣərman.

³² Əwwäyän-dd sär-s äddinät ähaləs mäzzəjän s-ikras iləs-net ad-däx-s tattärän ad-fälla-s isäns ifassän-net.

³³ Irmäs-t-dd Ƴisa s-edes təzzar, ij' assəkäd-net däx-timəzzujen-net, ijä daɣ s-assəkäd-net emätäm-net fäll-iləs n-ähaləs,

³⁴ äjozäy işənnawän, ähnäffät təzzar, inn'-as: «*Efata*», a-wen älmäɣna-net: «Marr.»

³⁵ Ämeränät timəzzujen-net hakd iləs-net, ad-itamäjräd.

³⁶ Äsmätär Ƴisa äddinät iket-näsän d-ad-wär jen isälan n-a-wen-däx i-äwadəm wäl' iyyän mäšan, a ikk' isamätar-tän, sawadän əntäneɗ däx-tənna n-a-wa ijän.

³⁷ Ämoos Ƴisa i-äddinät täkunt-i-däx mäqqärät, əqqälän-dd Ƴas jannen: «A-wa, a-wa itäj iket-net ifran, isasla imzaj, isamäjräd daɣ wi s-əkräsän ilsawän-näsän.»

8

Äsyawän Ƴisa əkkəz afdän n-ähaləs (Mätti 15:32-39)

¹ Toläs-dd tamətte daɣ azəmmäx fäll-Ƴisa däx-işilan-win-däx. Inhäy a-s wär t-illa a təttaf təkşä Ƴas, iɣrə-dd inəttulab-net, inn'-asän:

² «Naqq'-ahi tähanint n-tamətte-i-däx; a ilan kərəɗ işilan, təkam-ahi, äbas əttafän a əkşän;

³ afäl tän-əssəgläx s-ihänan-näsän, älluzän s-əmmək-wa-däx, ad-hasän-indär ad-tän-in-awəɗän fäl iba n-əşşahät ed, han-tän-i dd-falnen ijəj.»

⁴ Ənnän-as inəttulab-net: «Mi äddooben däx-tenere-ta-däx ad-işäkş tamətte jat əjut-wa-däx?»

⁵ İssəstän-tän Ƴisa, inn'-asän: «Maniket tijəlwen təttafäm?» Ənnän-as: «Əssayät.»

⁶ Äşxäyma Ƴisa tamətte iket-net, idkäl tijəlwen ti n-əssayät, ämmoy i-Mässinäx, äfräsfäräs-tänät təzzar, ikf'-enät i-inəttulab i-ad-tänät-uzanän jer-äddinät; äzunän-tänät.

⁷ Əkfän-t a-wa län däx-imänan, idkäl-t, ämmoy i-Mässinäx təzzar, ikf'-en i-inəttulab-net i-ad-tän-uzanän jer-äddinät.

⁸ Təkša tamette ta t-təllät dihen-däx hundäx har təyyəwän. Äsdäwän-dd inəttulab a-wa dd-əjläšan äddinät, osän-t, idnay əssa deketän.

⁹ A iwwädän əkkoḻ afdän n-əhaləs a ikšan ašäl-wen-däx. Təkša tamette ḡas, issəgl'-et Ḳisa; təglä.

¹⁰ Ijjäš ənta d-inəttulab-net turäft n-aman ässaḡät-wen-däx, əkkän tidbi ti hänen teje ta n-Dälmänuta.

Irrum wa jän käl-faris i-Ḳisa
(Mätti 16:1-4; Luqa 12:54-56)

¹¹ Osän-dd härät däx-käl-farisḲisa, ämḡännänän dār-s, tiirəmən-t, jannen-as: «Äj data-näx iji n-Mässinäx hanäx-issətbätän a-s tidət-däx a-s Mässinäx a käy-dd-äšmašälän.»

¹² Ähnäffät däx-iman-net, innä: «Mafäl tammäx əzzurəyät-ta-däx i-iji n-Mässinäx? Äsidätteḡ-awän a-s wär-ilkem ad-ija iji n-Mässinäx wäl' iyyän data-wän.»

¹³ Ifäl-tän ḡarät-a-wen, oläs ujəš n-turäft n-aman, ijläy ejänš s-efäyy wa iyyädän.

Äsmäqqa Ḳisa fäll-təmmətkit n-immun n-inəttulab
(Mätti 16:5-12)

¹⁴ Däx-tekle-ten-däx, əttəwän-in inəttulab ad-awəyän äzzad, wär-əwweyän däx-turäft n-aman ar tiyyät tajəlla.

¹⁵ Äsmätär-tän Ḳisa, inn'-asän: «He käwəneḡ! Agəḡät iman-näwän däx-täzza ta n-käl-faris d-Harudəs.»

¹⁶ Əslän inəttulab i-a-wen ḡas, ad-tinmənnin jer-iman-näsän: «A-wa, a-wa-däx s-wär nəwwey tijəlwen a fäl hanäx-itajj mäjräd-wa-däx.»

¹⁷ Ilmäḡ Ḳisa ḡur-iman-net a-wa tinmənnin, inn'-asän: «Mafäl əkkan inəzjam-näwän a-wa s-wär täwweyäm tijəlwen? Ajän ulhawän-näwän jan täḡart-ta-däx fäl äbas hannäyäm, äbas jarrähäm?»

¹⁸ Ma jänät tiṡṡawen-näwän tənḡəyäm sār-snät, ma jänät timəzzujen-näwän, təsləm sār-snät?

¹⁹ Ajän təttəwäm-in tijəlwen ti n-səmmosät äzunäx i-səmmos afdän n-əhaləs, maniket deketän dd-täsdäwäm däx-a-wa dd-təjläš tamette?» Ənnän-as: «Märəw d-əssin.»

²⁰ Inn'-asän: «Älwäqḡ wa d-äzunäx əssayät tijəlwen i-əkkoḻ afdän n-əwadəm, maniket deketän əḡnaynen dd-təjläš tamette?» Ənnän-as: «Əssa.»

²¹ Inn'-asän: «Adiš, har ämära-däx, wär t-illa a təjrahäm?»

Äzozäy Ḳisa emədderḡəl iyyän däx-Bätsäyda

²² Iwwäd-in Ḳisa d-inəttulab-net taḡrəmt ta n-Bätsäyda ḡas, ittəlwäy-dd sār-s emədderḡəl iyyän, əttärän däx-s ad-t-idəs, izzəy.

²³ Irmäs-t Ḳisa s-äfuss, ilwäy-t hundäx har dār-s izjār tadəbayt təzzar, äswär tisutaf-net tiṡṡawen n-emədderḡəl, äswär-t ḡarät-a-wen ifassän-net, inn'-as: «Ak, hannäyäd härät meḡ?»

²⁴ Äsfänäwnäw emədderḡəl, innä: «Hannäyäx äddinät mäšan, olähän-ahi d-ihəškan ärjašnen.»

²⁵ Oläs Ḳisa asəwär n-ifassän-net tiṡṡawen-net ḡas, äsnäfläy ahänay, izzäy, oḡäd ahänay-net i-härät iket-net.

²⁶ Issəgl'-e Ḳisa, inn'-as: «Wär resäd wälä tadəbayt, aḡəd iman-näk ḡas s-ehän-näk.»

Tajuhe ta ija Bətrus dəx-isälan n-ÿisa
(Mätti 16:13-20; Luqa 9:18-21)

²⁷ Izjār ÿisa ɖarät-a-wen ənta d-inəttulab-net, ikka dār-sän tidbi-ti hānen attayän n-aɣrəm wa s-itawänna Qäyşara wa n-Fəlibb. Eɣlan härwa a-s tən-issəstän ÿisa, inn'-asän: «Ma jannen äddinät dəx-isälan-in? Ma jannen mi ämoosäx?»

²⁸ Äwwežäbän-as, ənnän-as: «Iyyäd jannen: käyy a-s Exya wa n-Enəsselmäx; iyyäd jannen: käyy a-s ännäbi ʃəli; iyyäd fāw a jannen: käyy iyyän dəx-ännäbitän dd-olasän uɣəl.»

²⁹ Issəstän-tän daɣ, inn'-asän: «Käwänəɖ-ş, ma tənnäm, mi ämoosäx?» Äwwežäb-as Bətrus, inn'-as: «Käyy a-s Älmasex.»

³⁰ Äsmähäɖ dəx-sän ÿisa ɖarät-a-wen, d-ad-wär jen isälan-win-däx i-äwadəm wäl' iyyän.

Äloläy ÿisa dəx-isälan n-tamättant-net
(Mätti 16:21-23; Luqa 9:22)

³¹ ʃur-dihen-däx ad-issəntä ÿisa asəɣär n-inəttulab-net n-a-s Ägg-ägg-adəm, ilzam-t ad-inhəy tersəmmawen äjjootnen, ənkārən-t inušämän wi n-Işrayil d-imänokalän n-käl-tikutawen d-älɣulam n-Ättäwrät; ad-əjən iman-net mäšan, kərəɖ išilan ɖarät tamättant-net, ad-dd-aləs tanäkra jer-inəmmuttan.

³² Ij'-asän ÿisa mäjräd-wen-däx s-əmmək ilan ujreh; ikkäs-t-dd Bətrus s-takşe, äkläwlāw fälla-s.

³³ Innäɖ-dd ÿisa s-inəttulab-net, ixtäl Bətrus, inn'-as: «Şənkəş fäll-i, Iblis-wa! Käyy, inəzjam-näk, i n-dägg-adəm, wädden i n-Mässinäx.»

Alkum i-ÿisa Älmasex
(Mätti 16:24-28; Luqa 9:23-27)

³⁴ Iyrä-dd ÿisa ɖarät-a-wen tamətte d-inəttulab-net s-iman-net, inn'-asän: «Ere irhän alkum-hahi-däx, adiş, iksənet iman-net, äjet fäll-tamättant şund ta n-tajəttewt təzzar, ilkəmet-ahi.

³⁵ Ere wa wārən itəttär ar əmmək s-ogäz iman-net, dəx-äddunya-ta-däx, ad-ifut dəx-älžännät; mäšan, wa irdän äfota dəx-iman-net, dəx-äddunya-ta-däx, dəx-äddimmät-in, d-äddimmät n-Älənžil, ad-iɣləs.

³⁶ Ma s-infa ägg-adəm ad-irbäx äddunya iket-däx-net, a-s ija a-wen, äfota dəx-älaxärät?

³⁷ Ajän ma t-illan s-äddoobät äwadəm ad-t-äkf i-ad-sär-s iɣləs iman-net dəx-temse?

³⁸ Ere hi-äkrakəɖän, näkk d-mäjräd-in, dat-əzzurəyät-ta-däx n-temäznit tənmäşräyät i-Mässinäx, ad-t-əkrukəɖäx näkk-däx-i n-Ägg-ägg-adəm, aşäl wa d-mad-dd-iqqəl dəx-älxurmät n-Abba-nin, äddew d-änjəlosän wi n-iməşseddəjän.»

9

Tihusay n-älxurmät n-ÿisa Älmasex

¹ Inn'-asän ÿisa ɖarät-a-wen: «Äsidättey-awän a-s han-käwän äddinät əbdadnen diha-däx wär-e iba wär-ənheyän Təmmənəya n-Mässinäx tosa-dd s-äşşahät.»

(Mätti 17:1-13; Luqa 9:28-36)

² Sədis işilan dərət a-s inna a-wen-dəx, iyrä-dd Yisa Bətrus d-Yaqub d-Exya s-edes, ikka dər-sən tadəxt tiyyät tədkalät təzzar, ijjäš dihen ini äynayän data-sän;

³ ämläwläwän-dd imälsan-net, jän-dd təmölle s-käla wär-tätwänhäy fäll-ärori n-äkall.

⁴ Änfäläl-asän-dd dihen ännäbi Yəli d-ännäbi Mosa dd-falnen işənnawän, ad-tamäjrädän d-Yisa.

⁵ İggäd-dd Bətrus, innä i-Yisa: «Älxalim, ufa ad-nəzzäx xas diha-dəx, ad-nəkrəs kərəđ ihəktan: wa-näk, wa n-Mosa d-wa n-Yəli.»

⁶ Wär-issen a ijänna a-wa-dəx has-ja tarəmmeyt ənta d-imidiwän-net.

⁷ Təls'-en-dd tele n-tejärkekt tiyyät älwäqq-wen-dəx, ifäl-dd emäšli işənnawän, innän:

«A-wa Rure-x wa əkneeç tərha, säjdät-as!»

⁸ A-s dd-oläsän inəttulab ađkul n-asəwəđ-näsän, şanəşlamän siha d-siha, wär t-illa ere hannäyän edes-hasän kunta wädden Yisa xas.

⁹ Älwäqq wa dd-titrurun tadəxt, äsmähäd dəx-sän Yisa i-ad-wär jen isälan n-a-wa ənhäyän i-əwadəm wäl' iyyän hundəx har aşäl wa dd-mad-inkär Ägg-əgg-adəm jer-inəmmuttan.

¹⁰ Äsjädän i-a-wa hasän-inna, ad-tinməsəstinän d-älməxna n-tanəkra jer-inəmmuttan ed, iqqan a-wen ixfawän-näsän.

¹¹ Əssəstän-t, ənnän-as: «Mafäl jannen älxulam n-Ättäwrät a-s ännäbi Yəli a ilan s-a dd-ass təzzar, işrəy-t-dd Älmasex?»

¹² Inn'-asän: «Tidət, ännäbi Yəli a ilan s-a dd-ass isəssiçəd härät iket-net; məşan, mafäl iktab a-s Ägg-əgg-adəm, ilzam-t ad-inhəy tersəmmawen äjjootnen, səffätçən dəx-s dəgg-adəm?»

¹³ Ässiilmädəx-kəwän a-s ännäbi Yəli, äru dd-osa, məşan äkkuddälän-t dəgg-adəm, jän-as a-wa s-ärhän ed, a-wen-dəx a ənnän əlkəttabän dəx-isälan-net.»

*Äzozäy Yisa alyəđ n-amälşon
(Mätti 17:14-21; Luqa 9:37-43)*

¹⁴ Älwäqq wa dd-iqqäl Yisa d-inəttulab-net wi n-kərəđ, ogəzän-dd inəttulab-wi iyyäđnen, ämmiizəxän d-älxulam n-Ättäwrät, təxlay-tän tamətte.

¹⁵ Tojja tamətte Yisa xas, tof'-et təkunt, toşäl sər-s, ad-has-tajjän isofan.

¹⁶ Inn'-asän: «Ma tämmizəçäm?»

¹⁷ Inn'-as əhaləs iyyän dəx-tamətte: «Älxalim, əlwäyəç-dd sər-k rure-x ih' alşin ikrasän iləs-net;

¹⁸ edəgg dəx-t irmäs-dəx, ad-t-äjjäđlät s-äkall, ad-isakəffaw, iziməkärkiç isənän, isaçəqqad; əttärəç dəx-inəttulab-näk ad-dəx-s t-əkkəsän məşan, indär-asän.»

¹⁹ Äwwežəb-asän, inn'-asän: «Ya əzzurəyät-i-dəx wärät tomen, hundəx har əmme əlleç jere-wän, əşbarəç-kəwän? Awəyät-ahi-dd alyəđ.» Äwwäyän-as t-dd.

²⁰ Diha-dəx d-inhäy alşin Yisa, ad-ijjəđlät alyəđ s-äkall, ad-itişbərđil, isakəffaw.

²¹ İssəstän Yisa ti-s, inn'-as: «Emme tirmäs a-wa?» Inn'-as əhaləs: «Härwa mədrəy,

²² dehiyyän fəw, itəjjar-t alşin dəx-efew meç dəx-aman i-ad-ämmät. Yas, kunta täddoobed härät dəx-a-wa-dəx, ađən-anəç təhanint, agəç-anəç.»

²³ Inn'-as Ƴisa: «Tənned: <kunta täddoobed!> Əlməd a-s wär t-illa a-s wädden räqqiis i-amumən.»

²⁴ İdkäl ti-s n-alyađ eməsli-net älwäqq-wen-däx, innä: «Omanäx, agəz-ahi däx-iba n-immun.»

²⁵ İnhäy Ƴisa tamətə toşal-dd sār-s xas, əsmähəđ däx-alşin, inn'-as: «Alşin wa ikrəsän iləs n-alyađ-i-däx, əziməzzəj-t; omarəx-käy s-ad-t-təzjəräd, wär-iläkkämet ad-t-dd-täqqaläd.»

²⁶ Äxwättät alşin, ibbəkək alyad s-əşşahät təzzar, izjār-t; äktäyyät alyad har əyelän äddinät äba-t

²⁷ məşan, irmäs-t-dd Ƴisa s-əfuss, issənkär-t-dd, ibdäd fäll-iman-net.

²⁸ Əqqälän ehän xas, əssəstänän inəttulab Ƴisa s-edes, ənnän-as: «Alşin-wənnin-hi, mafäl hanəx-indär ad-t-nəkkəs däx-alyađ?»

²⁹ Inn'-asän: «Alşin şund-wa, wär t-ill' əmmək s-izjār ar s-tamədilt n-Mässinəx.»

*Əsihe wa s-əssin d-itajj Ƴisa isälän n-taməttant-net d-tanəkra-net
(Mätti 17:22-23; Luqa 9:43-45)*

³⁰ Fälän dihen xas, ällilän teje ta n-Galila məşan, wär-irha Ƴisa ad-sār-s ilməd əwadəm

³¹ ed isayra inəttulab-net, ijann'-asän: «Əgg-əgg-adəm, ad-ättärmäs, ijjeş ifassän n-dəgg-adəm, əjən iman-net məşan, kərəđ išilan ɗarät taməttant-net, ad-dd-inkär jer-inəmmuttan.»

³² Wär-əjrehän məjrad-wen-däx, h'-en dax tasəja n-ad t-səstənän d-əlməxna-net.

Tərha n-mijraw

(Mätti 18:1-5; Luqa 9:46-48)

³³ Əwwəđän-in Qəfərnaxum, əjjäşän ehän wa əkkän xas, issəstän Ƴisa inəttulab-net, inn'-asän: «Ma təmmizəxəm däx-tabarät?»

³⁴ Wär t-illa a has-ənnan. İj'-asän asəstan-wen-däx, fäl-a-s, däx-tekle-nəsän, əmmiizəxän jer-iman-nəsän i-ad-əlmədän əndek däx-sän wa ojərän.

³⁵ Äqqima Ƴisa xas, iyrä-dd inəttulab-net wi n-məraw d-əssin s-iman-net, inn'-asän: «Wa däx-wän irhän təzert, iməlet daw-imidiwän-net, umaset-asän akli.»

³⁶ İrmäs ɗarät-a-wen ara iyyän, ij'-e jere-sän təzzar, idkäl-t däx-ifassän-net, inn'-asän:

³⁷ «Ere əsbälälän ara şund wa-däx, däx-təssəba-nin, nəkk a əsbäläl; ere wa hi-əsbälälän, wädden nəkk a əsbäläl, Wa hi-dd-əşməşälän a əsbäläl.»

(Mätti 10:42; Luqa 9:49-50)

³⁸ Inn'-as ənəttalib wa s-isəm-net Exya: «Əlxalim, nənhay əhaləs itakkəsän alşinän däx-əddinät s-tərna n-isəm-nək, nənn'-as, wär-itiləset, ed wär dər-nəx əddew.»

³⁹ Inn'-asän Ƴisa: «Wär has-t-təgdələm, fäl-a-s, wär t-illa ere madän-əj iji n-Mässinəx s-tərna n-isəm-in aləs dax, a əndərrän ɗarät-a-wen, tiżmit-in.

⁴⁰ Ere wərän hanəx-iknes, a-di, amidi-nənəx.

⁴¹ Ere kəwän-issəswän kara n-aman, däx-təssəba n-a-wa s-Əlmasex a kəwän-ilän, əsidətəx-awän a-s ilkam, ad-ijrəw, əlhək n-emarked wa ija.»

Wär tumasät əssəbab n-tanməşrayt i-əwadəm

(Mätti 18:6-9; Luqa 17:1-2)

⁴² «Aratän wi sār-i omännən, ere əmoosän əssəbab n-tanməşrayt i-wəla iyyän däx-sän-däx, əwadəm-en, išşam-as-in, ad-tətwäqqən təhunt

ta mäqqärät s-itəzzad älkäma dəx-err-net, itwəjar-in dəx-ider n-əjärew wa səmmän härwa wär-ofa abäkkad-wen-dəx.

⁴³ Käyy, kunta äfuss-näk a äbokän ad-hak-ässäbäb s-abäkkad, itidärrut-käy, ənkäd-t-in härwa wär tämešäläd abäkkad-wen-dəx ed uf'-ak, ad-jeed äfuss, təjjəšäd älzännät, uhən, ad-leed əssin ifassän, tətwejaräd-in dəx-efew wa n-žohännäma wärän itəməkit [

⁴⁴ d-tiwəkkawen ti wären təməttit s-härkuk əfradnät dəx-tiḡəswen n-äddinät].

⁴⁵ Kunta dəx aḡär-näk a äbokän ad-käy-isidəw dəx-abäkkad, itidärrut-käy, ənkäd-t-in härwa wär tämešäläd abäkkad-wen-dəx, ed uf'-ak, ad-təjjəšäd älzännät, jeed aḡär, uhən ad-leed əssin idarän, tətwejaräd-in dəx-efew wa n-žohännäma-i hänät [

⁴⁶ tiwəkkawen ti wären təməttit s-härkuk əfradnät dəx-tiḡəswen n-äddinät].

⁴⁷ Kunta dəx tiṭṭ-näk a äbokän ad-käy-sidəw dəx-abäkkad, tiḡärrut-käy, kukkərət-tät-dd härwa wär tämešäläd abäkkad-wen-dəx, ed uf'-ak, ad-təjjəšäd Təmmənəya n-Mässinäx jeed tiṭṭ, uhən ad-leed sänatät tiṭṭawen, tətwejaräd-in dəx-efew wa n-žohännäma.

⁴⁸ Dihen, tiwəkkawen ti əfradnen dəx-tiḡəswen n-äddinät, əddarnät härkuk.

Tangalt ta n-tesəmt

(Mätti 5:13; Luqa 14:34-35)

⁴⁹ Ere ämešälän abäkkad, ad-ijjəš efew s-əmmək-wa-dəx s-tajjəš tesəmt imənsiwän i-ad-tän-təjjəš temḡe.

⁵⁰ Tesəmt, härät olaḡän mäšan, afäl tät-təjmäḡ temḡe, ma tät-e-isəsməmän? Tumaset tämudre-näwän a ha tesəmt, tənhirəjam dəx-älyafyät.»

10

Aməzzi d-iba-net

(Mätti 19:1-12; Luqa 16:18)

¹ Ifäl Ƴisa dihen, ikkä teje ta n-Älyähudəyät d-illa-hin i-əjäns wa n-Ƴurdəni, təlkaḡ-as-dd tamətte təjjeet, ad-isayra dəx äddinät, s-əmmək wa s-izzay ad-t-aj.

² Osän-t-dd härät dəx-käl-faris, orämän-t s-asəstan iyyän i-ad-änn a wärän itətweñn, ənnän-as: «Dəx-a-wa innä alämär-nänäx, ak ajän xälal i-ähaləs ad-izəmməzzəy hənne-s?»

³ Inn'-asän Ƴisa: «Ma dār-kāwän-äsmätär ännäbi Mosa.»

⁴ Ənnän-as: «Ännäbi Mosa, ijraw i-ähaləs ad-äkf təkarḡe n-aməzzi i-hənne-s təzzar, izəmməzzəy-tät.»

⁵ Inn'-asän Ƴisa: «Alämär wa hawän-iktäb ännäbi Mosa, iktäb-awän-t dəx-təssəba n-təḡart-i jän ulhawän-näwän,

⁶ ənnär wädden a-wen:

<S-tizarät a-s dd-ixläk Ämaxlak äddunya, ähaləs d-tamäḡt a dd-ixläk,

⁷ təssəba n-a-wen-dəx a fäl mad-ifəl ähaləs ti-s d-ma-s, irtəy d-hənne-s,

⁸ umasän fäll-əssin-essän tiyyät taḡəssa,

ad-äbas ämoosän əssin äddinät, ämoosän tiyyät taḡəssa.>

⁹ Ƴas, a-wa osäḡ Mässinäx, wär t-ibəḡḡəwet ägg-adəm.»

¹⁰ Iqqäl-dd Ƴisa ehän Ƴas, əssətänän-t inəttulab-net d-älmäƳna n-a-wa innä.

¹¹ Inn'-asän: «Ere hin-əzmäzzäyän hänne-s, oläs adubən n-iyyät, izna,

¹² tamədt day təbdät d-əhaləs-net, toläs adubən n-iyyän, təlmədet a-s, təzna ənta-däƳ.»

Ija Ƴisa əlbäraka dəƳ-aratän
(Mätti 19:13-15; Luqa 18:15-17)

¹³ Əlwäyän-dd äddinät aratän s-Ƴisa i-ad-däƳ-sän əj əlbäraka, məšan, äkläwläwän inəttulab-net fäll-imalwayän-näsän.

¹⁴ Inhäy Ƴisa a-wa tən-işlän Ƴas, əkmän-t iman-net, inn'-asän: «Äyyät aratän ad-hi-dd-əkkən, wär tən-in-täwweƳäm fäll-i fäl-a-s, Təmmənəya n-MässinäƳ, äddinät wi dār-sän ənifäqqänen a-s tāt-ihakk.

¹⁵ ÄsidätteƳ-awän a-s ere wärän iqbel Təmmənəya n-MässinäƳ s-əmmək wa s-tāt-mad-iqbəl ara, wär tāt-mad-ijjəş.»

¹⁶ Äşyäyma dərät-a-wen aratän fäll-ifaddän-net, əswär-tän ifassän-net, ijä dəƳ-sän əlbäraka.

Äddunya meƳ əlaxärät?
(Mätti 19:16-22; Luqa 18:18-23)

¹⁷ Əlwäqq wa d-əbok Ƴisa ad-ifəl edägg-en, oşäl-dd sār-s əhaləs iyyän, irkäƳ data-s, inn'-as: «ƏlƳalim wa oläƳän, ma s-əleƳ s-ad-t-əjəƳ i-ad-əkkusäƳ təmudre ta təxlälät?»

¹⁸ Inn'-as Ƴisa: «Mafäl hi-janned wa oläƳän? Wär t-illa ere oläƳän säl MässinäƳ,

¹⁹ wädden, təssanäd alämärän-net: Wär jed iman, wär jed əzzəna, wär tokeräd, wär təjjəyhäd s-bahu, wär tədlemäd əwadəm, səmƳär ti-k d-ma-k.»

²⁰ Inn'-as əhaləs: «ƏlƳalim, hārätän-win-däƳ, əƳdaläƳ-asän hārwa ämoosäƳ ara.»

²¹ Ikn'-e Ƴisa azəjjəzz, ijrüz-as, inn'-as: «Hārät iyyän a hak-in-äba: əgləw, tużžär-in a-wa leed, təkfəd-t i-tiläqqiwen i-ad-təkrəşäd ärrəzäƳ dəƳ-älžännät; dihen, əqqəl-dd, əlkəm-ahi.»

²² Isl' əhaləs i-mäjräd-wen-däƳ Ƴas, innäd, ənxasän iman-net, ed il' ehäre n-tikunen.

Ärrəzäy wa n-tidət
(Mätti 19:23-30; Luqa 18:24-30)

²³ IssäƳläy-dd Ƴisa tamətte akäyad-net, innä i-inəttulab-net: «Ażwi ija i-wi ärzäyənən ujš n-Təmmənəya n-MässinäƳ.»

²⁴ Inhäy a-s iqqan a-wen iƳäfawän n-inəttulab-net Ƴas, inn'-asän day: «Ilyadän-in, ażwi ija ujš n-Təmmənəya n-MässinäƳ!

²⁵ Ojār täräƳse ta ija ad-ijjəş amnəs s-tişt n-ənazmay uhən, ad-ijjəş ere irzaƳän Təmmənəya n-MässinäƳ.»

²⁶ Iknä mäjräd-wen-däƳ uƳən n-iƳäfawän-näsän, ad-tinmənnin: «Adiš mi madän-iyləs?»

²⁷ Issəjräh-tän Ƴisa, inn'-asän: «A-wen, dəgg-adəm wär t-əsmäkkänän məšan MässinäƳ ənta, ädoobät-t ed, wär t-illa a has-indarän.»

²⁸ Inn'-as Bətrus dərät-a-wen: «ƏlƳalim, nəkkänəd, wädden noyyä a-wa nəla iket-net, nəlkəm-ak.»

²⁹ Inn'-asän Yisa: «Äsidätteḡ-awän, a-s, wär t-illa ere madän-ifəl ehän-net d-ayətma-s d-šätma-s d-ma-s d-ti-s d-aratän-net d-ihärawän-net dāḡ-äddimmät-in, d-äddimmät n-Älönzil

³⁰ s-wädden ad-ijrəw dāḡ-äzzäman-wa-dāḡ s-temeḡe n-anəḡfus ihänan, ayətma, šätma, matte, aratän d-ihärawän äddewnen d-älḡizabät, ijrəw dāḡ tämudre täḡlalät dāḡ-tilkamät.

³¹ A äjjeen dāḡ-wi äzzarnen ašäl-i-dāḡ, ad-ijjəš ajilal, a äjjeen dāḡ-wi hänen ajilal ašäl-i-dāḡ, ad-izar.»

*Äsihe wa s-käraḡ d-itajj Yisa isälan n-tamättant-net d-tanäkra-net
(Mätti 20:17-19; Luqa 18:31-34)*

³² Ijjäš Yisa darät-a-wen eḡäf n-tamətte, irmäs tamdujt ta n-Yärußälam, äššiwwäšän inəṡṡulab-net, wär ozja ənniyät n-wi has-əlkommen. Ikkä-s-dd inəṡṡulab wi n-märaw d-əssin s-takše, ad-hasän-itajj isälan n-a-wa t-madän-irməs,

³³ inn'-asän: «Ənhəywät, näkkäneḡ-da-hi əkkänen Yärußälam-i-dāḡ mad-ättärmäs Ägg-ägg-adəm, ijjəš ifassän n-imänokalän n-käl-tikutawen d-älḡulam n-Äṡṡawrät, ad-t-siḡəwän dāḡ-äššäreḡa-näsän, äḡtəsän-as tamättant təzzar, əjən-t jer-ifassän n-inəzzulam,†

³⁴ i-ad-t-əjən tekäškäšt, sutəfən fälla-s, əjən dāḡ-s tiwit, əjən iman-net mäšan, ašäl wa s-käraḡ darät tamättant-net, ad-dd-inkär jer-inəmmuttan.»

*A-wa əttärän dāgg-Zäbdi dāḡ-Yisa
(Mätti 20:20-28)*

³⁵ Ohäzän-dd dāgg-Zäbdi, Yaquub d-Exya Yisa, ənnän-as: «Äḡalim, nārha ad-hanāḡ-təjəd a-wa dāḡ-k mad-nəttär.»

³⁶ Inn'-asän: «Ma s-tärham ad-hawän-t-äjäḡ?»

³⁷ Ənnän-as: «Äkf'-anāḡ ad-äqqayəm iyyän dāḡ-nāḡ daw-aḡil-näk, äqqayəm wa iyyäḡän daw-täšälje-näk i-ad-numas wi sār-k oräknen dāḡ-älxikmät, afäl dd-täqqäläd dāḡ-älxurmät-näk.»

³⁸ Inn'-asän Yisa: «Käwäneḡ, wär təssenäm a dār-sästanäm. Ajän näkk, kara n-tisnant wa mad-äswäḡ, täddobem tesäse-net, meḡ dāḡ, ajän täddoobem härät i-tamättant ta mad-äjäḡ?»

³⁹ Ənnän-as: «Näddoobät-t.» Inn'-asän Yisa: «Tidət lab a-s ad-təswəm kara n-tisnant wa mad-äswäḡ, təjəm tamättant ta mad-äjäḡ

⁴⁰ mäšan, dāḡ-isälan n-taḡimit daw-aḡil-in d-täšälje-nin, wädden näkk a ihakkän a-wen; Mässinäḡ a t-ihakkän i-wi s-t-itwär.»

*Mijraw wa n-tidət
(Mätti 20:24-28; Luqa 22:24-27)*

⁴¹ Əslän inəṡṡulab wi n-märaw i-a-wen ḡas, ijjäš-tän älhäm fäll-Yaquub d-Exya.

⁴² Iyr'-en-dd Yisa iket-näsän s-iman-net, inn'-asän: «Təssanäm a-s imänokalän n-tiwsaten, äxkamän fälla-snät s-äššahät; käl-əlxeḡum dāḡ, wär lämməḡän fäll-käl-äkall

⁴³ mäšan, käwäneḡ, wär jem a-wen; wa dāḡ-wän irhän mijraw, umaset akli n-imidiwän-net təzzar,

⁴⁴ ere dāḡ-wän irhän dāḡ täzert i-imidiwän-net, umaset akli-näsän təzzar.

† 10:33 10:33 – ḡur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änäzzalim a ämoos. A-wen-dāḡ a fäl tiwsaten ti iyyäḡnen iket-näsnät, ti n-inəzzulam. — Ašäl-i-dāḡ, änäzzalim, äkafär (ere wärän issen s-Mässinäḡ).

⁴⁵ Ägg-ägg-adəm, wär dd-ämešäl i-ad-has-äxdəmän äddinät, änn-ak, ämešäl-dd i-ad-ixdəm ənta iman-net, äkf tämudre-net i-ad-isəddärfət äddinät äjjootnen.»

Emədderyəl wa äzozäy Yisa
(*Mätti 20:29-34; Luqa 18:35-43*)

⁴⁶ Eglan har hin-əwwäḍän taḡrəmt ta n-Žärriko. Älwäqq wa dd-izajjār Yisa d-inəṭṭulab-net taḡrəmt-ten-däḡ, təlka-m-asän tamətte täjjeet. Zäbo wa dd-jän, äqqiima emədderyəl s-isəm-net Bärtima ägg Tima däḡ-asälim-net, itattär takute däḡ-äddinät.

⁴⁷ Islä a-s Yisa wa n-Näširät a okayän ḡas, äsḡärät, innä: «Ya Yisa wa n-Ägg Dawəd, aḍən-ahi tähanint!»

⁴⁸ Äḡtälän-t äddinät i-ad-hin-isusəm mäšan, äsḡärät s-afälla: «Ya Ägg-Dawəd, aḍən-ahi tähanint.»

⁴⁹ Ibdäd Yisa, innä: «Elwəyät-ahi-t-dd.» Elwayän-as-t-dd, jannen-as: «Ehəl iman-näk, iḡarr'-ik.»

⁵⁰ Ijār-in emədderyəl abärnuš-net dihen, iggäd s-iyyəät, ikka Yisa.

⁵¹ Os'-e-hi-dd ḡas, inn'-as Yisa: «Ma s-tärhed ad-hak-äjäḡ?» Inn'-as emədderyəl: «Älḡalim, aləsäḡet ahänay.»

⁵² Inn'-as Yisa: «Egləw, äzozäy-käy immun-näk.» Oläs Bärtima ahänay älwäqq-wen-däḡ, ilkäm i-Yisa.

11

Ujəš n-Yisa i-aḡrəm wa n-Yärussälam
(*Mätti 21:1-11; Luqa 19:28-40; Exya 12:12-19*)

¹ Ohäz-in Yisa d-inəṭṭulab-net Yärussälam, ih' ämära taḡrəmt ta n-Bätfaži, edes i-taḍaḡt ta täsijätät ihəškan wi n-əzzäytun. Yur-dihen-däḡ, ad-äšmašäl əssin däḡ-inəṭṭulab-net,

² inn'-asän: «Äkkät tadäbayt ta n-data-wän, däḡ-ujəš-näwän-has, ad-təjrəwäm äza ojayän s-käla wär t-iney äwadəm, arät-t-dd, təlwəyäm-t-dd.

³ Ere hawän-innän, mafäl t-tirəm, ännät-as: «Älḡalim a däḡ-s ilan əššäḡəl, ässimda dār-s ḡas, nässoḡäl-awän-t-dd.» »

⁴ Eglän inəṭṭulab wi n-əssin, əjrəwän äza ojayän däḡ-täšarrit dat-emm n-ehän iyyän, orän-t-dd.

⁵ Ənnän-asän äddinät t-əllanen dihen: «Mafäl tirəm äza?»

⁶ Ässoḡälän-asän a-wa hasän-inna Yisa, oyyän-tän, orän-t, əglän dār-s.

⁷ Elwəyän-dd äza i-Yisa, əstäjän-as isəlsa-näsän, inäy-t.

⁸ Ad-fattäḡ təššəm n-äddinät isəlsa-näsän fäll-tabarät, ḡattäsän-dd wi iyyäḍnen iləḍleḍän däḡ-ihəškan, fattäḡän-tän fäll-tabarät,

⁹ äsiḡären wi has-äzzarnen hakd wi has-əlkamnen, jannen:

«Ozana!

Näkfet Mässinäḡ semḡar!

Ija Mässinäḡ älbāraka

däḡ-wa dd-osän däḡ-isəm n-Emäli,

¹⁰ irxäm Mässinäḡ Təmmənəya

ta s-ija ärkäwäl-net i-abba-nänäḡ Dawəd.

Ozana i-Mässinäḡ wa iknän aḍkul.»

¹¹ Iwwäḍ-in Yisa aḡrəm wa n-Yärussälam, ijjäš ehän n-ämudd wa mäqqārən, äzjäzz'-e iket-net; inhäy a-s ija fälla-s ehäḍ ənta d-inəṭṭulab wi n-märəw d-əssin ḡas, ikkä dār-sän tadäbayt ta n-Bitanya.

*Aşar wa ilyän Yisa
(Mätti 21:18-19)*

¹² Äffäw, a-s dd-izjār tadābayt ta n-Bitanya, älluz.

¹³ Ojja ahəşk s-isəm-net aşar inşarän, ikk'-e-hi-dd, itassän warän-t aratan māšan, wār fälla-s ijrew ar ifärketän ed, wār-ija äzzāman n-tirwe-net.

¹⁴ Innä i-aşar: «Wār-issəlkäm Mässinäx ad-torawäd har tənkar äddunya.» A-s innä a-wen-däx, sallän-as inəttulab-net.

*Ikkäs Yisa käl-mamäla dāx-ehän n-ämudd wa mäqqārän
(Mätti 21:12-17; Luqa 19:45-48; Exya 2:13-22)*

¹⁵ Əwwädän-in Yärussālam, ijjäş Yisa ehän n-ämudd wa mäqqārän, ad-däx-s isattäx ättužžar d-imäžänšan-näsän, isibräxwil tisəskar n-käl-amähaş n-izärfan d-tisäqqima n-ättužžar n-tidäberen.

¹⁶ Wār-oyy' äwadəm wäl' iyyän äwwayän a inazzän ättužžar-t dāx-ehän n-ämudd wa mäqqārän.

¹⁷ Isaxrä äddinät, ijann'-asän: «Ajän wädden iktab a-s, innä Mässinäx: <Ehän-in ad-umas ehän n-ämudd i-tiwsaten iket-däx-näsnät,> māšan käwäned, jām-t tajnut n-imäkrädän.»

¹⁸ Əslän imänokalän n-käl-tikutawen d-älxulam n-Ättäwrät i-a-wen xas, ad-tattärän əmmək s-jän iman-net māšan, wār helän a-wen, fäl-a-s ämoos a-wa isäxra, a itəddasän ulhawän n-tamətte, ijraz-as iket-net.

¹⁹ Ij' alməz xas, izjār Yisa d-inəttulab-net axrəm.

*A-wa isadabat immun
(Mätti 21:20-22)*

²⁰ Äffäw, əkkän-dd edes i-aşar-wənnin, ənhäyän-t äqqur har ikewän-net.

²¹ Iktä-dd Bətrus a-wa ijän xas, innä i-Yisa: «Älxalim, ənhöy-t-ak aşar wa təlğanäd, äqqur-in.»

²² Äwwežäb-asän Yisa, inn'-asän: «Amənät s-Mässinäx,

²³ äsidättey-awän a-s ere dāx-wän innän i-aḍay-wa-däx: <Haan, təjrəd iman-näk dāx-əjäns wa səmmän>, ija a-wen, dāx-a-s, wār-ij' äşşäk dāx-ulh-net, iflas s-a-wa innä ad-äj, ad-ijrəw xur-Mässinäx a-wa dāx-s ittär.

²⁴ A-wen-däx a fäl hawän-janney a-s, a dāx-däläm Mässinäx-däx, dāx-a-s təflasäm a-s ad-t-təjrəwäm, ad-hawän-t-äkf.

²⁵ E-d təbdädäm-däx i-ad-tədləm Mässinäx har dd-təktäm a-s ixsad-awän äwadəm härät, änsät-as-in ed, afäl jām a-wen, ad-hawän-in-äns day Abba-näwän Mässinäx-i ihän isənnawän erk imojjan-näwän. [

²⁶ Afäl wār nəşşəm i-äddinät, wār hawän-in-e-äns Abba-näwän Mässinäx-i ihän isənnawän ibäkkädän-näwän.]»

*Äsmäşäkken imänokalän n-käl-tikutawen tärna n-Yisa
(Mätti 21:23-27; Luqa 20:1-8)*

²⁷ Oläs-dd Yisa uxəl n-Yärussālam ənta d-inəttulab-net xas, issäxläy-dd dāx-ehän n-ämudd wa mäqqārän. Osän-t-dd imänokalän n-käl-tikutawen d-älxulam n-Ättäwrät d-inuşämän n-Işrayil,

²⁸ ənnän-as: «Mi kay-ikfän turhajät n-amışəl n-tikunen-ti-däx? Mi käy-ikfän tärna-ta-däx s-täjjäd a-wa täjjäd?»

²⁹ Inn'-asän Yisa: «Ad-hawän-äjäx näkk-däx asəstan iyyän; wažäbät-ahi xas ad-hawän-älläxey näkk-däx ere wa hi-ikfän turhajät ta s-tamaşäläx a-wa täjjäx.

³⁰ Asəstan-in da: Mi dd-äšmašälän Exya wa n-Enəsselmäy i-ad-isəlmäy äddinät däx-aman? Ak Mässinäx meyx dägg-adəm xas?»

³¹ Inn'-asän a-wen xas, əqqälän-dd ämiiizäxän jer-iman-näsän, jannen: «Afäl has-nəнна: <Mässinäx a t-dd-äšmašälän>, ad-hanäx-änn: <Adiš, mafäl wär tomenäm s-a-wa hawän-inna.>

³² Afäl has-nəнна dağ dägg-adəm, aaa...» Wär helän tənna n-a-wen, ed äksudän, ad-fälla-sän tiðew tamətəta-däx ed təkkaş iket-net äššäk a-s, Exya, ännäbi n-Mässinäx s-tidət a ämoos.

³³ Ənnän-as: «Wär nəssen.» Inn'-asän: «Adiš, näkk-däx wär hawän-e-älläxey ere wa hi-ikfän tärna ta s-täjjäx a-wa täjjäx.»

12

Isälan n-inaxdimän wi n-inälläbäsän (Mätti 21:33-44; Luqa 20:9-18)

¹ Issäxläy Yisa dağ tangalen tiyyäd tamətəta. Ij'-asän tiyyät däx-hasän-innä: «Käla t-illa ähaləs äddomen ašəkrəş n-läxnäb, ij'-as afəraj, ijä däx-s edägg wa däx-izimməw läxnäb, idäy däx-s edägg n-soro i-ämagaz-net; ifär-t darät-a-wen i-inəsduma iyyäd təzzar ikk' äkall iyyän.

² Iwwäd-dd äzzäman n-amili n-ašəkrəş xas, äšmašäl-dd äanaxdim-net s-inəsduma i-ad-has-dd-awəy xur-sän folät-net däx-a-wa dd-oräw ašəkrəş.

³ Os'-en-dd äanaxdim, ärmäsän-t, tithəkkın-t har t-əksänän təzzar, əssəglän-t koräyräy.

⁴ Äšmašäl-dd sär-sän dağ äanaxdim iyyän, äsfätäqqen eyäf-net, äsmädräyän-t.

⁵ Oläs dağ ašəmmişəl n-iyyän, ärmäsän-t ənta, änxän-t kərəf; issəlkäm-asän-dd-i äjjootnen, äsmädräyän axıl-näsän, jän iman n-axıl wa iyyädän.

⁶ Wär has-dd-äqqima darät-a-wen ar ad-sär-sän dd-išəmmişəl rure-s ikna tärha ed inna däx-iman-net: <Ənta ya šamad rure-x, änihäjja s-ad-t-səmyärän>.

⁷ mäšan ənhäyän-t inəsduma imal-dd xas, änmännän: <Ənhəywät-ak, amäkkasu-net; əyyäwät, närməset, näjet iman-net i-ad-tumas takəsit tinänäx>;

⁸ ärmäsän-t, änxän-t kərəf təzzar, järän-t-in darät ašəkrəş.»

⁹ Issəmdä Yisa tangalt xas, inn'-asän: «Ässiistänäx-käwän, ma mad-äj mässi-s n-ašəkrəş ämära? Ədmanäx-awän a-s ad-dd-ass ənta iman-net, ilhəs inəsduma-wi-däx təzzar, aləs tefert n-ašəkrəş-net i-iyyäd.»

¹⁰ Inn'-asän dağ: «Ajän wär täxrem däx-əlkəttab n-Mässinäx a-s: <Tähunt ta hin-järän älbännatän s-ənnän wär tənfa härät, ənta a-s a-s təşräy tanfust,

tämoos tähunt ta tufät n-aymār hakkät äşşahät ehän;

¹¹ a-wen Emäli a t-ijän i-ad-umas təkunt dat-tiştawen-nänäx.> »

¹² Issəmdä Yisa tənna n-a-wen xas, ad-tattärän imänokalän n-käl-tikutawen d-älyulam n-Ättäwrät d-inušämän n-Işrayil əmmək s-t-ästärmäsän ed əssanän a-s əntäneq-en-däx a ässiixläy tangalt-ta-däx mäšan, wär helän a-wen fäl tuksəda-i jän i-tamətəta; əşläyän-as, əglän.

Isälan n-tiwse i-Qäyşär wa n-ämänokal (Mätti 22:15-22; Luqa 20:20-26)

¹³ Äšmašälän-dd sär-s darät-a-wen härät däx-käl-faris d-härät däx-käl-Harudəs i-ad-has-əqqənän tändärbat, siðewən-t däx-a inna wärän itətwinn.

¹⁴ Osän-t-dd, ənnän-as: «Älyxalim, nəssan a-s tidət xas a janned, wär täkkuläd däx-a-wa jannen äddinät, wär tän-täzmäzläyäd, wär säxrid dəx xas ar tidət n-tabarät n-Mässinäx. Ämära, nəssiistän-käy: ak iwar-anäx ad-nəzəl tiwse i-ämänokal Qäysär mex? Nəzlet-tät mex?»

¹⁵ İlmäd Yisa xur-iman-net s-təlmənufäya ta t-təllät dərät asəstan-näsän, inn'-asän: «Mafäl hi-tizərrubum? Awəyät-ahi-dd ərriyal n-azrəf-nəwän har t-ənhəyax.»

¹⁶ Äwwäyän-as-t-dd, inn'-asän: «Mi ilän ättəşwer d-isəm wa t-iwäran?» Ənnän-as: «I n-ämänokal Qäysär.»

¹⁷ Inn'-asän: «Adiš, suxəlät i-ämänokal wa məqqārən a-wa fälla-wän ila, təkfəm dəx Mässinäx a-wa fälla-wän ila.» Əqqälän-dd xas, tof'-en təkunt n-älwižab-wa-dəx hasän-ija.

*Äwwežəb Yisa dəx-isəlan n-tanəkra jer-inəmmuttan
(Mätti 22:23-33; Luqa 20:27-40)*

¹⁸ Osän-t-dd dərät-a-wen hərät dəx-käl-sadus-i xur-ija a-s wär təlkem tanəkra n-inəmmuttan, əssəstänən-t, ənnän-as:

¹⁹ «Älyxalim, inn'-anäx ännäbi Mosa: <Afäl äba äñña-s n-äwadəm, oyyä-dd hənne-s dər-wär oher ara, idubənet-tät äñña-s i-ad-ikreš əzzurəyät i-äñña-s wa äba i-ad-wär hin-itiləm isəm n-wa äba fäll-əröri n-əkall.»

²⁰ Ämära, əkkəs-anäx dəx-təqqän n-eyäf: kälə t-əllan əssa ayətma; ädobän dəx-sän wa n-amäqqar məšan, äba-t wär-ikreš ara.

²¹ Oyyä-dd hənne-s, ädobän-tät wa s-əssin, äba-t ənta-dəx wär dd-oyya ara, a-wen-dəx dəx a ija wa s-kərad;

²² äba-tän əssa-essän məšan, wär tän-iha i dd-oyyan ara; äba dəx tamədt dəra-sän.

²³ Nəssiistän-käy: əşäl wa n-tanəkra jer-inəmmuttan, əndek dəx-sän wa s-e-tumas hənne-s ed, ənhayän-tät adubən əssa-essän?»

²⁴ Inn'-asän Yisa: «Ənta-den-dəx təsətbət n-išk wa jəm ed, a-wa ənnän əlkəttabän hakd-dəx a-wa dər-togdäh tärna n-Mässinäx, wär t-illa a dəx-s təfhamäm.»

²⁵ Əşäl wa dd-nakkärän inəmmuttan, meddən hakd tiđeden, ad-äbas tidubunän ed ad-taläh təmudre-näsän d-ta n-änjəlosän wi hənən işənnawän.

²⁶ Ämära, dəx-isəlan wi n-inəmmuttan d-tanəkra-näsän, ajän wär təxrem dəx-əlkəttab wa n-ännäbi Mosa a-wa has-innä Mässinäx xur-tabsəxt ta təhjäljälät wär räqq? Wädden, inn'-as Mässinäx: <Nəkk a-s Mässinäx n-İbrahim d-İsxaqq d-Yaqub.»

²⁷ A-wen, älməxna-net a-s, äddinät-win-dəx, han älžännät, tiimələn Mässinäx; ənnär wär-ədderän, wär təjjən a-wen. Mässinäx, wädden inəmmuttan a-s ämoos Mässinäx, ämoos-t i-wi əddärnen. Tidət-dəx a-s toškam ed tənnäm wär təlkem tanəkra jer-inəmmuttan.»

*Alämär wa ufän
(Mätti 22:34-40)*

²⁸ Ohəz-dd iyyän dəx-älyxulam n-Ättəwrät əsijädän i-edəwänne wa ija Yisa d-käl-sadus d-älwižab wa ähuusken hasän-ija, inn'-as: «Ma ämoos xur-Mässinäx alämär wa ojärän?»

²⁹ Inn'-as Yisa: «Ənta da wa ojärän:
<Ya İşrayil, səjəd!

Emäli-nänäx Mässinäx, ənta xas a-s Emäli.

³⁰ Ad-tərhəd Emäli-nək Mässinäx s-ulh-nək imda

tärhəd-t s-iman-näk əmdan,
d-tayətte-näk təmda d-əşşahät-näk iket-net.>

³¹ Wa s-əssin dəx da:

<Ad-tärhəd ənharäj-näk s-əmmək wa s-tərhed iman-näk.>
Wär t-illa alämär ojärän-win-däx.»

³² Inn' əlyalim n-Ättäwrät i-Ÿisa: «Əlyalim, tənned tidət:
Mässinäx iyyän, wär t-illa ar ənta.

³³ Iwar ägg-adəm ad-t-ärh s-ulh-net imda,
d-tayətte-net təmda d-əşşahät-net iket-net;
ärh dəx ənharäj-net s-əmmək wa s-irh' iman-net.
A-wen, wär t-təlla tasəbdärt wəla takute wär-ojer.»

³⁴ Inhəy Ÿisa iqqud n-əlwižab-net xas, inn'-as: «Käyy, əbas tujəjad
Təmmənəya n-Mässinäx.» Əbas t-illa qarət-a-wen ere ihälän asəstan-net.

*Ÿisa, ojär tumast n-ahəya n-Dawəd
(Mätti 22:41-46; Luqa 20:41-44)*

³⁵ Isaxra Ÿisa dəx-ehän n-əmudd wa məqqärän, ijanna i-əddinät: «Ma
isawännen əlyulam n-Ättäwrät a-s Əlmasex, rure-s n-Dawəd?

³⁶ Wädden Dawəd iman-net a innän s-mäjräd ija Unfas Šəddijän dəx-
emm-net a-s:

<Eməli Mässinäx, innä i-Eməli-nin,
əyyäw, xayəm daw-axil-in,
hundəx har əjəx isənja-näk daw-iđarän-näk.>

³⁷ Ÿas šəmad Dawəd iman-net iğarr Əlmasex s-isəm Eməli; əndek əmmək
wa s-əddoobät ad-umas rure-s?»

Ijraz mäjräd-wen-dəx ija Ÿisa i-tamətte ta təjjeet has-təsijädät.

*Hewät!
(Mätti 23:1-36; Luqa 11:37-54; 20:45-47)*

³⁸ Dəx-a-wa isəxra, inn'-asən: «Agəzät iman-nəwän dəx-əlyulam n-
Ättäwrät, əjraznät-asən timukal dəx-isəlsa əhobätnen, ijraz-asən ad-
hasən-titwəjjin isofan dəx-tišarriten,

³⁹ ärhan tisəqqima-ti ənnufläyən dəx-ihənan n-əddin wi n-käl-Əlyəhud
d-atwəsəmyar dəx-imjora,

⁴⁰ tihəxän a-wa ihän ifassän n-tinudäfen, a-s ija a-wen, harkuk tumadän
i-ad-tän-in-əjrahän əddinät; ilkam dəx-sän əşşərexa səmmän.»

*Tənuđäft ta tojarät imərrəzəxän ihuk
(Luqa 21:1-4)*

⁴¹ Äqqiima Ÿisa dəx-ehän n-əmudd wa məqqärän dat-əssəndoqq wa
dəx-titwəjjinät tikutawen, ikyad dəx-əmmək wa s-dəx-s səns tamətte
azrəf. Təjjarän dəx-s käl-ehäre əzrəf əjjeen;

⁴² tosə-dd tənuđäft ləqqəwät, təstärəkkät dəx-əssəndoqq sənətät
təmmaten əbdənen.

⁴³ Iğrə-dd Ÿisa inəttulab-net s-iman-net, inn'-asən: «Əsidätteğ-awän a-s
tənuđäft-ta-dəx n-taləqqe, tojar əddinät iket-nəsən ihuk,

⁴⁴ fäl-a-s iket-nəsən, a-wa s-əssakəyän s-wär-əmyatəran a əkfän, a-s ija
a-wen ənta, a-wa tətəf i-təmdre-net iket-net a təkfa.»

13

*Terəzze ta təlcamät dəx-ehän n-əmudd wa məqqärän
(Mätti 24:1-2; Luqa 21:5-6)*

¹ Izjār-dd Yisa ehän n-ämudd wa mäqqārän ɣas, inn'-as iyyän däɣ-inəṭṭulab-net «Äɣalim, ənhəy ɣas tihun-ti-däɣ ähuskätnen, tihusay n-ehän!»

² Inn'-as Yisa: «Wädden hannäyäd-t ehän-wa-däɣ mäqqārän ähusken? Wār mad-däɣ-s dd-täqqayəm tähunt tiyyät warät tamidit-net, ad-ättäxtäɣ iket-däɣ-net.»

*Išmal n-täməddawt n-äddunya
(Mätti 24:3-35; Luqa 17:22-24; 21:7-24)*

³ Äqqiima Yisa ɗarät-a-wen fäll-taɗaxt ta tässidwälät ihəskan wi n-əzzäytun, ikyad däɣ-ehän n-ämudd wa mäqqārən, issəstän-t Bəṭrus d-Yaqub d-Exya d-Idris däɣ-takše,

⁴ ənnän-as: «Läɣät-anäɣ əmme d-mad-äj a-wa s-tənned? Əkkəs-anäɣ däɣ-taɣdärt n-išmal wi s-mad-nəlməd a-s səmdo n-härät iket-net, iwwäd-dd?»

⁵ Äwwežäb-asän Yisa, inn'-asän: «He käwäneɗ, äjät ənniyät, wär käwän-išäsket äwadəm,

⁶ ad-dd-asən äddinät äjjootnen fäll-isəm-in, änn hak iyyän däɣ-sän: «Näkk a-s Älmaseɣ», šiškən s-a-wen-däɣ äddinät äjjootnen.

⁷ Ad-təsləm i-isälan n-imjārən d-mähewəl n-imjārən, wär täxweläm ed ilzam ad-äj a-wen məšan, səmdo n-äddunya ənta, wär-ija härwa.

⁸ Ad-təknəs tawset tamidit-net, iknəs əddəwəl amidi-net, äj laɣ, iškədkəɗ äkall däɣ-idäggan äjjootnen, sənto n-täməddawt n-äddunya ɣas a-wa, oläh d-sänto n-tizɣurt n-tamäɗt jarräwät eɣäf-net.

⁹ Məšan, äjät ənniyät i-iman-näwän: ad-hawän-aškən äddinät s-əlxəkum, əjən däɣ-wän tiwit däɣ-ihənan n-äddin wi n-käl-Älyähud; səbdədän-käwän dat-gəfārən d-imänokalän, däɣ-äddimmät n-isəm-in wa käwän-iwarən; umas a-wen əssəbab fäl tämoosäm tjuhawen-in data-sän,

¹⁰ i-ad-əslənät tiwsaten iket-däɣ-näsnät i-isälan n-Älənžil təzzar.

¹¹ Afäl käwän-ästärmäsän äddinät, wär täšäwwašät däɣ-isälan n-a-wa mad-tənnəm, äjät məjrad wa käwän-e-itwəkfən əssaɣät-wen-däɣ ed wädden käwäneɗ a maden-ämmäjräd, Unfas Šaddijän a he-ijən däɣ-imawän-näwän a-wa s-läm s-tənnə-net.

¹² Išilan-en, ad-isəttärməs äwadəm əñña-s i-ad-ämmät kərəf, isəttärməs abba rure-s, ännäbdädän aratan d-imärawän-näsän, əjən iman n-imärawän-näsän;

¹³ ad-där-wän akəɗän äddinät iket-näsän, däɣ-äddimmät n-isəm-in wa käwän-iwarən, məšan ere wa ihälän iman-net, äkoyäd däɣ-alkum-hahi har ašäl wa d-imda a-wen-däɣ iket-net, ad-iɣləs.

Erk äzzämanän wi dd-malənen

¹⁴ Afäl tənähäyäm ənabxas wa n-eməkkärekaɗ här äqqima däɣ-edägg wa s-wär-ila s-ad-däɣ-s äqqayəm, äwadəm wa iɣarrän isälan-wi-däɣ, ijrəhet älmäɣna-näsän! Wi irmäs a-wen-däɣ əzzaɣän teje ta n-Älyähudəyät, jawəɗnet däɣ-azzal s-ašrut wa n-iɗaxän,

¹⁵ wa iwärän afälla n-ehän, wär dd-itəzəbbutet i-ad-iɗkəl a has-ihan ammas n-ehän,

¹⁶ wa ihän išəkraš, wär dd-itäqqälet ɗara-s i-ad-iɗkəl asälso-net.

¹⁷ Timəskay tiɗeɗen-ti mad-ärməsän išilan-win-däɣ lanät ənniyät meɣ siɗuɗnät.

¹⁸ Əttärät däɣ-Mässinäɣ ad-wär-itəmzəyyit ajiwəɗ-näwän d-äzzäman wa n-tajrəst

¹⁹ ed išilan-en-däx, ad-äj älyizabät ässuksäðän s-ad-dd-ixläk Mässinäx äddunya-däx, wär käla ätiwänhäy šund ənta fäll-ərori n-äkall, ad-təmdəw äddunya daḡ, wär-ilkem ad-ija a dār-s olähän.

²⁰ Afäl wär-ifnez Emäli däx-täqqän n-tisnant ta häť išilan-win-däx, wär-ixəlləs wäl' ägg-adəm iyyän ḡas; məšan, ad-išəksəl Mässinäx täqqän n-tizzurt-ten-däx, däx-təssəba n-äddinät wi əsnäfrän i-əlyəllas.

²¹ Äzzäman-en, afäl hawän-inna əwadəm: <Ənhəywät-ak, Älmasex, ənta da!> meḡ <Ənhəywät-ak, ənta den!> wär t-təflesäm.

²² Ad-dd-asən älmasexän n-bahu d-ännäbitän n-bahu, əjən ijitän ässuksäðnen d-tišušab, šiškən ənnär ämmukkän a-wen wäla äddinät wi əsnäfrän Mässinäx.

²³ He käwəneð! Äjät ənniyät i-iman-nəwän, əkkasəḡ-kəwän däx-taḡdärt härwa wär jen härätän-win-däx.»

*Uḡəl n-Ḳisa Älmasex
(Mätti 24:29-31; Luqa 21:25-28)*

²⁴ «Dərät tisnant ta madät-täj däx-išilan-win-däx, <ad-əlsənät tihay täfukt, iba təməlle n-ewär,

²⁵ ətrəkken-dd etran däx-išənnawän, ənhəynəhəyän iməşsuha wi hänen išənnawän.>

²⁶ Älwäqq-wen-däx, ad-e-itwənhəy Ägg-ägg-adəm, imal-dd, inay tijäräken, təlkam-as tärna-net d-älxurmät-net.

²⁷ Dihen, ad-išəmmišəl änjəlosän-net, sədəwən-dd sār-s däx-tisdas iket-nəsənät e d t-illäm ere əsinäfrän Mässinäx däx-e-d t-təlläm tamdujt fäll-ərori n-äkall hakd-däx däx-išənnawän.»

*Iji n-ənniyät
(Mätti 24:32-36; Luqa 21:29-33)*

²⁸ «Səjrähät ḡas əmmək wa s-idaggäl ašar: wädden e-d t-tənhəyäm a-s-dd-inšär har lämməðän ifärketän-net, ad-tənnəm, os'-anəḡ ewelän.

²⁹ Əmmək-wen-däx daḡ a-s afäl tənhəyäm härätän-win-däx s-hawän-ənnəḡ har əqqälän iji, adiš əlmədät a-s Ägg-ägg-adəm, ohəz-dd uḡəl-net, os'-iwän fəw.

³⁰ Äsidätteḡ-awän a-s, wär-e takəy əzzurəyät-ta-däx wär jen härätän-win-däx s-hawän-ənnəḡ iket-däx-nəsän.

³¹ Ojār tärəḡse ija ad-ib' išənnawän d-äkall, uhən ad-iba tənna-nin.

Ḳaymät täsidəwäm i-ass n-Ḳisa Älmasex

³² Däx-isälan n-ašäl meḡ əssaḡät wa däx-mad-əjən härätän-win-däx, wär t-illa ere t-issanän; wär t-əssenän änjəlosän wi hänen išənnawän wäla Ägg-ägg-adəm; Abba ḡas, a t-issanän.

³³ He käwəneð! Ḳaymät tokayäm ed wär təssenäm əssaḡät s-dd-e-ass.

Tangalt ta n-isuf wi itäj Mässinäx

³⁴ A-wa madän-äj, oläh d-əhaləs ixarrän asikəl. Əssawäð tekle ḡas, issəðmän ehän-net däx-inaxdimän-net; əsmätär hak iyyän däx-sän d-a-wa s-ila s-ad-t-äj. Inna i-wa ixləfän emm-n-ehän, äqqaymet okay.

³⁵ A-wen-däx a fäl, ḡaymät tokayäm ed, wär təssenäm əssaḡät s-dd-e-ass məssi-s n-ehän, alməz meḡ tišrayät n-ehäð meḡ əḡora meḡ tifawt.

³⁶ Uksäðät ad-dd-ass wär jem fäll-a-wen, ixdär-kəwän-dd tətḡasäm.

³⁷ A-wa hawän-janneḡ, janneḡ-t daḡ i-äddinät iket-nəsän, ḡaymät tokayäm.»

14

Anu n-taydärt wa kittəwän imänokalän i-Ÿisa
(Mätti 26:1-5; Luqa 22:1-2; Exya 11:45-53)

¹ Äqqimän-in əssin išilan i-ämudd wa n-Faşka-i dāy-tamäksanät tijəlwen ti wär ha täzza. Tattärän imänokalän n-käl-tikutawen əmmək s-əssäydärän Ÿisa, əjən iman-net mäšan,

² ənnän, wär-ufa ad-äj a-wen dāy-aşäl wa n-ämudd, i-ad-wär təjj tamdərwayt dāy-tamətte.

Tamädt ta təssänğälät ađutän fäll-Ÿisa
(Mätti 26:6-13; Exya 12:1-8)

³ Aşäl iyyän d-ämijarät Ÿisa i-Simyon wa s-käla t-ijrāw jəri izzäğän tadābayt ta n-Bitanya, itamänsaw dihen-dāy, a-s t-dd-tosa tamädt täwwayät butəl iknan dāy-tähunt mällät, han ađutän lanen älqim wär-iqqr härät. Tosä-dd ғas, tärza emm n-butəl wa täwwäy, ad-sänğal ađutän wi t-hänen fäll-eğäf n-Ÿisa.

⁴ Ənhäyän äddinät-wi dār-äniğayma a-wen, wär hasän-ijrez, ähnäffen dāy-iman-näsän, ad-jannen: «Mafäl baxxäsän ađutän-wi-dāy,

⁵ wädden äddooben ad-hin-ənşən kərəđät timađ n-ärriyal n-azrəf ämoosnen takute i-tiläqqiwen.» Ođänän ya ađkär i-tamädt-ten-dāy.

⁶ Inn'-asän Ÿisa: «Äkfät-tät älğafyät, mafäl has-naxxäsäm iman? Tihusay n-härät təj'-ahi-t!

⁷ Tiläqqiwen ya, əllanät ғur-wän härkuk, älwäqq s-tärhäm-dāy, täddoobem ad-hasnät-təjəm älxer mäšan, näkk, ilkam ad-käwän-äfläy.

⁸ Tamädt-i-dāy, tēja a-wa täddoobät, təşşəswär-dd i-äddinät dāy-isälan n-əmukən n-tafəkka-nin i-azəkka.

⁹ Äsidätteğawän a-s edägg dāy-ätwäxtäbän isälan n-Älənžil, dāy-äddunya-ta-dāy, ad-dāy-s ətwəsuyəlän isälan n-a-wa ja i-ad-tät-kittəwän äddinät.»

Anu n-taydärt wa iyäş Ÿahudəs
(Mätti 26:14-16; Luqa 22:3-6)

¹⁰ Inkär Ÿahudəs Isxaryut wa n-iiyän dāy-inəttulab wi n-märāw d-əssin, ikk' imänokalän n-käl-tikutawen i-ad-hasän-isäydär Ÿisa, ärməsän-t.

¹¹ Äsdäwen-tän isälan wi dd-iwwäy, jän-as ärkäwäl n-ad-t-əkfen azrəf. Ad-itammäy Ÿahudəs ғur-älwäqq-wen-dāy i-taşləlt s-hasän-t-ästärmäs.

Ämudd wa n-Faşka
(Mätti 26:17-30; Luqa 22:7-23; Exya 13:21-30; 1 Kur. 11:23-25)

¹² Aşäl wa äzzarän n-ämudd dāy-tamäksanät tijəlwen-ti wär təha täzza, älwäqq wa d-ğarräsän äddinät i-tağsiwen ti n-Faşka, ənnän inəttulab i-Ÿisa: «Əndek diha d-tärhed ad-nəsəssikəy imənsiwän n-ämudd wa n-Faşka?»

¹³ Äsmaşäl əssin dāy-sän s-ağrəm, inn'-asän: «Əjjəşät ağrəm, ad-därwän immuqqəs ähaləs äwwayän iddid n-aman, əlkəmät-as

¹⁴ s-ehän wa mad-ijjəş, tənnəm i-mässi-s n-ehän-en: <Inn'-ak älğalim, səkən-anäy edägg dāy-ehän-näk wa dāy-mad-səssikəyäy ämudd wa n-Faşka näkk d-inəttulab-in.>

¹⁵ Ad-käwän-isəkən soro n-ehän-net ih' ehän hərəwän, şaddijän dāy-ämmuujnen isəftay, dihen-dāy ad-mad-nəsəssikəy ämudd.»

¹⁶ Əglän inəttulab, əjjäşän ağrəm, ənhäyän härätän s-əmmək-wa-dāy s-hasän-tän-innä, ad-siməjnun imənsiwän wi n-Faşka.

¹⁷ Ij' ehäð ɣas, osä-dd ʃisa äddeew d-inəttulab-net wi n-märaw d-əssin.

¹⁸ Tamänsawän dihen-däx a-s hasän-inna: «Äsidätteɣ-awän a-s iyyän däx-wän där-i oharän ämära-däx a hi-madän-isəssäxdär.»

¹⁹ Ekmän-tän iman-näsän a-s hasän-innä a-wen-däx, ad-has-jannen s-iiyyän-iiyyän: «Ajän näkk?»

²⁰ Inn'-asän: «Enneɣ: iyyän däx-wän där-i änimäjjän äfuss däx-äkoss a hi-madän-isəssäxdär.

²¹ Tidət-däx a-s Ägg-ägg-adəm, ad-t-iba, ed a-wen-däx a ənnän əlkəttabän n-Mässinäx däx-isälan-net mäšan, amäskoy äwadəm wa t-madän-isəssäxdär! Äwadəm-en, iššäm-as-in ad-wär dd-ijješ äddunya fäw.»

Asəbdad tasäktot ta šäddijät

²² Tattän dihen-däx a-s idkäl ʃisa tajəlla, ämmoy i-Mässinäx təzzar, äzun-asän-tät, inn'-asän: «Uhənät, a-wa taɣəssa-nin.»

²³ Idkäl ɗarät-a-wen kara han aman n-läxnäb, äxxiimmärnen, ämmoy i-Mässinäx təzzar, ikf'-asän-t iket-däx-näsän, əswän däx-s.

²⁴ Inn'-asän: «A-wa ašni-nin wa ämoosän ärkawäl n-tassaxt ta täynayät d-Mässinäx, ašni-nin, ad-inɣəl däx-təssəba n-äddinät äjjootnen.

²⁵ Äsidätteɣ-awän a-s äbas ilkam ad-əswex a dd-ijmadän ara n-läxnäb hundäx har ašäl wa d-mad-äswäx wa äynayän däx-Təmmənəya n-Mässinäx.»

²⁶ Äwwäy ʃisa d-inəttulab-net isuhay n-təmmal n-Mässinäx dd-əzjarnen əlkəttab wa n-Äzzäbur, əglän ɗarät-a-wen, əkkän taɗaxt ta tässidwälät ihəškan wi n-əzzäytun.

Ilkam ad-ikkuddəl Bətrus ʃisa

(Mätti 26:31-35; Luqa 22:31-34; Exya 13:36-38)

²⁷ Inn'-asän ɗarät-a-wen: «Ad-täqqələm ɗar'-i iket-däx-nawän ed iktab däx-əlkəttab n-Mässinäx a-s:

«Ad-əwətäx amäɗan, iba-t, ämmähašnät tihatten iket-näsnät.»

²⁸ Afäl dd-ənkaräx jer-inəmmuttan, ad-hawän-izaräx s-teje ta n-Galila.»

²⁹ Iggäd-dd Bətrus, inn'-as: «Kud-irha əkkuddələn-käy imidiwän-in iket-näsän, näkk iman-in, wär käy-mad-əkkuddələx.»

³⁰ Inn'-as ʃisa: «Äsidätteɣ-ak a-s ehäð-i-däx, a-s-e-äj ekäz əssin iɣoran, täkkuddäläd-ahi har käraɗ ihändäggan.»

³¹ Ibbäräð Bətrus, innä daɣ: «Näkk ɣas, kud-däx tamättant a tihräx där-k, wär käy-mad-əkkuddələx.» Abäraj-wen-däx ija Bətrus, a jän imidiwän-net.

Ässaɣät wa ikkäs ʃisa däx-ašəkrəš wa n-Žätsämmani

(Mätti 26:36-46; Luqa 22:39-46)

³² Äddew där-sän ʃisa ɗarät-a-wen s-ašəkrəš iyyän iknan asədwal n-ihəškan s-isəm-net Žätsämmani. Ewwäðän-in ɣas, inn'-asän: «ɣaymät, täqqələm-ahi diha-däx har ədələx Mässinäx.»

³³ Iššenkäš-in fälla-sän, äddeew d-Bətrus d-Yaqub d-Exya; ɣur-ässaɣät-wen-däx ad-t-əssəntän iman-net təkma, ixwäl.

³⁴ Inn'-asän: «Äryän iman-in, äryän har išwar hi-äba; wär təttesäm, ɣaymät ɣur-i, wär hanäx-iläqqädet eðəs.»

³⁵ Iššenkäš-in daɣ fälla-sän a əndärrän, irkäx, ad-itəddal Mässinäx, ijanna: «Kunta ämmuukkän a-wen-däx, ajəjet-ahi ässaɣät-i-däx.»

³⁶ Innä day dāx-tittar-net: «Abba-nin, wār t-illa a-s wādden täddoobed-t, səssijəj-ahi tissant-ta-dāx, māšan hakd a-wen-dāx, əjet erhet wa-nāk wādden wa-nin.»

³⁷ Iqqāl-tān-dd Yisa, ogāz-tān-dd əttaşān, issənkār Bətrus, inn'-as: «Simyon, kāyy təttaşād? Adiš, indār-ak wāla-dāx ad-təjəd əssaḡāt iyyān tokayād,

³⁸ äyyät fälla-wān eḡəs, ədəlät Mässināx i-ad-kāwān-agəz dāx-tānḡərbaten n-Iblis; ägg-adəm, tidət-dāx a-s əsidārḡhān amişəl n-a äjjeen ähuusken māšan, igdal-as iba n-əşşahāt n-tumast-net amişəl n-a-wa irha.»

³⁹ Olās day aşənkəş fälla-sān, ad-itəddal Mässināx s-əmmək-wənnin-dāx s-t-idāl s-tizarāt.

⁴⁰ Olās-tān-dd uḡəl, ogāz-tān-dd, ij'-asān eḡəs alāḡad wa-dāx fāl hasān-indār wāla ad-arən tiṡṡawen-nāsān; issənkār-tān māšan, äba-hasān a hasān-ənnān a-wa-dāx hasān-ija, äzuk n-eḡəs.

⁴¹ Ifāl-tān, ij'-asān-dd uḡəl wa s-kāraḡ, inn'-asān: «Ḥas kāwāneḡ təttaşām, sinfum ḡārwa? Igdāh-awān; əssaḡāt wa d-ititwāḡdir Ägg-ägg-adəm, ijjeş ifassān n-inəsbākkadān, osā-dd.

⁴² Ənkārāt, äḡlāt-anāḡ, os'-iwān ämayḡdar-in.»

Atärməs n-Yisa

(Mätti 26:47-56; Luqa 22:47-53; Exya 18:2-11)

⁴³ Ämmiijrād ḡārwa a-s dd-osa Yāhudəs, iyyān dāx-inəṡṡulab-net wi n-māraw d-əssin, əsilāl tamətte s-iiyāḡ, əşləjān tikobawen, iyyāḡ äwwayān iboriyān; äşimaşālān-tān imānokālān n-kāl-tikutawen d-älḡulam n-Äṡṡāwrāt d-inuşāmān n-Işrayil.

⁴⁴ Tamətte-ten-dāx, ij'-as Yāhudəs wa n-ämayḡdar tamātart dāx-has-inna: «Ähaləs wa s-hi-tənhāyām har t-osāsāḡ dāx-idmarān-in, ənta a-s Yisa, ärməsāt-t, təḡləm dār-s dāx-a-s has-təknam iji n-ənniyāt.»

⁴⁵ Osā-dd Yāhudəs, oḡād iman-net s-Yisa, inn'-as: «Älfäqqi!» Osās-t dāx-idmarān-net.

⁴⁶ Toḡa tamətte fäll-Yisa, tärmäs-t.

⁴⁷ Iggād-dd iyyān dāx-inəṡṡulab-net, ilbāy-dd tākoba-net, iwāt sār-s akli n-ämānokāl n-kāl-tikutawen, iştāf-dd sār-s taməzzujt-net.

⁴⁸ Inna Yisa i-tamətte: «Ajān nākk ānaytaf a ämoosāḡ a-s hi-dd-takkām d-tikobawen d-iboriyān i-ad-hi-tärməsām?

⁴⁹ Wādden hak aşāl əlleḡ-t jere-wān, saḡreḡ dāx-ehān n-ämudd wa māqqārān, mafāl wār hi dāx-s tärməsām? Əlmədāt a-s a-wa ijān aşāl-i-dāx, ija i-ad-itbət a-wa ənnān əlkəttabān n-Mässināx dāx-isālan-in.»

⁵⁰ Äjewāḡdān inəṡṡulab iket-nāsān, oyyān-dd Yisa ənta ḡas jer-işənja-net.

Ämawaḡ wa äjewāḡdān

⁵¹ İlkām-as-dd ämawaḡ iyyān wārān ilsa ar tasəjbəst lämmədāt daw-wār t-illa ḡārāt, äkbätten-t-dd äddināt ḡas,

⁵² oyy'-asān-in tasəjbəst-net, oşāl wār ilsa tikəst.

Tebādde n-Yisa dat-äşşäreḡa wa māqqārān

(Mätti 26:57-68; Luqa 22:54-55, 63-71; Exya 18:12-14, 19-24)

⁵³ Ittəlwāy Yisa s-ämānokāl n-kāl-tikutawen-i s-a-s itäj a-wen-dāx, äzzimmāḡyān ḡur-s kāl-tikutawen d-inuşāmān n-Işrayil d-älḡulam n-Äṡṡāwrāt.

⁵⁴ Tamøtte-en, ij'-as-dd Bətrus alkum šøjren har tøjjäš ammas n-äxalla n-ehän n-ämänokal n-käl-tikutawen; osä-dd Bətrus, ijjäš ənta-däx, iglä äqqima edes i-gärditän, ad-itazzäh s-efew.

⁵⁵ A-s itäj a-wen-däx, tattärän imänokalän n-käl-tikutawen d-käl-Sinhidrin-i† tirönen äššärexa ere innän bahu fäll-Ÿisa, sidəwən-t däx-äššärexa, äxtəsän-as tamättant mäšan, wär t-illa udlem fälla-s əjrawän.

⁵⁶ Əggädän-dd äddinät äjjootnen, ad-t-saḍlamän mäšan, indär-asän ad-ännäfhämän fäll-bahutän-näsän.

⁵⁷ Sawarän-t iyyäd bahu,

⁵⁸ jannen: «nəsall'-as a-s innä: <Näkk, ad-ärzäx ehän n-ämudd wa mäqqärän däyän ifassän n-dägg-adəm, səbdədäx-dd däx-käraḍ išilan i wär deyän ifassän n-ägg-adəm däx-edägg-net> »

⁵⁹ mäšan, wäla bahu-wen-däx, indär-asän ad-fälla-s ännäfhämän.

⁶⁰ Ihä-dd ämänokal n-käl-tikutawen ibdad däx-ammas n-älžəmayät, innä i-Ÿisa: «Ma tənned däx-a-wa fälla-k itawännen? Mäjräd!»

⁶¹ Wär t-illa a has-inna Ÿisa. Issəstän-t ämänokal n-käl-tikutawen daḡ, inn'-as: «Ajän käyy a-s Älmasex wa n-Rure-s n-Wa ibbəlälän.»

⁶² Inn'-as Ÿisa: «Ämoosäx-t; ässiilmädäx-käy daḡ a-s yur-ašäl-i-däx, ad-tənhəyäm Ägg-ägg-adəm, äqqiima daw-axil n-Wa ilän tärna iket-net, taləsəm-t daḡ ahänay, iqqal-dd, ifal-dd išənnawän, inay tijäräken.»

⁶³ Isl' ämänokal n-käl-tikutawen i-a-wen ɣas, ijjäš-t älhäm wa-däx fäl irmäs err n-erəswäy-net, äşxərrawät-t fäll-iman-net, inna: «Ma nətaj i-tijuhawen daḡ?

⁶⁴ Təsläm-as iket-nəwän a-s äškafär wädden; ma tənnäm däx-isälan-net?» Äswärän-t udlem iket-näsän, ənnän änihäjja d-tamättant.

⁶⁵ Ad-fälla-s situfän, salsen ekäršäy idəm-net, sattäxän-as, jannen-as: «Luləy ya!» Sattäxän-as daḡ gärditän.

Akuddəl n-Bətrus i-Ÿisa

(Mätti 26:69-75; Luqa 22:56-62; Exya 18:15-18, 25-27)

⁶⁶ Äqqiima Bətrus däx-ammas n-äxalla-en-däx a-s t-dd tosa tiyyät däx-tinaxdimen n-ämänokal n-käl-tikutawen;

⁶⁷ tənähäy-t izzah s-efew, täzjəzz'-e, tənn'-as: «Käyy-däx, käla täddewäd d-Ÿisa wa n-Nəširät?»

⁶⁸ Äkkuddäl Bətrus a-wen, inn'-as: «Wär-əjrehäx, wär-əssenäx a däx-hi-tässewäläd.» Izjär Bətrus ḍarät-a-wen, ikk' emm n-äxalla ɣas, iwät ekäz äxora.

⁶⁹ Tənähäy-t daḡ tənaxdimt tiyyät, ad-janna i-äddinät-wi t-əllanen dihen: «Hannäyäm-t ähaləs-wa-däx, iyyän däx-sän.»

⁷⁰ Oläs daḡ Bətrus akuddəl n-a-wen. A əndärrän ḍarät-a-wen, ənnän-as äddinät əbdadnen dihen: «Ijmaḍ-t äššäk a-s iyyän däx-sän a tämoosäd ed käyy-däx, Galila a käy-lät.»

⁷¹ Ad-hasän-itähhaḍ, ilaqqän iman-net siha d-siha, ijann'-asän: «Ähaləs wa s-hi-jännem, wär t-əzzeyäx.»

⁷² Diha-däx d-innä a-wen-däx ad-iwät ekäz äxora wa s-əssin. Iktä-dd Bətrus mäjräd wa s-käla has-t-ija Ÿisa a-s has-innä: «Wär mad-iwət ekäz əssin iyoran wär tənned har käraḍ ihändäggan, wär hi-təzzeyäd.» Izjär, ad-ihall.

† 14:55 14:55 A-wa äläžəmayät n-inušämän d-imizärän n-käl-Işrayil wa itirən äššärexa, əntäneḍ a-s älqallitän, osaxän daḡ tamøtte d-əlxəkum d-äddin.

15

Tebädde n-ÿisa dat-Bilatəs

(Mätti 27:1-2, 11-14; Luqa 23:1-5; Exya 18:28-38)

¹ Härwa emäxär ad-änmänhäyän käl-tikutawen d-inušämän n-Işrayil d-älğulam n-Ättäwrät d-käl-Sinhidrin-i† tirönen äššäreya; jän tişem däg-ÿisa təzzar, əlwäyän-t s-Bilatəs.

² Inhäy-t Bilatəs ғas, issəstän-t, inn'-as: «Ak, käyy a-s ämänokal n-käl-Älyähud meyx?» Inn'-as ÿisa: «Käyy iman-näk, tənned-tän.»

³ Ad-t-sawarän udlemän äjjootnen.

⁴ Issəstän-t Bilatəs dağ, inn'-as: «Ənhəy ғas a-wa fälla-k itawännən? Ma tənned käyy iman-näk?»

⁵ Wär t-illa a has-inna ÿisa har iqqän asusəm-net eğäf n-Bilatəs.

Bäryäbbas wa n-emäjj n-iman

(Mätti 15:31; Luqa 23:13-15; Exya 18:38-19:36)

⁶ Äzzäman-en, hak ämudd n-Faşka, äsiwäyy'-in gəfär u-takärmüt wa däg-s təttär tamətte.

⁷ A-s itäjj a-wen, ih' ähaləs s-isəm-net Bäryäbbas takärmüt ənta d-imidiwän-net s-käla dd-əssənkärän tamətte har jän iman n-äwadəm däg-a-wen-däg.

⁸ Tənkär tamətte iket-net ad-tattär däg-Bilatəs a-wa s-izzäy ad-hasän-t-äj.

⁹ Inn'-asän: «Ak ajän tärham ad-hawän-in-äyyäğ ämänokal n-käl-Älyähud?»

¹⁰ Issan Bilatəs a-s təmyäre n-tismiten n-imänokalän n-käl-tikutawen a fäl ästärmäsän ÿisa.

¹¹ Əntäjän-dd tamətte s-Bilatəs i-ad-hasän-dd-isəwwəyy Bäryäbbas.

¹² Oläs dağ Bilatəs, inn'-asän: «Ma s-tärham ad-t-äjäğ i-wa s-itawänna ämänokal n-käl-Älyähud?»

¹³ Oläsän eğäri, jannen: «Itwəşləbet fäll-tajəttewt.»

¹⁴ Inn'-asän Bilatəs: «Mafäl, ma iyşäd t-äsiinäjjän d-taməttant?» Äşğäyyän däg-işənnawän: «Itwəşləbet fäll-tajəttewt.»

¹⁵ Äsof Bilatəs alkum i-erhet-näsän, äswäyy'-asän-in Bäryäbbas, äswäjjä tiwit s-ebärtäk däg-ÿisa təzzar, ikf'-asän-t i-ad-itwəşləb.

Asəmmädri wa jän əssärdusa i-ÿisa

(Mätti 27:27-31; Exya 19:2-3)

¹⁶ Əlwäyän əssärdusa wi n-gəfär ÿisa s-amməs n-ehän wa däg-iğattäs äššäreya, iyläyğäläy-t-dd dihen ejhän n-əssärdusa imdan,

¹⁷ əssəlsän-t anäkäbba šäggäğän, jän-as älmät, korona, a-wen, takənbut şund ta n-imänokalän, təzət däg-isənnanän,

¹⁸ ad-has-tajjän isofan, jannen-as: «Ämänokal n-käl-Älyähud, nəj'-ak gärdəbu.»

¹⁹ Hakkän-t tiwit s-täborit fäll-eğäf, situfän fälla-s, rakkäğän data-s, älmät ғabbädän-t.

²⁰ Əssəgdähän däg-tekäşkäšt ta tän-təşlät ғas, əkkäsän-dd fälla-s anäkäbba-wənnin šäggäğän, əsoğälän-as isəlsa-net təzzar, əzjārän dər-s ağrəm s-edägg wa-däg ila s-ad-däg-s itwəşləb fäll-tajəttewt.

† 15:1 15:1 A-wa älzämağät n-inušämän d-imizärän n-käl-Işrayil wa itirən äššäreya, əntäneğ a-s älqallitän, osayän dağ tamətte d-əlxəkum d-əddin.

*Atwəşləb n-ÿisa**(Mätti 27:32-44; Luqa 23:26-43; Exya 19:17-27)*

²¹ Eqlan dār-s a-s ämmoqqāsän d-Simyön wa n-tadābayt ta n-Qərwan n-abba n-Älxader d-Rəffus, ifal-dd işəkraş; äšhəşšälän-t alənji n-tajəttewt ta fäll-mad-itwəşləb ÿisa.

²² Äwwäyän ÿisa s-edägg wa s-itawänna Gälgota, a-wen, älmäyna-net: «Edägg wa n-akärkor.»

²³ Əssärtäyän-as-dd dihen asməd d-asəfar iyyän ifannäzän tissant dāx-taxəssa n-äwadəm mäšan, unjäy isw'-e.

²⁴ Əşläbän-t əssärdusa fäll-tajəttewt xas, jän tisəxeren i-ad-užanän isəlsa-net jer-iman-näsän, əlmədän əndek a-wa he-ikrəş hak iyyän dāx-sän.

²⁵ Agdölset a-s t-əşläbän fäll-tajəttewt, xur-ässaxət wa s-təzza.

²⁶ Əttəytäyän ällox jənnəj-s i-ad-əlmədän äddinät äddälil wa sār-s dd-orawän tamättant; ällox-en, iktab fälla-s:

«A-WA ÄMÄNOKAL N-KÄL-ÄLYÄHUD».

²⁷ Aşäl-en, ämizäyyen əssin inaxtafän atwəşləb d-ÿisa; ätwəşləb iyyän daw-aşil-net, ätwəşləb wa iyyädän daw-taşalje-net.

²⁸ A-wen-dāx jän i-ÿisa a-s ənnän əlkəttabän n-Mässinäx ad-äj fäl-a-s, iktab a-s:

«Ad-iđan dāx-iməddäxwa.»

²⁹ Iqqäl ÿisa tekäşkəšt i-äddinät-wi tikəynen, gaggärän-t, siwliwilän ixfawän-näsän, jannen-as: «Eyyaa, käyy wadden tənned täddobed teräzze n-ehän n-ämudd wa mäqqärän, taləsäd-t edey dāx-kərəđ işilan,

³⁰ əxləs ya iman-näk ämära, təzzəbbud-dd tajəttewt!»

³¹ Jän-t daş imänokalän n-käl-tikutawen d-älxulam n-Ättäwrät tekäşkəšt, tinmənnin: «Ənta-i ixləsän äddinät wi iyyädnen, indar-as ämära ad-işləs iman-net.

³² Kunta ənta a-s Ämaseş wa n-ämänokal n-Işrayil, izzubbətet-dd tajəttewt, ad-t-nənhəy, namən sār-s.» Jän-t wi ätwəşləbnen edes-has tekäşkəšt, ad-t-gaggärän əntəneđ-dāx.

*Iba n-ÿisa**(Mätti 27:45-56; Luqa 23:44-49; Exya 19:28-30)*

³³ Əlsänät tihay ärori n-əkall iket-dāx-net wa-dāx n-tarähut hundäx har tezzar.

³⁴ Təja tezzar xas, əşxärät ÿisa s-əşşahät, innä:

«Yälloy, Yälloy,

lama säbäxtani?»

A-wen älmäyna-net:

«Mässi-x Mässinäx, Mässi-x Mässinäx,

mafäl hi-tiyyəd d-iman-in

dāx-tissant-ta-dāx?»

³⁵ Əşlän-as äddinät əbdadnen dihen, wär-əfhemän a-wa ijänna xas, ad-jannen: «Säjdät-as, ännäbi ÿəli a işarr.»

³⁶ Oşäl-dd sār-s iyyän dāx-sän, issəlməş təduft tətälät fäll-äbəri dāx-bənegär, izzäl-as-tät i-ad-tät-isuməm, infəw-t a-wen dāx-fad, ihakk-as-tät dihen-dāx, ijänna: «Ad-nənhəy ya kunta ad-t-dd-ass ännäbi ÿəli, izəzzubbət-t-dd tajəttewt.»

³⁷ Əşxärät ÿisa s-əşşahät đarät-a-wen, əjmädän-t iman.

³⁸ Iqqärrawät älwäqq-wen-däx ärido wa ibdän däx-ehän n-ämudd wa mäqqärän, edägg wa šaddijän d-edägg wa iknän təšədje däx-ammās, wa-däx n-afälla-net har ider-net.

³⁹ Inhäy käbtän iyyän iswadän däx-Ŷisa a-s t-ijmäđ unfas a-wen ɣas, innä: «Tidət-däx a-s ähaləs-i-däx, Rure-s n-Mässinäx.»

⁴⁰ Əbdadnät daɣ dihen tiđeden tiyyäd däx-ijəj, əkyadnät däx-a-wa ijän. Tiđeden-en, h'-enät Märyäma ta n-Muläždaləyät, Märyäma ta n-ma-s n-Yaqub wa əndärrän d-Yusəf d-tiyyät s-isəm-net Sälma.

⁴¹ Əntänäteđ-en-däx ad-dd-äddewnen d-Ŷisa, wa-däx n-Galila, ədhalnät-t s-a-wa ətṭäfnät har əntänäteđ-da-däx; əbdadnät daɣ edes-hasnät tiyyäd äjjootnen dd-äddewnen d-Ŷisa a-s dd-ikka Yärussälam.

Azəkka n-Ŷisa

(Mätti 27:57-61; Luqa 23:50-56; Exya 19:38-42)

⁴² Tokäy takkäšt n-ašäl wa n-əlžəmət, sadaw tamətte i-ašäl wa n-əssəbət-i n-täsonfat,

⁴³ osä-dd Yusəf wa n-Arimata, ähaləs ätiwäsämyärän däx-inušämän n-Işrayil, ijar ätṭäma n-a-s təlcam Təmmənəya n-Mässinäx. Ənta-en-däx a ihälän tikawt n-Bilatəs, ittär däx-s tafəkka n-Ŷisa.

⁴⁴ Tofa täkunt n-armuđ n-tamättant n-Ŷisa Bilatəs, issäɣrä-dd käbtän iyyän i-ad-t-isəstən d-a-s tädduuttät tamättant-net meɣ?

⁴⁵ Ijä däx-s käbtän-en isälan n-a-s äba-t ɣas, issärräx-as ađkul n-tafəkka-net.

⁴⁶ Iglä Yusəf, izžənsä-dd tefit, ikkäs-dd tafəkka n-Ŷisa fäll-tajəttewt, ij'-et däx-tefit təzzar, issəns'-et däx-azəkka iɣaşän däx-esəwäl; äşɣäränɣarät đarət-a-wen təhünt mäqqoorät, ätṭubbät sār-s emm n-azəkka.

⁴⁷ Täjjəyha Märyäma ta n-Muläždaləyät d-Märyäma ta n-ma-s n-Yusəf i-a-wen-däx iket-net, əknänät asəbbuyən n-edägg wa däx-izka Ŷisa təzzar, əglänät.

16

Tanäkra n-Ŷisa jer-inəmmuttan

(Mätti 28:1-10; Luqa 24:1-12; Exya 20:1-10)

¹ Okäy əssəbət-i n-ašäl wa n-täsonfat ɣas, təžžənsä-dd Märyäma ta n-Muläždaləyät d-Märyäma ta n-ma-s n-Yaqub d-Sälma əlɣənfärän i-ad-əşwəynät sār-sän tafəkka n-Ŷisa.

² Tifawt n-älxad-i n-ašäl wa äzzarän däx-əssəboɣ, ɣur-ajmuđ n-täfukt, əkkänät azəkka.

³ Əglanät, tinmənninät jer-iman-näsnät: «Näkkänäteđ-i-däx, mi hanäɣ-e-ikkəsən təhünt ta mäqqärät təhärät emm n-azəkka?»

⁴ Əwwädnät-in ɣas, əkyädnät, ənhäynät a-s təhünt-tənnin mäqqärät, təɣiraräd-in.

⁵ Əjjäšnät ammas n-azəkka, ənhäynät ämawađ ilsan emäls mällän, äqqiima daw-aɣil-näsnät, tärtäy-asnät tarəmməxt d-täqqän n-eɣäf.

⁶ Mäšan, inn'-asnät ämawađ: «Wär täqqännet iɣäfawän-näkmät, wär tärmeɣmät, Ŷisa wa n-Näşirät ätwäşläbän s-tammäɣmät, inkär-dd jer-inəmmuttan, äbas t-illa diha; ənhəymät edägg wa s-käla däx-s insa.

⁷ Ämära, äkkəmät inəmmušal d-Bətrus, tənnəmät-as a-s äzzar-awän iket-nəwän s-Galila, dihen-däx ad-mad-t-tənhəyäm s-əmmək wa-däx s-käla hawän-tän-inna.»

⁸ Ezjarnät-dd azəkka ɣas, ošalnät, täšišäkădkăd-tănät tarəmmeyt tärtayät d-tăqqän n-eɣăf. Wăr t-illa ere s-ənnanät härät a-wa-dăɣ hasnät-ja tarəmmeyt.

Anfiləl wa dd-ija Țisa i-Măryăma ta n-Mulăždaləyät
(Mătti 28:16-20; Luqa 24:13-49; Exya 20:11-23)

[
⁹ Ašäl wa n-ălxad-i n-ašäl wa äzzarän dăɣ-əssəboɣ ad-dd-inkăr Țisa jer-inəmmuttan. Änfaläl-dd s-tizarät i-Măryăma ta n-Mulăždaləyät-i dăɣ-ikkäs əssa alšinän,

¹⁰ təglă, təj'-isălan dăɣ-ăddinät wi s-kăla äddewän d-Țisa-i s-a-s ităjj a-wen, ətəfän iba-net, äsniinän.

¹¹ Əslän a-s tənhay-t iddar măšan, unjäyän s-ad-tät-əfləsän.

Anfiləl n-Țisa i-əssin dăɣ-inalkimän-net
(Luqa 24:13-35)

¹² Issəkna Țisa iman-net ɗarät-a-wen i-əssin dăɣ-inalkimän-net əkkanen ejef. Änfaläl-asän-dd dăɣ-ini səl wənnin-dăɣ dd-änfaläl i-Măryăma.

¹³ Əqqälän Yărussălam, jän isălan dăɣ-imidiwän-năsän wi iyyădnen măšan, wăr tən-əfləsän əntăneɗ-dăɣ.

Ămašal wa issăylăf Țisa inəttulab-net
(Mătti 28:16-20; Luqa 24:36-49; Exya 20:19-23)

¹⁴ Änfaläl-dd Țisa ɗarät-a-wen i-inəttulab wi n-măraw d-iiyän dăɣ-ălwăqq d-ăžziimmăɣän, tamănsawän. Äklăwlăw fälla-sän dăɣ-təssəba n-iba immun-năsän d-tăɣart-ta jän ulhawän-năsän fäl-a-s, unjäyän əflăsän äddinät wi t-ənhăyenen, inkar-dd jer-inəmmuttan.

¹⁵ Inn'-asän: «Ămăra, äglät, ilalät äddunya iket-net, təxtəbăm Älənžil i-e d t-illăm ägg-adəm.

¹⁶ Wa omänän, ätwăsălmăɣ dăɣ-aman, ad-iɣləs; wa äsɣărän ulh-net, ad-t-iwăr udlem dat-Măssinăɣ.

¹⁷ Əntăneɗ-da härätän wi mad-ămašălän wi maden-amən: ad-əkkəsän alšinän dăɣ-ăddinät s-tărna n-isəm-in, ad-ămmăjrădän awalän äynaynen,

¹⁸ ətəfän taššălen dăɣ-ifassän-năsän, kud-əswän sunsəj-dăɣ, wăr hasän-e-iɣšəd härät, e-d äswărän ifassän-năsän imarhinän, ad-əzzəyän.»

Iqqäl Țisa išənnawän-i dd-ifäl
(Luqa 24:50-53)

¹⁹ Ij'-asän Țisa măjrăd-wen-dăɣ ɣas, imməɗkăl s-išənnawän, igl' äqqima daw-aɣil n-Măssinăɣ.

²⁰ Əglän inəttulab ɗarät-a-wen, ad-xatəbän isălan dăɣ-idăggan iket-năsän. Idhal-tän Emăli, isidəttut măjrăd-năsän s-ijitän n-Măssinăɣ wi tamašălän. Amin!]

Älönzil n-Ÿisa Älmasex wa iktäb Luqa

Äšajəš

¹ I-Täyofil wa ökney semɣar:

Ettärän äddinät äjjootnen, ad-əktəbän s-älmäɣna isälan wi jänen jerenäɣ,

² s-əmmək-wa-däɣ s-hanäɣ-tän-äsoyälän äddinät wi tän-ənhäyenen s-tittawen-näsän s-tizarät, ija Mässinäɣ imawayän n-mäjräd-net.

³ A-wen-däɣ a fäl näkk-däɣ, ijjäš-ahi-dd ənniyät n-ad-əmmäɣäɣ i-isälan-en-däɣ s-iyjän-iyjän ɣur-aläšäl-näsän, hundäɣ har ašäl-i-däɣ, i-ad-hakhasän-in-äjäɣ akätab äsisäjrähän,

⁴ tökkössäd äššäk a-s teɣäre ta tøjrawäd, tətbat.

Isälan wi ija änjälos däɣ-tiwit n-Exya

⁵ Äzzäman wa d-ämoos Harudəs ämänokal n-teje ta n-Älyähudəyät, ill'-e ähaləs iyjän däɣ-wi n-käl-tikutawen s-isəm-net Zäkärya, išɣal däɣ-ehän n-ämudd wa mäqqärän däɣ-taggayt n-käl-tikutawen ta n-ihäyawän n-Abya, isəm n-hänne-s Elizäbät, tahäyawt n-Harun a tämoos.

⁶ Oɣadän issənän-essän dat-Mässinäɣ, əttafän s-älxaqq färəðän d-alämärän n-Emäli,

⁷ mäšan wär len ara ed Elizäbät, täjjojra, täwwäd-tän-dd daɣ tušäre issənän-essän.

⁸ Ašäl iyjän dd-täqqäl tasəssäɣlit taggayt n-käl-tikutawen ta iha Zäkärya, išl'-e əššäɣəl-net dat-Mässinäɣ hundäɣ har fälla-s oðänät tisäyeren,

⁹ ämoos a-wen älyadät n-käl-tikutawen n-a-s afäl oðänät tisäyeren fäll-äwadəm, ənta a-madän-isəhhuh matälxer däɣ-ehän wa šaddijän n-Emäli.

¹⁰ Ašäl-en, isihəwhəw matälxer däɣ-ehän-en-däɣ, a-s itäjj a-wen-däɣ, älzämaɣät wa n-inaxbadän, itəddal Mässinäɣ dat-əmm n-ehän n-ämudd wa s-ijjäš Zäkärya ammas-net.

¹¹ A əndärrän, änfäläl-as-dd änjälos n-Emäli fäll-aɣil n-tasəskärt-ta fäll-tihuh matälxer.

¹² Inhäy Zäkärya änjälos ɣas, iggäd ənniyät, irmäɣ

¹³ mäšan, inn'-as änjälos: «Zäkärya! A-wa tətäräd däɣ-Mässinäɣ, ad-äj, hänne-k Elizäbät, ad-təkrəš ara, tøjəd-as isəm: Exya.

¹⁴ Ad-hak-umas əssəbab n-tedäwit d-tisrawt, səddəwət daɣ tiwit-net äddinät äjjootnen.

¹⁵ Ad-umas ere ilan isəm ɣur-Emäli d-idəm ɣur-Mässinäɣ, wär mad-isəw aman n-läɣnəb äxxiimmärnen wäl' asməd wäl' iyjän, ad-t-iðnəy Unfas Šaddijän n-Mässinäɣ härwa iha täsa n-ma-s.

¹⁶ Ənta a dd-madän-isuyəl a äjjeen däɣ-käl-Işrayil Emäli-näsän, Mässinäɣ,

¹⁷ ilköm-as s-ənniyät d-äššahät wa n-ännäbi Ƴəli i-ad-dd-isuyəl ulhawän n-abbatän aratän-näsän, əkrəšan iməkəddəlän tayətəta ta karräšan äddinät lanen idəm dat-Mässinäɣ, isəbdəd tamətəta täsidäwät i-ad-təlkəm i-Emäli.»

18 Innä Zäkärya ɗarät-a-wen i-änjālos: «Ǝndek a-wa s-mad-əlmədäx a-s a-wa hi-jānned tidət? Näkk, amyar wäššārān a ämoosäx, hānne-x ɗay ti-wäššārāt.»

19 Inn'-as änjālos: «A-wa näkk Žibril-wa s-härkuk əbdädäx dat-Mässināx, äšmašāl-ahi-dd sār-k i-ad-käy-dd-səssiwəɗäx isālan-wi-däx ähuskätnen.

20 Ämära, šāmad wār hi-təflesäd a-s hak-əmməjrädäx s-tizarät, ad-itwəttəf emm-nāk, ikrəs iləs-nāk hundäx har ašāl wa d-mad-itbatān isālan-wi-däx hak-jeɗ.»

21 A-s itājj a-wen-däx, tamətte täqqal i-Zäkärya, tof'-et tākunt n-a-wa t-in-išlān d-a-wa t-in-iṭṭafān.

22 Älwäqq wa dd-izjār, ittār ad-ämmäjräd i-äddinät māšan, indār-as, əlmädän a-s härät a has-dd-änfalälān däx-ehän-en-däx, ad-hasān-isitufəy i-ad-tān-isəfhəm a-wa ijān.

23 Issəmdä Zäkärya täqqān-net däx-əššäxəl ɗas, iqqäl ehän-net.

24 Təkräš hānne-s ɗarät-a-wen ənniyät ɗas, ja səmmos orān təffār iman-net däx-ehän-net,

25 janna: «Ǝnta da a-wa hi-ija Emāli-nin, ənta a däx-i dd-iswädän, ikkäs fäll-i tākrakiɗt ta ämoosäx jer-äddinät.»

Isālan-wi ija änjālos däx-tiwit n-Ÿisa Älmasex

26 Təjjäš Elizäbät ewār-net wa s-säɗis ɗas, äšmašāl Mässināx änjālos-net Žibril s-tayrəmt tiyyät s-itawānna Näširät hat teje ta n-Galila,

27 ässok'-e tämawaɗt wārät təzzey meddən s-isəm-net Märyäma, ittar ähaləs n-ahäya n-ämānokāl Dawəd s-isəm-net Yusəf.

28 Osä-dd änjālos Märyäma, inn'-as: «Ǝjeɗ-am äsafu kämm-i tənnefränät ed, təkräšäd idəm ɗur-Emāli-nām.»

29 Issärmäx-tät mäjräd-wen-däx, ad-tattār älmäxna n-manāwen-wa-däx.

30 Inn'-as änjālos: «Märyäma, wār tärmeɗäd, äzzäbbät-dd Mässināx ännuɗmät-net fälla-m,

31 kämm da-däx, ad-təkrəšäd ənniyät, təkrəšäd ara, təjəd-as isəm Ÿisa.

32 Ad-ikrəš isəm, iwār-t isəm Rure-s n-Mässināx wa iknān aɗkul, ad-äj Emāli Mässināx ətṭəbəl wa n-ämānokāl Dawəd-i t-äshäyāwān däx-ifassän-net,

33 ad-immukəl härkuk fäll-ehän wa n-ihäyawān n-Yaqub, tiɗlal təmmənukəla.»

34 Tənnä Märyäma ɗarät-a-wen i-änjālos: «Ǝndek əmmək wa s-e-äj a-wen ed näkk, wār-əzzeyäx meddən.»

35 Inn'-as änjālos: «Ad-fälla-m dd-izzubbət Unfas Šäddijän, täls'-im tärna n-wa iknān aɗkul, a-wen-däx a fäl ara wa šäddijän dd-e-iwən, ad-t-iwār isəm Rure-s n-Mässināx.

36 Ara n-meddən-nām, Elizäbät, wädden ti-wäššārät māšan, ad-təkrəš ara ənta-däx, ənta-i s-kāla tämoos teməjjejrut, ha ämära ewār-net wa s-säɗis

37 ed, wār t-illa a-s wädden äddoobät-t Mässināx.»

38 Tənn'-as Märyäma: «Näkk, taklit n-Emāli, itwəjjet-ahi a-wa s-tənned.» Ifäl-tät änjālos ässaɗät-wen-däx, iglä.

Təkkä Märyäma Elizäbät

39 Təkkä Märyäma išilan-win-däx tayrəmt tiyyät n-kāl-Yähuda hat iɗayän.

40 Täwwäɗ-in ehän wa n-Zäkärya, ad-tinməjj isofan d-Elizäbät.

⁴¹ Diha-däx d-has-təja Märyäma äsafu, ad-iggäd, ixbär-tät alyaḍ wa ihän täsa-net, idnäy-tät Unfas Šaddijän älwäqq-wen-däx.

⁴² Təḍkäl Elizäbät emäsli-net, tənnä: «Təndəḍ-am kämm jer-tiḍeḍen, təndəḍ daḡ i-ara wa ihän täsa-näm.

⁴³ Ənta näkk-i-däx, ma ämoosäḡ tis-ahi-dd anna n-Emäli-nin?

⁴⁴ Ijmaḍ-t äššäk a-s diha-däx d-əslänät timəzzujen-in i-äsafu-näm, ad-iggäd ara-wa ihän täsa-nin s-tedäwit.

⁴⁵ Təndəḍ-am kämm-i təfläsät a-s Emäli a ijän-däx, ilkam ḡas, ad-isətbət a-wa s-ijjaš ärkäwäl-net.»

Təmmal n-Märyäma i-Mässinäḡ

⁴⁶ Tənnä Märyäma:

«Timələn iman-in təmḡäre n-Emäli,

⁴⁷ äddiwät ulh-in fäl tössəba n-a-wa hi-ija Mässinäḡ-i n-Ämaylas-in.

⁴⁸ Ikyäd-dd däx-təmmäḍrit n-taklit-net.

ḡur-ašäl-i-däx, e d t-illäm ere ilkamän fäll-ärori n-äkall, ad-hi-änn: «Təndəḍ-am»

⁴⁹ fäl-a-s, Wa ilän tärna, ij'-ahi a äjjeen, šaddij isəm-net.

⁵⁰ Tähanint-net tənsa fäll-əzzurəyatän ti t-äksuḍnen däx-iwətyan iket-näsän.

⁵¹ Issəkna tärna n-äfuss-net, äsmäḍräy s-äššahät-net äddinät wi iha əttəkəbru,

⁵² ikkäs-dd daw-käl-äššahät təmmənukəla-näsän, issəfrär tilaqqiwen,

⁵³ äsyäwän iməlluza däx-a-wa äzedän, äsḡär ifassän n-käl-ehäre.

⁵⁴ Idhäl käl-Işrayil-i n-eklan-net, wär hin-iṭṭef fälla-sän tähanint-net

⁵⁵ ed, ämoos a-wen ärkäwäl iḡlalän ijjaš i-imärawän-nänäḡ wi n-ibda s-əmmək wa s-t-ija i-Ibrahim d-ihäyawän-net.»

⁵⁶ Təzzäḡ Märyäma ḡur-Elizäbät har tässakäy əḍḍəkuḍ n-käraḍ orän təzzar, täqqäl ehän-net.

Tiwit n-Exya wa n-Enəsselmäḡ

⁵⁷ Täwwäḍ-dd täqqän ta däx-jarräw Elizäbät eḡäf-net, təkräš ara n-eyy.

⁵⁸ Əslän änhärajän-net d-išäqqaqän-net tihusay n-a-wa has-ija Emäli ḡas, ohärän dār-s tedäwit ta ja.

⁵⁹ Ikräš ara əttam išilan ḡas, ämeläy, jän-as äddinät isəm Zäkärya i-ad-umas anəmmäḡru n-ti-s

⁶⁰ mäšan, tənn'-asän ma-s: «Äbo! Iwäret-t isəm Exya.»

⁶¹ Əggädän-dd sär-s äddinät, ənnän-as: «Wär t-illa äwadəm däx-ihänan-näwän iwar isəm-wen-däx.»

⁶² Ästafäyän i-ti-s n-alyaḍ i-ad-änn ənta isəm wa s-irha ad-iwär rure-s.

⁶³ Ästafäy-asän i-ad-t-dd-əkfən a fäll-iktäb, iktäb-asän fälla-s: «Isəm-net: Exya.» İqqälän-dd äddinät ḡas oran imawän.

⁶⁴ Ämera iləs n-Zäkärya älwäqq-wen-däx, ad-itamäjrad, itiməl Mässinäḡ.

⁶⁵ Tärmäs tukseḍa n-Mässinäḡ äddinät-wi əzzäḡnen däx-attayän-en-däx d-käl-iḍaḡän wi n-Älyähudəyät, ad-timsiḡulän isälan-wi-däx.

⁶⁶ Ǝttāfān äddināt iket-nāsān wi əslānen a-wa ijān dāḡ-ulhawān-nāsān, äqqimān-dd ḡas, jannen: «Ak ara-wa-dāḡ, ma mad-umas?» Ara-i, äsiwār-t Mässināḡ äfuss-net.

Äloläy Zäkärya s-tärna n-Unfas Šäddijän

⁶⁷ Zäkärya-i n-ti-s n-alyaḡ, iḡkār-t Unfas Šäddijän, äloläy, inna:

⁶⁸ «Təmmal i-Emāli-i n-Ämakraš n-Išrayil fäl-a-s, ənta, ad-dd-iššärjäšān tamətte-net, äsdärf'-et.

⁶⁹ Äsfäqqāt-anāḡ-dd isək n-əlyəllas dāḡ-ehān n-akli-net Dawəd.

⁷⁰ A-wen äru tän-inna Mässināḡ s-imawān n-ännäbitän-net wi n-iməššeddəjä.

⁷¹ Issəlmäd-anāḡ a-s ad-hanāḡ-agəz dāḡ-išənja-nānāḡ, ikkəs-anāḡ dāḡ-ifassān n-imiksānān-nānāḡ iket-dāḡ-nāsān.

⁷² A-wen-dāḡ a fäl oḡān tāhanint i-abbatän-nanāḡ wi n-ibda, iktä-dd ärkāwāl-net wa n-tassaḡt šäddijän hasān-ijjāš.

⁷³ Ämoos a-wen tahude ija i-abba-nānāḡ Ibrahim

⁷⁴ a-s has-innä, ad-hanāḡ-agəz dāḡ-išənja-nānāḡ, ad-nəzzaḡ jere-sān māšan, wār tän-näksuḡ.

⁷⁵ A-wen ij'-e, i-ad-t-nāḡbəd hak ašäl dāḡ-təšədje d-iqqud dāḡ-tuksəḡa-net.

⁷⁶ Käyy daḡ i n-rure-ḡ, ad-käy-iwār isəm ännäbi n-Mässināḡ wa iknān aḡkul, käyy a-madān-izar i-Emāli i-ad-təknəd ibaran-net,

⁷⁷ səlmədäd äddināt-net s-əlyəllas wa t-illān ḡur-Mässināḡ i-tenäšše n-ibäkkadān-nāsān

⁷⁸ fäl-a-s, Mässināḡ oḡān-anāḡ tāhanint.

Dāḡ-idəm n-ehäf n-ärräxmät-net,

ad-hanāḡ-dd-isəssiwoy Ämaḡlas olähān d-täfukt dd-təjammädät isənnawān

⁷⁹ i-ad-impləwləw ännur-net fäll-äddināt wi äqqimānen dāḡ-tihay,

han tele ta n-tamättant, i-ad-hanāḡ-išärjəš dāḡ-tabarät ta n-älxer.»

⁸⁰ Idaggäl Exya, tiwwad tayətte-net, izzay tinariwen hundāḡ har ašäl wa t-dd-äšmašäl Mässināḡ s-käl-Išrayil.

2

Tiwit n-Yisa Älmasex (Mätti 1:18-25)

¹ Äzzāman wa d-äsiḡabäl Qäyšär Ojärtän e d t-illām ämänokal, omär s-ad-tiḡān tamətte fäll-ärori n-äkall.

² Täḡint-ten-dāḡ täzzarät, təja dāḡ-äzzāman wa d-ämoos Kirənyus gəfär n-teje ta n-Surya.

³ Dāḡ-təssəba n-a-wen-dāḡ inn' ämänokal wa mäqqārān, a fäl hak äwadəm, iqqäl taḡrəmt-ta dāḡ-iwa i-ad-iḡān.

⁴ Ifäl-dd Yusəf taḡrəmt ta n-Näširät häť teje ta n-Galila, ikkä taḡrəmt n-amḡar-net Dawəd ta s-itawānna Bätlehäm häť teje ta n-Älyähudəyät, ed ahäya n-Dawəd a ämoos,

⁵ i-ad-iḡān ənta d-Märyäma ta n-tämutärt-net-i s-a-s itäj a-wen-dāḡ, la ənniyät.

⁶ Han tayrømt-ten-däx, a-s dd-tosa täqqän ta däx-jarräw Märyäma eyäf-net.

⁷ Təjräw eyäf-net, təkräš teḡäfädde-net, tətäl-t däx-ikäršäyän, tössəns'-e däx-efäyd fäl-a-s, ehän wa n-imäjarän, äbas t-ihä edägg.

Anfiləl wa dd-ija änjälos i-imädanän

⁸ Äkall-en, han-t imädanän ässinbärnen irözzejän-näsän däx-isalwan illa-hin i-ayrøm sihen.

⁹ A əndärrän, ibdäd-dd änjälos n-Mässinäx data-sän, äsmäläwlaw-dd älxurmät n-Emäli edägg wa hän, əknän-däx tarəmməxt

¹⁰ mäšan, inn'-asän änjälos: «Wär tärmeḡäm, ənhəywät, äwwayäx-awän isälan n-älxer maden-umas əssəbab n-tedäwit i-tamətte iket-däx-net.

¹¹ Ašäl-i, iw'-awän Ämaḡlas däx-tayrømt ta n-ämänokal Dawəd, ənta a-s Älmasex n-Emäli.

¹² Ənta da a-wa s-t-mad-təzzəyäm: ad-tənhəyäm ara s-iket iwa, ittal däx-ikäršäyän, insa däx-efäyd.»

¹³ Diha-däx d-issəmdä änjälos tənna n-a-wen-däx, ad-dd-äddew abrək n-änjälosän timəlnen Mässinäx, jannen:

¹⁴ «Təmmal i-Mässinäx däx-išənnawän,

älxer ija fäll-äröri n-äkall

i-äddinät-wi fäll-tənsa tärha-net.»

Tikawt n-imädanän i-Bätlehäm

¹⁵ Əqqälän änjälosän išənnawän ḡas, änmännän imädanän: «Adiš, näkket Bätlehäm i-ad-nənhəy a-wa ijän d-a-wa hanäx-issəlmäd Emäli.»

¹⁶ Äšwänken älwäqq-wen-däx, ogäzän-in dihen Märyäma d-Yusəf d-ara wa s-iket iwa, insa däx-efäyd.

¹⁷ Ənhäyän-t imädanän ḡas, äsoḡälän i-äddinät a-wa hasän-ätwännän fäll-ara wa əndärrän.

¹⁸ Äkunän äddinät iket-näsän wi əslänen i-a-wa ənnän imädanän

¹⁹ mäšan, Märyäma-i n-ma-s n-alyaḡ, tətṡäf isälan-win-däx iket-näsän däx-iman-net, siməktəw-tän däx-ulh-net i-ad-təlməd älmäḡna-näsän.

²⁰ Əqqälän imädanän qarät-a-wen, ad-samḡarän Mässinäx, tiimələn-t fäl tössəba n-a-wa əslän d-a-wa ənhäyän s-əmmək-wa-däx s-hasän-ätwänna.

²¹ Ikräš ara əttam išilan ḡas, ämeläy, jän-as isəm Ḳisa, isəm wa s-hasän-innä änjälos ad-has-t-əjən härwa wär-iwa.

Amiwi n-Ḳisa s-ehän n-ämudd wa mäqqārän

²² Däx-isälan n-a-wa tənna Äṡṡawrät ta n-Mosa, äddew Yusəf d-Märyäma s-ehän n-ämudd wa mäqqārän ihän Yärussälam i-ad-šəšdəjän iman-näsän, äwwäyän daḡ ara i-ad-t-säḡləfän tärna n-Emäli

²³ fäl-a-s, iktab däx-älämär n-Emäli a-s: «Alyaḡ n-eyy wa n-teḡäfädde, umaset eməššeddəj n-Mässinäx.»

²⁴ Däx-isälan n-ašəšdəj n-iman-näsän, lan s-ad-əjən takute n-sänatät tidäberən däx-ti n-əroj meḡ daḡ sänatät mällolnen däx-ti n-ayrøm ed, a-wen-däx a iktabän däx-älämär n-Emäli.

Tittar ti ija Šämḡun wa wäššärän i-Ḳisa

²⁵ A əndärrän ähaləs iyyän da-däx izzaxän Yärussälam s-isəm-net Šämḡun. A ija a-wa-däx, ijar äṡṡama n-əḡəllas wa s-inna Mässinäx i-Işrayil, ässinsa daḡ Mässinäx Unfas Šäddijän fälla-s.

26 Äru d-has-dd-änfaläl Mässinäx däx-täharjit, ijjäs-as ärkawäl s-tärna n-Unfas Šaddijän n-a-s wär mad-ämmät wär-inhey Älmasex n-Emäli.

27 Ašäl-en-däx, imhät-t-dd Unfas Šaddijän s-ehän n-ämudd wa mäqqärän i-ad-imzöyyöt d-imärawän n-Ÿisa älwäqq wa d-tajjän a-wa fälla-sän irha älyadät däx-isälan wi n-ihuk-net i-Mässinäx.

28 Irmäs-t-dd Šämyun däx-ifassän-näsän, ad-itiməl Mässinäx, ijanna:

29 «Emäli!

Ämära, ärmös unfas däx-akli-näk
i-ad-igəl däx-älxer ed, a-wa s-has-tönned, ijä.

30 Äjjunfänät tiṭṭawen-in däx-əlyəllas-näk

31 wa dd-täsmäjned i-äddunya iket-däx-net.

32 Əlyəllas wa s-ənta a-s ännur i-inəzzulam†

i-ad-hasän-dd-tənfilölöd,
ämoos älxurmät-näk i-käl-Išrayil-i n-tamötte-näk.»

33 Iqqäl-dd ti-s d-ma-s ɣas tof'-en təkunt n-a-wa itawännən fäll-alyaḍ-i-däx.

34 Ittär Šämyun ḍarät-a-wen a däx-sän ijän älbäraka təzzar, innä i-Märyäma-i n-ma-s: «Alyad-i, ənhöy, äsnäfrän-t Mässinäx i-ad-umas tebädde d-əjadäl i-käl-Išrayil, umas daɣ əssəbab n-tamɣənnant i-äddinät äjjootnen.

35 Däx-təssəba-net, ad-dd-iffukkär a-wa ihän ulhawän n-äddinät äjjootnen. Kämm daɣ, ad-ham-umas əssəbab n-uɣšad n-iman olähän d-tidij n-täkoba.»

Tajuhe n-Hännätu ta n-tännäbit

36 Äzzäman-en, töll'-ee tännäbit təknaṭ tušäre la tawset ta n-dägg-Äšir s-isəm-net Hännätu wälät Fanwäl. Däx-təmmädrit-net, käla tät-iḍäs adubən däx-təja əssa iwətyan,

37 äb' ähaləs-net ɣas, täqqiimä-dd, wär toles adubən, la ämära-däx a iwwädän əttamät timərwen n-awätay d-əkkoz. A ija a-wen-däx, käla wär fel ehän n-ämudd wa mäqqärän, ehäḍ d-ašäl ɣabbäd Mässinäx, täxdamas, tuzam.

38 Ässaɣät-wen-däx ad-dd-tosa ənta-däx, ad-tiiməl Mässinäx, tajj isälan n-Ÿisa i-äddinät iket-näsän wi järnen äṭṭäma n-ad-dd-izəzzubbət Mässinäx tädarfit-net fäll-Yärussälam.

Təmmiwəḍa n-Ÿisa

39 Əssəmdän imärawän n-Ÿisa a-wa fälla-sän ifrəḍ alämär n-Emäli ɣas, əqqälän taɣrəmt-näsän Näširät, däx-teje ta n-Galila.

40 Idaggäl Ÿisa, itişuhut, itəggar-t sārho däx-isälan n-a-wa irha Mässinäx fäll-ägg-adəm, ikna daɣ fälla-s Mässinäx asəns n-ännuɣmät-net.

Ikräš Ÿisa märaw iyətwan d-əssin

41 Hak awätay, əkkan imärawän n-Ÿisa Yärussälam i-ämudd wa n-Faška.

42 Ikräš Ÿisa märaw iwətyan d-əssin ɣas, äddewän dər-s ed, a-wen-däx, a innä älyadät n-ämudd.

† 2:32 2:32 — ɣur-käl-Älyähud, ere wärän ämoos ägg-Älyähud s-aläsäl meɣ ere wärän ilkem i-äddin-näsän, iket-net, änəzzalim a ämoos. A-wen-däx a fäl tiwsaten ti iyyädnen iket-näsnät, ti n-inəzzulam. — Ašäl-i-däx, änəzzalim, äkafär (ere wärän issen s-Mässinäx).

⁴³ Ässakäyän ämudd dihen ɣas, əqqälän ihānan-nāsän mäšan, äqqiima-hin ʃisa ɗara-sän dāɣ-Yārussālam. Wār t-odenän hundäɣ har hin-əjrähän a-s wār ɗār-sän äddew.

⁴⁴ Ʒjān ašäl imdan n-asikəl ija ɣur-sän a-s äddew d-iməssukal-wi iyyādnen ɗār-sän ohärnen tabarät, əjrähän-in a-s wār ɗār-sän äddew ɣas, əqqälän dāɣ-adäriš-nāsän, ad-has-tammäɣän ɣur-išäqqaɣän-nāsän d-imuzäyän-nāsän

⁴⁵ mäšan, äba-hasän-t hundäɣ har hin-əwwäɗän Yārussālam.

⁴⁶ Šāmad okayän kəraɗ išilan ad-t-əjrāwän āniɣäyma dāɣ-ehän n-ämudd wa mäqqārän d-älɣulam n-Ätṭāwrät, äsijād-asän tafässarän əlkəttabän n-Mässinäɣ, isastan-tän.

⁴⁷ Äkunän äddinät iket-dāɣ-nāsän wi sallänen i-a-wa ijānna dāɣ-tayəttenet d-älwižabän-net.

⁴⁸ Älwäqq wa d-t-ənhäyän imärawän-net dihen, äqqänän iɣāfawän-nāsän, tənn'-as ma-s: «Alyad-in, ma ämoos a-wa hanäɣ-jed? A ija a-wa dāɣ, nətammäɣ-ak näkk d-abba-näk ed näɣel asujjəl a jed.»

⁴⁹ Inn'-asän: «Mafäl hi-tammäɣäm, ajän wār tessenäm a-s ley s-ad-hi-əšləwän əššäɣəlän n-Abba-nin dāɣ-ehän-net?»

⁵⁰ Wār t-illa a əjrahän dāɣ-a-wa hasän-innä.

⁵¹ Äddew ɗār-sän ɗarät-a-wen s-Näširät, äqqim isajād i-a-wa hasjannen. Təṭṭaf anna-net härätän-winnin-dāɣ, wār tän-ihā-i hin-tatāwa.

⁵² Idaggäl ʃisa dāɣ-eɣäs-net, itisärhut, ijraz i-Mässinäɣ hakd dägg-adəm.

3

Älxuṭbät wa ija Exya wa n-Enəsselmäɣ (Mätti 3:1-12; Marqəs 1:1-8; Exya 1:19-28)

¹ Awätay wa s-märāw d-səmmos dāɣ-təmmənukəla n-Qäyšär Tibäryus, ämoos Bunəs Bilatəs gəfär n-teje ta n-Älyähudəyät, ämoos Harudəs ämänokal n-teje ta n-Galila, äñña-s Fəlibb äminakäl fäll-Taräkunit d-Ʒyyadurəya, Lisanyas ənta äminakäl fäll-äkall wa n-Abila.

² Äzzāman-en, Hənnan d-Qayāf a äminakäl-nen fäll-käl-tikutawen. Išilan-win-dāɣ, ad-imməjräd Mässinäɣ i-Exya ägg Zäkärya dāɣ-tenere.

³ Ikk' Exya ɗarät-a-wen ikallän iket-nāsän wi hänen attayän n-əjäns wa s-itawänna ʃurdəni. Ixaṭṭāb, ijanna i-äddinät: «Utabät, tət-wəsəlmäɣäm dāɣ-aman i-ad-təjrəwäm tenäšše n-ibäkkadän.»

⁴ A-wen-dāɣ išlän Exya, a iktabän dāɣ-əlkəttab wa n-ännäbi Sayat† älwäqq wa d-inna dāɣ-s:

«Säjdät, ija emäsli iyyän ijannen:

<A-wa emäsli ässewälän dāɣ-tenere,

äknät tabarät n-Emäli,
səssiɣədät ibaran data-s.

⁵ Iɣəšran-wi ɣäšnen, ad-ənbəlän,
iɗayän d-ijefän, ad-aləmən,
ibaran-wi äkränbäynen, ad-ayədən,
tabaräten-ti ärbäɣrəbäɣnen, ad-agdähñät,

⁶ e d t-illām ägg-adəm,
ad-inhöy əlɣəllas wa dd-äzzäbbät Mässinäɣ.> »

† 3:4 3:4 A-wa ännäbi dd-äzzarän i-ʃisa, äloläy dāɣ-isālan-net əssayät timad n-awätay dat-tiwit-net.

⁷ Osän-dd äddinät äjjootnen ärhanen ad-tän-isəlmäx Exya dəx aman, inn'-asän: «Ya taššälen-i-däx! Wädden tənnäm təmsädäm! Eyya, a tärham ad-tətwəsəlmäxäm i-ad-təfləm daw-äššärexa n-Mässinäx wa s-išwar fälla-wän dd-oða. Ləxätät-ahi, mi käwän-issəlmädän s-a-wen?»

⁸ Sətbətäm tätubt-näwän s-imärkedän, təyyəm fälla-wän tənna n-a-s əzzurəyät n-Ibrahim a nämoos ed afäl täqqäl s-isälan n-əzzurəyät xas, äyyät-ahi ad-hawän-ännäx a-s: Mässinäx, äddoobät ad-isəmməskəl tihun-ti-däx hannäyäm, ixlək-dd dəx-snät əzzurəyät i-Ibrahim.

⁹ Äjät ənniyät fäl-a-s emm n-tutäla äru d-insa fäll-ikewän n-ihəşkan, e d t-illäm ahəşk wärän itirəw aratan ih'-älfäyda, ad-hin-ättänkäd, itwəjar-in dəx-efew.»

¹⁰ Əssəstänän-t äddinät wi has-äsijädnen, ənnän-as: «Ma s-nəla s-ad-t-näj?»

¹¹ Äwwežäb-asän, inn'-asän: «Ere dəx-wän ilän əssin imälsan, äkfet iyyän i-wa wärän ila wäl' iyyän, wa ilän a ikša, äkfet ere wa t-wärän ila.»

¹² Osän-t-dd dərät-a-wen inarmasän n-tiwse i-ad-tän-isəlmäx dəx-aman, ənnän-as: «Älyalim, ma s-nəla s-ad-t-näj?»

¹³ Inn'-asän: «Wär tətteräm dəx-äddinät ar a-wa s-omär əlxəkum.»

¹⁴ Əssəstänän-t əssärdusa, ənnän-as: «Näkkäned-i-š, ma hanäx-iwarän?» Inn'-asän: «Wär tohexäm äwadəm, wär təssədlämäm äwadəm s-bahu, äjät ärramät dəx-timzäl-näwän.»

¹⁵ Äddinät iket-dəx-näsän wi əslänen i-a-wa ijänna Exya, jərän ätṭama, ad-tinməsəstinän kunta wädden ənta-i-dəx a-s Älmasex.

¹⁶ Äwwežäb-asän, inn'-asän: «Näkk, aman a dəx-käwän-salmaṭəxə māšan, ilkam-ahi ähaləs hi-ijan mijraw wa-dəx s-wär-änhäjjäx wälä-dəx d-ad-ədəsəx issal n-tifädelen-net, ənta ad-käwän-isəlmäx dəx-Unfas Šäddijän d-efew i-ad-hin-istəb a-wa läbasän.

¹⁷ İtṭaf tesäyt-net ta s-hin-e-izzuzzär allon-net, isədəw allon wa oläxän, äj'-e dəx-əjänd-net, irməs ahoşär wa wärän infa härät, äj'-e dəx-efew ähijäljälän härkuk.»

¹⁸ İkk' Exya dədi, itajj isälan n-älxer n-Älənžil-wi-dəx, isamətar dəx äddinät s-älməxnatän äjjootnen.

¹⁹ Äzzäman-en-dəx, ad-äsmähäd Exya fäll-ämänokal Harudəs İntibbas dəx-isälan n-Härudəyyas ta n-hänne-s n-ənṭa-s Fəlibb dəx-s ohäx, illäxät-as dəx ibäkkadän äjjootnen äməşäl səl wen-dəx.

²⁰ Ässewäd Harudəs fäll-a-wen-dəx iket-net iji n-Exya dəx-takärmüt.

*Atwəsəlməx n-Ḳisa dəx-aman
(Mätti 3:13-17; Marqəs 1:9-11)*

²¹ A-wen-dəx iket-net, ija dərät a-s ässilmäx Exya äddinät äjjootnen d-Ḳisa iman-net dəx-aman. Älwäqq wa d-ititwəsəlməx Ḳisa, itəddal Mässinäx dihen-dəx a-s dd-ämerän isənnawän,

²² äzzubbät-dd fälla-s Unfas Šäddijän dəx-ännux n-tedäbert mällät, ijmäd-dd eməsli isənnawän, innän:

«Käyy-i-dəx a-s Rure-x wa əkneex tärha, käyy a dəx-äsriwän iman-in.»

*Ätṭarex n-Ḳisa Älmasex
(Mätti 1:1-17)*

²³ Ila Ƴisa ədǝkuǝ n-kərəǝt timərwen n-awətay a-s issənta əmašal-net, ija xur-əddinət iket-nəsən wi t-hannäyнен a-s rure-s n-Yusəf wa n-əgg Xali.

²⁴ Xali ənta, əgg Mätata, Mätata əgg Lewi, Lewi əgg Mälki, Mälki əgg Ƴännay, Ƴännay əgg Yusəf,

²⁵ Yusəf əgg Mətašiyas, Mətašiyas əgg Ƴämmosa, Ƴämmosa əgg Nəxwama, Nəxwama əgg Xäšli, Xäšli əgg Naggay,

²⁶ Naggay əgg Mätti, Mätti əgg Mətašiyas, Mətašiyas əgg Šəmxi, Šəmxi əgg Yosəx, Yosəx əgg Yoda,

²⁷ Yoda əgg Exya, Exya əgg Ƴisa, Ƴisa əgg Žərrubabil, Žərrubabil əgg Äššəlat, Äššəlat əgg Näyri,

²⁸ Näyri əgg Mälki, Mälki əgg Äddi, Äddi əgg Kosəm, Kosəm əgg Älmädäm, Älmädäm əgg Err,

²⁹ Err əgg Ƴisa, Ƴisa əgg Ƴəlyazər, Ƴəlyazər əgg Yurim, Yurim əgg Mätata, Mätata əgg Lewi,

³⁰ Lewi əgg Simyon, Simyon əgg Ƴähuda, Ƴähuda əgg Yusəf, Yusəf əgg Yonəm, Yonəm əgg Ilyakim,

³¹ Ilyakim əgg Mälaya, Mälaya əgg Mäyna, Mäyna əgg Mätata, Mätata əgg Natan, Natan əgg Dawəd,

³² Dawəd əgg Isaya, Isaya əgg Äxbäydi, Äxbäydi əgg Boxaz, Boxaz əgg Sala, Sala əgg Nasun,

³³ Nasun əgg Aminədab, Aminədab əgg Ädmin, Ädmin əgg Arni, Arni əgg Xäšrun, Xäšrun əgg Faris, Faris əgg Ƴähuda,

³⁴ Ƴähuda əgg Yaqub, Yaqub əgg Isxaqq, Isxaqq əgg Ibrahim, Ibrahim əgg Taräxa, Taräxa əgg Naxur,

³⁵ Naxur əgg Sarux, Sarux əgg Raggəw, Raggəw əgg Faləx, Faləx əgg Ƴəbbir, Ƴəbbir əgg Saləx,

³⁶ Saləx əgg Käynəm, Käynəm əgg Arfəxšad, Arfəxšad əgg Səm, Səm əgg Nox, Nox əgg Laməx,

³⁷ Laməx əgg Mätussaləm, Mätussaləm əgg Inuk, Inuk əgg Yarət, Yarət əgg Məxləlyil, Məxləlyil əgg Käynəm,

³⁸ Käynəm əgg Anuš, Anuš əgg Šətti, Šətti əgg Adəm, Adəm ənta, Məssinəx a t-dd-ixləkän.

4

Ažurrəb wa ija Iblis i-Ŷisa
(*Mätti 4:1-11; Marqəs 1:12-13*)

¹ A-s dd-ifäl Ŷisa ejänš wa n-Ŷurdəni, idkar Unfas Šaddijän s-aššahät. Unfas-en-däy a t-oyädän s-tenere.

² Ijä dihen əkkožät timərwen n-ašäl itizərrub-t Iblis. Täqqän-ten-däy, ij'-et iket-net wär t-illa a ikkan emm-net təzzar, əlluz.

³ Os'-e hi-dd Iblis, inn'-as:

«Šamad käyy a-s Rure-s n-Mässinäy, amär i-tähunt-ta-däy ad-tumas tajəlla.»

⁴ Äwwežəb-as Ŷisa, inn'-as:

«Iktab däy-məjräd n-Mässinäy:

<Tämudre n-əgg-adəm, wär təmda fäll-tetäte ɣas.> »

⁵ Iwwäy-t Iblis s-edəgg iknan aɖkul, issəkn'-e däy-ešəfälli n-titt, e d t-illäm əddəwəl iwarän ərori n-əkall,

⁶ inn'-as əməra:

«Ad-käy-əkfäy tärna d-təmyär fäll-əddəwəlän-wi-däy hannäyäd iket-näsän fäl-a-s i-nin, hakkäy-tän daɣ i-ere wa s-ərheɣ,

⁷ a-wen-däy a fäl, hakkäy-ak-tän iket-näsän afäl hi-täybädäd.»

⁸ Äwwežəb-as, inn'-as: «Iktab däy-məjräd n-Mässinäy a-s:

<Emäli-näk Mässinäy a dat-e-tärkäɣäd, ənta ɣas a fälla-k ilan əlyibadät.> »

⁹ Iwwäy-t Iblis ɖarät-a-wen s-Yərussəlam, issəbdäd-t fäll-afälla n-ehän n-əmudd wa məqqārən təzzar, inn'-as:

«Šamad käyy a-s Rure-s n-Mässinäy, äyy iman-näk s-əkall ed, iktab däy-edəgg iyyän däy-məjräd n-Mässinäy a-s:

¹⁰ <Ad-dd-išəmmišəl ənjəlosän-net

i-ad-käy-agəzən däy-əšsar,

¹¹ əkbəlän-käy däy-ifassän-näsän

i-ad-wär hak-rässəl wəla-däy təhunt tiyyät ɣas.> »

¹² Inn'-as Ŷisa: «Iktab däy-məjräd n-Mässinäy a-s:

<Wär-e tarməd Emäli-näk Mässinäy.> »

¹³ Äžžurrəbät-t Iblis s-a-wa s-əddobät iket-net, indär-as ɣas, ujoj-t, ad-isiməqqul i-ad-sär-s ijərəw taffawt tiyyät daɣ.

Sənto n-əlxidmət n-Ŷisa däy-teje ta n-Galila
(*Mätti 4:12-17; Marqəs 1:14-15*)

¹⁴ Iqqäl Ŷisa ɖarät-a-wen teje ta n-Galila, toyad-t tärna n-Unfas Šaddijän däy-a-wa itəjj, intəj isəm-net däy-teje-ten-däy iket-net.

¹⁵ Isaɣra əddinät däy-ihənan n-əddin wi n-käl-Əlyəhud, əssiimɣərən-t əddinät iket-nəsän.

Təɣart n-ulh n-käl-Nəširät
(*Mätti 13:53-58; Marqəs 6:1-6*)

¹⁶ Ifäl Ŷisa dihen, ikkə tayrəmt ta n-Nəširät-i-däy idwəl, ij'-e ašäl wa n-əssəbət-i n-təsonfat, ikk' ehän n-əddin wa n-käl-Əlyəhud ed, a-wen-däy a-s izzay ad-t-əj.

¹⁷ Təddalän əddinät Mässinäy dihen-däy a-s ibdäd Ŷisa jere-sän, əkfän-t əlkəttab wa n-ənnəbi Saya† i-ad-hasän-däy-s iɣär. Ikkəs-in i-əlkəttab aɖ wa ija təzzar, or'-e däy-edəgg wa däy-iktəb:

† 4:17 4:17 A-wa ənnəbi dd-əzzarən i-Ŷisa, əloläy däy-isəlan-net əssayät timad n-awätay dat-tiwit-net.

18 «Insa fäll-i Unfas n-Emäli,
 äsnäfränän-ahi
 i-ad-äjäx isälan n-Älənžil i-tiläqqiwen,
 äšmašäl-ahi-dd i-ad-äjäx isälan i-wi hänen tikärmuten,
 əjrəwän iman-näsän,
 zuzəyäx iməddorçal,
 səddärfəx äddinät-wi ätiwäkräšnen,

19 zəzzubbəx-dd awätay n-ännuymät n-Emäli fäll-ärori n-äkall.»

20 Issəmdä Yisa teğäre ɣas, iɣfäl əlkəttab, ässoɣäl-t i-änaxdim-wa ijän ənniyät i-ehän wa n-äddin. Iqqäl-dd, äqqima ɣas, äsbälaläɣän däx-s äddinät-wi hänen ehän n-äddin-en-däx iket-däx-näsän.

21 Iqkäl məjräd, inn'-asän: «Məjräd wa s-təsläm ašäl-i-däx, itbät.»

22 Iqqälän-dd ɣas oran imawän, tof'-en təkunt n-tihusay n-iməjridän wi dd-zajjärnen emm-net, ad-jannen: «Ak ajän a-wa wädden ägg-Yusəf wa-däx nəzzäy?»

23 Inn'-asän Yisa: «Əssanäx a-s ad-hi-dd-səktəwäm ozz wa innän: <Läxtur, käyy-ak səssəfär i-iman-näkk təzzar>, tənnəm-ahi: <Təmmaz jed däx-äkall-näk a-wa s-nəsla jed-t däx-aɣrəm wa n-Qäfärnaxum.> »

24 Inn'-asän daɣ: «Tidət-däx a-s wär t-illa ännäbi ätiwäqbalän däx-äkall-net.

25 Äsidätteɣ-awän a-s käla t-əllänät tinuɗäfen äjjootnen däx-Işrayil däx-äzzäman wa n-ännäbi Yəli. Äzzäman-en, oɣäy männa i-äddinät, jän käraɗ iwətyan d-sädis oran wär t-təlla teddamt n-ajənna watät äkall-en-däx, ija laz s-käla wär-ätwänhäy a dər-oläh fäll-ärori n-äkall.

26 Ija a-wen iket-net məšan, wär dd-äšmašäl Mässinäx ännäbi Yəli ar s-tänuɗäft tiyyät ɣas däx-snät təzzaɣät taɣrəmt ta n-Saräfta däx-teje ta n-Säyda.

27 Darät Yəli daɣ, osä-dd äzzäman wa n-ännäbi Ilyas. Äzzäman-en, əllan-t äddinät äjjootnen däx-äkall wa n-Işrayil ijraw jəri məšan, wär täniha-i s-dd-äšimašäl Mässinäx Ilyas a säl ähaləs iyyän n-aməjar il' äkall wa n-Surya s-isəm-net Näɣma i-ad-t-işəşdəj.»

28 Əslän äddinät i-härätän-win-däx hasän-innä däx-ehän n-äddin ɣas, käfän a-wa-däx hasän-ija aɗkär-net,

29 ämzäyzyän-t iket-näsän, əzzəwen-t hundäx har afälla n-aɗaɣ wa fäll-idäy aɣrəm i-ad-t-in-səttərəkken, ämmät

30 məšan, ikka Yisa jere-sän, iglä.

Äzozäy Yisa ähaləs n-amälšon (Marqəs 1:21-28)

31 Ätrarä-dd Yisa ɗarät-a-wen, ikka taɣrəmt ta n-Qäfärnaxum hät teje ta n-Galila ad-isayra dihen äddinät hak ašäl n-əssəbət-i n-täsonfat;

32 əqqälän-dd äddinät ɣas oran imawän fäll-əjjärüzät-i-däx hasän-ija a-wa isayra ed isayr'-en s-älxikmät äşsohen.

33 Ehän n-äddin-en, ih'-e ähaləs ih' alšin, inhäy Yisa ɣas, ad-isayrat s-afälla, ijanna

34 «Ya Yisa wa n-Nəşirät, ma däx-näx tärhed? Ajän ahälak-nänäx a-s dd-tosed? Əssanäx ere wa tämoosäd, käyy-i-däx a-s: Wa Şäddijän dd-äšmašäl Mässinäx.»

35 Äsmähäɗ däx-s Yisa, inn'-as «Ətṭəf emm-näk, təzjəräd ähaləs-i-däx!» Ijjädlät alšin ähaləs jer-äddinät təzzar, izjār-t, wär t-illa a has-iɣšad.

³⁶ Ǝqqälän-dd äddinät ɣas oran imawän, tinmønnin: «Ma ämoos mäjräd wa? Wa ønta wäl' alšinän e-d fälla-sän äsmähäd s-tärna-net, ad-øzjārän äddinät.»

³⁷ Intäj isøm n-Ŷisa ɗarät-a-wen-däɣ, wär t-illa edägg däɣ-teje-ten-däɣ s-wädden timsiyulän däɣ-s isälan-net.

*Äzozäy Ŷisa taɗäggalt n-Bəṭrus d-imarhinän äjjootnen
(Mätti 8:14-17; Marqəs 1:29-39)*

³⁸ Izjār Ŷisa ehän wa n-äddin ɣas, ikka ɣur-Simyön. Ämzäyyät-in d-a-s tärmas tenäde täšsoohet taɗäggalt n-Simyön, øttärän däɣ-s äddinät ad-tät-izuzøy.

³⁹ Ibdäd-dd Ŷisa jønnøj-s, äsmähäd fäll-tenäde, tärza fälla-s. Tønkär-dd älwäqq-wen-däɣ, ad-tän-simjurut.

⁴⁰ Toɗa täfukt ɣas, ämewäyän-dd sār-s imarhinän s-hak iyyän d-turhønna-net i-ad-tän-izuzøy, äswär hak iyyän ifassän-net, äzozäy-tän.

⁴¹ Zajjārän alšinän äddinät äjjootnen, saɣären, jannen: «Käyy a-s Rure-s n-Mässinäɣ» mäšan, isamähäd fälla-sän, wär tän-itøyy ämmijrädän ed, øssanän a-s ønta a-s Älmaseɣ.

⁴² Äffäw ɣas, ikka Ŷisa tenere n-iman-net mäšan tömmäɣ-as tamøtte här t-tøjräw, ad-tattärän äddinät ømmøk s-t-øṭṭäfän edes-hasän i-ad-wär-ilkem ad-tän-ifal;

⁴³ inhäy tayøtte-näsän ɣas, inn'-asän: «Iwar-ahi ad-äxṭøbäɣ isälan n-älxer n-Tømmønøya n-Mässinäɣ i-iɣärman-wi iyyäɗnen øntäned-däɣ ed a-wen-däɣ a-s dd-ämešäläɣ.»

⁴⁴ Ad-ixattäb ɗarät-a-wen däɣ-ihänan n-äddin wi n-käl-Älyähud n-teje ta n-Älyähudøyät.

5

*Inøṭṭulab n-Ŷisa wi äzzarnen
(Mätti 4:18-22; Marqəs 1:16-20)*

¹ Ašäl iyyän d-ibdad Ŷisa däɣ-asälim n-øjänš wa n-Žännäšarät, täɣläyɣäläy-t-dd tamøtte täjjeet tärhat ad-søjød i-mäjräd n-Mässinäɣ wa itäj.

² Inhäy sänatät turfen n-aman ojaynen s-äqqiimän mössaw-snät däɣ-asälim n-aman, saradän titarren-näsän.

³ Ijjäš däɣ-snät ta n-Simyön, ittär däɣ-s ad-has-tät-in-imhøl hundäɣ har tøføl asälim n-aman, äqqima däɣ-s, ad-isaxra tamøtte.

⁴ Issømdä mäjräd ɣas, inna i-Simyön: «Søgløw turäft-näk hundäɣ har ammas n-aman, tøjred käyy d-imidiwän-nak titarren-näwän.»

⁵ Inn'-as Simyön: «Äɣalim, ehäd imdan a nøja nøšɣal wär t-illa a närmas mäšan, fäl tønna-näk, ad-nøjär titarren-nänäɣ.»

⁶ Jän a-wa hasän-innä, ärmäsän-dd ašäl-en-däɣ imänan-i-däɣ äjjootnen har dd-äqqälänät titarren-näsän, tössarnät.

⁷ Ad-talläfän i-imidiwän-näsän wi hänen turäft-ta iyyäɗät i-ad-dd-ašøløn, ilälän-asän. Osän-dd, øɗnäyän turfen-näsän tissønen hundäɣ har-däɣ tilkøyyitnät.

⁸ Inhäy Simyön Bəṭrus a-wa ijän ɣas, irkäɣ dat-Ŷisa, inn'-as: «Emäli, ajøj-ahi fäl-a-s näkk anäsbäkkad a ämoosäɣ.»

⁹ Tärmäs tarømmøxt-i-däɣ mäqqärät Simyön d-imidiwän-net fäl tössøba n-øjut n-imänan-i-däɣ ärmäsän.

¹⁰ Tākunt-ta tärmasät Simyon, ənta day a tärmasät Yaqub d-Exya wi n-dägg-Zäbdi-i dār-ohār älxidmät. Innä Yisa i-Simyon darät-a-wen: «Wär tärmeḡäd, ḡur-ašäl-i-däḡ, ad-tumasäd äwadəm sār-i dd-isadawän äddinät i-ad-tän-äḡləsäḡ.»

¹¹ Äsoḡälän-dd darät-a-wen turfen-näsän asälim n-aman, oyyän a-wa tän-išlän iket-net, əlkämän-as.

Äzozäy Yisa ähaləs ijraw jəri
(Mätti 8:1-4; Marḡəs 1:40-45)

¹² Iha Yisa iyyän däḡ-iḡärman a-s t-inhäy ähaləs ilsa jəri, ikk'-e-hidd, irkāḡ data-s, ad-t-ilaqqäd, ijann'-as: «Äḡḡalim, afäl tärhed a-wen-däḡ, täddoobed ad-hi-šəšdējäd.»

¹³ Izzäl Yisa äfuss-net, idäs-t, inn'-as: «Ärheḡ a-wen, išdaj», ifäl-t jəri älwäqq-wen-däḡ.

¹⁴ Äsmätär-t Yisa, inn'-as: «Wär jed isälan i-äwadəm wäl' iyyän n-a-s näkk a käy-äzozäyän; änn-ak, əḡləw, səkən iman-näk i-u-tikutawen, tējəd takute ta n-təšədje s-älmäḡna wa s-tän-innä alämär wa n-ännäbi Mosa i-ad-hasän-umas a-wen tajuhe n-a-s təzzäyäd.»

¹⁵ Hak ašäl tiwwad-dd terše n-isəm i-Yisa, tidaw-dd sār-s tamətte täjjeet i-ad-səjed i-isälan n-Älənžil, təzzəy däḡ-turhənnawen-net.

¹⁶ Mäšan Yisa ənta, äsoof edägg ištärän däḡ-ijraw s-tamädilt n-Mässinäḡ.

Äzozäy Yisa ähaləs ibdanän
(Mätti 9:1-8; Marḡəs 2:1-12)

¹⁷ Ijraw Yisa ḡur-Emäli tärna täšsoohet ässitbät azuzi wa itäj i-äddinät. Ašäl iyyän d-isayra, äqqiimän edes-has käl-faris d-äḡyulam n-Ätṭäwrät dd-falnen tidbi n-Galila d-Älyähudəyät d-Yärussälam.

¹⁸ A əndärrän meddön iyyäd-da-däḡ ämisawäyän anäbdon insan fäll-asəftäḡ. Ettärän a-wa däḡ-he-əjən ərəsän tamətte, sənsən-t dat-Yisa

¹⁹ mäšan, äba-hasän älmäḡna n-a-wen fäl əjut-i-däḡ ja tamətte. Äḡläyän, äwwänän afälla n-ehän, sārän däḡ-assətax n-ehän edägg s-äddooben ad-sār-s dd-šujəšan anäbdon, ästärärän-t-dd darät-a-wen har t-dd-əssənsän däḡ-ammäs n-tamətte, dat-Yisa.

²⁰ Inhäy Yisa immun-näsän ḡas, innä: «Ähaləs, ätwänšän-ak ibäkkadän-näk.»

²¹ Əslän äḡyulam n-Ätṭäwrät d-käl-faris i-a-wen ḡas, ad-jannen däḡ-iman-näsän: «Ma ämoos wa äwadəm isikuforän s-əmmək-wa-däḡ? Mi äddoben tenäšše n-ibäkkadän säl Mässinäḡ?»

²² İlmäd Yisa ḡur-iman-net a-wa ämiḡännänän ulhawän-näsän, inn'-asän: «Ma tämmizäḡäm däḡ-ulhawän-näwän?»

²³ Ma ojärän täräḡse jer-ad-tənnəd i-äwadəm: «Ätwänšän-ak ibäkkadän-näk» d-ad-has-tənnəd: «Əbdəd, ärjəš.»

²⁴ Ašäl-i, ässiilmädäḡ-käwän a-s Ägg-ägg-adəm, ijraw fäll-ärori n-äkall turhajät n-tenäšše n-ibäkkadän.» Inna darät-a-wen i-anäbdon: «Ənneḡ-ak, əbdəd, ədkəl asəftäḡ-näk, əqqəl ehän-näk.»

²⁵ İbdäd anäbdon ässaḡät-wen-däḡ dat-äddinät iket-näsän, idkäl asəftäḡ-net, iqqäl ehän-net itiməl Mässinäḡ.

²⁶ Äqqiimän-dd äddinät ḡas tof'-en tākunt n-a-wa ijän, tiimlən Mässinäḡ. Tēj'-asän tarəmməḡt arəmas wa-däḡ fäl jannen: «Ašäl-i, iman-net, nənhäy härätän äqqannen eḡäf.»

Iyră-dd Țisa Mătti s-iman-net
(Mătti 9:9-13; Marqəs 2:13-17)

²⁷ Ifăl Țisa edăgg-en ȡas, inhăy āhaləs irammăsăn tiwse s-isəm-net Lewi, āqqiima dăȡ-edăgg n-ălxidmăt-net, inn'-as: «Ēlkəm-ahi.»

²⁸ Ibdăd Lewi, ibdă d-a-wa t-išlăn iket-net, ilkăm-as.

²⁹ Āsmăjarăt Lewi Țisa đarăt-a-wen s-ehăn-net. Itaxăyma Țisa dăȡ-edăgg wa n-imənsiwăn a-s erk āddinăt han inarmăsăn n-tiwse ājjootnen da-dăȡ, osăn-dd, ānȡăymăn dăr-s ənta d-inəțtulab-net.

³⁰ Ēnhăyăn kăl-faris d-ălxulam n-Āțtăwrăt a-wen ȡas, āmjănănăn jer-iman-năsăn ad-jannen i-inəțtulab-net: «Mafăl tattăm, sassăm, tihrəm ikassăn d-inarmăsăn n-tiwse d-erk āddinăt?»

³¹ Āwwežăb-asăn, inn'-asăn: «Āddinăt āssoxătne, wăr-ămȡatărăn s-lăxtur, imarhinăn a săr-s āmiȡatărne;

³² năkk, wăr dd-ămešălăȡ s-āddinăt-wi ordănen iman-năsăn iqqud, inăsbăkkadăn a-s dd-ămešălăȡ i-ad-utabăn.»

Isălan n-ăzum
(Mătti 9:14-17; Marqəs 2:18-22)

³³ Ēnnăn-as đarăt-a-wen: «Inəțtulab wi n-Exya hakd-dăȡ kăl-faris, hărkuk tuzamăn, tumadăn măšan, wi-năk əntăneđ, tattăn, sassăn.»

³⁴ Issăȡlăy-tăn tangalt dăȡ-hasăn-inna: «Kăl-tuksest, wăr tăn-ilzem āzum a ikka āmaȡlay ill'-e ȡur-săn

³⁵ măšan, ilkam ad-dd-ass āzzăman-wa tăn-mad-ifəl āmaȡlay, āzzăman-en, ad-uzamăn.»

³⁶ Ij'-asăn Țisa tangalt tiyyăt dăȡ-hasăn-innă: «Wăr t-illa ere dd-isaxărrawen tikəst dăȡ-erăswey āynayăn i-ad-săr-s isəmməkukəs i wăššărăn ed, afăl ija a-wen, ad-dd-isăqqərriwət erăswey wa āynayăn bännan, đarăt-a-wen dăȡ, tabdoȡt-ta tăynayăt, wăr mad-talăh d-ta wăššărăt ini.

³⁷ Wăr t-illa dăȡ ere itajjăn aman n-lăȡnăb āynaynen āxxiimmărne dăȡ-ijdad, ere ijăn a-wen har kăfăn aman ənnin āynaynen dăȡ-ijdad, ad-has-səbbuqqen ijdad-net, ifut đarăt-a-wen dăȡ-aman hakd-dăȡ dăȡ-ijdad.

³⁸ Aman n-lăȡnăb āynaynen āxxiimmărne, iddidăn āynaynen a dăȡ-tăn-itajj āwadəm.

³⁹ Āwadəm dăȡ wa iswăn aman n-lăȡnăb s-ăru d-ăxximmărăn, ābas āsidărhăn tesăse n-wi āynaynen ed ad-ănn: «Wi s-ăru d-əxxəmărăn a āzednen.» »

6

Isălan n-əssəbət, ašăl wa n-tăsonfat
(Mătti 12:1-8; Marqəs 2:23-28)

¹ Ašăl iyyăn n-əssəbət-i n-ašăl wa n-tăsonfat, ālliil Țisa išəkraš n-ălkăma, əlkamăn-as inəțtulab-net, nakkădăn tiȡăȡănən n-ălkăma, tifəfferun-tănăt jer-ifassăn-năsăn, taffăžăn tiblalen-ti tănăt-dd-zajjărne.

² Ēggădăn-dd hărăt dăȡ-kăl-faris tăn-hannăynen, ənnăn-asăn: «Mafăl tajjăm a wărăn itətwəjj dăȡ-ašăl wa n-əssəbət-i n-tăsonfat?»

³ Āwwežăb-asăn Țisa, inn'-asăn: «Adiš kăwăneđ, wăr tăȡrem dăȡ-əlkəttab a-wa ija Dawəd ašăl wa d-ălluz ənta d-əjhăn-net?

⁴ Wădden ätwănnă, ijjăš ehăn n-Măssinăȡ, idkăl dăȡ-tijəlwen ti n-tikutawen s-wăr t-illa ere s-xălal tetăte-năsnăt săl kăl-tikutawen măšan, ənta, ikš'-enăt, ikfă dăȡ-snăt dăȡ imidiwăn-net wi dăr-ăddew.»

⁵ Inn'-asän Yisa ɗarät-a-wen: «Ägg-ägg-adəm a ännihädän dāḡ-a-wa s-ila ägg-adəm d-a-wa s-wär ila s-ad-t-äj dāḡ-ašäl wa n-əssəbət-i n-täsonfat.»

Äzozäy Yisa ähaləs s-äqqur äfuss-net dāḡ-ašäl wa n-əssəbət-i n-täsonfat

(Mätti 12:9-14; Marqəs 3:1-6)

⁶ Iqqäl-dd əssəbət-i n-ašäl wa n-täsonfat ḡas, ijjäš Yisa ehän n-äddin wa n-käl-Älyähud ad-dāḡ-s isayra. Ehän-en, ih'-e ähaləs s-äqqur äfuss-net wa n-aḡil.

⁷ Jan-as älḡulam n-Ättäwrät d-käl-faris ənniyät, tassänän ihäl ad-tizuzəy dāḡ-ašäl wa n-əssəbət-i n-täsonfat meḡ i-ad-t-səḍləmän.

⁸ Ilmäd Yisa ḡur-iman-net a-wa dāḡ-zinəzjumän, innä i-ähaləs wa s-äqqur äfuss-net: «Eyyäw, əbdəd dāḡ-amməs n-älžəməḡät.» Inkär-dd ähaləs, ibdəd diha s-has-innä.

⁹ Inn'-asän Yisa ɗarät-a-wen: «Ässiistänäḡ-käwän: Ak a xälälän dāḡ-ašäl wa n-əssəbət-i n-täsonfat iji n-emärked meḡ iji n-a läbasän, igguz n-iman meḡ iji n-iman?»

¹⁰ Issäḡläy-tän-dd Yisa asəwəḍ-net iket-dāḡ-näsän təzzar, innä i-ähaləs: «Ezzəl äfuss-näk.» Ija a-wa has-innä, izzäy äfuss-net älwäqq-wen-dāḡ.

¹¹ Ija a-wen ḡas, wäsän käl-äddin, änmänhäyän jer-iman-näsän dāḡ-isälan n-a-wa he-əjön i-Yisa.

Inəmmušal wi n-märaw d-əssin

(Mätti 10:1-4; Marqəs 3:13-19)

¹² Išilan-win-dāḡ ad-iwwän Yisa taɗayt, ikkäs dihen ehäd imdan, itəddal Mässinäḡ.

¹³ Äffäw ḡas, iḡrā-dd inəṭṭulab-net, äsnäfrän dāḡ-sän märaw d-əssin, äswär-tän isəm inəmmušal.

¹⁴ Entəneḍ da inəṭṭulab-wi äsnäfrän: Simyon wa s-ija isəm Bəṭrus d-änḡa-s Idris; Yaqub d-Exya, Fəlibb d-Bärtälamma,

¹⁵ Mätti d-Tomi; Yaqub wa n-ägg Älfa d-Simonyon wa s-itawänna äššəzəḡ,

¹⁶ Hudd ägg Yaqub d-Yähudəs wa n-Isxaryut-i ämoosän äməḡdar.

Äzozäy Yisa äddinät äjjootnen

(Mätti 4:23-25)

¹⁷ Äzzubbät-dd Yisa taɗayt ɗarät-a-wen ənta d-inəṭṭulab-net, ätrarän-dd fäll-əḡäryär dāḡ-təbdad tamətte täjjeet d-äddinät äjjootnen dd-falnen Älyähudəyät d-Yärussälam d-iḡärman wi n-Tir d-Säyda hänen asälim n-əjäns.

¹⁸ Äddinät-en-dāḡ, osän-dd iket-dāḡ-näsän i-ad-səjdən i-a-wa isayra, əzzəyän dāḡ-turhənnawen-näsän, əjrəwän dāḡ-sän wi hän alšinän iman-näsän.

¹⁹ Tattär taxləkt-ten-dāḡ iket-net ad-t-təḍəs ed zəjjär-t-dd tärna tän-zizuyät iket-dāḡ-näsän.

Tisunɗad

(Mätti 5:1-12)

²⁰ Iswäd Yisa dāḡ-inəṭṭulab-net, innä:

«Təndəḍ-awän käwəneḍ-i
äzoḡnen iman-näwän dat-Mässinäḡ ed,
Təmmənəya n-Mässinäḡ, ti-näwän.

²¹ Təndəḍ-awän käwəneḍ-i inäqq laz
ašäl-i-dāḡ ed, ad-täyyäwänäm;

təndəḍ-awän kăwăneḍ-i hallänen
ašäl-i-däḡ ed, ad-tăddăwem.

²² Təndəḍ-awän afäl dăr-wän okăḍän dăgg-adəm,
afäl kăwän-əkkăsän jer-iman-năsän;
afäl kăwän-gaggărän;
afäl ətărän uḡşad n-ismawän-năwän
dăḡ-ăddimmăt n-Ăgg-ăgg-adəm.

²³ Dăwătăt, taləwəm dăḡ-ašäl-wen-dăḡ fäl-a-s ad-ijat marušăt-năwän
dăḡ-ălžännăt; erk älخال-wen-dăḡ hawän-han ašäl-i-dăḡ, a əjjăšän abbatän-
năsän i-ännăbitän.»

Isəmmăqq

²⁴ «Iməskay kăwăneḍ-i n-imărrezăḡän ed,
älxer-năwän, ih' ifassän-năwän.

²⁵ Iməskay kăwăneḍ-i n-imăyyăwänän n-ašäl-i-dăḡ ed,
ad-tulažäm.

Iməskay kăwăneḍ-i dazžänen ašäl-i-dăḡ ed,
ad-təṭṭəfäm iba, təlhəm.

²⁶ Iməskay kăwăneḍ-i timələn äddinăt ed, älخال-wen-dăḡ a
əjjăšän abbatän-năsän i-ännăbitän wi n-bahu n-ibda.»

Tărha n-iməksänän-nănăḡ (Mătti 5:38-48; 7:12)

²⁷ «Kăwăneḍ-i hi-ăsijădnen, ənneḡ-awän: Ārhăt išənja-năwän, äjăt a
olaḡän i-ăddinăt-wi dăr-wän okăḍnen,

²⁸ äjăt älhimmăt i-wi hawän-ărhanen a lăbasän, ädələt Măssinăḡ i-wi
fälla-wän jannänen bahu.

²⁹ Afäl hak-istăḡ äwadəm fäll-tăjomăst-năk tiyyăt, səgdəl-as daḡ ta
iyyăḍăt; afäl irmăs äwadəm tanăkkăbbat-năk, äkf'-e daḡ anăkăbba-năk.

³⁰ Ere kăy-idălän-dăḡ, äkf'-e; wăr tətterăd dăḡ-ăwadəm ad-hak-isuḡəl
a-wa dăḡ-k irmăs.

³¹ A-wa s-tărhäm, ad-hawän-t tajjăn äddinăt, äjăt-asän-t kăwăneḍ-dăḡ.

³² Afäl wăr tărhem ar imărhan-năwän, əndek marušăt-năwän?
Wădden, inăsbăkkăḍän-dăḡ, ärhan äddinăt wi tăn-ărhanen.

³³ Afäl wăr təjjəm a olaḡän ar i-wi hawän-t-tajjänen, əndek irhuj-
năwän? Wădden, wäl' inăsbăkkăḍän, a-wen, tajjăn-t.

³⁴ Afäl daḡ wăr səmərwisäm ar i-ăddinăt wi dăḡ-tordäm timzal, əndek
marušăt wa s-mad-təjrəm äṭṭăma-net? Wădden, inăsbăkkăḍän-dăḡ,
samărwasän i-imidiwän-năsän ed, ordan ḡur-sän azăbăna.

³⁵ Ārhăt išənja-năwän, tajjăt-asän a olaḡän; səmmərwəsăt i-ere dăḡ-wăr
jerăm äṭṭăma n-timzal. Dihen, ad-ijat marušăt-năwän, tumasäm arătän n-
Măssinăḡ wa iknan aḍkul ed, ənta, miḡaw-net, wăr săr-s izley wi wăr ha
tămayit hakd-dăḡ wi n-inăllăbăsän.

³⁶ Təjjəšet-kăwän təmḡäre n-tăhanint ta hăt Abba-năwän.

Wăr săḍlamăt äwadəm (Mătti 7:1-5)

³⁷ Afäl wăr tənneḡ dăḡ-ăwadəm, wăr mad-dăḡ-wän änn äwadəm, afäl
wăr təssəḍlămăm äwadəm, wăr kăwän-e-isəḍləm äwadəm, naššăt i-ad-
təjrəwăm tenăšše.

³⁸ Äkfăt, ad-təjrəwăm; ere wa ihakkän, ad-ijrəw a äjjeen dăḡ-asəbbətăr-
net ed, ilkam ad-hanăḡ-ikət Măssinăḡ isuf-net s-əmmək wa s-nətəkkat isuf-
nănăḡ i-ăddinăt.»

³⁹ Issäyläy-tän-dd Yisa tangalt dāḡ-hasān-inna: «Ajān emədderyəl äddoobāt ad-ilwəy emədderyəl? Wādden, ad-idwən issənān-essān dāḡ-anu?»

⁴⁰ Wār t-illa ānāṭṭalib ojarān ālḡalim-net māšan, ānāṭṭalib iket-net iḡradān, ad-alāh d-ālḡalim-net.

⁴¹ Uhən kāyy, mafāl hannāyād tezewt ta hāt tiṭṭ n-āṇṇa-k, a-s ija a-wen, wār hənneyād afāḡot wa ihān tiṭṭ ta-nāk?

⁴² Meḡ daḡ, əndek əmmək wa s-mad-tənnəd i-āṇṇa-k: «Äyy-ahi ad-hak-əkkəsāḡ tezewt dāḡ-tiṭṭ-nāk», a-s ija a-wen, kāyy iman-nāk, iha afāḡot tiṭṭ ta-nāk. Älmunafey! Äkkəs-in afāḡot wa ihān tiṭṭ-nāk təzzar i-ad-tudabed ahānay d-ukəs n-tezewt ta hāt tiṭṭ n-āṇṇa-k.»

A-wa ihan ulh a ijanna emm

(Mätti 7:17-20; 12:34-35)

⁴³ «Wār t-illa ahəšk olaḡān itiirowən aratan läbasnen, wār t-illa daḡ erk ahəšk itiirowən aratan olaḡnen.

⁴⁴ Hak ahəšk-dāḡ aratan-net a-s ititwəzziy. Wār mad-dd-təkkəsād ara n-ašar fäll-ewärwār, wār mad-təkkəsād daḡ läḡnāb fäll-tahəjjart.

⁴⁵ Äwadəm-wa olāḡān, miḡaw n-ulh-net a dāḡ-dd-itakkäs a-wa olāḡān māšan, enällābäs ənta, tāllābäst n-ulh-net a dāḡ-dd-itakkäs a-wa läbasān ed, a-wa idkārān ulh n-ägg-adəm a dāḡ-itamājrad emm-net.»

Ässasān wi n-əssin

(Mätti 7:24-27)

⁴⁶ «Mafāl hi-jannem: «Emäli, Emäli!» a-s ija a-wen, wār təjjəm a-wa hawān-janney.

⁴⁷ Ere hi-dd-ikkān-dāḡ, äsjād i-mājrad-in, ad-itamašal a-wa ənney, ad-kāwān-sāknāḡ ere wa dār-olāh.

⁴⁸ Olāh d-äwadəm itəddayān ehān, iḡāš ässas-net har iwwād tāhunt, idāy fälla-s. Ij' akāsa, ij' anji äššoohen, inkäf i-taḡāšamt siha d-siha māšan, wār tät-äsmāramār ed, təkn' äntum dāḡ-äkall

⁴⁹ māšan ere wa islān i-mājrad-in wār has-äsjād, olāh d-ere idāyān ehān-net fäll-tasənjit wārāt la ässas, osä-dd anji, inkäf i-ehān, immār-t-in siyyāt, ij'-as tenāde təmdat.»

7

Äzozāy Yisa ānaxdim n-kābtān iyyān

(Mätti 8:5-13)

¹ Issəsla Yisa isālan-win-dāḡ i-tamətte ḡas, ijjāš aḡrəm wa n-Qäfārnaxum.

² Ill'-e dihen kābtān ilan akli ikna tārha-i s-a-s itāj a-wen-dāḡ ija turhəna ta-dāḡ s-išwar hin-ässijja.

³ Islā kābtān a-s dd-ijjaš Yisa äkall ḡas, äšmašäl sār-s hārāt dāḡ-inušāmān n-kāl-Älyāhud i-ad-dāḡ-s əttārān ad-dd-ass, izuzəy akli-net.

⁴ Osān-dd käl-Älyāhud Yisa, dālān-t dāḡ-ad-t-izuzəy, ənnān-as: «Ähaləs-i-dāḡ, āniihājja s-ad-has-təkkəsād tekəriḡt,

⁵ irha tumast-nānāḡ hullan, ənta a hanāḡ-issəkrāsān ehān n-äddin wa nəla.»

⁶ Äddew dār-sān Yisa. Wār-ujəy a-s has-dd-əlkādān imidiwān n-kābtān dd-äšimašäl, ənnān-as: Inn'-ak kābtān: «Älḡalim! Wār täsläyyāḡād iman-nāk fäl-a-s, wār-ānhājjaḡ d-ad-dd-təjjəšād ehān-in,

⁷ a-wen-däx day a fäl wär-äsnähäjjäx iman-in d-ad-käy-in-äkkäx, änn tiyyät täfert, ad-izzöy äanaxdim-in.

⁸ Näkk, öllan-t imänokalän jönnöj-i, leḡ day näkk össärdusa daw-i t-öllanen, e-d önnöḡ i-iiyyän: <Ἐγλω>, ad-iglow, e-d önnöḡ i-wa iyyädän: <Ἐγγῶ>, ad-hi-dd-ass; akli-nin day, e-d has-önnöḡ: <Ἄϊ a-wa>, ad-t-äj.»

⁹ Islä Ḳisa i-a-wen ḡas, ijrāz-as käbtän, innäd-dd s-äddinät wi has-ölkämnen, inn'-asän: «Äsidätteḡ-awän a-s wäla dāḡ-äkall wa n-İsrayil, wär käla önhäyāḡ ere s-ogdäh immun-net d-wa n-ähalös-i-dāḡ.»

¹⁰ Ḳqqälän meddön-wi dd-ämešälnen, ogäzän-in akli wa s-käla ärhin, izzay.

Issenkär-dd Ḳisa rure-s n-tänudäft tiyyät jer-inömmuttan

¹¹ Ašäl wa n-ḡarät wen, äddew Ḳisa d-inöḡḡulab-net s-taḡrömt s-isöm-net Nayin, tölkam-asän day tamötte täjjeet.

¹² Diha-dāḡ dd-öjjäšän aḡröm, ad-ämmoqqäsän d-äddinät äwwädnen härät äwwaynen enömmettön s-tizöska; enömmettön-en, alyaḡ s-wär töla ma-s ar önta, ti-s day wär-idder.

¹³ Öjjä Ḳisa tamäd-t-ten-dāḡ, täḡḡ'-e tähanint-net, inn'-as: «Ἐϋχεν Iblis.»

¹⁴ İkkä-dd enömmettön, idäs-t, öbdädän äddinät-wi t-ämisawäyinen, innä i-enömmettön: «Ämawaḡ, önnöḡ-ak: önkär!»

¹⁵ Äqqimä-dd enömmettön ässaḡät-wen-dāḡ, ad-itamäjrad, ässoḡäl-t Ḳisa i-ma-s.

¹⁶ Ärmäḡän äddinät iket-näsän, ad-tiimölön Mässinäḡ, jannen: «Ašäl-i, änfäläl-dd ännäbi mäqqoorän jere-nāḡ, Mässinäḡ ösä-dd tamötte-net i-ad-tät-iḡlös.»

¹⁷ Ämsaḡäl mäjräd-wen-dāḡ ätwännän fäll-Ḳisa dāḡ-Älyähudöyät d-attayän-net.

İsöstanän wi ija Exya wa n-Enösselmäḡ dāḡ-isälan n-Ḳisa (Mätti 11:2-19)

¹⁸ Ösän-dd inöḡḡulab n-Exya, jän dāḡ-s isälan n-a-wa ijän iket-dāḡ-net.

¹⁹ İḡrā-dd dāḡ-sän össin, äšmašäl-tän s-älḡalim i-ad-t-söstönän kunta önta a-s Wa s-ätwännä ilkam ad-dd-ass meḡ ilkam iyyän säl önta.

²⁰ Ösän-dd meddön, önnän-as: «Exya wa n-Enösselmäḡ a hanāḡ-dd-äšmašälän sär-k, inn'-anāḡ ad-käy-nösöstön, <kunta käyy a-s Wa s-ätwännä ilkam ad-dd-tasöd meḡ ilkam ere säl käyy?> »

²¹ Ässaḡät-wen-dāḡ t-sastanän, äzozäy Ḳisa äddinät äjjootnen dāḡ-tizören d-alšinän, ikfa day imöddorḡal äjjootnen turhajät n-ahänay.

²² Äwwöžäb i-meddön wi dd-äšmašäl Exya, inn'-asän: «Äqqölät Exya, suḡäläm-as a-wa tönhäyäm d-a-wa tösläm, ännät-as: imöddorḡal hannäyän, inöbdan rajjäšän; wi ijraw jöri, tišdajän, imzaj, sallän; inömmuttan nakkärän-dd; tiläqqiwen, sallänät i-Älönzil.

²³ Töndöḡ i-ere wa dāḡ-i wärän ij' äššäk.»

A-wa innä Ḳisa fäll-Exya wa n-Enösselmäḡ

²⁴ Ḳglän inämmašälän n-Exya ḡas, ädwännät Ḳisa i-tamötte dāḡ-isälan n-Exya, inn'-asän: «Ak, a-s tözjäräm s-tenere, ma tönhäyäm? Ak tezewt äsiwälawäl aḡu a tönhäyäm? Äbo!

²⁵ Adiš ma tökkäm i-ad-t-tönhöyäm? Ak ähalös äsisahäḡän ašäl a tönhäyäm? Ḳnhöywät-tän-ak äddinät-wi sasahaḡnen ašäl, öntänöḡ-den ännufläyinen dāḡ-ihänan-wi n-imänokalän.

²⁶ Adiš mi tökkäm i-ad-t-tönhöyäm? Ak ännäbi? Tidöt lab a-s ännäbi, ässiilmädäx-käwän a-s ere ojärän tumast n-ännäbi a tönhäyäm.

²⁷ Exya, ənta-en-däx a fäl inna əlkəttab n-Mässinäx:

<Ənhöy! Äzizäräx-ak änämmasıul-in

wa he-iknən tabarät data-k.>

²⁸ Ässiilmädäx-käwän a-s, wär t-illa ara n-tamädt ojärän Exya mäšan, hakd a-wen-däx, wär t-illa ere t-wärän ojer däx-Təmmənəya n-Mässinäx.»

²⁹ Äddinät-wi has-əslänen iket-näsän hakd-däx inarmasän n-tiwse ärđän s-Təmmənəya n-Mässinäx ed, əqbälän ad-tän-isəlmäx Exya

³⁰ mäšan, käl-faris d-älxulam-i unjäynen s-asəlməx-net, əsfatän iman-näsän däx-a-wa ixtäs Mässinäx.

³¹ Innä Ƴisa: «Ak, mi dər-mad-sənnəfəqqäx käl-əzzurəyät-ta-däx? Ak, mi dər-olähän?

³² Olähän Ƴas d-aratän janen aƳrəf däx-təfərre, jannen iyyäd i-wi iyyädnen:

<Ənhöywät, käwäned, wär lem asəfar;

nəwät-awän taƳänibt, tunjäyäm s-dällol!

Nənzär-awän tiswal n-tisnant mäšan,

wär təlhem!>

³³ Exya wa n-Enəsselmäx, äzzäman wa dd-osa, wär-itətt imənsiwän olaƳnen, wär-isəss aman n-läxnəb äxxiimmärnen; tənnäm: <Ih'-e əlšin>,

³⁴ işräy-t-dd Ägg-əgg-adəm, ənta itihar dər-wän a-wa tättäm d-a-wa səssäm, Ƴas tənnäm däx-s: <Wa ənta, insäy, iräf aman wi n-läxnəb äxxiimmärnen, amidi n-inarmasän n-tiwse d-əlfusaƳ wi iyyädnen.>

³⁵ Mäšan a-wen wär hin-ikkəs a-s:

<Sərho wa dd-ifälän Mässinäx,

ijitän n-aratän-net a t-isatbatän.> »

Təjrəw tamädt tiyyät tenäsše n-ibəkkadän-net

³⁶ Ämjarät-dd Ƴisa əşäl iyyän i-u-faris iyyän, ikk'-e-hi-dd, ad-tamənsawän.

³⁷ Təsla tamädt n-tanəsbəkkədt hat aƳrəm-en-däx a-s Ƴisa ämjarät i-u-faris-en Ƴas, a əndərrän, ənta da-däx təwway butəl n-ađutän.

³⁸ Tosä-dd, təjjəş fälla-sän ehän wa däx-tamənsawän, təkka dihad əsiƳämär Ƴisa, məl daw-ıdarän-net, ad-hall. Hall har təssəbdäj ıdarän-net s-iməttawän-net, ad-tän-timəs s-tişəkkədt-net, timəllut-asän, sənƳal fälla-sän ađutän.

³⁹ İnhäy u-faris wa dd-əsməjaren Ƴisa a-wen Ƴas, ad-ijanna däx-iman-net: «Ənnär əmoos əhaləs-i-däx ännäbi, ilməd a-s tamädt-ta-däx t-tədasät, təlkəxəbat.»

⁴⁰ Inn'-as Ƴisa: «Simyon, ərheƳ ad-hak-ännəx hərät iyyän.» Inn'-as Simyon: «Älxalim, əsijadäx-ak, məjrəd.»

⁴¹ Inn'-as Ƴisa: «Kəla t-illa əhaləs irwasän əssin meddən: iyyän, irwas-t səmmosät timədt n-ərriyal n-azrəf, wa iyyädän, irwas-t, səmmosät timərwen n-ərriyal n-azrəf.

⁴² İnhäy a-s wär tän-ıha-i äddooben timzəl n-ehäre-net, ma n-əmmək Ƴas, inş'-asän-in a-wa tän-irwəs. Ässistänəx-käy käyy Simyon: <Əndek däx-sän wa has-madän-ikən təmayit?> »

⁴³ Inn'-as Simyon: «OrdeƳ a-s wa s-hin-oyyä əmarwas wa ojärän.» Inn'-as Ƴisa: «ToƳadäd.»

⁴⁴ Innäd-dd Yisa ɗarät-a-wen s-tamäɗt təzzar, innä i-Simonyon: «Wädden hannäyäd tamäɗt-ta-däx, əjjäšäx-dd ehän-näk, wär hi-təkfed aman s-ässerädäx iɗarän-in mašan ənta, təssəbdäj-tän s-imetṭawän-net, tomäs-tän s-tiškəkəɗ-net,

⁴⁵ əlwäqq wa dd-osex ehän-näk, wär hi-dd-təlkeɗäd, tasəsäd-ahi dəx-idmarän-näk mašan ənta, a dd-osex, timəllut i-iɗarän-in fäll-semxar-i-däx hi-təja.

⁴⁶ Käyy dəx, wär təšweyäd eɣäf-in, a-s ija a-wen ənta, iɗarän-in a təšwäy s-adutän.

⁴⁷ Däx-təssəba n-tärha-i-däx mäqqärät hi-təssəkna, a-wa äjjen la dəx-ibäkkəɗän, ätiwänšän-as-in. Tidət-däx a-s ere wa s-hin-ätwänša a əndärrän, təmayit-net dəx ti-əndärrät.»

⁴⁸ Inna Yisa ɗarät-a-wen i-tamäɗt: «Ibäkkəɗän-am, ätiwänšänäm-in.»

⁴⁹ Əslän iməjarän i-a-wen-däx xas, ad-jannen dəx-iman-näsän: «Ma ämoos äwadəm wa äddooben tenäšše n-ibäkkəɗän n-äddinät?»

⁵⁰ Innä Yisa i-tamäɗt ɗarät-a-wen: «Immun-näm a käm-iɣläsän, əgləw dəx-älxer.»

8

Tiɗeɗen-ti n-timadhəlen n-Yisa

¹ Əlliil Yisa ɗarät-a-wen iɣərman d-tidbi äjjootnen, ixatṭab i-äddinät isəlan n-älxer n-Təmmənəya n-Mässinäx, äddeewän ɗar-s inəṭṭulab-net wi n-məraw d-əssin

² d-härät dəx-tiɗeɗen s-tiyyäd, ikkas dəx-snät, alšinän d-tiyyäd äzozäy dəx-turhənnawen. Tiyyät dəx-snät, isəm-net Märyäma ta n-Muləzɗaləyät, ikkas dəx-s ənta əssa alšinän,

³ tiyyät isəm-net Təxya, ənta a-s hənne-s n-Šuza wa ixkämän fäll-inaxdimän n-ehän n-ämənokal n-əkall wa s-isəm-net Harudəs, tiyyät Suzänna d-timidiwen-net tiyyäd äjjootnen, iket-däx-näsnät, ədhəlnät Yisa d-inəṭṭulab s-a-wa əṭṭəfnät.

Təngəlt ta n-änəsdamu

(Mätti 13:1-9; Marqəs 4:1-9)

⁴ Täddeew-dd tamətte təjjeet s-wär t-illa ayxəm wär dd-fel s-Yisa. Issəxləy tamətte təngəlt, inn'-asän: «Käla izjər ənəsdamu iyyän i-adiddumət əškərəš-net.

⁵ Əlwäqq wa d-itidumut, oɗänät tiblalen tiyyäd dəx-əbara, əfkälfəkälän-tänät äddinät, äkkukkären-tänät-dd igɗəɗ, əksän-tänät.

⁶ Oɗa əšər iyyän jer-tihun, diha-däx dd-əffoqqät, ad-hin-əqqur fäl iba n-abduj.

⁷ Oɗa əšər iyyän dəx-tabəññənt, tədwäl-dd fälla-s tabəññənt, təzmäd-as.

⁸ Əšər wa iyyädän, oɗa dəx-əkall olaxän, idwäl-dd, ikrəš aratan s-timəɗ.»

Ija məjrad-wen-däx xas, idkäl eməsli-net, innä: «Ere ilän timəzzujen s-islä-däx, isəjdet.»

Äddälil wa fäl isayra Yisa s-təngəlen

(Mätti 13:10-17; Marqəs 4:10-12)

⁹ Əssəstänän-t inəṭṭulab-net ɗarät-a-wen d-əlməxna n-təngəlt ta ija.

¹⁰ Inn'-asän: «Kəwəneɗ, təjrawəm turhajät n-ujreh n-əddəraj wa n-isəlan n-Təmmənəya n-Mässinäx mašan, äddinät wi iyyädnen, wär jen a-wen.

«Ad-əswaḏän, wär hənnəyän;
sallän, wär jərrähän.» »

Älmäyna n-tangalt ta n-änäsdamu
(*Mätti 13:18-23; Marqəs 4:13-20*)

¹¹ «Ämära, tangalt, älmäyna-net da:
Tiblalen a-s mäjräd n-Mässinäx.

¹² Äbara wa dəx-oḏänät tiblalen tiyyäḏ, ənta a-s äddinät-wi sallänen i-mäjräd n-Mässinäx, as'-en-dd Iblis, ilbəy-t-dd dəx-ulhawän-näsän i-ad-wär-omenän s-Mässinäx, iyləs-tän.

¹³ Tihun ti jer-oḏänät tiblalen tiyyäḏ, əntänäteḏ a-s äddinät-wi s-e-d əslän i-mäjräd n-Mässinäx, ad-əhləyləyän, äqbəlän-t šik, məšan wär t-təyyən ikraš ikewän dəx-ulhawän-näsän, ad-əjən äzzäman əndərrän älmät ätubän, məšan afäl ätwäžžurräben, ad-hin-əbbuṭṭəlän a-wa s-omänän.

¹⁴ Tabənnənt ta dəx-oḏänät tiblalen tiyyäḏ, ənta a-s äddinät wi s-e-d əslän i-mäjräd n-Mässinäx, ad-tän-äxləbän inəzjam n-tərha d-ajmur d-izəjraḏ n-wälät-äddunya, əzmədän-as, indär-asän ad-əhələn s-data dəx-tuksəḏa-näsän i-Mässinäx.

¹⁵ Äkall wa oləxän dəx-oḏänät tiblalen tiyyäḏ, oläh d-äddinät-wi s-e-d əslän i-mäjräd n-Mässinäx, ad-t-əknən uḏəf s-särho dəx-ulhawän-näsän, ad-hasän-t-ijjəš älfäyda äddewän d-akuyəd.»

Tefätelt
(*Marqəs 4:21-25*)

¹⁶ Inn'-asän Yisa daḏ: «Wär t-illa ere isarmasän tefätelt təzzar, isəbbumbəy fälla-s äkoss meḏ tāt-ija daw-tešejit, änn-ak, asili a tāt-itajj fäll-äsaḏəf əsikakän i-ad-hannäyän äddinät wi dd-tajjəšnen ehän ännur-net.

¹⁷ Wär t-illa a iffarän s-wädden ad-dd-infiləl, wär t-təlla daḏ takše s-wädden ad-dd-təffukkär s-tarähut.

¹⁸ Äjät ənniyät i-əmmək wa s-sajadäm; äwadəm wa ifhämän härät, ad-has-iwwaḏ musnät har isəssikəy məšan, wa s-wär t-illa a ijrah, wär t-in-ikka härät, änn-ak, ad-dəx-s əmahəx wəla a-wa s-orda a-s iṭṭaf-t.»

Anna d-ayətma n-Yisa wi n-tidət
(*Mätti 12:46-50; Marqəs 3:31-35*)

¹⁹ Tosä-dd anna n-Yisa d-ayətma-s məšan, igdäl-asän əjut n-tamətte ad-t-ənhəyän.

²⁰ Ätwänn'-as: «Təbdad anna-näk d-ayətma-k dat-əmm n-ehän, ärhan ahänay-näk.»

²¹ Äwwežäb-asän, inn'-asän: «Anna-nin d-ayətma-x, äddinät-wi sajad-nen i-mäjräd n-Mässinäx, tamašalän a-wa inna.»

Issəbdäd Yisa aḏu fäll-əjäns
(*Mätti 8:23-27; Marqəs 4:35-41*)

²² Ijjäš Yisa ašäl iyyän turäft n-aman ənta d-inəṭṭulab-net, inn'-asän: «Nəjləyet ejäns s-ašrut wa iyyäḏän», əglän.

²³ Əglän fäll-aman-en-dəx a-s hin-iṭṭäs Yisa. A əndərrän, inkär-dd aḏu-i-dəx əšsoohen, ad-ḏakkär turäft aman, əjjäšän miši.

²⁴ Ohəžän-dd inəṭṭulab Yisa, ad-t-sänkarän dəx-eḏəs, jannen-as: «Älyalim, Älyalim, nəhläk!» Inkär-dd Yisa, äsmähəḏ fäll-aḏu d-tinəzzämären ti əšsoohätnen, ibdäd a-wen-dəx iket-net, səmmeḏ-in.

²⁵ Inn'-asän Yisa: «Ma ija immun-nāwān.» Eqqälän-dd ɣas ärmāɣān, oran imawān, tinmōnnin: «Ma āmoos āwadēm-wa-dāɣ s-e-d omār i-aḍu d-aman ad-has-sējdēn?»

*Äzozäy Yisa āwadēm iha alšin
(Mätti 8:28-34; Marqəs 5:1-20)*

²⁶ Äsjānān ɗarāt-a-wen dāɣ-ākall wa n-käl-Gadara ānimās-wāḍān d-teje ta n-Galila.

²⁷ Diha-dāɣ dd-izjār Yisa turāft n-aman, ad-has-dd-ilkāḍ āhalēs n-aɣrēm-en-dāɣ han alšinān. A ilan äzzāman, wār-ilōss tikōst, wār-il' edāgg n-iman-net, izzaɣ tizəska.

²⁸ Inhāy Yisa ɣas, äsɣārāt tōzzar, irkāɣ data-s, inn'-as: «Ya Yisa wa n-Rure-s n-Māssināɣ wa iknān aḍkul, ma dāɣ-i tārhed? Dalāɣ-kāy d-ad-wār hi-tāqquzsäbed.»

²⁹ A-s ijānna a-wen-dāɣ, isamāhaḍ Yisa fäll-alšin wa t-ihān, i-ad-t-izjār. Ähalēs-en, itajjāš-t alšin s-e-d t-ijjāš, akārad ad-t-tajjān äddināt s-tišēm d-tifren māšan, isayātas-dd a-wen-dāɣ iket-net, äzzāwāt-t alšin s-tinariwen.

³⁰ Issōstān-t Yisa, inn'-as: «Mi isēm-nāk?» Inn'-as amālšon: «Isēm-in ejhān», ed alšinān äjjootnen a t-hanen.

³¹ Ad-laqqādān alšinān-wi t-hānen Yisa i-ad-wār tān-ässoka anu wa wārān il' ider ihān ālaxārāt.

³² Iḍan dihen ehāre n-əlxənžārān fäll-tasāja n-taḍayt, əlyādān alšinān Yisa i-ad-tān-äyy ad-əjjōšān əlxənžārān-en-dāɣ, ird'-asän s-a-wen.

³³ Əzjārān alšinān āhalēs, əjjāšān əlxənžārān, ad-dd-titrēktōrikān wa dāɣ n-afälla n-taḍayt, tiḍəwān dāɣ-əjärew wa səmmān, tattān-tān aman.

³⁴ Ənhāyān imāḍanān-nāsān a-wa ijān ɣas, äjewāḍān, jān isālan dāɣ-käl-aɣrēm d-attayān-net.

³⁵ Osän-dd äddināt äwinafātnen a-wa ijān, ogāzān-dd āhalēs wa dāɣ-ikkās Yisa alšinān, äqqiima edes i-ḍarān n-Yisa, ijā isəlsa, h'-e daɣ tija n-iman-net; ärmāɣān.

³⁶ Jān dāɣ-sān äddināt wi äjjōyhnen i-a-wa ijān isālan n-əmmək wa s-dd-iɣlās amālšon dāɣ-alšinān wi t-əzzāɣnen.

³⁷ Māšan, əjjāšān-tān isālan n-a-wa ijān ɣas, ad-tattārān käl-Gadara dāɣ-Yisa ad-ifəl ākall-nāsān fäll-tarəmmeyt-i-dāɣ jān. Ijjāš Yisa turāft n-aman, iqqāl.

³⁸ Ittār dāɣ-s āhalēs wa dāɣ-ikkās alšinān ad-t-äyy ad-dār-s idaw māšan, inn'-as Yisa:

³⁹ «Eqqəl ehān-nāk, tāllāɣed i-äddināt tōmɣäre n-a-wa hak-ija Māssināɣ». Iglā ɗarāt-a-wen, ad-isanāfas dāɣ-aɣrēm iket-net tōmɣäre n-a-wa has-ija Yisa.

*Isālan n-elle-s n-Žayrus d-tamāḍt ta dd-izajjār ašni
(Mätti 9:18-26; Marqəs 5:21-43)*

⁴⁰ Älwāqq wa dd-iqqāl Yisa ašrut n-ejānš wa iyyāḍān, tēlkāḍ-as-dd tamōtte has-tāqqalāt.

⁴¹ A əndārrān āhalēs iyyān da-dāɣ s-isēm-net Žayrus, ənta a-s älfāqqi n-ehān n-äddin wa n-käl-Älyāhud n-taɣrēmt-en; irkāɣ dat-Yisa, ad-dāɣ-s itattār ad-idawān s-ehān-net,

⁴² fäl-a-s itiba elle-s lat marāw iwətyan d-əssin s-ənta ɣas a ila. Äddeew dār-s s-ehān-net dāɣ-a-s t-täɣiläyɣälāy tamōtte siha hakd siha.

⁴³ Tamōtte-en, h'-et tamāḍt izajjār ašni a ilan mārāw iwətyan d-əssin, wār t-illa läxtur wār tosa māšan, äbā-dd i tāt-äzozāyān.

⁴⁴ Tökkä-dd darät ʒisa, ɖäs afär n-eräswäy-net, iktäl ašni wa tät-dd-izajjārān älwäqq-wen-däx.

⁴⁵ Innä ʒisa: «Ma ämoos äwadəm wa hi-iɖäsän?» Wär t-illa ere innan härät. Iggäd-dd Bəṭrus, inn'-as: «Älyalim, täsinäkmäm-käy tamötte täjjeet däx-ifäyyän iket-näsän.»

⁴⁶ Inn'-asän ʒisa: «Iɖäs-ahi äwadəm iyyän fäl-a-s, ofrayäx i-tärna ta hi-dd-təjmädät.»

⁴⁷ Təlmäd tamädət a-s täffukkär-dd ɖas, tökkä-dd ʒisa täšikäɖkäd, tärkäx data-s, tölläxät-as dat-äddinät iket-näsän äddälil wa fäl ɖäs afär n-eräswäy-net d-əmmək wa s-təzzäy älwäqq-wen-däx.

⁴⁸ Inn'-as ʒisa: «Talyadət-in, äzozäy-käm immun-näm, əgləw däx-älxer.»

⁴⁹ Ämmiijräd ʒisa dihen-däx a-s dd-osa ähaləs dd-ifalän eɖewən n-älfäqqi n-ehän wa n-äddin, inn'-as: «Elle-k, äba-tät, wär täsläyyäxäd älyalim däx.»

⁵⁰ Islä ʒisa i-isälan wi dd-ässawäd ähaləs-en ɖas, innä i-Žayrus: «Wär käy-isärməxet härät, amən ɖas, ad-təzzəy.»

⁵¹ Iwwäd-in ʒisa ehän n-Žayrus ɖas, igdäl i-äddinät ad-t-əjjəšän, wär-äddew ar d-Bəṭrus d-Exya d-Yaqub d-ti-s d-ma-s n-talyadət.

⁵² A-s itäjj a-wen-däx, täsikäläl tamötte iket-däx-net, hall iba n-talyadət mäšan, inn'-asän ʒisa: «Wär təlhem ed talyadət, wär tät-äba, eɖəs ɖas a ja.»

⁵³ Jän-t tekäškäšt ed əkkasän äššäk a-s äba-tät.

⁵⁴ Ijjäš ʒisa edägg wa däx-tənsa talyadət, irmäs-tät-dd s-äfuss, iyr'-et, inn'-as: «Talyadət, ənkär-dd!»

⁵⁵ Əqqälän-tät-dd iman-net, təbdäd-dd s-iiyyät, omär-tän d-ad-tät-əkfen a təkša.

⁵⁶ Əqqälän-dd imärawän-net ɖas tof'-en täkunt. Äsmätär-tän ʒisa d-ad-wär jen isälan n-a-wa ijän däx-äwadəm wäl' iyyän.

9

Äšmašäl ʒisa inəmmušal-net (Mätti 10:5-15; Marqəs 6:7-13)

¹ Iyrä-dd ʒisa inəṭṭulab-net wi n-märaw d-əssin, ikf'-en tärna d-älxikmät fäll-e d t-illäm alšin d-tädabit n-ad-zizuyän äddinät däx-turhənnawen-näsän,

² äšmašäl-tän darät-a-wen i-ad-xaṭṭäbän isälan n-Təmmənəya n-Mässinäx d-ad-zizuyän imarhinän,

³ inn'-asän: «Wär tiwəyät wäla a əndärrän däx-asikəl-näwän, wär tiwəyät tāborit, wäla šäkköš, wäla äzzad, wäla əzrəf; wär tiwəyät əssin iräswäyän.

⁴ Ehän təjjäšäm-däx har käwän-äsmäjarät, ɖaymät däx-s har ašäl wa d-tässawädäm tekle.

⁵ Ayrəm təjjäšäm wär käwän däx-s äsbärräk äwadəm, əzjarät-t, täbbäkbäkäm iɖarän-näwän i-ad-wär käwän-iləttäx wäla äboqqal-net, ilkam ad-äjjäyh a-wen fälla-sän.»

⁶ Əglän inəṭṭulab, tadəbayt əmmärän-däx, ad-däx-s äxtəbän isälan n-älxer, zuzəyən däx-s imarhinän.

Iggäd ənniyät n-ämänokal Harudəs (Mätti 14:1-12; Marqəs 6:14-29)

⁷ Islä Harudəs-i ixkämän fäll-teje ta n-Galila a-wa itäjj ʁisa d-inəttulab-net ʁas, iqqän eʁäf-net fäl-a-s, jannen äddinät iyyäd däʁ-isälan n-ʁisa a-s ənta-i-däʁ a-s Exya wa n-Enəsselmäʁ dd-olasän tanäkra jer-inəmmuttan,

⁸ jannen iyyäd: «A-wa ännäbi ʁəli dd-olasän uʁəl», jannen wi iyyädnen: «A-wa iyyän däʁ-ännäbitän wi n-ibda dd-olasän tanäkra jer-inəmmuttan.»

⁹ Harudəs ənta iman-net, innä: «Exya-š, ajän wädden näkk a dd-issəfräsän eʁäf-net, ma ämoos-š wa hi-dd-išreyän fäll-salläʁ ijitan-wi-däʁ?» Ad-itattär ya Harudəs əmmək s-inhäy ʁisa.

*Asyāwän ʁisa səmmos afdän n-ähaləs
(Mätti 14:13-21; Marqəs 6:30-44; Exya 6:1-14)*

¹⁰ Ɛqqälän-dd inəmmušal, jän däʁ-ʁisa isälan n-a-wa jän iket-net. Ikkäs-tän-dd s-takše, ikka dār-sän taʁrəmt ta n-Bätsäyda.

¹¹ Ɛlmädän äddinät s-a-wen ʁas, əlkämän-as-dd. Ilkäd-asän-dd ʁisa, ad-hasän-itajj isälan n-Təmmənəya n-Mässinäʁ, izizuy däʁ-sän wi n-imärhinän äddirärnen s-a-wen.

¹² Ohäz-dd ejädäl n-täfukt ʁas, ohäzän-t-dd inəttulab-net wi n-märaw d-əssin, ənnän-as: «Səgləw tamətə ad-täkk tidbi-ti ohäznen d-imäzzayän i-ad-təmmäʁ i-edägg däʁ-tənsa d-i däʁ-təkša fäl-a-s, edägg n-tenere a nəha.»

¹³ Inn'-asän: «Un, šäksät-tän käwänəđ iman-näwän.» Ɛnnän-as: «Wär nəttəf ar səmmosät tijəlwen d-əssin imänan, afäl wädden ayərəm a nəkka, i-ad-dd-nəžänš a təkša tamətə jat əjut-wa-däʁ.»

¹⁴ Älzämaʁät-en-däʁ, ih'-e a iwwädän səmmos afdän n-ähaləs. Innä ʁisa i-inəttulab-net: «Säqqaymət äddinät, təbdəwäm-tän s-səmmosät-səmmosät timərwen n-äwadəm.»

¹⁵ Jän inəttulab a-wa hasän-innä, äşyämän äddinät iket-näsän.

¹⁶ Idkäl ʁisa ɖarät-a-wen tijəlwen ti n-səmmosät d-imänan wi n-əssin, äjozäy išənnawän, ämmoy i-Mässinäʁ, äfräsfäräs tijəlwen, änkäɖnäkäđ imänan təzzar, ikfä a-wen-däʁ iket-net i-inəttulab-net i-ad-t-užanän jer-äddinät.

¹⁷ Ɛksän iket-däʁ-näsän har əyyəwänän, äsdäwän-dd a-wa əjläšan, osän-t idnäy märaw deketän d-əssin n-tijəlwen d-imänan.

*Tajuhe ta ija Bətrus däʁ-isälan n-ʁisa
(Mätti 16:13-19; Marqəs 8:27-29)*

¹⁸ Ašäl iyyän, itəddal ʁisa Mässinäʁ, əllan-t ʁur-s inəttulab-net, har šik-däʁ, inn'-asän: «Ma janna tamətə däʁ-isälan-in, ma janna, mi ämoosäʁ?»

¹⁹ Ɛnnän-as: «Iyyäd jannen: käyy a-s Exya wa n-Enəsselmäʁ, iyyäd jannen: käyy a-s ännäbi ʁəli, iyyäd fäw a jannen: käyy iyyän däʁ-ännäbitän wi n-ibda dd-olasän tanäkra jer-inəmmuttan.»

²⁰ Inn'-asän: «Käwänəđ-i-š, ma tənnäm, mi ämoosäʁ?» Äwwežäb-as Bətrus, inn'-as: «Käyy a-s Älmasex wa n-Mässinäʁ.»

*Äloläy ʁisa däʁ-isälan n-tamättant-net d-tanäkra-net
(Mätti 16:20-21; Marqəs 8:30-31)*

²¹ Äsmähäđ däʁ-sän ʁisa, omär-tän d-ad-wär jen isälan-win-däʁ i-äwadəm wäl' iyyän,

²² inn'-asän: «Ägg-ägg-adəm, ilzam-t ad-inhöy tersəmmawen äjjootnen, ənkärän-t inušämän wi n-Işrayil d-imänokalän n-käl-tikutawen d-älɟulam n-Ättäwrät, əjən iman-net mäšan, ašäl wa s-kärađ ɖarät tamättant-net, ad-dd-inkär jer-inəmmuttan.»

Alkum i-Ŷisa Ālmasex
(*Mätti 16:24-28; Marqəs 8:34-9:1*)

²³ Inn'-asän iket-näsän ɗarät-a-wen: «Ere irhän alkum-hahi-däx, adiš, iksənet iman-net, äjet hak ašäl fäll-tamättant šund ta n-tajəttewt təzzar, ilkömet-ahi.

²⁴ Wa wärän itəttär ar əmmək s-ogəz iman-net däx-əddunya-ta-däx, ad-ifut däx-älžännät, mäšan, wa irɗän äfota däx-iman-net däx-əddunya-ta-däx, däx-əddimmät-in, ad-iyləs.

²⁵ Ma s-infa ägg-adəm ad-irbäx əddunya iket-däx-net, a-s ija a-wen, äššiiska iman-net, äfota däx-älaxärät?

²⁶ Ere hi-äkrakəɗän-däx näkk d-mäjräd-in, ad-t-əkrukəɗäx näkk-däx i n-Ägg-ägg-adəm ašäl wa d-mad-dd-äqqələx däx-älxurmät-in d-älxurmät n-Abba d-änjəlosän wi n-iməššeddəjän.

²⁷ Äsidätteɗ-awän a-s han-kəwän äddinät əbdadnen diha-däx wär-e iba wär-ənheyän Təmmənəya n-Mässinäx.»

Tihusay n-älxurmät n-Ŷisa Ālmasex
(*Mätti 17:1-8; Marqəs 9:2-8*)

²⁸ Əddəkud n-əttam išilan ɗarät a-s hasän-ija Ŷisa mäjräd-wənnin-däx, əddew d-Bətrus d-Exya d-Yaqub s-taɗayt tiyyät i-ad-idəl Mässinäx.

²⁹ Itəddal Mässinäx dihen-däx a-s data-sän dd-ijjäs ini äynayän, iqqäl-dd emäls-net i mällän-mällän šund essam.

³⁰ A əndərrän, əssin meddən-da-däx dd-falnen išənnawän hasän-dd-änfalälnen, ad-taməjrädän d-Ŷisa. Meddən-en-hi, iyyän ännäbi Mosa, wa iyyəɗän ännäbi Ƴəli.

³¹ Änfalälän-as-dd däx-älxurmät, əjän-as isälan n-əmmək wa s-mad-hin-isəssiwəɗ ämašal n-Mässinäx s-tamättant-net, däx-Yərussälam.

³² A-s itəjj a-wen-däx, ilɗad eɗəs Bətrus d-imidiwän-net, ənkärän-dd ɗas, ənhäyän təmɗäre n-älxurmät n-Ŷisa d-meddən wi n-əssin ɗär-ännibɗəd.

³³ Älwəqq wa d-igilləw Mosa d-Ƴəli, innä Bətrus i-Ŷisa: «Äɗalim, ufa ad-nəzzäx ɗas diha-däx, nəkrəs kərəɗ ihəktan: wa-näk, wa n-Mosa d-wa n-Ƴəli.» Wär-issen Bətrus a ijanna.

³⁴ Ijanna a-wen-däx a-s tän-dd-təlsa tele n-tejəräkt tiyyät, ärmäxän.

³⁵ Izjār-dd eməsli tejəräkt-en innän:

«A-wa Rure-x wa n-iiyyän äsnəfränäx, säjdät-as!»

³⁶ A-s imda mäjräd-ənnin-däx, wär t-illa ere dd-äqqimän dihen-däx a säl Ŷisa. Ässosämän inəttulab fäll-a-wa ənhäyän däx-išilan-win-däx, wär t-illa ere däx-jan isälan.

Äzozäy Ŷisa alyad təjraw tašəkärkärät
(*Mätti 17:14-18; Marqəs 9:14-27*)

³⁷ Ašäl wa ilkämän i-wen, älwəqq wa dd-äzzubbät Ŷisa d-inəttulab-net taɗayt, təlkəɗ-as-dd tamətte täjjeet.

³⁸ A əndərrän ähaləs iyyän da-däx, idkäl eməsli-net, innä: «Äɗalim, aɗən təhanint i-ara-nin s-ənta ɗas a leɗ.

³⁹ E-d t-irmäs alšin wa t-ihän-däx, ad-isaxərat, itišbərɗil, isakəffaw, isiləbbud-t, šärnaš ɗär-s ibiɗdəw,

⁴⁰ əttäräx däx-inəttulab-näk ad-däx-s t-əkkəsän mäšan, indär-asän.»

⁴¹ Äwwežäb-asän, inn'-asän: «Ya əzzurəyät-i-däx wärät tomen s-Mässinäx, täniməšräy-as, hundäx har əmme əlleɗ jere-wän, əşbaräx-kəwän?» Innä i-ähaləs ɗarät-a-wen: «Awəy-ahi-dd rure-k.»

⁴² Ikka-dd alyaq Ŷisa a-s t-ässoda alšin, ad-itišbärđil mäšan, äsmähäđ Ŷisa fäll-alšin, izzäy alyaq, ässoxäl-t i-ti-s.

Äsihe wa s-əssin d-itajj Ŷisa isälan n-tamättant-net d-tänäkra-net
(Mätti 17:22-23; Marqəs 9:30-32)

⁴³ Äkunän äddinät iket-däx-näsän fäl tössəba n-təmyäre n-ijitän n-Mässinäx. Inhäy Ŷisa a-s äkunän däx-a-wa itäjj xas, innä i-inəttulab-net:

⁴⁴ «Ejjəšnet isälan-wi-däx timəzzujen-näwän: Ägg-ägg-adəm, išwar ättirmäs, ijjəš ifassän n-dägg-adəm.»

⁴⁵ Wär-əjrehän mäjräd-wen-däx hasän-ija, ättunkäl-asän älmäxna-net i-ad-wär t-järrähän hakd a-wen-däx, äksuđän ad-t-səstənän d-älmäxna-net.

Mijraw wa n-tidət
(Mätti 18:1-5; Marqəs 9:33-37)

⁴⁶ Tənkär đarät-a-wen tamxənnant täšsoohet jer-inəttulab i-ad-əlmədän əndek däx-sän wa ojarän.

⁴⁷ Iyrä Ŷisa edäwänne n-ulhawän-näsän xas, idkäl-dd ara iyyän, ij'e edes-has,

⁴⁸ inn'-asän: «Ere äsbälälän ara-wa-däx, däx-äddimmät-in, näkk a äsbäläl, ere wa hi-äsbälälän, wa hi-dd-äšmašälän a äsbäläl; wa däx-wän äsräsän iman-net, ənta a-s wa ojarän.»

(Marqəs 9:38-40)

⁴⁹ Issəstän-t ənəttalib-net Exya, inn'-as: «Älyalim, nənhay äwadəm iyyän itakkäsän alšinän däx-äddinät s-tärna n-isəm-näk, nənn'-as, wär-tilset, ed wär hanäx-ihä s-alkum-hak.»

⁵⁰ Inn'-as Ŷisa: «Wär has-t-təgdeläm fäl-a-s ere wärän käwän-iknes-däx, a-di, amidi-näwän.»

Tikawt n-Ŷisa i-Yäruşsalam

⁵¹ Ohäzän-dd išilan-wi d-ila Ŷisa s-ad-t-iba, inkär-dd jer-inəmmuttan, äkk išənnawän xas, təjjäš-dd tärha n-tikawt n-Yäruşsalam ənniyät-net s-äššahät.

⁵² Issəglä inämmašälän data-s, ässok'-en taXRəmt tiyyät n-Sämari i-ad-has-əjrəwän ehän däx-äzzubbät

⁵³ mäšan, unjäyän käl-taXRəmt-ten-däx s-ad-hasän-imjurət, ed ija tam-dujt ta n-Yäruşsalam.

⁵⁴ Inhäy Yaquub d-Exya a-wen xas, ənnän-as: «Älyalim, wi hi-äddinät, äyy-anäx ad-fälla-sän dd-nəzəzzubbət efew tän-ilhäsän.»

⁵⁵ Innäđ-dd sār-sän Ŷisa, äsnärxäm fälla-sän, inn'-asän: «Wär tössenäm a jännem,

⁵⁶ Ägg-ägg-adəm wär dd-osa i-ad-ilhəs äddinät, osä-dd i-ad-tän-ixləs.» Okäyän đarät-a-wen s-taXRəmt säl-ten.

Kəssən n-iman däx-alkum i-Ŷisa
(Mätti 8:19-22)

⁵⁷ Əglan däx-a-wen-däx a-s inn' ähaləs iyyän i-Ŷisa: «E-s təkkeđ-däx, əlkamäx-ak.»

⁵⁸ Inn'-as Ŷisa: «Ibäggan lan tihaliwen, igdađ lan iskak mäšan, Ägg-ägg-adəm, wär ila wälä edägg däx-issənsa eXäf-net.»

⁵⁹ Innä Ŷisa i-ähaləs iyyän đarät-a-wen: «Əlkəm-ahi.» Inn'-as wa: «Älyalim, äkf'-ahi turhajät n-ad-əgläx äzkäx abba-nin, äqqələx-käy-dd, əlkəmäx-ak.»

⁶⁰ Inn'-as Ƴisa: «Äyy inəmmuttan ad-əzkən inəmmuttan-näsän, käyy, egləw äj i-äddinät isälan n-Təmmənəya n-Mässinäx.»

⁶¹ Inn'-as iyyän daɣ: «Äɣalim, ärheɣ ad-hak-əlkəmäx məšan, äkf'-ahi turhajät n-ad-äjäx isənnäɣlaf d-äddinät-in təzzar.»

⁶² Inn'-as Ƴisa: «Ere issəntän azzal wa n-älxidmət i-Mässinäx təzzar, ad-işanäşlam ɗara-s, a-di, wär-änhäjja d-Təmmənəya n-Mässinäx.»

10

Inəttulab wi n-əssayät timərwen d-əssin äsmaşäl Ƴisa

¹ Äsnäfrän äɣalim Ƴisa ɗarät-a-wen, əssayät timərwen n-änättaḷib d-əssin, äsmaşäl-tän s-əssin-əssin i-ad-has-izarän s-idäggan wi s-ikittəw ad-tän-immär.

² Inn'-asän: «Aşəkrəş äggolät, əttəxam ijjət məšan, wär-əjjətän inaxdimän t-oläynten, ädölät məssi-s n-aşəkrəş i-ad-dd-işəmmişəl inaxdimän oläynten aşəkrəş-net.

³ Säjdät! Äglät, äşimaşäläx-käwän i-ad-talähäm d-ikərwatän əllanen jer-tiɣəs.

⁴ Wär tiwəyät äzrəf, wäla šakkoş, wäla tifädelen, wär käwän-şəllunet isofan dəx-tabarät.

⁵ Ehän təjjäşäm-däx, äjrat fälla-s ässälam s-tizarät.

⁶ Kunta ehän-en, izzaɣ-t ägg-älxer, ad-käwän-isəbbärrək, äns fälla-s älxer-näwän, kunta daɣ wär t-ihä ägg-älxer, ad-iş, akəyät d-älxer-näwän.

⁷ Afäl təjrawäm ehän wa n-ägg-älxer, əzzäɣät dəx-s, təksəm, təswəm a-wa käwän-mad-äkf məssi-s fäl-a-s, hak änaxdim-däx, ärhuj-as älxəq n-tide-net, udayät i-tikawt jer-ihənan.

⁸ Aɣrəm tosäm-däx, äsbärräkän-käwän məssaw-s, äksät a-wa s-käwän-mad-səmməjurun,

⁹ zuzəyät imarhinän-näsän, tənnəm i-məssaw-s: <Təmmənəya n-Mässinäx, tohäz-käwän-dd>

¹⁰ məšan, aɣrəm tosäm, wär käwän-äsbärräkän məssaw-s, ilalät tişarriten-net, tənnəm i-məssaw-s:

¹¹ <Täjjəyhäm a-s wäla-däx äboqqal n-aɣrəm-näwän wa iwärän iɗarän-nänäx, näbbikbäk-in məšan, əlmədät a-s Təmmənəya n-Mässinäx, tohäz-dd.>

¹² Ənneɣ-awän a-s aşäl wa ilkämän, ad-tajär tisanant ta madät-tärməs aɣrəm-en-däx, ta tärmäsät aɣrəm wa n-Sodoma.»

Iɣərman wi fäll-äsmäqqa Ƴisa

(Mätti 11:20-24)

¹³ «Iməskay käl-Qorazin, iməskay käl-Bätsäyda! Älməşşibät ɣas a fälla-wän madän-iɗəw ed ənnär iɣərman wi n-Tir d-Säyda əzzäɣän inəzzulam† a dəx-jänät tikunen-ti-däx jänen ɣur-wän, äru d-əlsän šakutän, əblənbulun dəx-ezəd fäl təmyäre n-tätubt-näsän.

¹⁴ A-wen-däx a fäl aşäl wa ilkämän, ad-käwän ijjəş äddäyyät ojärän wa ijjäşän iɣərman wi n-Tir d-Säyda.

¹⁵ Käwäned-i-ş-i əzzäɣnen aɣrəm wa n-Qäfärnaxum, ma təxeläm? Tordam a-s ad-itimɣar aɣrəm-näwän har awəɗ isənnawän? Xəram-awän! Änn-ak, ad-təhələm ider, wär käwän-dd-e-awäx ar temse.»

† **10:13 10:13** – Ƴur-käl-Älyähud, ere wärän ämoos ägg-Älyähud s-aläşäl meɣ ere wärän ilkem i-äddin-näsän, iket-net, änäzzalim a ämoos. A-wen-däx a fäl tiwsaten ti iyyädnen iket-näsnät, ti n-inəzzulam. — Aşäl-i-däx, änäzzalim, äkafär (ere wärän issen s-Mässinäx).

¹⁶ Innä daɣ Ƴisa i-inəttulab-net: «Ere hawän-äsjädän, näkk a-s äsjäd, wa käwän-irfädän, näkk a irfäd, ere daɣ wa hi-irfädän, wa hi-dd-äšmašälän a irfäd.» Issəmdä Ƴisa mäjräd ɣas, issəglä inəttulab-net i-adhin-səssiwədan ämašal-net.

Uyäl n-inəttulab wi n-əssayät timərwen d-əssin

¹⁷ Əglän inəttulab wi n-əssayät timərwen d-əssin, a-s dd-əqqälän əknan dəɣ-tedäwit. Osän-dd ɣas, ənnän-as: «Äɣalim, wäl' alšinän, rakkäɣän-ənəɣ e-d hasän-näɣra isəm-näk.»

¹⁸ Inn'-asän: «Hannäyäh Iblis har dd-ätrakkät dəɣ-išənnawän šund essam.

¹⁹ Əlmədät a-s əkfey-käwän tärna fäll-taššälen d-tizerdömen d-a-wa ila Iblis dəɣ-tärna iket-net, wär t-illa fäw a äddooben ad-hawän-iɣšəd härät

²⁰ mäšan, wär käwän-isädawatet a-wa s-data-wän rakkäɣän alšinän, änn-ak, isəddəwətet-käwän a-wa s-əktäbän ismawän-näwän dəɣ-išənnawän.»

*Tämeyit n-Ƴisa i-Abba-net
(Mätti 11:25-27; 13:16-17)*

²¹ Täsdäwät tärna n-Unfas Šaddijän Ƴisa älwäqq-wen-dəɣ, innä: «Abba, käyy-i n-Emäli n-išənnawän d-äkall, timələɣ-käy fäl-a-s härätän-widəɣ, təffärät-tän i-iməssorha d-imusänän n-äddunya-ta-dəɣ mäšan, täsnäfaläläd-tän-dd wäla i-aratän. Tidət Abba, käyy a timələɣ ed ädduuttät a-s ənta-den-dəɣ erhet-näk wa ähusken.

²² Wär t-illa a-s wädden ij'-e Abba-nin dəɣ-ifassän-in, wär t-illa ere hi-ijan muzəyät imdan kunta wädden Abba, wär t-illa daɣ ere ijan muzəyät imdan i-Abba kunta wädden näkk-i n-Rure-s-i t-dd-ifälän d-ere wa s-ärhey ad-has-t-zuzəyäh.»

²³ Innä-dd Ƴisa dərät-a-wen s-inəttulab-net, ikkäs-tän-dd s-takše, inn'-asän: «Təndəđ i-tiṭṭawen ti hannäynen a-wa hannäyäm!

²⁴ Ässiilmädəɣ-käwän a-s äsdärhänän ännäbitän äjjootnen d-imänokalän ahänay n-a-wa hannäyäm mäšan, wär t-ənheyän, äsdärhänän mäšällät n-a-wa s-salläm mäšan, wär has-əslen.»

*Ujəš n-tämudre ta täɣlälät
(Mätti 22:34-40; Marqəs 12:28-31)*

²⁵ A əndärrän äɣalim n-Äṭṭäwrät iyyän da-dəɣ dd-inkärän, ija i-Ƴisa asəstan dəɣ-otas irrum-net, inn'-as: «Äɣalim, ma s-leɣ s-ad-t-äjäɣ i-ad-əkkusəɣ tämudre ta täɣlälät?»

²⁶ Inn'-as Ƴisa: «Ma iktabän dəɣ-Äṭṭäwrät, ma dəɣ-s täɣred?»

²⁷ Inn'-as äɣalim, iktab dəɣ-s a-s:
«Ad-tärhəd Emäli-näk Mässinäɣ s-ulh-näk imda,
tärhəd-t s-iman-näk əmdan,
d-äššahät-näk imda d-tayətte-näk təmda,
tärhəd daɣ änhäraj-näk s-əmmək wa s-tärhed iman-näk.»

²⁸ Inn'-as Ƴisa: «Toɣadäd, äj a-wen, ad-təddäräd.»

²⁹ Mäšan irha äɣalim-en ad-ikrəš tidət ɣas, innä daɣ i-Ƴisa: «Mi ämoosän änhäraj-in?»

Tangalt ta n-u-Sämari

³⁰ Inn'-as Ƴisa: «Käla dd-ätrara ähaləs iyyän aɣrəm wa n-Yärussälam s-wa n-Žärriko, igla har fälla-s ođan inaxtafän, ohäɣän a-wa ila, tithəkkin-t har äktäyyät təzzar, əšläyän-as.

³¹ Israd dihen-däx, a-s t-dd-immär u-tikutawen dd-ijan tabarät-ten-däx, inhäy-t mäšan, okäy-t šund wär t-ihənnəy;

³² immär-t-dd iyyän n-u-Lewi, okäy-t ənta-däx.

³³ Mäšan, immär-t-dd u-Sämari dd-ijan tabarät-ten-däx, inhäy-t ɣas, täny'-e tähanint-net,

³⁴ os'-e-hi-dd, ässeräd ibuyəsän-net s-əzzäyt d-asməd n-läynäb, ittäl-tän təzzar, äsnäy-t tasnit-net, äwwäy-t s-tähänzabbut, ittäf-as täməzzuɣt d-tämudre.

³⁵ Äffaw-t ɣas, ikfä əssin ärriyälän n-azrəf ahänzabbu, inn'-as: <Taɣälift-näk ähaləs-i-däx har dd-äqqələx, a fälla-s təbxäsäd-däx, afäl dd-äqqäläx, ad-hak-äzläx.> »

³⁶ Innä ʔisa ɖarät-a-wen i-älɣalim: «Əndek däx-äddinät-wi-däx n-käraɖ wa s-torded a-s ənta a-s änhäraj n-ähaləs-wa oɖän däx-ifassän n-inaxtafän?»

³⁷ Inn'-as: «Wa has-oɖänän tähanint.» Inn'-as ʔisa: «Adiš, əgləw käyy-däx, təjəd šund a-wen-däx.»

Märyäma d-Marta

³⁸ Ifäl ʔisa dihen äddeew d-inəttulab-net här dd-räsän taɣrəmt tiyyät däx-tän-täsbärräk tamäɖt s-isəm-net Marta,

³⁹ təla wälätma-s s-isəm-net, Märyäma. Täqqiima Märyäma ɣur-älɣalim ʔisa, ad-sajad i-a-wa ijänna,

⁴⁰ a-s ija a-wen Marta ənta, tədgaɣ däx-imjora n-ʔisa. Tähoja ɣas, təjjäš-dd fälla-sän, tənn'-as: «Äɣalim, ajän wär käy-ikma a-wa s-täqqiima wälätma-ɣ wär hi-tilal s-əššäxəl, änn'-as, ad-təbdəd tilal-ahi.»

⁴¹ Inn'-as ʔisa: «Marta, Marta! Tozaräd däx-a äjjeen wärän infa härät,

⁴² härät iyyän a ilan tənfa, wen ənta, täsnäfrän-t Märyäma, wär-ilkem daɣ ad-däx-s ämehäx.»

11

Abba-nänäx wa ihän isənnawän (Mätti 6:9-13; 7:7-11)

¹ Ašäl iyyän, itəddal ʔisa Mässinäx däx-edägg iyyän, issəmdä ɣas, inn'-as iyyän däx-inəttulab-net: «Äɣalim, səlməd-anäx tamädilt n-Mässinäx šund a-wa ija Exya i-inəttulab-net.»

² Inn'-asän ɖarät-a-wen: «E-d təddaläm Mässinäx, ännät:

<Abba,
səmyärnet äddinät isəm-näk wa šäddijän,
taset-dd Təmmənəya-näk,

³ äkf'-anäx hak ašäl isudar-nänäx,

⁴ äns-anäx ibäkkadän-nänäx ed näkkäneɖ-däx,

nənašš i-wi hanäx-ɖallämmen,

wär toyyed Iblis äzzurräbät-anäx,

isiɖəw-anäx däx-abäkkad.> »

Akuyəd däx-tamädilt n-Mässinäx (Mätti 7:7-11)

⁵ Inn'-asän daɣ: «Təssanäm käwäneɖ iman-näwän a-s afäl däx-wän ila iyyän amidi har t-osa s-ammäs n-ehäɖ, inn'-as: <Amidi-nin, əffəd-ahi-dd käraɖät tijəlwen

⁶ fäl-a-s leɣ amidi-nin s-iket dd-osa ifal-dd asikəl, äzzubbät ɣur-i, wär-ələx a t-əššəkšäx,>

⁷ tössanäm a-s wär has-mad-änn amidi-net: <Wär hi-täsyäfäd, äbas äddobey tanäkra, ehän ixfal ämära-däx, aratän day önsan.>

⁸ Ällewey-awän a-s kud-däx wär ibded i-ad-t-äkf a-wa däx-s ittär däx-idem n-tëmmidöwa ta n-jere-sän, ad-has-t-äkf fäl tössöba n-täkrakiqt ta mad-has-umas a-wen afäl öslän äddinät i-täkunt ta ija.

⁹ Enney-awän: ädölät Mässinäx, ad-käwän-äkf, ömmäxät, ad-töjröwäm; äxrät-t, ad-hawän-äkawän.

¹⁰ Ere idälän, ad-ikröš, ere immäxän, ad-ijröw; ere ixrän Mässinäx däx-tämäxatert t-tärmasät, ad-has-tät-ikkəs.

¹¹ Endeck abba däx-wän wa s-e-d t-idäl rure-s däx-emän, ad-t-äkf taššält?

¹² Mex öndek wa s-e-d t-idäl däx-tekakit, ad-t-äkf tezerdömt?

¹³ Yas kunta käwäneđ-i n-inälläbäsän, tössanäm isuf n-a-wa oläxän i-aratän-näwän, äb'-ätğama n-ad-wär käwän-ikfa Abba-näwän-i ihän isönnawän Unfas Šaddijän, afäl t-däläm däx-s.»

*Tärna ta n-Ÿisa, wär toher härät d-ta n-Iblis
(Mätti 12:22-30; Marqəs 3:22-27)*

¹⁴ Ikkäs Ÿisa đarat-a-wen däx-ähälös iyyän alšin has-igdalän mäjräd, izjär-t alšin, immöjräd xas, ämoos a-wen täkunt i-äddinät.

¹⁵ Ad-jannen iyyäđ däx-sän: «A-wa tärna n-Abälzäbil, Iblis wa n-ämänokal n-alšinän a-s itakkäs alšinän däx-äddinät.»

¹⁶ Ettärän wi iyyäđnen ad-t-arömen, önnän-as: «Äj data-näx iji n-Mässinäx hanäx-issötbätän a-s tidöt-däx a-s, Mässinäx a käy-dd-äšmašälän.»

¹⁷ Ilmäđ Ÿisa xur-iman-net a-wa ihän önniyät-näsän, inn'-asän: «E d t-illäm öddöwöl s-dd-öqqälän mössaw-s öknasän jer-iman-näsän, ad-t-iba; ehän day wa s-dd-öqqälän mössaw-s öknasän jer-iman-näsän, ad-änd.

¹⁸ Afäl-dd iqqäl Iblis iknas imöššerökän-net, öndek ömmök wa s-e-tähaj tömmönöya-net? Wädden tönnäm näkk, tärna ta n-Abälzäbil a-s takkäsäx alšinän däx-äddinät?

¹⁹ Kunta day a-wa jännem tidöt, adiš inöğğulab wi-näwän öntäneđ, mi tän-ikfän tärna ta s-takkäsän alšinän däx-äddinät? Inöğğulab-näwän endäx a-s ilkam ad-äjjayhön fälla-wän, södlömän-käwän.

²⁰ Mäšan, kunta näkk, tärna n-assökäđ n-Mässinäx a-s takkäsäx alšinän, adiš Tömmönöya n-Mässinäx, töll'-e jere-wän.

²¹ A ikk' ähalös n-anäkfor ijbas fäll-täzoli-net, ixfal ehän-net, ad-ogaz ehäre-net

²² mäšan, afäl fälla-s dd-öda ere t-öjären äşşahät, ad-t-ärn, ahäx däx-s täzoli-net ta fäll-äsifälla, uzan đarat-a-wen ehäre-net.

²³ Elmödät a-s ere hi-wärän irha-däx, a-di, ašanjo-nin; ere day wa hi-wärän itilal s-asdu, ašömmähöš xas a t-işlan.

*A-wa ihän iba n-tätubt tömdat
(Mätti 12:43-45)*

²⁴ E-d izjär alšin äwadöm, ad-äkk tinariwen i-ad-däx-snät immäx i-edägg däx-ässunfa, afäl has-t-äba, ad-änn i-iman-net: <Näkk-i-däx, ma hi-idgazän, äqqöläxet xas ehän-in wa dd-fäläx.>

²⁵ Afäl dd-iqqäl edägg wa ifäl s-tizarät, ad-t-dd-ass ifrađ, ämmujnät.

²⁶ Iglöw älwäqq-wen, awöy-dd össa alšinän t-öjären tälläbäst, öjješän äwadöm-önnin-däx, özzäxän däx-s; umas a-s talxa n-äwadöm-en ta täzzarät, töşşäm i-ta töşräyät.»

²⁷ Ämmiiräd Ƴisa dihen-däx a-s tɔdkäl tamädt tiyyät emäslī-net däx-tamette, tenn'-as: «Təndəd i-täsa ta dd-təzjärad, təndəd i-ifāfan-wi tətṭädäd.»

²⁸ Inn'-as Ƴisa: «Änn-ak, təndəd i-wi sajadnen i-mäjräd n-Mässināx, tamašalän a-wa inna.»

*Isətbat n-a-s Mässināx a dd-äšmašälän Ƴisa.
(Mätti 12:38-42; Marqəs 8:12)*

²⁹ Inhāy Ƴisa a-s tidawän-dd sär-s äddinät xas, inn'-asän: «Əzzurəyät-ta-däx, tenälläbäst, wär tömmäx xas ar ad-ətwəjjən ijitän n-Mässināx data-s mäšan, təlmədet a-s wär däx-s ilkem iji n-Mässināx sāl wa n-ännäbi Yunəs.

³⁰ Əmmək wa s-kāla sär-s ämoos Yunəs iji n-Mässināx i-käl-Nəniba a-s ija kārad išilan däx-täsa n-emän, əmmək-wen-däx daḡ a-s mad-umas Ägg-əgg-adəm iji n-Mässināx i-əzzurəyät-ta-däx.

³¹ Ašäl wa n-tebädde, ad-dd-tənkär tämänokalt ta s-kāla täxkäm fäll-əkall wa n-ajus s-isəm-net Saba, täjjayh fäll-käl-əzzāman-i-däx, səḍləm-tän ed, ənta fäl-dd diha dd-imda äkall i-ad-səjəd i-iməjridän n-sārho wi itäjj ämänokal Suläyman. Säjdät! Ašäl-i-däx, ənhəywät-ak, ill'-e jere-wän ere ojarän ämänokal Suläyman mäšan hakd a-wen-däx, tunjäyäm s-asjəd-has.

³² Ašäl wa n-tebädde, ad-dd-ənkärän käl-aḡrəm wa n-Nəniba, səḍləmän käl-əzzurəyät-ta-däx ed ašäl wa d-hasän-ixtāb ännäbi Yunəs, ätubän. Säjdät! Ašäl-i-däx, ənhəywät-ak, ill'-e jere-wän ere ojarän Yunəs mäšan hakd a-wen-däx, tunjäyäm s-ad-tutabäm.»

*Tangalt ta n-tefätelt
(Mätti 5:15; 6:22-23)*

³³ «Wär t-illa ere isarmasän tefätelt təzzar iffär-tät meḡ tāt-ija daw-əkoss, änn-ak, aswār a tāt-itajj edəgg iḍkalän i-ad-hannäyän äddinät wi dd-tajjāšnen ehän ännur-net.

³⁴ Tiṭṭ-nāk a-s tefätelt n-taḡəssa-nāk. Afäl toolay tiṭṭ-nāk, adiš taḡəssa-nāk, hannäy iket-net mäšan, afäl wär toley tiṭṭ-nāk, taḡəssa-nāk iket-net a ihan tihay.

³⁵ Ƴas he kāyy! Äj ənniyät i-iman-nāk, wär-itumaset ännur-nāk tihay i-taḡəssa-nāk.

³⁶ Afäl ha taḡəssa-nāk iket-net ännur, wär tāt-iha fāw a ihan tihay, ad-tajjäd ahānay wa täjjäd afäl hed edəgg täsimäläwlāw tefätelt.»

*Iməskay käl-faris d-älḡulam n-Äṭṭäwrät
(Mätti 23:1-36; Marqəs 12:38-40; Luqa 20:45-47)*

³⁷ Issəmdä Ƴisa mäjräd xas, issəkl'-e u-faris iyyän xur-iman-net. Osä-dd Ƴisa ehän n-u-faris xas, ikk' edəgg wa däx-əskarän imənsiwän, äšḡämär däx-s.

³⁸ Äkun u-faris däx-a-wa s-issənta Ƴisa tetäte wär-ässeräd ifassän-net s-älxal wa n-käl-Älyāhud.

³⁹ Inn'-as älxalim Ƴisa: «Kāwāneḍ-i n-käl-faris, šašdajäm afälla n-kara d-ikassän wi iyyädnen, a-s ija a-wen, ammas n-ulhawän-nāwän, wär-iḍney ar tikra d-tälläbäst.

⁴⁰ Tidət-däx a-s irmas-kāwän iba n-tayette! Ajän wädden wa dd-ijän afälla n-əkoss, ənta daḡ a dd-ijän ammas-net?

⁴¹ Äktät a-wa ihän karatän-nāwän d-ikassän-nāwän i-tiläqqiwen, dihen, ad-data-wän išdaj härät iket-net.

⁴² Iməskay kəwāneḍ-i n-kāl-faris! Hakkām s-iqqud a-wa āmoosān tāmukāst-nāwān dāḡ-ənnāḡnaḡ d-tiyəššawen-ti iyyāḍnen, a-s ija a-wen, təšlalām-in fäll-a-wa āmoosān iqqud d-tārha n-Māssināḡ, hārātān-win-dāḡ a-s ānihājjā a-s təssəntām sār-sān, səlkəmām-asān amišəl n-wi iyyāḍnen olāḡnen.

⁴³ Iməskay kəwāneḍ-i n-kāl-faris! Tārham tisāqqima ti ānuflāyenen dāḡ-ihānan n-āddin wi n-kāl-Ālyāhud, ijraz-awān ad-hawān-tajjān āddināt isofan dāḡ-tišarriten.

⁴⁴ Iməskay-nāwān fäl-a-s, tolāhām ḡas d-tizəska fäll-irajjāš āwadəm wār-issen s-a-wen, səmməḍəsnāt-t.»

⁴⁵ Inna iyyān dāḡ-ālyulam n-Āttāwrāt i-ḡisa: «Ālyalim, kāyy ya nākkāneḍ-dāḡ, jed-anāḡ erk mājrād.»

⁴⁶ Inn'-as ḡisa: «Iməskay kəwāneḍ-dāḡ ālyulam n-Āttāwrāt! Sawarām āddināt āzuk s-izzəwāt aggay-net, a-s ija a-wen, wār kəwān-iha ad-hasān-tilalām s-aggay-net wāla-dāḡ s-emm n-assəkāḍ.

⁴⁷ Iməskay kəwāneḍ-i təqqasnen izəkwan āhuskātnen i-ānnābitān wi ānḡān abbatān-nāwān.

⁴⁸ Īmmək-wen-dāḡ a-s saknem a-s tārḍam s-a-wa jān ed əntāneḍ, ānḡāntān, kəwāneḍ ḡāšām izəkwan-nāsān.

⁴⁹ A-wen-dāḡ a fäl inna Māssināḡ dāḡ-təmyāre n-sārho-net: <Ad-sār-sān-dd-šəmmišəläḡ ānnābitān d-inəmmušaḡ ājjootnen, ad-əjən iman iyyāḍ dāḡ-sān, āqquzzəbun wi iyyāḍnen.>

⁵⁰ Han iman n-ānnābitān wi āba ḡur-sānto n-āddunya har ašāl-i-dāḡ dāḡ-kāl-əzzurəyāt-ta-dāḡ,

⁵¹ issəntā-dd a-wen ḡur-iman wi n-Xābālla-i āba s-tizarāt fäll-ākall-i-dāḡ har iman wi n-Zākārya wa n-āmānokāl n-kāl-tikutawen wa išrāyān s-inḡāl ašni-net dāḡ-ehān n-āmudd wa māqqārān, jer-edāgg wa n-tikutawen d-edāgg wa šāddijān. Tidət, āssiilmādāḡ-kāwān a-s āddināt-win-dāḡ, əḍmanān iman-nāsān iket-dāḡ-nāsān dāḡ-kāl-əzzurəyāt-ta-dāḡ.

⁵² Iməskay kəwāneḍ-i n-ālyulam n-Āttāwrāt! Təttāfām asāyar wa n-musnāt māšan, wār ləmmədām, āddināt dāḡ wi ārhānen almud, tənkažām-asān-t.»

⁵³ A-s ifäl ḡisa ehān-ənnin-dāḡ, samādadān ālyulam d-kāl-faris fälla-s, tajjān-as isəstanān ājjootnen

⁵⁴ dāḡ-otasān ad-t-səwwənnən a wārān oḡed, i-ad-əjrəwān āsaru s-t-əssəḍlāmān.

12

He kəwāneḍ təlmənuḡāḡ!

¹ Darāt-a-wen, tāddew-dd tamətte-i-dāḡ tājjət s-ḡisa har dd-āqqimān āddināt tinməkukulān. Innā ḡisa i-inəttulab-net s-tizarāt: «Ājāt ənniyāt i-tāzza ta n-təlmənuḡāḡ n-kāl-faris.

² Wār t-illa a āttunkālān s-wādden ad-dd-infiləl, wār t-illa a iffarān s-wādden ad-dd-iffukkār.

³ A-wen-dāḡ a fäl, a tənnām dāḡ-takše-dāḡ, ad-dd-iffukkār, a tasmātāktākām dāḡ-ammās n-ihānan-nāwān-dāḡ, ad-t-sāqqəyən āddināt fäll-afälla n-ihānan-nāsān.»

*Uksaḍāt Māssināḡ wādden dāgg-adəm
(Mātti 10:28-33, 19-20; 12:32)*

⁴ «Kāwāneḍ-i n-imidiwān-in, ənney-awān: wār tāksuḍām dāgg-adəm-i wāren äddobāt ar tenäxe n-taxəssa-nāwān, wār t-illa a äddoben sāl a-wen-däx.

⁵ Äyyät-ahi ad-hawān-älläxey ere wa s-təlam s-ad-t-tuksaḍām: Uksaḍāt Mässināx-i inaqqān, ila daḡ ḍarāt-a-wen tārna s-kāwān-in-ijār dāx-žohännāma, tidət, ənta-en-däx a-s lam s-ad-t-tuksaḍām!

⁶ Ƴur-wān, wādden təssanām a-s iba n-təfərre n-tošəmba a fäl hin-nazzān səmmos dāx-sān sānatāt tammaten? Hakd a-wen-däx, wār tən-ihā i hin-itatāwa Mässināx,

⁷ wār tärmeḡām, wāla amzadān n-eḡāf-nāwān, āḍinān, tojārām abrək n-igḍaḍ älqim.

⁸ Älleḡey-awān a-s ere äsjäyhān dāgg-adəm a-s näkk a t-ilān, ad-äjjayhāx näkk-däx i n-Ägg-ägg-adəm dat-änjālosān n-Mässināx a-s āwadəm-en, i-nin.

⁹ Ere daḡ wa hi-äkkuddälān dat-dāgg-adəm, ad-t-əkkuddälāx näkk-däx dat-änjālosān n-Mässināx.

¹⁰ Ere innān a läbasān dāx-isālan n-Ägg-ägg-adəm-däx, äddobāt ad-ijrəw tenäšše n-a-wen māšan, āwadəm wa äskafārān dāx-isālan n-Unfas Šaddijān, wār-ilkem ad-has-in-ätiwānša.

¹¹ Afäl tāmewāyām s-äššäreḡa dāx-ihānan n-äddin wi n-kāl-Älyāhud, meḡ daḡ dat-kāl-äššäreḡa d-əlxəkum, wār kāwān-itäšāwwašet əmmək wa s-mad-təhələm iman-nāwān wāla a-wa mad-tənnəm,

¹² afäl älwäqq wa d-tamājradām, Unfas Šaddijān a kāwān-e-isäḡrən ässaḡāt-wen-däx a-wa s-änihājja s-ad-tān-tənnəm.»

Tārha n-hārät sajrāw hārät

¹³ Ijanna Ƴisa a-wen-däx a-s dd-iggād āwadəm iyyān dāx-tamətte, inn'-as: «Älyalim, änn i-änḡa-ḡ a dār-i uzan tākasit-nānāx.»

¹⁴ Inn'-as Ƴisa: «Ähaləs, mi hi-ijān älqalli-nāwān tuzanāx-awān tākasit.»

¹⁵ Inna Ƴisa i-tamətte ḍarāt-a-wen: «He kāwāneḍ! Agəzāt iman-nāwān dāx-tārha n-hārät fäl-a-s, ägg-adəm, kud-ila hārät-däx, wādden ärrəzäḡ-net a iḍmanān tāmudre-net.»

¹⁶ Issäḡläy-tān tangalt, inn'-asān: «Kāla t-illa ähaləs n-amärrəzäḡ ilan išekraš has-dd-izajjār älfäyda mäqqoorān.

¹⁷ Inhāy a-s ibbāḡār hullan ḡas, iqqāl-dd ad-ijanna i-iman-net: <Näkk-i-däx, ma mad-äjāḡ, ābas leḡ edägg āwwayān əttāḡam-in?>

¹⁸ Ij' äddābara i-iman-net, innā: <Ad-ärzäḡ ijāndān-in, sädəyāḡ i tān-ojārnen, sädwāḡ dāx-sān älkāma-nin d-a-wa leḡ iket-net,

¹⁹ dihen, ad-ännāḡ i-iman-in: Ya iman-in, sunfāt, təkšəm, təzhəm dāx-tānoflayt, itwar-awān ärrəzäḡ madān-āj iwətyan äjjootnen.>

²⁰ Diha-däx d-issəmda tənna n-a-wen, ad-has-innā Mässināx: <Isəm n-enəbbeddəl, ad-kāy-iba ehād-i-däx, ḡas mi madān-ikus a-wa äjjen täsdāwād?>

²¹ Šund a-wen-däx a madān-irməs ere ijmarān iman-net wār-ikəttəw Mässināx.»

Iba n-ašəwwəš (Mätti 6:19-21, 25-34)

²² Innā Ƴisa ḍarāt-a-wen i-inəṭṭulab-net: «A-wen-däx a fäl hawān-janneḡ: wār kāwān-järrāwnet inəzjam n-a-wa mad-təkšəm d-a-wa mad-təšwəm d-a-wa mad-təlsəm.

²³ Iman-nāwān, ojārān tetäte; ässexāt n-taxəssa-nāwān daḡ, ojār isəlsa.

²⁴ Ëkyödät ɣas dāɣ-izuyaj, wār tødumun, wār tøjlubun, wār len timšiten wāla ijāndān māšan, āssodār-tān Māssināɣ, tufām-tān s-a ājjeen.

²⁵ Ændek ɣas dāɣ-wān wa āddoben s-inəzjam-net, ad-isiwəḍ taɣrəst-net wāla s-a ogdāhān d-emm n-asənnan?

²⁶ Šāmad a ogdāhān d-a-wen-dāɣ təmmətkit wār t-tāddobem, adiš ma dāɣ-tozarām dāɣ-a-wa sāl a-wen?

²⁷ Ëkyödät ɣas dāɣ-tadāwla n-tāboyt: wār zətt, wār zəmməy māšan, wāl' āmānokāl Sulāyman hakd terše-net iket-net, wār kāla ojar tāboyt-i-dāɣ asəssihāɣ n-ašāl.

²⁸ ɣas kunta Māssināɣ isalsa teyəšše n-išəkraš s-ašāl-i-dāɣ təbdaj, ašəkka ad-hin-tāɣ dāɣ-efew s-əmmək-wen-dāɣ, āb' āttāma n-ad-wār hawān-izzəzmāy kāwāneḍ. Təmmətkit ija immun-nāwān!

²⁹ Wār kāwān-daggāznet inəzjam n-a-wa mad-təksəm d-a-wa mad-təswəm.

³⁰ Hārātān-win-dāɣ, kāl-āddunya a ɣallābān. Kāwāneḍ, Abba-nāwān-i ihān isənnawān, wār t-illa a-s tāmiɣatārām s-wādden, issan-t.

³¹ Æmmāɣāt s-tizarāt i-Təmmənəya n-Māssināɣ, dihen, ad-hawān-in-iwwaḍ a-wa iyyāḍān.

³² Tahrut-in ta əndārrāt, wār tərmeɣām fāl-a-s, irha Abba-nāwān, ad-āj Təmmənəya-net dāɣ-ifassān-nāwān,

³³ tužžārāt-in a-wa lām, təktəm-t i-tilāqqiwen, təjəm i-iman-nāwān azrəf iɣlalān d-ijāndān s-wār-iɣəššəd a-wa dāɣ-sān itwārān ed isənnawān, wār tān-hen imākrādān wāla temedhe.

³⁴ Tidət-dāɣ a-s inəzjam n-ulh n-āwadəm, wār təffilān dihad itwār təla-net.»

Ānaxdim wa olāɣān d-wa lābasān

³⁵ «ɣaymāt tasidāwām, tējbasām, tāssirɣām tiftəl-nāwān.

³⁶ Alāhāt d-inaxdimān əqqalnen i-māssi-sān dd-ifalān azli s-tišrayāt n-ehāḍ s-ad-dd-itis ɣas, oran-as emm n-ehān.

³⁷ Təndəḍ i-eklan-en-dāɣ dd-mad-agəz māssi-sān okayān āssaɣāt s-tān-dd-osa-dāɣ. Āsidätteɣ-awān a-s afāl tān-dd-osa, ad-ijbəs ənta iman-net, isāqqaym'-en, isəmmənsəw-tān.

³⁸ Jer-iqqāl-dd s-tišrayāt n-ehāḍ wāla s-emāɣār, təndəḍ i-inaxdimān-wi dd-mad-agəz okayān.

³⁹ Wādden kāwāneḍ iman-nāwān təssanām a-s ənnār issan māssi-s n-ehān āssaɣāt wa s-t-dd-itis emākrād s-ehāḍ i-ad-ärz ehān-net, iket-di, wār-itəttəs i-ad-has-ärz emākrād ehān-net.

⁴⁰ Kāwāneḍ-dāɣ, ɣaymāt tāsidāwām, tāɣtafām ed Ägg-ägg-adəm, ad-dd-ass s-āssaɣāt d-wār fälla-s jem.»

(Mätti 24:45-51)

⁴¹ Iggād-dd Bətrus, innā i-Ŷisa: «Āɣalim, nākkāneḍ ɣas a tāssiɣlāyād tangalt-ta-dāɣ meɣ nohar-tāt d-āddināt-wi iyyāḍnen?»

⁴² Inn'-as āɣalim Ŷisa: «Ændek ānaxdim wa n-ägg-ärkāwāl ijarahān hārāt? Ēnta-en-dāɣ a mad-isāɣləf māssi-s ehān-net i-ad-ituzān imənsiwān i-inaxdimān-wi iyyāḍnen.

⁴³ Təndəḍ i-akli wa dd-mad-agəz māssi-s āddunkāt dāɣ-ālxidmāt wa dāɣ-t ija, ālwāqq s-t-dd-osa-dāɣ.

⁴⁴ Āsidätteɣ-awān a-s wen ənta, ad-t-isāɣləf māssi-s ehäre-net iket-net

⁴⁵ māšan, ānaxdim wa innān dāɣ-iman-net: «Nākk, māssi-ɣ āhoja-hin fäll-i», oḍa ḍarāt-a-wen dāɣ-inaxdimān d-tinaxdimen ti iyyāḍnen, ad-tān-itəggat, itatt, isass əlxəmār har t-ijmāḍ ənniyāt,

⁴⁶ ānaxdim-en, ilkam ad-t-dd-iydār māssi-s dāy-ašāl d-āssayāt d-wār fälla-s ija, ilməd s-erk əššāxəl wa t-išlān a ija a-wa-dāy; afāl t-dd-osa, ad-t-iqquzzəbət, isärtəy-t d-ināmāšrayān dāy-edāgg wār-iha ar tahāla d-azəmmākärkəz n-isenān fāl tāmujrižt.

⁴⁷ A-wen-dāy a fāl ānaxdim-wa issanān erhet n-māssi-s, äqqima wār t-ija, əlkamnāt dāy-s tiwit äjjootnen

⁴⁸ māšan, ānaxdim-wa wārān issen erhet n-māssi-s, ija a wārān oxed, ad-ijrəw tiwit wāren əjjət. Ere ijrawān a äjjen, ad-dāy-s itwəttar a äjjeen, ere iylafān a māqgoorān, ad-dāy-s itwəttar dāy ad-dd-ikkəs a māqgoorān.»

Išmal n-āzzāman

(Mätti 5:25-26; 10:34-36; 16:1-4; Marqəs 8:11-13)

⁴⁹ Inn'-asān Yisa dərāt-a-wen: «Oseḡ-dd i-ad-särḡāḡ efew fäll-ākall, āsidārhanāḡ a-s äru d-irḡa.

⁵⁰ Ilkam dāy-i atwəsəlmaḡ s-wār mad-sunfāḡ fāw wār-ija.

⁵¹ Ak täxelām älyafyāt a-s dd-oseḡ i-ad-t-äkfāḡ i-ākall? Äbo, ənnex-awān, tərbəddawt a sār-s dd-āwwāyāḡ.

⁵² Yur-ašāl-i-dāy, wāla-dāy ehān han səmmos äddināt, ad-ənməkšārān jer-iman-nāsān, ad-əššunjun wi n-kāraḡ wi n-əssin, əššunjun dāy wi n-əssin wi n-kāraḡ.

⁵³ Ad-ibḡəw abba d-rure-s, ibḡəw alyaq d-ti-s, təbḡəw anna d-elle-s, təbḡəw talyaqd d-ma-s, təbḡəw taḡäggalt d-hānne-s n-rure-s, təbḡəw tamāḡt d-taḡäggalt-net.»

⁵⁴ Innā Yisa dāy i-tamətte: «Wādden e-d tənḡāyām tejärākt təzjar-dd s-emāynāj, ad-tənnəm: <Os'-anāḡ ajənnā>, äj a-wen s-əmmək-wa-dāy s-tān-tənnām;

⁵⁵ e-d tənḡāyām dāy aḡu wa dd-ihan s-afälla, ad-tənnəm: <Ilkam dāy-nāḡ ašāl äkkuusān>, äj a-wen s-əmmək-wa-dāy s-tān-tənnām.

⁵⁶ Älmunafexān a tāmoosām! Kāwāneḡ-i əssānnen teḡäre n-išmal wi n-išənnawān d-ākall, uhən-dāy, indar-awān ad-təfhəməm äzzāman wa fälla-wān ijān ašāl-i-dāy.

⁵⁷ Mafāl wār tāddobem ad-təlmədām ḡur-iman-nāwān iji n-a-wa olāḡān?

⁵⁸ E-d kāy-iḡra ere kāy-āsiwārān uḡlem s-āššäreḡa, əttār əmmək s-dār-s tānmāknād härwa wār hin-tāwwəḡām ehān wa n-āššäreḡa, dihen, wār mad-kāy-irməs ägg-āššäreḡa, äj'-ik dāy-ifassān n-əlxəkum ed, əlxəkum afāl təjjāšād ifassān-net, ad-kāy-äj dāy-takārmüt.

⁵⁹ Äsidätteḡ-ak a-s edāgg-en, wār mad-t-dd-təzjārād a təkāsād wār zelād har tāmma ta kāy-irwäs.»

13

Utabāt iket-di!

¹ Ämmiirād Yisa härwa a-s t-dd-osān äddināt has-jānnen isālan n-aḡāras wa ija Bilatəs wa n-āmānokāl n-teje ta n-Älyāhudəyāt i-meddən n-Galila təzzar, issärtāy ašni-nāsān d-wa n-tikutawen-nāsān.

² Inn'-asān: «Ak tordam a-s käl-Galila win-dāy ənhaynen tamättant-ten-dāy səmmāt, ojārān käl-Galila-wi iyyäḡnen tumast n-inäsbökkāḡan?

³ Fāw, māšan, āsidätteḡ-awān kāwāneḡ-dāy, a-s afāl wār tätubām, ad-təjem tamättant šund-ten-dāy.

⁴ Mey day tordam a-s meddøn wi n-märaw d-øttam hänen Yärussälam fäll-dd-oda äxalla wa n-täsahaŷt ta s-itawänna ta n-Silwi inŷ'-en, tordam a-s ojarän käl-Yärussälam wi iyyäðnen tumast n-inäsbäkkadän?

⁵ Fäw, mäšan, äsidätteŷ-awän day a-s afäl wär tätubäm, ad-tøjøm tamättant šund-ten-däŷ jän.»

Tangalt n-ahəšk-wa wärän infa härät

⁶ Issäxläy-tän-dd day tangalt tiyyät däŷ-hasän-innä: «Käla äddomät ähaləs ašar däŷ-ašəkrəš-net n-läxnäb, iwwäð-dd äzzäman n-tirwe-net ŷas, osä-dd i-ad-däŷ-s ijrəw a län aratan mäšan, wär t-illa a fälla-s ijrəw.

⁷ Innä i-änaxdim n-ašəkrəš: «Awätay wa s-kärað da-däŷ tisäŷ-dd, jaräŷ ätṭäma n-ad-əjrəwäŷ aratan däŷ-ašar-wa-däŷ mäšan, wär t-illa a t-dd-ijammäðän, ämära, äŷtəs-t-in ed, äsinäkmäm edägg bännan.»

⁸ Inn'-as änanxdim: «Mässi-ŷ, ärheŷ däŷ-k ad-t-töyyəd tene-ta-däŷ ŷas, ad-äŷəšäŷ dawa-s, äjäŷ dawa-s ädanda,

⁹ iha miši s-awätay wa dd-imalän, ad-ikrəš aratan, afäl wär-ija a-wen, äŷtəs-t-in.» »

Äzozäy ŷisa tamäðt äsikäränbäy Iblis däŷ-ašäl n-əssəbət-i n-täsonfat

¹⁰ Ašäl iyyän n-əssəbət, isaŷra ŷisa däŷ-ehän n-äddin wa n-käl-Älyähud.

¹¹ Təll'-e dihen tamäðt lat märaw iwətyan d-øttam iṭṭaf-tät alšin tät-äsikäränbäyän har äbas täddobät iqqud n-tebädde-net.

¹² Inhäy-tät ŷisa, iŷr'-et, inn'-as: «Tamäðt, älyib-näm, təbðed dər-s.»

¹³ Äswär-tät ifassän-net, toŷäd tebädde-net älwäqq-wen-däŷ, ad-tiiməl Mässinäŷ.

¹⁴ Inhäy älfäqqi n-ehän n-äddin a-s äzozäy-tät ŷisa däŷ-ašäl n-əssəbət ŷas, ijjäš-t älhäm fälla-s, inna i-tamətte: «Ajän wädden säðis išilan a t-əllanen i-älxidmät, tisät-dd däŷ-išilan-win-däŷ, töyyəm-dd ass ašäl wa n-əssəbət-i n-täsonfat.»

¹⁵ Äwwežäb-as ŷisa, inn'-as: «Älmunafəŷän, ajän ih'-iwän-i s-wädden itir awdes-net meŷ ešəð-net däŷ-ašäl n-əssəbət i-ad-t-išrəj?

¹⁶ Ma hawän-ijrawän, ad-təfhämäm ašəroj n-awdes-näwän meŷ ešəð-näwän däŷ-ašäl n-əssəbət-i n-täsonfat, a-s ija a-wen, indar-awän, ad-təfhämäm azuzi wa jeŷ i-tahäyawt-ta-däŷ n-Ibrahim lat märaw iwətyan d-øttam iṭṭaf-tät Iblis däŷ-tišəm-net.»

¹⁷ Innä ŷisa a-wen ŷas, təlsa täkrakidṭ imiksänän-net iket-näsän, täqqäl-dd tamətte ənta, täddiiwät däŷ-təssəba n-timašalen-ti ähuskätnen itäjj.

*Tangalt ta n-temätäwt d-täzṣa
(Mätti 13:31-33; Marqəs 4:30-32)*

¹⁸ Inna ŷisa day: «Ma dər-toläh Təmmənəya n-Mässinäŷ? Ma dər-tät-mad-səssiləhäŷ?

¹⁹ Toläh d-temätäwt-ta tojarät təmmətkit äddomät äwadəm däŷ-ašəkrəš, tədwäl-dd, täqqäl ahəšk, ad-ṣattän igdäð iskak-näsän däŷ-iləktan-net.»

²⁰ Inn'-asän day: «Ma dər-e-səssiləhäŷ Təmmənəya n-Mässinäŷ?

²¹ Toläh d-takməttet n-täzṣa təssärtäy tamäðt d-kärað ännäfəŷatän n-əjel n-älkäma i-ad-ikəf iket-net.»

*Emm wa kärruzän itiyədän s-älžännät
(Mätti 7:13-14, 21-23)*

²² Ifäl ŷisa dihen ŷas, ällil iŷärman d-tidbi iket-näsnät, isaŷra äddinät, ija tabarät ta n-Yärussälam.

²³ Igla a-s has-innä ähaləs iyyän: «Älyalim, wädden äddinät wi maden-əjjəš älžännät, wär-əjjətän?»

²⁴ Innä Yisa i-tamətte: «Bällänät i-ad-təjjäšäm s-äššahät tämudre ta n-tidət s-emm wa kärruzän fäl-a-s, äsidättey-awän a-s äddinät äjjootnen, ad-əttärän ujəš-net mäšan, ad-hasän-indär.

²⁵ Afäl iyfäl mässi-s n-ehän tashärt n-ehän fäll-iman-net, ad-dd-təbdədäm data-s ad-tät-takäwkawäm, çarräm-t, jannem-as: «Mändam, mändam! Arr-anäx-in emm n-ehän» mäšan, ad-hawän-änn: «Älyafyät-näwän, wär käwän-əzzeyäx, wär əssenäx əndek siha s-dd-häm;»

²⁶ tənnəm-as daç: «Ajän wädden, nohär dār-k išəkša d-isəswa, təssäçräd däç-tišarriten n-iyärman-nänäx?»

²⁷ Mäšan, ad-hawän-änn: «Ya inäsbäkkadän-i-däç, näkk ya wär käwän-əzzeyäx, äjəjat-ahi.»

²⁸ Ašäl-wen-däç, ad-täj tahäla d-açəmmäkärkəç n-isenän fäl tämujriçt, ed ad-tənhəyäm Ibrahim d-Isxaqq d-Yaqub d-ännäbitän iket-däç-näsän äççiiimän däç-Təmmənəya n-Mässinäç, a-s ija a-wen käwänəç, ejer a-hin-mad-tətwejjəm däç-žohännäma.»

Täçart-ta jän ulhawän n-käl-Yärussäläm

²⁹ «Ašäl-en, ad-dd-əfəlen äddinät emäynäj d-atäram d-afälla d-ajus, änxəymən däç-amäjaru wa madän-äj däç-Təmmənəya n-Mässinäç.

³⁰ Ašäl-en, ənhəywät! Wi hänen ajilal, ad-izarän, wi äzzarnen, ad-əjjəšan ajilal.»

Tälläbäst ta ija Harudəs

(Mätti 23:37-39)

³¹ Ohäzän-t-dd härät däç-käl-faris, ənnän-as: «He käyy, jawäç fäl-a-s, irha Harudəs ad-äj iman-näk.»

³² Inn'-asän: «Äçlät, ännät i-isəm n-ebägg-di a-s näkk, takkäsäç alšinän däç-äddinät, zizuyäç ašäl-i-däç d-ašəkka, ašäl wa s-käraç, ad-imdəw a-wa hi-išlän.

³³ Äduuttät a-s əkkeç Yärussäläm ašäl-i-däç d-ašəkka d-ašäl-wen fäl-a-s, wär-ämmukkän ad-ib' ännäbi däç-edägg säl Yärussäläm.»

Ilha Yisa fäll-Yärussäläm

(Mätti 23:13-39)

³⁴ Innä Yisa: «Yärussäläm, ya Yärussäläm! Tamäskoyt kämm-i täjjät iman n-ännäbitän, hakkäd sämmäçori n-tihun inəmmušal wi särm dd-ašmašäl Mässinäç, əndek ças a-wa-däç wär jəç däç-utär n-asdu n-imuzäçän-näm šund a-wa täjj tekäççit i-ikärtän-net daw-tafriwen-net mäšan, təssəndäräd-ahi.

³⁵ Ämära, isälan əmdän, ad-käwän-äyy Mässinäç d-iman-näwän, umas açrəm-näwän timšar, wär-ilkem ad-hi-tənhayäm hundäç har ašäl wa d-mad-taləsäm tənna n-a-s: «Näkfet wa dd-osän däç-isəm n-Emäli semçar.»

14

Äzozäy Yisa ähaləs s-äsiläfafäçnät tikussawen eläm-net

¹ Ašäl iyyän daç n-əssəbət-i n-täsonfat, ikla Yisa çur-iyyän däç-imänokalän n-käl-faris, jan-as dihen äddinät iket-näsän ənniyät.

² A əndärrän ähaləs iyyän da-däç s-äsiläfafäçnät tikussawen taçəssa-net iket-net,

³ issəstän Ƴisa käl-faris d-älyulam-wi t-əllänen dihen: «Ak xälal mey xāram, ad-izuzəy āwadəm āmarhin dāx-ašäl n-əssəbət-i n-tāsonfat?»

⁴ Wār t-illa a has-ənnan Ƴas, idās āmarhin, āzozäy-t, issəgl'-e.

⁵ Inn'-asän ɗarāt-a-wen: «Əndek dāx-wān wa s-afäl oɗa rure-s mey awdes-net dāx-anu ašäl wa n-əssəbət-i n-tāsonfat ad-t-äyy dāx-s har akəy ašäl-en təzzar?»

⁶ Äbä-hasän-dd a has-ənnän.

Asrəs n-iman d-imäjarän

⁷ Ijräh-in Ƴisa asənnəfrən wa täjjän imäjarän i-idəggan wi ännufläyenen dāx-ehän Ƴas, issäxläy äddinät-wi dd-əklänen dihen tangalt, inn'-asän:

⁸ «E-d kəwän-āsmäjarät āwadəm s-edəgg n-azli, wār täsnäfränäm idəggan-wi t-əllänen s-data ed, äddobät ad-dd-ass āwadəm kəwän-ojarän atwəsəmyār,

⁹ änn'-awän mässi-s n-ehän, ad-tənkäräm, təkfəm-t edəgg. Ad-hawän-umas a-wen täkrakiɗt ed, ad-kəwän-təhhuššəl tebädde dat-äddinät iket-näsän, täqqəläm ɗara-sän.

¹⁰ Ufa a-s kəwän-dd-āsmäjarät āwadəm, ad-təkkəm ɗarät äddinät iket-näsän, täqqayməm, dihen, afäl dd-ijjāš mässi-s n-ehän, inhäy dihad täqqimäm, ad-kəwän-dd-iɣār, änn'-awän: «Ƴyyäwät, Ƴaymät s-data.» Ad-hawän-umas a-wen səmyār mäqqoorän dat-äddinät wi ɗär-täniɣäymäm.

¹¹ Ere idkälän iman-net ad-irəs, ere äsräsän iman-net, ad-itwəsəmyār.»

¹² Innä Ƴisa ɗarät-a-wen i-u-faris wa t-dd-āsmäjaren: «E-d dd-simjurud äddinät s-ehän-näk, s-ašäl wāla s-ehäd, wār dd-täsmäjared imidiwän-näk d-ayətma-k d-išäqqaqān-näk d-änhäräjän-näk wi länen härät fäl-a-s, əntäned, äddooben ad-hak-dd-suxələn azäbäna,

¹³ änn-ak, e-d, tärhed asəmməjəru n-äddinät, äɣār-dd tiläqqiwen d-imäsjätäɣän d-inəbdan d-iməddorɣal.

¹⁴ Təndəɗ-ak ed, əntäned wār-äddooben ad hak-əzələn älxer wa hasän-jed, Mässinäɣ a ɣur-hak-t-əllan imraš n-a-wa jed ašäl wa n-tebädde.»

Isälan n-amäjaru wa mäqqārän

(Mätti 22:1-10)

¹⁵ Isl' iyyän dāx-imäjarän i-a-wa inna Ƴisa Ƴas, inn'-as: «Təndəɗ i-ere wa madän-äks dāx-imjora-wi madän-äj dāx-Təmmənəya n-Mässinäɣ.»

¹⁶ Inn'-as Ƴisa: «Käla t-illa ähaləs ijän amäjaru-i-dāx mäqqārän, äsmäjarät-dd sär-s äddinät äjjootnen.

¹⁷ Ämmujnen imənsiwän Ƴas, äšmašäl änaxdim-net s-äddinät wi dd-iɣra i-ad-hasän-änn: «Härätän ämmujnen, täwwäɣäm-anäɣ»

¹⁸ mäšan, ässälähän-as isoran iket-dāx-näsän. Inn'-as wa äzzarän: «Iket əžžənšəɣ ašəkrəš, ärheɣ ad-t-asəɣ, ənhəyäɣ-t təzzar, äns'-ahi-dd.»

¹⁹ Inna wa iyyäɗän: «Iket əžžənšəɣ märaw iwdesän-wi s-mad-äxdəməɣ išəkraš-in, ärheɣ ad-tän-arəməɣ təzzar, äns'-ahi-dd.»

²⁰ Inn'-as wa s-käraɗ: «Iket dd-əzzəzläyäɣ, wār-äddobey ad-hin-asəɣ.»

²¹ Iqqäl-dd akli, ij' isälan i-mässi-s Ƴas, ijjäš-t älhäm fäll-äddinät-win-dāx; innä i-änaxdim-net ämära: «Ašəl šik, ilal tišarriten, təlwəyäd-dd tiläqqiwen d-inaxyabän d-iməddorɣal d-imäsjätäɣän.»

²² Igl' änaxdim, iqqäl-dd, inna i-mässi-s: «Mässi-ɣ, a-wa tənned ija mäšan, ehän, ih' e edəgg härwa.»

²³ Inn'-as mässi-s: «Iqqəl šik, ilal tišarriten, äkk attayän n-ifərjan, šəhhəššəl äddinät ad-dd-asən i-ad-idnəy ehän-in.

²⁴ Ədmanäɣ-awän a-s meddən-winnin-dāx dd-äsmäjareɣ s-tizarät, wār tän-e-ijjəš-i madän-ikrəbbət imənsiwän-in.» »

Älqim wa ihän alkum i-ÿisa

²⁵ Innäd-dd ÿisa s-tamette ta täjjet has-tölkämät, innä:

²⁶ «Ere irhän alkum-hahi, a-s ija a-wen, wär tojer tärha ta hi-ija ta ija i-abba-net, d-anna-net, d-hänne-s, d-aratän-net, d-ayötma-s, d-šätma-s d-iman-net, wär-äddobät ad-umas änätalib-in.

²⁷ Ere wärän äsdäw i-alenji n-tajöttewt-net ta n-tamättant i-ad-hi-ilköm, wär-äddobät ad-umas änätalib-in.

²⁸ Endek däx-wän wa s-wädden afäl irha edey n-ehän, ad-äqqayäm tēzzar ixseb älqim n-a-wa däx-s mad-äkš tēzzar isänt edey-net,

²⁹ afäl wär ija a-wen, ad-isänt ässas n-ehän, indär-as ad-t-in-isəmdəw, əjən-t äddinät tadäzza

³⁰ ed, ad-ənnən: «Wa äwadəm, issəntä edey n-ehän, indär-as ad-t-in-isəmdəw.»

³¹ Ajän wädden e-d irha ämänokal ad-ijäd amidi-net, ad-issən äddobät ad-ikrəš fälla-s ašäl ənta-i ilän märaw afdän n-ähaləs fäll-ämänokal wa dār-mad-iknəs-i ilän ənta sänatät timərwen n-efäd n-ähaləs.

³² Afäl inhäy a-s a-wen wädden a dār-äddobät amjār, ad-išəmmišəl sār-s älzəməxät n-älxer, ittär däx-s əmmək n-älxəfyät härwa-däx ogaž.

³³ A-wen-däx a fäl hawän-jannex, ere wa däx-wän wärän iksen a-wa ila iket-net, wär-äddobät ad-umas änätalib-in.

(Mätti 5:13; Marqəs 9:50)

³⁴ Tesəmt, härät olağan mäšan, afäl tät-təjmäd temde-net, ma s-tät-e-isəsməm äwadəm?

³⁵ Ad-äbas tənfa äkall wälä ädanda, ad-hin-tädf xas.

Ere ilän timəzzujen s-islä-däx, isäjdet!»

15*Tehäle ta äba, tətəjräw-dd*

(Mätti 18:10-14)

¹ Tisən-dd inarmasän n-tiwse d-erk äddinät äjjootnen ÿisa i-ad-has-əslən.

² Ənhäyän käl-faris d-älxulam n-Ättäwrät a-wen xas, ad-simtəktikän, jannen: «Ak, təjrahäm-in anxim d-tihra ta itäjj d-erk äddinät?»

³ Issäxläy-tän-dd ÿisa tangalt däx-hasän-inna:

⁴ «Endek däx-wän wa s-afäl ila temede n-tehäle har däx-snät tässujjal tiyyät, wädden ad-äyy ti n-təzzayät timərwen d-təzzayät əfradnät, igləw, isəssəjjəl ta däx-s äba har tät-dd-ijrəw?

⁵ Afäl tät-dd-ijrəw, ad-tät-isəwär ižerhan-net ikna tedäwit,

⁶ afäl hin-iwwäd ihänan, ad-dd-iḡār imidiwän-net d-änhäräjän-net, änn'-asän: «ÿyāwät, ährät dār-i tedäwit, tehäle-nin ta tässujjalät, əjrəwäx-tät-dd.»

⁷ S-əmmək-wen-däx dəx a fäl, ässiilmädäx-käwän a-s, ad-tajär tedäwit ta madät-täj däx-išənnawän däx-təssəba n-iyyän anäsbäkkad ätubän, uhən i-təzzayät timərwen n-äwadəm d-təzza xur-ija a-s, wär-ämḡatärän s-tätubt.

Ärriyal wa äba, ittəjräw-dd

⁸ Wädden dəx afäl la tamädt märaw ärriyalän n-azrəf hundäx har däx-sän äb' iyyän, ad-särməs tefätelt, ad-tišriwit äkall n-ehän, tiskənsəkit-t hundäx har dd-təjrəw ärriyal-net wa äba?

⁹ Afäl t-dd təjrəw, ad-dd-sədəw timidiwen-net d-tänhäräjen-net, tänn'-asnät: «Ahärmät dār-i tedäwit, ed ärriyal-in wa äba, əjrəwäx-t-dd.»

¹⁰ A-wen-däy a fäl hawän-älleyey a-s, tämoos tätubt n-anäsbäkkad iyyän əssəbab n-tedawit mäqqoorät i-änjəlosän n-Mässinäy.»

Ämawaḍ wa äba, ittəjräw-dd

¹¹ Inn'-asän Yisa daḡ: «Käla t-illa ähaləs ilan əssin aratan.

¹² Ašäl iyyän, osä-dd wa əndərrän ti-s, inn'-as: <Abba, akf'-ahi ejädär-in dāy-täkasit.> Äzun ti-sän a-wa ila jere-sän.

¹³ Härät n-išilan ḍarät-a-wen, ättužžär-in wa əndərrän ejädär-net, irmäs azrəf-net, ikk' äkall iyyän ujejän, ällil izəjraz n-iman-net, ad-ibaxxäs a-wa ila.

¹⁴ Älwäqq wa d-ikkəykäy a-wa ittäf, oḍä-dd laḡ fäll-äkall wa iha iket-net, toḡäy-as tämäyatert.

¹⁵ Iḡla, ixdäm ḡur-iyyän dāy-käl-äkall, ässok'-e ägg-äkall išəkraš-net i-ad-dāy-sän idən əlxənžärän.

¹⁶ Ij'-as laḡ asəmmänənnäd wa-dāy fäl dd-iqqäl isadärhan tetäte n-išəkša-wi-dāy tattän əlxənžärän mäšan, wär t-ikfa mässi-sän turhajät n-a-wen.

¹⁷ Əqqälän-t-dd iman-net ašäl iyyän, äznəzjamät, innä: <Näkk-i-dāy, ma hi-ijän dāy a-wa? Ajän wädden a-wa ila abba-nin dāy-inaxdimän ijarräw a ikša har t-isəssikəy, uhən-dāy näkk, näkk-da-dāy, isimnənnid-ahi laḡ;

¹⁸ äddäbara, ad-ənkäräy, äqqələy abba-nin, ännäy-as: Abba, änmäšräyay i-Mässinäy, äbodäräy-käy,

¹⁹ äbas äniihäjjäy d-ad-itwənn rure-k a ämoosäy, äj'-ahi iyyän dāy-inaxdimän-näk.>

²⁰ Ibdäd, iqqäl äkall wa iha ti-s. Ikkä-dd ehän dāy-ijəy a-s t-ojja ti-s, täny'-e tähanint-net, ošäl sār-s, or'-as ifassän-net, oḍä dāy-sän, ad-t-itisəs dāy-ijərjar-net, itiməllut-as.

²¹ Innä alyad älwäqq-wen i-ti-s: <Abba, änmäšräyay i-Mässinäy, äbodäräy-käy, äbas äniihäjjäy d-ad-itwənn näkk rure-k.>

²² Iḡrä-dd ti-s inaxdimän-net, inn'-asän: <Ašəläät tärmaḍ, awəyät-dd anäkäbba wa ufän, təjəm-as-t, äjät tadhot dāy-assəkäd-net, təkfəm-t tifädelen äynaynen,

²³ ärməsät-dd ašjär wa ojärän tadhont, täḡrəsäm-as, äjet amäjaru d-äzzäho

²⁴ fäl-a-s rure-ḡ wa s-käla ämmut iddär-dd, käla ässujjäl mäšan, ittəjräw-dd.> Əssəntän eqqas d-tiḡləla älwäqq-wen-dāy.

²⁵ A-s itäj a-wen, rure-s wa n-teḡäfädde ih' išəkraš. Ikka-dd dihen a-s isla i-tandiwen d-tihärdänen d-isuhaḡ əkkan išənnawän,

²⁶ iḡrä-dd iyyän dāy-inaxdimän, issəstän-t d-a-wa ijän,

²⁷ inn'-as änaxdim: <Äḡḡa-k, ad-dd-iqqälän, inḡ'-as ti-k ašjär wa iddären ed, iqqäl-t-dd rure-s, iddar-iḡlas.>

²⁸ Ojäl, unjäy s-ad-dd-ijjəš ehän. Ikk'-e-hi-dd ti-s, ad-t-isalyad.

²⁹ Inna i-ti-s: <Wädden näkk, a ilan iwətyan əšḡaläy-äk, wär käla änmäšräyay i-a hi-tənned mäšan, wär käla hi-təkfəd wäla dāy-eḡäyd s-əkley näkk d-imidiwän-in

³⁰ mäšan, iqqäl-dd rure-k wa hin-ibxäsän azrəf-näk dāy-tälkäxbaten ḡas, täḡrəsäd-as i-ašjär-wa iddären.>

³¹ Inn'-as ti-s: <Alyad-in, käyy, wär käla hi-fäläd, a-wa əley iket-net i-näk

³² mäšan ašäl-i, äniihäjja s-ad-näj amäjaru d-äzzäho, fäl-a-s äḡḡa-k wa s-käla ämmut, iddär-dd, käla ässujjäl mäšan, ittəjräw-dd.> »

16

Ānazraf-wa wār təha tafləst

¹ Innä Ƴisa daɣ i-inəttulab-net: «Käla t-illa ähaləs n-amärrəzäɣ dd-osän äddinät, əjän däɣ-s isälan n-əmmək wa s-ibaxxäs änazraf-net ehäre-net.

² Issäɣr'-e-hi-dd, inn'-as: «Käyy, ma ämoos a-wa salläɣ fälla-k? Siḍən-ahi ehäre-nin ed, äbas ärhey əššäɣəl-näk.»

³ Innä änazraf älwäqq-wen-däɣ däɣ-iman-net: «Endek a-wa mad-äjjä afäl hi-ikkäs mässi-ɣ däɣ-älxidmät? Ajäyak n-išəkraš, wār t-äddobəɣ, tamädilt daɣ täsikarakäd-ahi.

⁴ Ƴissanäɣ a-wa he-äjjä s-kud-däɣ ikkäs-ahi mässi-ɣ däɣ-əššäɣəl, ad-hi-siməjurun äddinät däɣ-ihānan-näsän.»

⁵ Issäɣrā-dd äddinät wi irwäs mässi-s iket-näsän, innä i-wa äzzarän: «Käyy, maniket käy-irwäs mässi-ɣ?»

⁶ Inn'-as: «Temeḍe n-bärgo n-əzzäyt». Inn'-as änazraf: «Täkarḍe-näk da ta n-ämarwas, ɣayəm, əktəb šik fälla-s, səmmosät timərwen n-bärgo.»

⁷ Innä i-wa iyyädän: «Käyy-i-š, ma käy-irwas mässi-ɣ?» Inn'-as: «Temeḍe n-šaku n-älkäma.» Ikf'-e-hi-dd ənta-däɣ älkad-net wa n-ämarwas d-aɣänib, inn'-as: «Əktəb: əttamät timərwen n-šaku.»

⁸ Islä mässi-s n-ehäre i-amsud n-änazraf-net ɣas ad-t-itiməl.» Inna Ƴisa daɣ: «Ädduuttät a-s inəzzulam† n-äzzäman-i-däɣ, ojäran imakšadän n-Mässinäɣ amsud.»

Iba n-abäxas n-ehäre

⁹ Oläs daɣ, inn'-asän: «Äjät imidiwän s-ehäre wa xäramän n-wälät-äddunya-ta-däɣ n-ämära, dihen, afäl fälla-wän tät-äba, ad-təjrəwäm irošan n-a-wen däɣ-tämudre ta täɣlälät.

¹⁰ Wa iɣdälän däɣ-a-wa wärän färör, ad-iɣdəl daɣ däɣ-a-wa äjjen, wa wärän iɣdel däɣ-a-wa wärän färör, wār mad-iɣdəl daɣ däɣ-a-wa äjjen.

¹¹ Afäl wār täɣdeläm däɣ-ärrezäɣ wa xäramän n-äzzäman-wa-däɣ wärän infa härät, mi käwän-madän-isäɣləf ärrezäɣ wa n-tidət ihän äddunya ta təlkämät.

¹² Afäl wār täɣdeläm däɣ-ehäre n-äddinät wa käwän-əssäɣləfän, mi käwän-madän-isäɣləf wa mad-təkrəšäm däɣ-äddunya-ta dd-malät.

¹³ Wār t-illa änaxdim äddooben ad-ixdam i-əssin imälan; iyyät-i-däɣ, ad-akəḍ d-iiyän, ärh wa iyyädän, meɣ daɣ, ikf'-iman-net i-iiyän, iksən wa iyyädän. Wār-äddobät äwadəm ad-ixdam i-Mässinäɣ, ošal daɣ ḍarät terše n-azrəf.»

Äsmäqqa Ƴis fäll-käl-faris

¹⁴ Ija Ƴisa mäjräd-wen-däɣ ɣas, jän-t käl-faris tekäškäšt ed, əntäned əknan tarha n-azrəf.

¹⁵ Inn'-asän Ƴisa: «Käwäned, jam iman-näwän äddinät oɣadnen dat-dägg-adəm, mäšan, Mässinäɣ issan a-wa ihän ulhawän-näwän fäl-a-s, a-wa äsihäsken dägg-adəm, tajlölheyɣ yur-Mässinäɣ.

¹⁶ Äzzäman wa n-alämär wa n-Mosa d-əlkəttabän wi n-ännäbitän, ibdäd yur-ännäbi Exya wa Enəsselmäɣ, a ija a-wen-däɣ, titwəjjin isälan n-Älənžil wa n-Təmmənəya n-Mässinäɣ, tattärän äddinät uješ-net s-äššahät-näsän.

† 16:8 16:8 — Ƴur-käl-Älyähud, ere wärän ämoos ägg-Älyähud s-aläsäl meɣ ere wärän ilkem i-äddin-näsän, iket-net, änäzzalim a ämoos. A-wen-däɣ a fäl tiwsaten ti iyyädnen iket-näsän, ti n-inəzzulam. — Ašäl-i-däɣ, änäzzalim, äkafär (ere wärän issen s-Mässinäɣ).

17 Ojār tārəyxe ija ad-iba išənnawān d-ākall uhən, ad-iba wāla-dāy tātbaqqet tiyyāt ɣas dāy-alāmār n-Māssināy.

18 Ere hin-āzmāzzāyān hānne-s, olās adubən n-iiyyāt, ilmədet a-s izna, ere daɣ wa ādobānān tamāđt dd-tāmmizzāyāt, ilmədet a-s izna ənta-dāy.»

Tangalt ta n-amārrəzāy d-Lazar wa n-talāqqe
(Mātti 19:1-12; Marqəs 10:1-12)

19 Inn'-asān daɣ: «Kāla t-illa āhaləs n-amārrəzāy s-hak ašāl āsisahāy ašāl dāy-isəlsa wi āsmāxmāxnən, lānen ālqim, izha, ānnuflāy, āyyiwān.

20 A-s itājj a-wen-dāy, ins' āhaləs n-talāqqe s-isəm-net Lazar dat-emm n-ehān-net, əlsanāt tikussawen dāy-iffay arəssuđ elām-net.

21 A-wa has-ija əllāqqu, isadārhan ad-ākš a-wa dd-ititrəkkin dāy-imənsiwān wi itātt amārrəzāy māšan, wār t-ijārrəw; āddeew-as a-wen d-afdārfāđār wa jānāt tikussawen fāll-taɣəssa-net hundāy har dd-əqqālān iyyāđan tallāxān-tānāt.

22 Har ašāl wa d-tāmmut talāqqe, āwwāyān-tāt ānjālosān s-Ibrahim dāy-ālžānnāt, āmmut amārrəzāy ənta-dāy, izka.

23 Iha tisənsa ti n-žohānnāma-en-dāy ihannāy aɣāna a-s idkāl asəwađ-net, ojj' Ibrahim ill'-e Lazar edes-has.

24 Ad-iɣar Ibrahim, ijann'-as: <Y' Abba Ibrahim, ađən-ahi tāhanint, šəmmişəl-dd sār-i Lazar i-ad-isəlmāy emm n-assəkāđ-net dāy-aman, isəsmāđ iləs-in fāl-a-s, āsrākāttāt-ahi efew wa heɣ.>

25 Inn'-as Ibrahim: <Alyāđ-in, əktəw-dd a-s kāyy, tärzāxād hullan dāy-tāmudre-nāk, a-s ija a-wen, Lazar, wār-inhey a sāl aɣāna, āmāra, ənta a āssismāđān, ānnuflāy, a-s ija a-wen kāyy, tiknənnəwid;

26 đarāt-a-wen daɣ, ill'-e eɣāy wārān ila ider jere-nāy đār-wān, wār-āddoben wi n-ɣur-nāy, ad-kāwān-in-əkkən, wār-āddoben daɣ wi n-ɣur-wān, ad-hanāy-dd-əkkən kud-tārham-dāy.>

27 Inn' āhaləs āmāra: <Adiš abba, dalāy-kāy d-ad-šəmmişələd Lazar s-ehān n-abba-nin

28 fāl-a-s, leɣ səmmos ānɣatān i-ad-tān-isəmmətār, uday ad-dd-əjjəšan edāgg-wa-dāy n-tissust.>

29 Inn'-as Ibrahim: <Wādden lan Mosa d-ānnābitān-wi iyyāđnen, səjəđnet-asān.>

30 Inna i-Ibrahim: <Ābo! Abba Ibrahim, afāl tān-dd-iqqāl ere dd-inkarān jer-inəmmuttan, imməjrād-asān, ad-utabān.>

31 Inn'-as Ibrahim: <Afāl wār-āsjadān i-ānnābi Mosa d-ānnābitān wi iyyāđnen, wār mad-utabān kud-hasān-ija āwadəm dd-inkarān jer-inəmmuttan isālan-dāy.> »

17

Anməšri d-əssəbab-net
(Mātti 18:6-7, 21-22; Marqəs 9:42)

1 Innā Ƴisa đarāt-a-wen i-inəttulab-net: «Tanməšrayt, ad-tajj ɣas, māšan, iməskay kāl-əssəbab-net.

2 Wa has-issəbābān, iššām-as-in, ad-tətwāqqən tāhunt ta s-itəzzad ālkāma dāy-err-net, itwəjār-in dāy-əjärew wa səmmān, uhən ad-umas əssəbab n-tanməšrayt i-iiyyān dāy-inəttulab-in.

3 Ājāt ənniyāt i-iman-nāwān: afāl kāy-idlām ānɣa-k, āɣtəl-t, kunta āmmujrāz, ānš'-as.

4 Afāl hak-ija əssa uđlemān dāy-ašāl, ij'-ak-dd əssa uɣlawān dāy-dāy-k itattār tenāšše, ānš'-as.»

Älfäyda n-immun s-Mässinäx

⁵ Ænnän inəmmušal i-Ŷisa: «ÄŶalim, siwəð immun-nänäx.»

⁶ Inn'-asän ÄŶalim Ŷisa: «Afäl lam immun ogdähän d-temätäwt ta tojarät təmmətkit dāx-idommän, ad-tudabem ad-tənnəm i-ahəkš-wa-dāx: <Ælbəy-dd iman-näk, säxtəd-tän dāx-əjänš>, ad-äj a-wa has-tənnäm.

⁷ Ændek dāx-wän wa s-afäl t-dd-odwa akli-net wa ässixdäm dāx-ašəkrəš-net, mex wa äşđän arəzzej-net, ad-has-änn: <Æyyäw mänsäw>,

⁸ wädden a has-mad-änn: <Səñŋ'-ahi-dd a əkšəx, təjəd isəlsa-näk wi n-älxidmät, təkfəd-ahi amənsi har äkšäx, äswäx təzzar, təkšəd, təswəd käyy.>

⁹ Tordam a-s ähaləs-en-dāx, ill'-e a mad-umay i-akli-en-dāx, ijän a-wa tiwarän?

¹⁰ Käwäned-dāx, e-d jäm a-wa s-hawän-ätwännä, ännät: <Näkkäned, jer-t-nəlla wäla wär t-nəlla, eklan xas a nämoos, wär nəja xas ar a-wa hanäx-iwarän.> »

Äzozäy Ŷisa märaw meddən ijraw jəri

¹¹ Älwäqq wa d-ikka Ŷisa Yärussälam, ällil zäbo wa ikkän jer-teje ta n-Sämari d-ta n-Galila.

¹² Ijjäš-dd tadābayt tiyyät xas, əlkädän-as-dd märaw meddən ijraw jəri, əbdädän-as dihen,

¹³ ədkälän iməslan-näsän, ənnän-as: «ÄŶalim Ŷisa! Ađən-anäx tähanint.»

¹⁴ Inhäy-tän, inn'-asän: «Äglät, säknät iman-näwän i-käl-tikutawen.» Æglan härwa a-s əzzäyän iket-näsän, šäddijän.

¹⁵ Inhäy iyyän dāx-sän a-s izzäy xas, iqqäl dāx-adäriš-net, idkäl eməsli-net, ad-itiiməl Mässinäx.

¹⁶ Osä-dd, irkäx dat-Ŷisa, ad-has-itumay, ähaləs-en, i n-teje ta n-Sämari.

¹⁷ Innä Ŷisa: «Ajän wädden märaw meddən a əzzäyən, ma jän təzza wi iyyäđnen?

¹⁸ Xas wär tän-dd-izjer fäw ere dd-iqqalän i-ad-aməl Mässinäx ar amäjar-wa-dāx?»

¹⁹ Innä Ŷisa i-ähaləs đarät-a-wen: «Æbdəd, əgləw, ixläs-käy immun-näk.»

Išmal wi n-Təmmənəya n-Mässinäx (Mätti 24:23-28, 36-41)

²⁰ Æssəstänän käl-faris Ŷisa, ənnän-as: «Æmme dd-mad-təzzubbət Təmmənəya n-Mässinäx?» Inn'-asän: «Təmmənəya n-Mässinäx, wär mad-dd-täj ass ilan mänhoy,

²¹ wär mad-itwənn: <Ænta da>, wäla: <Ænta den>, fäl-a-s ädduuttät a-s, Təmmənəya n-Mässinäx, təll'-e jere-wän.»

²² Innä i-inəttulab-net đarät-a-wen: «Ælkamän išilan dāx-mad-səddärhənäm ahänay n-Ägg-ägg-adəm kud-dāx i-ašäl iyyän xas, mäšan, wär t-mad-tənhöyäm.

²³ Afäl hawän-ätwännä: <Ænta den>, mex: <Ænta da>, wär təglem, wär təlkemäm i-a-wen

²⁴ fäl-a-s, Ägg-ägg-adəm, ass-net, ad-aläh d-essam-i s-e-d issäm dāx-ašrut iyyän n-išənnawän, ad-isəmməlwəw əšrut wa iyyäđän.

²⁵ Mäšan, wär mad-äj a-wen ar s-ad-inhöy tersəmmawen, təkkuddəl-t əzzurəyät-ta-dāx təzzar,

26 fäl-a-s, a-wa ijän däx-išilan wi n-ännäbi Nox, a madän-äj day däx-išilan-wi dd-mad-iqqəl Ägg-ägg-adəm.

27 Äzzäman wa n-ännäbi Nox, tayāwanän äddinät, sassän, tidubunän, sidubunän har ašäl wa d-ijjāš Nox turäft n-aman ta mäqqärät s-has-innä Mässinäx a tät-ikən, ođän-dd fälla-sän aman wi n-đuf, əlhäsän-tän iket-däx-näsän.

28 Šund a-wen-däx day a ijän däx-išilan wi n-Lut, tattän äddinät, sassän, žanšen, satajän, tidumun, təddayän ihānan

29 har ašäl wa d-izjār Lut aḡrəm wa n-Sodoma, iffäy-dd fälla-sän Mässinäx ajənna n-efew d-əlkäbrit, ilhäs-tän iket-däx-näsän.

30 Šund a-wen-däx a madän-äj ašäl wa dd-mad-iqqəl Ägg-ägg-adəm.

31 Ašäl-en, wa iwarän afälla n-ehän, wär dd-itəzəbbutet i-ad-iđkəl ilalän has-hanen ider n-ehän; wa ihan ašəkrəš-net day, wär-itäqqälet ehän,

32 wär hin-təttəwäm a-wa ijrāwän hānne-s n-Lut.

33 Ere wa wārän idgez ar däx-ajärāw n-iman-net däx-äddunya-ta-däx, ad-ifut däx-älžännät, māšan, əwadəm wa irđän əfota däx-iman-net, däx-äddunya-ta-däx, däx-äddimmät-in, ad-iḡləs.

34 Ässiilmädäx-kāwän s-ehäd-wen-däx, ad-ənsan əssin meddən fäll-asəftäx iyyän, ämmäđkäl iyyän, itwəyy-dd wa iyyäđän,

35 ad-təzzadnät sänatät tiđeden əttäḡam däx-edägg iyyän, tämmäđkäl tiyyät, tətəwəyy-dd ta iyyäđät; [

36 ad-əhan əssin meddən ašəkrəš iyyän, ämmäđkäl iyyän, itwəyy-dd iyyän.]»

37 Əssəstänän inəttulab Ƴisa, ənnän-as: «Äḡalim, əndek dihad-e-äj a-wen?» Inn'-asän: «Dihad t-təlla tamäḡsoyt, ad-itajj ellay.»

18

Tangalt ta n-tänudäft d-älqallı wa n-enälläbäs

1 Ij'-asän Ƴisa day tangalt tiyyät däx-irha ad-tän-isəlməd a-s lan s-ad-təddalän Mässinäx härkuk, wär däx-s təkəkəsän ättäma.

2 Inn'-asän: «Käla t-illa aḡrəm ih' älcqallı wārän äksud Mässinäx, wär-issəfrär day dägg-adəm.

3 Təll'-e day dihen tänudäft t-dd-tiisət hak ašäl, təjann'-as: <Əkkəs-ahi tekəriđt däx-əwadəm wa hi-ohäḡän.>

4 Ähojā älcqallı wär tät-in-ijreh, har šik, innä däx-iman-net ašäl iyyän: <Kud-däx wär-äksudäx Mässinäx, wär-əssəfräräx dägg-adəm,

5 ad-əkkəsäx tekəriđt i-tamäđt-i-däx hi-täsḡäfät i-ad-hi-täkf äḡafyät.> »

6 Inn'-asän Äḡalim Ƴisa: «Säjdät ḡas i-a-wa-däx inna älcqallı-wa-däx n-enälläbäs.

7 Ƴas tordam a-s Mässinäx wär-e-ikkəs tekəriđt i-wi əsnäfrän sār-s dd-hallänen ehäd d-ašäl? Tordam a-s ad-hin-ähaj fälla-sän?

8 Äbo! Ällexəḡ-awän a-s, ad-hasän-ikkəs tekəriđt šik māšan, tordam fāw s-ašäl wa dd-mad-iqqəl Ägg-ägg-adəm, ad-dd-agəz immun fäll-ərōri n-äkall?»

Tangalt ta ija Ƴisa fäll-u-faris d-u-tiwse

9 Issäḡläy Ƴisa đarät-a-wen tangalt äddinät wi ordänen iman-näsän iqqud, a-s ija a-wen, əlkähän imidiwän-näsän, inn'-asän:

10 «Käla əkkän əssin meddən ehän n-ämudd wa mäqqärän i-ad-umadän, äḡbədän Mässinäx. Iyyän u-faris, wa iyyäđän ənarmas n-tiwse.

¹¹ Osän-in ɣas, ibdäd wa n-u-faris, ad-itumad, ijanna däɣ-iman-net: <Äjoðäyāɣ-ak Mässināɣ fäl-a-s, wär-olehäɣ d-äddinät-wi iyyäðnen n-imäkrädän d-iməzzəna, wär-olehäɣ daɣ d-u-tiwse-wa-däɣ,

¹² tuzamäɣ əssin išilan däɣ-əssəboɣ, takkäsäɣ tämukäst n-a-wa jarräwäɣ iket-net.>

¹³ A-s itäj a-wen u-tiwse ənta, ibdad dihen, təgdal-as täkrakiðt wäla ad-idkəl asəwad-net, äsninän iman-net, ijanna ənta: <Ya Mässināɣ! Səsməð fäll-i, əkrəšäɣet data-k idəm näkk-i n-anäsäkkad.> »

¹⁴ Inn'-asän ʁisa: «Äleɣeɣ-awän a-s u-tiwse-wa-däɣ, a-s iqqäl ehän-net, ijraw idəm wär-ijrew u-faris dat-Mässināɣ. Ere idkälän iman-net, ad-irəs, ere daɣ wa äsräsän iman-net, ad-t-idkəl Mässināɣ.»

Ija ʁisa älbäraka däɣ-aratän
(Mätti 19:13-15; Marqəs 10:13-16)

¹⁵ Ämmewäyän-dd ðarät-a-wen imärkäsän s-ʁisa i-ad-däɣ-sän äj älbäraka, mäšan, ənhäyän inəttulab-net a-wen ɣas, äkläwläwän fäll-imärawän-näsän.

¹⁶ Iɣr'-en-dd ʁisa s-iman-net, inn'-asän: «Äyyät aratän ad-hi-dd-əkkən, wär tän-in-täwwexäm fäll-i fäl-a-s Təmmənəya n-Mässināɣ, äddinät-wi ðär-sän äni-fäqqänen a-s tät-ihakk.

¹⁷ Äsidätteɣ-awän a-s ere wärän iqbel Təmmənəya n-Mässināɣ s-əmmək wa s-tät-mad-iqbəl ara, wär tät-mad-ijješ.»

Äddunya meɣ äläxärät?
(Mätti 19:16-30; Marqəs 10:17-31)

¹⁸ Osä-dd älfäqqi iyyän n-käl-Älyähud ʁisa, inn'-as: «Äɣalim wa oläɣän, ma s-leɣ s-ad-t-äjäɣ i-ad-əkkusäɣ tämudre ta täɣläläät?»

¹⁹ Inn'-as ʁisa: «Mafäl hi-ɣarräd s-isəm: Wa oläɣän? Wär t-illa ere oläɣän säl Mässināɣ.

²⁰ Wädden təssanäd alämärän-net: <Wär jed əzzəna, wär jed iman, wär tokeräd, wär täjjəyhäd s-bahu, səmɣär ti-k d-ma-k.> »

²¹ Inn'-as älfäqqi: «Äɣdaläɣ i-a-wen-däɣ iket-net härwa ämoosäɣ ara.»

²² Isla ʁisa i-mäjräd wa ija ɣas, inn'-as: «Härät iyyän a hak-in-äba: tužžär-in a-wa led iket-net, tuzanäd-t i-tiläqqiwen i-ad-təjrəwäd ärrəzäɣ däɣ-älžännät, dihen, əqqəl-dd, əlkəm-ahi.»

²³ Isl' älfäqqi i-a-wen ɣas, ənxäsän iman-net ed ila ehäre n-tikunen.

²⁴ Inhäy-t ʁisa änxäsän iman-net ɣas, innä: «Unhh! Ažwi ija i-ere irzaɣän uješ n-Təmmənəya n-Mässināɣ!

²⁵ Ojär täräɣse ta ija i-amnəs uješ s-tiɥ n-änazmay uhən i-ere irzaɣän uješ n-Təmmənəya n-Mässināɣ.»

²⁶ Ənnän-as äddinät-wi has-äsijädnen a-s inna a-wen-däɣ: «Adiš mi madän-iɣləs.»

²⁷ Inn'-asän: «A-wa wär-äsmäkkänän dägg-adəm, äddoobät-t Mässināɣ.»

²⁸ Iggäd-dd Bətrus, inn'-as: «Näkkänəð-i-š oyyänen ihänan-nänäɣ nəl-käm-ak, əndek isälan-nänäɣ, ma s-ilkam ad-t-nəjrəw?»

²⁹ Inn'-asän ʁisa: «Äsidätteɣ-awän a-s wär t-illa däɣ-wän-i madän-äyy ehän-net meɣ hänne-s meɣ ayətma-s meɣ imärawän-net meɣ məddana-s däɣ-təssəba n-Təmmənəya n-Mässināɣ

³⁰ s-wädden, ad-ijrəw a ännudfäsän fäll-a-wen däɣ-äddunya-ta-däɣ, ijrəw daɣ tämudre ta täɣläläät däɣ-äddunya ta dd-malät.»

*Äsihe wa s-käraḍ d-itajj ʃisa isälan n-tamättant-net d-tanäkra-net
(Mätti 20:17-19; Marqəs 10:32-34)*

³¹ Ikkäs-dd ʃisa ḍarät-a-wen inəṭṭulab-net wi n-māraw d-əssin s-takše, inn'-asän: «Ənhəywät, näkkäneḍ-da hi-əkkänen Yārussälam i-ad-itbət a-wa əktäbän ännäbitän däḡ-isälan n-Ägg-əgg-adəm

³² fäl-a-s, ad-t-əjən ayətma-s däḡ-ifassän n-inəzzulam,† əjən-t tekäškäšt, səmmäḍrəyän-t, sutəfən fälla-s,

³³ əjən däḡ-s tiwit, əjən iman-net mäšan, ašäl wa s-käraḍ ḍarät tamättant-net, ad-dd-inkär jer-inəmmuttan.»

³⁴ Ij'-asän ʃisa mäjräd-wen-däḡ mäšan, wär t-illa a däḡ-s əjrahän ed, ättunkäl-asän älmäḡna-net, wär-əjrehän a-wa däḡ-hasän-əssewäl.

*Emədderyəl-wa äzozäy ʃisa
(Mätti 20:29-34; Marqəs 10:46-52)*

³⁵ Älwäqq wa d-hin-ohäzän taḡrəmt ta n-Žärriko, əkkän-dd edes i-emədderyəl äqqiimän däḡ-asälim n-zäbo, itattär takute däḡ-äddinät.

³⁶ Islä i-täkat ta ja tamətte ḡas, issəstän d-a-wa ijän.

³⁷ Ənnän-as äddinät: «ʃisa wa n-Näširät a okayän.»

³⁸ Äşyarät, innä: «Ya ʃisa wa n-Ägg-Dawəd, aḍən-ahi tähanint!»

³⁹ Äxtälän-t äddinät-wi äzzarnen i-tamətte i-ad-hin-isusəm mäšan, äşyarät s-afälla: «Ya Ägg Dawəd, aḍən-ahi tähanint!»

⁴⁰ Ibdäd ʃisa, omär s-ad-sär-s dd-ättälwäy. Os'-e-hi-dd emədderyəl ḡas, issəstän-t, inn'-as:

⁴¹ «Ma s-tärhed ad-hak-t-äjäḡ?» Inn'-as emədderyəl: «Älyalim, aləsäḡet ahänay.»

⁴² Inn'-as ʃisa: «Ənhəy! Iḡläs-käy immun-näk.»

⁴³ Inhäy älwaqq-wen-däḡ, ilkäm i-ʃisa, ad-itiiməl Mässinäḡ, tiiməl daḡ tamətte ta tənähäyät a-wa ijän Mässinäḡ fäl tihusay n-ijitän-net.

19

Isälan n-Zakəyyu wa n-ajəzzəlu

¹ Ijjäš ʃisa aḡrəm wa n-Žärriko, ällil-t.

² A əndärrän ähaləs n-amärrəzäḡ n-ämänokal n-inarmasän n-tiwse s-isəm-net Zakəyyu da-däḡ,

³ itattär əmmək s-inhäy ʃisa afäl okäy mäšan, tənjar-as-t tamətte ed, i jəzzəlän.

⁴ Ošäl, äzzar i-tamətte, iwwän ahəšk s-isəm-net sikamur i-ad-isənnəfləy däḡ-ʃisa, afäl ikka dawa-s.

⁵ Iwwäḍ-dd ʃisa dihen ḡas, idkäl asəwaḍ-net, inn'-as: «Zakəyyu! Zubbət-dd šik, ašäl-i, ämijareḡ-ak.»

⁶ Äzzubbät-dd Zakəyyu šik, äsmäjarät ʃisa däḡ-tedäwit.

⁷ Ənhäyän äddinät a-wen ḡas, ad-simtəktikän, jannen: «A-wa, äbä-has ere ḡur-äzzubbät ar anəsäkkəḍ-wa-däḡ.»

⁸ Ibdäd Zakəyyu dat-Älyalim ʃisa, inn'-as: «Älyalim, hakkäḡ tiläqqiwen täzune n-ehäre-nin, kunta daḡ ill'-e ere s-käla däḡ-s ohäḡäḡ ehäre-net, siḡuläḡ-as-t ija əkkoḡ inəḍfusän.»

† 18:32 18:32 – ḡur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änäzzalim a ämoos. A-wen-däḡ a fäl tiwsaten ti iyyäḍnen iket-näsnät, ti n-inəzzulam. — Ašäl-i-däḡ, änäzzalim, äkafär (ere wärän issen s-Mässinäḡ).

⁹ Innä ʒisa älwäqq-wen-däx däx-isälan n-Zaköyyu: «Ašäl-i-däx, ehän-wa-däx, ijjäš-t-dd əlxəllas, ed ähaləs-i-däx, ənta-däx ahäya n-ännäbi Ibrahim a ämoos

¹⁰ fäl-a-s, Ägg-ägg-adəm, osä-dd, immaḡ i-äddinät-wi ässujjälne i-ad-tän-iḡləs.»

Tangalt ta n-isuf wi itäjj Mässinäx

¹¹ Ənhäyän äddinät ʒisa d-inəttulab-net han attayän n-Yärußälam ḡas, äḡelän älwäqq wa d-fälla-sän dd-mad-təzzubbət Təmmənəya n-Mässinäx, iwwäq-dd. Təssəba n-a-wen-däx a fäl issäḡläy ʒisa tangalt-ta-däx i-wi has-äsijädne,

¹² inn'-asän: «Käla ikk' ähaləs n-ägg-ehän äkall ujęän i-ad-däx-s dd-ijrəw təmmənukəla, iqqəl-dd.

¹³ Ässawäq tekle ḡas, iḡrā-dd märaw däx-inaxdimän-net, hak iyyän däx-sän, ikf'-e abläx n-oräx təzzar, inn'-asän: «Äxdəmät s-oräx-i-däx iket-di dd-taqqäläx.»

¹⁴ Mäšan, fäl mikḡaw-i-däx dār-s əjän käl-äkall-net, oyyän-t har iglä təzzar, əssəlkämän-as älzämayät äšimašälän s-ämänokal wa mäqqārän ikka i-ad-has-ənnən: «Ähaləs-di, wär nārha ad-fälla-näx immukəl.»

¹⁵ Hakd a-wen-däx, ijrāw-dd təmmənukəla, iqqäl-dd äkall-net; osä-dd ḡas, iḡrā-dd inaxdimän-net winnin ikfa oräx i-ad-ilməd a-wa ärbäxän däx-mamäla-näsän.

¹⁶ Os'-e-hi-dd wa äzzarän, inn'-as: «Mässi-ḡ, abläx-näk, ärbäxäx fälla-s märaw iyyäq.»

¹⁷ Inn'-as mässi-s: «Ehoyd! Änaxdim ifranän ha taflest a tämoosäd; šämad h'-iik taflest däx-a-wärän ijət, ad-käy-səmmənukələx fäll-märaw iḡärman n-äkall-in.»

¹⁸ Osä-dd wa s-əssin ḡarät-a-wen, innä: «Mässi-ḡ, abläx-näk, ärbäxäx fälla-s səmmos iyyäq.»

¹⁹ Innä daḡ i-wa: «Käyy, ad-təmnukələd fäll-səmmos iḡärman n-äkall-in.»

²⁰ Osä-dd iyyän daḡ, inn'-as: «Mässi-ḡ, abläx-näk, ənta da; a təḡled-däx, əkmasäx-t, itwar,

²¹ jeḡ-ak tukşəḡa-i-däx mäqqārät ed əssanäx a-s emäşşehi a tämoosäd, sikusäd-dd a wär təssətwäräd, tiləyəd-dd aşəkrəş wär täddomed.»

²² Inn'-as mässi-s: «Käyy wa-hi, erk änaxdim a tämoosäd! A-wa-däx dd-izjārän emm-näk a-s käy-e-səḡləmäx; a-s təssanäd a-s näkk emäşşehi a ämoosäx dd-isikusän a wär əssətwäräx, tiləyäx-dd aşəkrəş wär-äddomeḡ,

²³ mafäl wär jed azrəf-in däx-bänk, dihen a-s t-dd-mad-äqqələx, ättilläxäx härät fälla-s.»

²⁴ Innä ämänokal ḡarät-a-wen i-äddinät-wi t-əllänen dihen: «Ahäxät däx-s abläx wa itḡäf, təkfəm-t i-wa n-märaw.»

²⁵ Ənnän-as äddinät: «Ənta-ş wädden ila märaw?» »

²⁶ Inn'-asän ʒisa: «Älleḡeḡ-awän a-s äwadəm wa ilän härät, ad-has-iwwäq mäšan, wa wärän ila härät, ad-däx-s ämahäx wäla a-wa itḡäf.

²⁷ «ḡarät-a-wen, išənja-nin winnin wären irha ad-fälla-sän əmnukələx, əlwəyät-ahi-tän-dd, täḡrəsäm-asän dat-i.» »

Ujəş n-ʒisa i-Yärußälam

(Mätti 21:1-11; Marḡəs 11:1-11; Exya 12:12-19)

²⁸ Innä ʒisa a-wen ḡas, äzzar-i-inəttulab-net s-Yärußälam.

²⁹ Ohäz-in tidbi ti n-Bätfaži d-Bitanya, edes i-taḡaḡt ta täsijätät ihəşkan wi n-əzzäytun; dihen-däx ad-äşmaşäl əssin däx-inəttulab-net,

³⁰ inn'-asän: «Äkkät tadäbayt ta-n data-wän, afäl tät-təjjäšäm, ad-təjrəwäm äza ojayän s-käla wär t-iney äwadəm; arät-t-dd, təlwəyäm-t-dd.

³¹ Ere käwän-issəstänän d-a-wa fäl t-tirəm, ännät-as: «Ila dəḡ-s älyalim əššəḡəl.» »

³² Eḡlän inəṭṭulab-wi äšmašäl, ogəžän-in härätän s-əmmək-wa-dəḡ s-hasän-tän-innä;

³³ tiirən äza a-s tän-äytälän mössaw-s d-a-wa fäl t-tirən.

³⁴ Ənnän-asän inəṭṭulab wi n-əssin: «Älyalim a dəḡ-s ilan əššəḡəl.»

³⁵ Əlwäyän-dd äza i-ḡisa, əstäjän-as inkubba-näsän, äsnäyän-as-t ḡas,

³⁶ ad-fattäḡän äddinät isəlsa-näsän fäll-zäbo wa mad-ilal iket-net.

³⁷ Issəntä-dd ḡisa atrur n-taḡayt ta n-əzzäytun ḡas, təddəwät tamətte ta n-inəṭṭulab-net iket-net, siixləlit, tiiməl Mässinäḡ s-afälla dəḡ-təssəba n-ijitän wi ässuksädnen tənḡäy.

³⁸ Tiiməl Mässinäḡ, janna:

«Ozana!

Ija Mässinäḡ älbäraka dəḡ-ämänokal wa dd-osän dəḡ-isəm n-Emäli, älxer ija, imäl-t älxurmät dəḡ-išənnawän iket-näsän.»

³⁹ Eḡgädän-dd käl-faris hanen tamətte, ənnän i-ḡisa: «Älyalim, səssusəm inəṭṭulab-näk.»

⁴⁰ Inn'-asän ḡisa: «Älleyeḡ-awän a-s afäl ässosämän, ad-säqqärətnät tihun.»

Tisnant ta təlkamät dəḡ-Yärussälam

⁴¹ Ohəz-in ḡisa Yärussälam, inhäy-tät ḡas, ad-ihall fälla-s,

⁴² ijanna: «Yärussälam! Ənnär täddobed ad-təlmədäd ašäl-i-dəḡ, əmmək wa s-täddobed ad-təjrəwäd älyafyät n-iman-näm mäšan, ättunkäl-am a-wen, wär t-hənnəynät tiṭṭawen-näm.

⁴³ Äduuttät a-s, əlkamän dəḡ-m išilan səmuumnen dəḡ-mad-käm-əḡləyḡələyän išənja-näm, äzbəbän-käm s-išrutän iket-dəḡ-näsän,

⁴⁴ ättäḡtäḡän-käm, kämm d-aratän-näm, wär mad-dəḡ-m-dd-əyyən wäla abləḡ iwarän amidi-net fäl-a-s, tunjäyäd s-ašäl wa sār-m dd-äšbašəjəḡ.»

Ikkäs ḡisa käl-mamäla dəḡ-ehän n-ämudd wa məqqärän (Mätti 21:12-17; Marḡəs 11:15-19; Exya 2:13-22)

⁴⁵ Ijjäš ḡisa ḡarät-a-wen ehän n-ämudd wa məqqärän, ad-dəḡ-s isattəḡ ättužzar,

⁴⁶ ijann'-asän: «Ajän wädden iktab a-s inna Mässinäḡ: «Ehän-in, ad-umas ehän n-tittar», mäšan, käwəneḡ jəm-t tajnut n-imäkrädän.»

⁴⁷ Isaḡra ḡarät a-wen-dəḡ hak ašäl dəḡ-ehän n-ämudd wa məqqärän. Ənkärän-dd imänokalän n-käl-tikutawen d-älyulam n-Äṭṭäwrät d-imizärän n-käl-Älyähud, ad-tattärän əmmək s-jän iman-net

⁴⁸ mäšan, äbä-hasän taməntelt fäl jän a-wen ed, təsijäd-as tamətte iket-net, ijraz-as dəḡ a-wa ijanna.

20

A-wa innä ḡisa i-käl-tikutawen (Mätti 21:23-27; Marḡəs 11:27-33)

¹ Ašäl iyyän, isaḡra ḡisa dəḡ-ehän n-ämudd wa məqqärän, ixattäb i-äddinät isəlan n-Älənžil a-s t-dd-osän käl-tikutawen d-älyulam n-Äṭṭäwrät d-inušämän n-Işrayil,

² ənnən-as: «Ləxät-anəx, mi kay-ikfän turhajät n-amışel n-tikunen-ti-dəx, mex day mi käy-ikfän tärna-ta-dəx s-täjäd a-wa täjjäd?»

³ Inn'-asän: «Ad-hawän-əjəx näkk-dəx asəstan iyyän, əməra, ləxätət-ahi:

⁴ Mi dd-əşmaşälän Exya wa n-Enəsselməx i-ad-isəlməx əddinät dəx-aman? Ak Məssinəx a t-dd-əşmaşälän mex dəgg-adəm xas?»

⁵ Ənməkkəsän s-takşe, ad-jannen: «Afäl has-nəнна: <Məssinəx a t-dd-əşmaşälän>, ad-hanəx-änn: <Adiş, mafäl wär tomenəm s-a-wa hawän-inna.>

⁶ Afäl has-nəнна dəgg-adəm xas a t-dd-əşmaşälän, ad-hanəx-təkf tamətte iket-net səmməjori n-tihun ed təkkas iket-net əşşək a-s Exya ənnəbi n-Məssinəx a əmoos.»

⁷ Əqqälän-dd, ənnən-as wär əssenän ere t-dd-əşmaşälän.

⁸ Inn'-asän Yisa: «Adiş näkk-dəx, wär hawän-e-əlləxey ere wa hi-ikfän tärna ta s-täjəx a-wa täjjəx.»

*Tangalt ta n-meddən wi fərnen aşəkrəş
(Mətti 21:33-44; Marqəs 12:1-11)*

⁹ Issəyləy-tän-dd Yisa dərät-a-wen tangalt dəx-hasän-innä: «Kəla əddomət əhaləs iyyän aşəkrəş n-ləxnəb, ifər-t i-inəsduma iyyəd təzzar, ikk' əkall iyyän dəx-hin-əhoja.

¹⁰ Təwwəd-dd təqqän n-amili n-aşəkrəş xas, əşmaşäl-dd sər-sän ənaxdim i-ad-has-dd-awəy xur-sän folət-net dəx-a-wa dd-orəw aşəkrəş. Osə-dd inəsduma wi fərnen aşəkrəş, ədnəyän-t tiwit təzzar, əssəglän-t korəyrəy.

¹¹ Oləs-dd sər-sän aşəmmişel n-ənaxdim iyyän day, jän dəx-s ənta-dəx tiwit, əsmədrəyän-t, əssəglän-t korəyrəy.

¹² Əşmaşäl-dd sər-sän day wa s-kərəd, ənta, əsbayəsän-t təzzar, əntəjən-t-in korəyrəy.

¹³ Innə məssi-s n-aşəkrəş dərät-a-wen: <Əndek əddəbara əməra? Wər hin-əqqima xas ar ad-sər-sän şəmmişələx rure-x wa əkney tərha, ənta ya, ənihəjja s-ad-t-səmxərən.>

¹⁴ Ənhəyän inaxdimən rure-s n-məssi-s n-aşəkrəş imal-dd xas, ənmənnən jer-iman-nəsän: <Ənhəywət-ak, aməkkasu-net, nərməset-t, nəjet iman-net, dihen ad-tumas təkasit ti-nənəx.>

¹⁵ Ərməsän-t, əzjərən dər-s aşəkrəş, ənxən-t kərəf.» Inn'-asän Yisa: «Ma tordam, wi-dəx inaxdimən, ma hasän-mad-əj məssi-s n-aşəkrəş?

¹⁶ Ədmanəx-awən a-s əməra, ad-tän-dd-ass ənta iman-net, ilhəs-tän iket-dəx-nəsän, aləs tefert n-aşəkrəş-net i-iyəd.» Əslän, əddinät i-a-wen xas, ənnən: «Assəkəd əkall!»

¹⁷ Issəyləy-tän-dd akəyad-net, inn'-asän: «Adiş mafäl ətiwəнна dəx-əlkəttab n-Məssinəx a-s:

<Təhünt ta hin-jərən əlbənnatən s-ənnən wər tənfa hərət,

ənta a-s a-s təşrəy tanfust,

təmoos təhünt ta n-əxmər tufət, hakkət əşşahət ehən;

¹⁸ təhünt-ta-hi, ere fəlla-s ođän,

ad-ərrəzrəz; ere fəll-tođa day, ad-ilkəz.> »

¹⁹ Inn'-asän Yisa a-wen xas, əttərən əlyulam n-Əttəwrət d-imənokalän n-kəl-tikutawen əmmək s-t-əstərməsän əlwəqq-wen-dəx ed, əssənən a-s əntənəđ-en-dəx, a əssiyləy tangalt-ta-dəx məşən, wər jen a-wen ed, əksudən tamətte.

Isälan n-tiwse i-ämānokāl Qäyşār
(Mätti 21:45-46; 22:15-22; Marqəs 12:12-17)

²⁰ Jān-as ɗarāt-a-wen ənniyāt dāx-ijəj, āšmašälān-dd sār-s inaramān janen iman-nāsān älmāt äddināt oɣadnen i-ad-t-səwwənnən a-wārān itətwənn, əjən-t dāx-ifassān n-gəfār d-əlxəkum-net.

²¹ Osān-t-dd, ənnān-as: «Älyalim, nəssan a-s a-wa jānned d-a-wa säɣred iket-net, oɣad; wār täzmäzläyād äddināt ed tabarāt ta n-Mässināx ɣas a säɣred.

²² Ämära, nässistān-käy: ak iwar-anāx ad-nəzəl tiwse i-Qäyşār wa n-ämānokāl mäqqārān meɣ?»

²³ İlmād ɣisa ɣur-iman-net amsud wa t-illān ɗarāt asəstan wa has-jān, inn'-asān

²⁴ «Säkənāt-ahi-dd ärriyal, tälläɣem-ahi ere wa ilān ättäşwer d-isəm wa t-iwārān?» Ənnān-as: «I n-ämānokāl Qäyşār.»

²⁵ Inn'-asān: «Adiš, suɣəlāt i-Qäyşār a-wa fälla-wān ila, təkfəm daɣ Mässināx a-wa fälla-wān ila.»

²⁶ İndār-asān fāw a t-səwwənnən erk mäjrād dat-tamətte, əqqälān-dd ɣas tof'-en tākunt n-älwižab wa hasān-ija, ässosāmān.

Isälan n-tanākra jer-inəmmuttan
(Mätti 22:23-33; Marqəs 12:18-27)

²⁷ Os'-e-hi-dd ɗarāt-a-wen hārāt dāx-kāl-taggayt ta n-kāl-sadus-i jānnānen a-s wār təlkem tanākra jer-inəmmuttan, afāl äba äwadəm, əmdān isälan-net.

²⁸ Əssəstānān-t, ənnān-as: «Älyalim, inn'-anāx ännābi Mosa: <Afāl ädobān ähaləs, äba-t wār oher ara d-hānne-s, idubənet-tāt äñña-s i-ad-ikreš əzzurəyāt i-äñña-s wa äba i-ad-wār hin-itiləm isəm n-wa äba fäll-ārori n-äkall.>

²⁹ Ämära, əkkəs-anāx dāx-täqqān n-eɣäf: Kāla t-əllān əssa äññatān, ädobān dāx-sān wa n-amäqqar māšan, äba-t wār-ikreš ara,

³⁰ İşrāy-t wa s-əssin s-adubən n-hānne-s,

³¹ İlkām-as daɣ wa s-kāraɗ māšan, wār tān-iha i dār-s oharān ara; ädobānān-tāt əssa-essān, äba-tān daɣ iket-nāsān, wār t-illa i dār-s oharān ara.

³² Äba daɣ ɗara-sān tamäɗt.

³³ Nässiistān-käy: ašāl wa n-tanākra jer-inəmmuttan, əndek dāx-sān wa s-e-tumas hānne-s ed, ənhayān-tāt adubən əssa-essān?»

³⁴ Inn'-asān ɣisa: «Dāx-äddunya-ta-dāx, tidubunān meddən, tidubunnāt tiɗeɗen

³⁵ māšan, äddināt wi ikfa Mässināx turhajāt n-ad-dd-ənkārān jer-inəmmuttan i-ad-əjjəşān älzānnāt, jer-wi n-meddən wāla tiɗeɗen, ad-ābas ämiyatārān s-adubən,

³⁶ ed ābas dāx-sān təlkam tamättant, ad-alāhān d-änjālosān, umasān aratān n-Mässināx ed, ənkārān-dd jer-inəmmuttan.

³⁷ Dāx-a-wa dd-iqqälān isälan n-tanākra jer-inəmmuttan, issətbāt-tān ännābi Mosa ed, ašāl wa t-iyrä Emāli dāx-tabsāxt ta tähjäljälāt wār räqq, iyr'-e Mosa s-isəm: Mässināx n-İbrahim d-İsxaqq d-Yaqub.

³⁸ A-wen, älmāɣna-net a-s, äddināt-win-dāx, han älzānnāt, tiimələn Mässināx; ənnār wār ədderān wār təjjən a-wen. Mässināx, wādden inəmmuttan a-s ämoos Mässināx, ämoos-t i-wi əddārnen ed data-s, əddarān iket-dāx-nāsān.»

³⁹ Imməjräd härät dāḡ-ālyulam n-Āṭṭāwrät ɖarät-a-wen i-Ŷisa, ənnän-as: «Ālyalim, edāwänne-nāk, ikna.»

⁴⁰ Ābas t-illa ɖarät-a-wen ere ihälän asəstan-net.

Mi s-āmoos Ŷisa, rure-s?

(Mätti 22:41-46; Marqəs 12:35-37)

⁴¹ Issəstän-tän Ŷisa ɖarät-a-wen, inn'-asän: «Ma isawännen äddinät a-s Ālmasex, rure-s n-Dawəd?»

⁴² Ajän wädden Dawəd iman-net inna fälla-s dāḡ-əlkəttab wa n-Āzzābur: <Inna Emäli i-Emäli-nin, ḡayəm daw-aḡil-in,

⁴³ hundāḡ här äjāḡ išənja-nāk daw-iɖarän-nāk.>

⁴⁴ Ŷas kunta Dawəd iman-net iḡarr Ālmasex s-isəm <Emäli>, əndek əmmək wa s-äddobät ad-umas rure-s?»

Agəzät iman-nāwän dāḡ-təlmənuḡāya

(Mätti 23:1-36; Marqəs 12:38-40; Luqa 11:37-54)

⁴⁵ Innä Ŷisa ɖarät-a-wen i-inəṭṭulab-net dat-tamətəte ta has-täsijädät:

⁴⁶ «Agəzät iman-nāwän dāḡ-ālyulam n-Āṭṭāwrät, ijraz-asän ad-tikələn timukal dāḡ-isəlsa əhobätnen, ijraz-asän ad-hasän-tajjän äddinät isofan dāḡ-tišarriten, ärhan tisəqqima ti ännufläynen dāḡ-ihänen n-äddin wi n-käl-Ālyāhud d-atwəsəmḡar dāḡ-imjora,

⁴⁷ saknen a-s härkuk tumadän, a-s ija a-wen, tihāḡän a-wa ihän ifassän n-tinuɖāfen, ilkam dāḡ-sän äššäreḡa səmmän.»

21

Isälän n-tänuɖäft ta tojärät imärrəzāḡän ihuk

(Marqəs 12:41-44)

¹ Iɖkäl Ŷisa ɖarät-a-wen asəwad-net, inhäy käl-ehäre tajjän azrəf wa təkkatän dāḡ-əssəndoqq wa n-tikutawen ihän ehän n-ämudd wa mäqqārän,

² inhäy dāḡ tänuɖäft tiyyät läqqəwät har dd-tosa, tästäräkkät dāḡ-əssəndoqq sänatät tämmaten əbɖanen.

³ Inhäy Ŷisa a-wen ḡas, inna: «Tidət-dāḡ a-s tänuɖäft-ta-dāḡ n-taläqqe, tojär äddinät iket-näsän ihuk,

⁴ fäl-a-s iket-näsän, a-wa s-ässakäyän s-wär-ämḡatärän a əkfän, a-s ija a-wen ənta, dāḡ-əlläqqu-net, a-wa təṭṭäf i-tämudre-net iket-net, a təkfa.»

Teräzze ta təlkämät dāḡ-ehän n-ämudd wa mäqqārän

(Mätti 24:1-2; Marqəs 13:1-2)

⁵ Islä Ŷisa ɖarät-a-wen i-äddinät iyyäd dāḡ-tamətəte, tiimələn tihusay-ti ija ehän n-ämudd wa mäqqārän, tiimələn dāḡ a-wa t-ihän d-tihun ti s-idäy d-a-wa s-idläj mäšan, inn'-asän:

⁶ «A-wa-dāḡ hannäyäm əhusken, əlkamän išilan dāḡ-wär mad-dd-täqqayəm təhünt tiyyät ḡas warät tamidit-net, ad-ättäḡtäḡ iket-dāḡ-net.»

Išmal n-täməddawt n-äddunya

(Mätti 24:3-28; Marqəs 13:3-23)

⁷ Əssəstänän-t, ənnän-as: «Ālyalim, əmme d-mad-äj a-wen? Ēkkəs-anäḡ dāḡ-tayɖärt n-išmal wi-s-e-nəlməd a-s sämdo, osä-dd.»

⁸ Inn'-asän Ŷisa: «He kəwänəɖ, wär kəwän-išäšket əwadəm ed, ad-dd-asən äddinät äjjootnen s-isəm-in, änn hak iyyän dāḡ-sän: <Näkk a-s Ālmasex!> meḡ änn: <Täqqän, täwwäɖ!> wär tošeläm ɖara-sän.

⁹ Afäl tēslām i-isālan n-imjārān d-tanākra n-timōttawen, wār-itāggādet ēnniyāt-nāwān; a-wen a ilan s-ad-āj tēzzar išrōy-t-dd sāmdo n-hārāt iket-net.»

¹⁰ Inn'-asān dāḡ ḡarāt-a-wen: «Ad-tēknēs tawset tamidit-net, iknēs ēddōwēl amidi-net,

¹¹ ad-iškēdkēd ākall dāḡ-idāggan ājjootnen, āj laḡ d-turhōnnawen ājjootnen, ēzjārān-dd hārātān d-ijitān āssuksādnen išōnnawān

¹² māšan, dat-ad-āj a-wen-dāḡ, ad-tāttārmāsām, tēt-wāḡēzzōbem, tāttāl-wāyām s-āššāreḡa dāḡ-ihānan n-āddin wi n-kāl-Ālyāhud, tējjōšām tikārmuten, sōrrōwrōwān-awān āddināt s-imānokālān d-gōfārān dāḡ-tōssōba n-isēm-in wa kāwān-iwarān,

¹³ ad-hawān-umas a-wen ēssōbab fāl tāmoosām tijuḡawen-in.

¹⁴ Wār tāšāw-wašnet ulhawān-nāwān dāḡ-isālan n-a-wa mad-tōnnēm

¹⁵ fāl-a-s, ad-kāwān-āk-fāḡ āllifaḡ d-sārḡo dāḡ-mājrād s-wār t-illa ašānjo-nāwān āddoben tebādde data-wān, wāla asōbbōggu-nāwān.

¹⁶ Ad-kāwān-sōttārmōsān imārāwān-nāwān, d-ayōtma-wān, d-išāqqāḡān-nāwān, d-imidiwān-nāwān, sōssānḡōn kōrēf iyyād dāḡ-wān,

¹⁷ ad-dār-wān akōḡān āddināt iket-nāsān dāḡ-tōssōba n-isēm-in wa kāwān-iwarān

¹⁸ māšan, wār hin-e-iba wāla emḡād n-eḡāf-nāwān iyyān ḡas.

¹⁹ Ere wa ākōyādān dāḡ-alkum-hahi dāḡ-immun-net har ašāl wa d-imda a-wen-dāḡ iket-net, ad-iḡlōs.»

Erk āzzāmanān wi dd-malōnen

²⁰ «Afäl tēnhāyām Yārussālam a-s tāt-dd-āḡlāyḡālāyān ēlḡōskārān, ēlmōdāt a-s ēlhōllak-net, ohāḡ-dd.

²¹ Dihēn, wi ēzzāḡnen teje ta n-Ālyāhudōyāt, jawādnet dāḡ-azzal s-ašrut wa n-iḡāḡān; wi ēzzāḡnen aḡrēm wa n-Yārussālam, ēzjārnet-t; wi ēzzāḡnen āroj-net, wār dd-tājjāšnet aḡrēm

²² fāl-a-s, išilan-en, išilan n-ukōs n-eḡa dāḡ-mad-āj a-wa ēnnān ēlkōttabān n-Māssināḡ iket-net.

²³ Timōskay tiḡēden-ti irmās a-wen-dāḡ lanāt ēnniyāt meḡ siḡuḡnāt, fāl-a-s, ad-tāḡ tizzurt māqqōorāt fāl-ākall, iḡōw aḡkār n-Māssināḡ fāl-tamōtte-ta-dāḡ.

²⁴ Aḡil-net iyyān, ad-t-tākš tākoba, aḡil wa iyyādān, ad-ākkālāt dāḡ-ikallān wi iyyādnen, ad-ēddōšnāt tiwsaten wāren āmoos ti n-Ālyāhud, Yārussālam hundāḡ har akōy āzzāman-nāsnāt.»

Tāmōddawt n-āddunya

(Mātti 24:29-31; Marḡōs 13:24-27)

²⁵ «Ad-āj hārāt dāḡ-tāfukt d-ewār d-etran, ējōnāt tirēmḡaḡ dāḡ-tiwsaten ti wārnen ārori n-ākall dāḡ-tōssōba n-emāsli-i-dāḡ āssuksādān he-ikkōs ējārew wa sōmmān d-tināzzāmāren-net.

²⁶ Āddināt iyyād, ad-tān-tānḡ tarēmmeḡt n-a-wa hannāyān itajj fāl-ākall ed, wāla imōššuḡa wi hānen išōnnawān, ad-ēnhōynōhōyān.

²⁷ Ālwāqq-wen-dāḡ, ad-e-ēnhōyān āddināt Āgg-āgg-adēm imal-dd, inay tijārāken, tōlkam-as tārna-net d-ālxurmāt-net.

²⁸ Afäl ēssōtān hārātān-win-dāḡ iji, ēbdōdāt, tōḡkōlām iḡāfawān-nāwān fāl-a-s, ēlḡōllas-nāwān, ohāḡ-dd.»

ḡaymāt tokayām

(Mātti 24:32-35; Marḡōs 13:28-31)

²⁹ Issäyläy-tän Yisa darät-a-wen tangalt tiyyät, inn'-asän: «Səjrähät dāy-ašar d-ihəškan wi iyyādnen;

³⁰ wadden e-d, tän-tənhäyäm a-s dd-ənšärän, ad-təlmədäm d-iman-nāwän a-s os'-iwän akäsa.

³¹ Emmək-wen-dāy dāy a-s afäl tənähäyäm härätän-win-dāy s-hawän-ənnex har əqqälän iji, adiš əlmədät a-s Təmmənəya n-Mässinäy, tohäz-dd.

³² Äsidättey-awän a-s wär-e takəy əzzurəyät-ta-dāy wär jen härätän-win-dāy s-hawän-ənnex iket-dāy-näsän.

³³ Ojār täräyxe ija ad-ib'-išənnawän d-äkall uhən ad-iba tənna-nin.

³⁴ Äjät ənniyät i-iman-nāwän, wär zāzayet tesäse n-asməd d-əlxəmə r d-inəzjam n-äddunya ulhawän-nāwän, wär toyem ašäl-en-dāy oḡa-dd fälla-wän

³⁵ šund tätart fäl-a-s ašäl-en, ad-dd-iḡəw fäll-äddinät wi wärnen ärori n-äkall iket-dāy-näsän.

³⁶ Yas, xaymät jam ənniyät, täybadäm Mässinäy s-älwäqq iket-net i-ad-täy ləsäm dāy-a-wa dd-imalän, tudabem dāy tebädde dat-Ägg-ägg-adəm.»

³⁷ Itajj Yisa ašäl iket-net isayra dāy-ehän n-ämudd wa mäqqārän mäšan, e-d t-ija ehäd, ad-adəw taḡayt ta n-əzzäytun;

³⁸ e-d äffäw, ad-dd-tənšəy tamətte iket-net ehän n-ämudd wa mäqqārän i-ad-has-səjəd.

22

Anu n-tayḡärt wa iyäš Yähudəs

(Mätti 26:1-5, 14-16; Marqəs 14:1-2, 10-11; Exya 11:45-53)

¹ Ohäz-dd ämudd wa n-Faška-i dāy-tattän äddinät tijəlwen ti wär täskäf täzḡa yas,

² əggädän-dd imänokalän n-käl-tikutawen d-älḡulam n-Ättäwrät, ad-tattärän əmmək s-əjän iman n-Yisa mäšan, təgdäl-asän-t tuksəḡa ta jän i-tamətte.

³ Dāy-a-wen-dāy, ad-ijjäš Iblis Yähudəs Isxaryut, iyyän dāy-inəḡḡulab n-Yisa wi n-märəw d-əssin,

⁴ iglä, imməjräd d-imänokalän n-käl-tikutawen d-imänokalän n-älḡomitän, änmäknän dār-s i-ad-hasän-isäḡdär Yisa.

⁵ Äsdäwät-tän a-wa hasän-inna, əjjäšan-as ärkəwäl n-ad-t-ək fən azrəf,

⁶ ird'-asän, ad-itammäy i-ässayät ännufläyän d-wär t-təlla tamətte edes i-Yisa i-ad-hasän-t-isəttärməs.

Isəmməjna i-ämudd wa n-Faška

⁷ Osä-dd ašäl wa dāy-tattän äddinät tijəlwen-ti wär ha täzḡa d-ḡarräsnät taysiwen ti n-Faška,

⁸ äšmašäl Yisa Bəḡrus d-Exya, inn'-asän: «Äḡlät, səmməjnum-anäy imənsiwän wi n-ämudd wa n-Faška.»

⁹ Ənnän-as: «Əndek diha d-tärhed ad-tän-nəsəmmujnət?»

¹⁰ Inn'-asän: «Diha-dāy d-e-təjjəšäm ay rəm ad-där-wän-e-immuqqəs ähaləs dd-iktarän, əlkəmät-as s-ehän wa mad-ijjəš,

¹¹ tənnəm i-mässi-s n-ehän-en: <Inn'-ak älyalim, səkən-anäy edägg dāy-ehän-näk wa-dāy mad-səssikəyāy ämudd wa n-Faška näkk d-inəḡḡulab-in.>

¹² Ad-kəwän-isəkən ehän n-soro dāy-ämmujnen isəftay, dihen-dāy ad-mad-nəsəssikəy ämudd.

¹³ Əḡlän, ənhäyän härätän s-əmmək-wa-dāy s-hasän-tän-inna Yisa, ad-siməjnun imənsiwän wi n-Faška.»

*Ämudd wa n-Faška**(Mätti 26:20-30; Marqos 14:22-26; 1 Kur. 11:23-25)*

¹⁴ Ämmujnät-dd härät iket-net, øskärän-dd imønsiwän ɣas, änyäyma ʃisa d-inømmuſal dāɣ-edägg wa n-imønsiwän,

¹⁵ inn'-asän: «Äsdärhänäɣ hullan ad-där-wän ahäräɣ Faška-ta-däɣ härwa wär-äqquzzäbey

¹⁶ fäl-a-s, ädduuttät a-s äbas ilkam, ad-där-wän tät-oharäɣ hundäɣ har aſäl wa d-mad-ättälmäd älmäɣna-net dāɣ-Tømmønøya n-Mässinäɣ.»

¹⁷ Iðkäl-dd ʃisa kara han aman n-läɣnāb äxxiimmärnen, äjoðäy i-Mässinäɣ tøzzar, ikf'-en i-inøttulab-net, inn'-asän: «Näɣøbbötät a-wa jer-iman-nāwän

¹⁸ fäl-a-s, ässiilmädäɣ-kāwän a-s wär-ilkem ɣur-aſäl-i-däɣ ad-øswey a dd-ijmadän läɣnāb, hundäɣ har aſäl-wa dd-mad-tass Tømmønøya n-Mässinäɣ.»

Asøbdad n-amønsi wa n-tasäktot šäddijän

¹⁹ Iðkäl ʃisa ðarät-a-wen tajølla, ämmoy i-Mässinäɣ, irz'-et tøzzar, äzun-asän-tät, inn'-asän: «A-wa taɣøssa-nin ta mad-äkfäɣ dāɣ-idäggan-nāwän, tuzanät tajølla jer-iman-nāwän kāwäned-däɣ i-ad-hi-dd-kittøwäm.»

²⁰ Èssømdän tetäte ɣas, iðkäl kara han aman n-läɣnāb äxxiimmärnen, inn'-asän: «A-wa ihän kara-i-däɣ a-s ärkāwäl n-tassaxt wa äynayän ijän s-aſni-nin wa madän-inɣøl dāɣ-äddimmät-nāwän

²¹ mäſan, ønhøywät-ak ämayðar-in, ønta-da-däɣ där-i oharän.

²² Äsidätteɣ-awän a-s Ägg-ägg-adøm, ätiwatäs ad-t-iba mäſan, amäskoy äwadøm wa t-madän-isøssäɣdär!»

²³ Ad-tinmøsestinän ya inøttulab jer-iman-näsän i-ad-ølmødän ere wa ihälän ad-äj täkunt-ten-däɣ.

Mijraw wa n-tidøt

²⁴ Tønkär dāɣ-sän tamädašt täſſøohet älwäqq-wen-däɣ i-ad-ølmødän ere wa dāɣ-sän øjärän.

²⁵ Inn'-asän ʃisa: «Imänokalän äsiikäløn øddøwälän-wi fäll-äxkamän mäſan, hakd a-wen-däɣ, ärhan ad-hasän-itawänna däg-g-älxer

²⁶ mäſan, kāwäwed, wär jem a-wen: Wa øjärän dāɣ-wän, umaset ſund wa øndärrän, wa n-ämizär, umaset änaaxdim n-wi iyyäðnen.

²⁷ Ässistänäɣ-kāwän: øndek ere wa äniihäjjän d-semɣar jer-ere wa äqqiimän itatt d-ere wa has-ixdamän? Wädden wa äqqiimän itatt a äniihäjjän d-semɣar. Äywa! Näkk a-s kāwän-dd-øsey, øjeɣ iman-in jere-wän dāɣ-edägg n-änaaxdim.

²⁸ Kāwäned-i-däɣ ɣas, ad-dd-äqqimänen tølkamäm-ahi ðarät aɣäna wa ønhäyäɣ,

²⁹ a-wen-däɣ a fäl, tajiäɣ Tømmønøya ta n-Abba-nin jer-ifassän-nāwän s-ømmøk wa s-tät-ija jer-wi-nin,

³⁰ i-ad-där-wän ahäräɣ iſøkſa d-isøswa dāɣ-Tømmønøya-nin, täqqaymøm fäll-tisäqqima n-tømmønøkøla i-ad-tøſräɣäm tiwsaten ti n-märawät d-sänatät n-Iſrayil.»

*Äloläy ʃisa dāɣ-isälan n-akuddøl wa t-mad-äj Bøtrus**(Mätti 26:31-35; Marqos 14:27-31; Exya 13:36-38)*

³¹ Innä Älɣalim ʃisa ðarät-a-wen: «Simyon, Simyon, ittär iblis turhajät n-ad-kāwän-iskønsøkøt ſund älkäma

³² mäſan, däläɣ-ak Mässinäɣ i-ad-wär-äba immun-näk sä-r-i; afäl hi-dd-täqqäläd, søbðed ayøtma-k dāɣ-äddin.»

³³ Iggäd-dd Bətrus, innä i-Ŷisa: «Älyalim, näkk, äsidäwäx i-ad-där-k idawäx s-takärmüt hakd-däx s-tamättant.»

³⁴ Inn'-as Ŷisa: «Bətrus, ässiilmädäx-käy a-s, a-s mad-iwət ekäz äxora ašäl-i-däx, täkkuddäläd-ahi har kärađ ihändäggan.»

Isəmməterän-wi ija Ŷisa i-inəttulab-net

³⁵ Inn'-asän Ŷisa iket-näsän darät-a-wen: «Älwäqq wa d-käwän-äšmašäläx s-tizarät wär täwweyäm azrəf wäla šäkköš, wäla tifädelen, ajän äba-hin härät fälla-wän.» Ənnän-as: «Wäla a əndärrän.»

³⁶ Ŷas, inn'-asän: «Ämära, ere ilän azrəf, idkəlet-t, ere ilän šäkköš, išləjet-t, ere däx-wän wärän ila täkoba, iżänšet-in anäkäbba-net i-ad-tät-ikrəš

³⁷ ed, ällexeḡ-awän a-s a-wa ätwännän fäll-i däx-əlkəttab n-Mässinäx a-s inna:

«Ädin däx-inadlimän»,
ad-äj.»

³⁸ Ənnän-as əntäned: «Älyalim, sänatät tikobawen da»; inn'-asän: «Täkat, igdäh-awän mäjräd!»

*Ässayät wa ikkäs Ŷisa däx-ašəkrəš wa n-Žätsämmani
(Mätti 26:36-46; Marqəs 14:32-42)*

³⁹ Ifäl dihen ḡas, äddew dər-sän s-tađayt ta n-əzzäytun ed, äru-däx a-wen-däx a-s izzay ad-t-äj.

⁴⁰ Əwwädän-in tađayt-en ḡas, inn'-asän: «Ädölät Mässinäx i-ad-käwän-agəz däx-tändärbaten n-Iblis.»

⁴¹ Iššenkäš-in Ŷisa fälla-sän s-əddəkud n-tejere n-tähunt, irkäx, ad-itəddal Mässinäx,

⁴² ijanna: «Abba, kunta tärhed a-wen-däx, səssijəj-ahi kara n-tisnant-ta-däx mäšan hakd a-wen-däx, äjet erhet wa-näk wädden wa-nin.»

⁴³ Ijanna a-wen-däx a-s has dd-änfaläl änjalos n-Mässinäx i-ad-tisəşsuhət.

⁴⁴ Idgäz Ŷisa, ijläy hullan däx-tamädilt n-Mässinäx har tämoos tide-net a olähän d-tikruten n-ašni dd-titrəkkiten fäll-äkall.

⁴⁵ Imdä d-tamädilt n-Mässinäx ḡas ibdäd, iqqäl-dd inəttulab-net, ogäz-tän-dd tässoodäs-tän tisnant.

⁴⁶ Inn'-asän: «Ma s-təttasäm? Ənkärät-dd, ädölät Mässinäx i-ad-käwän-agəz däx-tändärbaten n-Iblis.»

*Atärməs n-Ŷisa Älmaseḡ
(Mätti 26:47-56; Marqəs 14:43-50; Exya 18:2-11)*

⁴⁷ Härwa-däx ämmiijräd i-inəttulab-net a-s dd-osa ejhän wa t-ittärän, äzzar-as iyyän däx-inəttulab-net wi n-märaw d-əssin wa s-isəm-net Yähudəs. Ohäz-dd Yähudəs Ŷisa i-ad-t-asəs däx-idmarän-net

⁴⁸ mäšan, inn'-as Ŷisa: «Ḥas käyy Yähudəs, əmmək wa-däx a-s saḡdaräd Ägg-ägg-adəm?»

⁴⁹ Ənhäyän inəttulab wi iyyädnen a-wa ikkän iji ḡas, ənnän: «Ak näwtet-t s-tikobawen-nänäx meḡ?»

⁵⁰ Iwät iyyän däx-sän akli n-ämänokal n-käl-tikutawen s-täkoba-net, ištäf-dd taməzzujt-net ta n-aḡil.

⁵¹ Iḡtäl-tän Ŷisa, inn'-asän: «Wär jem a-di.» Idäs taməzzujt n-ähaləs, äzozäy-t.

⁵² Innä Ŷisa i-imänokalän n-käl-tikutawen d-imänokalän n-älgomitän wi äḡläfnen ehän n-ämudd wa mäqqärän d-inušämän n-Işrayil d-wi

t-ässhunjätnen: «Ma s-sär-i dd-täwwayäm tikobawen d-iboriyän šund änaɣtaf?

⁵³ Wädden hak ašäl ärtayäɣ dār-wän däɣ-ehän n-ämudd wa mäqqārän, mafäl wār hi-däɣ-s tärmesäm; əlmədät a-s ašäl-wa-däɣ, ašäl-nāwän käwāneɟ d-Iblis d-tihay-net.»

Tisətbət n-akuddəl wa ija Bətrus i-Ÿisa

(Mätti 26:57-58, 69-75; Marqəs 14:53-54, 66-72; Exya 18:12-18, 25-27)

⁵⁴ Ärmäsän Ÿisa, əlwäyän-t s-ehän n-ämānokāl wa n-käl-tikutawen, ij'-asän Bətrus alkum šəjren.

⁵⁵ A-s hin-əwwädän dihen, irɣä efew däɣ-ammās n-äɣalla, əzzahän sār-s äddinät; ijjäš Bətrus ənta-däɣ, iglä äqqima edes i-äddinät-en.

⁵⁶ Tənhäy-t tänaɣdimt tiyyät äqqiima s-efew, təkn'-e azəjjəzz, tənnä: «Hannäyäm-t wa-daɣ, amidi n-Ÿisa.»

⁵⁷ Äkkuddäl Bətrus a-wen, inn'-as: «Tamäɟt, wār t-əzzeyäɣ.»

⁵⁸ A əndärrän ɟarät-a-wen-däɣ, inhäy-t äwadəm iyyän daɣ, inn'-as: «Iyyän däɣ-sän a tämoosäd.» Inn'-as Bətrus: «Ähaləs, äɣafyät-näk.»

⁵⁹ Okäy a iwädän ässaɣät ɟarät-a-wen, ikyäd däɣ-s ähaləs iyyän, inna: «Ijmaɟ-t äššäk a-s ähaləs-i-däɣ, amidi-näsän fäl-a-s ənta-däɣ, i n-Galila.»

⁶⁰ Inn'-as Bətrus: «Ähaləs, wār-əssenäɣ a däɣ-hi-tässewäläd.» Diha-däɣ d-innä Bətrus a-wen-däɣ, härwa-däɣ ämmjiräd a-s iwät ekäz äɣora.

⁶¹ Innäɟ-dd sār-s Ÿisa, ämmoqqäs asawaɟ-näsän, iknä däɣ-s Ÿisa akäyad ɣas, iktä-dd Bətrus mäjräd wa s-käla has-t-ija a-s has-innä: «A-s mad-iwət ekäz äɣora ašäl-i-däɣ, täkkuuddäläd taməzzuyt-in har käraɟ ihändäggan.»

⁶² Izjār Bətrus, ad-ihall a-wa-däɣ has-ja tisanat.

Äsmäɟrāyän əssärdusa Ÿisa

(Mätti 26:67-68; Marqəs 14:65)

⁶³ Əzzänän meddän-wi jānen ənniyät i-Ÿisa sār-s, ad-däɣ-s ɟazzän, təggatän-t;

⁶⁴ äqqänän idəm-net s-ekäršäy, ad-has-jannen: «Luləy ya, tälläɣed-anäɣ ere wa käy-iwätän.»

⁶⁵ Ad-sikuforän, gaggärän-t.

Tebädde n-Ÿisa dat-käl-Sinhidrin wi ɣattäsnen äššäreɣa

(Mätti 26:59-66; Marqəs 14:55-64; Exya 18:19-24)

⁶⁶ Äffāw ɣas, äddew-dd älzämaɣät wa n-inušämän n-Işrayil d-imānokälän n-käl-tikutawen d-älɣulam n-Ättäwrät, əlwäyän Ÿisa s-käl-äššäreɣa.

⁶⁷ Əwwädän-in ɣas, əssəstänän-t, ənnän-as: «Kunta käyy a-s Älmaseɣ, əkkəs-anäɣ däɣ-tayɟärt.» Inn'-asän: «Kud-hawän-tän-ənney-däɣ, wār hi-e-təfləsäm;

⁶⁸ kud-kāwän-əssəstänäɣ daɣ, wār hi-e-täwwäzzäbäm

⁶⁹ mäšan, əlmədät a-s ɣur-ašäl-i-däɣ, ad-tənhəyäm Ägg-ägg-adəm, äqqiima daw-aɣil n-Mässinäɣ-i ilän tärna.»

⁷⁰ Ənnän-as iket-däɣ-näsän: «Adiš käyy a-s Rure-s n-Mässinäɣ?» Inn'-asän: «Kāwāneɟ iman-nāwän, tənnäm a-s näkk a t-ämoosän.»

⁷¹ Ənnän älwäqq-wen: «Ma nətajj i-tajuhe säl ta-däɣ? Wädden nəslä näkkāneɟ iman-nänäɣ i-a-wa dd-izjārän emm-net.»

23

Tebädde n-ÿisa dat-Bilatös

(*Mätti 27:1-2, 11-14; Marqos 15:1-5; Exya 18:28-38*)

¹ Inkär älzämaḡät iket-net, ittölwäy ÿisa s-Bilatös wa n-göfär.

² Osän-in dihen ḡas, ad-t-saḡlamän, jannen i-göfär: «A-s närmäs ähalös-i-däḡ, išaška tamötte-nänäḡ, ijanna önta a-s Älmaseḡ wa n-ämänokal, ijanna daḡ i-äddinät wär ḡeläm tiwse i-Qäyşär-i n-ämänokal wa mäqqārän.»

³ Issöstän Bilatös ÿisa, inn'-as: «Ak, käyy a-s ämänokal n-käl-Älyähud meḡ?» Inn'-as ÿisa: «Käyy iman-näk, tönned-tän.»

⁴ Innä Bilatös i-imänokalän n-käl-tikutawen d-tamötte: «Ähalös-i-däḡ, wär hönnöyäḡ fälla-s uḡlem t-äsinähäjjän d-tamättant.»

⁵ Ezzäjän äddinät imäslan-näsän s-afälla, önnän-as: «Issöntä-dd aşöşk n-tamötte s-a-wa tät-isäḡra ḡur-Galila ta dd-ifäl har dd-imdä Älyähudöyät, iwwäd-dd Yärussälam ämära.»

⁶ Islä Bilatös i-a-wen ḡas, issöstän d-a-s ÿisa i n-Galila meḡ?

⁷ Ilmäd a-s Galila a t-töläḡ ḡas, ässawäy-t i-Harudös wa n-göfär n-Galila-i fälla-s ixkamän ed, a-s itäj a-wen-däḡ, iha Yärussälam.

Tebädde n-ÿisa dat-Harudös Antibbas

⁸ Inhäy Harudös ÿisa ḡas, iddöwät hullan fäl-a-s äru irh' ahänay-net däḡ-tössöba n-a-wa fälla-s isäll, ijar daḡ äḡḡäma n-ad-äj ÿisa, iji n-Mässinäy iyyän data-s.

⁹ Ija Harudös isöstanän äjjootnen i-ÿisa mäšan, wär t-illa a has-inna ÿisa.

¹⁰ A-s itäj a-wen, imänokalän n-käl-tikutawen d-älḡulam n-Äḡḡäwrät, saḡlamän ÿisa s-äşşahät.

¹¹ Iggäd-dd daḡ Harudös d-össärdusa-net, ad-t-samäḡrayän, tajjän-t tekäşkäşt; össölsän-t anäkäbba iknan tiḡsay, äsoḡälän-t ḡarät-a-wen i-Bilatös wa n-göfär.

¹² Aşäl-önnin-däḡ, ad-änmäzäl Harudös d-Bilatös, ämedäwän ed, dat-a-wa, änimäksärän.

Bilatös, Bäryäbbas, ÿisa

(*Mätti 27:15-26; Marqos 15:6-15; Exya 18:39-19:16*)

¹³ Äsdäw-dd Bilatös imänokalän n-käl-tikutawen d-inušämän d-tamötte, inn'-aşän:

¹⁴ «Ähalös-i-däḡ ya, täwwäyäm-ahi-t-dd, tönnäm-ahi: «İšaška äddinät», össöstänäḡ-t data-wän mäšan, wär fälla-s öjrewäḡ fäw a t-äsinähäjjän d-tamättant däḡ-härätän-wi-däḡ t-sawaräm.

¹⁵ Ässawäyäḡ-t i-Harudös önta-däḡ mäšan, wär t-ill' uḡlem fälla-s ijraw ed, äsoḡäl-anäḡ-t-dd. Wär fälla-s hönnöyäḡ fäw a t-äsinähäjjän d-tamättant.

¹⁶ Äddäbara ämära, ad-däḡ-s söwwöjjäḡ tiwit, äyyäḡ-t-in.» [

¹⁷ Äzzäman-en, hak ämudd n-Faška, äsiwäyy'-asän-in Bilatös u-takärmüt iyyän.

¹⁸ Ohärän iket-näsän iyyän n-emm, äşḡären däḡ-işönnawän, jannen: «Ämmätet ähalös-wa-däḡ, söwwöyöd-anäḡ-dd Bäryäbbas.»]

¹⁹ Bäryäbbas-i-hi, iha takärmüt fäl-a-s käla dd-issenkär tamötte däḡ-aḡräm har ij' iman n-äwadäm däḡ-a-wen-däḡ.

20 Ittär Bilatəs ad-hasän-ämmäjräd day ed irha ənta ad-hin-isəwwəyy
 ʁisa

21 məšan, əşxären iket-dəx-nəsän dəx-işənnawän, ənnän-as:
 «Itwəşləbet fäll-tajəttewt, itwəşləbet fäll-tajəttewt!»

22 Oläs-tän asəstan wa s-kärađ, inn'-asän: «Mafäl, ma ixsäd t-
 əsiinähəjjän d-taməttant? Wär fälla-s əjrewəx a t-əsinähəjjän d-
 taməttant; əddäbara əməra, ad-dəx-s səwwəjjəx tiwit, səwwəyyəx-t-in.»

23 Əxwälän-t s-işəran-nəsän, tattärän dəx-s ad-itwəşləb fäll-tajəttewt.
 Oyy'-asän iman-net, əşjad-asän Bilatəs,

24 əllil erhet-nəsän, ixtäs-as taməttant,

25 əswəyy'-asän-in əhaləs wa dəx-s əttärän ihän takärmüt dəx-təssəba
 n-asəkar wa dd-ija i-tamətte d-iman-wi ija, ija ʁisa dəx-ifassän-nəsän i-
 ad-has-əjən a-wa s-ərhän.

Atwəşləb n-ʁisa Əlməsex fäll-tajəttewt

(Mätti 27:32-44; Marqəs 15:21-32; Exya 19:17-27)

26 Əlwəqq wa d-əwwəyän ʁisa i-ad-itwəşləb, əşhəşşälän əhaləs s-isəm-
 net Simyon n-tadəbayt ta n-Qərwan dd-ifalän işəkraş alənji n-tajəttewt ta
 fäll-mad-itwəşləb ʁisa; idkäl-tät, ilkäm-asän.

27 Təlkam-asän day tamətte təjjeet əhanät tiqəden əsiikälälnen,
 təggatnät iman-nəsnät s-əkall.

28 Innəd-dd sār-snät ʁisa, inn'-asnät: «Şät-Yərussəlam, wär təlhemät
 fäll-i, əlhəmät fäll-iman-nəkmät d-aratän-nəkmät

29 ed, malän-dd işilan dəx-mad-itwənn: «Təndəđ i-timəjjejruten d-ti s-
 kəla wär-əkrešnät ara, wär kəla əssəđədnät»,

30 əşäl-en, ad-ənnən əddinät i-ıdaxän: «Ađəwät fälla-nəx», ənnən i-
 tidaxen: «Ələmət-anəx»

31 fäl-a-s, efew kunta oşal dəx-ahəşk ibdajän s-əmmək-wa-dəx, ma inna
 wa əqqurän?»

32 Əttilwəyän day dəx-a-wen-dəx əssin inaxtafän əkkanen taməttant
 əntəned-dəx.

33 Əlwəqq wa d-hin-əwwəđän edəgg wa s-itawänna: «Edəgg wa n-
 akärkor», əşləbän ʁisa, əşləbän day inaxtafän edes-has, iyyän daw-axil-
 net, wa iyyəđän daw-təşəlje-net.

34 Əlwəqq wa d-əşləbän ʁisa, innä: «Abba, ənş-asän fäl-a-s, wär-
 əssenän a hən»; jän qarət-a-wen tisəxeren i-ad-užanän isəlsa-net jer-iman-
 nəsän.

35 A-s itəjj a-wen, təbdad tamətte, təjjəyha i-a-wa ijän iket-net; dəzzän
 imännəhəđän n-käl-Əlyəhud dəx-ʁisa, jannen: «Wədden ixləs əddinät wi
 iyyəđnen, ixləset ya iman-net əməra kunta ənta a-s Əlməsex wa əsnəfrän
 Məssinəx i-iman-net.»

(Mätti 28:16-20; Marqəs 16:14-18; Exya 20:19-23)

36 Əjən-t əssərdusa tađəzə, zəhazän-t-dd bənegär, hakkän-as-t,

37 jannen-as: «Kunta kəyy a-s əmənokəl n-käl-Əlyəhud, əxləs iman-nək
 ya!»

38 Əttəytəyän əllox jənnəj-s, iktab fälla-s:

«A-WA ƏMƏNOKAL N-KƏL-ƏLYƏHUD».

39 İggəd-dd iyyän dəx-inaxtafän wi ətwəşləbnen dihen, ad-isaməđray
 ʁisa, ijann'-as: «Wədden kəyy a-s Əlməsex, əxləs iman-nək ya, təxləsəd-
 anəx!»

⁴⁰ Äkläwläw änaytaf-wa iyyädän fäll-amidi-net, inn'-as: «Käyy-i dār-s oharän tissant-ta-däx, uksad Mässinäx,

⁴¹ näkkäned, a-wa hanäx-irmäsän, imojjan-nänäx a sār-näx-t-dd-orāwän, nānihājja dār-s, iwar-anäx udlem māšan ənta, wār t-illa a läbasän ixsad.»

⁴² Inn' änaytaf wa s-iket imməjräd i-Ŷisa: «Ektəw-ahi-dd afäl dd-täqqäläd täminakäläd.»

⁴³ Inn'-as Ŷisa: «Äsidätteḡ-ak a-s ašäl-i-däx, ad-dār-i tahəred älžännät.»

Tamättant n-Ŷisa Älmasesx

(Mätti 27:45-56; Marqəs 15:33-41; Exya 19:28-30)

⁴⁴ A-s itäjj a-wen-däx, išwar təja tarähut, əlsänät tihay ärori n-äkall iket-däx-net hundäx har təja tezzar.

⁴⁵ Tättunkäl täfukt, iqqärrawät ärido wa ibdän däx-ehän n-ämudd wa mäqqārän, edägg wa šaddijän d-wa iknän təšədje.

⁴⁶ Äşyärät Ŷisa s-äşşahät dərät-a-wen, innä: «Abba, ärməs unfas-in.» Innä a-wen-däx ḡas, əjmädän-t iman.

⁴⁷ Inhäy käbtän wa ixkämän fäll-əssärdusa wi əşläbnen Ŷisa a-wa ijän ḡas, omäl Mässinäx, innä: «Wār t-ih' äşşäk a-s ähaləs-i-däx, ämaḡdal.»

⁴⁸ Ənhäyän äddinät wi dd-äddewnen s-edägg-wen-däx a-wa ijän, əqqälän, änxasän iman-näsän hullan.

⁴⁹ A-s itäjj a-wen-däx, əbdadän imidiwän n-Ŷisa däx-ijəj əkyadän əntäned d-tiḡeden-ti has-dd-əlkämnen wa-däx n-Galila har əntänäteḡ-da-däx.

Azəkka n-Ŷisa

(Mätti 27:57-61; Marqəs 15:42-47; Exya 19:38-42)

⁵⁰ Osä-dd ähaləs oḡadän, olaḡän n-tayrəmt ta n-Arimata s-isəm-net Yusəf, iha inušämän n-Işrayil-wi ḡattäsnen äşşäreḡa,

⁵¹ wār-oher d-imizārän-wi iyyädnen äddäbaratän-wi jän däx-isälan n-Ŷisa ed ijar ätṡäma n-a-s ilkam ad-dd-təzzubbət Təmmənəya n-Mässinäx,

⁵² ənta-en-däx a ihälän ad-äkk Bilatəs, ittär däx-s tafəkka n-Ŷisa,

⁵³ oyyas-tät Bilatəs ḡas, ikkäs-dd Yusəf tafəkka n-Ŷisa fäll-tajəttewt, ij'-et däx-tefit tezzar, issəns'-et däx-azəkka iḡaşän däx-esəwäl s-käla wār däx-s inša ere äba.

⁵⁴ Itäjj a-wen-däx ašäl wa d-siməjnun äddinät i-ämudd wa n-əssəbət-i n-täsonfat.

⁵⁵ Əlkämnet tiḡeden-ti dd-äddewnen d-Ŷisa wa-däx n-Galila har diha-däx i-Yusəf, ənhäynät edägg n-azəkka-en hakd-däx əmmək wa s-tənsa tafəkka n-Ŷisa däx-azəkka-en.

⁵⁶ Əqqälät ihänan ḡas, ad-sadawnät əlḡənfärän d-aḡutän. Ijä ašäl wa n-əssəbət-i n-täsonfat ḡas, ässunfänät ed, a-wen-däx, a innä alämär wa n-ännäbi Mosa.

24

Tanäkra n-Ŷisa jer-inəmmuttan

(Mätti 28:1-10; Marqəs 16:1-8; Exya 20:1-10)

¹ Abənnəbən n-älxad-i n-ašäl wa äzzarän däx-əssəboḡ, əkkänät tiḡeden azəkka äwwaynät əlḡənfärän d-aḡutän-wi dd-äsdawnät,

² äwwädñät-in azəkka, oḡäznät-in tähunt-ta härät emm n-azəkka, täḡiraräd-in,

³ əjjäšnät ammas n-azəkka māšan, wār däx-s ənhəynät tafəkka n-Ŷisa.

4 Äqqanän ixfawän-näsnät dāx-a-wen-dāx a-s dd-əbdādän əssin meddөн əlsanen isəlsa əsimāxmāxnen edes-hasnät,

5 jänät tarəmmeyt-ta-dāx fäl dd-hänät-ärkaxnät, əsiḏāsnät timmawen-näsnät äkall. Ənnän-asnät meddөн: «Ma s-tammāxmät i-ere iddarän jer-inəmmuttan?»

6 Yisa, wär t-illa diha, inkär-dd dāx-tamättant. Əktəwmät-dd a-wa innä härwa iha teje ta n-Galila,

7 a-s innä: «Ägg-ägg-adəm, ilzam ad-ättärmäs, ijjəš ifassän n-inəsbäkkadän, əşləbän-t māšan, əşäl wa s-käraḏ, a dd-inkär jer-inəmmuttan.» »

8 Əktänät-dd iməjridän-win-dāx ija Yisa.

9 Fälnät azəkka xas, əkkänät inəṭṭulab wi n-māraw d-iyyan d-inalkimän-wi iyyädnen, jänät dāx-sän isəlan.

10 Tiḏeḏen-en, h'-enät Märyäma ta n-tadābayt ta n-Mulāždaləyät, Täxya d-Märyäma ta n-ma-s n-Yaqub d-tiyyäḏ dāx sidəttutnen a-wa ənnänät i-inəṭṭulab

11 māšan, jän-tänät tinəbbuddal wären əssen a jannenät, unjäyan s-ad-tänät-əfləsän.

12 Iggäd-dd Bəṭrus, oşäl s-azəkka, iwwäḏ-in xas, əssijja dāx-əmmas-net māšan, wär dāx-s inhey ar tefit tənsat d-iman-net, iqqäl ənta-dāx iqqan a-wa ijän eyäf-net.

Zäbo wa n-Imayus

(Marqəs 16:12-13)

13 Əkkän inalkimän n-Yisa əssin əşäl-wen-dāx taxrəmt ta n-Imayus təniməjjajät d-Yärussälam s-əḏḏəkuḏ n-māraw kelumetarän d-əssin,

14 əssokalän, simxuylän isəlan n-a-wa ijän iket-net

15 a-s tän-dd-iwwäḏ Yisa iman-net, äddew dār-sän

16 māšan, indär i-tiṭṭawen-näsän ad-t-əzzəynät.

17 Imməjräd-asän, inn'-asän: «Ma s-tärjašäm ham ti-net?» Äqqänän ixfawän-näsän, əbdādän,

18 inn'-as dāx-sän wa s-isəm-net Kälyobbas: «Xas, käyy xas, dāx-Yärussälam təmdat a wär hen isəlan n-a-wa dāx-s ijän išilan-wi-dāx?»

19 Inn'-asän: «Ma dāx-s ijän?» Ənnän-as: «Un a-wa ijrāwän Yisa wa n-Nəşirät-i əmoosän ännäbi əşşoohen s-imojjan-net hakd məjräd-net dat-Mässinäy d-tamətte iket-net,

20 ärmäsän-t imänokalän n-käl-tikutawen d-imizärän-nänäx, əssoḏän-t dāx-əşşärexa-näsän təzzar, əşləbän-t.

21 Näkkəneḏ, nəmoos härät dāx-wi əjərnen äṭṭäma n-a-s ənta a madän-iyləs İşrayil māšan, a-wa əşäl wa s-käraḏ d-əjän härätän-win-dāx,

22 äqqänät dāx tiḏeḏen-nänäx tiyyäḏ ixfawän-nänäx ed, ənşäynät azəkka

23 māšan, wär dāx-s in-ogeznät tafəkka-net, äqqäl-nät-dd, ənnänät änfälälän-asnät-dd änjälösän hasnät-ənnänen, iddar.

24 Osän iyyäḏ dāx-näx dāx azəkka, əsbayanän a-wa ənnänät tiḏeḏen māšan, Yisa iman-net, wär t-illa ere t-inhayän.»

25 Inn'-asän Yisa älwäqq-wen: «Käwəneḏ-i-ş, tidət-dāx a-s ijrāw-kāwän iba n-tayətte, uhən, ma əsiḏärän ulhawän-nāwän, igdal-awän ad-təjrahäm a-wa ənnän ännäbitän dāx-əlkəttabän n-Mässinäy?»

26 Wädden ənnän ilzam ad-inhəy Älmasex təhänşariḏt təzzar, ijjəš älxurmät-net.»

²⁷ Irmäs-asän-dd darät-a-wen ħur-ännäbi Mosa, ikkä-dd ħur-ännäbitän wi iyyäḍnen iket-näsän, itafässar-asän a-wa ənnän əlkəttabän dəḡ-isälan-net.

²⁸ Ohäzän-in taḡrəmt ta əkkän ħas, issəkn'-en a-s okay-tän

²⁹ məšan, ənnän-as: «Ḥayəm ħur-näḡ ed, ašäl iglä, ehäḍ-däḡ, išwar ija», äzzubbät ħur-sän.

³⁰ Əqqälän tetäte ħas, iḍkäl tajəlla, ämmoy i-Mässinäḡ, irz'-et, ikf'-asän-tät.

³¹ Ämeränät tiṭṭawen-näsän älwäqq-wen-däḡ, əzzäyän-t məšan, ättunkäl-asän ässaḡät-wen-däḡ.

³² Änmännän jer-iman-näsän: «Wädden a-s hanäḡ-ämmijräd dəḡ-tabarät, isafham-anäḡ əlkəttabän n-ännäbitän, sanäjmaḍän ulhawännänäḡ fäll-ad-t-əzzəyän.»

³³ Əbdädän ässaḡät-wen-däḡ, əqqälän Yärussälam. Ogäzän-in inəṭṭulab wi n-märəw d-iyyən d-inalkimän-wi iyyäḍnen, äzziimmäḡän dəḡ-edägg iyyän.

³⁴ Ənnän-asän inəṭṭulab d-inalkimän-wi iyyäḍnen: «Ijmaḍ-t äššäk a-s Ḥisa, inkär-dd jer-inəmmuttan, inhay-t Simyon.»

³⁵ Əlläyən-asän əntänəḍ-däḡ amuqqəs wa əjän dār-s dəḡ-tabarät d-əmmək wa s-t-əzzäyän älwäqq wa d-irza tajəlla.

Änfäläl-dd Ḥisa i-inəmmušal

(Mätti 28:16-20; Marqəs 16:14-18; Exya 20:19-23)

³⁶ Ämmijrädän härwa a-s dd-ibdäd Ḥisa iman-net jere-sän, inn'-asän: «Ins' älxer n-Mässinäḡ fälla-wän.»

³⁷ Äxwälän, əggädän ənniyätän-näsän, əknän tarəmməxt ed, äḡelän ämättänkul a hannäyän

³⁸ məšan, inn'-asän Ḥisa: «Ma käwän-ixwalän, iggad d-ənniyätän-näwän, ikkas tafləst dəḡ-ulhawän-näwän?»

³⁹ Əkyədät dəḡ-ifassän-in d-iḍarän-in, näkk iman-in a-wa, äḍəsät-ahi, təkəyädäm dəḡ-i i-ad-təkkəsäm äššäk, ämättänkul, wär dār-i mad-aläh ed, wär-ila taḡəssa wäla iḡäsän.»

⁴⁰ Ijann'-asän a-wen, isakn'-en ifassän-net d-iḍarän-net

⁴¹ məšan, təgdäl-asän təmḡäre n-tedäwit-i-däḡ jän ad-t-əfləsän. Inhäy a-s äqqanän iḡäfawän-näsän ħas, inn'-asän: «Ak təlam a itamäkšen diha?»

⁴² Əkfän-t-dd ašär n-emän ähhoyen,

⁴³ irmäs-t-dd, ikš'-e data-sän.

⁴⁴ Inn'-asän darät-a-wen: «A-wa-däḡ a hawän-janney härwa əlley jere-wän a-s ähhuuššäl ad-itbət a-wa fäll-i iktabän dəḡ-alämär wa n-ännäbi Mosa d-əlkəttabän wi n-ännäbitän d-Äzzäbur.»

⁴⁵ Ora älwäqq-wen tiyətwen-näsän i-ad-əfhəmän əlkəttabän,

⁴⁶ inn'-asän: «Iktab a-s Älmasex, ilzam ad-inhəy təhänšariḍt, inkär-dd ašäl wa s-kəraḍ jer-inəmmuttan,

⁴⁷ ətwəjjən darät-a-wen isälan n-tätubt d-tenäšše n-ibäkkadän s-isəm-net i-tiwsaten iket-däḡ-näsnät, isänt a-wen dəḡ-Yärussälam.

⁴⁸ Käwänəḍ a jeḡ tjuhawen n-a-wen iket-net,

⁴⁹ näkk dəḡ, ad-hawän-dd-səssiwəyāḡ a-wa s-hawän-ija Abba-nin ärkäwäl-net, a-wen-däḡ a fäl wär feläm aḡrəm-wa-däḡ, a təkkäs tärna ta dd-fälät išənnawän wär käwän-təlsa.»

Tikawt n-Ḥisa i-išənnawän

(Marqəs 16:19-20)

⁵⁰ Ilwäy-tän ɗarät-a-wen har edes i-tadäbayt ta n-Bitanya, iɗkäl ifassän-net, ija dāḡ-sän älbāraka.

⁵¹ Itajj dāḡ-sän älbāraka hārwa a-s dār-sän ibɗa, imməɗkäl s-išənnawän.

⁵² Ārkāḡän-as əntāneɗ dihen-dāḡ təzzar, əqqälän Yārussālam əknan dāḡ-tedāwit.

⁵³ Hak ašāl ɗarät-a-wen, timāqqusän dāḡ-ehän n-āmudd wa māqqārän ihän Yārussālam, tiimələn Mässināḡ. Amin!

Älönzil n-ÿisa Älmasex wa iktäb Exya

Äšajəš

¹ S-tizarät, a-s wär t-illa a dd-ixlakän, wär t-illa a t-illän a säl Wa s-itawänna Mäjräd, Mäjräd ill'-e ÿur-Mässinäx, Mäjräd ənta a-s Mässinäx.

² Ill'-e s-tizarät ÿur-Mässinäx,

³ ənta a-s dd-ixlak Mässinäx härät iket-net, wär t-illa a dd-ixlakän ar s-ənta,

⁴ ənta a ässodärän härät iket-net, tämudre-ten-däx ihakk a-s ännur i-dägg-adəm;

⁵ ännur, ämiläwlaw däx-tihay mäšan, unjäynät sär-s.

⁶ Osä-dd ähaləs dd-äsimašäl Mässinäx s-isəm-net Exya,

⁷ i-ad-umas tajuhe, amənän dägg-adəm s-ännur wa fäll-hasän-itajäyha.

⁸ Wär-ämoos ənta iman-net ännur, tajuhe-net a ämoos.

⁹ Ännur-i-hi, ənta a-s wa n-tidət dd-osän äddunya i-ad-impləwlew fäll-dägg-adəm, arr tiṭṭawen-näsän.

¹⁰ Wa s-itawänna Mäjräd, ijjäš-dd äddunya, təbnä-dd sär-s mäšan, tunjäy s-ad-t-təzzəy,

¹¹ osä-dd ännur äkall-net mäšan, wär t-äqbelän imälan-net,

¹² hakd a-wen-däx däx, wi t-äqbälne, omänän sär-s, äsdabät-tän ad-umasän aratan n-Mässinäx.

¹³ Aratan-en, tiwit-näsän, wär tämoos ta n-täsa wäla ta n-erhet n-taḡəssa wäla erhet n-ägg-adəm, ti n-Mässinäx.

Mäjräd, iqqäl-dd ägg-adəm

¹⁴ Mäjräd, ämoos-dd ägg-adəm, izzäx-dd jere-näx ännufläy däx-ännuymät d-tidət, näjjunfä däx-älxurmät-net, älxurmät day wa ikarräš Alyaq s-wär-il' Abba i säl ənta.

¹⁵ Ənta-en-däx a fäll-äjjəyha ännäbi Exya a-s innä s-afälla: «Ad-hi-dd-išrəy ere hi-ojarän fäl-a-s ill'-e härwa wär dd-äxlekäx.»

¹⁶ Nəjräw iket däx-nänäx ejädär-nänäx däx-älxurmät n-ännuymät-net, ajäräw nəja-däx, ilkam-as iyyän

¹⁷ fäl-a-s, əmmək wa s-ija Mässinäx Äṭṭawrät däx-äfuss n-ännäbi Mosa, ənta day a-s ija ännuymät-net d-tidət-net däx-äfuss n-ÿisaÄlmasex.

¹⁸ Mässinäx, wär t-illa ere s-käla t-inhäy mäšan, Rure-s wa n-iiyyän ÿur-s izzäxän, äsbayän-anäx-t-dd.

Tajuhe ta ij' Exya fäll-ÿisa

(Mätti 3:11-12; Marqəs 1:7-8; Luqa 3:15-17)

¹⁹ Ənta da tajuhe ta ij' Exya a-s sär-s dd-äšmäšälän imänokalän n-käl-Älyähud wi hänen Yärussalam, käl-tikutawen d-dägg-Lewi i-ad-t-səstənän d-a-wa ämoos.

²⁰ Wär hasän-iffer iman-net, inn'-asän: «Wädden näkk a-s Älmasex.»

²¹ Oläsän-t asəstan: «Adiš mi tämoosäd? Ämmuukkän käyy a-s ännäbi ÿəli?» Inn'-asän: «Wär t-ämoosäx.» Ənnän-as: «Adiš käyy a-s ännäbi wa s-ənnän ännäbitän ilkam a dd-ass?» Inn'-asän: «Äbo!»

²² Oläsän-as tənna: «Adiš, mi tämoosäd? Nərha älwizab näwwäy i-äddinät wi hanäx-dd-äšmäšälne, ma tənne, mi tämoosäd?»

²³ Inn'-asän:
«Näkk a-s wa äseḡären dāḡ-tenere, janney:
<šessiḡedät tabarät dat-Emäli>,
s-əmmək wa s-tän-innä ännäbi Saya.†»

²⁴ Äddinät-win-dāḡ sār-s dd-ämešälnen, i n-taggayt ta n-käl-faris.

²⁵ Oläsän-t asəstan daḡ, ənnän-as: «Adiš mafäl salmaḡäd äddinät dāḡ-aman a-s wädden käyy a-s Älmasex wäla, ḡəli wäla ännäbi wa s-ätwänna?»

²⁶ Äwwežäb-asän, inn'-asän: «Näkk, aman a dāḡ-salmaḡäḡ äddinät mäšan, ill'-e jere-wän ere wär təzzeyäm,

²⁷ ad-hi-dd-išrəy, wär-änhäjjäḡ wäla-dāḡ d-ad-ədəsəḡ issal n-tifädelenet fäl mijraw-i-dāḡ hi-ija.»

²⁸ Tadäbayt ta n-Bitanya təwärat asälim n-ḡurdəni wa n-atäram a dāḡ-itajj a-wa-dāḡ, dihen-dāḡ ad-isalmaḡ Exya äddinät dāḡ-aman.

ḡisa, Ašəḡol n-Mässinäḡ

²⁹ Ašäl wa n-ḡarät-wen, inhäy Exya ḡisa ikk'-e-hi-dd, innä i-tamətte:
«Ənhəywät-ak Ašəḡol n-Mässinäḡ wa itakkäsän ibäkkəḡän n-äddunya!

³⁰ Ənta-i-dāḡ a fäll-hawän-ənnəy: ad-hi-dd-išrəy ere hi-ojärän fäl-a-s ill'-e härwa wär dd-äxlekäḡ;

³¹ näkk iman-in, ibda wär t-əzzeyäḡ mäšan, i-ad-dd-ibbuyən i-käl-Išrayil, oseḡ-dd i-ad-salmaḡäḡ dāḡ-aman.»

³² Oläs daḡ Exya ajəyh, inna: «Hannäyäḡ Unfas Šäddijän, ifal-dd išənnawän dāḡ-ännuḡ n-tedäbert mällät har fälla-s äsjän, izzäḡ fälla-s.

³³ Käla t-əlleḡ wär t-əzzeyäḡ mäšan, wa hi-dd-ašmašälän i-ad-salmaḡäḡ dāḡ-aman, inn'-ahi: <Ere wa s-tənhäyäd Unfas har fälla-s äsjän, izzäḡ fälla-s, ənta a ihakkän Unfas Šäddijän.>

³⁴ Näkk daḡ, ənhäyäḡ-t, äjjəyhäḡ a-s ənta a-s Rure-s n-Mässinäḡ.»

Inəṭṭulab n-ḡisa wi äzzarnen

³⁵ Ašäl wa n-ḡarät-wen, ibdad Exya d-inəṭṭulab-net əssin dāḡ-edägg-wənnin-dāḡ a-s iswäd,

³⁶ inhäy ḡisa okay ḡas, innä: «Ənhəywät-ak Ašəḡol n-Mässinäḡ!»

³⁷ Əslän inəṭṭulab-net wi n-əssin i-mäjräd-wen-dāḡ ij' Exya ḡas, əlkämän i-ḡisa.

³⁸ Äšnəšläm ḡisa ḡara-s, inhäy a-s əlkämän-as ḡas, inn'-asän: «Ma tärham?» Ənnän-as: «Räbbi, a-wen älmäḡna-net: Äḡalim! Ənde d-təzzaḡäd?»

³⁹ Inn'-asän: «Əyyäwät, ad-t-tənhəyäm.» Əḡlän, ənhäyän dihad izzäḡ, əzzäḡän ḡur-s ašäl-en-dāḡ. Itajj a-wen s-takkäšt.

⁴⁰ Inəṭṭulab wi n-əssin əslänen i-mäjräd wa ij' Exya fäll-ḡisa ḡas əlkämän-as, iyyän dāḡ-sän Idris wa n-əḡḡa-s n-Simyön Bəṭrus;

⁴¹ Idris-en-dāḡ a osän əḡḡa-s Simyön, inn'-as: «Əyyäw, nəjräw Älmasex». Älmasex, älmäḡna-net: Wa innəfränän.

⁴² Ilwäy Idris Simyön s-ḡisa. Ikna ḡisa akäyad dāḡ-Simyön, inn'-as: «Wädden isəm-näk: Simyön ägg Yunəs? Ad-käy-iwär isəm Sefas». Sefas, älmäḡna-net: Tähunt.†

Ilkäm Fəlibb d-Natanähil i-ḡisa

† **1:23 1:23** A-wa ännäbi dd-äzzarän i-ḡisa, äloläy dāḡ-isälan-net əssayät timad n-awätay dat-tiwit-net. † **1:42 1:42** Sefas dāḡ-Tälyunanit a has-itawännen: Bəṭrus.

⁴³ Ašäl wa n-ḍarät-wen, ikka ʁisa teje ta n-Galila a-s ämmoqqäs d-Felibb, inn'-as: «Felibb, əlkəm-ahi.»

⁴⁴ Felibb hakd Idris d-Bəṭrus, iket-näsän, i n-tayrəmt ta n-Bäṭsayda.

⁴⁵ Iglä Felibb ənta-däx har osa Natanähil, inn'-as: «Ašäl-i, nəjrāw ere wa s-ij' ännäbi Mosa isälan-net däx-Äṭṭāwrät, əlläxən daḡ ännäbitän s-ass-net: a t-ämoosän ʁisa wa n-ägg Yusəf n-tayrəmt ta n-Näširät.»

⁴⁶ Inn'-as Natanähil: «Ajän Näširät, a tät-dd-ifəl a olaḡän?» Inn'-as Felibb: «Eyyäw, ənhöy-t.»

⁴⁷ Inhäy ʁisa Natanähil ikk'-e-hi-dd ɣas, innä: «Ašäl-i-š, hannäyäx U-Bānu-Işrayil n-ägg-aläšäl wär ha täkkärzäzzäl.»

⁴⁸ Inn'-as Natanähil: «Ənde hi-təzzäyäd?» Inn'-as ʁisa: «Hannäyäx-käy härwa wär käy-dd-iḡra Felibb, a-s ija a-wen, telled-t daw-tele n-ašar.»

⁴⁹ Iḍkäl Natanähil emäsli-net, innä: «Älyalim, käyy a-s Rure-s n-Mässinäx, käyy a-s ämänokal n-Işrayil!»

⁵⁰ Inn'-as ʁisa: «ɣas a-wa-däx fäl hak-ənnəx hannäyäx-käy härwa telled-t daw-tele n-ašar a fäl tomänäd? Əlməd a-s ilkam däx-k ad-tənhöyäd härätän ojännen a-wen-däx təmḡäre.»

⁵¹ Älleyəx-awän s-tidət tädduuttet† a-s ad-tənhöyäm išənnawän ämerän, tənhöyäm daḡ änjälosän n-Mässinäx tiwənən tizəbbun-dd fäll-Ägg-ägg-adəm.»

2

Iji n-Mässinäx wa äzzarän ija ʁisa

¹ Käraḍ išilan ḍarät-a-wen, ij' azli däx-hin-tätiwäḡra ma-s n-ʁisa däx-tayrəmt n-Käna ta n-Galila;

² ätwäxr'-in daḡ ʁisa s-azli-en-däx ənta d-inəṭṭulab-net.

³ Əmdän aman n-läxnäb wi äxxiimmärnen tamäswanen däx-azli ɣas, tenn'-as ma-s: «Äddinät ya, äbas lan aman n-läxnäb wi äxxiimmärnen əswän.»

⁴ Inn'-as ʁisa: «Anna, tazidert, ässaḡät-in, wär dd-iwwəḍ härwa.»

⁵ Tənnä ma-s i-inaxdimän: «A hawän-innä-däx, təjəm-t.»

⁶ Əllan-t dihen säḍis iḡsas mäqqornen əknanen däx-tähunt s-təggatän käl-Älyähud älwälla s-aman-wi tän-hänen; hak iyyän däx-iḡsas-en-däx, itiwəy teməḍe n-litär.

⁷ Innä ʁisa i-inaxdimän: «Əḍkärät-dd iḡsas-i-hi aman»; əḍkärän-tän har imawän-näsän.

⁸ Inn'-asän daḡ: «Əlkəwät ämära, tawəyəm i-ere-wa ännihädän däx-imənsiwän»; jän a-wa hasän-inna.

⁹ Äkräbbät emännähäd n-imənsiwän aman n-läxnäb wi äxxiimmärnen s-wär-issen e-s t-dd-hän kud-däx əssanän inaxdimän-wi tän-dd-əlkäwnnen siha s-dd-hän; iḡrä-dd ämazlay,

¹⁰ inn'-as: «Wär t-illa ere s-wädden aman n-läxnäb wi äxxiimmärnen äzednen a isaswa äddinät har tän-ijməḍ ənniyät təzzar, išəsrəy-tän-dd wi wären əkna täzude mäšan, käyy wi äzednen a təššəšräyäd.»

¹¹ Iji n-Mässinäx wa-däx ija ʁisa däx-Käna ta n-Galila a-s iji-net wa äzzarän, äsnäfaläl-dd sär-s tärna-net dat-äddinät, omänän sar-s inəṭṭulab-net.

¹² Ätrara ʁisa ḍarät-a-wen, ikka tayrəmt ta n-Qäfärnaxum äddeew d-ma-s d-ayətma-s d-inəṭṭulab-net mäšan, wär-əhoja dihen.

† 1:51 1:51 Däx-Tälyunanit: Amin, amin (S-tidət, tidət).

*Iššəšdəj Ƴisa ehān n-āmudd wa māqqārān
(Mätti 21:12-13; Marqəs 11:15-18; Luqa 19:45-46)*

¹³ Ohāz-dd āmudd n-kāl-Ālyāhud wa n-Faška Ƴas, ājožāy Ƴisa, ikka Ƴārussālam.

¹⁴ Ogāz-dd dāƳ-ehān n-āmudd wa māqqārān ättužžar n-iwdesān d-tihatten d-tidāberēn d-kāl-amāhaš āqqiimān dāƳ-s,

¹⁵ iknā-dd ebärtāk n-iƳunan, ad-tān-isattāƳ əntāneđ d-tihatten-nāsān d-iwdesān-nāsān, išamāhaš izārfan n-kāl-amāhaš, isibrāƳwil tisəskar-nāsān,

¹⁶ ijanna i-ättužžar n-tidāberēn: «Ēkkəsāt a-wa diha, wār jem ehān n-Abba-nin ehān n-mamāla.»

¹⁷ Innā a-wen Ƴas, əktān-dd inəṭṭulab-net a-s iktab dāƳ-mājrād n-MässināƳ a-s:

«Tədgaz-ahi tārha n-ehān-nāk.»

¹⁸ Ēggādān-dd sār-s imizārān n-kāl-Ālyāhud, ənnān-as: «Ma āmoos iji n-MässināƳ wa s-tāddobed iji-net i-ad-hanāƳ-səfləsād a-s a-wa jed āmāra-dāƳ, led sār-s.»

¹⁹ Inn'-asān: «Āndāt ehān n-āmudd-wa-dāƳ ad-hawān-t-dd səbdədāƳ dāƳ-kārađ išilan.»

²⁰ Ēnnān-as kāl-Ālyāhud: «Kāhh! Ajān wādden ehān n-āmudd-wa-dāƳ, əkkožāt timərwen n-awātay d-sāđis a ija ibinnəw təzzar imdā, Ƴas əndek dihad ila əmmək ad-t-dd-səbdədād kāyy dāƳ-kārađ išilan?»

²¹ Ij'-asān Ƴisa mājrād-wen-dāƳ māšan, wār-əjrehān a-s ehān n-āmudd wa s-hasān-iha isālan-net, taƳəssa-net ənta iman-net.

²² Šāmad dd-inkār Ƴisa jer-inəmmuttan a dd-əktān inəṭṭulab-net tifer-tin-dāƳ ija, omānān s-a-wa ənnān əlkəttabān d-a-wa innā ənta iman-net.

²³ Āzzāman-wen-dāƳ n-āmudd wa n-Faška əssakāy dāƳ-Ƴārussālam, omānān sār-s əddināt əjjootnen hannāynen ijitān n-MässināƳ wi itājj,

²⁴ māšan wār tān-ifles ed izzay-tān iket-dāƳ-nāsān,

²⁵ wār-āmƳatār daƳ, ad-has-ājjāyh āwadəm wāl' iyyān fäll-iyyān ed, issan d-iman-net a-wa ihān ulh n-e d t-illām āgg-adəm.

3

Edāwānne wa ija Ƴisa d-Nikodem dāƳ-isālan n-tiwit ta tāynayāt.

¹ Ehāđ iyyān, osā-dd iyyān dāƳ-imānokālān n-kāl-Ālyāhud la taggayt ta n-kāl-faris s-isəm-net Nikodem Ƴisa,

² inn'-as: «ĀlƳalim,† nəssan a-s kāyy ālƳalim dd-āšimasāl MässināƳ a tāmoosād fāl-a-s ijitān n-MässināƳ wi tājjād, wār t-illa ere əddooben iji-nāsān ar s-ad-t-idhal MässināƳ.»

³ Āwwežāb-as Ƴisa, inn'-as: «ĀlleƳeƳ-ak s-tidət tādduuttet† a-s a ikkās āwadəm wār-ija tiwit ta tāynayāt dd-fälāt išənnawān, wār mad-inhəy Təmmənəya ta n-MässināƳ.»

⁴ Inn'-as Nikodem: «Ēndek əmmək wa s-mad-iwəy āwadəm wāššārān? Ajān əddobāt ad-iqqəl tāsa n-ma-s, āj-dd tiwit ta s-sānatāt?»

⁵ Inn'-as Ƴisa: «ĀlleƳeƳ-ak s-tidət tādduuttet a-s ere wārān iwa s-aman d-Unfas Šāddijān, wār-e ijješ Təmmənəya n-MässināƳ

⁶ fāl-a-s, a-wa dd-torāw taƳəssa, i n-taƳəssa, a-wa dd-orāw Unfas daƳ, i n-Unfas.

† 3:2 3:2 DāƳ-Ƴābranəyya: Rābbi. † 3:3 3:3 DāƳ-Tālyunanit: Amin, amin: (S-tidət, tidət).

⁷ Wār-itäqqänet eyäf-näk fäl-a-s innin önney-ak: <Wār hawän-t-tëlla ar tiwit ta täynayät dd-fälät isënnawän.>

⁸ Wädden adu itəhhal siha s-irha, salläd i-emäslī-net mäšan, wār tössenäd siha s-dd-iha wäla siha s-ikka, a-wen-däx day, a ij' äwadəm iket-net dd-iwan s-Unfas n-Mässinäx.»

⁹ Issöstän Nikodem Yisa day, inn'-as: «Endek əmmək wa s-mad-äj a-wen?»

¹⁰ Inn'-as Yisa: «End'-e-d-il' əmmək a-s käyy älhalim n-Işrayil ogdähän d-a-wa-däx, uhən-däx wār käy-hen isälan n-a-wen-däx?

¹¹ Älleyeş-ak s-tidət tädduuttet a-s nətajj isälan n-a-wa nössän, nətajyha day fäll-a-wa nənähäy mäšan käwäned, wār tärðem s-tajuhe-nänäh.

¹² Yas, kunta wār hi-təfləsäm dihad hawän-ässewäläx däx-isälan n-härätän wi n-äddunya, əndek əmmək wa s-hi-mad-təfləsäm afäl hawän-ässewäläx däx-isälan wi n-tidət əlkämnen n-isënnawän?

¹³ Wār t-illa ere iwwadän isënnawän kunta wädden ere wa-tän-dd-ifälän, a-wen a t-ämoosän Ägg-ägg-adəm-i däx-sän izzäxän.

¹⁴ Emmək-wa-däx s-issärjäj ännäbi Mosa taşşält däx-tenere, əmmək-wen-däx day a-s ilzam, ad-itwədkəl Ägg-ägg-adəm,

¹⁵ dihen, ere sār-s omänän-däx, ad-ijrəw tämudre täxlälät

¹⁶ fäl-a-s, Mässinäx, ija i-äddunya tärha-ta-däx fäl ikfa Rure-s wa n-iyyän i-ere sār-s omänän-däx, wār-e ämmät, änn-ak, ad-ijrəw tämudre ta täxlälät;

¹⁷ Mässinäx, wār dd-äşmaşäl Rure-s s-äddunya i-ad-tät-işräx, änn-ak i-ad-tät-işləs.

¹⁸ Ere sār-s omänän, wār t-e-işräx mäšan, ere sār-s wärän omen, äru d-itbät äşşärexa-net fäl-a-s, wār-omen s-Rure-s n-Mässinäx wa n-iyyän.

¹⁹ Äddälil n-äşşärexa-en, ənta da: osä-dd ännur äddunya mäšan, ässofän dägg-adəm tihay ed timaşalen-näsän ti läbasnen.

²⁰ Äwadəm itamaşälän a läbasän härkuk äşşunjät ännur, wār dawa-s dd-itəmmil ed äksuð ad-dd-əffukkärän erk imojjan-net

²¹ mäšan, ere iglan fäl tidət, wār-äksuð ad-dd-äkk ännur i-ad-dd-infiləl a-s imojjan-net, Mässinäx a-s əssəbab-näsän.»

Tajuhe ta s-sänatät ija Exya wa n-Enəsselmäx fäll-Yisa

²² Darät-a-wen, ikka Yisa d-inəttulab-net teje ta n-Älyähudəyät, əzzäxän dihen-däx, ad-isalmaş äddinät.

²³ A-s ija a-wen, Exya ənta, tisən-t-dd äddinät, isalmaş-tän däx-edägg s-isəm-net Anun däx-ihəz n-tadäbayt ta n-Saləm fäl-a-s, əjjətän aman dihen.

²⁴ A-wen itajj härwa wār hin-ätwäjär Exya däx-takärmüt.

²⁵ Tənkär tamxənnant jer-inəttulab n-Exya d-ägg-Älyähud iyyän däx-isälan n-älwällä wa isäşdajän yas,

²⁶ əkkän-t-dd, ənnän-as: «Älhalim,[†] ähaləs wa s-käla dār-s tärtäyäd fäll-täjjəyhäd fäll-aşrut n-əjäns n-Yurdəni wa iyyädän, ämära isalmaş ənta-däx, takkän-t äddinät iket-näsän.»

²⁷ Inn'-asän Exya: «Ägg-adəm, wār-e äj ar a-wa dār-t-äskälläf Mässinäx.

²⁸ Wädden, täjjəyhäm iket-nawän a-s önney: <Näkk, wār-ämoosäx Älmaseş, ämişəl yas a dd-jey data-s.>

²⁹ Nössan a-s ämazlay ənta a ilän tämazlayt mäšan, amidi n-ämazlay-i yur-sän t-illän äsijäd, äsidawät-t emäslī n-ämazlay wa s-isäll. Elmədät a-s

[†] 3:26 3:26 Däx-Yäbranəyya: Rəbbi.

tedäwit-ten-däx itäj amidi n-āmazlay, a jeḡ näkk-däx āmāra, tedäwit-in daḡ, tøjlay, tōmda.

³⁰ Imḡaret isəm-net, ifnəzet wa-nin.»

Isālan n-Wa dd-ifālān isənnawān

³¹ «Ere wa dd-ifālān isənnawān, oḡar äddināt iket-nāsān, ere wa dd-ifālān ākall, i n-ākall, wār mad-āj daḡ ar isālan n-ākall-i-däx māšan, ere wa dd-ifālān isənnawān, [oḡar äddināt iket-nāsān ed]

³² ənta isālan n-a-wa inhāy d-a-wa islā a itajj māšan, wār t-illa ere t-iflasān.

³³ Ere wa t-iflasān, əssiitbāt tōnna n-Mässināḡ

³⁴ fāl-a-s, ere wa dd-āšmašāl Mässināḡ, a-wa innā Mässināḡ a ijanna ed əsināflāy-t Mässināḡ däḡ-isuf n-Unfas-net.

³⁵ Abba ikna tārha n-Rure-s, hārāt iket-net a ija däḡ-ifassān-net.

³⁶ Ere wa omānān s-Rure-s, ijraw tāmudre ta täḡlälāt, ere wa sār-s wārān omen, wār mad-inhəy tāmudre ta ihākk Mässināḡ ed, insa fälla-s aḡkār n-Mässināḡ.»

4

Tu-Sāmarit ta tomānāt s-Ḣisa

¹ Ilmād Ḣisa a-s əslān kāl-faris a-s oḡarān inəṡṡulab wi isālməḡ ənta, uhən wi isālməḡ Exya, a-wen-däḡ a əḡelān.

² Tidət a-s, Ḣisa ənta iman-net, wār t-illa ere əssilmāḡ, inəṡṡulab-net ḡas a salmaḡnen äddināt.

³ Ifāl teje ta n-Ālyāhudəyāt, olās tikawt n-ta n-Galila

⁴ māšan, i-ad-āj a-wen, ilzam-t ad-ijləy teje ta n-Sāmari.

⁵ Āssookal har dd-iwwād aḡrəm n-Sāmari s-isəm-net Sišar, ikkā dihen anu wa ihān ašəkrəš wa iḡāš ānnābi Yaḡub təzzar ikf'-e i-rure-s Yusəf, anu-en, iwār-t isəm wa n-Yaḡub.

⁶ Osā-dd anu ḡas, āḡqimā fäll-emm-net i-ad-isunf a-wa-däḡ has-ija aləḡdeš n-asikəl. A-wen a itajjān s-tarāhut.

⁷ Āḡqiima fäll-emm n-anu-en-däḡ a-s dd-tosa tu-Sāmarit dd-təšrajāt, inn'-as Ḣisa: «Tamāḡt, sās-w'-ahi-dd.»

⁸ A-s itäj a-wen-däḡ, əkkan inəṡṡulab-net aḡrəm i-ad-dd-žənšən imənsiwān əkšān.

⁹ Tənn'-as tamāḡt: «Ma kāy-āsihālān kāyy-i n-āḡḡ-Ālyāhud, ad-däḡ-i təttārād aman näkk-i n-tu-Sāmarit?» Äzzāman-en, kāl-Ālyāhud d-kāl-Sāmari, wār-ānmännākān.

¹⁰ Inn'-as Ḣisa: «Ēnnar təssanād fäll-isuf n-Mässināḡ d-ere wa ham-ijānnen: <sās-w'-ahi-dd>; kāmm a has-madān-ānn: <sās-w'-ahi-dd>; ākf'-im ənta, aman əddārnen.»

¹¹ Tənn'-as tamāḡt: «Āḡḡalim, anu-i, i šəjreen, kāyy daḡ wār led āja, ḡas, əndek əmmək wa s-mad-dd-təjrwād aman əddārnen wi s-jānned?»

¹² Ajān tojārād abba-nānāḡ ānnābi Yaḡub-i hanāḡ-ikfān anu-i-däḡ däḡ-iswa ənta d-aratān-net d-irəzzejān-net?»

¹³ Inn'-as Ḣisa: «Ere iswān aman n-anu-i-däḡ, ad-aləs fad

¹⁴ māšan, ere iswān aman-wi t-mad-ākfāḡ, wār däḡ-s ilkem fad ed, ad-däḡ-s umasān aman wi t-mad-ākfāḡ, a däḡ-has-dd-təffay tāmudre ta täḡlälāt.»

¹⁵ Tənn'-as tamāḡt: «Āḡḡalim, sās-w'-ahi däḡ-aman-win-däḡ i-ad-ābas tifadāḡ, əbḡəwāḡ s-iyyāt d-ašəroj n-anu-i-däḡ.»

16 Inn'-as Ƴisa: «Egləw, idaw-dd d-āhaləs-nām, täqqələd-ahi-dd.»

17 Tənn'-as tamädt: «Wär-ädobänäx.» Inn'-as Ƴisa: «Tənned tidət a-s wär tädobänäd

18 fäl-a-s, jed səmmos idubnawän mäšan, təzjərät-tän-dd iket-näsän, āhaləs daḡ wa dār-tärtäyäd ämära-däḡ, wär tämsäxläläm.»

19 Tənn'-as tamädt: «Älyalim, hannäyäḡ a-s käyy ya ännäbi a tämoosäd!

20 Ibda abbatän-nänäḡ aḡaḡ-wa-däḡ a fäll-ḡabbädän Mässinäḡ mäšan, käwäned-i n-käl-Älyähud, tənnäm wär t-illa älyibadät n-Mässinäḡ ar däḡ-Yärussäläm.»

21 Inn'-as Ƴisa: «Tamädt, əfləs-ahi, ilkam älwäqq d-wär mad-täḡbədäm Abba fäll-aḡaḡ-wa-däḡ wälä däḡ-Yärussäläm.

22 Käwäned, ḡabbädäm a wär təssenäm mäšan, näkkäned nəssan ere wa nəḡabbäd ed, əḡəllas, käl-Älyähud a dd-ifäl.

23 Mäšan, ilkam ässaḡät s-ənta-da-däḡ nəha ämära-däḡ däḡ-mad-äḡbədän imumənän wi n-tidət Abba s-tidət däḡ-ənniyätän-näsän fäl-a-s, inaḡbadän əjlaynen šund-win-däḡ a has-əjraznen.

24 Mässinäḡ, Unfas, wär-itətəwənhəy, a-wen-däḡ a fäl ere t-iḡabbädän, iḡbədət-t s-ənniyät d-tidət.»

25 Tənn'-as tamädt: «Ešsanäḡ a-s Wa innəfränän s-itawänna Älmaseḡ, ilkam ad-dd-ass, afäl dd-osa, ad-hanäḡ-isəssiḡəd däḡ-härät iket-net.»

26 Inn'-as Ƴisa: «Näkk-i-däḡ ham-ämmiijrädän a t-ämoosän.»

27 Ämmiijräd-as Ƴisa härwa a-s dd-əqqälän inəttulab-net. Iqqän a-wa s-ämmiijräd i-tamädt iḡäfawän-näsän mäšan, hakd a-wen-däḡ, wär tän-iha-i t-ässistänän d-a-wa däḡ-s irha wälä a-wa fäl dār-s ädiwännät.

28 Toyyä tamädt aḡəsis-net dihen-däḡ, täqqäl aḡrəm, tənnä i-äddinät:

29 «Eyyäwät, ənhəywät āhaləs hi-illäḡen a-wa s-kälä t-jəḡ iket-net, ämmuukkän a-s ənta-i-däḡ a-s Älmaseḡ.»

30 Ezejärän-dd käl-aḡrəm, əkkän-dd Ƴisa.

31 A-s itäj a-wen, salḡadän inəttulab älyalim-näsän i-ad-ämmäkläw

32 mäšan, inn'-asän: «Näkk, leḡ a əkšəḡ wär təssenäm.»

33 Ad-tinmənnin: «Ajän iwwäy-as-dd äwadəm amənsi ḡara-näḡ?»

34 Inn'-asän Ƴisa: «Amənsi-nin, iji n-erhet n-Wa hi-dd-äšmašälän, sətbətäḡ ämašal-net.

35 Wädden a jannem diha-däḡ s-əkkəz orän ad-ämaläyän išəkraš? Ənneḡ-awän: ənhəywät, ədkəlät tiḡtawen-näwän, təkyədäm däḡ-išəkraš, əḡḡan, wär-ərhen ḡas ar amili.

36 Ässaḡät wa d-ijarräw änaḡdim wa itiləyən išəkraš älxəqq n-tide-net, ənta-da-däḡ däḡ-təssəba n-ad-isədəw allon-net i-tämudre ta täylälät, i-ad-imzəyyət änaḡdim-wa äddomen d-wa itiləyən tedäwit

37 ed, ozz wa innän: «äddomät iyyän, oläy wa iyyädän», innä tidət.

38 Näkk, ässokäḡ-käwän illuy n-išəkraš däḡ-wän wären irh' äššahät, iyyäd a tän-ixdämän, tärbäxäm käwäned-däḡ äššahät-näsän.»

39 Omänän käl-Sämari n-aḡrəm-ənnin-däḡ äjjootnen s-Ƴisa däḡ-təssəba n-tajuhe ta hasän-təja tamädt a-s hasän-tənna: «Illäḡät-ahi a-wa s-kälä t-jəḡ iket-net.»

40 A-wen-däḡ a fäl osän-dd Ƴisa ḡas, dälän-t d-ad-ḡur-sän izzäḡ, ija ḡur-sän əssin išilan.

41 Ešlän-as ənta iman-net ämmiijräd ḡas, jän wi sār-s omännen əjut ojarän wənnin.

⁴² Ënnän wi sär-s omännen i-tamadt: «Ämära, äbas sär-s noman däx-tössöba n-a-wa hanäx-tönned, nəsł'-as iman-nänäx, nomän day a-s ädduuttät a-s önta a-s Ämaxlas n-äddunya.»

Rure-s n-ägg-ölxökum wa äzozäy Yisa

⁴³ Ässakäy Yisa össin išilan-win-däx dihen xas, ikkä teje ta n-Galila

⁴⁴ ed, issan a-s: «Wär t-illa ännäbi ätiwäsämyärän däx-äkall-net.»

⁴⁵ Mäšan, diha-däx d-hin-iwwäð Galila, ad-t-äsbärräkän käl-äkall ed, önhäyän däx-sän i äjjootnen däx-wi ässakäynten ämudd däx-Yärussälam a-wa ija Yisa iket-net.

⁴⁶ Iqqäl Yisa ðarät-a-wen tadäbayt ta n-Käna hät teje ta n-Galila däx-äsmäskäl aman, ij'-en aman n-läxnäb äxxiimmärnen. A-s itäj a-wen-däx, ih' ägg-ölxökum iyyän s-ärhin rure-s axtrem wa n-Qäfärnaxum.

⁴⁷ Islä a-s Yisa ifäl-dd Älyähudöyät s-Galila xas, ikk'-e-hi-dd, ad-t-ilaqqäd i-ad-dd-itruur, izuzöy rure-s s-išwar t-äba.

⁴⁸ Inn'-as Yisa: «Adiš käwäned a tökkäm wär tönheyäm ijitän n-Mässinäx d-tikunen, wär-e tamönäm s-Mässinäx.»

⁴⁹ Inn'-as käbtän: «Älyalim, näglet šik iket-di d-wär-ämmut alyad-in.»

⁵⁰ Inn'-as Yisa: «Eglöw, rure-k iddar.» Ifläs käbtän a-wa has-innä Yisa, iglä.

⁵¹ Ikka-dd ehän-net härwa a-s has-dd-ölkädän inaxdimän-net, önnän-as: «Rure-k, iddar.»

⁵² Issöstän-tän d-ässaxät wa-däx ijräw älafu, önnän-as: «Ëndöšel s-tezzar ad-t-toyyä tenäde.»

⁵³ Inhäy abba n-alyad a-s älwäqq-wen-däx iman-net ad-has-innä Yisa: «Rure-k, iddar». Omän ašäl-wen-däx s-Yisa önta hakd ejädäš-net iket-net.

⁵⁴ Iji n-Mässinäx wa-däx a-s wa s-össin ija Yisa ðarät efel-net i-Älyähudöyät s-Galila.

5

Anäbdon wa äzozäy Yisa

¹ Ijä ämudd iyyän day n-käl-Älyähud xas, oläs Yisa tikawt n-Yärussälam.

² Yärussälam, ujöš-net wa s-itawänna wa n-tihatten, h'-e täsahayt n-aman s-isöm-net däx-Yäbranöyya: Bätzata, äxlaynät-tät sëm mosät tisökla

³ daw-önsan imarhinän d-imeddorxal d-inöbdan d-inaxyabän äjjootnen [äqqalnen i-emäremar n-aman

⁴ fäl-a-s dehiyyän, itizöbbut-dd änjälos n-Emäli däx-täsahayt, isömrümär aman-net. Ere äzzarän s-ujöš n-aman-en-däx ðarät a-s tänsimäramär änjälos, ad-izzöy a tämoos turhönna-net däx].

⁵ Ins' ähalös dihen ibdanän a ilan käraðät timöwren n-awätay d-öttam.

⁶ Inhäy-t Yisa insa, ilmäd däx-iman-net a-s ähoja ässins'-e böddin-net dihen-däx xas, inn'-as: «Ajän tärhed ad-käy-dd-iqqöl ässexät-näk?»

⁷ Inn'-as anäbdon: «Älyalim, wär ley äwadöm hi-ijärän däx-täsahayt e-d ämramärän aman. E-d sär-sän dd-ämhärhämäräx-däx, ad-hi sär-sän išwär ere hi-öjärän armud.»

⁸ Inn'-as Yisa: «Ebdöd, öðköl asöftäx-näk, ärjös.»

⁹ Izzäy ähalös älwäqq-wen-däx, idkäl asöftäx-net, irjäš. Ašäl wa d-itäj a-wen-däx, ašäl n-össöböt-i n-täsonfat.

¹⁰ Izzäy xas, osän-t-dd imizärän n-käl-Älyähud, önnän-as: «Ajän wär tössenäd a-s ašäl-i, össöböt-i-däx wär hak-xälal aggay n-asöftäx-näk.»

11 Inn'-asän: «Ähaləs wa hi-äzozäyän, a hi-innän: <Ëḏkəl asəftäḡ-näk, ärjəš.> »

12 Ænnän-as: «Ma ämoos ähaləs wa hak-innän: <Ëḏkəl asəftäḡ-näk, ärjəš?> »

13 Ähaləs wa izzäyän, wär-izzey ere wa t-äzozäyän ed äzozäy-t Ḳisa ḡas, izjār tamətte.

14 Ämmoqqäs dār-s Ḳisa ḏarät-a-wen dāḡ-ehän n-ämudd wa mäqqārän, inn'-as: «Ämära d-təzzeyäd, wär tolesäd iji n-abäkkad, uksad ad-käy-ijrəw a irnän a-wa s-käla käy-ijräw.»

15 Igl' ähaləs ḏarät-a-wen, illäḡät i-imizärän n-käl-Älyähud a-s Ḳisa a t-äzozäyän.

16 Æslän i-a-wen ḡas, ad-tattärän arämas n-Ḳisa ed ämešäl iji n-Mässinäḡ wen-dāḡ dāḡ-ašäl n-əssəbət-i n-täsonfat.

17 Inn'-asän Ḳisa: «Abba-nin, ixdam härkuk, näkk-dāḡ, a-wen-dāḡ a jeḡ.»

18 Ämoos a-wen ämära äsaru wa fäl tattärän imizärän n-käl-Älyähud iji n-iman-net ed ənnän, wär-issəḡär ašäl wa n-əssəbət-i n-täsonfat, äsisägdäh dāḡ iman-net d-Mässinäḡ ed, innä Abba-net a ämoos.

Turhajät ta ikfä Mässinäḡ Ḳisa

19 Inn'-asän Ḳisa dāḡ: «Älleḡeḡ-awän s-tidət tädduuttet† a-s, wär t-illa a ixaddäm Rure-s n-Mässinäḡ ar a-wa s-inhäy Abba-net ixdam-t, a-wa ämešäl Abba iket-net, ad-t-ämašäl Rure-s ənta-dāḡ

20 fäl-a-s, Abba ikna tärha n-Rure-s, isakn'-e dāḡ a-wa itamašäl iket-net, ad-t-isəkən dāḡ ijitän ojärnen wi-dāḡ təḡḡäre, əknən iḡäfawän-näwän uḡən.

21 Fäl-a-s, əmmək wa s-dd-isänkar Abba inəmmuttan i-ad-tän-isudär, əmmək-wen-dāḡ dāḡ a-s ihakk Rure-s tämudre ere wa s-tät-irha.

22 Wär-isərräḡ Abba äwadəm wäl' iyyän mäšan, ija äššäreḡa n-härät iket-net jer-ifassän n-Rure-s

23 dāḡ-təssəba n-ad-t-səḡärän äddinät iket-näsän s-əmmək wa s-ässimḡärän Abba-net. Ere wärän issəḡär Rure-s n-Mässinäḡ, wär mad-isəḡär Abba-i t-dd-äšmašälän.

24 Älleḡeḡ-awän s-tidət tädduuttet a-s ere äsjädän i-mäjräd-in, omän s-wa hi-dd-äšmašälän, ijraw tämudre ta täḡlälät, wär-e inhəy äššäreḡa, änn-ak, ad-dd-ihləbbət dāḡ-ifassän n-tamättant, ijjəš tämudre ta täḡlälät.

25 Älleḡeḡ-awän s-tidət tädduuttet a-s imal-dd ässaḡät s-ənta-da-dāḡ nəha dāḡ-mad-əslən inəmmuttan i-eməsli n-Rure-s n-Mässinäḡ. Wi has-maden-isəll, ad-əddärän

26 fäl-a-s, əmmək-wa-dāḡ s-tämudre, ifassän n-Abba a təha, əmmək-wen-dāḡ dāḡ a-s ikfa Rure-s tädabit n-ad-isudär äddinät.

27 Ənta a ikfä tädabit n-äššäreḡa-näsän ed ənta iman-net a-s Ägg-ägg-adəm.

28 Ḳas, wär täqqännet iḡäfawän-näwän fäl-a-s, imal-dd ässaḡät dāḡ-mad-əslən inəmmuttan iket-näsän i-eməsli n-Ägg-ägg-adəm.

29 Ašäl-en dd-nakkär tamətte jer-inəmmuttan, äddinät wi ämešälnen sārho, ad-dd-ənkärän i-tämudre ta täḡlälät, wi s-tälläbäst ḡas a ämešälän, ad-dd-ənkärän i-äššäreḡa.»

Ḳisa Älmasəḡ, tidət ḡas a isayra tamətte

† 5:19 5:19 Dāḡ-Tälyunanit: Amin, amin (S-tidət, tidət).

³⁰ «Näkk, wär t-illa fäw a tajjəχ d-iman-nin ɣas, tənna n-Mässinəχ ɣas a-s šarrəχəχ, äššäreχa-nin daχ härkuk oɣad ed, wädden erhet wa n-iman-in a-s tattärəχ iji-net, wär tətärəχ ar iji n-erhet n-Wa hi-dd-äšmašälän.

³¹ Afäl äqqäləχ tajuhe i-iman-in, wär mad-tənfəw tajuhe-nin härät.

³² Ere säl näkk a fäll-i itajəyhen, əssanəχ daχ a-s tajuhe-net fäll-i ənta, wär tät-iha äššäk.

³³ Wädden a-s täšmašäläm äddinät s-Exya, äjjəyha fäll-i.

³⁴ Əlmədät a-s näkk, wär t-illa ägg-adəm dəχ-tattärəχ tajuhe məšan, a-wa hawän-ənneχ, ənnəχ-awän-t dəχ-derhan n-ad-təχləsəm.

³⁵ Exya, a-s dd-osä, ämoos tefätelt tärɣat, təmiläwlaw məšan, wär tətteräm ar tedäwit n-ässaxät əndärrän dəχ-ännur-net.

³⁶ Näkk, leχ tajuhe tojərät ta fäll-i ijä Exya fäl-a-s, ijitän wi s-hi-ikfa Abba tədabit-näsän, əntäneɖ-en-dəχ a äsidättäten s-ənta a hi-dd-äšmašälän.

³⁷ Abba daχ-i hi-dd-äšmašälän, äsidättät a-wa ənneχ məšan, wär käla təsläm i-emäslī-net, wär käla t-tənhäyäm daχ,

³⁸ tänimäšräyäm daχ i-mäjräd-net ed, wär tomenäm s-ere wa dd-äšmašäl.

³⁹ Əlkəttabän n-Mässinəχ di-dəχ safäykem, tamməχäm dəχ-sän i-tämudre ta təχläläät, a tajəyhanen fäll-i

⁴⁰ məšan, häd a-wen-dəχ, tunjayäm s-ad-hi-dd-təkkəm näkk, i-ad-təjrəwäm tämudre ta təχläläät.

⁴¹ Təmmal-in wädden dägg-adəm a dd-təfal

⁴² məšan, əzzayəχ-käwän, əssanəχ a-s wär təha tərha n-Mässinəχ ulhawän-näwän.

⁴³ Näkk-i dd-osän fäll-isəm n-Abba-nin, tənkaräm-ahi məšan, afäl käwän-dd-osa ere iglan dəχ-älhimmät n-iman-net, šik a-s mad-t-təqbəläm.

⁴⁴ Əndek əmmək wa s-mad-tamənäm käwäneɖ-i wären ətəmməχ ar i-təmmal jer-iman-näwän, a-s ija a-wen, wär təmməχäm i-təmmal ta dd-fälät Mässinəχ-i n-iyyän.

⁴⁵ Wär teχalät näkk a käwän-e-isəɖləmän dat-Abba, ännäbi Mosa-i s-tənnäm ənta a dəχ-jaräm ätṭäma, a käwän-e-isəɖləmän

⁴⁶ fäl-a-s, ənnar təflasäm ännäbi Mosa, tamənäm sār-i ed, isälan-nin, iktab-tän.

⁴⁷ ɣas, šämad wär təflesäm a-wa iktäb, əndek əmmək wa s-mad-təflesäm a-wa hawän-janneχ?»

6

Äsyäwän ɣisa səmmos afdän n-äwadəm

(Mätti 14:13-21; Marqəs 6:30-44; Luqa 9:10-17)

¹ Ijläy ɣisa ɖarät-a-wen s-asälīm n-ejänš wa iyyäɖän n-Galila s-itawänna wa n-Tibäryad.

² Əlkämän-as-dd äddinät äjjootnen hannäyenen ijitän n-Mässinəχ wi s-izizuy imarhinän.

³ Iwwän taɖaxt ənta d-inəṭṭulab-net, äqqima fälla-s.

⁴ Äzzäman-en, ohaz-dd ämudd n-käl-Älyähud wa s-itawänna Faška.

⁵ Idkäl ɣisa akäyad-net, inhäy tamətte ta täjjet t-dd-təkkät ɣas, inna i-Fəlibb: «Əndek diha d-mad-nəžänš tijəlwen äššikšänen tamətte-ta-dəχ?»

⁶ Irrum ɣas a t-itajj ed issan ɣur-iman-net a-wa mad-äj.

⁷ Äwwežäb-as Fəlibb, inn'-as: «Kud-nəžžənša tijəlwen n-sänatät timaq n-ərriyal n-azrəf-dəχ, wär mad-igdäh a-wen i-tamətte jat əjut-wa-dəχ kud-dəχ s-afärs-afärs.»

8 Iggäd-dd iyyän däx-inəttulab wa s-isəm-net Idris n-ənna-s n-Simyon Bətrus, inn'-as:

9 «Ill'-e alyaḍ diha ilan səmmosät tijəlwen n-tärruza d-əssin imānan māšan, a-wen ma ikna däx-tamətte jat əjut-wa-däx?»

10 Inn'-asän Yisa: «Säqqəymät tamətte.» Eddäg-en, əssiidwāl teyəšše, täqqima fälla-s tamətte iha a iwwädän səmmos afdän n-əhaləs.

11 İdkäl Yisa tijəlwen ti n-səmmosät, ämmoy i-Mässinäx təzzar, əzun-tänät i-tamətte. İja a-wen-däx daḡ i-imānan wi n-əssin, təkša tamətte har tässakäy.

12 Älwäqq wa d-əkšän, əyyəwänän, innä Yisa i-inəttulab-net: «Sädwät-dd ifärsän wi əjoläšnen i-ad-wär-ibäxxəs əttäḡam.»

13 Äsdäwän-dd a-wa dd-əjläšän äddinät, osän-t idnäy märaw deketän d-əssin n-tijəlwen.

14 Ənhäyän äddinät iji n-Mässinäx wa s-iket t-ija Yisa ḡas, ənnän: «Ädduuttät a-s ənta-da-däx ännäbi wa ilän s-a dd-ass äddunya.»

15 İlmäd Yisa a-s ärhan ad-t-səmmənukəlän s-əšsil ḡas, ifäl-tän, oläs aggan n-taḍayt ənta ḡas.

Räjjəš n-Yisa fäll-aman
(Mätti 14:22-27; Marḡəs 6:45-52)

16 İjä ehäd ḡas, ätrarän-dd inəttulab-net ejänš,

17 əjjäšän turäft n-aman, ad-jalläyän ejänš s-efäyy wa n-aḡrəm wa n-Qäfärnaxum. A-s itäjj a-wen-däx, janät tihay, wär tän-dd-äwweḍ daḡ Yisa härwa.

18 İnkär-dd fälla-sän aḍu äšsoohen, änmäntaş ejänš.

19 Äyyämme turäft n-aman-näsän har ujęän asälim n-ejänš s-a iwwädän səmmos meḡ säḍis kelumetärän təzzar, ənhäyän-t, ikk'-en-dd, irjaš fäll-aman.

20 Ärmäḡän māšan, inn'-asän: «Näkk a-wa, wär tärməḡäm.»

21 Diha-däx d-əttärän ad-dd-ijjəš turäft fälla-sän ad-täsjän, təḍäs äkall wa əkkän.

Tajəlla ta n-tidət häkkät tämudre

22 Äffäw ḡas, əjrähän-in äddinät-wi wärnen asälim n-ejänš wa dd-fälän a-s turäft n-aman tiyyät ḡas a-s käla täsjän dihen māšan, wär däx-s igla Yisa, inəttulab a däx-s əglänen, äkunän.

23 Osänät-dd daḡ turfen n-aman tiyyäḍ dd-falnen Tibäryad, əkkanät-dd edägg-wənnin däx-əkšän äddinät tijəlwen ḍarät tämayit ta ija Yisa i-Emäli.

24 Təjräh-in tamətte a-s Yisa hakd inəttulab-net äbas t-əllan dihen ḡas, əjjäšän turfen n-aman ti s-iket dd-osänät, əkkän Qäfärnaxum, əmmaḡän-as.

25 Əjräwän-t fäll-asälim n-ejänš wa iyyädän ḡas, ənnän-as: «Äḡalim, əmme dd-tosed diha?»

26 Inn'-asän Yisa: «Äleḡeḡ-awän s-tidət tädduuttet† a-s wädden ijitän n-Mässinäx wi tənähäyäm a fäl hi-tammäḡäm, änn-ak, tammäḡäm-ahi däx-tössəba n-tijəlwen ti-däx təyyəwänäm.

27 Wär täxdemäm i-išəkša-i s-ilkam ad-tän-iba, änn-ak, äxdəmät i-išəkša wi dd-tiirəwnen sār-wän tämudre ta täḡlälät-i käwän-mad-äkf Ägg-ägg-adəm, ed ənta-en-däx a äswär Abba Mässinäx ešwäl-net.»

28 Ənnän-as: «Əndek əmmək wa s-mad-näxdəm erhet n-Mässinäx?»

† 6:26 6:26 Däx-Tälyunanit: Amin, amin (S-tidət, tidət).

²⁹ Inn'-asän Yisa: «Erhet n-Mässinäx a t-ämoosän ad-təfləsäm wa dd-äšmašäl.»

³⁰ Ənnän-as: «Säkən-anäx iji n-Mässinäx wa hanäx-käy-madän-isəfləs.

³¹ Abbatän-nänäx a-s əzzaḡän tenere, əksän tajəlla ta hasän-dd-äsfäl Mässinäx isənnawän fäl-a-s, iktab a-s:

<Ikf'-en Mässinäx tajəlla dd-fälät isənnawän i-ad-tät-əkšən.> »

³² Inn'-asän Yisa: «Äleyeḡ-awän s-tidət tädduuttet a-s wädden ännäbi Mosa a käwän-ikfän tajəlla ta dd-fälät isənnawän, Abba-nin ənta, ad-käwän-äkf tajəlla ta n-tidət dd-fälät isənnawän

³³ ed, tajəlla ta ihäkk Mässinäx a tät-ämoosän ere wa dd-ifälän isənnawän, ənta a ihakkän tämudre i-äddinät.»

³⁴ Ənnän-as: «Älyalim, ten-däx tajəlla, äkf'-anäx-tät härkuk.»

³⁵ Inn'-asän Yisa: «Näkk a-s tajəlla ta hakkät tämudre, wa hi-dd-ikkän, wär-ilkem ad-älluz, wa sär-i omänän wär-ilkem ad-äffud.

³⁶ Ässiilmädäx-käwän a-s tənḡäyäm-ahi mäšan, tunjäyäm tomänäm.

³⁷ Yas, əlmədät a-s äddinät-wi hi-ikfa Abba-nin a hi-dd-asən iket-däx-näsän, wär mad-äkfäx dəḡ ärori-nin i-ere hi-dd-ikkan

³⁸ ed, wär dd-feläx isənnawän i-ad-äjäx erhet-in, fäläx-tän-dd i-ad-äjäx erhet n-Wa hi-dd-äšmašälän.

³⁹ Erhet dəḡ n-Wa hi-dd-äšmašälän a t-ämoosän, ad-wär-äsbätäx wäl' iyyän däx-äddinät-wi hi-ikfa, änn-ak, a irha ad-tän-dd-sənkäräx dəḡ-tamättant ašäl wa ilkämän

⁴⁰ fäl-a-s, erhet n-Abba-nin ənta da: e d t-illäm ere sär-i omanän näkk-i n-Rure-s, ad-ijrəw tämudre ta täylälät, sənkäräx-t-dd dəḡ-tamättant ašäl wa ilkämän.»

⁴¹ Ad-simtəktikän käl-Älyähud jer-iman-näsän fäl-a-s innin inn'-asän: «Näkk a-s tajəlla ta dd-fälät isənnawän»,

⁴² tinmənnin: «Ak wa ənta, wädden Yisa wa-däx n-ägg Yusəf, nəzzay ti-s, nəzzay ma-s? Yas, ma t-isawännen isənnawän a dd-ifal?»

⁴³ Äwwežäb-asän, inn'-asän: «Äyyät fälla-wän takšiwən,

⁴⁴ wär t-illa ere äddoben ad-hi-dd-äkk ar s-ad-t-dd-intaš Abba-nin sär-i, ere dəḡ wa sär-i omänän, ad-t-dd-sənkäräx dəḡ-tamättant ašäl wa ilkämän.

⁴⁵ Ajän wädden əktabän ännäbitän a-s:

<Ilkam ad-umasän dägg-adəm iket-näsän

inəṭṭulab n-Mässinäx>,

yas, ere islän i-tənna n-Abba, irḡa s-a-wa t-issäḡra, ad-hi-dd-äkk.

⁴⁶ Älmäḡna n-a-wen a-s wär t-illa ere inḡayän Abba kunta wädden ere wa dd-ašmašäl Mässinäx, ənta yas a inḡayän Abba.

⁴⁷ Äleyeḡ-awän s-tidət tädduuttet a-s ere wa sär-i omänän, ijraw tämudre ta täylälät.

⁴⁸ Näkk a-s tajəlla ta hakkät tämudre.

⁴⁹ Abbatän-näwän a-s əzzaḡän tenere, əksän mana,† a-wen tajəlla n-taləmmiḡt ta hasän-dd-äsfäl Mässinäx isənnawän, hakd a-wen-däx, ämmun,

⁵⁰ mäšan, tajəlla ta dd-təšräyät dd-fälät isənnawän, ere tät-ikšän, wär-e ämmät.

⁵¹ Näkk a-s tajəlla ta n-tämudre dd-fälät isənnawän, ere ikšan tajəlla-ten-däx, ad-iddar härkuk; taḡəssa-nin a-s tajəlla-ten-däx mad-äkfäx i-ad-təddär äddunya.»

† 6:49 6:49 A-wa isəm n-amənsi wa dd-äzzäbbät Mässinäx fäll-käl-Işrayil äzzäman wa d-hän tanəzruft. Itawänn'-as dəḡ-Tälyunanit: Mana; itawänn'-as dəḡ-Tämasäḡt: Taləmmiḡt n-Mässinäx.

⁵² Inna ʁisa a-wen ʁas, tɔnkär tamɣənnant täšsoohet jer-käl-Älyähud, ad-tinmännin: «Ǽndek əmmək wa s-mad-hanäɣ-äkf taɣəssa-net i-ad-tät-näks?»

⁵³ Inn'-asän ʁisa: «Älleɣeɣ-awän s-tidət tädduuttet a-s afäl wär təksem taɣəssa-nin näkk-i n-Ägg-ägg-adəm, təswəm day ašni-nin, wär mad-təddäräm.

⁵⁴ Ere ikšän taɣəssa-nin, iswä ašni-nin, ijraw tämudre ta täɣlälät, sɔnkäräɣ-t-dd day däɣ-tamättant ašäl wa ilkämän

⁵⁵ fäl-a-s, taɣəssa-nin a-s amənsi wa n-tidət, ašni-nin a-s tesäse ta n-tidət.

⁵⁶ Ere ikšän taɣəssa-nin, iswä ašni-nin, nosäɣ näkk d-ənta, heeɣ-t, ih'-ahi.

⁵⁷ Ǽmmək wa s-iddär Abba-i hi-dd-äšmašälän, əmmək-wen-däɣ a-s əddaräɣ näkk-däɣ. ʁas, ere ikšän taɣəssa-nin däɣ, ad-has-umasäɣ əssəbab n-tämudre täɣlälät.

⁵⁸ Ǽnta-da-däɣ tajəlla ta dd-fälät išənnawän təzläyät d-tajəlla ta əkšän abbatän-näwän uhən-däɣ, ämmun. Ere wa ikšän tajəlla ta ämoosäɣ, ad-iddar härkuk.»

⁵⁹ Ǽnta-da-däɣ älxuṭbät wa ija ʁisa däɣ-ehän n-äddin wa n-käl-Älyähud ihän aɣrəm wa n-Qäfärnaxum.

Mäjräd n-ʁisa, ihakk tämudre

⁶⁰ Ǽslän inəṭṭulab-net äjjootnen i-älxuṭbät wa s-iket t-ijä ʁas, änmännän jer-iman-näsän: «Wa mäjräd, ojar-anäɣ, mi äddoben asjəd-has?»

⁶¹ Ilmäd ʁisa ɣur-iman-net a-wa simtəktikän, inn'-asän: «Ajän wa mäjräd, ikm'-iwän?»

⁶² Kud-täjjəyhäm i-Ägg-ägg-adəm har iqqäl däɣ-išənnawän edägg wa s-käla t-iha s-tizarät, ma mad-tənnəm?

⁶³ Unfas n-Mässinäɣ a ihakkän tämudre, taɣəssa mälayäɣna. Iməjridän wi hawän-jeɣ, hen tämudre ed, Unfas Šäddijän a dd-fälän

⁶⁴ mäšan, iyyäḍ däɣ-wän hi-əlkammen, wär sär-i omenän.» Inn'-asän ʁisa a-wen ed issan ašäl äzzarän äddinät wi has-əlkammen a-s ija a-wen wär sär-s omenän, issan day däɣ-sän ere wa t-madän-isəssäɣdär.

⁶⁵ Ässewäḍ ʁisa fäll-a-wen, innä: «Ǽnta-den-däɣ a-wa fäl hawän-ənnəy ihənnin a-s wär t-illa ere hi-dd-madän-äkk ar s-ad-ijraw turhajät n-a-wen ɣur-Abba.»

⁶⁶ ʁur-ten-däɣ, əqqälän ḍara-s inalkimän äjjootnen, äbas has-əlkamän.

Tajuhe n-Bəṭrus fäll-ʁisa

⁶⁷ Innäd-dd ʁisa ḍarät-a-wen s-inəṭṭulab-net wi n-märäw d-əssin, inn'-asän: «Käwänəḍ-i-š, ajän wär tärhem uɣəl ḍar'-i?»

⁶⁸ Inn'-as Simyon Bəṭrus: «Äɣalim, mi mad-näkk? Käyy a itṭafän iməjridän-wi hakkänen tämudre ta täɣlälät;

⁶⁹ noman sär-k, nəkkas day äššäk a-s käyy a-s Wa Šäddijän dd-ifälän Mässinäɣ.»

⁷⁰ Inn'-asän ʁisa: «Käwänəḍ-i n-märäw d-əssin, ajän wädden näkk a käwän-äsnäfränän? Hakd a-wen-däɣ, iyyän däɣ-wän, iblis.»

⁷¹ Mäjräd-wen-däɣ, ij'-e ʁisa fäll-Yähudəs Ägg Simyon wa n-Isxaryut fäl-a-s, ənta-i-däɣ n-iyyän däɣ-inəṭṭulab wi n-märäw d-əssin a t-madän-isəssäɣdär.

7

Täɣart n-ulh n-ayətma-s n-ʁisa

¹ Ällil ʒisa ɗarät-a-wen teje ta n-Galila fäl-a-s, wär irha ad-ilal ta n-Älyähudəyät ed, äxtafän-as dāḡ-s imizārän n-käl-Älyähud i-ad-t-änḡen kərəf.

² Äzzāman-en, ohaz āmudd n-käl-Älyähud wa s-e-d dd-ija ad-əzzāḡän daw-ihəktan.

³ Eḡḡādän-dd ayətma-s n-ʒisa, ənnän-as: «Äkk Älyähudəyät i-ad-ənhəyän inəṭṭulab-näk wi t-əllanen dihen ijitän-näk əntāneḡ-dāḡ,

⁴ ed ere irhan ad-sär-s əlmədän äddinät, wär-ixəddəm dāḡ-ufär, ḡas, kunta tajjäd timaşalen ogdähnen d-a-wa-dāḡ asuksäd, äj'-enät dat-äddunya iket-net.»

⁵ Ənnän-as ayətma-s a-wen ed wär sär-s omenän əntāneḡ-dāḡ.

⁶ Inn'-asän ʒisa: «Älwäqq-in wär-ija härwa mäšan, wa-nāwän ija härkuk,

⁷ käwāneḡ wär təla äddunya äddälil fäl käwän-təksär mäšan, näkk təksär-ahi ed, tajyheḡ fäll-ijitän-net wi läbasnen.

⁸ Äḡlät ḡas käwāneḡ, äkkät āmudd, näkk wär t-əkkeḡ ed ässaḡät-in, wär-iwwed.»

⁹ Inn'-asän ʒisa a-wen ḡas, äqqima dāḡ-Galila-en-dāḡ.

Tikawt n-ʒisa i-āmudd wa n-ihəktan dāḡ-Yārussālam

¹⁰ Ekkän ayətma-s āmudd ḡas, ikk'-e ənta-dāḡ ɗarät-a-wen, mäšan, dāḡ-ufär i-ad-wär sär-s ilmed āwadəm.

¹¹ Ij' ašäl wa n-āmudd ḡas, ad-has-tammāḡän imizārän n-käl-Älyähud, sastanän d-diha d-t-illa.

¹² Tənkär tamḡənnant dāḡ-tamətte dāḡ-isälan-net, ijanna aḡil iyyän: «Äwadəm olayän a āmoos», ijanna aḡil wa iyyädän: «A fāw, a-di, išinməšrəy tamətte»;

¹³ mäšan, hakd a-wen-dāḡ, wär t-illa ere iḡakkälän eməsli-net i-ad-aməl ʒisa fäl tuksəḡa n-imizārän n-käl-Älyähud.

¹⁴ Äzunän išilan n-āmudd ḡas, ikka ʒisa ehän n-āmudd wa mäqqārän, ad-dāḡ-s isaḡra.

¹⁵ Äkunän käl-Älyähud dāḡ-älxikmatän wi tən-isasla har jannen: «Wa älžahil, ənde d-dd-iḡra, mi t-issəlmädän ättäfässir n-əlkəttabän?»

¹⁶ Äwwežäb-asän, inn'-asän: «A-wa säḡreḡ, wädden a dd-izjarän erhet-in, erhet n-Mässinäḡ-i hi-dd-äšmašälän a dd-ifal.

¹⁷ ʒas, ere irhän ad-āmašäl erhet n-Mässinäḡ, ad-ilməd kunta asəssäḡär wa tajjāḡ Mässinäḡ a dd-ifal meḡ-i dd-əkneḡ ḡur-iman-in.

¹⁸ Ere itamäjrädän fäll-iman-net, aḡkul n-iman-net ḡas a itattär mäšan, ere itattärän təmmal n-wa t-dd-äšmašälän, tidət a ijanna, wär t-iha a ifraḡän.

¹⁹ Äjän wädden ännäbi Mosa a käwän-ikfän Äṭṭäwrät? Ädiš mafäl wär təmišiläm a-wa hawän dāḡ-s inna? Ma hawän-äḡšädäḡ a-s tattäräm tenäḡe-nin?»

²⁰ Ənnän-as: «Tidət-dāḡ a-s ih'-ik alšin, mi itattärän tenäḡe-näk?»

²¹ Inn'-asän ʒisa: «Jeḡ data-wän iji iyyän ḡas, təkunäm dāḡ-s,

²² amili, nəssan a-s wädden ännäbi Mosa a fäll-dd-äzzubbät s-tizarät, imḡarän wi has-äzzarnen a fäll-dd-äzzubbät mäšan, omär-käwän sär-s ḡas, ad-samalayäm aratän wäla dāḡ-ašäl n-əssəbət-i n-täsonfat.

²³ ʒas, šamad wär käwän-äšnamäšräy d-Äṭṭäwrät asəmmili n-ara dāḡ-ašäl n-əssəbət-i n-täsonfat, ädiš, mafäl käwän fäll-i ih' älhäm fäl-a-s innin äzozäyāḡ āwadəm imdan dāḡ-ašäl n-əssəbət?

24 He käwäned! Wār təḍkeḍām äwadəm s-a-wa s-tordäm, hannäyäm fölla-s, əḍkeḍät-t s-a-wa ämoosän tidət.»

25 Innä Yisa a-wen ḡas, ad-jannen iyyäḍ dəḡ-käl-Yärußsälam: «Ajän wädden ənta-i-däḡ a-s tattärän tenäḡe-net?

26 Ənhəywät-t, ädiwännät dār-sän s-əmmək wa s-irha uhən wār t-illa a has-ḡaßsädan. Tordam a-s wädden asədəttu a jän imizärän-nänäḡ a-s ənta-i-däḡ a-s Älmaseḡ?

27 Älwäxla a-s ənta-i, nəssan siha s-dd-iha, a-s ija a-wen Älmaseḡ, wār t-illa ere issanän siha s-mad-dd-ihiy.»

28 İdkäl Yisa emäsli-net, härwa isaḡra dəḡ-ehän n-ämudd wa mäqqärän, innä: «Wädden təzzayäm-ahi, təssanäm dəḡ siha s-dd-heḡ mäšan, hakd a-wen-däḡ, əlmədät a-s wār dd-äşmaşäläḡ iman-in, ere wa hi-dd-äşmaşälän, wār t-təzzeyäm mäšan, ädduuttät;

29 näkk-i t-dd-ifälän, əzzayäḡ-t ed ənta a hi-dd-äşmaşälän.»

30 Əttärän arämas-net mäšan, wār t-illa ere t-iḍasän ed älwäqq-net, wār dd-iwwed härwa.

31 Omänän äddinät äjjootnen hanen älzämaḡät-en-däḡ s-Yisa ḡas, ad-tinmännin jer-iman-näsän: «Ak tordam a-s Älmaseḡ fäw kud-dd-osa-däḡ, ajän ad-äj ijitän n-Mässinäḡ ojärnen wi ij' ähaləs-i-däḡ!»

Əttärän imizärän n-käl-Älyähud əmmək s-ärmäsän Yisa

32 Əslän käl-faris i-aḍkul wa təja tamətte Yisa dəḡ-ätuktek ḡas, əssəḡlän imizärän n-käl-tikutawen d-käl-faris älgomitän n-ehän n-ämudd wa mäqqärän i-ad-dd-ärməsän Yisa.

33 Inn'-asän Yisa: «Əllex jere-wän älwäqq əndärrän, ḍarät-a-wen, ad-äqqələḡ ere wa hi-dd-Äşmaşälän.

34 İlkam dəḡ-wän ad-hi-təmmäḡäm mäšan, wār mad-hi-təjrəwäm ed siha s-əkkeḡ, wār täddobem aggaḍ-net.»

35 Änmännän imizärän n-käl-Älyähud jer-iman-näsän: «Əndek ḡas edäḡ wa mad-äkk dəḡ-t wār mad-nəjrəw? Tordam a-s irha ad-äkk käl-Älyähud wi əmmähäşnen jer-käl-Älyunan† meḡ tordam a-s käl-Älyunan-en-däḡ a mad-äkk i-ad-tän-isäḡär ämära?

36 Meḡ ma tordam əndek älmäḡna n-a-wa s-innä: <Ad-hi-təmmäḡäm mäšan, wār hi-mad-təjrəwäm> d-a-wa s-innä dəḡ: <Siha s-əkkeḡ, wār täddobem aggaḍ-net?> »

Yisa a-s aman əddärnen

37 Aşäl wa işräyän mäqqärän d-imiddəw ämudd, ibdäd Yisa dat-älzämaḡät, idkäl emäsli-net, innä: «Ere äffudän-däḡ, aset-ahi-dd, äswet.

38 Ere sār-i omänän, ad-ənjəyän ijəwan n-aman əddarnen dəḡ-ulh-net s-əmmək wa s-tän-innä əlkəttab n-Mässinäḡ.»

39 Innä Yisa a-wen, dəḡ-isälan n-Unfas n-Mässinäḡ wa mad-əjrəwän wi maden-amən sār-s ed a-s itäj a-wen-däḡ, wār dd-əzzubbät Unfas Şäddijän ed Yisa wār-ijjeş älxurmät-net härwa.

İbdän äddinät dəḡ-təssəba n-Yisa

40 Təslä tamətte ta təsijädät i-a-wa innä ḡas, inn' aḡil-net iyyän: «Ädduuttät a-s ännäbi wa s-ätwänna ənta-da-däḡ.»

† 7:35 7:35 Itawann'-asän: Gəriktän. (Les Grecs dəḡ-Təfränsit). Əzzaḡän Erobbä dəḡ-äkall wa itawänna: Gəris (La Grèce dəḡ-Təfränsit). Tawalt-näsän: Tälyunanit.

⁴¹ Inn' aȳil iyyän daȳ: «Älmasex lab ənta-da-däȳ.» Inn' aȳil wa iyyäðän: «Ajän Älmasex Galila a mad-dd-ifəl?»

⁴² Wädden inn'-anäȳ əlkəttab n-Mässinäȳ a-s: «Älmasex əzzurəyät ta n-ämänokal Dawəd d-tadäbayt-net Bätlehäm ta s-käla däȳ-s-izzäȳ a dd-mad-izjār?» »

⁴³ Täzun tamətte däȳ-təssəba n-ȳisa,

⁴⁴ əttärän iyyäð däȳ-sän ad-t-ärməsän mäšan, ikkä jere-sän, wär t-illa ere t-iðasän.

⁴⁵ Əqqälän-dd älgomitän n-ehän n-ämudd wa mäqqārän, ənnän-asän imizārän n-käl-tikutawen d-käl-faris: «Mafäl wär t-dd-təlweyäm?»

⁴⁶ Ənnän-asän älgomitän: «Näkkəneð a nəwa-däȳ, wär käla nəslä i-äwadəm ijan mäjräd irzan wa ija ähaləs-i-däȳ.»

⁴⁷ Ənnän-asän käl-faris: «Adiš käwəneð-däȳ, äšnämäšräy-käwän?»

⁴⁸ Meȳ ajän hannäyäm däȳ-näȳ ämizār meȳ ere təla taggayt ta n-käl-faris sār-s omanän?

⁴⁹ Ajän wär hənnəyäm a-s wär sār-s omen ar äddinät wi n-älžuhäl wären əssen a ihän Ätṭäwrät.»

Irmäs Nikodem ašrut wa n-ȳisa

⁵⁰ Iggäd-dd Nikodem wa n-u-faris s-käla dd-ädwännät i-ȳisa s-ehäð, inn'-asän:

⁵¹ «Ajän äššərəȳa-nänäȳ isaðlam äwadəm dat-ad-has-əslən äddinät, itwəlməd a-wa iȳšäd?»

⁵² Ənnän-as: «Ajän käyy-däȳ Galila a käy-təlät? Səffəyök ȳas əlkəttabän n-Mässinäȳ, təmməz təkkäsäd-dd däȳ-sän ännäbi dd-ifalän Galila.» [

⁵³ Ḍarät mäjräd-wen-däȳ, hak äwadəm ikk' ehän-net.

8

Tamäðt ta s-ätwännä, təzna

¹ Odwa ȳisa ənta ehäð-wen taðəȳt ta n-ihəškan wi n-əzzäytun.

² Äffäw ȳas, oläs-dd uȳəl n-ehän n-ämudd wa mäqqārän, täddew-dd sār-s daȳ tamətte iket-net, äqqima, ad-tät-isəȳra.

³ Əwwäyän-dd älyulam n-Ätṭäwrät d-käl-faris tamäðt tättirmäsät däȳ-əzzəna, əssəbdädän-tät däȳ-ammäs n-älžəməȳät təzzar,

⁴ ənnän i-ȳisa: «Älyalim, ta-däȳ tamäðt, a-s tät-dd-näȳdär, izinnəw-tät ähaləs iyyän.

⁵ Däȳ-isälan n-tiðeden-ti maden-ättärmäs däȳ-əzzəna, inn'-anäȳ ännäbi Mosa däȳ-Ätṭäwrät a-s ad-tänät-näkf sämmäjori n-tihun. Ämära, nässistän-käy, ma tənneð käyy däȳ-isälan-win-däȳ?»

⁶ Otasän älyulam n-Ätṭäwrät d-käl-faris asəstan-net, wär təmmäȳän ȳas ar i-äsaru fäl t-əssəðlämän. Ənnän-as a-wen ȳas, äddunkät ȳisa ad-ikattäb fäll-äkall s-assəkäð-net.

⁷ Äxwälän-t s-asəstan ȳas, iðkäl-dd sār-sän asəwað-net, inn'-asän: «Ijäret-tät däȳ-wän wa s-käla wär-ofa abäkkäð s-tähunt ta täzzarät.»

⁸ Äddunkät daȳ Ḍarät-a-wen, ad-ikattäb fäll-äkall.

⁹ Əslän älyulam n-Ätṭäwrät d-käl-faris i-a-wa hasän-inna ȳas, əglän s-iyyän-iyyän, ȳur-wi wäššarnen har wi mädroynen. Wär dd-äqqima däȳ-edägg-ənnin-däȳ ar ȳisa, təbdad data-s tamäðt, däȳ-ammäs n-edägg wa s-käla däȳ-s ibdäd älzəməȳät.

¹⁰ Ibdäd-dd sār-s ȳisa, inn'-as: «Tamäðt! Ma jän äddinät wi s-käla käm-əṭṭäfän? Ajän äbas käm-äsiwär äwadəm wäl' iyyän uðlem?»

¹¹ Tənn'-as: «Äbo, Älyalim, äbas t-illa äwadəm wäl' iyyän.» Inn'-as Yisa daḡ: «Wär kām-össödlämäḡ näkk-däḡ, ämära, öglöw mäšan, wär tolesäd iji n-abäkkad.»]

Yisa a-s ännur n-äddunya

¹² Innä Yisa darät-a-wen i-tamötte: «Näkk a-s ännur n-äddunya, ere-wa hi-ilkämän wär mad-irjöš däḡ-tihay, änn-ak, ad-ijrəw ännur wa ihäkkän tämudre.»

¹³ Äggädän-dd käl-faris, ənnän-as: «Käyy ya tajäyhed fäll-iman-näk, a-wen-däḡ daḡ a äsdätten a-s tajuhe-näk, bahu.»

¹⁴ Inn'-asän Yisa: «Kud-tajäyheḡ fäll-iman-in-däḡ, näkk, tajuhe-nin, tädduuttät ed, əssanäḡ siha s-dd-heḡ, əssanäḡ daḡ siha s-häläḡ mäšan käwäned, wär təssenäm siha s-dd-heḡ, wäla siha s-əkkeḡ.

¹⁵ Käwäned, tayötte ta n-dägg-adəm a-s šarräḡäm äddinät, näkk wär t-illa ere šarräḡäḡ,

¹⁶ darät-a-wen daḡ, näkk, kud-əšräḡäḡ äwadəm-däḡ, a-s mad-tasəm äššäreḡa-nin, i n-tidöt fäl-a-s, wär t-jeḡ d-iman-in ḡas, oharäḡ-t d-Abba-nin i hi-dd-äšmašälän.

¹⁷ Wädden iktab däḡ-alämär-näwän a-s təgdäh tajuhe n-əssin äddinät i-asəṭbat n-härät.

¹⁸ Äywa, näkk leḡ sänatät tjuhawen, ämoosäḡ tajuhe fäll-iman-in, äjjəyh'-ahi daḡ Abba-i hi-dd-äšmašälän.»

¹⁹ Innä Yisa a-wen ḡas, ənnän-as käl-faris: «Abba-näk-i-š, əndek diha t-illa?» Inn'-asän Yisa: «Wär hi-təzzeyäm näkk wäla Abba-nin ed, ənnär hi-təzzayäm, təzzəyäm daḡ Abba-nin.»

²⁰ A-s ijä Yisa mäjräd-wa-däḡ, isayra däḡ-ehän n-ämudd wa mäqqärän, edes i-əssəndoqq wa däḡ-inass azrəf d-oräḡ wa təkkatän äddinät i-ehän n-ämudd wa mäqqärän mäšan, wär t-illa ere t-irmasän ed, älwäqq-net wär dd-iwwed härwa.

A-wa iqqäl Yisa Älmasex

²¹ Inn'-asän Yisa daḡ: «Təlkam däḡ-i tekle, tekle daḡ däḡ-mad-hi-təmmäḡäm mäšan, ad-tämmätäm däḡ-abäkkad-näwän ed, edägg wa əkkeḡ, wär täddobem aggaḡ-net.»

²² Äslän käl-Älyähud i-a-wen ḡas, änmännän jer-iman-näsän: «Tordam a-s wädden a-s äbok ad-änḡ iman-net a-s ijän: «Edägg wa əkkeḡ, wär täddobem aggaḡ-net.» »

²³ Inn'-asän Yisa: «Käwäned äddunya-i-däḡ a käwän-lät, näkk išənnawän a hi-länen, käwäned, təl'-iwän äddunya-ta-däḡ, a-s ija a-wen näkk, wär hi-təla.

²⁴ A-wen-däḡ daḡ a fäl hawän-əneḡ a-s ad-tämmätäm däḡ-ibäkkadän-näwän ed, ijmäḡ-t äššäk a-s afäl wär tomenäm a-s «Näkk a iḡlalän», ad-tämmätäm däḡ-ibäkkadän-näwän.»

²⁵ Ənnän-as: «Käyy-š, mi tämoosäd?» Inn'-asän Yisa: «Ämoosäḡ a-di-däḡ s-äru d-hawän-əneḡ: «Näkk äḡlaläḡ.»

²⁶ Leḡ a äjjeen fälla-wän əneḡ, ill'-e daḡ uḡlem äjjeen käwän-äswäräḡ mäšan, Wa hi-dd-äšmašälän, ädduuttät, wär jəneḡ daḡ i-äddunya ar a-wa s-has-əsleḡ har tän-innä.»

²⁷ Inn'-asän Yisa a-wen-däḡ mäšan, wär əfhemän s-isälan n-Abba-net a hasän-itajj.

28 Inn'-asän day älwäqq-wen: «Afäl dd-osa ašäl wa d-tenhäyäm Ägg-ägg-adäm ämmiidkäl s-išennawän däḡ-ammās-nāwän, dihen, ad-təlmədäm a-s: <Näkk a iḡlalän>, təlmədäm day a-s wär t-illa a tajjāḡ d-iman-nin, wär jөнney ḡas ar a-wa hi-issäḡra Abba.

29 Ǝnta-i hi-dd-äšmašälän, idhal-ahi, wär hi-oyya d-iman-in ḡas ed, ənta ḡas a-s tamašäläḡ erhet-net härkuk.»

30 Orāw-dd mäjräd-wen-däḡ ija Ǝisa, immun s-äddinät äjjootnen.

A-wa isadärfen ägg-adäm

31 Inna Ǝisa ɔarät-a-wen i-käl-Älyähud wi sār-s omänner: «Afäl təkfäm iman-nāwän i-mäjräd-in, ad-tumasäm inəṭṭulab ətbatnen,

32 təzzəyäm tidət, səddärfət-kāwän.»

33 Ǝnnän-as: «Näkkäneḡ-š wädden əzzurəyät n-ännäbi Ibrahim a nämoos, wär kāla hanāḡ-ikräš äwadəm wäl' iyyän ḡas, ənnär əmmək wa s-jänned ad-näddärf?»

34 Inn'-asän Ǝisa: «Älleḡeḡ-awän s-tidət tädduuttet† a-s, e d t-illäm äwadəm itamašälän abäkkäḡ, äkkilät-as.

35 Təssanäm a-s akli, wär-itəzzäḡ däḡ-ehän n-mässi-s härkuk mäšan, Rure-s n-mässi-s n-ehän ənta, ad-däḡ-s izzay härkuk.

36 Afäl kāwän-äsdärfät Rure-s n-mässi-s n-ehän, ad-təjrəwäm iman-nāwän.

37 Ǝssanāḡ a-s əzzurəyät n-ännäbi Ibrahim a tämoosäm mäšan, hakd a-wen-däḡ, tattäräm tenāḡe-nin fäl-a-s, wär-ijrew mäjräd-in edägg däḡ-uhawän-nāwän.

38 Näkk, wär hawän-jөнney ar a-wa ənhäyāḡ ḡur-Abba-nin ḡas, kāwäneḡ day, wär təjjəm ḡas ar a-wa s-təsläm ḡur-abba-nāwän.»

39 Äwwežäbän-as, ənnän-as: «Näkkäneḡ, ännäbi Ibrahim a-s abba-nänāḡ.» Inn'-asän Ǝisa: «Ǝnnar ihäyawän n-ännäbi Ibrahim a tämoosäm, ikad-di, tämašäläm a-wa ämešäl

40 mäšan ämära, kāwäneḡ-da-däḡ, tattärnen tenāḡe-nin fäl-a-s innin ənney-awän tidət-ta s-əsleḡ ḡur-Mässināḡ, täkunt šund-ten, wär tät-ija Ibrahim.

41 A-wen-däḡ a fäl hawän-janney a-s kāwäneḡ, ijitän n-abba-nāwän ḡas, a tamašäläm.» Ǝnnän-as: «Näkkäneḡ ya, wädden ikzewän a nämoos, Abba iyyän a nəla, a t-ämoosän: Mässināḡ.»

42 Inn'-asän Ǝisa: «Ǝnnar ämoos Mässināḡ Abba-nāwän, tärhəm-ahi ed ənta a dd-əzjarāḡ, ənta day a dd-fäläḡ, wär dd-əgleḡ d-iman-in, ənta a hi-dd-äšmašälän.

43 Ajän ma hawän-igdalän ad-təjrähäm a-wa hawän-janney? Igdal-awän-t a-wa-däḡ s-tunjäyäm asjed i-mäjräd-in.

44 Iblis a-s abba-nāwän, ənta a-s täqbaläm amišəl n-derhanän-net, ənta-i-s s-aläšäl däḡ-emäjj n-iman, wär kāla ibdäd fäll-tidət ed, tidət fāw a wär-issen. E-d imməjräd-däḡ, bahu ḡas a ijanna ed a-wen-däḡ a-s agna-net fäl-a-s, änəsbahu a ämoos, ənta day a-s abba n-bahu.

45 Näkk wär hi-təflesäm ed tidət a hawän-janney.

46 Ǝndek däḡ-wän ḡas wa äddoben ad-äjjäyh a-s kāla ämešäläḡ abäkkäḡ? Šämäd tidət a hawän-janney, adiš mafäl wär hi-fəlləsäm?

47 Ere wa ila Mässināḡ, asjed a itajj i-a-wa innä Mässināḡ mäšan, kāwäneḡ, wär tämoosäm aratän n-Mässināḡ, a-wen-däḡ a fäl wär hi-səjidäm.»

† 8:34 8:34 Däḡ-Tälyunanit: Amin, amin (S-tidət, tidət).

Yisa Ālmaseḫ, ojār ānnābi Ibrahim

⁴⁸ Āwwežābān-as käl-Ālyāhud, ənnān-as: «A-wa tidət-däḫ a-s nənna käyy u-Sāmari a tāmoosād, ih'-ik alšin.»

⁴⁹ Inn'-asān Yisa: «Näkk lab, wār h'-iha alšin, semḫar ḫas a jeḫ Abba-nin, a-s ija a-wen käwāneḍ, tunjayām s-asəməḫar-in.

⁵⁰ Näkk, wār tətṭārāḫ ad-hi-səməḫārān äddināt, ill'-e ere wa itattārān ad-hi-səməḫārām, ənta-en-daḫ a käwān-madān-išrāḫ.

⁵¹ Ālleḫeḫ-awān s-tidət tädduuttet a-s ere iṭṭafān mäjrād-in, wār däḫ-s ilkem ad-inhay tamättant.»

⁵² Ənnān-as käl-Ālyāhud: «ḫur-ta-däḫ, ad-nəlmād s-tidət-däḫ a-s ih'-ik alšin, ajān wādden Ibrahim hakd ānnābitān wi iyyādnen, təmmār-tān-in tamättant, ḫas käyy, ma käy-āsihālān tənna n-a-s: «Ere iṭṭafān mäjrād-in, wār däḫ-s ilkem ad-inhay tamättant.»

⁵³ Adiš käyy ija ḫur-k a-s tojārād abba-nānāḫ Ibrahim d-ānnābitān wi iyyādnen ämmutnen? Ajān käyy, ma s-täḫelād tāmoosād-t?»

⁵⁴ Inn'-asān Yisa: «Ənnar iman-in ḫas a timəlaḫ, wār-inəffəw a-wen hārāt, Abba-nin-i s-tənnām Emāli-nāwān a āmoos, ənta a hi-itiməlān.

⁵⁵ Abba-nin-en, əzzayāḫ-t māšan käwāneḍ, wār t-təzzeyām. Afāl hawān-əneḫ wār t-əzzeyāḫ, ad-umasāḫ ānāsbahu dār-wān olāhān. Ädduuttät a-s Abba-nin, əzzayāḫ-t, tamašalāḫ daḫ mäjrād-net.

⁵⁶ Ānnābi Ibrahim daḫ-i s-jannem abba-nāwān a āmoos, iddəwāt däḫ-derhan n-ahānay n-ašāl wa n-tiwit-in, inhäy-t ḫas, ija tedāwit təmdat.»

⁵⁷ Innä Yisa a-wen ḫas, ənnān-as käl-Ālyāhud: «Käyy, wār led wāla-däḫ səmmosāt timərwen n-awātay, uhən-däḫ, hālād ad-tənnəd, tənhayād ānnābi Ibrahim?»

⁵⁸ Inn'-asān Yisa: «Ālleḫeḫ-awān s-tidət tädduuttet a-s dat-tiwit n-Ibrahim, əlleḫ-t ed «Näkk äḫlälāḫ.» »

⁵⁹ Ədkälān älwāqq-wen-däḫ tihun i-ad-t-əjrən sār-snāt māšan, iffār-asān däḫ-tamətte, izjār ehān n-āmudd wa māqqārān.

9

Āzozäy Yisa emədderyəl iyyān

¹ Ašāl iyyān, irjaš Yisa a-s inhäy āhaləs s-a-s dd-iwa-däḫ dārḫal.

² Əssəstānān-t inəṭṭulab-net, ənnān-as: «Āḫalim,[†] ak āhaləs-i-däḫ s-ad-dd-iwa-däḫ dārḫal, ənta a-āmešālān abākkaḍ wa has-āmoosān əssəbab n-täddārḫält meḫ imārawān-net?»

³ Āwwežāb-asān, inn'-asān: «Wār-ofa abākkaḍ ənta wāla imārawān-net, ānn-ak Mässināḫ a irhan ad-āj älḫib-net əssəbab s-issəkna tārna-net.

⁴ Iwar-anāḫ ad-nāxdəm tārha n-Wa hi-dd-āšmašālān hārwa ij' ašāl fāl-a-s, imal-dd ehād s-wār t-illa ere äddoben älxidmāt däḫ-s.

⁵ A əkkeḫ heḫ äddunya-ta-däḫ, näkk a-s ānnur-net.»

⁶ Innä Yisa a-wen ḫas, ässotāf fäll-ākall, issəbdāj tālaḫt s-tisutaf-net təzzar, isəls'-et tiṭṭawen n-emədderyəl.

⁷ Inn'-as dārāt-a-wen: «Əgləw, ärdəb däḫ-tāsahayt n-aman ta n-Silwi.» (Silwi, älmāḫna-net: ānāmmašul.) Iglā, irdāb-dd, a-s dd-iqqāl, ihannāy.

⁸ Ənhāyān-t ānhārajān-net d-äddināt wi t-əzzāyenen hārwa dārḫal ḫas, ānmānnān: «Ka! Ajān wādden a-wa emədderyəl wa itaxāyemen däḫ-tāšarrit itattār takute däḫ-äddināt?»

[†] 9:2 9:2 Rābbi däḫ-Yābranəyya.

⁹ Inn' aḡil-nāsān: «Ewällā ənta.» Inn' aḡil wa iyyādān: «Aa fāw! Wādden ənta, milhaw ḡas a jan.» Iggād-dd emədderyəl iman-net əlwāqq-wen, inn'-asān: «A-wa nəkk wədi-dāḡ təzzāyām.»

¹⁰ Ənnān-as: «Əndek əmmək wa s-əmerānāt tiṭṭawen-nək?»

¹¹ Inn'-asān emədderyəl: «Ahaləs wa s-isəm-net ḡisa a issəbdājān tālayt, issəls'-et tiṭṭawen-in təzzar, inn'-ahi: «Əḡləw, ərdəb dāḡ-tāsahayt n-aman ta n-Silwi». Əkkeḡ tāsahayt n-aman əlwāqq-wen-dāḡ, ərdəbāḡ-dd dāḡ-s.»

¹² Ənnān-as əddināt: «Wa kāy-əzozāyān-š, ma ija?» Inn'-asān əhaləs: «Wār-əssenāḡ.»

Asəstan wa jān kəl-faris i-emədderyəl wa izzāyān

¹³ Əmdān əddināt d-asəstan n-əhaləs wa s-kāla dāryal ḡas, əwwāyān-t s-kəl-faris

¹⁴ fəl-a-s, əsəl n-əssəbət-i n-təsonfat a dāḡ-issəbdāj ḡisa tālayt-ta əswār tiṭṭawen-net, or'-enāt.

¹⁵ Osā-dd emədderyəl wa izzāyān kəl-faris ḡas, əssəstānān-t d-əmmək wa s-izzāy. Inn'-asān: «Əswār ḡisa tālayt tiṭṭawen-in, ərdəbāḡ, ənhāyāḡ.»

¹⁶ Inn' aḡil n-kəl-faris iyyān: «Wa-dāḡ ḡisa, wār-əmoos ənəmmašul n-Məssināḡ ed ənnar t-əmoos, isəmḡār əsəl wa n-əssəbət-i n-təsonfat.» Inn' aḡil-nāsān wa iyyādān: «Ajān anəsbəkkaḡ wār-idhel Məssināḡ, əddoobāt amišəl n-ijitān wi itāj əhaləs-i-dāḡ?» Əqqālān-dd ḡas əmiḡānnānān jer-iman-nāsān dihen-dāḡ.

¹⁷ Əssəstānān ḡarāt-a-wen emədderyəl wa izzāyān, ənnān-as: «Kāy ma tənneḡ, ma iqqal əhaləs wa orān tiṭṭawen-nək?» Inn'-asān: «Un ənnābi a əmoos.»

¹⁸ Əyrān-dd imizārān n-kəl-Əlyāhud ḡarāt-a-wen imārawān n-emədderyəl fəl-a-s, wār-əflesān a-s kāla dāryal, izzāy.

¹⁹ Osān-dd imārawān n-əhaləs ḡas, əssəstānān-tān: «Ak rure-wān wa s-tənnām a-s dd-iwa-dāḡ, dāryal, ənta-da-dāḡ meḡ? Kunta daḡ a dd-iwa-dāḡ, dāryal, əndek əmmək wa s-əmāra, ihannāy?»

²⁰ Ənnān-asān imārawān n-əhaləs: «Tidət lab a-s a-wa rure-nāḡ, wār t-ih' əššək daḡ s-a-s dd-iwa-dāḡ, dāryal

²¹ məšan, dāḡ-isālan n-əmmək wa s-ihannāy əməra d-ere wa orān tiṭṭawen-net, a-wen, wār hanāḡ-ha tijya-net, səstənāt-t ənta iman-net ed əhaləs iššamān a əmoos, əddoobāt ad-əj isālan n-a-wa t-iqqālān.»

²² Tuksəḡa n-imizārān n-kəl-Əlyāhud a təswānnāt imārawān-net a-wen fəl-a-s, əssiibdādān imizārān n-kəl-Əlyāhud s-e d t-illām ere irḡān a-s: «ḡisa a-s Əlmasex», ad-has-əḡdəlān uješ n-ehān n-əddin wa n-kəl-Əlyāhud.

²³ Dāḡ-tuksəḡa n-a-wen-dāḡ a fəl ənnān imārawān n-əhaləs: «Ahaləs iššamān a əmoos, səstənāt-t ənta iman-net.»

²⁴ Olāsān-dd kəl-faris teḡāre n-əhaləs wa s-kāla dāryal, ənnān-as: «Ən tidət i-Məssināḡ fəl-a-s, nəssan a-s wa kāy-əzozāyān, anəsbəkkaḡ a əmoos.»

²⁵ Inn'-asān: «Kunta anəsbəkkaḡ a əmoos wāla, wār-əssenāḡ; hārāt iyyān a əssanāḡ: kāla dāryalāḡ, əməra, hannāyāḡ.»

²⁶ Ənnān-as daḡ: «Lāḡāt-anāḡ ma hak-ija? Əndek əmmək wa s-ora tiṭṭawen-nək?»

²⁷ Inn'-asān əhaləs: «Wādden əru d-hawān-tān-ənnəḡ məšan, wār hi-təsjādām ḡas, mafəl tārham daḡ ad-hawān dāḡ-s əqqəlāḡ? Adiš a tārham ad-tumasām kāwāneḡ-dāḡ hārāt dāḡ-inəṭṭulab-net?»

²⁸ Inn'-asän a-wen ɣas, ad-t-gaggärän, jannen-as: «Aa təfəw! Käyy ɣas a-s änäṭṭalib-net, näkkäneḍ, inəṭṭulab n-ännäbi Mosa a nämoos,

²⁹ nəssan daɣ a-s ännäbi Mosa imməjräd-as Mässinäɣ mäšan, wa-hi, wär nəssen e-s dd-iha.»

³⁰ Inn'-asän emədderɣəl wa izzäyän: «Adiš täqqän n-eɣäf təja härwa ed, ənta a orän tiṭṭawen-in mäšan hakd a-wen, wär təssenäm e-s dd-iha.»

³¹ Inn'-asän daɣ: «Nəssan a-s Mässinäɣ, wär iɣəbbəl tittar n-inäsbäkkadän mäšan, iɣabbäl tittar n-e d t-illäm ere t-äksuḍän, itamašalän erhet-net.

³² Nəssan daɣ a-s wär käla ätwäsla äwadəm oran tiṭṭawen n-ere s-a-s dd-iwa-däɣ, dərɣal.

³³ ɣas, ähaləs-i-däɣ, ənnär wädden Mässinäɣ a dd-ifal, wär-ikərrəš tädabit n-a-wa itäjj.»

³⁴ Issəmdä emədderɣəl wa izzäyän d-mäjräd ɣas, ənnän-as: «Ewad! Käyy iket-näk abäkkad a däɣ-wed, ma käy-äsihälän älxuṭbat wa hanäɣ-täjjäd?» Äššewäjän sār-s ḍarät-a-wen har t-əzzəzjārän ehän n-äddin wa hän.

Käl-faris, wär-əzleyän d-iməddorɣal

³⁵ Islä ɣisa a-s əkkäsän-t däɣ-ehän n-äddin-näsän ɣas, os'-e-hi-dd, inn'-as: «Ak käyy tomanäd s-Ägg-ägg-adəm meɣ?»

³⁶ Inn'-as ähaləs wa s-käla dərɣal: «Äɣalim, säkən-ahi-t ɣas ad-sār-s amənäɣ.»

³⁷ Inn'-as ɣisa: «Tənhäyäd-t ed, ənta-da-däɣ hak-ämmijrädän ämära-däɣ.»

³⁸ Inn'-as ähaləs älwäqq-wen: «Äɣalim, omanäɣ sār-k.» Irkäɣ dat-ɣisa ässaɣät-wen-däɣ.

³⁹ Innä ɣisa i-tamətə ḍarät-a-wen: «Näkk, oseɣ-dd i-ad-əbḍəwäɣ jer-äddinät:

wi dərɣalnen, ad-ənhəyän,

wi hannäyən, ad-äddärɣälän.»

⁴⁰ Islän käl-faris wi t-əllänen ɣur-ɣisa i-mäjräd-wen-däɣ ija ɣas, ənnän-as: «Ajän näkkäneḍ-däɣ iməddorɣal a nämoos?»

⁴¹ Inn'-asän ɣisa: «Ənnär tämoosäm iməddorɣal, wär käwän-itəgger uḍlem wa n-abäkkad mäšan, däɣ-təssəba n-a-di-däɣ s-tənnäm hannäyäm, a fäl, tumast-näwän i-inäsbäkkadän, tətbat.»

10

Tangalt ta n-a-s ɣisa a-s Amäḍan n-iman

¹ Inn'-asän ɣisa ḍarät-a-wen: «Älexeɣ-awän s-tidət tädduuttet† a-s e d t-illäm ere dd-ijjašän afäraj n-arəzzej s-ašrut säl wa n-əmm-net, emäkräd d-änarkab a ämoos,

² mäšan, amäḍan n-tihatten ənta, emm n-afäraj a-s dd-itajjäš fäll-tihatten-net.

³ E-d tänät-dd-osa, ad-has-arr änaɣlaf-näsnät s-ehäd emm n-afäraj. Afäl has-ämera afäraj har dd-ijjäš fälla-snät, ad-əslənät tihatten-net i-emäslinet, iɣär hak iyyät s-isəm-net təzzar, izəzjār-tänät,

⁴ afäl tänät-dd-izzəzjār iket-näsnät, ad-iməl data-snät, əlkəmnät-as ed, əzzaynät emäslinet.

⁵ Amäḍan-en, tihatten-net, wär mad-əlkəmnät i-amäjar, änn-ak, ad-has-əffoqqətnät ed, wär-əzzeynät emäslinet.»

† 10:1 10:1 Däɣ-Tälyunanit: Amin, amin (S-tidət, tidət).

⁶ Äsnäfäqq'-asän Yisa isälan-win-däx mäšan, indär-asän ad-əfhəmān a däx-hasän-ässewäl.

Yisa a-s amādan wa olāxān

⁷ Oläs daḡ, inn'-asän: «Älleḡeḡ-awān s-tidət tädduuttet a-s näkk a-s emm n-afāraj wa s-tajjāšnät tihatten,

⁸ äddinät-wi hi-dd-äzzarnen, imäkrädän d-inarkabän a ämoosän iket-däx-näsän, wär hasän-äsjadnät tihatten;

⁹ näkk a-s emm n-afāraj, ere sār-i t-dd-ijjāšän-däx, ad-iḡləs, ad-igilləw, itaqqäl-dd, ijarrāw daḡ amādon.

¹⁰ Emäkräd ənta, wär dd-itis ar i-tikra d-aḡāras d-ahälak; näkk, oseḡ-dd i-ad-əjrəwän dägg-adəm tämudre, əjrəwän-tät daḡ s-tänoflyt.

¹¹ Näkk a-s amādan wa olāxān, amādan wa olāxān iman-net a ihakk i-ad-äḡlənät tihatten-net

¹² mäšan, ere wa s-tefert a fäl ixdam, wär-ämoos amādan olāxān, wädden ənta a-s mässi-s n-tihatten. A-wen-däx a-s, afäl inhäy taḡəssit dd-malät, ad-əjawäd, äyy tihatten d-iman-näsnät, təjjəš-tänät taḡəssit, šəmməhəš-tänät,

¹³ ed issan a-s tefert ḡas a fäl ixdam, wär-äkkul a jänät tihatten.

¹⁴ Näkk a-s amādan wa olāxān, əzzayäḡ tihatten-in, əzzaynät-ahi daḡ.

¹⁵ Əzzaynät-ahi s-əmmək wa s-əzzayäḡ Abba, izzay-ahi daḡ ənta. Hakkäḡ-tänät tämudre-nin,

¹⁶ leḡ hārwa tihatten äjjootnen wären ha afāraj-wa-däx, iwar-ahi s-ad-tänät-dd-əwətäḡ, əslənät əntänätəḡ-däx i-emäslin-nin, təməl-t tiyyät tahrut iḡan iyyän n-amādan.

¹⁷ Abba ənta, irh'-ahi ed hakkäḡ tämudre-nin, siḡuläḡ-tät-dd iman-in.

¹⁸ Wär t-illa ere äddoben ad-däx-i ahäḡ tämudre-nin, hakkäḡ-tät d-iman-in, siḡuläḡ-tät-dd däx d-iman-in, ənta-den-däx turhajät ta əjrəwäḡ ḡur-Abba-nin.»

¹⁹ Əslän käl-Älyähud i-mäjräd-wen-däx ija Yisa ḡas, tənkar tamḡənnant daḡ jere-sän.

²⁰ Əggädän-dd däx-sän iyyäd äjjootnen, ad-jannen: «Ak mafäl täsijädäm i-ere ih' alšin, äbbuddäl?»

²¹ Jannen wi iyyädnen: «Mäjräd wa dd-izjārän emm n-ähäləs-i-däx, wädden mäjräd s-äddobät ad-t-äj ere ih' alšin, nəssan daḡ a-s ere ih' alšin, wär-äddobät ad-arr tiḡtawen n-iməddorḡal.»

Unjäyän käl-Älyähud äqbälän Yisa

²² Äzzāman-en, ijä ämudd n-tasäktot n-ašəšdaj wa jän käl-Älyähud i-ehän n-ämudd wa mäqqārän ihän Yärussälam s-tajrəst,

²³ irjäš Yisa däḡ-ehän n-ämudd wa mäqqārän däḡ-tele n-edägg wa s-itawänna: Wa n-Suläyman,

²⁴ əžžəmmäḡän-dd fälla-s käl-Älyähud, ənnän-as: «Əkkəs-anäḡ däḡ-taḡdärt, kunta käyy a-s Älmasex, änn'-anäḡ-tän, ma s-täqqaläd, təkkəsäd-anäḡ däḡ-täqqän n-eḡäf-ta-däḡ?»

²⁵ Äwwežäb-asän, inn'-asän: «Wädden, əlläḡeḡ-awān mäšan, tunjäyäm tomänäm sār-i, ənhəywät ḡas ijitän wi s-hi-ikfa Abba-nin turhajät n-amışəl-näsän, əntänəḡ-en-däḡ a tajäyhanen fäll-i.

²⁶ Käwänəḡ, wär sār-i tomenäm fäl-a-s wär täḡḡinäm däḡ-äddinät wi hənən tahrut ta n-inalkimän-in.

²⁷ Tahrut ta leḡ n-inalkimän-in, sallän i-emäslin-nin, əzzayäḡ-tän, əlkamän-ahi daḡ.

28 Wi ley, hakkäy-tän tämudre ta täylälät, wär däx-sän tøkem tamättant, wär tän-mad-ahäx day äwadəm wäl' iyyän däx-äfuss-in

29 fäl-a-s, Abba-nin-i hi-tän-ikfän, wär t-illa ere s-wädden ill'-e jönnøj-s, wär t-illa day ere äddooben ukəs-näsän däx-äfuss-net.

30 Näkk d-Abba, iyyän härät, wär nəzley.»

31 Innä Yisa a-wen ɣas, obärän-dd sär-s tihun i-ad-t-əkfen sammäjori-näsnät mäšan, inn'-asän:

32 «Läxätät-ahi ɣas däx-ijitän n-Abba wi-däx ähuskätnen jey jere-wän, öndek däx-sän wa ilän äddälil n-tenäxe ta s-tärham ad-hi-tät-tøjəm?»

33 Ənnän-as käl-Älyähud: «Wädden däx-tössəba n-iji ähusken jed a fäl käy-nəhakk tamättant, änn-ak däx-tössəba n-asəkkufar wa jed ed käyy-i n-əgg-adəm, täsisəgdähäd iman-näk d-Mässinäx.»

34 Inn'-asän Yisa: «Ajän wädden iktab däx-Ättäwrät-näwän a-s, Mässinäx, innä:

«Äxläkäx-dd dägg-adəm däx-milhaw-in».

35 Wädden, nəssan day a-s mäjräd n-Mässinäx, ixlal, wär-itəmöttöy. ɣas kunta äddinät wi əlkämnen i-mäjräd-en, ixläk-tän-dd däx-milhaw-net,

36 mafäl jannem əskafäräx, näkk-i əsnäfrän Abba, əšmašäl-ahi-dd s-äddunya fäl-a-s innin ənney-awän: «Näkk Rure-s n-Mässinäx a ämoosäx.»

37 Ämära kunta ɣas a-wa tamašäläx wädden Abba-nin a dd-ifal, adiš wär sär-i tomenäm mäšan,

38 kunta a-wa tamašäläx Abba-nin a dd-ifal, adiš kud-däx wär sär-i tomenäm näkk, ämənät s-timašalen-en-däx i-ad-təlmədäm, səbbuyənäm a-s näkk, ärtayäx d-Abba, irtay där-i day ənta, heex-t, ih'-ahi.»

39 Äsmägəggäyän day käl-Älyähud däx-arəmas-net mäšan, əzləbbät-dd Yisa däx-sän, iglä.

40 Ikka dərät-a-wen asəlim wa n-emäynäj n-əjäns wa n-ɣurdəni, däx-edəgg wa s-käla däx-s isalmaɣ Exya äddinät, izzäx dihen-däx.

41 Əkkän-t-dd äddinät əjjootnen, jannänen: «Exya, wär-ija təkunt wäl' iyyät mäšan, a-wa inna fäll-əhaləs-i-däx, itbat iket-net.»

42 Omänän äddinät əjjootnen s-Yisa däx-edəgg-en-däx.

11

Issənkär-dd Yisa Lazar jer-inəmmuttan

1 Äzzäman-wen-däx ad-ärhin Lazar wa n-taxrəmt ta n-Bitanya n-ənḡa-s n-Marta d-Märyäma

2 ta s-käla tössənxäl aɖutän fäll-idarän n-Yisa təzzar, ad-tän-timəs s-tišəkkaɖ-net. Ənta-i-däx a-s ämära, ärhiin ənḡa-s, Lazar.

3 Ärhin ɣas, əssawäynät šätma-s ämašal s-Yisa, ənnänät-as: «Älyəlim, əss-dd, emärh-näk Lazar ärhiin.»

4 Iwwäɖ-dd ämašal Yisa ɣas, innä: «Turhəonna ta tərməsät Lazar, wädden ənta a t-madät-tawəy s-ələxärät, turhəonna-net ta-däx a madät-tumas əssəbab fäl ätwəsəmɣär Mässinäx, itwəsəmɣär day Rure-s.»

5 Tärha ta ija Yisa i-Lazar, ənta day a ija i-Marta d-wälätma-s Märyäma.

6 Əjjäšan isəlan n-turhəonna n-Lazar Yisa mäšan, əssakäy däx-edəgg-ənnin-däx əssin išilan təzzar,

7 innä i-inəttulab-net: «Äqqələt-anəx Älyähudəyät.»

8 Ənnän-as inəttulab-net: «Älyəlim, ajän wädden a äynayän tattärän käl-Älyähud, ad-käy-əkfen sammäjori n-tihun däx-teje-ten-däx, ɣas ma däx-s təqqaläd?»

⁹ Inn'-asän Ƴisa: «Ajän wädden märaw ässaḡätän d-əssin a hanen ašäl? Ere irjašan härwa ija ašäl, wär mad-äjjärtäqqəl fäl-a-s ihannäy data-s

¹⁰ mäšan, äwadəm irjašan s-ehäd, ad-äjjärtäqqäl ed irjaš däḡ-tihay.»

¹¹ Ija Ƴisa mäjräd-wen-däḡ ḡas, inn'-asän: «Emärh-nänäḡ Lazar, iṭṭas mäšan, əgley i-ad-t-dd-sənkäräḡ.»

¹² Ənnän-as inəṭṭulab-net: «Äḡalim, adiš kunta eḡəs ḡas a ija, ill'-e äṭṭäma n-ad-izzəy.»

¹³ Mäjräd wa hasän-ija, ij'-asän-t i-ad-tän-isəlməd a-s Lazar äba-t mäšan, əbdadän ənniyätän-näsän fäll-eḡəs wa n-ere ilḡad eḡəs.

¹⁴ Ij'-asän Ƴisa ḡarät-a-wen mäjräd s-äddooben afäham-net, inn'-asän: «Əlmədät a-s Lazar ya äba-t, mäšan,

¹⁵ äddiwəḡ däḡ-təssəba-näwän ed a-s ärhin, wär ḡur-s t-əlleḡ, ätiwatäs a-wen i-ad-sär-i tamənäm; ämära, ənkärät, äkkät-anäḡ-t.»

¹⁶ Iggäd-dd Tomi wa s-itawänna Didim, a-wen älmäḡna-net: ekne, innä i-inəṭṭulab wi iyyädnen: «Äḡlät-anäḡ näkkäneḡ-däḡ i-ad-nahär d-äḡalim-nänäḡ tamättant.»

Ƴisa Älmasex, isidur

¹⁷ A-s hin-osa Ƴisa Bitanya, ila Lazar əkkoḡ išilan däḡ-azəkka.

¹⁸ Bitanya-i däḡ-t-äba, wär jere-s t-illa d-Yärussälam ar kəraḡ kelumetärän.

¹⁹ Äba Lazar ḡas, osän-dd käl-Älyähud äjjootnen Marta d-Märyäma, ad-sasmaḡän ulhawän-näsnät.

²⁰ Təsla Marta a-s imal-dd Ƴisa ḡas, təkäḡ-as, a-s ija a-wen Märyäma ənta, täqqima-hin ḡur-ehän.

²¹ Tämmoqqäs d-Ƴisa ḡas, tənn'-as: «Äḡalim, əssanäḡ a-s ənnär telled diha-däḡ, wär-itiba äṅṅa-ḡ.

²² Mäšan hakd a-wen-däḡ, əssanäḡ a-s käyy a təttäräd, däḡ-Mässinäḡ-däḡ, ad-hak-t-äkf.»

²³ Inn'-as Ƴisa: «Äṅṅa-m a dd-inkär däḡ-tamättant.»

²⁴ Tənn'-as Marta: «Əssanäḡ lab s-ad-dd-inkär däḡ-tamättant ašäl wa ilkämän.»

²⁵ Inn'-as Ƴisa: «Näkk a-s Wa dd-isänkarän däḡ-tamättant, näkk a ihakkän tämudre, ere sär-i omänän-däḡ, ad-iddar härkuk kud-däḡ ämmut,

²⁶ ere iddarän daḡ har sär-i omän, wär däḡ-s təkem tamättant fäw. Ak kämm Marta, təflasäd a-wen meḡ?»

²⁷ Tənn'-as Marta: «Əyya Äḡalim, omanäḡ a-s käyy a-s Älmasex wa n-Rure-s n-Mässinäḡ s-ätwänna ilkam ad-dd-ass äddunya.»

Issänḡäl Ƴisa imeṭṭawän däḡ-təssəba n-Lazar

²⁸ Təja Marta mäjräd-wen-däḡ ḡas, təglä, təkäs-dd wälätma-s s-takše, tənn'-as: «Äḡalim ya, osä-dd, inn'-am ad-t-in-tasəd.»

²⁹ Təsla Märyäma i-a-wen ḡas, təggäd ässaḡät-wen-däḡ, təkä Ƴisa.

³⁰ A-s itäjj a-wen-däḡ, wär dd-ijješ Ƴisa aḡrəm härwa, ih' edägg-wənnin-däḡ däḡ-där-s tämmoqqäs Marta,

³¹ əllan-t daḡ imänokalän n-käl-Älyähud iyyäd ḡur-Märyäma däḡ-ehän, sasmaḡän ulh-net. Ənhäyän-tät a-s təbdäd šik, təzjār ḡas, əlkämän-as ed ija ḡur-sän a-s Lazar a təkka i-ad-tälh fäll-azəkka-net.

³² Täwwäḡ-in Märyäma diha t-illa Ƴisa, tənähäy-t ḡas, tärkäḡ-as, tənn'-as: «Emäli, əssanäḡ a-s ənnär telled diha-däḡ, wär-itiba äṅṅa-ḡ.»

³³ Inhäy-tät Ƴisa hall ənta d-wi dār-s äddewnen, ḡas, äsnin, əkmän-t iman-net,

³⁴ inn'-asän: «Säknät-ahi azəkka wa dāḡ-jäm Lazar.» Ænnän-as: «Æyyäw, ənhəy-t.» Inhäy-t ḡas,

³⁵ ilhä Ḣisa.

³⁶ Ænnän iyyäḡ dāḡ-imänokalän n-käl-Älyähud: «Təmyäre n-tärha ij'-et i-Lazar»,

³⁷ ənnän wi iyyäḡnen: «Ænta-i orän tiṭṭawen n-emədderyəl, indär-as ad-igdəl i-Lazar tamättant?»

Issənkär-dd Ḣisa Lazar jer-inəmmuttan

³⁸ Oläsän-t iman-net təkma, iglä ḡarät-a-wen, ikk' azəkka wa iha Lazar iyäšan dāḡ-esawäl, ihar s-tähunt mäqoorät.

³⁹ Osä-dd Ḣisa azəkka ḡas, innä i-äddinät: «Ækkəsät-in tähunt ta härät azəkka.» Təggäd-dd Marta ta n-wälät ma-s n-enəmmettən ässaḡät-wen, tənna i-Ḣisa: «Älyalim, Lazar ya äru d-irkäh, ašäl-net wa s-əkkoḡ a-wa ih' azəkka.»

⁴⁰ Inn'-as Ḣisa: «Ajän wädden Marta äru d-ham-əney a-s afäl sär-i tomänäd, ad-tənhəyäd tärna n-Mässinäḡ?»

⁴¹ Ækkäsän-in äddinät tähunt fäll-əmm n-azəkka ḡas, äjoḡäy Ḣisa išənnawän, innä: «Abba, ämmoyäḡ-ak aḡäbal wa jed a-wa dāḡ-k əttäräḡ,

⁴² əssanäḡ daḡ a-s ḡabbäläd tittar-in härkuk mäšan, ämmijrädäḡ-ak ämära dāḡ-təssəba n-älžämaḡät-wa-dāḡ ibdädän, dāḡ-təssəba n-ad-əmənan äddinät a-s käyy a hi-dd-äšmašälän.»

⁴³ Innä Ḣisa a-wen ḡas, idkäl eməsli-net, innä: «Lazar, əzjār-dd!»

⁴⁴ Izjār-dd Lazar azəkka, äqqaḡän ifassän-net d-iḡarän-net s-isəssora, ilsä ekäršäy idəm-net. Inn'-asän Ḣisa älwäqq-wen: «Arät-t, təbḡəwäm-t d-ikäršäyän-wi-dāḡ ittäl, təyyəm-t ad-igləw.»

Äswärän imizärän n-käl-Älyähud udlem Ḣisa (Mätti 26:1-5; Marḡəs 14:1-2; Luḡa 22:1-2)

⁴⁵ Osän-dd käl-Älyähud äjjootnen, ənhäyän a-wa ija Ḣisa ḡur-Märyäma ḡas, omänän sär-s

⁴⁶ mäšan, əglän iyyäḡ dāḡ-sän, osän käl-faris, əlläḡen-asän a-wa ija Ḣisa.

⁴⁷ Äžžəmmäḡän-dd imänokalän n-käl-tikutawen d-käl-faris d-älžämaḡät wa n-käl-Sinhidrin-i† iyattäsän äššäreḡa, änmännän: «Ændek äddäbara? Wa äwadəm, əjjətän fälla-näḡ ijitän-net wi ässuksäḡnen!

⁴⁸ Ælmədät a-s afäl t-noyya s-əmmək-wa-dāḡ, ad-sär-s əmənan äddinät iket-näsän. Afäl ämoos a-wen a ijan, ad-ärḡən käl-Roma-i hanäḡ-äsitäḡmärnən ehän n-ämudd-nänäḡ wa šäddijän, ättäḡtäḡän äkall-nänäḡ.»

⁴⁹ Iggäd-dd dāḡ-sän Qayäf-i s-ənta a äminakälän fäll-käl-tikutawen awätay-wen-dāḡ, innä: «Ijmaḡ-t äššäk a-s wär t-illa a təjrahäm iket-dāḡ-nawän,

⁵⁰ ajän wär hənnəyäm a-s uf'-awän, ad-ämmät äwadəm iyyän dāḡ-təssəba n-tamətə uhən ad-tämmät tamətə iket-net.»

⁵¹ Mäjrad-wen-dāḡ ija Qayäf, wädden a dd-ifalän tayətə-net mäšan, šämad ənta a äminakälän fäll-käl-tikutawen awätay-wen-dāḡ, ikf'-e Mässinäḡ mäjräd hin-ässawäḡ tamətə n-a-s ilkam ad-ämmät Ḣisa, dāḡ-təssəba n-tamətə ta n-Išrayil iket-net.

† 11:47 11:47 A-wa äläžämaḡät n-inušämän d-imizärän n-käl-Išrayil wa itirən äššäreḡa, əntäneḡ a-s äläqallitän, osayän daḡ tamətə d-əlxəkum d-äddin.

⁵² Təzzar daḡ wädden käl-Işrayil ɣas a-s mad-ämmät, ad-ämmät i-ad-dd-isədəw aratan n-Mässinäḡ wi əmmähäşnen jer-ikallän, umasän tiyyät taḡəssa.

⁵³ Äxtäsän ɣur-aşäl-wen-däḡ n-a-s wär-e sunfən fäw wär jen iman-net.

⁵⁴ İxtäf ənta-däḡ ɣur-aşäl-wen-däḡ i-räjjoş däḡ-edägg t-hannäyän käl-Älyähud. İfäl äkall-wen-däḡ hän, ikkä teje ta tohäzät tanəzruft, izzäḡ ənta d-inəṭṭulab-net däḡ-aḡrəm s-isəm-net İfḡahim.

⁵⁵ Ohäz-dd əmudd n-käl-Älyähud wa n-Faşka ɣas, əhhujjäjän-dd äddinät äjjootnen s-Yărussälam i-ad-şəşdəjän iman-näsän dat-əmudd-en-däḡ,

⁵⁶ ad-tammäḡän iməhhujjaj iket-näsän i-Ḳisa, tinmənnin jer-iman-näsän däḡ-ehän n-əmudd wa mäqqārän: «Ak, tordam a-s ihäl a dd-äkk əmudd meḡ?»

⁵⁷ A-s jännen a-wen-däḡ, omarän imänokalän n-käl-tikutawen d-käl-faris s-ere ilmädän diha t-illa Ḳisa iket-net, isäḡdäret-t i-ad-ättärmäs.

12

Təssänyäl Märyäma ađutän fäll-Ḳisa (Mätti 26:6-13; Marqəs 14:3-9)

¹ Aşäl wa s-sädis dat-əmudd wa n-Faşka, ikkä Ḳisa taḡrəmt ta n-Bitanya däḡ-izzäḡ Lazar wa dd-issənkär jer-inəmmuttan.

² Təssəskär-dd Marta imənsiwän dat-Ḳisa, äniḡäyma d-Lazar d-imäjarän wi iyyädnen.

³ Tədkäl Märyäma darät-a-wen təzune n-litär n-ađutän lanen älqim wär-ıqquer härät, ad-tän-sanḡal fäll-iđarän n-Ḳisa, timəs-tän s-tişəkkađ-net. Äbyänḡälän ađutän däḡ-ehän-ənnin-däḡ iket-net.

⁴ İggäd-dd iyyän däḡ-inəṭṭulab n-Ḳisa wa s-isəm-net Yähudəs wa n-İsxaryut-i t-e-isəssäḡdärän, innä:

⁵ «Mafäl ađutän-wi-däḡ wär hin-ənşen kərəđät timađ n-ärriyal n-azrəf əmoosnen takute i-tiläqqiwen.»

⁶ Innä a-wen wädden däḡ-a-s innin ozar däḡ-a əjrəwnät tiläqqiwen, änn-ak fäl-a-s innin emäkräđ a əmoos, ənta a-s änazraf n-taggayt ta n-inalkimän n-Ḳisa, a ätwäjjän däḡ-əssəndoqq wa n-azrəf-däḡ, ad-där-s in-işləy.

⁷ Inn'-asän Ḳisa: «Äkfät-tät älḡafyät, a-wa təja, təj'-e däḡ-təssəba n-aşäl wa d-mad-əjjəşäḡ azəkka.

⁸ Tiläqqiwen ya, əllanät ɣur-wän härkuk mäşan näkk, ilkam ad-käwän-äfläḡ.»

Utär n-iji n-iman n-Lazar

⁹ İslän käl-Älyähud äjjootnen a-s iha Ḳisa taḡrəmt ta n-Bitanya ɣas, fälän-dd Yărussälam, əkkän-t-dd mäşan, wädden ənta ɣas a-s otasän ahänay-net, ərhan daḡ, ad-ənhəyän Lazar wa dd-issənkär jer-inəmmuttan,

¹⁰ äxtäsän imänokalän n-käl-tikutawen s-ad-əjən iman n-Lazar ənta-däḡ

¹¹ ed hannäyän a-s, däḡ-təssəba n-asənkär wa t-dd-ija Ḳisa jer-inəmmuttan a fäl, taqqälän imänokalän n-käl-Älyähud äjjootnen darät käl-tikutawen, timənən s-Ḳisa.

Ujəş n-Ḳisa i-Yărussälam (Mätti 21:1-11; Marqəs 11:1-11; Luqa 19:28-40)

12 Äffaw ɣas, tɔslä tamɔtte ta täjjet dd-tökkät ämudd a-s ʒisa ikkä-dd ʒärußälam.

13 Ejjäšan-tät isälan ɣas, ad-dd-ɣattäsän äddinät iləktan n-tišday, lakkädän-as, säɣären s-afälla:

«Ozana! Ija Mässinäɣ älbäraka
däɣ-ämänokal wa n-Işrayil
dd-osän fäll-isəm n-Emäli.»

14 Ijräw ʒisa äza iyyän däɣ-zäbo, inäy-t, ämoos a-wen a ässitbätän a-wa iktäbän däɣ-əlkəttab n-Mässinäɣ a-s innä:

15 «ʒärußälam ta däyät fäll-taɣəxt ta n-Sayon,
wär tärmeyäd, ənhəy ɣas ämänokal-näm
imal-dd inay ara n-teşedt.»

16 Äşäl wa d-jän härätän-winnin-däɣ, wär tän-əfhemän inəttulab n-ʒisa mäšan, äşäl wa d-ijjäş təmyäre n-älxurmät-net, əktän-dd a-s ənta-en-däɣ a fäl əktäbän ännäbitän härätän-win-däɣ, ämeşäl-tän day.

17 Äşäl-wen-däɣ, täsoyäl tamɔtte iket-net a-wa ijä ʒisa ed, täjjəyha a-s dd-issənkär Lazar jer-inəmmuttan, ikkäs-t-dd däɣ-azəkka.

18 Təlkäd-dd tamɔtte-en iket-net i-ʒisa däɣ-təssəba n-iji n-Mässinäɣ wa däɣ s-təslä ij'-e.

19 Eñhäyän käl-faris a-wen ɣas, änmännän jer-iman-näsän: «Tənhäyäm ämära a-s a-wa wädden a dd-nəkka d-härät, tamɔtte iket-däɣ-net a ɟara-s toşälät.»

Äsdärhänän käl-Älyunan iyyäd ahänay n-ʒisa

20 Osän-dd härät däɣ-käl-Älyunan† s-ijraz äddin wa n-käl-Älyähud, əkkan-dd daw-ämudd-i-däɣ i-ad-äɣbədän Mässinäɣ däɣ-ʒärußälam,

21 əjräwän änättalib wa s-isəm-net Fəlibb wa n-tayrəmt ta n-Bätsäyda ta n-Galila, ənnän-as: «Ähaləs, närha ad-nənhəy ʒisa.»

22 Iglä Fəlibb, ija isälan däɣ-Idris, äddewän issənän-essän s-ʒisa, əlläyen-as.

23 Ewwädän-dd ʒisa ɣas, inn'-asän: «Ässaɣät wa däɣ-mad-ijjəş Ägg-ägg-adəm älxurmät-net, osä-dd.

24 Älleyəɣ-awän s-tidət tädduuttet† a-s a tökkäs temätəwt n-älkäma wär tənbel däɣ-əkall tämmät, ad-tämoos tiyyät tablalt ɣas mäšan, afäl tənbal däɣ-əkall har tämmut, a dd-tarəw tiblalen äjjootnen.

25 Ere wa wärän itəttär ar əmmək s-ijmār iman-net däɣ-äddunya-ta-däɣ, ad-ifut däɣ-älzännät, mäšan, äwadəm wa irdän äfota däɣ-iman-net, däɣ-äddunya-ta-däɣ, däɣ-äddimmät-nin, ad-ijrəw tämudre ta täxlälät.

26 Ere däɣ-wän irhän tumast n-änaxdim-in-däɣ adiş, ilkəmet-ahi fäl-a-s, näkk edägg wa däɣ-mad-əzzäɣə, ənta day a däɣ-mad-izzäy änanaxdim-in, ijrəw semɣar ɣur-Abba.»

Äloläy ʒisa däɣ-isälan n-tamättant-net

27 «Äryän iman-in, äryän ämära-däɣ, ak ma he-ännäy fäw? Abba, äɣləs-ahi däɣ-ässaɣät-wa-däɣ? Fäw, näkk, əssanäy a-s təssəba n-ässaɣät-wa-däɣ a fäl dd-ämeşäläɣ.

28 Abba, səkən äddinät təmyäre n-älxurmät n-isəm-näk.» Ifäl-dd emäslä älwäqq-wen-däɣ išənnawän innän:

«Isəm-in, əssəmyäräɣ-t,

† 12:20 12:20 Itawann'-asän: Gəriktän. (Les Grecs däɣ-Təfränsit). Ezzayän Erobbä däɣ-əkall wa itawänna: Gəris (La Grèce däɣ-Təfränsit). Tawalt-näsän: Tälyunanit. † 12:24 12:24 Däɣ-Tälyunanit: Amin, amin (S-tidət, tidət).

ad-t-alösäy day asəmyar.»

²⁹ Təslä tamətte ta t-təllät dihen i-eməsli-ənnin-däx ɣas, innä aɣil-net iyyän: «Ak salläm i-ejjaj wa ijjäjän?» Inna aɣil wa iyyädän: «A-di wädden ejjaj, änjälos a has-imməjrädän.»

³⁰ Inn'-asän Ƴisa day: «Eməsli wa s-iket has-təsläm, wädden təssəba-nin a däx-ija, təssəba-näwän käwäneḍ a däx-ija.

³¹ Īlmədät a-s ämära-däx, ad-mad-tətwəšärräx äddunya, itwəstäx day ämänokal-net Iblis,

³² näkk day, afäl əmməḍkäläx, ad-dd-äxräx s-iman-in äddinät iket-näsän.»

³³ Innä a-wen-däx i-ad-tän-isəlməd əmmək wa s-mad-ämmät.

³⁴ Tənn'-as tamətte: «Ajän wädden näxra däx-Ätṭäwrät a-s Älmasex, wär-e ämmät, iɣlal, adiš ma käy-isawännen: «Ägg-ägg-adəm, ad-ämmäḍkäl?» Wa Ägg-ägg-adəm fäl wär nəssen madän-ämmäḍkäl, mi ämoos?»

³⁵ Inn'-asän Ƴisa: «Ännur, wär has-in-äqqima ar a əndärrän ill'-e jere-wän, äsimätäräx-käwän d-ad-has-təlkəmäm i-ad-wär käwän-ɣäddärnet tihay fäl-a-s, ere irjašän däx-tihay, wär-issen e-s ihäl.

³⁶ Iket-di təzzegäzäm a-wen, a ikkäs ännur ill'-e jere-wän, amənät sār-s i-ad-tumasäm dägg-ännur.» Innä Ƴisa a-wen ɣas, ifäl tamətte, iffär.

Täxart n-ulhawän n-tamətte

³⁷ Ija Ƴisa data-sän ijitän n-Mässinäx-i-däx äjjootnen mäšan, unjäyän sār-s omänän,

³⁸ ämoos a-wen a ässiitbätän mäjräd wa ikfä Mässinäx ännäbi Saya† a-s innä däx-əlkəttab n-Mässinäx:

«Emäli, mi omänän s-a-wa nənna?

Mi s-dd-tänfaläl tärna n-äfuss n-Emäli?»

³⁹ Aqqurän ulhawän n-käl-Işrayil fäl-a-s, innä ännäbi Saya day:

⁴⁰ «Äsdäryäl-tän Mässinäx,

äsɣär ulhawän-näsän i-ad-wär hənnəyän s-tiṭṭawen-näsän,

əjrähän härät s-ulhawän-näsän,

utabän i-ad-tän-izuzəy Mässinäx.»

⁴¹ Mäjräd-wen-däx, ij'-e ännäbi Saya äzzäman wa d-has-dd-änfaläl älxurmät n-Ƴisa, ädwännät däx-isälan-net.

⁴² Hakd a-wen-däx, omänän imizärän n-käl-Älyähud äjjootnen s-Ƴisa mäšan, təgdal-asän tuksəḍa n-käl-faris ad-sətbətän immun-näsän, fäl-a-s äksuḍän ad-tän-əkkəsän däx-ihənan n-äddin-näsän,

⁴³ äsofän təmmal ta dd-fälät dägg-adəm uhən ta n-Mässinäx.

Ƴisa Älmasex a-s ilkam ad-işräx dägg-adəm

⁴⁴ İḍkäl Ƴisa eməsli-net, innä: «Ere sār-i omänän-däx, ilmədet a-s wädden näkk a-s omän, Mässinäx-i hi-dd-äšmašälän a-s omän,

⁴⁵ ere day wa hi-inhäyän, ilmədet a-s Mässinäx-i hi-dd-äšmašälän a inhäy.

⁴⁶ Näkk a-s ännur, ämešäläx-dd s-äddunya däx-təssəba n-ad-wär-itəzzäx fäw ere sār-i omanän däx-tihay,

⁴⁷ ere islän i-mäjräd-in wär t-iṭṭef, wädden näkk a t-madän-işräx fäl-a-s, wär dd-ämešäläx i-ad-əşräxäx äddunya, änn-ak, ämešäläx-dd i-ad-tät-äɣləsäx.

† 12:38 12:38 A-wa ännäbi dd-äzzarän i-Ƴisa, äloläy däx-isälan-net əssayät timaḍ n-awätay dat-tiwit-net.

⁴⁸ Ere sār-i unjāyān, unjāy s-mājrād-in, mājrād-en-dāy a t-e-išrāyān ašāl wa ilkāmān

⁴⁹ fāl-a-s, mājrād wa jey iket-net, wādden a dd-əkkašāy dāy-eyāf-in ɣas, Abba-nin ənta iman-net-i hi-dd-āšmašālān a hi-ikfān turhajāt n-ad-ānnāy a-wa hi-inna, ājāy dāy isālan-net i-āddināt.

⁵⁰ Əssanāy dāy a-s e d t-illām āwadəm ilkamān i-a-wa innā, ad-ijrəw tāmudre ta tāylālāt. A-wen-dāy a fāl nākk, a-wa jānney iket-net, jānney-tān s-əmmək wa s-hi-tān-innā Abba.»

13

Ässerād Ƴisa iɖarān n-inəttulab-net

¹ Ehād wa n-dat-wa n-āmudd wa n-Faška, ilmād Ƴisa s-āssaɣāt n-ajmuɖ-net i-āddunya i-ad-akk Abba, iwwād-dd. Ehād-en-dāy, issəmdā-dd təmyāre n-tārha-net s-inəttulab-net, issəkn'-en tārha tokāyāt ta tān-isakna hak ašāl a ija a-wa-dāy.

² Hārwa tamānsawān a-s ija Iblis dāy-ulh n-Yāhudəs Ägg Simyon wa n-Isxaryut erk ənniyāt wa n-ad-isāyɖār Ƴisa.

³ Dāy-təlluləya-net, issan Ƴisa a-s wār t-illa a-s wādden ij'-e Abba-net dāy-ifassān-net, issan dāy a-s Māssināy-i t-dd-āšmašālān, ənta a iqqal.

⁴ Əssəmdān tetāte ɣas, ibdād Ƴisa, ikkās emāls-net, iɖkāl-dd ekāršāy iyyān, ijbās sār-s,

⁵ ija ɖarāt-a-wen aman dāy-tazāwat, ad-isarad iɖarān n-inəttulab-net, itiməs-tān s-ekāršāy wa s-ijbās.

⁶ Iwwād-dd āssaɣāt wa n-asirəd n-iɖarān n-Simyon Bətrus ɣas, iggād inna i-Ƴisa: «Xāša Älyalim! Nākk a iwar asirəd n-iɖarān-nāk wādden kāyy.»

⁷ Inn'-as Ƴisa: «A-wa hi-išlān, wār mad-təjrāhād älmāyāna-net ämāra-dāy māšan, ilkam ad-t-təfhəməd.»

⁸ Inn'-as Bətrus älwāqq-wen: «Kāla kāla Älyalim, nākk lab wār-ilkem ad-ärɖey tāsserādād iɖarān-in.» Inn'-as Ƴisa: «Afāl wār-ässerādāy iɖarān-nāk, wār hak t-illa ad-nahār.»

⁹ Innā Simyon Bətrus: «Adiš Älyalim, wār təbdeɖād ɣur-iɖarān-in ɣas, sirəd dāy eyāf-in hakd ifassān-in.»

¹⁰ Inn'-as Ƴisa: «Wādden ere ässerādān telāmākt-net, wār-ämɣatār s-ad-aləs asirəd dāy kunta wādden iɖarān-net ed, šāddij iket-net, kāwāneɖ, a-s təkkašām iyyān dāy-wān, šāddijām.»

¹¹ Mājrād-wen-dāy, ij'-e Ƴisa ed, issan ere wa t-madān-isəssāyɖār. Dāy-təssəba n-a-wen-dāy a fāl hasān-innā iyyān dāy-sān, wār šāddij.

¹² Ässerād iɖarān-nāsān ɣas, ils' emāls-net, iqqāl-dd, äqqima dāy-edāgg wa n-imənsiwān, inn'-asān: «Ak, kāwāneɖ, təfhāmām a-wa s-iket hawān-t-jey mey?»

¹³ Wādden a hi-jannem: <Älyalim d-Emāli,> ikna ed a-wen-dāy a ämoosāy

¹⁴ ɣas, šāmad nākk-i n-Emāli d-älyalim, ässerādāy iɖarān-nāwān, adiš kāwāneɖ-dāy, iwar-kāwān ad-tinməsiridām iɖarān jer-iman-nāwān;

¹⁵ əssəknāy-kāwān älmital he-tinməjjim jer-iman-nāwān s-əmmək-wa-dāy s-hawān-t-jey.

¹⁶ Älleyey-awān s-tidət tādduuttet† a-s wār t-illa akli ojarān māssi-s, wāla ānāmāšal ojarān ere wa t-āšmašālān.

† 13:16 13:16 Dāy-Tälyunanit: Amin, amin (S-tidət, tidət).

17 Təndəḍ-awān kunta tössanām s-härätän-wi-däx, ad-tän-tamaşalām.

18 A-wa hawān-jannex, wādden iket-nāwān a fāl t-jannex fāl-a-s näkk, əzzayāx inəṭṭulab-in wi əsnāfrānāx, əməra, məjrād n-Mässināx a madän-isətbət a-wen ed, iktab dəx-s a-s:

<Wa dār-i ohārān ākoss, ənta a-s ašanjo-nin.>

19 Əkkasāx-kāwān dəx-taydārt n-härätän-wi-däx härwa wār-ətbətän dəx-tössəba n-a-s afäl jän, ad-tamənām a-s: <Näkk, əxlaləx>.

20 Əllexəx-awān s-tidət tədduuttet a-s ere əsbärräkän ere hin-əsiməşäləx, a əmoos-däx, näkk a əsbärräk, ere dəx wa hi-əsbärräkän, Wa hi-dd-əşməşälän a əsbärräk.»

Əloläy Ƴisa dəx-isälan n-əmaydar-net
(Mätti 26:20-25; Marqəs 14:17-21; Luqa 22:21-23)

21 A-s issəmda Ƴisa məjrād-wa-däx, əkman-t iman-net, inn'-asän: «Əllexəx-awān s-tidət tədduuttet a-s iyyän dəx-wän a hi-madän-isəssəxdär.»

22 Əslän inəṭṭulab i-a-wen xas, ad-tinməkyidän, tinməsəstinän d-ere wa s-iha ti-net.

23 A-s itəjj a-wen-däx, əsixāmār ənəṭṭalib wa ikna Ƴisa tārha edes-has,

24 inzāj-as Simyon Bəṭrus tiṭṭ, inn'-as, ad-isəstən Ƴisa d-ere wa s-iha ti-net.

25 Əsmätäktäk ənəṭṭalib-en i-Ƴisa, inn'-as: «Əlxalim, mi kəy-madän-isəssəxdär?»

26 Inn'-as Ƴisa: «Ere wa s-mad-səlməxəx afärs n-tajəlla dəx-ədrəz, ənta-en-däx a hi-madän-isəssəxdär.» Issəlməx Ƴisa afärs n-tajəlla dəx-ədrəz, ikf'-e Yəhudəs wa s-itawänna Isxaryut n-əgg Simyon.

27 Diha-däx d-irməs Yəhudəs afärs n-tajəlla-ənnin-däx, ad-innähəḍ Iblis dəx-ulh-net, inn'-as Ƴisa əlwəqq-wen: «Yəhudəs! A-wa təjjäd, əj'-e şik.»

28 İjä Ƴisa i-Yəhudəs məjrād-wen-däx məşan, wār t-illa dəx-inəṭṭulab-net wi iyyəḍnen əsiixāmärnen dəx-isəftəx i ifhamän a-wa innä,

29 əxelän a has-innä: «Zänş-dd a-wa s-nəmiḡatär i-əmudd wa n-Faşka» mex «Əkf härät tiləqqiwen» fäl-a-s, ənta a-s ənəzraf-nəsän.

30 İrməs-dd Yəhudəs afärs n-tajəlla wa has-dd-izzäl Ƴisa xas, izjār. İsälan-wi-däx, ehəḍ a-s tājjan.

Aləmār wa əynayän ikfä Ƴisa inəṭṭulab-net

31 Izjār Yəhudəs xas, innä Ƴisa i-inəṭṭulab-net: «Əməra-däx ad-mad-itwəsəmxār Əgg-əgg-adəm, itwəsəmxār dəx Mässināx dəx-tössəba-net,

32 əkf Əgg-əgg-adəm əlxurmät xur-iman-net, əkf'-as-t dəx şik.

33 İlyadən-in, wār-e əhajəx əllex jere-wän, əssanəx a-s ilkam ad-hi-təmməxām məşan, ənnex-awān a-wa s-käla tän-ənnex i-käl-Əlyəhud wi iyyəḍnen: <Edəgg wa əkkex, wār mad-tudabem əggaḍ-net>.

34 Əməra, ənta-da fərəḍ wa əynayän əfradəx fälla-wän: <Nəməjjät jer-iman-nāwän anmārḡ şund wa hawān-jex, nəmərhät jer-iman-nāwän,

35 anmārḡ jer-iman-nāwän en-däx a he-isəlmədän əddinät a-s tidət-däx a-s inəṭṭulab-in a təmoosəm.> »

Əloläy Ƴisa dəx-isälan n-akuddəl wa t-e-əj Bəṭrus
(Mätti 26:31-35; Marqəs 14:27-31; Luqa 22:31-34)

36 İssəmdä Ƴisa məjrād-wen-däx xas, iggäd-dd Simyon Bəṭrus, innä: «Əlxalim, əndek siha s-təkkeḍ?» Inn'-as Ƴisa: «Edəgg wa əkkex, wār

täddobed ad-hi-sär-s төлкөмäd ämära-däx mäšan, ilkam däx-k ad-hi-dd-tawəäd däx-s.»

³⁷ Inn'-as Bətrus: «Älyalim, mafäl wär-äddobex alkum-hak ämära-däx? Äddobex-t, näkk, äsidäwäx wäla i-tamättant däx-tössəba-näk.»

³⁸ Inn'-as Yisa: «Wädden tənned täsidäwäd wäla i-tamättant däx-tössəba-nin? Ikna mäšan, äsidätteḡ-ak a-s, wär-e iwət ekäz äḡora wär hi-täkkuddäläd har käraḡ ihändäggan.»

14

Yisa Älmaseḡ a-s tabarät ta tiḡədät s-Mässinäx

¹ Inn'-asän Yisa ḡarät-a-wen: «Wär rammäḡnet ulhawän-näwän, amənät s-Mässinäx, amənät sär-i,

² ehän n-Abba-nin, han-t idäggan äjjootnen, ənnär wär-itbet a-wen, wär hawän-jənnex əḡley i-ad-hawän-səmməjnux edägg,

³ afäl əḡley har hawän-äsmäjnex edägg, ad-käwän-dd-äqqələx, əḡkələx-käwän, təmləm diha t-əlleḡ.

⁴ Edägg daḡ wa əkkeḡ, tössanäm tabarät-net.»

⁵ Iggäd-dd änätḡalib wa s-isəm-net Tomi, inn'-as: «Älyalim, näkkäneḡ lab, wär nəssen siha s-təkkeḡ, əndek əmmək wa s-mad-nəlməd tabarät-net?»

⁶ Inn'-as Yisa: «Näkk a-s tabarät, näkk a-s tidət, näkk daḡ a-s tämudre, wär t-illa fäw ere äddooben aggaḡ n-Abba ar s-ad-hi-ija əssəbab n-a-wen.

⁷ Šämad daḡ näkk təzzayäm-ahi, ad-təzzəyäm Abba-nin, šämad təzzayäm-t, adiš, tənḡayäm-t.»

⁸ Iggäd-dd wa s-isəm-net Fəlibb, inn'-as: «Älyalim, səkən-anäx ḡas Abba, igdäh-anäx a-wen-däx.»

⁹ Inn'-as Yisa: «ḡas Fəlibb, a-wa-däx jeḡ iket-net ärtayäx där-wän, wär hi-təzzəyäd? Wa hi-inḡayän, inḡay Abba, ḡas əndek əmmək wa s-jänned: <säkən-anäx Abba>.

¹⁰ Ajän wär tomenäd a-s näkk ärtayäx d-Abba, irtay där-i daḡ ənta, heeḡ-t, ih'-ahi? A-wen-däx a fäl iməjridän wi hawän-täjjäx, wädden a dd-əkkaḡ däx-əḡäf-in ḡas, Abba-i där-i irtayän a ämoosän əssəbab n-ijitän wi tamašaläx iket-näsän.

¹¹ Amənät a-s näkk ärtayäx d-Abba, irtay där-i daḡ ənta, heeḡ-t, ih'-ahi. Kunta daḡ wär tomenäm s-mäjräd-in, amənät bännan s-ijitän-wi tamašaläx.

¹² Älleḡex-awän s-tidət tädduuttet† a-s ere sär-i omänän-däx, ad-äj ənta-däx ijitän-wi jeḡ, äj fäw-i tän-əknanen mijraw ed näkk, əkkeḡ Abba.

¹³ A-wen-däx a fäl a töttäräm-däx s-isəm-in, ad-t-äjäḡ i-ad-ijrəw Abba älxurmät däx-tössəba n-Rure-s.

¹⁴ A töttäräm-däx s-isəm-in, ad-hawän-t-äjäḡ.»

Unfas wa s-ilkam ad t-dd-isəssiwəy Mässinäx

¹⁵ «Kunta tidət-däx a-s tärham-ahi adiš, əḡḡəfät färəḡän-in,

¹⁶ ad-hawän-ädələx Abba i-ad-käwän-äkf änabdid iyyän ḡur-wän e-illan härkuk,

¹⁷ ənta a-s Unfas wa s-tidət ḡas a t-dd-zajjärät, wär täddoobät äddunya ad-t-täqḡəl fäl-a-s wär täddobät ahänay-net wäla muzəyät-net mäšan, käwänəḡ, təzzayäm-t ed äheräj där-wän, izzaḡ daḡ däx-ulhawän-näwän.

¹⁸ Wär käwän-mad-äyyäḡ täjohäläm, ad-käwän-dd-äqqələx,

† 14:12 14:12 Däx-Tälyunanit: Amin, amin (S-tidət, tidət).

¹⁹ äqqim-in a ɛndärrän i-ad-äbas hi-hannäy äddunya mäšan käwäneḍ, a hi-hannäyäm fäl-a-s, ɛddaräx, tɛddaräm.

²⁰ Ašäl-wen-däx ad-mad-təlmədäm a-s näkk ärtayäx d-Abba, tärtayäm dār-i käwäneḍ, ärtayäx dār-wän day näkk.

²¹ Ere wa iknän uḍəf n-färəḍän-in, ɛnta a-s emärh-in, ere day wa hi-irhän, ad-t-ärh Abba-nin, ärhäx-t näkk-däx, sənnəfilələx-as-dd day iman-in.»

²² Inn'-as änätṭalib wa s-isəm-net Hudd izleyän d-Yähudəs wa n-Isxaryut: «Älxalim, ɛndek ɛmmək wa s-mad-hanäx-dd-sənnəfilələd iman-näk wär tän-dd-täsnäfaläläd i-äddunya?»

²³ Inn'-as ʃisa: «Ere hi-irhan, ad-agəz mäjräd-in, dihen, ad-t-ärh Abba-nin, nidaw-dd sār-s, nəzzäx ɣur-s.

²⁴ Ere wa hi-wärän-irha, wär mad-itṭəf mäjräd-in. Mäjräd wa s-təsläm ɣur-i, wädden a dd-əkkasäx däx-eḡäf-in ɣas, Abba-nin-i hi-dd-äšmašälän ahi-ikfän turhajät n-tənna-net.

²⁵ ʃas, əkkasäx-käwän däx-tayḍärt härwa ɔllex jere-wän,

²⁶ änabdid day wa s-hawän-ənney, a t-ämoosän Unfas Šaddijän, ad-hawän-t-dd-isəssiwəy Abba s-isəm-in, afäl hawän-t-dd-ässawäy, ad-käwän-isäxär härät iket-net, isəktəw-käwän-dda-wa hawän-ənney iket-net.

²⁷ Ämära, oyyex ɣur-wän älxer, älxer day wa s-näkk ɣas a t-ihakkän a ɣur-wän oyyex ed näkk, isuf-wi hawän-täjjäx, wär-olehän d-wi hawän-täjj äddunya, wär täšawwašnet ulhawän-näwän, wär rämmäxät.

²⁸ Wädden, salläm-ahi a-s hawän-ənney: «Egley däx-təssəba n-ad-käwän-dd-äqqələx», ɣas ɛnnär hi-tärham, ijreḡ-awän a-wa hawän-ənney ed Abba-i əkkeḡ, ojar-ahi.

²⁹ Härätän-wi-däx, janney-awän-tän ämära-däx i-ad-käwän-əkkəsäx däx-tayḍärt härwa wär jen, dihen afäl jän, ad-tamənäm sār-i.

³⁰ Igdäh däx-mäjräd diha-däx ämära fäl-a-s, Iblis-i n-ämänokal n-äddunya, imal-dd. Elmədät a-s wär fäll-i ila tärna

³¹ mäšan, ärheḡ ad-təlməd äddunya a-s näkk ärheḡ Abba, wär təmišiläx day ɣas ar erhet-net. Ənkärät ämära, äflät-anäx edägg-wa-däx.»

15

ʃisa a-s ahəšk wa däx-ärmamän imumənän

¹ Fälän dihen ɣas, inn'-asän ʃisa: «Näkk a-s ahəšk n-läxnäb wa n-tidət, Abba-nin a-s änäsdamu.

² Käwäneḍ a-s iləktan n-ahəšk, e d t-illäm eläkät däx-i irmamän wärän itirəw, ad-t-in-ixtəs Abba-nin, eläkät day iket-net itirəwän aratan, ad-hin-isrəmsərəm iləḍan-net, išəšdəj-t i-ad-dd-arəw aratan s-əjut.

³ ʃur-ämära-däx, əlmədät a-s šaddijäm däx-təssəba n-asəssäxär wa käwän-jex.

⁴ A-wen-däx a fäl ɣaymät tärtayäm dār-i s-əmmək wa s-dār-wän ärtayäx. Wär t-illa eläkät äddooben tiirwe d-iman-net afäl wär-irmem d-tafäja, əmmək-wen-däx day a-s wär t-illa a iha ärramät s-täddobem amišəl-net i-Mässinäx ar s-ad-dār-i tärtayäm.

⁵ Ässiilmädäx-käwän a-s näkk a-s tafäja n-ahəšk n-läxnäb, käwäneḍ a-s iləktan-net. Ere wa dār-i irtayän, ärtayäx dār-s näkk-däx, ad-ämašäl i-Mässinäx a iha ärramät fäl-a-s, wär t-illa a-s täddobem iji-net wäla näkk.

⁶ Ere dār-i wärän irtey iket-net, ad-hin-itwäxtəs, itwəjar-in šund eläkät äqqurän s-afäl hin-ätwäjär däx-efew, ad-ärḡ s-iyiyät mäšan,

7 afäl näkk a ihan inəzjam-nāwān, ad-dār-i tärtayām, tamašalām mājrad-in, a təttārām dāḡ-Māssināḡ-dāḡ, ad-hawān-t-ākf.

8 Afäl inəṭṭulab tamašalnen a iha ārramāt i-Māssināḡ a tāmoosām, ad-hawān-dd-isənnifiləl a-wen ālxurmāt n-Abba-nin.

9 Tārha ta-hi ija Abba, ənta a hawān-jeḡ näkk-dāḡ; əṭṭəfāt tārha-nin, təzzāḡām dāḡ-s.

10 Tārha-nin daḡ, wār tāt-mad-təṭṭəfām ar s-ad-təṭṭafām fārəḡān-in s-əmmək wa s-əṭṭafāḡ fārəḡān n-Abba-nin, əlkamāḡ i-tārha-net, əzzaḡāḡ dāḡ-s.»

Āsmadāw Yisa inəṭṭulab-net d-iman-net

11 «Mājrad-wa-dāḡ hawān-jeḡ, jeḡ-awān-t dāḡ-təssəba n-ad-təjəm tedāwit šund ta jeḡ, təjəm daḡ tedāwit təmdat.

12 Āmāra, ənta da fārəḡ wa kāwān-āsiwārāḡ: <Nəmārhat jer-iman-nāwān s-əmmək-wa-dāḡ s-kāwān-ārheḡ>.

13 Wār t-təlla tārha tojārāt ad-ākf āwadəm iman-net dāḡ-təssəba n-imidiwān-net,

14 afäl tamašalām a-wa fälla-wān əfrādāḡ, ad-kāwān-ḡarrāḡ s-isəm: <imidiwān-in>.

15 ad-ābas kāwān-jeḡ eklan-in ed akli, wār dāḡ-s itəjj māssi-s isālan-net, ānn-ak, ad-tumasām imidiwān-in fāl-a-s, a-wa s-əsleḡ ḡur-Abba-nin iket-net, əssəlmādāḡ-awān-t.

16 Wādden kāwāneḡ a hi-āsnāfrānān, näkk a kāwān-āsnāfrānān, āḡreḡ-kāwān-dd i-ad-tamašalām a iha ārramāt i-Māssināḡ, umasnāt timašalennāwān a iḡlalān. Afäl jām a-wen, a təttārām dāḡ Abba-nin s-isəm-in, ad-hawān-t-ākf.

17 Ēnta da a-wa s-kāwān-omarāḡ: <Nəmārhat jer-iman-nāwān.> »

Āddunya, tašānjot n-ālmāssexitān

18 «Kunta tokāḡ dār-wān āddunya, əlmədāt a-s tokāḡ dār-i data-wān,

19 ənnār tāmoosām āddināt āttilālnen a-wa fäll-təḡl' āddunya, wār kāwān-kəssən. Āssiilmādāḡ-kāwān a-s wār kāwān-təla āddunya, tokāḡ dār-wān daḡ dāḡ-təssəba n-a-wa s-kāwān-āsnāfrānāḡ.

20 ḡaymāt dd-kittəwām mājrad wa s-kāla hawān-t-jeḡ a-s hawān-ənnəḡ: <Wār t-illa akli ojarān māssi-s.> Kunta, tāqquzābāt-ahi āddunya-ta-dāḡ, adiš ad-kāwān-tāqquzəbət kāwāneḡ-dāḡ, kunta daḡ təsjād i-mājrad-in, adiš, ad-hawān-səjəd kāwāneḡ-dāḡ

21 māšan, əlmədāt a-s wār hawān-mad-səjdən āddināt, ānn-ak, āḡizabāt a kāwān-e-səknən dāḡ-təssəba-nin ed, wār-əzzeyān ere wa hi-dd-āšmašālān.

22 Ēnnār wār dd-oseḡ i-ad-hasān-ājāḡ isālan, iket-di, wār tən-itəwwer abākkaḡ māšan, āmāra-dāḡ d-hasān-jeḡ isālan, ābas hasān-t-illa āsaru injārān ibākkaḡān-nāsān.

23 Ere wa dār-i okāḡān, okāḡ daḡ d-Abba-nin.

24 Ēnnār wār jere-sān jeḡ ijitān n-Māssināḡ s-kāla wār tən-ija āwadəm dat-i, āqqaymən wār tən-iwer abākkaḡ, māšan āmāra-dāḡ, d-ənhāyān ijitān n-Māssināḡ wi jeḡ dat-tiṭṭawen-nāsān, okāḡān dār-i näkk hakd Abba-nin.

25 Hakd a-wen-dāḡ, mikḡaw-nāsān dār-i, i n-təssəba n-ad-itbat mājrad n-Māssināḡ wa iktābān dāḡ-ālāmār-nāsān a-s tən-iytāl, inn'-asān: <Okāḡān dār-i dāḡḡ-adəm bānnan baṭilān.>

26 Afäl hawān-dd-āssawāyāḡ ānabdīd wa t-illan ḡur-Abba, ənta-i n-Unfas wa wār dd-zəjjār ar tidət ta dd-fālāt Abba, ad-hawān-āj isālan-in,

27 tumasäm tjuhawen-in fäl-a-s, käwäneḍ-i-däḡ a-s wi s-a əssəntäḡ ämašal-in har näkk-da-däḡ, täddewäm där-i.»

16

Ilkam älyizabät

1 «Jeḡ däḡ-wän isälan-wi-däḡ i-ad-wär tinməšrəyäm.

2 Ilkam ad-hawän-əgdälän käl-Älyähud ämudd däḡ-ihānan n-äddin-näsän, ilkam fäw äzzāman s-āwadəm inḡän iyyän däḡ-wän, ad-iḡal teḡse a ikät i-Mässinäḡ.

3 Ad-əjən a-wen ed wär hi-əzzeyän näkk wäla Abba.

4 Əlläḡeḡ-awän härwa ämära, däḡ-təssəba n-a-s afäl dd-əwwäḍän härätän-win-däḡ, ad-dd-təktəwäm a-s älleḡeḡ-awän sār-sän härwa wär jen, wär hawän sār-sän əlläḡeḡ äru ed a-s ija a-wen, ärtayäḡ där-wän mäšan

5 ämära-däḡ d-ässawäḍäḡ uḡəl n-Wa hi-dd-äšmašälän, wär käwän-ihā-i hi-isastanän d-diha əkkeḡ

6 mäšan, äḡšadän ulhawän-näwän däḡ-təssəba n-a-wa hawän-ənneḡ.

7 Tidət a hawän-ənnəḡ, uf'-awän ad-äḡläḡ ed, afäl wär-əḡleḡ, wär mad-käwän-dd-ass änaḅdid, afäl əḡleḡ, ad-hawän-t-dd-sukäḡ.

8 Afäl dd-osa änaḅdid, ad-isəlməd a-s toška äddunya däḡ-a-wa ämoosän abäkkəḍ d-a-wa ämoosän iqqud d-a-wa ämoosän äššäreḡa n-Mässinäḡ;

9 ad-isəlməd äddinät a-s oškan däḡ-isälan n-ibäkkəḍän ed, wär sār-i omenän,

10 isəlməd-tän a-s oškan däḡ-isälan n-iqqud ed əkkeḡ Abba, wär-ilkem ad-hi-tənhayäm,

11 isəlməd-tän a-s oškan däḡ-isälan n-äššäreḡa ed Iblis-i n-ämānokāl n-äddunya, äššäreḡa-net, äru d-t-iḡtäs Mässinäḡ.

12 Leēḡ a äjjeen s-ärheḡ ad-hawän-t-ännäḡ mäšan, wär täddobem ujreh-net ämära-däḡ.

13 Afäl dd-osa Unfas wa wär dd-zəjjär ar tidət, ad-käwän-aḡəd däḡ-tidət iket-net fäl-a-s, wädden isälan n-iman-net a däḡ-e ämmäjräd, änn-ak, ad-äj isälan n-a-wa s-islä, älläḡät-awän härätän-wi dd-malənen.

14 Afäl dd-osa Unfas, ad-hi-isəməḡär fäl-a-s, ad-dd-irməs mäjräd-in, isuḡəl-awän-t.

15 A-wa ila Abba iket-net, i-nin, a-wen-däḡ a fäl hawän-ənneḡ, ad-dd-irməs mäjräd-in, isuḡəl-awän-t.»

Təssəkma tekle n-Ḳisa iman n-inəṭṭulab-net

16 «Äḡqima-hin a əndärrän i-ad-äbas hi-hannäyäm, akəy daḡ ässaḡät əndärrän, taləsäm-ahi ahānay.»

17 Əslän iyyäḍ däḡ-inəṭṭulab-net i-tifer-tin-däḡ ḡas, änmännän jer-iman-näsän: «Əndek älmäḡna n-mäjräd wa hanäḡ-ija a-s innä: <Äḡqima-hin a əndärrän i-ad-äbas hi-hannäyäm, akəy daḡ ässaḡät əndärrän, taləsäm-ahi ahānay.> Ma ämoos daḡ älmäḡna n-: <əkkeḡ Abba-nin> wa hanäḡ-innä?»

18 Änmännän daḡ: «Näkkäneḍ ya wär t-illa a nəfham, ma ämoos älmäḡna <n-älwäqq əndärrän> wa s-hanäḡ-ijänna.»

19 Ilmäḍ Ḳisa a-s ärhan ad-t-səstənän ḡas, inn'-asän: «Käwäneḍ, tinməssəstinäm härwa jer-iman-näwän däḡ-a-wa s-hawän-ənneḡ: <Äḡqima-hin a əndärrän i-ad-äbas hi-hannäyäm, akəy daḡ ässaḡät əndärrän, taləsäm-ahi ahānay.>

²⁰ Älleḡeḡ-awän s-tidöt tädduuttet† a-s ad-šorsöm, səkkəläläm, a-s ija a-wen äddunya ənta täsriiw, ad-äḡšədän iman-näwän mäšan, ad-dd-təšrøy tedäwit a-wen.

²¹ Wädden tamädt ed, täbok ajäraw n-eḡäf-net, ad-tazär hullan mäšan, afäl tøjräw eḡäf-net ad-hin-titaw tizzurt-net tənnin-däḡ iket-net, tisanant-net, ad-has-tät-in-sətəw tedäwit n-ara wa təkraš.

²² Emmək-wen-däḡ a-s käwäneḡ-däḡ ämära-däḡ, äḡšadän iman-näwän mäšan, ad-käwän-aləsäḡ ahänay, äddäwen ulhawän-näwän, əjön day tedäwit-ta-däḡ s-wär t-illa ere äddoben aḡäšad-net.

²³ Ašäl-wen d-hi-mad-tənhöyäm, wär mad-t-iməl fäw a-s tämiḡatäräm d-asəstan-in dār-s. Älleḡeḡ-awän s-tidöt tädduuttet a-s a təttäräm däḡ-Abba s-isəm-in, ad-hawän-t-äkf.

²⁴ Har ämära-däḡ, wär t-illa a däḡ-t-daläm s-isəm-in, ädölät-t ämära, ad-käwän-äkf a-wa däḡ-s təttäräm i-ad-sär-wän dd-təmdəw tedäwit.»

A əttärän imumənän däḡ-Mässinäḡ-däḡ, ad-hasän-t-äkf

²⁵ «A ija a-wa-däḡ, saḡlayäḡ-käwän tangalen, sinfäqqeḡ-awän härätän, mäšan, imal-dd älwäqq d-äbas hawän-e-tamäjrädäḡ s-tangalen, ašäl-en, ad-hawän-äjäḡ isälan n-Abba s-əmmək ässiifhämän.

²⁶ Ašäl-wen, wär mad-təmyütäräm s-ad-hawän-ädöläḡ Abba, ad-t-tədöləm käwäneḡ iman-näwän s-isəm-in

²⁷ fäl-a-s, Abba iman-net irh'-iwän ed tärham-ahi, tomanäm day a-s Mässinäḡ a dd-faläḡ.

²⁸ Ənta a hi-dd-äšmašälän s-äddunya ḡas, ämära, faläḡ-tät, äqqaläḡ-t ənta-i n-Abba.»

Ikräš Ḳisa ašäl fäll-äddunya

²⁹ Ənnän-as inəṡṡulab-net: «Näkkäneḡ iket nəjräh a-wa hanäḡ-janned ed, äbas hanäḡ-saḡlayäd tangalen, a-wa hanäḡ-janned ämära iket-net, il' ujh.

³⁰ Nəssan ämära a-s wär t-illa a-s wädden tössanäd-t, wär tämyütäräd s-ad-käy-isəstən äwadəm d-härät wäl' iyyän. Däḡ-tössəba n-a-wen-däḡ a fäl noman a-s käyy Mässinäḡ a dd-faläd.»

³¹ Inn'-asän Ḳisa: «Ak tənnäm tomanäm sār-i wädden?

³² Ikna mäšan, ässiilmädäḡ-käwän a-s imal-dd ässaḡät, ässaḡät day s-išwar dd-osa, ad-tämmähäšäm, ilal hak iyyän däḡ-wän tenere n-iman-net, təyyəm-ahi näkk ḡas mäšan, kud-hi-fäläm-däḡ, wär mad-äqqaymäḡ näkk ḡas ed, idhal-ahi Abba.

³³ Əkkäsäḡ-käwän däḡ-taydärt n-härätän-wi-däḡ i-ad-sär-i tamənäm, tøjräwäm älxer. Əlmədät a-s ad-tənhöyäm aḡäna däḡ-äddunya-ta-däḡ mäšan, wär käwän-isärməyet härät, əkräšäḡ ašäl fäll-äddunya.»

17

Tittar ti n-tinahäyen ija Ḳisa

¹ Ija Ḳisa isälan-win-däḡ ḡas, äjozäy išənnawän, innä: «Abba, täqqän ta hi-təkfed, täwwäḡ-dd, sətəbət təmyäre n-älxurmät n-Rure-k i-ad-isətəbət ənta-däḡ wa-näk

² fäl-a-s Rure-k, ənta a təkfed tärna fäll-e d t-illäm ägg-adəm i-ad-umas əssəbab wa ihäkkän tämudre ta täḡlälät i-äddinät wi t-tössäḡläfäd.

³ Tämudre-en, a tät-ämoosän: ad-käy-əzzöyän, käyy-i n-Mässinäḡ wa n-tidöt, əzzöyän Rure-k Ḳisa Älmasex wa dd-täšmašäläd.

† 16:20 16:20 Däḡ-Tälyunanit: Amin, amin (S-tidöt, tidöt).

4 Æsselmädäy s-älxurmät-näk fäll-ärori n-äkall, ässawäḍäy-in day ämašal wa hi-tössäyläfäd,

5 ämära Abba, iqqølet-ahi-dd älxurmät wa yur-k ley härwa wär dd-täxlek äddunya.

6 Däy-a-wa äkkäsäy hey äddunya-ta-däy, äsbayänäy-käy i-äddinät wi hi-dd-tohäyäd däy-s, tössäyläfäd-ahi-tän; käyy a tän-ilän mäšan, tækfed-ahi-tän day yas, ölkämän i-mäjräd-näk, øttäfän-t.

7 Äšäl-i, ölmädän a-s a-wa hi-tækfed iket-net, käyy a dd-ifal

8 fäl-a-s, a-wa hi-tønned iket-net, ønney-asän-t, äqbälän-t, ölmädän day a-s tidøt a-s käyy a dd-fäläy, øfläsän a-s käyy a hi-dd-äšmašälän.

9 Tøddaläy-käy hasän, wär käy-tøddiläy i-äddunya ta wärät sär-k tomen, tøddaläy-käy i-äddinät wi hi-täsnäfränäd fäl-a-s, äddinät-win-däy a-s wi-näk.

10 A-wa ley iket-net, i-näk, a-wa led day iket-net, i-nin; øntäneḍ-en-däy day sär-k omännen a däy-dd-änfaläl älxurmät-in.

11 Šämad näkk ämära, øzjaräy äddunya-ta-däy i-ad-käy-in-äkkäy, äqqaymøn däy-s øntäneḍ, øttaräy däy-k Abba Šäddijän, ad-tän-tagøzäd s-tärna n-isøm-näk wa hi-tækfed näkk-i n-Rure-k, i-ad-osayän s-ømmøk wa s-nosay näkk d-käyy.

12 Äzzäman wa äkkäsäy jere-sän, ogažäy-tän s-tärna n-isøm-näk, ogažäy-tän day iket-däy-näsän, jey ønniyät, wär tän-iha fäw-i hi-änimäšräyän a-s tökkäsäd wa n-ägg-ølhøllak i-ad-itbøt a-wa däy-äloläy ølkøttab.

13 Ämära, näkk-da-däy s-išwar käy-in-äqqaläy, tajjäy-asän mäjräd-wa-däy, däy-äddunya-ta-däy, i-ad-äddäwen s-tedäwit n-tänoflayt ta s-näkk yas a tät-ihakkän.

14 Æssäyläfäy-tän mäjräd-näk mäšan, täššunjät-tän äddunya ed, wär tän-tøla s-ømmøk wa s-wär hi-tøla näkk-i s-omänän.

15 Abba, wär däy-k tøttäräy ad-tän-tökkösäd däy-äddunya-ta-däy, änn-ak, tattäräy däy-k, ad-tän-tagøzäd däy-a-wa läbasän.

16 Wär tän-tøla äddunya-ta-däy s-ømmøk wa s-wär hi-tøla näkk-däy-i s-omänän.

17 Šøšdøj-tän s-mäjräd-näk ed mäjräd-näk a-s tidøt ta n-tidøt.

18 Äšimašäläy-tän s-äddunya s-ømmøk wa s-hi-dd-täšmašäläd sär-s,

19 näkk, hakkäy-käy iman-in däy-tössøba-näsän i-ad-käy-økfen iman-näsän øntäneḍ-däy, šøšdøj-tän s-tidøt-näk.

20 Wädden øntäneḍ-i-däy yas a fäl käy-tøddaläy, tøddaläy-käy day i-äddinät iket-däy-näsän wi s-ilkam ad-sär-k amönän däy-tössøba n-tajuhe-ta mad-øjøn fäll-i,

21 umasnet iket-däy-näsän iyyät tayøssa s-ømmøk wa s-nämoos näkk d-käyy iyyän, hey-käy, hed-ahi, umasnet øntäneḍ-däy iyyän där-näy i-ad-tøfløs äddunya a-s käyy a hi-dd-Äšmašälän.

22 Näkk day, älxurmät wa hi-tækfed, økfey-asän-t i-ad-osayän, ämoosän iyyän s-ømmøk wa s-nosay, nämoos näkk d-käyy, iyyän.

23 Tartit-ta där-k jey a där-sän jey näkk-däy i-ad-tumas tartit-näsän ti tømдат, tølmød day äddunya a-s käyy a hi-dd-äšmašälän, tølmød day a-s jed-asän tärha šund ta hi-jed.

24 Ættaräy däy-k Abba a-s edägg wa hi-tækfed, ähräyet-t yur-k day d-äddinät-wi hi-tækfed i-ad-øjjunfun øntäneḍ-däy, däy-älxurmät wa hi-tækfed ed, käyy tärha-ta hi-jed, jed-ahi-tät härwa wär dd-täxlek äddunya.

²⁵ Abba, käyy-i oḡādän, tunjäy äddunya-ta-däḡ s-ad-käy-təzzəy məšan näkk, əzzäyāḡ-käy, äddinät daḡ wi sār-i omännən, əflasän a-s käyy a hi-dd-äšmašälän;

²⁶ äzozäyāḡ-tän isəm-näk, ad-käy-aləsäḡ daḡ azuzi-hasän i-ad-təjjəš tārha-ta hi-jed ulhawän-näsän, äknäḡ tartit dār-sän.»

18

Atärməs n-Ḡisa

(Mätti 26:47-56; Marqəs 14:43-50; Luqa 22:47-53)

¹ Issəmda Ḡisa d-tittar-tin-däḡ ḡas, iglä ənta d-inəṭṭulab-net, əjläyän tasənjit ta s-itawänna ta n-šädrön, əjjäšän ammas n-ašəkrəš n-ihəškan ihan asälim n-aman,

² a-wen edägg s-issan Yähudəs-i t-madän-isəssäḡdär a-s itakk'-e-hi-dd Ḡisa d-inəṭṭulab-net.

³ Iha Ḡisa ammas n-ašəkrəš-en-däḡ a-s Yähudəs-da-däḡ äddew d-əssärdusa d-älgomitän n-ehän n-ämudd wa məqqārän dd-ässiglän imänokalän n-käl-tikutawen d-käl-faris äwwayän tiftəl d-imämmälän, əšlajän tikobawen.

⁴ Issan Ḡisa ḡur-iman-net a-wa has-iqqälän, izjār-dd sār-sän, inn'-asän: «Mi s-tammäḡäm?»

⁵ Ənnän-as: «Ḡisa wa n-Näširät.» Inn'-asän Ḡisa: «Näkk da.» Äddinät-en, ih'-en Yähudəs-i t-e-isəssäḡdärän.

⁶ Diha-däḡ d-hasän-innä: «Näkk da», issəkn'-en iman-net, ad-äškätaräšän, təwät-tän tarəmməḡt s-äkall älwäqq-wen-däḡ.

⁷ Oläs-tän asəstan, inn'-asän: «Ak käwänəḡ, mi s-tammäḡäm?» Ənnän-as daḡ: «Ḡisa wa-n Näširät.»

⁸ Inn'-asän: «Wädden ənnəḡ-awän: <Näkk da.> Kunta tidət-däḡ a-s näkk a-s təmmaḡäm adiš, äyyät inəṭṭulab-in ad-əglun.»

⁹ Ijä Ḡisa məjräd-wen-däḡ i-ad-umas a äsidätten a-wa s-käla tän-innä a-s innä: «Abba, wi hi-təkfed, wär däḡ-sän änmäšräy wäl' iyyän.»

¹⁰ Ilbäy-dd älwäqq-wen-däḡ Simyon wa s-itawänna Bəṭrus təkoba-net, iwät sār-s Malkus wa n-akli n-ämänokal n-käl-tikutawen, inkäḡ-dd taməzzujt-net ta n-aḡil.

¹¹ Iḡtäl Ḡisa Bəṭrus, inn'-as: «Suyəl təkoba-näk titar; wär t-illa əmmək s-unjäyāḡ s-tesäse n-kara n-tisnant wa hi-izzäl Abba ässaḡät-wa-däḡ.»

(Mätti 26:57-58; Marqəs 14:53-54; Luqa 22:54)

¹² Irmäs kumända d-əssärdusa-net d-älgomitän-wi dd-äšmašälän imänokalän n-käl-Älyähud Ḡisa, əkrädän-t,

¹³ əlwäyän-t s-tizarät s-ehän n-Xäna wa n-aḡäggal n-Qayäf-i n-ämänokal n-käl-tikutawen awätay-wen-däḡ.

¹⁴ Qayäf-en-däḡ a-s käla innä i-imänokalän n-käl-Älyähud däḡ-isälan n-Ḡisa: «Ufa ämmut ähaləs iyyän uhən təlhäs tamətte iket-net.»

Akuddəl wa ija Bəṭrus i-Ḡisa

(Mätti 26:69-70; Marqəs 14:66-68; Luqa 22:55-57)

¹⁵ A-s itäjj a-wen-däḡ, äddeew Simyon Bəṭrus d-änäṭṭalib iyyän, əjan alkum šəjren i-Ḡisa. Änäṭṭalib-en dār-äddew Simyon, izzay-t ämänokal n-käl-tikutawen, ijrāw-as a-wen-däḡ ad-imzəyyət d-Ḡisa ujəš n-äḡalla n-ehän n-ämänokal n-käl-tikutawen

16 māšan, äqqima-hin Bətrus ənta ibdad dəx-təfərre dat-emm n-əxalla. Əhoja ənəttalib wa izzäy əmänokal n-käl-tikutawen ɣas, izjār-dd, imməjräd i-tamədt ta tətəfät emm n-əxalla, toyy'-e, äšsojäs-dd Bətrus.

17 Təkyäd tänaxdimt ta tətəfät emm n-əxalla dəx-Bətrus, tənn'-as: «Ajän käyy wädden iyyän dəx-inəttulab n-əhaləs-wa-dəx s-iket ittärmäs?» Inn'-as Bətrus: «Wär t-əmoosäx.»

18 Itajj a-wen s-əzzəman n-tajrəst, əssiirxän inaxdimän n-əmänokal n-käl-tikutawen d-əlgomitän wi əxləfnen ehän n-əmudd wa məqqārən əfew, əzzahän sār-s, ibdäd-dd Bətrus edes-hasän, ad-itazzäh ənta-dəx.

*Tebädde n-Ÿisa dat-äššəreɣa wa məqqārən
(Mätti 26:59-66; Marqəs 14:55-64; Luqa 22:66-71)*

19 Issəstän əmänokal n-käl-tikutawen Ÿisa, ittär dəx-s ad-has-əj isəlan n-inəttulab-net d-a-wa tän-isəxra.

20 Äwwežəb-as Ÿisa, inn'-as: «Näkk, wär kəla ənneɣ hərət fəw i-əddinät dəx-ufär, əssəxərəx dəx-ihənan n-əddin wi n-käl-Älyəhud d-ehän n-əmudd wa məqqārən-i dəx-tazəmmaɣän käl-Älyəhud, wär t-illa a əssiixərəx dəx-ufär ɣas,

21 mafäl hi-sastanäd? Səstən əddinät-wi əslänen i-a-wa əssəxərəx, əssanən a-wa hasän-ənneɣ.»

22 Diha-dəx d-innä Ÿisa a-wen-dəx ad-has-istəx iyyän dəx-əlgomitän n-ehän n-əmudd wa məqqārən, inn'-as: «Käyy, ma käy-əsihəlän a təjəd erk məjräd i-amənokäl n-käl-tikutawen?»

23 Inn'-as Ÿisa: «Kunta jeɣ erk məjräd, səkənät-ahi a-wa dəx-änməšrəyəx, kunta dəx məjräd oɣadän a jeɣ adiš, mafäl tamətteɣ?»

24 Issəgdäh Xəna dəx-isəstanən n-Ÿisa ɣas, ikräd-t, əssawəy-t i-Qayäfi n-əmänokal n-käl-tikutawen.

25 A-s itajj a-wen-dəx, äqqiima Simyon Bətrus hərəwa s-əfew, itazzäh. A əndərrən, äkrättät-t əwadəm iyyän, inn'-as: «Wädden käyy-dəx iyyän dəx-inəttulab-net?» Äkkuddäl Bətrus a-wen, innä: «Wär t-əmoosäx.»

26 Iggäd-dd iyyän dəx-inaxdimän n-əmänokal n-käl-tikutawen, əmoosän əšəqqəx n-əhaləs wa s-dd-ifräs Bətrus taməzzujt-net s-təkoba, innä i-Bətrus: «Käyy-i-dəx, ənhayəx-käy təddewäd d-Ÿisa dəx-əšəkrəš n-ihəškan wa-dəx ittärmäs?»

27 Oläs dəx Bətrus akuddəl n-a-wen. Taməzəyyat-ten-dəx, ad-iwät ekəz əxora.

*Əmewəy Ÿisa s-Bilatəs
(Mätti 27:1-2, 11-14; Marqəs 15:1-5; Luqa 23:1-5)*

28 Hərəwa tifawt ad-fälän d-Ÿisa ehän wa n-Qayäf, əkkän dər-s ehän wa n-gəfär māšan, unjəyän s-ad-əjjəšän ammas-net fäl tuksəda n-ad-səmmədəsän iman-nəsän, igdəl-asän a-wen-dəx tetäte n-isan n-təxsiwen-ti lənen s-ad-əxərəsnät əšäl wa n-əmudd wa n-Fəška.

29 Əbdadän dəx-ajəma n-ehän-en-dəx a-s sār-sän dd-izjār Bilatəs, inn'-asän: «Ma əmoos udlem wa təsiwərəm əhaləs wa təlwəyäm?»

30 Ənnän-as: «Ənnär a-s ija a ləbasän, wär t-dd-nələwwəy sār-k.»

31 Inn'-asän Bilatəs: «Äglät, əšrəxət-t s-a-wa innä əlqanun-nəwän.» Ənnän-as imənokälän n-käl-Älyəhud: «Näkkəneɣ, dəx-a-wa innä əlqanun-nənəx, wär hanəx-t-illa ad-nəj iman n-əwadəm.»

32 Wär hasän-ijrew əlqanun-nəsän tenəxe n-əwadəm i-ad-tədduttət tənna n-Ÿisa fäl taməttant ta mad-əj.

³³ Oläs Bilatəs ujəš n-ehän-net, iyrä-dd Ƴisa təzzar, inn'-as: «Ak, käyy a-s ämänokal n-käl-Älyähud meḡ?»

³⁴ Inn'-as Ƴisa: «Ak tifer-ti-däḡ jed ämära-däḡ, ad-dd-təkkasäd däḡ-eḡäf-näk meḡ mäšällät a tänät-jed?»

³⁵ Inn'-as Bilatəs: «Näkk-š ma äkkuläḡ, ajän ägg-Älyähud a ämoosäḡ, täjjäšan-ahi isälan-näk? Tumast-näk d-imänokalän n-käl-tikutawen a käy-dd-äwwäyenen sär-i, ḡas, läḡät-ahi, ma täḡšädäd?»

³⁶ Inn'-as Ƴisa: «Təmmənəya-nin, wär tät-təla äddunya-ta-däḡ, ənnär tät-təla äddunya-ta-däḡ, iket-di, əknəsän inəṭṭulab-in i-ad-wär hi-jen imänokalän n-käl-Älyähud däḡ-ifassän-näk, ämära, Təmmənəya-nin, wär tät-təla äddunya-ta-däḡ.»

³⁷ Inn'-as Bilatəs älwäqq-wen: «Adiš tidət-däḡ a-s ämänokal a tämoosäd?» Inn'-as Ƴisa: «Käyy iman-näk tənne-d-tän, ämänokal a ämoosäḡ. Näkk, ämešäläḡ-dd s-äddunya-ta-däḡ, weḡ-dd däḡ-s i-ad-umasäḡ tajuhe i-tidət, ere wa ilkämän i-tidət iket-net, ad-isəjəd i-a-wa jänneḡ.»

³⁸ Innä Ƴisa a-wen ḡas, inn'-as Bilatəs: «Tidət-i-däḡ fäw, əndek-tät?» Innä Bilatəs a-wen ḡas, izjār-dd daḡ s-imänokalän n-käl-Älyähud, inn'-asän: «Ähaləs wa hi-dd-täwwäyäm, wär fälla-s əjrewäḡ uḡlem t-äsinähäjjän d-tamättant mäšan,

³⁹ šämad ässilmädäḡ-käwän a-s hak ämudd n-Faška, äsiwäyyäḡ-awän-in u-takärmüt iyyän, əssənät ten'-i-däḡ tärham ad-hawän-in-səwwəyyäḡ ämänokal n-käl-Älyähud meḡ?»

(Mätti 27:15-31; Marqəs 15:6-20; Luqa 23:13-25)

⁴⁰ Əslän i-a-wen ḡas, äşḡären däḡ-išənnawän, ənnän-as: «Fäw, wär hanäḡ-t-dd-toyyed, änn-ak, səwwəyy-anäḡ-dd Bäḡḡäbbas.» Bäḡḡäbbas-i s-ärhan a hasän-t-dd-isəwwəyy, ätiwässan a-s änaḡtaf a ämoos.

19

Irḡa Bilatəs s-atwəşləb n-Ƴisa

(Mätti 27:15-31; Marqəs 15:6-20; Luqa 23:13-25)

¹ Irmäs Bilatəs Ƴisa, omär əssärdusa i-ad-däḡ-s əjən tiwit s-ibärtäkän.

² Əggädän-dd əssärdusa, əzzän älmät, korona, a-wen, takənbut n-isənnanän šund ta täjjän imänokalän təzzar, äswärän-tät eḡäf-net, əssəlsän-t anäkäbba šäggäḡän

³ təzzar, ad-t-tiḡliḡələyän, jannen-as: «Ämänokal n-käl-Älyähud, nəj'-ak gärdəbu», sattäḡän-as siha d-siha.

⁴ Izjār-dd Bilatəs daḡ s-käl-Älyähud, innä: «Ənhəywät, ähaləs-i-däḡ, äsoḡäläḡ-awän-t-in i-ad-käwän-səlmədäḡ a-s wär t-illa uḡlem fälla-s əjrawäḡ t-äsinähäjjän d-tamättant.»

⁵ Izjār-dd Ƴisa sär-sän ḡarät-a-wen, ija takənbut ta n-isənnanän, ilsa anäkäbba wa šäggäḡän, inn'-asän Bilatəs älwäqq-wen «Ähaləs-näwän dədi.»

⁶ Ənhäyän imänokalän n-käl-tikutawen d-älgomitän Ƴisa ikk'-en-dd ḡas, äşḡären iket-näsän, ənnän i-Bilatəs: «Itwəşləbet fäll-tajəttewt, Itwəşləbet fäll-tajəttewt!» Inn'-asän Bilatəs ämära: «Ärməsät-t, təşləbäm-t fäll-tajəttewt käwänəd iman-näwän fäl-a-s näkk, wär t-illa uḡlem fälla-s əjrawäḡ t-äsinähäjjän d-tamättant.»

⁷ Ənnän-as imänokalän n-käl-Älyähud: «Näkkänəd, ijraw-anäḡ Äṭtäwrät iji n-iman-net ed, ija iman-net Rure-s n-Mässinäḡ.»

⁸ Isla Bilatəs i-mäjräd-wen-däx ças, irmäx,

⁹ ijjäš ehän-net təzzar, innä i-ÿisa: «Käyy-i-däx fäw, əndek siha s-ddhed?» Wär t-illa a has-inna ÿisa. Inn'-as Bilatəs:

¹⁰ «Mafäl wär hi-jənnid härät? Ajän wär təssenäd a-s näkk lex tädabit n-ad-käy-in-äyyäx, lex daç tädabit n-ad-käy-əşləbäx fäll-tajəttewt?»

¹¹ Inn'-as ÿisa: «Wär fäll-i mad-təkrəşäd tärna wäl' iyyät säl ta käy-ikfa Mässinäx däç-əssaçät-wa-däç, a-wen-däç a fäl ere wa hi-ijän jer-ifassän-näk, oçär-käy tifut n-abäkkad.»

¹² Ad-itammäx ya Bilatəs i-äddäbara s-t-in-äswäyya mäšan, äşçären käl-Älyähud däç-işənnawän, ənnän-as: «Afäl t-in-toyyed, ad-nəlməd a-s käyy wädden amidi n-Qäyşär a tämoosäd fäl-a-s, nəssan a-s ere ijan iman-net ämänokal iket-net, ad-umas ašanjo n-Qäyşär.»

¹³ Islä Bilatəs i-a-wen ças, izzəzjär-dd ÿisa təzzar, äçqima däç-edägg wa däç-iyattäs äşşäreça s-itawänna däç-ÿäbranəyya: ÿäbbata.

¹⁴ Itajj a-wen s-tarähut n-aşäl wa n-dat-wa n-ämudd wa n-Faşka. Innä Bilatəs i-imänokalän n-käl-Älyähud: «Uhənät, ämänokal-näwän dədi.»

¹⁵ Mäšan, äskälälän iket-näsän, ənnän-as: «Ämmätet, ämmätet, itwəşləbet fäll-tajəttewt.» Inn'-asän Bilatəs: «Ças käwäned, äbahawän ere təşləbäm ar ämänokal-näwän?» Ənnän-as imänokalän n-käl-tikutawen: «Näkkäned, wär nəla ämänokal säl Qäyşär.»

Atwəşləb n-ÿisa

(Mätti 27:32-44; Marçəs 15:21-32; Luqa 23:26-43)

¹⁶ Ijä Bilatəs ÿisa jer-ifassän-näsän i-ad-itwəşləb fäll-tajəttewt. Ärmäsän əssärdusa ÿisa, əlwäyän-t təzzar,

¹⁷ äslänjen-t tajəttewt ta fäll-mad-itwəşləb, əzjärän dər-s açrəm, əkkän dər-s edägg wa s-itawänna däç-ÿäbranəyya: «Gälgota»; a-wen älmäçna-net: «Edägg wa n-akärkor.»

¹⁸ Aşäl-en, ämizäyyen əssin inaçtafän atwəşləb d-ÿisa; iyyän daw-açil-net, wa iyyädän daw-täşälje-net, imäl-t ənta jere-sän.

¹⁹ Əşləbän ÿisa ças, issəktäb Bilatəs fäll-ällox iyyän a-s:

«A-WA ÿISA WA N-NÄŞIRÄT

N-ÄMÄNOKAL N-KÄL-ÄLYÄHUD».

Əttəytäyän-t jənnəj-s fäll-tajəttewt ta fäll-ätwəşləb.

²⁰ Akätəb-en, äçrän-t käl-Älyähud äjjootnen fäl-a-s, edägg wa däç-ätwəşləb ÿisa, oçaz açrəm. Ällox-en, akätəb wa t-iwarän, ija däç kərəd iməjridän: ÿäbranəyya, Tärömanit d-Tälyunanit.

²¹ Əggädän-dd imänokalän n-käl-tikutawen d-käl-Älyähud, äsmätärän Bilatəs d-udaç ad-iktəb a-s ÿisa ämänokal n-käl-Älyähud änn-ak, iktəbet a-s, innä: näkk, ämänokal n-käl-Älyähud mäšan,

²² inn'-asän Bilatəs: «A-wa s-işwär əktäbäç-t, əktäbäç-t.»

²³ Əşləbän əssärdusa ÿisa fäll-tajəttewt ças, əjän i-isəlsa-net əkkoçät tiçunawen, idkäl hak iyyän däç-sän täçune tiyyät, wär dd-äçqima ar tanäkəbbat wär iha azämäy wäl' iyyän.

²⁴ Ärmäsän-tät əssärdusa ças, änmännän jer-iman-näsän: «Udaç ad-tät-nəşäçrriwət, nəçet fälla-s tişäçeren i-ad-t-ikrəş iyyän däç-näç.» Əjän tişäçeren, ämoos a-wen a ässiitbätän a-wa iktäbän däç-mäjräd n-Mässinäç a-s inna:

«Äzunän isəlsa-nin,

jän tişäçeren fäll-tanäkəbbat-in.»

Jän əssärdusa a-wen s-əmmək-wa-däç s-tän-innä əlkəttab n-Mässinäç.

²⁵ Edes i-tajəttewt ta fäll-ätwäsläb Ƴisa, təbdad ma-s d-wälätma-s n-ma-s d-Märyäma ta n-hänne-s n-Klufas d-Märyäma ta s-itawänna ta n-Muläždaləyät.

²⁶ Inhäy Ƴisa ma-s təbdad edes i-änätṭalib wa ikna tärha ƣas, inn'-as: «Anna, rure-m dədi ibdädän edes-ham.»

²⁷ Innä daḡ i-änätṭalib: «Käyy daḡ, ma-k dədi təbdädät edes-hak, taḡalift-näk.» Ƴur-ašäl-wen-däḡ, ij'-et-dd änätṭalib-en s-iman-net, iṭṭäf-as tämudre.

Taməttant n-Ƴisa

(Mätti 27:45-56; Marqəs 15:33-41; Luqa 23:44-49)

²⁸ Ilmäd Ƴisa a-s əssəbab wa fäl dd-əmešäl s-əddunya, əssawäd-t-in iket-net, fäll-tajəttewt-en-däḡ, innä: «Äffuudäḡ.» Ämoos a-wen a əssiitbätän a-wa innä əlkəttab n-Mässinäḡ fälla-s.

²⁹ Iskar dihen äkoss iḡkarän bənegär, innä Ƴisa äffuud ƣas, əttälän əssärdusa täduft fäll-äbəri, əssəlmäḡän-tät däḡ-bənegär təzzar, əzzälän-as-tät i-ad-tät-isuməm məšan,

³⁰ äkrəbbät Ƴisa bənegär ƣas, inna: «A-wa s-dd-oseḡ, ijä, imdä». Äskäräyräy-dd eḡäf-net dərät-a-wen, ijmäd-t unfas.

(Mätti 27:57-61; Marqəs 15:42-47; Luqa 23:50-56)

³¹ Itajj a-wen ašäl wa n-dat-wa n-Faška-i-däḡ sadawän äddinät i-ämudd. Šəmad wär-ərhen imänokalän n-käl-Älyähud ad-tän-dd-iḡdär ämudd wa n-Faška-i əknän asəḡar ed awätay-wen, oḡa ašäl wa n-ämudd fäll-əssəbət-i n-təsonfat, ƣas, osän Bilatəs, əttärän däḡ-s ad-amär i-əssärdusa teräzze n-iḡarän n-äddinät-wi ätwäsläbnen fäll-tijəttewen təzzar, əkkəsän-tän-dd fälla-snät.

³² Osän-dd əssärdusa ƣas, ärzän iḡarän n-ənaxtaf wa äzzarän, okäyän daḡ s-amidi-net wa iyyädän, jän-as a-wen-däḡ ənta-däḡ.

³³ Əwwädän-dd Ƴisa, ənhäyän-t ämmut ƣas, okäyän-t wär-ärzen iḡarän-net

³⁴ məšan, inbäj iyyän däḡ-əssärdusa tajəzzelt n-Ƴisa s-allaḡ-net, izjär-tät-dd ašni s-əlkamän aman.

³⁵ Näkk a iktäbän isälan-wi-däḡ ed, äjjəyhäḡ-asän iket-däḡ-näsän, tajuhe-nin daḡ, wär tät-ih' äššäk. Ƴas, siḡuläḡ-tän näkk-i tän-inhäyän s-tiṭṭawen-in däḡ-təssəba n-ad-tamənäm s-Ƴisa.

³⁶ Isälan-wi-däḡ, jän i-ad-itbət a-wa iktäbän däḡ-mäjräd n-Mässinäḡ a-s innä:

«Wär mad-ärz eḡäs-net wäl' iyyän.»

³⁷ Innä daḡ mäjräd n-Mässinäḡ däḡ-edägg iyyän säl-wen:

«Ad-əjjənfun äddinät däḡ-wa dəjän.»

Azəkka n-Ƴisa

³⁸ Osä-dd Yusəf wa n-tadəbayt ta n-Arimata. Ämoos ənta iman-net, änätṭalib n-Ƴisa, məšan, iffar a-wen fäl tuksəḡa n-a-wa däḡ-s-e-ənnən imänokalän n-käl-Älyähud. Ənta-en-däḡ a ihälän tikawt n-Bilatəs, ittär däḡ-s turhajät n-ad-dd-ikkəs tafəkka n-Ƴisa fäll-tajəttewt; ikf'-e Bilatəs turhajät n-a-wen ƣas, ikkäs-dd tafəkka n-Ƴisa fäll-tajəttewt.

³⁹ Osä-dd daḡ dihen Nikodem wa s-käla dd-ädwännät i-Ƴisa s-ehäd, iwway a okäyän kərəḡät timərwen n-kelu n-matälxer d-aḡutän.

⁴⁰ Ärmäsän tafəkka n-Ƴisa, əknän-tät s-matälxer d-aḡutän təzzar, əttälän-tät däḡ-tefit, ed a-wen-däḡ a tajjän käl-Älyähud i-ere äba təzzar, əjän-t däḡ-azəkka.

⁴¹ Edägg wa dāḡ-ätwäsläb ʿYisa, ohaz-t ašəkrəš n-ihəškan, iha azəkka s-käla wär dāḡ-s insa ere äba.

⁴² Azəkka-wen-dāḡ a dāḡ-jän tafəkka n-ʿYisa ed, wär tän-ujəj, äsinäkmäm-tän daḡ ämudd-i s-afäl dd-iwwäḍ ässaḡät-net, ad-äbas t-illa emäremar.

20

Tanäkra n-ʿYisa jer-inəmmuttan

(Mätti 28:1-10; Marqəs 16:1-8; Luqa 24:1-12)

¹ Abənnəbən n-älxad-i n-ašäl äzzarän dāḡ-əssəboḡ, härwa janät tihay, tənšäy Märyäma ta n-Muläždaləyät azəkka wa iha ʿYisa, tənähay a-s tähunt ta mäqqārät härät emm n-azəkka, tämmuqqäs-in.

² Tošäl s-Simyon Bəṭrus d-änätṭalib wa iyyäḍän ikna ʿYisa tärha, tənn'-asän: «Tafəkka n-Älḡalim-nänäḡ, təmmäḍkäl, äbas ha azəkka, wär nəssen ənde d-tät-jän ämära.»

³ Iḡla Bəṭrus d-änätṭalib wa iyyäḍän, əkkän azəkka.

⁴ Ošälän issənän-essän mäšan, ijmaḍ änätṭalib wa iyyäḍän Bəṭrus dāḡ-azzal, išwār-t-in s-azəkka,

⁵ äddunkät, ässijjä dāḡ-ammäs-net, inhäy tefit tənsa d-iman-net mäšan, wär-ijješ ammas n-azəkka.

⁶ Iwwäḍ-t-dd Simyon Bəṭrus ḡas, ijjäš ənta azəkka, inhäy tefit ta tənsät d-iman-net,

⁷ oläs daḡ ahänay n-taswəḍt ta s-käla təttäl eḡäf n-ʿYisa, tənsa d-iman-net s-edes, toḍha.

⁸ Ijjäš-dd fälla-s ḍarät-a-wen änätṭalib wa iyyäḍän t-dd-išwārän s-azəkka, inhäy, omän;

⁹ fäl-a-s, a-wa-dāḡ jän ärtayän d-ʿYisa iket-net, wär-əfhemän a-wa ənnän əlkəttabän dāḡ-isälan-net, a-s ənnän a-s, ilzam ad-t-iba təzzar, inkär-dd jer-inəmmuttan.

¹⁰ Əqqälän ḍarät-a-wen ihänan-näsän.

Issəkna ʿYisa iman-net i-Märyäma ta n-Muläždaləyät

(Marqəs 16:9-11)

¹¹ Täqqimä-dd ḍara-sän Märyäma, təbdad edes i-azəkka, hall. Halla dihen-dāḡ har šik-dāḡ tässijjä dāḡ-ammäs n-azəkka,

¹² tənähay əssin änjəlosän ässiimlälən, äqqimän dāḡ-edägg wa s-käla dāḡ-s tənsa tafəkka n-ʿYisa. Äqqiima iyyän dāḡ-edägg wa s-käla dāḡ-s insa eḡäf n-ʿYisa, äqqiima wa iyyäḍän dāḡ-edägg wa s-käla dāḡ-s ənsän iḍarän-net.

¹³ Əssəstänän änjəlosän Märyäma, ənnän-as: «Märyäma, ma käm-isalhen?» Tənn'-asän: «Tafəkka n-Älḡalim-in a təmmäḍkälät, wär-əssenäḡ ənde d-tät-jän ämära.»

¹⁴ Tənnä a-wen ḡas, täšnəšläm, tənähay ʿYisa ibdad mäšan, indär-as ad-t-təzzəy.

¹⁵ Imməjräd-as, inn'-as: «Tamäḍt, ma käm-isalhen? Ma dāḡ-m äba?» Ämmiijräd-as mäšan, täḡel Märyäma mässi-s n-ašəkrəš a has-ämmiijrädän, tənn'-as: «Ya ähaləs-i-dāḡ, kunta käyy a iḍkälän tafəkka n-Emäli-nin, əttaräḡ dāḡ-k idəm n-ad-hi-səknəd diha tät-jed i-ad-tät-əḍkələḡ.»

¹⁶ Iḡr'-et ʿYisa s-isəm-net, inn'-as: «Märyäma!» Təggäd təzzar, tənnäḍ-dd sār-s, tənn'-as dāḡ-ʿYäbranəyya: «Rabbuni»; a-wen älmäḡna-net: «Mässi-ḡ.»

¹⁷ Inn'-as Ƴisa älwäqq-wen: «Wär hi-ðesäd, tawəxəd-ahi fäl-a-s, wär-osex išənnawän-i iha Abba-nin härwa. Ämära, əgləw, läxät i-ayətma-x a-s əkkex Abba-nin-i s-ənta dəx a-s Abba-näwän, əkkex Mässi-x-i n-Mässinäx-i s-ənta a-s Mässinäx-i n-Mässi-wän.»

¹⁸ Təkkä Märyäma ta n-Muläždaləyät inəttulab, tənn'-asän: «Näkk, ənhayəx Emäli». Ad-däx-sän tadj isälan n-a-wa has-innä Ƴisa.

Issəkna Ƴisa iman-net i-inəttulab-net

(Mätti 28:16-20; Marqəs 16:14-18; Luqa 24:36-49)

¹⁹ Ehäd n-aşäl-wənnin-däx n-älxad, äžziimmäxän inəttulab dəx-ehän iyyän, ättubben imawän-net fäll-iman-näsän a-wa hasän-təja tuksəda n-imänokalän n-käl-Älyähud. Wär tän-hen isälan a-s ənta iman-net da-däx dd-ibdädän jere-sän, inn'-asän: «Ins' älxer n-Mässinäx fälla-wän.»

²⁰ Ij'-asän isofan, ad-tän-isakna ifassän-net d-tajəzzelt-net. Älwäqq-i-däx t-ənhäyän, əjän inəttulab tedawit-i-däx mäqqärät.

²¹ Inn'-asän Ƴisa: «Ins' älxer n-Mässinäx fälla-wän. Ämaşal wa ijä Abba dəx-ifassän-in, jəx-t näkk-däx ämära dəx-ifassän-näwän.»

²² Dərät-a-wen, äşhäd Ƴisa jənnəj-i-xäfawän-näsän, inn'-asän: «Uhənät Unfas Şaddijän,

²³ ere wa s-tənşäm ibäkkadän-net, ad-ijrəw tenäşşe-näsän, ere wa s-tän wär tənşem, wär mad-ijrəw tenäşşe-näsän.»

Issəkna Ƴisa iman-net i-Tomi

²⁴ Aşäl wa d-jän isälan-wi-däx, wär t-illa iyyän dəx-inəttulab wi n-märaw d-əssin s-isəm-net Tomi wa s-itawänna Ekne.

²⁵ Osä-dd xas, ənnän-as inəttulab wi iyyädnen: «İşräy-käy-dd Emäli Ƴisa.» Unjäy s-ad-tän-ifləs, inn'-asän: «Näkk xas, a əkkäsäx wär t-ənhəyəx s-tiştawen-in, ənhəyəx dəx idraš n-ibuyəsän dəx-ifassän-net, äjäx dəx assəkäd-in dəx-adəriş n-ibuyəsän, äjäx äfuss-in dəx-tajəzzelt-net ta inbäj allax, wär mad-əfləsəx a-s dd-inkar jer-inəmmuttan.»

²⁶ Aşäl wa n-əttam dərät-a-wen, äžziimmäxän inəttulab dəx-ehän ättubben, ih'-en ämära Tomi. Wäla hin-əjrähän a-s dd-ibdäd Ƴisa jere-sän, inn'-asän: «Ins' älxer n-Mässinäx fälla-wän.»

²⁷ Innä Ƴisa i-Tomi dərät-a-wen: «Ahəz-ahi-dd, səjräh ifassän-in, hənda assəkäd-näk, äj'-e dəx-äfuss-in, təjəd-t dəx dəx-tajəzzelt-in, wär täşxäräd ulh-näk.»

²⁸ Awwəžäb-as Tomi, inn'-as: «Emäli-nin, Mässi-x Mässinäx.»

²⁹ Inn'-as Ƴisa: «Käyy, tənähäyäd-ahi təzzar tomänäd, tənðəd i-äddinät wi hi-wären-ənhəy mäşan, omänän.»

Äddälil-wa fäl iktäb Exya əlkəttab-wa-däx

³⁰ Ija Ƴisa dat-inəttulab-net ijitän n-Mässinäx äjjootnen wären əkteb dəx-əlkəttab-wa-däx

³¹ mäşan, a-wa dəx-sän iktäbän dəx-əlkəttab-wa-däx iket-net, iktab dəx-tössəba n-ad-tamənäm a-s Ƴisa a-s Älmasex wa n-Rure-s n-Mässinäx, ere omänän s-isəm-net-däx, ad-ijrəw tämudre ta täxlälät.

21

Oläs Ƴisa asəkən n-iman-net i-əssa dəx-inəttulab-net

¹ Dərät-a-wen-däx ijän, äsnäfaläl-dd Ƴisa dəx iman-net i-inəttulab-net dəx-asälim n-əjänş wa s-itawänna Tibäryad. Ənta da əmmək wa s-hasän-dd äsnäfaläl iman-net:

² Ašäl iyyän, äžziimmäx Simyon Bətrus, Tomi wa n-ekne d-Natanähil wa n-tayxremt ta n-Käna tēhät teje ta n-Galila d-dägg-Zäbdi d-össin inəttulab iyyäd däx,

³ äqqiimän har šik-däx, inn'-asän Simyon Bətrus: «Näkk, əkkex ejänš i-ad-əhhuyex imānan.» Ənnän-as inəttulab wi iyyädnen: «Äqqəl-anäx, näddew dār-k.» Əzjārän, əjjäšan turäft n-aman, əglän. Okäy-tän ehäd-wen-däx iket-net, wär t-illa a ärmasän.

⁴ Äffäw xas, iwär-dd Yisa asälim n-ejänš mäšan, indär-asän ad-t-əzzəyän.

⁵ Ixr'-en, inn'-asän: «Ilyadän, ajän wär lem a təkšäm?» Ənnän-as: «Äbo!»

⁶ Inn'-asän: «Äjrät ämära tätart-näwän s-ašrut wa n-axil n-turäft n-aman, ad-tärməsäm imānan.» Järän tätart-näsän s-ašrut-wen-däx tän-issəkna, əttärän ad-tät-dd-ärkəbän däx-aman mäšan, təndär-asän fäl adānay-i-däx tēja imānan.

⁷ Inhäy änätalib wa ikna Yisa tārha a-wen xas, inna i-Bətrus: «Ijmad-t äššäk a-s a-wa Emäli-nänäx.» Islä Simyon Bətrus a-s a-wa Emäli Yisa xas, idkäl emäls-net wa ikkäs i-älxidmät, ij'-e däx-err-net, ijär iman-net däx-aman, išyäf, ikk' asälim.

⁸ Äxyämnen-dd inəttulab wi iyyädnen turäft, ähoben-dd tätart ta təkärät imānan ed, wär t-illa jere-sän d-asälim n-ejänš ar sänatät timad n-axil.

⁹ Əwwädän asälim n-aman xas, ənhäyän efew iryan fäll-naṅṅän imānan d-tajəlla,

¹⁰ inn'-asän Yisa: «Awəyät-dd a län imānan däx-wi s-iket tän-dd-tärmäsäm.»

¹¹ Ijjäš Simyon Bətrus turäft ta n-aman, ähobät-dd tätart s-asälim n-aman, osän-tät, ih'-et a iwwädän temede d-səmmosät timərwən n-emän d-käraḍ däx-wi šuharnen mäšan, hək d-a-wen-däx, wär ser tätart.

¹² Əṅṅän imānan d-tajəlla xas, inn'-asän Yisa: «Əyyäwät, mänsäwät.» Itajj a-wen-däx iket-net mäšan, wär tän-iha-i ihälän asəstan-net d-ere wa ämoos ed, əssanän ämära a-s Emäli iman-net a-wa.

¹³ Idkäl Yisa tajəlla, äzun-asän-tät, äzun däx imānan jere-sän.

¹⁴ Ənta-da-däx anfiləl wa s-käraḍ dd-ija Yisa i-inəttulab-net qarät tanäkra-net jer-inəmmuttan.

Isəstanän wi ija Yisa i-Bətrus

¹⁵ Əkšän xas, innä Yisa i-Simonyon Bətrus: «Simyon ägg Yunəs, ak torded a-s tojār tārha ta hi-jed, ta hi-jän imidiwän-näk?» Inn'-as Simyon: «Emäli, təssanäd a-s ärheḅ təmmidəwa-näk.» Inn'-as Yisa: «Adiš, äj i-inəttulab-in taḅälift ta itäj amädän i-ikərwatän-net.»

¹⁶ Ij'-as Yisa asəstan wa s-össin, inn'-as: «Simyon ägg Yunəs, ak torded a-s tärhed-ahi?» Inn'-as Simyon: «Näkk lab, ärheḅ təmmidəwa-näk.» Inn'-as Yisa: «Adiš, äj i-inəttulab-in tamädint ta itäj amädän i-tihatten-net.»

¹⁷ Ij'-as Yisa asəstan wa s-käraḍ, inn'-as: «Simyon ägg Yunəs, ak tidət-däx a-s tärhed təmmidəwa-nin?» Inxäs a-wen-däx iman n-Bətrus d-a-s har kərəḍ ihändəggan isastan-t d-a-s irh'-e meḅ? Inn'-as Bətrus ämära: «Emäli, wär t-illa a-s wädden təssanäd-t, təssanäd a-s jeḅ-ak tārha təmdat.» Inn'-as Yisa: «Adiš, äj i-inəttulab-in taḅälift ta itäj amädän i-tihatten-net.

¹⁸ Älleḅəḅ-ak s-tidət tädduuttet a-s däx-təmmiwəḍa-näk, salsed iman-näk, erhet-näk xas a käy-išilləwän mäšan, afäl wäššaräd, ere wär

tämoosäd a käy-madän-isäls, tättärmäsäd, tättälwäyäd s-edägg wär tärhed.»

¹⁹ Inn'-as a-wen-däx i-ad-isəlməd Bəṭrus älخال n-tamättant ta has-täqqälät madät-tumas tajuhe ta s-mad-isəmyär Mässinäx. Ij'-as Үisa mäjräd-wen-däx xas, inn'-as: «Əlkəm-ahi.»

Änäṭṭalib wa ikna Үisa tärha

²⁰ Äšnəšläm Bəṭrus dara-s, inhäy änäṭṭalib wa irha Үisa, ilkam-asän. Änäṭṭalib-wen-däx a dd-insän fäll-idmarän n-Үisa ehäḍ wa där-s ohärän amənsi, ənta-en-däx a issəstänän Үisa ehäḍ-wen a-s has-innä: «Älyalim, əndek däx-näx wa käy-madän-isəssäxdär?»

²¹ Inhäy-t Bəṭrus ilkam-asän xas, innä i-Үisa: «Emäli, wa hi-š änäṭṭalib, ma däx-s ilkamän?»

²² Inn'-as Үisa: «Kud-ärheḡ ad-iddar har dd-äqqələx, ma täkkuuläd däx-a-wen? Käyy, əlkəm-ahi xas.»

²³ Mäjräd-wen-däx ija Үisa i-Bəṭrus a dd-oräwän a-wa s-jannen in-alkimän n-Үisa, änäṭṭalib-en-däx, wär däx-s təkem tamättant mäšan, wär has-inna Үisa wär mad-ämmät, änn-ak a inna i-Bəṭrus: «Ajän kud-ärheḡ ad-iddar har dd-äqqələx, ma täkkuuläd däx-a-wen?»

Ajilal n-mäjräd

²⁴ Änäṭṭalib-wen-däx fäll-ija Үisa tajuhe-ten-däx, a äjjəyhän i-isälan-wi-däx, iktäb-tän, nəssan daḡ a-s tajuhe-net, tädduuttät.

²⁵ Əllan-t härätän äjjootnen ija Үisa wären əkteb diha-däx. A-wa ija, ija əjut wa-däx s-ənnär ittär əwadəm akätab-net s-iyyän-iyyän, wär-ordeḡ a-s täddobät täkost n-äkall-i-däx aggay n-əlkəttabän-win-däx he-siwəlneḡ däx-isälan-net. Amin!

Ijitän n-inəmмуšal n-Ÿisa Älmasex

Äšajəš

¹ A-wa näkk hin-iktabän i-enəsseməḡär-in Täyofil:

Däḡ-əlkəttab-in wa äzzarän, äsoḡäläḡ-ak isälan n-a-wa s-issəntä Ÿisa iji-net d-a-wa issäḡra iket-net

² hundäḡ har ašäl wa d-imməḡkäl s-išənnawän, ḡarät a-s äsimätär inəmмуšal wi äsnäfrän s-tärna n-Unfas Šäddijän.

³ Əntänəḡ-en-däḡ a-s dd-äsnäfaläl iman-net s-tizarät ḡarät tamättant-net i-ad-tän-isəlməḡ s-timtär äjjootnen a-s iddar. Ija ḡarät tanäkra-net jer-inəmmuttan əkkəzät timərwen n-ašäl izzay jer-inəḡḡulab-net, itajj'-asän isälan n-Təmmənəya n-Mässinäḡ.

Ärkäwäl wa ija Mässinäḡ i-aratän-net

⁴ Ašäl iyyän, ohar dār-sän amənsi har šik-däḡ, inn'-asän: «Wär feläm aḡrəm wa n-Yärussälam, əqqəlät i-a wa s-hi-təsläm saḡreḡ-t s-hawän-ijjäs Abba ärkäwäl-net;

⁵ tidət, Exya, aman a däḡ-issəlmäḡ äddinät mäšan käwänəḡ, däḡ-härät n-išilan, ad-tətwəsəlmäḡäm däḡ-Unfas Šäddijän-i dd-e-izzubben fälla-wän.»

(*Marḡəs 16:19-20; Luḡa 24:50-53*)

⁶ Äžziimmäḡän dihen-däḡ a-s t-əssəstänän, ənnän-as: «Emäli, ajän äzzäman wa däḡ-dd-taqqäl təmmənukəla Işrayil, osä-dd?»

⁷ Inn'-asän: «Wädden käwänəḡ a iwar almud n-täqqän wäla ässaḡät wa iḡtäs Abba däḡ-älxikmät-net;

⁸ käwänəḡ, ad-təjrəwäm tärna, ad-fälla-wän dd-izzubbət Unfas Šäddijän, tumasäm tjuhawen-in däḡ-aḡrəm wa n-Yärussälam, däḡ-teje ta n-Älyähudəyät iket-net d-ta n-Sämari təkkəm har diha dd-təmda äddunya.»

⁹ Inn'-asän a-wen ḡas, imməḡkäl data-sän s-išənnawän; əbdadän, əswaḡän däḡ-s har hasän-t tənjar tejäräkt.

¹⁰ Äjozäyän išənnawän-i s-imməḡkäl a-s hasän-dd-änfalälän əssin meddön ässiimlälnen, ənnän-asän:

¹¹ «Ya käl-Galila, ma s-təbdadäm täjozäyäm išənnawän? Ÿisa wa imməḡkälän jere-wän s-išənnawän, ilkam a dd-iqqəl s-əmmək-wa-däḡ s-t-tənhäyäm ikk'-en.»

¹² Fälän inəmмуšal ḡarät-a-wen taḡayt ta n-əzzäytunitän, əqqälän aḡrəm wa n-Yärussälam-i hasän-t-illän əḡḡəkud n-täzune n-ässayät n-räjjoš.

¹³ Əwwädän-in aḡrəm, əkkän soro n-ehän-wa s-əzzäyän ažəmmäḡ däḡ-s. A-wen: Bəḡrus, Exya, Yaḡub, Idris, Fəlibb, Tomi, Bartälamma, Mätti, Yaḡub ägg Älfa, Simyon wa s-itawänna Äššazəḡ, Hudd wa n-ägg Yaḡub.

¹⁴ Əjlayän iket-däḡ-näsän däḡ-a-wa hän, oharän iyyän n-ulh däḡ-temädilt n-Mässinäḡ əntänəḡ d-tiḡəḡen təha Märyäma ta n-ma-s n-Ÿisa d-ayətma-s n-Ÿisa.

Änäḡḡalib wa ijjäšän edägg n-Yähudəs Isxaryut

15 Äžziimmäxän dihen-däx, ämoosän temede n-äwadəm d-sänatät timərwen a-s dd-ibdäd Bətrus jere-sän, inn'-asän:

16 «Ayətma-x, a-wa innä Unfas Šaddijän s-emm n-ännäbi Dawəd, däx-isälan n-Yähudəs-i dd-äslälän äddinät wi ärmäsnen Yisa, ijä;

17 kälä däx-näx ädđiin, kälä t-illa ijraw folät-net däx-ämašal wa hanäx-issäxläf Mässinäx.

18 Azrəf-wa xāramän irmäs i-ad-ämašäl abäkkad wa ofa, izžənšä sär-s ašəkrəš wa däx-dd-iha äsikätṭäy fäll-eḡäf-net, äsfätäqqät iman-net, äzun däx-ammās, äbräzzät-dd a-wa ihän täsa-net iket-net fäll-äkall;

19 wär t-illa ere izzaḡän Yärussälam s-wädden han-t isälan n-a-wen-däx, əglän äddinät fäw har ašəkrəš-wen-däx däx-t-äba, əjän-as isəm däx-tawalt-näsän: «Häqqäldäma», a-wen älmäḡna-net: «Ašəkrəš wa n-ašni».

20 Ämära, iktab däx-əlkəttab wa n-Äzzäbur a-s:

«Iqqəlet ehän-net timšar,
wär t-itoləset äwadəm uzäx.»

Iktab daḡ a-s:
«Ijjəšet iyyän edägg-net.»

21 Ilzam ämära ad-nəsənnəfrən iyyän däx-meddən wi hanäx-hänen s-alkum i-Yisa däx-takliwen-net d-uḡlawän-net däx-a-wa ikkäs Emäli Yisa ill'-e jere-näx,

22 a-wen, ḡur-ašäl wa t-issəlmäḡ Exya däx-aman har ašäl wa dd-inkär jer-inəmmuttan təkkəd ašäl wa d-immədkäl jere-näx s-išənnawän.»

23 Äsnäfränän-dd əssin meddən, iyyän Yusəf wa s-itawänna Bärsabas, jannen-as iyyäd Istus, wa iyyädän Matiyas.

24 Dälän Mässinäx ḡarät-a-wen, ənnän: «Emäli, käyy a issanän a-wa ihän ulh n-e d t-illäm ägg-adəm, səlməd-anäx wa täsnäfränäd jer-meddən-wi-däx n-əssin

25 i-ad-ijjəš edägg wa n-tənnəmušəla irfäd Yähudəs, ikk' edägg wa ija i-iman-net.»

26 Jän tisəḡeren ḡarät-a-wen, oḡänät fäll-Matiyas, ädđin ya fäll-inəmмуšal wi n-märəw d-iiyän.

2

Äzabbu wa dd-ija Unfas Šaddijän fäll-inəṭṭulab

1 A-s dd-iwwäd ašäl n-ämudd n-käl-Älyähud wa s-itawänna Fantäkawt, äžziimmäxän inəṭṭulab iket-däx-näsän däx-iiyän n-edägg.

2 Wälä a hin-əjrähän a-s dd-ifäl emäsli iyyän olähän d-i n-tamädalt täšsoohet išənnawän, änhäynähäy edägg-ənnin-däx däx-äqqiimän iket-net;

3 ibdäd-dd fäll-hak iyyän däx-sän a olähän d-ilsawän n-imämmälän n-efew əbḡanen,

4 idnäy-tän Unfas Šaddijän älwäqq-wen-däx, ad-tamäjrädän awalän äynaynen s-əmmək wa s-hasän-issärḡäs Unfas turhajät n-a-wen.

5 A-s itäjj a-wen-däx, ähhujjäjän-dd käl-Älyähud äjjootnen äddinnen s-Yärussälam, wär t-illa äkall s-wädden falän-t-dd.

6 Təslä tamətte n-aḡrəm i-emäsli wa ijän, tošäl-dd iket-net s-edägg wa däx-ija, təjraw-tät täkunt n-emäsli-wa-däx d-a-wa s-hak äwadəm-däx, isall i-inəmмуšal ämmijrädän tawalt n-äkall-wa-däx dd-ifäl.

7 Eqqälän-dd äddinät ḡas, oran imawän, təjraw-tän täkunt, jannen: «Kähh! Wi äddinät hanäx-ämmijrädnen, ajän wädden teje ta n-Galila a tän-lät?»

8 Ma n-əmmək n-a-s hasän-nəsall ämmiirädän tawalen-nänäx?

9 Han-anäx äddinät dd-falnen Bartas, Midyas, Ilam, Mizəbbutəmya, Älyähudəyät, Kafadusya, Fon, Azya;

10 Frižya, Banfilya, Mišra, Libya, Qərwan, Roma,

11 iyyäð däx-näx käl-Älyähud s-aläšäl, iyyäð inalkimän n-äddin wa n-käl-Älyähud, iyyäð däx-näx käl-Kritus, iyyäð Arabän; mäšan, nəsall'-asän iket-däx-nänäx tiimələn tihusay n-ijitän n-Mässinäx däx-tawalen-nänäx.»

12 Əqqälän-dd äddinät ɣas oran imawän, iqqan a-wa ijän iɣäfawän-näsän, tinmännin: «Ma ämoos älmäɣna n-a-wa-däx?»

13 Əggädän-dd iyyäð, jän inəttulab tekäškäšt, ad-jannen: «A-di, asməd a däx-äyyiwänän.»

Älxuṭbat wa ija Bəṭrus ašäl wa n-Fantäkawt

14 Ibdäd-dd Bəṭrus jer-imidiwän-net wi n-märəw d-iyyan, idkäl emäslinet, innä i-tamətte: «Meddən, käwänəð-i n-iməhhujaj, käwänəð-i n-käl-Älyähud əzzäɣnen Yärussälam, säjdät-ahi iket-däx-näwän, təjrahäm a-wa hawän-e-ännäx däx-älmäɣna n-a-wa ijän jere-wän ašäl-i-däx.

15 Wädden a-wa tordäm a ijan, meddən wi hannäyäm, wär-əswen asməd däx-sän ikkasän ənniyät, wär-ämmukkän a-wen ed agdəlset-däx iket ija.

16 A-wa ijän ašäl-i-däx, wär-ämoos ɣas ar tasəṭbat n-a-wa inn' ännäbi Yuwil† äzzäman wa d-äloläy, innä; innä Mässinäx:

17 <Enta da a-wa ilkämän däx-išilan wi dd-malənen,

A dd-zəzzubbuɣ Unfas-in fäll-e d t-illäm ägg-adəm,

ad-äkfäɣ mäjräd-in mədda-wän d-ešše-wän,

səssiwəðän-t-in dägg-adəm,

ad-dd-ənfilələn härätän ättunkälnen i-imawaðän-näwän,

əhhərjun imɣarän-näwän tikunen;

18 išilan-en, a dd-zəzzubbuɣ Unfas-in

fäll-eklan-in d-tiklaten-in,

əluləyän iket-näsän.

19 Ad-dd-əjməðän härätän ässuksəðnen išənnawän,

äjäɣ ijitän n-Mässinäx fäll-ärori n-äkall,

inɣəl ašni, äɣ efew, inkär äho s-išənnawän.

20 Ad-təmaɣäy təfukt, əjənät tihay,

išwəɣ ewär šund ašni təzzar,

ass-dd ašäl wa məqqärän n-älxurmät iytäs Emäli.

21 Ašäl-en, ere iɣrän isəm n-Emäli i-tinahäɣen, ad-iɣləs.>

22 Ya käl-Işrayil, säjdät i-isälan-wi-däx: ʔisa wa n-Näširät, təssanäm käwänəð iman-näwän a-s ähaləs äsinäfrän Mässinäx a ämoos, issəṭbät a-wen dat-tiṭṭawen-näwän s-tikunen d-tišušab d-ijitän n-Mässinäx wi ija jere-wän,

23 däx-a-wa itäj Mässinäx d-təlluləya-net, oyy'-iwän tərmäsäm-t, jəm iman-net s-ifassän n-inəzzulam† wi t-əsläbnen fäll-tajəttewt;

24 tidət, ämmut mäšan, ikkäs-t-dd Mässinäx däx-taməttant ta t-təzbäbät, ed wär t-illa əmmək s-t-təttäf däx-tišəm-net.

25 Isälan n-a-wen-däx a däx-äloläy ännäbi Dawəd a-s innä:

<Hannäyäɣ hak ässaɣät Emäli dat-i;

† **2:16 2:16** A-wa ännäbi dd-äzzarän i-ʔisa, äloläy däx-isälan-net səmmosät timəð n-awätay dat-tiwit-net. † **2:23 2:23** — ʔur-käl-Älyähud, ere wärän ämoos ägg-Älyähud s-aläšäl meɣ ere wärän ilkem i-äddin-näsän, iket-net, änäzzalim a ämoos. A-wen-däx a fäl tiwsaten ti iyyäðnen iket-näsän, ti n-inəzzulam. — Ašäl-i-däx, änäzzalim, äkafär (ere wärän issen s-Mässinäx).

iwar aḡil-in i-ad-ozja ənniyät-in.

²⁶ Äsidäwät a-wen ulh-in,
olwa iləs-in ed jaräḡ ätṭäma
n-ad-täns tafəkka-nin däḡ-älxer,

²⁷ wär-e təyyəd iman-in ənsan däḡ-ider n-äkall,
wär-e təyyəd Eməššeddəj-näk
rakkäh tafəkka-net däḡ-azəkka.

²⁸ Käyy a hi-issəknän tabarät ta ha tämudre,
sämmed ulh-in, äddiwät ed telled-t edes-in.>

²⁹ Meddən, käwäneḡ-i n-ayətma-ḡ, əkkasäḡ äššäk däḡ-a-wa hawän-janney:
Amḡar n-amäzzaḡ Dawəd, äba-t, izka; azəkka-net daḡ har ašäl-i-däḡ, ill'-e
diha-däḡ jere-näḡ.

³⁰ Ənta-i n-ännäbi, issan fäll-ärkäwäl wa has-ihäḡ Mässinäḡ a-s has-innä:
<Ilkam ad-isəbdəd däḡ-edägg-net iyyän
däḡ-ihäyawän-net däḡ-təmmənukəla.>

³¹ A-s ijänna Dawəd a-wen, ihannäy däḡ-ijəj tanäkra n-Älmasex jer-
inəmmuttan ed äru d-äloläy Dawəd däḡ-isälan n-a wa s-ilkam ad-äj. Ənta-
en-däḡ a däḡ-ässewäl Dawəd a-s innä:

<Wär-e təyyəd tafəkka-nin təjar-in däḡ-azəkka,
wär-e təyyəd tafəkka-nin rakkäh däḡ-azəkka.>

³² ʔisa-i s-hawän-heḡ isälan-net, näjjəyha i-asənkär wa t-dd-ija
Mässinäḡ jer-inəmmuttan təzzar

³³ iḡkäl-t s-išənnawän, äšḡäym'-e daw-aḡil-net i-ad-immukəl, ikf'-e Abba
Unfas Šaddijän wa s-ijjäš ärkäwäl-net, äzzäbbät-t-dd daḡ fälla-näḡ,
äsnäfläy-anäḡ däḡ-s, ənta-den-däḡ a-wa dd-oräwän a-wa s-sälläm d-a-wa
hannäyäm ašäl-i-däḡ.

³⁴ Ännäbi Dawəd ya, təssanäm a-s wär-imməḡkäl s-išənnawän ed ənta
iman-net a innän:

<Innä Emäli Mässinäḡ i-Emäli-nin:
Əyyäw, ḡayəm, täxkəməd daw-aḡil-in

³⁵ hundäḡ har äjäḡ išənja-näk isəkkukal daw-iḡarän-näk.>

³⁶ Ašäl-i, əlmədnet käl-Işrayil iket-däḡ-näsän a-s ʔisa wa təşläbäm fäll-
tajəttewt, ənta a ija Mässinäḡ Emäli d-Älmasex!»

Älmässexitän wi äzzarnen

³⁷ Iḡäs mäjräd wa ija Bəṭrus ulhawän n-äddinät wi has-äsijädnen,
ənnän-as ənta d-inəmмуšal wi iyyäḡnen: «Ayətma-näḡ, ma hanäḡ-
iwarän?»

³⁸ Inn'-asän Bəṭrus: «Utabät, tətweşəlmäḡäm iket-näwän däḡ-aman
s-isəm n-ʔisa Älmasex, i-ad-təjrəwän tenäšše n-ibäkkəḡän-näwän, äkf'-
iwän Mässinäḡ Unfas Šaddijän,

³⁹ ed ärkäwäl wa ijjäš Mässinäḡ, käwäneḡ d-ihäyawän-näwän d-äddinät
wi əzzäḡnen däḡ-ijəj, d-e d t-illäm ere dd-iḡra Emäli-nänäḡ Mässinäḡ s-
iman-net a-s t-ija.»

⁴⁰ Ij'-asän Bəṭrus isälan äjjootnen, isatbat härätän data-sän, isamätar-
tän, ijann'-asän: «Agəzät iman-näwän däḡ-əzzurəyät-ta-däḡ təfräḡät.»

⁴¹ Äddinät wi omännen s-a-wa ätwännän, ätwäsälmäḡän däḡ-aman;
ämoos a-s, käraḡ afdän n-äwadəm ašäl-wen-däḡ a dd-əwwäḡnen fäll-
imümənän.

Anməṭṭaf wa t-illän jer-imümənän

42 Ekfän imumənän iket-däx-näsän iman-näsän i-a-wa tän-säxren inəmмуšal, oharän ittus, tužanän amənsi wa šaddijän n-tasäktot, tēddalän Mässinäx.

43 Təjjäš tuksəda n-Mässinäx tamətte iket-net, fäl-a-s tamašalän inəmмуšal tišušab d-ijitän n-Mässinäx äqqannen eḡäf.

44 Änimättafän imumənän iket-däx-näsän jer-iman-näsän, əzzaḡän iyyän n-edägg, tihəron a-wa ətṭäfän,

45 žänš'-en-in a-wa län däx-ehäre, ad-tužanän älqim-net s-a-wa dār-ogdähñät timḡutar n-hak iyyän däx-sän.

46 Äkoyädän hak ašäl s-iiyyän n-ənniyät däx-ažəmmäx däx-təfarre n-ehän n-ämudd wa mäqqārän, tihəron imənsiwän däx-ihənan-näsän s-iman äddiwätnen; a-wa təjjän iket-net, il' əmmək,

47 tiimələn Mässinäx, ässiimḡārän-tän äddinät iket-näsän. Isawaḡ-dd Emäli hak ašäl fäll-älžəmayät-näsän äddinät wi iḡalläs.

3

Anäbdon wa äzozäyän inəmмуšal

1 Ašäl iyyän, ikka Bəṭrus ehän n-ämudd wa mäqqārän, äddeew d-Exya i-ämudd wa n-tezzar.

2 Älwäqq-wen-däx daḡ, ad-dd-ämewäy s-emm n-ehän n-ämudd wa s-itawänna: «Tihusay», ähaləs s-a-s dd-iwa-däx ibdan. Hak ašäl dihen-däx a t-sänsen äddinät-net i-ad-itattär takute däx-äddinät wi dd-tajjäsñen ehän n-ämudd.

3 Inhäy Bəṭrus d-Exya äbokän uješ n-ehän n-ämudd ḡas, izzäl-asän äfuss.

4 Ikn'-e Bəṭrus d-Exya azəjjəzz təzzar, inn'-as Bəṭrus: «Ekən däx-näx akäyad.»

5 Iknä däx-sän ähaləs akäyad, ijar ätṭäma n-ad-t-əkfen härät

6 mäšan, inn'-as Bəṭrus: «Wär leḡ oräḡ wäl' azrəf mäšan, a-wa leḡ, hakkäx-ak-t s-isəm n-ḡisaÄlmasex wa n-Näširät: əbdəd, ärjəš.»

7 Äšhätäl-as-dd Bəṭrus s-äfuss-net wa n-aḡil, issəbdäd-t. Iqqäl-dd äššahät idarän-net d-timzəzzəden-net ässaḡät-wen-däx;

8 ijä-dd tiyyät teggedt, irjäš, änmäjjäš dār-sän ehän n-ämudd, itaggäd a-wa-däx has-təja tedäwit, itiiməl Mässinäx.

9 Ənhäyän-t äddinät iket-näsän irjäš, itiiməl Mässinäx,

10 əzzäyän-t ḡas, ad-jannen: «Ak, wa wädden emädäl wa s-härkuk äqqiima dat-emm wa ähusken n-ehän n-ämudd wa mäqqārän.»

Ənhäyän a-wa däx-s ijän ḡas, äqqänän iḡäfawän-näsän, tof'-en təkunt n-a-wa ijän.

Iffəssär Bəṭrus i-tamətte älmäḡna n-azuzi wa jän i-änabdon

11 İltäx ähaləs-ənnin Bəṭrus d-Exya, unjäy fäw dār-sän ibda. Tošäl-dd tamətte iket-net s-edägg wa däx-əbdädän s-itawänna tisudaf n-ehän wa n-Suläyman, äḡläyḡäläyän-tän-dd äddinät tufa təkunt n-a-wa ijän.

12 Inhäy Bəṭrus awnaf wa hasän-ämoosän ḡas, inn'-asän: «Käl-İşrayil, ma s-däx-näx təkyadäm s-əmmək-wa-däx šund a-s näkkəneḡ d-iman-nänäx, meḡ s-iqqud-nänäx dat-Mässinäx a-s nəzozäy ähaləs-i-däx?

13 Mässinäx wa n-Ibrahim d-İsxaqq d-Yaḡub, ənta-i n-Mässi-s n-abbatän-nänäx, ənta a idkälän s-älxurmät-net, akli-net ḡisa-wa tästärmäsäm təzzar, täkkuddäläm-t dat-Bilatəs-i a-s itäj a-wen-däx, äbook ad-t-in-isəwwəyy mäšan,

14 kăwăneḍ tăkkuddälăm Eməššeddəj d-Ămayḍal, təttărăm dăḡ-ămănokāl ad-hawăn-dd-isəwwəyy emăjj n-iman,

15 jăm iman n-ămănokāl wa ihakkăn tāmudre măšan, issenkăr-t-dd Măssinăḡ jer-inəmmuttan, năkkăneḍ a-s tjuhawen-net.

16 Ɛlmədät a-s s-tărna n-isəm n-Ŷisa d-təssəba n-immun wa sār-s nəja, a fäl hannăyăm āhaləs-wa-dăḡ təzzayăm, har t-dd-iqqāl əššahăt-net data-wăn; immun s-isəm n-Ŷisa a əzozăyăn āhaləs-i-dăḡ hannăyăm ibdăd data-wăn.

17 Ămăra ayətma-ḡ, əssanăḡ a-s a-wa təjăm kăwăneḍ d-imizărăn-năwăn, əlžăhalăt a dăḡ-t təjăm,

18 a-wa ijăn, a otas Măssinăḡ i-ad-isətbət a-wa s-ăru d-ălölăyăn ənnăbităn dăḡ-isălan-net, a-s ənnăn a-s Ălmasex, ad-inhəy aḡăna təzzar innukəl.

19 A-wa ənnăn, ijă, a-wen-dăḡ a fäl əmăra, mujrəzăt ibăkkăḍăn-năwăn, tutabăm i-ad-hin-aməs Măssinăḡ ibăkkăḍăn-năwăn,

20 izəzzubbət-dd fälla-wăn išilan n-ălxeḡ, i-ad-hawăn-dd isuxəl Ŷisa-i n-Ălmasex əsnăfrăn-i s-ămăra-dăḡ,

21 ih' isənnawăn har ašăl wa d-mad-isəynəy Măssinăḡ hărăt iket-net, s-əmmək wa s-ăru tăn-innă s-imawăn n-ənnăbităn-net wi n-iməššeddəjăn.

22 Dăḡ-isălan n-a-wen-dăḡ, ad-inn' ənnăbi Mosa:

<Ad-hawăn-dd-isəssiwəy Emăli Măssinăḡ
ənnăbi dăr-toharăm temiḍt, dăr-i olăhăn,
săjdăt i-a-wa hawăn-e-ənn iket-net.

23 Ere unjăyăn s-asjəd-has,
ad-ăbas əḍḍiin dăḡ-tamətte n-Măssinăḡ, əmmătet.>

24 Ămăra, ənnăbităn iket-năsăn, ḡur-Sumăyla har wi t-dd-əšrăynten, əlölăyăn iket-dăḡ-năsăn dăḡ-isălan wi s-hanăḡ-sallăm nəttajj'awăn-tăn ašăl-i-dăḡ.

25 Kăwăneḍ a-s iməkkusa n-ənnăbităn-win-dăḡ ed tăkosăm ərkăwăl wa ohăr Măssinăḡ d-abbatăn-nănăḡ ašăl wa d-innă i-Ibrahim:

<S-isəm n-əzzurəyăt-năk a-s mad-ijjəš
əlbăraka tiwsaten n-ăkall iket-năsăt.>

26 Təssəba-năwăn kăwăneḍ, s-tizarăt, a fäl dd-issenkăr Măssinăḡ akli-net, Ŷisa Ălmasex, əšməšăl-t-dd sār-wăn i-ad-dăḡ-wăn əj əlbăraka, təbḍəwăm d-erk imojjan-năwăn.»

4

1 Ămmiirăd Bəḡrus d-Exya hărwa i-tamətte a-s tăn-dd-osăn hărăt dăḡ-kăl-tikutawen, əddewăn d-emănnăhăḍ n-ehăn n-ămudd wa măqqărăn d-kăl-şadus.

2 Asḡăf-tăn asəḡăr wa təjjăn inəmмуšal i-tamətte ed, jannen i-ăddinăt a-s Ŷisa Ălmasex, inkăr-dd jer-inəmmuttan,

3 ərmăsăn-tăn, jăn-tăn dăḡ-takărmuḡ har əffăw ed a-s ităjj a-wen-dăḡ, ijjaš-dd ehăḍ.

4 Omănăn əddinăt əjjootnen əslanen i-măjrăd wa jăn, a-wa ətubăn dăḡ-ašăl-wen-dăḡ, iwwăḍ səmmos afdăn n-ăwadəm.

5 Əffăw ḡas, əžžəmmăḡăn-dd imizărăn n-kăl-Ălyăhud d-inušămăn d-əlyulam n-Ăḡḡăwrăt wi hănen Yărussălam

6 d-Hənnan wa n-ămănokāl n-kăl-tikutawen d-Qayăf d-Exya d-Ălxăḍer d-kăl-ehăn n-ămănokāl n-kăl-tikutawen iket-năsăn.

7 Ǝssəbdädän-dd Exya d-Bəṭrus jere-sän, ənnän-asän: «Käwäneḍ, ma tämoos tärna d-isəm wa s-täjjäm a-wa täjjäm?»

8 Äzzubbät-dd Unfas Šaddijän s-äššahät föll-Bəṭrus ässaḡät-wen-däḡ, inn'-asän: «Imizärän n-käl-Älyähud, käwäneḍ-i n-inušämän,

9 asəstan a hanäḡ-tajjäm ašäl-i-däḡ, däḡ-isälan n-a-wa ähusken ätwäjjän i-anäbdon d-əmmək wa s-iḡläs.

10 Närha ad-təlmədäm iket-näwän, käwäneḍ hakd käl-Išrayil wi iyyäḍnen a-s tärna n-isəm n-Ḳisa Älmasex wa n-Näširät təšläbäm föll-tajəttewt mäšan, issenkär t-dd Mässinäḡ jer-inəmmuttan, tärna-net ənta-en-däḡ a täzozäyät ähaləs wa hannäyäm ibdad data-wän.

11 Ḳisa, ənta a-s tähunt ta hin-järäm käwäneḍ-i n-älbännatän mäšan, tämoos-dd tähunt ta n-aḡmär föll-insa ehän iket-net.

12 Wär t-illa əlḡəllas ar s-isəm wa-net föll-a-s wär t-illa isəm ikfa Mässinäḡ daw-išənnawän i-əlḡəllas n-dägg-adəm säl wa-net.»

13 Islä älzämaḡät i-əššuhu n-mäjräd wa hasän-ija Bəṭrus d-Exya ḡas, tof'-en täkunt-näsän, ed jan-tän äddinät əžhalnen wären əḡra mäšan, əlmädän a-s Bəṭrus d-Exya, ämoosän inalkimän n-Ḳisa.

14 Darät-a-wen daḡ, anäbdon-wa izzäyän, ənta-da-däḡ ibdädän edes-hasän, äbas əssanän a mad-ənnən.

15 Ǝzzəzjārän Bəṭrus d-Exya ehän wa däḡ-ḡattäsän äššäreḡa iket-di d-tamänhayän əntäneḍ.

16 Däḡ-taḡimit-näsän, ənnän: «Wi äddinät, ma hasän-e-näj? Iji n-Mässinäḡ wa ijän, wär t-iha äššäk ed əssanän sär-s käl-Yärussälam iket-däḡ-näsän, wär näddoobät akuddəl-net.

17 Ämära, i-ad-wär səməlsin isälan-wi-däḡ föll-tamətte, nəsemmähäḍet fölla-sän i-ad-äbas ilkam ad-jan isälan n-isəm n-Ḳisa i-äwadəm wäl' iyyän, olasän ḡas, äminänhayän d-iman-näsän.»

18 Ǝssäḡrän-dd Bəṭrus d-Exya darät-a-wen, äsmäqqän fölla-sän i-ad-äbas ilkam ad-äḡran wäla ässiḡrän isəm n-Ḳisa i-äwadəm wäl' iyyän.

19 Äwwežäbän-asän, inn'-asän Bəṭrus d-Exya: «Ǝssənät käwäneḍ iman-näwän kunta ma ufän asjəd-hawän käwäneḍ, meḡ asjəd i-Mässinäḡ?

20 Däḡ-a-wa hanäḡ-dd-iqqälän näkkäneḍ, wär näddobät asusəm föll-isälan nənhay, nəsl'-asän.»

21 Oläs älzämaḡät asəmmähəḍ däḡ-sän təzzar, oyyän-tän-in ed wär t-illa uḍlem fölla-sän əjrawän. Täqqäl-dd tamətte iket-net, tiiməl Mässinäḡ föll-təssəba n-a-wa ija.

22 Anäbdon-wa izzäyän, ähaləs ilan a okäyän əkkožät timərwen n-awätay.

Tittar ti jän imumənän darät a-s dd-ätiwäyya Exya d-Bəṭrus

23 Ätwäyyän-in inəmмуšal ḡas, əkkän imidiwän-näsän, əjän däḡ-sän isälan n-a-wa ənnän imänokalän n-käl-tikutawen d-inušämän.

24 Ǝslän i-isälan-en-däḡ ḡas, əṭṭäfän iyyän n-əmm, ad-təddalän Mässinäḡ s-afälla, jannen: «Emäli, käyy a dd-ixläkän išənnawän d-äkall d-ejärew wa səmmän d-a-wa tän-ihän iket-net,

25 käyy a innän s-tärna n-Unfas Šaddijän s-əmm n-abba-nänäḡ Dawəd-i n-akli-näk:

<Ma däḡ-ədgaznät tiwsaten?

Ma ijan äddinät däḡ-a wären infa härät?>

26 Ma äsihälän imänokalän əššənju-näk, tiherən d-imännähäḍän əmm föll-Emäli d-Älmasex-net.

27 Itbat a-s ijäð Bunəs Bilatəs d-Harudəs akli-näk Үisa Wa n-Eməššeddəj täsnäfränäd i-ad-umas Älmasex. Ohärän fälla-s emm əntäned d-tiwsaten ti n-inəzzulam† d-käl-Işrayil dəx-Yärussälam.

28 A-wen jän-t i-ad-itbat erhet-näk d-a-wa s-äru t-dd-täxtäsäd.

29 Ämära Emäli, agəz-anəx dəx-äššar-näsän, təkfed eklan-näk ənniyät ozjan s-äxtäbän mäjräd-näk.

30 Ilal-anəx s-tärna n-äfuss-näk i-ad-nəzizuy äddinät, näj tikunen d-tišušab s-isəm n-akli-näk Үisa Wa Šäddijän.»

31 Diha-dəx d-əssəmdän tamädilt n-Mässinäx, ad-äškädkäð edägg-wənnin-dəx dəx-äžziimməxän, idnay-tän Unfas Šäddijän iket-näsän, ad-xatṭäbän mäjräd n-Mässinäx s-ənniyät ozjan.

Tassayt ta t-təllät jer-älməssexitän

32 Itṭaf älzämaḡät wa n-imumənän iyyän n-ulh d-iiyän n-ənniyät, wär tän-iha fäw ere ijannen a-wa i-nin wäla a-wa i-nin, änn-ak tihərən a-wa län iket-net jer-iman-näsän.

33 Tajäyhen inəmмуšal s-tärna täšsohet, xatṭäbän i-äddinät tanäkra-ta dd-ija Emäli Үisa jer-inəmmuttan, ässinsa dəx Mässinäx ännuymət-net s-äššahät fälla-sän iket-näsän.

34 Wär tän-iha fäw ere ämiḡatärän s-härät, žänš'-en-in dəx-sän wi länen išəkraš d-iḡanan,

35 tiwəyən-dd älqim n-a-wa tän-in-əžžənšän, sans'-en-t dat-inəmмуšal i-ad-t-užanän jer-imumənän. Hak äwadəm, ijraw s-a-wa dār-ogdāhnät timḡutar-net.

36 Osä-dd Yusəf wa n-ahäya n-Lewi, il' äkall wa n-Qəbrus, ḡarrän-t inəmмуšal s-isəm Bärnäbbas, a-wen älməḡna-net: enəssesmäð n-talḡiwen. İžžənša-hin ašəkrəš-net,

37 iwwäy-dd a-wa t-in-ižžənša, ikf'-e inəmмуšal.

5

A-wa ija Änanyas d-hänne-s Säfiya

1 Dəx-a-wen-dəx a dd-iggäd Änanyas ənta d-hänne-s Säfiya, ižžənša-hin ašəkrəš-net

2 mäšan, änmännäk d-hänne-s fäll-ad-hin-itṭəf ayil n-älqim n-inäzzan-net, awəy-dd a-wa iyyäðän i-inəmмуšal.

3 Osä-dd ḡas, inn'-as Bəṭrus: «Änanyas! Mafäl təyyəd Iblis itajj erk ənniyät ogdähän d-a-wa-dəx dəx ulh-näk? Ma käy-isawännen bahu i-Unfas Šäddijän a-s hin-tatṭäfäd ayil n-älqim n-ašəkrəš-näk?

4 Mi käy-äšhäššälän inäzzan-net? Ajän wädden jer-inša-hin wäla, i n-näk ḡas, täddobed ad-has-təjəd a-wa s-tärhed. Ma dd-oräwän sār-k erk əššəḡəl-wa-dəx? Elməd a-s wädden dägg-adəm a-s tənned bahu, Mässinäx a-s tän-tənned.»

5 Islä Änanyas i-tifer-tin-dəx ḡas, oða, əjmäðän-t iman. Ämoos a-wen isəksað i-äddinät wi əslänen i-a-wen-dəx.

6 Osän-dd härät dəx-imawaðän, əssəlsän-in tafəkka-net, əḡlän dār-s, ənbälän-t-in.

7 Okäy a iwwäðän kərəð ässaḡätän çarät-a-wen ḡas, tosä-dd hänne-s n-Änanyas, wär tät-təha tijya n-a-wa ijän.

† 4:27 4:27 — Үur-käl-Älyähud, ere wärän ämoos ägg-Älyähud s-aläsäl meḡ ere wärän ilkem i-äddin-näsän, iket-net, änäzzalim a ämoos. A-wen-dəx a fäl tiwsaten ti iyyäðnen iket-näsnät, ti n-inəzzulam. — Ašäl-i-dəx, änäzzalim, äkafär (ere wärän issen s-Mässinäx).

⁸ Təjjäš-dd ɣas, issəstän-tät Bəṭrus, inn'-as: «Säfiɣa, läɣät-ahi, ak ajän älqim-wa-däɣ a-s hin-təžžənšäm ašəkrəš meɣ?» Tənn'-as: «Ḥyya!»

⁹ Inn'-as Bəṭrus: «Ma sār-wän dd-orāwän tanmənnakt šund-ta-däɣ, tiirəməm Unfas Šaddijän? Ənhəy adəriš n-əddinät wi s-iket hin-ənbälän ähaləs-näm, əqqälän-dd, əbdadän dat-əmm n-ehän i-ad-käm-awəyän kämm-däɣ.»

¹⁰ Todä älwäqq-wen-däɣ daw-ıdarän n-Bəṭrus, tämmut ənta-däɣ s-ıyyät. Ədkälän-tät imawaḍän, əzkän-tät edes i-ähaləs-net.

¹¹ Orāw-dd a-wen-däɣ taksädt-i-däɣ mäqqärät fäll-älkänisät iket-net d-əddinät wi ıyyäḍnen əslänen i-a-wa ijän.

¹² Əjän inəmмуšal ijitän n-Mässinäɣ d-härätän əssuksäḍnen əjjootnen dat-əddinät. Tažəmmaxän imumənän n-Ḥisa hak ašäl däɣ-ehän n-ämudd wa mäqqärän edes i-täfala ta s-itawänna ta n-Suläyman. Əknan tassaɣt, əṭṭafän ıyyän n-əmm,

¹³ wädden ere dd-ıggädän-däɣ, ad-fälla-sän dd-iwwaḍ, əssiimɣärän-tän əddinät.

¹⁴ Tiwwaḍän-dd fälla-sän meddən d-tıdeḍen əjjootnen omannen s-Emäli.

¹⁵ Tiwəyän-dd sār-sän əddinät imarhinän, säns'-en-tän fäll-isəftaɣ däɣ-ıttus n-ad-tän-täls kud-däɣ tele n-Bəṭrus afäl okäy, ed ere təlsa tele-net däɣ, ad-ızzəy.

¹⁶ Təffälän-dd əddinät ıyərman wi ohäznen, tişələn-dd s-Yärussälam äwwayän imarhinän d-iməlšan, zizuyän-tän inəmмуšal iket-däɣ-näsän.

¹⁷ Iggäd-dd ämänokal n-käl-tikutawen, osäm hullan ənta d-ıyyäḍ sār-s oraknen n-taggayt ta təglät fäll-tidət n-iman-net, s-itawänna ta n-käl-sadus, änmännakän i-ad-əjrəwän əmmək s-äɣšädän härät i-inəmмуšal.

¹⁸ Ästärmäsän-tän, əjän-tän däɣ-takärmüt ta mäqqärät.

¹⁹ Mäšan, osä-dd ənjälos dd-äšimašäl Mässinäɣ s-ehäḍ, ora tishar n-takärmüt, ızzəzjār-tän-dd təzzar, inn'-asän:

²⁰ «Äkkät ehän n-ämudd wa mäqqärän, təxtəbäm i-tamətte isälan n-tämudre ta täylälät.»

²¹ Əjän inəmмуšal a-wa hasän-ätwännän, ənšäyän ehän n-ämudd wa mäqqärän ad-däɣ-s saɣren əddinät. Älwäqq wa dd-osa ämänokal n-käl-tikutawen ənta d-əddinät wi sār-s oräknen, issäɣrä-dd käl-Sinhidrin wi n-imizärän n-käl-Älyähud ɣattäsnen əššərəɣa, d-inušämän n-käl-Işrayil wi ıyyäḍnen, omärän s-ad-dd-ättälwäyän inəmмуšal däɣ-takärmüt.

²² Əglän əssärdusa mäšan wär tän-in-ogežän däɣ-səllul-näsän, əqqälän-dd, əjän isälan däɣ-älžəmaxät wa äqqimän, ənnän-asän:

²³ «A-s hin-nosa takärmüt, äṭṭubben imawaḍ-net, əbdadän əssardusa wi tät-äɣläfnen däɣ-idəggan-näsän mäšan, älwäqq wa d-nora səllul, wär t-təha tiṭṭ.»

²⁴ Islä kumända wa ännihädän däɣ-əssärdusa wi jänen ənniyät i-ehän n-ämudd wa mäqqärän d-ämänokal n-käl-tikutawen i-a-wen ɣas, äqqänän ıyäfawän-näsän har äbas əssanän a mad-ənnən.

²⁵ Osä-dd ämaway n-isälan, inn'-asän: «Meddən wi jäm däɣ-takärmüt, han ehän n-ämudd wa mäqqärän, saɣren däɣ-s tamətte.»

²⁶ Iggäd-dd kumända äddew d-əjhän n-əssärdusa, əlwäyän-dd inəmмуšal s-tiläqqad, ed äksuḍän ad-fälla-sän dd-təggəd tamətte əntäneḍ-en-däɣ, täkf'-en sämmäjori n-tihun.

²⁷ Osän-dd ɣas, äššojäšan-tän ehän wa däɣ-äqqiima älämaxät wa n-ämänokalän. İdkäl ämänokal n-käl-tikutawen mäjräd, innä i-inəmмуšal:

28 «Ajän wädden äru d-fälla-wän näsmähäq i-ad-äbas ilkam ad-tässiyräm äwadəm wäl' iyyän s-isəm-wa-däx? Īnhöywät xas a-wa jäm ämära, təkäräm-anäx Yärußälam iket-net teḡäre-näwän, tärham day qarät-a-wen, ad-hanäx-səwərəm iman n-ähaləs wa s-jannem.»

29 Äwwežäb-asän Bəṭrus d-inəmмуšal: «Ufa amišəl n-a-wa innä Mässi-näx uhən asjəd i-a-wa jännen dägg-adəm.

30 Mässi-s n-abbatän-nänäx, ad-dd-issənkarän Ḳisa wa s-jäm iman-net a-s t-təşläbäm fäll-tajəttewt,

31 təzzar idkäl-t s-iman-net, äşḡäym'-e daw-aḡil-net i-ad-immukəl, umas Ämaḡlas fäll-härät iket-net. A-wen ij'-e Mässi-näx i-ad-utabän käl-Işrayil, əjrewän tenäşe n-ibäkkadän-näsän.

32 A-wen, näjjəyh'-as iket-net, äjjəyh'-as day Unfas Şaddijän-i ikfä äddinät wi tamaşalnen erhet-net.»

33 Äfdändärräy älzämaḡät däx-älhäm a-s islä i-a-wen-däx, ad-tattärän əmmək s-tän-in-olämän fäll-äröri n-äkall.

34 Kittəwän a-wen-däx a-s, dd-ibdäd jere-sän iyyän däx-sän la taggayt ta n-käl-faris s-isəm-net Gamälyäl, äḡalim äzizäbben alämär wa n-ännäbi Mosa a ämoos, tässiimyär-t day tamətte iket-net. Omär s-ad-zəzjärän inəmмуšal i-härät n-ässaḡät təzzar, inn'-asän:

35 «Käl-Işrayil, äjät ənniyät i-a-wa s-täbokäm ad-t-təjəm i-meddän-wi-däx;

36 əktəwät-dd xas Tadi wa s-a ilan äzzäman dd-osa, iji iman-net härät dat-äddinät, äsläl qarä-s a iwwädän əkkožät timaḡ n-äwadəm mäşan, wär-ähoja a-s ätwäjjän iman-net, əmmähäşän inalkimän-net, äbä-dd isälan-näsän qarät-a-wen.

37 Qara-s day, däx-äzzäman wa n-täqint n-äddinät, osä-dd Yähudəs wa n-Galila, äsläl ənta-däx tamətte täjjeet qarä-s mäşan, ämmut ənta-däx, əmmähäşän inalkimän-net.

38 Ämära, äyyät-ahi ad-hawän-äjäx äddäbara: əjmädät isälan n-äddinät-wi-däx, äkfät-tän äḡafyät, təyyəm-tän ad-əglun fäl-a-s tiyyät-i-däx, kunta a-wa tän-işlän, erhet n-ägg-adəm meḡ a dd-ifalän dägg-adəm, adiş, ad-t-in-iba

39 mäşan, kunta Mässi-näx ad-dd-ifal a-wa tän-işlän, adiş, wär has-lem tärna. He käwäned! Wär-itumaset a-s Mässi-näx a dār-tät-jam.» Äsjäd älzämaḡät iket-net i-äddäbara-wen-däx hasän-ija Gamälyäl.

40 Īssäyrän-dd inəmмуšal, äswäjjän däx-sän tiwit s-ibärtäkän, äsmähäqän däx-sän i-ad-äbas ilkam ad-ämmijrädän s-isəm n-Ḳisa təzzar, äswäyyän-tän-in.

41 A-s fälän inəmмуšal ehän-en-däx, əknan däx-tedäwit fäl təssəba n-turhajät ta tän-ikfa Mässi-näx n-ad-ənhöyän erk əmmək şund wa-däx, däx-idəm n-Ḳisa.

42 Täzämḡän qarät-a-wen hak aşäl däx-ehän n-ämudd wa mäqqärän, d-ihänan n-imumənän wi iyyädnen. Wär t-illa edägg s-wädden xaṭṭabän däx-s, saḡren däx-s Älənžil n-ḲisaÄlmasex.

6

İssa inušämän wi ənnəfrännen

1 Äzzäman-en, hak aşäl tiwwädän-dd imaksadän n-Mässi-näx däx-wi əlkamnen i-ättäbeḡa wa n-käl-Älyunan† fäll-älzämaḡät wa n-imumənän.

† 6:1 6:1 Itawann'-asän: Gərictän. (Les Grecs däx-Təfränsit). İzzaḡän Erobbä däx-äkall wa itawänna: Gəris (La Grèce däx-Təfränsit). Tawalt-näsän: Tälyunanit.

Däx-a-wen-däx, ad-ikka mäjräd jer-käl-Älyähud wi ezzäyenen jer-käl-Älyunan d-käl-Älyähud wi sawalnen Yabranəyya. Ənnän wi n-käl-Älyunan, timəddun wi n-Yäbranitän tinuđafen-näsän däx-isälan n-tizunawen n-tadhəlt ta tadjän hak ašäl.

² Əssäxrän-dd inəmмуšal wi n-märaw d-əssin tamətte ta n-inəttulab, ənnän-asän: «Wär-ənhäjja ad-näyy älxuṭbät n-isälan n-Mässinäx, näqqəld-dd nännuṭṭäf d-tizunawen n-imənsiwän.

³ A-wen-däx a fäl, sənnəfrənät jere-wän əssa meddən ätiwäsəmyärnen, idnay Unfas Šaddijän n-iməssorha, ännuṭṭäfnen d-əššəxəl-wen-däx,

⁴ dihen, näkkəneḍ, ad-näkf iman-nänäx tamədilt n-Mässinäx d-älxuṭbät hak ašäl n-mäjräd-net.»

⁵ Ijräz äddäbara-wen-däx i-älžəmaṭ iket-net, innəfrän-dd Stifan,† a-wen əhaləs n-immun imdan, idnay Unfas Šaddijän d-Fəlibb d-Brukurus d-Nikanur d-Timun d-Bärmenas d-Nikola wa n-teje ta n-Intyuš s-käla ilkam i-äddin wa n-käl-Älyähud.

⁶ Meddən-win-däx a dd-issəbdäd älzəmaṭ dat-inəmмуšal, əttärän-asän s-Mässinäx təzzar, əswärän-tän ifassän-näsän, jän däx-sän älbäraka.

⁷ Ad-xaṭṭäbän əntəneḍ mäjräd n-Mässinäx, tijatän-dd fälla-sän hak ašäl imumənän əynaynen däx-Yərussälam. Omänän fəw käl-tikutawen äjjootnen, ad-tamašälän əntəneḍ-däx, a-wa innä mäjräd n-Mässinäx.

Ajəyh wa ija Stifan dat-tamətte

⁸ Stifan, əmoos əhaləs s-tidət-däx, fäll-əssinsa Mässinäx ännuxmət-net d-tärna-net, itamašal härätän äqqannen eṭäf d-ijitän n-Mässinäx dat-tamətte iket-net.

⁹ Əggädän-dd meddən ila ehän n-äddin wa n-käl-Älyähud s-itawänna «Idärfan», əntəneḍ d-iyyəḍ dd-falnen Qərwan d-Iskändərya d-tajiwən ti n-Silisi d-ti n-Azya, ad-taməzaṭän d-Stifan,

¹⁰ mäšan indär-asän ad-t-siḍəwən däx-mäjräd fäl tihusay n-särho wa t-ikfa Unfas Šaddijän.

¹¹ Əglän, əžžənsän imawän n-äddinät iyyəḍ i-ad-t-sədləmən, ənnän, əslan-asän har əskafar, innä daṭ a läbasän fäll-ännäbi Mosa d-Mässinäx.

¹² Əntäjän-dd s-a-wen-däx tamətte d-imizärän-net d-älxulam n-Äṭṭäwrät. Wäla a hin-ijrah Stifan a-s fälla-s oḍän äddinät, əwwäyän-t s-käl-Sinhidrin wi n-imizärän n-käl-Älyähud ṭattəsnen äššəreṭa.

¹³ Äwwäyän-dd daṭ tjuhawen n-bahu ənnänen: «Əhaləs-i-däx, wär käla okäy ašäl d-wär-innä a läbasän fäl ehän n-Mässinäx wa šaddijän d-alämär wa n-Mosa.»

¹⁴ Təhhaḍän, jannen: «Ijmaḍ-t äššäk a-s nəsl'-as har innä a-s ilkam, ad-ärz Yiša wa n-Nəširät ehän n-ämudd wa mäqqärän, isəmməskəl älxadatän wi hanäx-dd-oyya ännäbi Mosa.»

¹⁵ Iqqäl-dd älzəmaṭ iket-net əsibäläläx däx-Stifan, iqqäl-dd sār-sän a-s ənjəlos a däx-əkyadän fäl tihusay-i-däx dd-ija idəm-net.

7

Älxuṭbät wa ija Stifan i-käl-Älyähud i-ad-tän-dd-isəktəw a-wa innä Mässinäx

¹ Issəstän əmänokal n-käl-tikutawen wa mäqqärän Stifan† ḍarät-a-wen, inn'-as: «Käyy, a-wa ätwännän fälla-k, ak tidət meṭ bahu?»

† 6:5 6:5 Jannen-as iyyəḍ: Älmüştafa. † 7:1 7:1 Jannen-as iyyəḍ: Älmüştafa.

2 Inn'-asän Stifan:

«Ayətma, abbatän, säjdät-ahi: Mässinäḡ-i ilän älxurmät iket-net, ənta a dd-änfalälän i-abba-nänäḡ Ibrahim härwa izzaḡ äkall wa n Mizəbbuḡamya, härwa wär dd-iddek äkall wa n-Haran.

3 A-s has-dd-änfaläl Mässinäḡ, inn'-as:

<Əfəl äkall-näk d-imärawän-näk, tähanəd s-äkall wa käy-mad-säknäḡ.>

4 Ähona ya Ibrahim, ifäl äkall wa n-Käldäyän, iddäk wa n-Haran.

5 Äba abba-net dihen ḡas, inn'-as Mässinäḡ, ad-ähän s-äkall-wa-däḡ, təzzaḡäm ašäl-i-däḡ. Äkall-en, wär däḡ-s ikfa Mässinäḡ Ibrahim täkasit n-wäla edägg däḡ-ässinsa aḡär-net mäšan, ijjäš-as ärkäwäl n-ad-t-äkf äkall-en-däḡ ənta d-ihäyawän-net. A-s has-ijänna Mässinäḡ a-wen-däḡ, wär-ila Ibrahim ara.

6 Inn'-as Mässinäḡ äzzäman-en:

<Ihäyawän-näk ad-umasän imäjarän däḡ-äkall wär len, ad-äkkälän, ənhöyän aḡäna har əkkoḡät timaḡ n-awätay

7 mäšan, ad-hasän-əkkəsäḡ tekäriḡt,

əšräḡäḡ äkall-en tän-äskälän,

zəzjäḡ-asän-t-dd, äḡbədän däḡ-edägg wa-däḡ tän-əkfeḡ.>

8 Ijjäš Mässinäḡ ärkäwäl n-tassaḡt i-Ibrahim, ärkäwäl-en, amili a-s tamätart-net. A-wen-däḡ a fäl ikräš Ibrahim Isxaqq, äsmaläy-t ašäl wa s-əttam; a-wen-däḡ daḡ a ija Isxaqq i-rure-s Yaḡub, ij'-e daḡ Yaḡub i-məddana-s wi n-märaw d-əssin i n-imḡarän n-imäzzaḡän n-tiwsaten-nänäḡ ti n-märawät d-sänatät.

9 Osämän ḡarät-a-wen məddana-s n-Yäḡub wi n-imḡarän n-imäzzaḡän fäll-Yusəf-i n-ənḡa-sän, əzzənšän-t-in i-ad-äkkälät däḡ-Mişra mäšan, issän Mässinäḡ däḡ-Yusəf däḡ-äkall-wen-däḡ.

10 Wär t-illa erk əmmək däḡ-wär t-dd-ikkəs Mässinäḡ, issənsä fällas ännuḡmät-net d-särho i-ad-ikrəš idəm dat-Firḡäwna-i n-ämänokal n-Mişra-i has-ijän tafləst-ta-däḡ fäl t-äsmänakäl dawa-s fäll-äkall d-a-wa ihän eḡewən-net iket-net.

11 Däḡ-a-wen-däḡ a dd-oḡa laḡ läbasän fäll-Mişra d-Xäna, ämḡatärän äddinät hullan har äbas əḡḡafän imärawän-nänäḡ a əksän.

12 Isla Yaḡub a-s ih' əttäḡam Mişra ḡas, äšmašäl sär-s məddana-s wi hanäḡ-äshäyawnen.

13 Osän-dd, əqqälän, šamad dd-jan asikəl wa s-əssin a tän-äzozäy Yusəf iman-net, ilmäd daḡ Firḡäwna s-a-wen-däḡ, tumast n-Yusəf.

14 Ässotär Yusəf ti-s d-imärawän-net iket-näsän, ämoos a-wen-däḡ əssayät timərwen n-äwadəm d-səmmos.

15 Iddäk-dd ya Yaḡub Mişra, äba-t daḡ dihen-däḡ ənta d-imärawän-nänäḡ wi hanäḡ-äshäyawnen.

16 Əmməḡkälänät tifəkwen-näsän ḡarät tamättant-näsän s-aḡrəm wa n-Sišäm i-ad-ənbəlän dihen däḡ-təfärre ta izžənša Ibrahim fäll-məddana-s n-Hämmär däḡ-Sišäm.

17 A-s dd-täwwäḡ täqqän n-ärkäwäl wa ijjäš Mässinäḡ i-Ibrahim, təkna tamətte-nänäḡ əjut däḡ-Mişra.

18 Inäy-dd äzzäman-en Firḡäwna äynayän wärän izzey Yusəf.

19 Ijjäš sär-näḡ erk älxal, issəknä tumast-nänäḡ aḡäna, ijä a wärän ijrez i-imärawän-nänäḡ, äsmäḡräy-tän hullan s-älxidmät wa däḡ-tän-ijä, iglä däḡ-tälläbäst-net har hasän-innä ad-hin-əndəwän aratän-näsän wi n-eyyan i-ad-ämmätän.

20 Äzzäman-en-däx ad-iwa Mosa-i ikräšan idəm dat-Mässinäx; kärađ orän xas a jän imärawän-net eṭṭafän-t, təzzar, äšhäššäl-tän a-wa inna Firxäwna täbədđawt dār-s.

21 Järän-t-in xas, təkkmät-t-dd elle-s n-Firxäwna, təj'-e-hi-dd s-iman-net, təj'-as asədwal wa mad-täj i-ara n-täsa-net.

22 Ämoos Mosa ere iḡran däx-təlxuləma d-musnät wa n-käl-Miṣra, ikf'-e Mässinäx äššahät däx-mäjräd hakd däx-timašalen.

23 Ikräš əkkožät timərwen n-awätay xas, ijjäs-t-dd ənniyät n-ad-əkk ayətma-s wi n-Išrayil, idhəl-tän, əntänəđ-i n-tumast-net.

24 Ašäl iyyän, inhäy iyyän däx-sän isalmađ u-Miṣra t-irnan xas, ohäx-as tinahäyen, ijä iman n-wa n-u-Miṣra.

25 Äxel afäl ija a-wen, ad-əjrahän ayətma-s a-s Mässinäx a t-dd-äšmašälän sär-sän i-ad-tän-ikkəs däx-əkkəlu wa hän mäšan, wär əjrehän a-wen.

26 Ašäl wa ilkamän i-wen, inhäy əssin meddən n-käl-Älyähud əknasnen, ittär ad-əkk jere-sän, ibdəw-tän, əjən älxer. Inn'-asän: <Imidiwän, käwänəđ wädden ayətmatän a tämoosäm, mafäl tinməjjim a läbasän jer-iman-näwän.>

27 Iggäd-dd sär-s wa irnän, imhäl-t-in, inn'-as: <Käyy, mi käy-ijän ämizär d-älqall-i-hanäx,>

28 əyya, a tärhed ad-hi-tänxəd šund a wa jed i-u-Miṣra wa s-jed iman-net əndəšel.>

29 Islä Mosa i-mäjräd-wen-däx xas, irmäx, äjewäd älwäqq-wen-däx s-əkall wa n-Mädyan, izzäx, ädobän ya dihen-däx, ikräš əssin ilyađän.

30 Šamad okaynät əkkožät timərwen n-awätay ad-has-dd-änfaläl änjälos n-Mässinäx däx-tenere fäll-ađax wa n-Säynay däx-tabsäxt ta tähijäljälät wär räqq.

31 Täqqän tänfalilt-ta-däx ihannäy exäf-net, iknä-dd ihəz n-tabsäxt i-ad-ikən asənnəfli däx-a-wa ihannäy mäšan, izjār-tät-dd eməsli n-Emäli has-innän:

32 <Näkk a-s Mässinäx n-imxarän wi käy-äshäyawnen, näkk a-s Mässinäx wa n-Ibrahim d-Isxaqq d-Yaqub.>

Ihä-dd xas Mosa äšikäđkäd a-wa-däx has-ja tarəmmeyt har äbas ihäl wälä-däx ad-ıdkəl idəm-net, ikyəd.

33 Inn'-as Emäli daḡ:

<Əkkəs tifädelen-näk fäl-a-s edägg wa däx-təbdadäd, edägg šaddijän,

34 ənhäyäx tisanant ta tärmäsät tamətte-nin däx-Miṣra, əsley i-tihnəffa-näsän,

a-wen-däx a fäl dd-äzzubbəx i-ad-tän-səddärfəx.

Ämära, əgləw, käyy a he-šəmməsələx s-əkall wa n-Miṣra.>

35 Wädden hannäyäm a-s Mosa-wa-däx äkkuddälän a-s has-ənnän: <Mi käy-ijän ämizär d-älqall-i-hanäx?> Ənta-en-däx a dd-äšmašäl Mässinäx i-ad-izar i-käl-Išrayil, isəddärf'-en-dd s-tärna n-änjälös wa has-dd-änfalälän däx-tabsäxt ta tähijäljälät wär räqq.

36 Ənta-en-däx a tän-dd-izzəzjārän Miṣra itajj s-tärna n-Mässinäx härätän äqqannen exäf d-ijitän n-Mässinäx har əjläyän ejärew wa səmmän šəggäxän, əjän đarät-a-wen əkkožät timərwen n-awätay ähonän däx-tenere.

37 Mosa, ənta a-s käla innä i-käl-Išrayil: <Ilkam ad-sär-wän dd-išəmmişəl Mässinäx ännäbi dār-i olähän,

ännäbi dār-wän oharän temiḏt.>

³⁸ Ēnta-en-däḡ ḏay a ibdādän däḡ-tenere ta n-Säynay jer-änjālos wa has-ämiijrādän fäll-afälla n-aḏay wa n-Säynay d-tamötte, ikf'-e Mässināḡ mājrād wa ihakkän tämudre i-ad-hanāḡ-t-dd isəssiwād

³⁹ māšan, unjāyän abbatän-nānāḡ s-asjəd-has, äšyārän-as ulhawän-nāsän, ənnādän fälla-s, ad-sadārhanän uḡəl n-Miṣra-i dd-əzjārän.

⁴⁰ Däḡ-a-wen-däḡ, a dd-təggād tamötte s-Harun, tənn'-as:

<Āj'-anāḡ imālan äynaynen ärjāšnen data-nāḡ fäl-a-s

Mosa wa hi-hanāḡ-dd-izzəzjārän Miṣra, ābas nəssan a ija.>

⁴¹ Ēṣṣəwwārän-dd ḏarät-a-wen i-iman-nāsän ehādäl n-orāḡ, ad-tajjān tikutawen i-äṣṣänäm wa jān s-ifassän-nāsän, ad-t-ḡabbādän, tiimələn-t, sānkarän izəjraz d-isudal dat-a-wa dd-əknän ifassän-nāsän.

⁴² Ēssəksänän iman-nāsän Mässināḡ s-a-wen-däḡ tän-išlän, oyy'-en ənta-däḡ s-äṣṣänäm-nāsän d-älḡibadät wa täjjän i-ajhanän wi n-išənnawän: tāfukt, ewär d-etran; ämoos a-wen a ässiitbätän a-wa innä ännäbi Ȳammosa† a-s inna däḡ-əlkəttab-net, innä Mässināḡ:

<Ya käl-Iṣrayil!

Ēkkozät timərwen n-awätay a jām däḡ-tenere,

ḡarrāsäm i-taḡsiwen, təkkatäm-tänät,

ak ässistänāḡ-kāwän, ajän näkk a-s tänät-kätäm?

⁴³ Wädden ehäket n-äṣṣänäm wa s-isəm-net Molax

d-atär wa s-isəm-net Rufan-i jām emāli-nāwän,

tahanem dār-s siha d-siha, a-s tänät-kätäm,

täqqäläm-dd ḡabbādäm-tän.

Däḡ-təssəba n-a-wen-däḡ tämešäläm

a fäl mad-ärzən käl-Bābilun äkall-nāwän,

täkkälēm däḡ-ikallän wi hasän-in-əllanen.>

⁴⁴ A-s hän imḡarän-nānāḡ tenere, əṭṭafän ehäket wa n-tämuqquest n-Mässināḡ ämoosän tajuhe i-ärkāwäl n-tassayt wa ijjäš Mässināḡ i-Mosa a-s, has-innä, ad-ikrəs ehäket-en s-əmmək wa s-has-omär s-a-wen.

⁴⁵ Ehäket-en, togāz-t-dd əzzurəyät ta hasän-təlkämät har äzzāman wa d-hasän-äzzar Yešwa, əjjāšän d-ehäket äkall wa tän-ikfa Mässināḡ, ohāḡän däḡ-əddəwəlän wi iyyādnen; əṭṭafän ehäket-en däḡ-äkall-en-däḡ har äzzāman wa n-Dawəd-i

⁴⁶ ijrāwän idəm d-ännuḡmät dat-Mässināḡ. Ēnta-en-däḡ a ittārän däḡ-Mässināḡ turhajät n-ad-isəkrəs ehän i-Mässi-s n-Yaqub

⁴⁷ māšan, turhajät-ten-däḡ, Sulāyman-i n-rure-s n-Dawəd a tät-ijrāwän.

⁴⁸ Ikräs ehän-en māšan, issəlmäd-t Mässināḡ s-härät iyyän,

⁴⁹ inn'-as Emāli:

<Išənnawän a-s tasäqqaymut-in,

äkall a-s isəkkukal n-iḏarän-in.

Ma ämoos ehän wa s-täddobem

a hi-t-tədəyəm i-ad-hi-awəy, sunfäḡ däḡ-s?

⁵⁰ Ajän wädden äfuss-in a dd-ixlākän härät iket-net.> »

⁵¹ Oläs ḏay inn'-asän Stifan: «Ya meddən-i-däḡ n-iḡāfawän äqqurnen n-ulhawän wären ätub s-äṭṭubbätän timəzzujen-nāsän, tunjayäm s-Unfas Šaddijän šund a-wa jān abbatän-nāwän,

⁵² ijmaḏ-t äššāk a-s a-wa əjän abbatän-nāwän ḡas a kāwän-išlän kāwāneḏ-däḡ, wär t-illa ännäbi s-wädden äqquzzäben-t, jān iman n-wi hasän-äloläyänen n-a-s ilkam a dd-ass wa n-iyyän n-Āmayḏal äsnäfrän

† 7:42 7:42 A-wa ännäbi äloläyän däḡ-isālan n-Ȳisa, a okäyän səmmosät timaḏ n-awätay dat-tiwit-net.

Mässinäx, tətəläläm-tän käwäneḍ-däx ed төssäydäräm-t ənta-däx төzzar, tänyäm-t kərəf,

⁵³ äzzäbbät-dd Mässinäx fälla-wän alämärän-net, əmməjrädän-awän sār-sän änjəlosän məšan, tunjəyäm s-asjəḍ-hasän.»

Tamättant n-Stifan

⁵⁴ Islä ämänokal n-älžämaḡät wa iḡattäsän äššäreḡa i-a-wen-däx ḡas, ad-isamädad ənta d-äddinät-net, zımkärkəwežän isenän, fäll-älhäm-i-däx mäqqārän tän-ijjäsän fäll-Stifan.

⁵⁵ Ənta älwäqq-wen-däx, idnäy-t Unfas Šaddijän, idkäl asəwaḍ-net s-išənnawän, inhäy älxurmät n-Mässinäx d-ḡisa ibdad daw-aḡil n-Mässinäx.

⁵⁶ Idkäl eməsli-net älwäqq-wen, innä i-älžämaḡät: «Säjdät, ənhəywät išənnawän, ämerän, ibdad Ägg-ägg-adəm daw-aḡil n-Mässinäx.»

⁵⁷ Əslän i-a-wen ḡas, äşḡäyyän däx-išənnawän, härän timəzzujen-näsän, ošälän-dd šund iyyän n-äwadəm sār-s iket-däx-näsän, oḡän fälla-s,

⁵⁸ äšräwrəwän-t har dār-s əzjārän aḡrəm, ad-t-hakkän sämməjori n-tihun har t-änḡän kərəf. Äddinät wi jänen a-wen-däx, ämawaḍ s-isəm-net Sawəl a əssäḡläfän isəlsa-näsän төzzar äšewäjän s-Stifan.

⁵⁹ Hakkän-t sämməjori n-tihun wär dd-išrey, itəddal ənta Mässinäx, ijanna: «Emäli ḡisa, ässiḡläfäḡ-käy iman-in.»

⁶⁰ Irkäḡ ḡarät-a-wen, idkäl eməsli-net s-afälla, innä: «Emäli, wär täntäswäräd abäkkəḍ-wa-däx.» Innä a-wen-däx ḡas, əjmädän-t iman.

8

Älyzabät d-amšänḡu n-imumənän äzzäman-wen-däx

¹ A-wa ijän ašäl-wen-däx iket-net issan-as Sawəl härät, iqqäs i-tamättant ta ija Stifan.† ḡur-ašäl-wen-däx, ad-intä älyzabät səmmän fäll-älkänisät ta təhät Yärussälam, əmmähäšän imumənän däx-tajiwən ti n-Älyähudəyät d-Sämari, inəmмуšal ḡas a dd-äqqimänen däx-Yärussälam.

² Osän-dd meddən äddinnen, əštärän-in Stifan, ətḡäfän iba-net däx-tisnant.

³ Iggäd-dd Sawəl däx-a-wen-däx, ad-itammäḡ i-əmmək s-hin-oläm älkänisät edägg t-təlla-däx, wär t-illa ehän wär-ijješ, isatärmas äddinät wi omännen s-ḡisa jer-ämoosän meddən wəla tiḡeḍen, itəjjar-tän-in däx-tikärmuten.

Älxuḡbät wa ija Fəlibb däx-Sämari

⁴ Imumənän wi dd-əzjərnen Yärussälam, əmmähäšän ḡas, ällilän äkall iket-net, xaḡḡäbän Älənžil i-äddinät.

⁵ Däx-a-wen-däx ad-ikkä Fəlibb aḡrəm iyyän ihan teje ta n-Sämari ad-däx-s ixatḡäb i-tamətte isälan n-Älmasex.

⁶ Sajadän-as äddinät äjjootnen s-ijraz məjräd wa itäj d-ijitän n-Mässinäx wi itamašal data-sän,

⁷ itakkäs alšinän naḡḡäwnen iḡaran däx-äddinät, izizuy daḡ inaxəyabän d-inəbdan äjjootnen.

⁸ Ja tedäwit mäqqoorät däx-aḡrəm-wen-däx.

⁹ Izzaḡ dihen ähaləs n-emässäxär s-isəm-net Simon, ämoos a-wa itäj awnaf i-käl-Sämari, ässimḡär iman-net hullan,

† 8:1 8:1 Jannen-as iyyäḍ: Älmuştafa.

¹⁰ əltaxän-t wi mədroynen hakd wi wəşşarnen, jannen fälla-s: «Wa əhaləs, tärna ta tojarät n-Mässinax a ittaf.»

¹¹ Əltaxän-t ya əddinät əjootnen dax-təssəba n-əssaxər wa itəjj, itaqqän ixfawän-nəsän.

¹² Inhəy Simon a-s omänän əddinät s-Ələnžil wa hasän-ixatqab Fəlibb fäl Təmmənəya n-Mässinax d-Ŷisa Əlmasex xas, ad-titwəsəlmixän meddən hakd tidedən dax-aman,

¹³ omän ənta-dax, ətwəsəlməx dax-aman. İltax ya Fəlibb qarət-a-wen fäl təssəba n-ijitän n-Mässinax d-tikunen ti s-t-ihannəy itajj'-enät, əqqännen exaf-net ənta-dax.

Ajaraw wa jän käl-Səmari i-Unfas Şaddijän

¹⁴ Əslän inəmмуşal wi hənən Yərussəlam a-s käl-Səmari-dax omänän s-məjräd n-Mässinax xas, əşməşälän-dd sər-sän Bətrus d-Exya.

¹⁵ Əwwədən-in xas, dälän Mässinax i-ad-dd-izəzzubbət Unfas Şaddijän fäll-əddinät wi atubnen dihen

¹⁶ ed, dat-a-wen-dax, wär tən-ihə-i fäll-dd-əzzubbət Unfas Şaddijän, atwəsəlməx xas a ətwəjjän dax-aman s-isəm n-Eməli Ŷisa.

¹⁷ Əswär-tän Bətrus d-Exya ifassän-nəsän, əzzubbət-dd fälla-sän Unfas Şaddijän.

¹⁸ Inhəy Simon a-s şəmad tən-əsiwərən inəmмуşal ifassän-nəsän, ad-fälla-sän dd-əzzubbət Unfas Şaddijän xas, ittär ad-tən-əkf əzrəf, ijann'-asän:

¹⁹ «Əkfət-ahi nəkk-dax tədabit-ta-dax i-ad-umas a-s ere əswärəx ifassän-in nəkk-dax, ad-fälla-s dd-izzubbət Unfas Şaddijän.»

²⁰ Inn'-as Bətrus: «Təksəfəd, kəyy hakd əzrəf-nək ed tordəd a-s a-wa ikfa Mässinax bənnan, təddoobəd əzənş-net.

²¹ Şəmad kəyy ənniyət-nək da-dax, əlməd a-s a-wa ijän, əbas t-ihə folət-nək ed ifrax ulh-nək dat-Mässinax.

²² A-wen-dax a fäl utab dax-amsud-nək iket-di, tədələd Eməli kunta əmmukkän a-wen, ad-hak-ənş erk ənniyət wa innəhədən dax-ulh-nək

²³ ed, hannəyəx a-s ulh-nək, wär-ıdneý a səl təlləbəst d-iba n-iqqud.»

²⁴ Əwwežəb Simon, inn'-asän: «Əttərət-ahi-in kəwəneq-di-dax dax-Eməli i-ad-wär hi-irəmməs a-wa s-tənnəm.»

²⁵ Əjjejhän inəmмуşal, əxtəbän məjräd n-Eməli i-əddinät əjootnen təzzar, əqqälän Yərussəlam. Dax-asikəl-nəsän, tājjan isəlan n-Ələnžil dax-tidbi əjootnen n-Səmari.

Mənistär n-İtyobyə wa omänän s-Ŷisa Əlmasex

²⁶ İmməjräd qarət-a-wen ənjalos n-Eməli i-Fəlibb, inn'-as: «Fəlibb, tərur, təjəd tabarət ta fälət Yərussəlam təkka Gaza ed wär dax-s əjjetän iməssukal əməra-dax.»

²⁷ İglə, wär-əhoja a-s əhaləs iyyän n-əmudəş n-minəstär-da-dax, ənta a ənnihədən dax-a-wa la Kəndas ta n-təmənokalt n-əkall wa n-İtyobyə. Əhhujjəj-dd ənta-dax s-Yərussəlam i-ad-dax-s ixbəd Mässinax.

²⁸ İssəmda əhujjəj xas, iqqäl əkall-net dax-turəft-net əlwayən ibəjwan. Əsookal minəstär-di iyar əlkəttab wa n-ənnəbi Sayə† a-s dər-s əmmuqqəs Fəlibb.

²⁹ İnnə Unfas Şaddijän i-Fəlibb ad-hin-ahəz turəft-net.

† 8:28 8:28 A-wa ənnəbi dd-əzzarən i-Ŷisa, ələləy dax-isəlan-net əssayət timəq n-awətay dat-tiwit-net.

³⁰ Ošäl Fəlibb har dār-s ämsadäx, isl'-as iḡarr əlkəttab wa n-ännäbi Saya ḡas, inn'-as: «Ähaləs, ak a-wa ḡarräd, təjrahäd älmäḡna-net meḡ?»

³¹ Inn'-as ähaləs: «Endek a-wa he-äjäḡ əjrahäḡ-t a-s wär t-illa ere hi-t-iffəššārän.»

³² Äsnäy-t-dd ähaləs edes-has ad-has-iḡarr edägg wa däḡ-iktäb a-s:

«Oläh ḡas d-tiḡse tättilwäyät s-asäḡrəs,
oläh d-takəndəmt s-təllasän äddinät,
wär t-illa emäsli dd-izjarän emm-net,

³³ immədräy bännan,

wär has-ätwäjjä äššäreḡa wa dār-äniihäjja.

Mi s-ilkam ad-dd-iḡkal isälan-net i-ihäyawan-net

ed tärza tayrəst-net däḡ-äddunya?»

³⁴ Issəstän ähaləs wa n-ämudäš n-Ityobya Fəlibb, inn'-as: «Läḡät-ahi, mi s-ihä ännäbi ti-net däḡ-edägg-wa-däḡ? Ak iman-net a däḡ-ämmijräd meḡ isälan n-ere s-ilkam ad-dd-ass a-s iha ti-net?»

³⁵ Irmäs-as-dd Fəlibb tifer-ti-däḡ, ad-has-itafässar a-wa inna Älənžil n-ḡisa.

³⁶ Əḡlan har dd-əkkän edes i-edägg han aman ḡas, inn'-as ähaləs wa n-ämudäš: «Aman da, ma igdalän ad-ətwəsəlmäḡäḡ?» [

³⁷ Inn'-as Fəlibb: «Amən ḡas s-ulh imdan.»] Inn'-as ähaləs wa n-ämudäš: «Omanäḡ a-s ḡisa Älmaseḡ a-s Rure-s n-Mässinäḡ.»

³⁸ Omär älwäqq-wen-däḡ i-ad-təbdəd turäft, ijjäš dār-s Fəlibb aman, issəlmäḡ-t.

³⁹ Diha-däḡ dd-əzjārän aman ad-iḡkäl Unfas n-Emäli Fəlibb, wär t-oles ämudäš-ənnin-däḡ ahänay, iglä ənta däḡ-zäbo-net, ikna tedäwit.

⁴⁰ A-s hin-ijräh Fəlibb iman-net ḡarät-a-wen, iha äkall wa n-Ašdud, ifäl dihen, ikk' aḡrəm wa n-Qäyşära. Tadäbayt immär-däḡ, ad-däḡ-s äj isälan n-Älənžil.

9

Tätubt n-Sawəl (*Ijitän 22:6-16; 26:12-18*)

¹ Äzzäman-en-däḡ, a dd-iggäd Sawəl, isamädad, isamähad, wär t-illa anəzjum ila säl wa n-iji n-iman n-inəṭṭulab n-ḡisa. Däḡ-isälan n-a-wen-däḡ a däḡ-ikka ämänokal n-käl-tikutawen

² i-ad-t-äkf tikarḡiwen issəknä däḡ-ihänan n-äddin wi n-käl-Älyähud hänen Dämašäq i-ad-ijrəw s-asəttärməs n-e d t-illäm ere ällilän tabarät-ten-däḡ n-Emäli, jer-ähaləs wäla tamäḡt, i-ad-t-dd-awəy däḡ-tiḡəm s-Yäruşsalam.

³ Äsookal Sawəl däḡ-a-wen a-s hin-ohäz aḡrəm wa n-Dämašäq. A əndärrän, ämläwläw ännur-i-däḡ äšşooheḡ dd-ifalän isənnawän;

⁴ ihä-dd oḡa, isl' älwäqq-wen-däḡ i-emäsli has-innän: «Sawəl, Sawəl, ma käy-orämän sär-i tiḡəzzəbud-ahi?»

⁵ Inn'-as Sawəl: «Mi tämoosäd Emäli?» Inn'-as Emäli: «A-wa näkk ḡisa wa tiḡəzzəbud, ad-hak-indär amzəzəzaj dār-i härkuk.

⁶ Ämära, əbdəd, əjjəš aḡrəm wa n-Dämašäq, ad hak-itwənn dihen a-wa s-led s-ad-t-təjəd.»

⁷ Əqqälän-dd ḡas meddən wi äddewnen d-Sawəl oran imawän, äbas əssanän a he-ənnən ed əslan i-emäsli-wənnin-däḡ mäšan, wär t-illa ere hannäyän.

8 Ibdäd Sawəl ɖarät-a-wen fäll-iman-net, ittär ad-arr tiṭṭawen-net mašan, wär t-illa a ihannäy. Elwäyän-t imidiwän-net har dār-s əjjašan aɣrəm wa əkkän.

9 Ija kəraɖ išilan ɖarät-a-wen dərɣal, wär-ikša, wär-iswa.

10 Aɣrəm wa n-Dämašaṣq, ih'-e ənätṭalib n-Ṭisa s-isəm-net Änanyas, änfaläl-as-dd Mässinäḡ, inn'-as: «Änanyas!» Inn'-as Änanyas: «Näkk da Emäli.»

11 Inn'-as Emäli: «Äkk täšarrit ta s-itawänna <ta toɣädät>, təjjəšäd ehän wa n-Yähudəs, səstənäd d-ähaləs n-tayrəmt ta n-Tarša s-isəm-net Sawəl.» A-s itäjj a-wen-däḡ, itəddal Sawəl Mässinäḡ,

12 änfaläl-as-dd däḡ-a-wen-däḡ a-s ikk'-e-hi-dd ähaləs s-isəm-net Änanyas-i t-madän-isəwär ifassän-net i-ad-t-dd-iqqəl ahänay-net.

13 Innä Änanyas: «Emäli, əsley a äjjeen fäll-ähaləs-i-däḡ, əlläḡen-ahi äddinät äjjootnen erk əmmək wa issəkna iməššeddəjän wi hānen Yārussālam,

14 wāla Dämašaṣq-i dd-ikka, ikk'-et-dd äwway tikarḍiwen t-dd-əkfan imänokalän n-käl-tikutawen has-əjrāwnen ad-isəttärməs e d t-illām ere iɣarrän isəm-näk.»

15 Inn'-as Emäli: «Əgləw, ähaləs-di, näkk a t-äsnäfränän i-ad-awəy isəm-in, isəlməd tiwsaten ti n-inəzzulam† d-imänokalän d-käl-Işrayil a-wa ämoosäḡ,

16 ad-t-säknäḡ aɣāna wa mad-inhəy däḡ-təssəba-nin.»

17 Igl' Änanyas, ikk' ehän wa s-has-ätwänna ih'-e Sawəl, os'-in, äswär-t ifassän-net, inn'-as: «Äḡḡa-ḡ Sawəl, Emäli Ṭisa-i hak-dd-änfalälän däḡ-tabarät ta dd-jed, ənta a hi-dd-äšmašälän sār-k i-ad-käy-dd-iqqəl ahänay-näk, idnəy-käy Unfas Šäddijän.»

18 Tamäzäyyat-ten-däḡ a däḡ-dd-ätträkkät a olähän d-tifrənkawen däḡ-tiṭṭawen n-Sawəl təzzar iqqäl-t-dd ahänay-net,

19 ibdäd ɖarät-a-wen, ätwäsälmaḡ däḡ-aman, immənsäw, iqqäl-t-dd äššahät-net, izzäḡ Sawəl ḡur-inəṭṭulab wi n-aɣrəm-en-däḡ har ḡur-sän ässäḡ a län išilan.

Ämoos Sawəl ämära tajuhe n-Ṭisa Älmasex

20 Wär-ähoja a-s issəntä axäṭab n-isālan n-Ṭisa däḡ-ihānan n-äddin wi n-käl-Älyähud, isatbat dat-tamətṭe iket-net a-s, Ṭisa a-s, Rure-s n-Mässinäḡ.

21 Äkunän äddinät wi has-sällänen, əqqälän-dd ḡas, jannen: «A-wa, wädden Sawəl wa izzänän s-wi ḡarränen isəm wa n-Ṭisa hānen Yārussālam? Äjän wädden ass-net i-aɣrəm-wa-däḡ, i n-təssəba n-ad-tän-isəttärməs, äj'-en däḡ-ifassän n-ämänokal n-käl-tikutawen?»

22 Sawəl ənta, itiṣuhut immun-net s-Mässinäḡ hak ašäl, isimxəlxil käl-Älyähud wi əzzäḡnen Dämašaṣq, isikus-tän äššäk a-s Ṭisa a-s Älmasex.

23 Okäy äzzāman ḡas, änmännäkän käl-Älyähud fäll-əmmək wa s-t-mad-säḡdärän, äḡḡən-t kərəf. Əssəbdädän ɖarät-a-wen meddön däḡ-imawän n-aɣrəm iket-net i-ad-äqqaymən has-äḡtafän i-ad-əjrəwän əmmək s-t-änḡän

24 mašan, əjjašan-t isālan n-tayḡdärt ta s-äbokän ad-has-tät-əjən.

† 9:15 9:15 — ḡur-käl-Älyähud, ere wärän ämoos ägg-Älyähud s-aläsäl meḡ ere wärän ilkem i-äddin-näsän, iket-net, änäzzalim a ämoos. A-wen-däḡ a fäl tiwsaten ti iyyäḍnen iket-näsän, ti n-inəzzulam. — Ašäl-i-däḡ, änäzzalim, äkafär (ere wärän issen s-Mässinäḡ).

²⁵ Ǝnkārän inəṭṭulab s-ehäḍ, jän Sawəl dəḡ-deke hərəwän, ästärarän-t s-ašrut n-əḡalla wa iyyädän iḡläyän aḡrəm, əssəjmädän-t, ikkä Yärussälam.

²⁶ Iwwäd-in ḡas, ikkä inəṭṭulab wi iyyädnen i-ad-där-sän irtəy məšan, äksuḍän-t iket-näsän ed wär-əflesän härwa a-s iyyän dəḡ-sän a ämoos.

²⁷ Irmäs-t-dd Bärnäbbas s-iman-net, ilwäy-t s-inəmмуšal, illäḡät-asän əmmək wa s-inhäy Sawəl Emäli Ƴisa dəḡ-tabarät ta n-Dämašəḡ d-əmmək wa s-has-imməjräd Mässinäḡ d-turhajät ta t-ikfa n-ad-ämmäjräd s-ənniyät ozjan dəḡ-ihänan n-äddin wi n-käl-Älyähud i-ad-äjjäyh a-s Ƴisa a-s Älmasex.

²⁸ Äsbärräkän-t älwäqq-wen-dəḡ, irtäy där-sän; edägg əkkän dəḡ-Yärussälam-dəḡ, äddeew där-sän, itajäyha s-ənniyät ozjan ənta-dəḡ fäll-isəm n-Emäli,

²⁹ itidwənnit, itamäzaḡ d-käl-Älyähud wi sawalnen Tälyunanit məšan, əggädän-dd sār-s, ad-tammäḡän əntäneḍ-dəḡ i-tašləlt s-əjan iman-net.

³⁰ Ǝslän ayətma-s dəḡ-äddin i-a-wen ḡas, əssəjmädän-t s-aḡrəm wa n-Qäyšara təzzar, ikkä ḍarät-a-wen wa n-Tarša.

Ikkä Bəṭrus älkänisät ta n-teje ta n-Älyähudəyät

³¹ Äzzäman-en, təjraw älkänisät äḡafyät dəḡ-tajiwən ti n-Älyähudəyät d-Galila d-Sämari, tišuhun inəṭṭulab dəḡ-immun-näsän, tinməkfin tayətte, tamašalän härät iket-net dəḡ-tuksəḍa n-Emäli, idhal-tän Unfas Šaddijän, isawaḍ-dd fälla-sän hak ašäl äddinät wi iḡläs Mässinäḡ.

³² Älliil Bəṭrus ənta äkall iket-net har dd-osa iməššeddəjan wi əzzäḡnen tadäbayt ta n-Ludd.

³³ Ill'-e dihen ähaləs s-isəm-net Inyas s-a ilan əttam iwətyan ibdan, wär kälä ifäl asəftäḡ-net.

³⁴ Os'-e-hi-dd Bəṭrus, inn'-as: «Inyas, äzozäy-käy Ƴisa Älmasex, əbdəd, aḍh asəftäḡ-näk.» Ibdäd Inyas ässaḡät-wen-dəḡ.

³⁵ Ǝnhäyän käl-Ludd əntäneḍ d-äddinät wi əzzäḡnen telämse ta n-Sarun a-wen ḡas, omänän s-Emäli iket-dəḡ-näsän.

³⁶ A-s itäj a-wen-dəḡ, təzzaḡ tänaṭṭalibt s-isəm-net Täbita aḡrəm wa n-Žafa, tawäḡra daḡ s-isəm wa n-Dorkas, a-wen älmäḡna-net: «Tašənkäḍt.» Tämoos tamäḍt n-wälät-älxer, tajj imärkedän äjjootnen, təkkat.

³⁷ Išilan-en-dəḡ ad-tärhin, äba-tät, əknän äddinät tafəkka-net, əssənsän-tät dəḡ-ehän n-soro.

³⁸ Ǝslän inəṭṭulab wi hänen taḡrəmt-en wärät tänmäjjaj d-Ludd a-s dd-ijjaš Bəṭrus äkall ḡas, äšmašälän sār-s əssin meddən i-ad-där-sän dd-idaw šik.

³⁹ Äddew där-sän Bəṭrus, əwwädän-dd ḡas, əlwäyän-t s-soro wa dəḡ-tənsa tafəkka n-tamäḍt, əlkäḍnät-as-dd tinuḍäfen əṭṭafnät iba-net, hallänät, saknenät isəlsa wi hasnät-təzzəzmäy Dorkas dəḡ-a-wa təkäs təll'-e jere-snät.

⁴⁰ Izzəzjār-tänät əntänəteḍ d-tamətte iket-net, irkäḡ ḍarät-a-wen jənnəj-s, idäl Mässinäḡ. Issəmdä tittar ḡas, innäḍ-dd sār-s, inn'-as: «Täbita, ənkär-dd!» Torä-dd tiṭṭawen-net älwäqq-wen-dəḡ, tənähäy Bəṭrus, täqqimä-dd.

⁴¹ Äšhätäl-as-dd s-äfuss-net, issəbdäd-tät, iḡräd-dd iməššeddəjan d-tinuḍäfen ḍarät-a-wen, issəkn'-asän-tät, təddar.

⁴² Šik-dəḡ a-s dd-əssäḡläyän isälan n-a-wen-dəḡ aḡrəm wa n-Žafa iket-net, omänän äddinät äjjootnen s-Emäli.

⁴³ Ija Bəṭrus äzzäman dāḡ-Žafa izzaḡ dāḡ-ehän n-Simyön wa isafalän ilämawän.

10

Ikka Bəṭrus ehän wa n-Kärnälyus

¹ Aḡrəm wa n-Qäyşära, izzaḡ-t käbtän n-käl-Roma s-isəm-net Kärnälyus, ännihäd dāḡ-ejhän n-össärdusa wi hänen taggayt ta s-itawänna: İtali.

² Ähaləs äddiinän a ämoos ənta hakd käl-eḡewən-net, itəkkat, infa tamətte s-a äjjeen, härkuk daḡ itəddal Mässinäḡ.

³ Aşäl iyyän, ebre n-tezzar, ḡur ässaḡät wa s-kärad, änfaläl-as-dd änjälos n-Mässinäḡ dāḡ-ehän-net s-älmäḡna äsisäjrähän, inn'-as: «Kärnälyus!»

⁴ Issəjräh Kärnälyus dāḡ-änjälos dāḡ-a-s irmaḡ, inn'-as: «Emäli, näkk-da, ma tənned?» Inn'-as änjälos: «Tittar-näk, d-tikutawen-näk, əwwädnät Mässinäḡ, wär käy-in-ittəwa,

⁵ šəmmişəl ämära meddən s-Žafa i-ad-hak-dd aḡrən Simyön wa s-itawänna Bəṭrus,

⁶ äzzubbät ḡur-Simyön wa isafalän ilämawän s-t-illa ehän-net dāḡ-asälim n-ejärew wa səmmän.»

⁷ İfäl-t änjälos wa hasän-imməjrädän ḡas, issäḡrä-dd Kärnälyus əssin dāḡ-inaxdimän-net, äsdäw-tän d-össärdasi äddinän dāḡ-wi äḡläfnen ehän-net, ikna taflest.

⁸ İjä dāḡ-sän isälan n-a-wa ijän iket-net təzzar, äşmaşäl-tän s-Žafa.

⁹ Härwa han tabarät aşäl wa iyyädnän, ad-iwwän Bəṭrus afälla n-ehän s-tarähut, ad-itəddal Mässinäḡ.

¹⁰ İtəddal Mässinäḡ dihen-dāḡ a-s älluz, äsdärhän a ikša. Samäjnen-as äddinät imənsiwän dihen-dāḡ a-s t-irmäs härät,

¹¹ ojja išənnawän a-s dd-ämerän, ifäl-tän-dd ässärer mäqoorän ätiwätäfän s-əkkoḡ išrutän-net, insä-dd data-s.

¹² Ässärer-en, iskar fälla-s a-wa t-illän dāḡ-irəzzejän d-izlulam d-igdaḡ.

¹³ Inn'-as emäsli iyyän älwäqq-wen: «Bəṭrus, äḡrəs, äkš.»

¹⁴ Inn'-as Bəṭrus: «Fäw Emäli! Näkk, wär käla əkşəḡ a xəramän wäla a ämmidäsän.»

¹⁵ Inn'-as emäsli daḡ: «Wär käy-iwer asäxrəm n-a-wa issäxläl Mässinäḡ.»

¹⁶ İtajj änjälos mäjräd-wənnin-dāḡ i-Bəṭrus har kärad ihändəggan təzzar, immədkäl data-s ässärer s-işənnawän.

¹⁷ İqqän a-wen-dāḡ eḡäf-net, ad-isiməktəw, itassän ad-ijräh älmäḡna n-a-wa has-dd-änfalälän. Tamäzäyyat-ten-dāḡ a dāḡ-dd-əbdädän meddən dār-s sastannen dat-əmm n-ehän wa n-Simyön-i ḡur-äzzubbät,

¹⁸ əssəstänän s-afälla kunta ehän-wen-dāḡ a dāḡ-izzaḡ Simyön wa s-itawänna Bəṭrus.

¹⁹ İsiməktəw Bəṭrus dāḡ-isälan n-tänäfalilt-ta-dāḡ a-s has-innä Unfas Şaddijän: «Sastanän dār-k kärad meddən,

²⁰ wär täsmäsändädäd tidawt dār-sän ed näkk a tän-dd-äşmaşälän sār-k.»

²¹ Äzzubbät-dd sār-sän Bəṭrus, äzozäy-tän iman-net, issəstän-tän d-äddälil wa fäl dār-s sastanän.

²² İnnän-as: «Kärnälyus wa n-käbtän n-Roma a hanäḡ-dd-äşmaşälän sār-k, ähaləs n-ämaḡdal n-ämaksad n-Mässinäḡ, ässiimḡarän käl-Älyähud iket-näsän a ämoos. A ilan išilan d-has-dd-änfaläl änjälos n-eməşseddeḡ

n-Mässinäḡ t-äsmätärän d-ad-käy-dd-isössäḡär, isəjed i-a-wa has-mad-tənnəd afäl t-dd-tosed.»

²³ Äsbärräkät Bəṭrus meddən wi dd-äšmašäl Kärnälyus, äsmäjarät-tän. Äffäw ḡas, ärkäbän, äddewän dār-sän härät dāḡ-ayətma-sän dāḡ-äddin əzzaḡnen Žafa.

Ajəyh wa ija Bəṭrus dat-äddinät wären ämoos dāḡg-Älyähud

²⁴ Ewwädän-in ašäl wa iyyädän Qäyšara. A-s hin-osän, iqqal-asän Kärnälyus ənta d-käl-əḡewən-net d-inaflisän-net.

²⁵ Iräs-dd Bəṭrus ehän ḡas, ilkäḡ-as-dd Kärnälyus, oḡa daw-iḡarän-net, irkäḡ data-s

²⁶ māšan, issəbdäd-t-dd Bəṭrus, inn'-as: «Ahaa, wär jed a-di, näkk-dāḡ äḡḡ-adəm ḡas a ämoosäḡ.»

²⁷ Ädiwännen har-əjjäšan fäll-älžamaḡät wa äqqimän dāḡ-ammäs n-ehän.

²⁸ İdkäl Bəṭrus mäjräd, inn'-asän: «Təssanäm käwänəḡ iman-näwän a-s ässixräm alämär wa n-käl-Älyähud i-iyän dāḡ-sän uješ n-ehän, wäla təmmidəwa d-ere d-wär-oher äddin māšan, näkk-i-hi, inn'-ahi Mässinäḡ a-s wär leḡ s-ad-səjrähäḡ äwadəm wäl' iyyän i-ad-t-äjäḡ a xäramän wäla a ämmidäsän.

²⁹ Təssəba n-a-wen-dāḡ afäl wär jeḡ äsarü wäl' iyyän i-ad-wär käwän-dd-əkkeḡ, läḡätät-ahi ämära, äddälil wa fäl hi-dd-təssäḡräm.»

³⁰ Inn'-as Kärnälyus: «A ilan käraḡ išilan, s-ässayät šund-wa-dāḡ, təddaläḡ Mässinäḡ s-tezzar dāḡ-ehän-in, har šik-dāḡ, ibdäd-dd ähaləs ilsan imälsan äsimäḡmäḡnen dat-i,

³¹ inn'-ahi: «Kärnälyus, tittar-näk d-tikutawen-näk, əwwädänät Mässinäḡ, wär käy-in-ittəwa,

³² šəmmişəl ämära meddən s-aḡrəm wa n-Žafa i-ad-dd-idawän d-ähaləs s-isəm-net Simyon wa s-itawänna Bəṭrus, äzzubbät dāḡ-ehän n-Simyon wa isafalän ilämawän, ehän-net, ih' asälim n-əjärew wa səmmän.»

³³ Äšmašäläḡ-in sär-k älwäqq-wen-dāḡ meddən-in, iräš-ak Mässinäḡ ass wa hi-dd-jed. Ämära, iket-dāḡ-nänäḡ da-dāḡ, Mässinäḡ a dāḡ-nəjar äṭṭama, näsijäd dāḡ iket-nänäḡ i-a-wa s-hak-inna Emäli ad-hanäḡ-t-səlmədäd.»

³⁴ İdkäl Bəṭrus mäjräd, innä: «Tidət-dāḡ a-s, iket əjrähäḡ a-s, Mässinäḡ, wär-izley äddinät,

³⁵ änn-ak, e d t-illäm ere t-äksuḡän, itamašal erhet-net s-iqqud, tawset t-təlät-dāḡ, ijraz-as.

³⁶ Mässinäḡ, ässawäy-dd s-tizarät mäjräd-net i-käl-Işrayil i-ad-tän-isəlməd s-älxer wa tän-mad-äkf ḲisaÄlmasex-i n-Emäli n-e d t-illäm äḡḡ-adəm.

³⁷ Təssanäm a-wa ijän dāḡ-Galila d-Älyähudəyät ḡarät asəlmaḡ wa ij' Exya i-äddinät dāḡ-aman.

³⁸ Ḳisa wa n-Näşirät, äsnäfrän-t Mässinäḡ, ikf'-e Unfas, issäḡläy-dd äkall iket-net, itajj älxer, izizuy äddinät iket-näsän wi ässirmäḡ İblis.

³⁹ Näjjəyh i-a-wa ija iket-net dāḡ-teje ta n-Älyähudəyät d-aḡrəm wa n-Yärussälam hundäḡ har ašäl wa d-t-ärmäsän käl-Älyähud, əşläbän-t fäll-tajəttewt

⁴⁰ māšan, issənkar-t-dd Mässinäḡ s-tärna-net jer-inəmmuttan ašäl wa s käraḡ i-ad-t-ənhəyän äddinät, iddar,

⁴¹ wädden äddinät iket-näsän a t-ənhäyenen, wär t-inhey ar wi äsnäfrän ənta iman-net i-a-wen. Äddinät-en, nəh'-en näkkäneḍ-i ohärnen išəkša d-isəswa d-Ÿisa ḍarät a-s t-dd-ässinkär Mässinäḡ jer-inəmmuttan.

⁴² Ǝnta-en-däḡ a hanäḡ-äsnäfränän, omär-anäḡ s-axätṭab n-isälan-net i-äddinät, nəsełməḍ-tän a-s Ÿisa a äsnäfrän Mässinäḡ i-ad-išräḡ e d t-illäm ägg-adəm, wi äba hakd wi əddärnen.

⁴³ Däḡ-isälan-net ənta-en-däḡ a däḡ-äjjeḡyhän, ənnän ännäbitän iket-däḡ-näsän a-s, ere sār-s omänän-däḡ, ad-ijrəw tenäšše n-ibäkkadän-net s-tärna n-isəm-net.»

Ajäraw wa jän inəzzulam i-Unfas Šäddijän

⁴⁴ Ijanna Bəṭrus a-wen-däḡ a-s dd-äzzubbät Unfas Šäddijän fäll-älžämaḡät-en iket-net.

⁴⁵ Iqqän a-wen eḡäf n-imumənän wi n-käl-Älyähud ämeläyenen äddewnen d-Bəṭrus ed ənhäyän Unfas Šäddijän har dd-äzzubbät fäll-äddinät s-aläšäl-näsän, inəzzulam a ämoosän.

⁴⁶ Sallän-asän daḡ ämmiijrädän awalän äynaynen, samḡarän Mässinäḡ.

⁴⁷ Inn'-asän Bəṭrus ḍarät-a-wen: «Ak, ma igdalän i-äddinät fäll-dd-äzzubbät Unfas Šäddijän s-əmmək wa s-fälla-näḡ dd-äzzubbät ad-ətwəsəlmäḡän däḡ-aman?»

⁴⁸ Omär älwäqq-wen-däḡ s-ad-ətwəsəməḡän däḡ-aman s-isəm n-Ÿisa Älmaseḡ.

Ittär Kärnəlyus d-älžälmaḡät-net däḡ-Bəṭrus ad-ḡur-sän isəssikəy a län išilan.

11

Isälan wi ija Bəṭrus dat-imumənän wi n-Ÿärušsälam

¹ Ǝslän inəmмуšal d-ayətma wi iyyäḍnen hänen teje ta n-Älyähudəyät a-s iyyäḍ däḡ-inəzzulam† omänän s-mäjräd n-Mässinäḡ.

² Älwäqq wa dd-iqqäl Bəṭrus Ÿärušsälam, ämžäyžäyän-t imumənän wi n-dägg-Älyähud jänen amili härät, ənnän-as:

³ «Käyy, ma käy-äsihälän ujəš n-ehän n-äddinät wären ämeläy tihərəd dār-sän imənsiwän?»

⁴ Issənt'-asän Bəṭrus afəssär n-isälan s-iiyän-iiyän ḡur-aläšäl-näsän har ašäl-i-däḡ, inn'-asän:

⁵ «Heḡ aḡrəm wa n-Žafa, təddaläḡ Mässinäḡ a-s dd-heḡ oḍeḡ, irmäs-ahi härät, änfäläl-ahi-dd ässärer dd-ifälän išənnawän

⁶ fäll-ənsanät taḡsiwen d-tawäqqast d-ižlulam d-igḍaḍ. Zajäzzeḡ a-wa insän fäll-ässärer-en-däḡ

⁷ a-s əsley i-eməsli hi-innän: <Bəṭrus, äḡrəs, äks>

⁸ mäšan, ənneḡ-as: <Fəw Emäli! Näkk, wär käla əkšeḡ a xəramän wäla a ämmidäsän.>

⁹ Inn'-ahi eməsli-ənnin daḡ: <Wär käy-iwer asəxrəm n-a-wa issäxläl Mässinäḡ.>

¹⁰ Itajj a-wen har kəraḍ ihändäggan təzzar, imməḍkäl dat-i ässärer s-išənnawän.

¹¹ Iqqan a-wa ijän eḡäf-in dihen-däḡ a-s dd-əbdädän kəraḍ meddən dd-falnen Qäyšära dat-əmm n-ehän wa ḡur-äzzubbeḡ,

† 11:1 11:1 — ḡur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änäzzalim a ämoos. A-wen-däḡ a fäl tiwsaten ti iyyäḍnen iket-näsän, ti n-inəzzulam. — Ašäl-i-däḡ, änäzzalim, äkafär (ere wärän issen s-Mässinäḡ).

12 inn'-ahi Unfas Šaddijän ad-där-sän idawäx šik. Äddewäx där-sän, äddeewäx day d-sädis ayətma wi t-öllänen data-wän ämära-däx s-ehän n-Kärnälyus-i hi-dd-issäxran.

13 Näwwäḍ-in ɣas, ija däx-näx Kärnälyus isälan n-əmmək wa s-has-dd-änfaläl änjalos wa has-innän: <Šəmmişəl ämära äwadəm s-aɣrəm wa n-Žafa i-ad-dd-idaw d-ähaləs s-isəm-net Simyon wa s-itawänna Bəṭrus.

14 Afäl dd-osa, ad-hak-älläxät əmmək wa s-mad-täxləsäd käyy d-eɣewən-näk.>

15 Ämmiijrädäx-asän dihen-däx, a-s fälla-sän dd-äzzubbät Unfas Šaddijän iket-näsän s-əmmək wa s-fälla-näx dd-äzzubbät näkkäneḍ ašäl äzzarän.

16 İkteɣ-dd älwäqq-wen mäjräd n-Emäli Ƴisa a-s inna: <Eɣya, issəlmäx däx-aman mäšan, käwäneḍ, ad-tətwəsəlmäxäm däx-Unfas Šaddijän.>

17 Ƴas šamad ij'-asän Mässinäx ihuk šund wi hanäx-ija a-s nomän s-Emäli Ƴisa Älmaseɣ, mi ämoosäx timsəgəggiyäx d-Mässinäx?>

18 Isl' älzämaɣät i-isälan-win-däx ɣas, sämmeḍ ənniyät-net ad-tiimələn Mässinäx, jannen: «Itbat a-s inəzzulam-däx, ikf'-en Mässinäx turhajät n-ad-utabän, amənän sär-s, əjrəwän əntäneḍ-däx tämudre ta n-tidət.»

Ätwäjjän isälan n-älxer däx-tayrəmt ta n-Intyuš

19 Imumənän wi əmmähäšnen ḍarät tissust ta təlkämät i-tamättant n-Stifan,† əkkän däx-sän iyyäḍ äkall wa n-Finisya, əkkän iyyäḍ awtəl wa n-Qəbrus, əkkän iyyäḍ aɣrəm wa n-Intyuš, mäšan wär xəṭṭəb təššəm-näsän ar i-käl-Älyähud.

20 Däx-a-wen-däx a däx-sän əkkän iyyäḍ əwanen däx-äkall wa n-Qəbrus d-wa n-Libya aɣrəm wa n-Intyuš, ad-xaṭṭäbän dihen isälan n-älxer n-Emäli Ƴisa i-käl-Älyunan.

21 Idhal-tän Emäli däx-a-wa täjjän. Omänän äddinät äjjootnen däx-a-wen-däx, əkfän iman-näsän i-Emäli.

22 Təsl' älkänisät ta hät Ƴärussälam i-a-wen ɣas, täšmašäl-dd Bärnäbbas s-aɣrəm wa n-Intyuš.

23 Osa-hin, inhäy tihusay n-ännuɣmät n-Mässinäx ɣas, äsdäwät-t a-wen, ad-isamətar imumənän d-ad-əknən uḍəf n-Emäli s-ulhawän əjlaynen.

24 Ämoos ənta iman-net ähaləs n-emässärho, iḍnay Unfas Šaddijän, äšsoohät day däx-immun-net. İsilan-en-däx, omänän äddinät äjjootnen s-Emäli.

25 Däx-a-wen-däx ad-ikka Bärnäbbas tayrəmt ta n-Tarša itammäx i-Sawəl, ijrāw-t ɣas, ilwäy-t-dd s-Intyuš.

26 Jän dihen awätay imdan änniixdämän d-älkänisät n-aɣrəm-en, saɣr'-en tamətte täjjet. Aɣrəm-wen-däx n-Intyuš a däx-ätwäxran inəṭṭulab n-Ƴisa s-isəm wa n-älmässexitän s-tizarät.

27 Äzzäman-en-däx ad-dd-fälän ännäbitän iha Äggäbbas aɣrəm wa n-Ƴärussälam, əkkän-dd Intyuš.

28 Ənta-en-däx a ibdädän, äloläy s-tärna n-Unfas Šaddijän n-a-s ilkam ad-äj laz läbasän fäll-ärori n-äkall iket-net. Ija day a-wen s-əmmək-wen-däx s-tän-innä däx-äzzäman wa d-ämoos Kəlod ämänokal n-äkall.

29 Təssəba n-a-wen-däx a fäl, änmännakän imumənän wi hänen Intyuš i-ad-arəj hak iyyän däx-sän s-a-wa iṭṭäf d-a-wa s-äddoobät i-ayətma-sän däx-äddin wi hänen Älyähudəyät.

† 11:19 11:19 Jannen-as iyyäḍ: Älmuştafa.

³⁰ Ʒjän a-wen s-əmmək-en-däx təzzar, jän tasəssiwit-ten-däx jer-ifassän n-Bärnäbbas d-Sawəl i-ad-tät-in-səssiwəđän inušämän n-älkänisät ta häť Älyähudəyät.

12

Iyläs-dd Mässinäx Bətrus däx-tamättant

¹ Äzzäman-wen-däx, ad-izzän ämänokal Harudəs Ägribba s-iyyəđ däx-äddinät n-älkänisät ta häť Yärussälam, ad-tän-itixəzzəbut.

² Däx-a-wen-däx, ad-inça s-täkoba Yaçub wa n-əñça-s n-Exya.

³ Inhäy a-s a-wa ija, ijraz i-käl-Älyähud ças, ästärmäs Bətrus ašäl n-ämudd wa n-Faşka-i-däx tattän äddinät tijəlwen ti wär ha täzza,

⁴ ij'-e däx-takärmüt təzzar, issəbdəd əkkožät taggayen n-əkkož-əkkož əssärdusa i-ad-t-äxləfän ed irha ad-t-dd-isəbdəd dat-käl-äššəreça afäl okäy ašäl wa n-Faşka.

⁵ Iha Bətrus takärmüt-en-däx məšan, a-s ija a-wen-däx, älkänisät ənta, täžziimäx, tajäynan dat-Mässinäx, tattär däx-s ad-t-dd-äswäyyän.

⁶ Däx-ehäđ wa n-dat-wa d-ila Harudəs ad-t-išräx, insa Bətrus däx-takärmüt jer-əssin əssärdusa däx-s janen sänatät tišəm, əbdadän day əssärdusa iyyəđ dat-emm n-takärmüt.

⁷ Har šik-däx, osä-dd änjälos n-Emäli edägg-en, ämläwläw səllul wa iha, äkrättät änjälos tasäja n-Bətrus, issənkär-t, inn'-as: «Tärmađ, əbdəd šik!» Särnät fälla-s tišəm ässaçät-wen-däx, ođänät.

⁸ Inn'-as änjälos day: «Tärmađ, əjbəs taməntəka-näk, əsəl tifädelennäk, uhən, əj anäkäbba-näk, əlkəm-ahi.» Ija Bətrus a-wa has-innä änjälos iket-net.

⁹ Izjār-dd Bətrus takärmüt, ilkäm i-änjälos məšan har ämära-däx, ija çur-s a-s täharjit ças a-wa-däx iket-net.

¹⁰ Ʒkkän-dd edes i-əssärdusa wi äzzarnen, əkkän-dd day edes i-taggayt ta s-sänatät har dd-ohäzän tashärt ta n-təzoli təkfät emm-net açrəm, tämera d-iman-net data-sän, əzjārän, əjjäšän ammas n-täšarrit ças, ifäl änjälos Bətrus.

¹¹ Älwäqq-wen-däx, ad-t-dd-iqqäl ənniyät-net, ikkäs äššäk a-s Mässinäx a sār-s dd-äšməšälän änjälos-net i-ad-t-dd-ikkəs jer-ifassän n-Harudəs, d-a-wa läbasän s-ärhän käl-Älyähud ad-has-t-əjən.

¹² Ijräh taçärha-net ämära ças, ikkä ehän n-Märyäma ta n-ma-s n-Exya wa s-itawänna Marçəs, äžziimmäçän çur-s imumənän əjjootnen təddalnen Mässinäx.

¹³ Ikkəwkaw emm n-ehän, tošäl-dd sār-s tämawađt n-tänaxdimt s-isəm-net Roda, təssəstän-t d-ere wa ämoos,

¹⁴ təzzäy temäsläxt-net məšan, təja tedawit-ta-däx fäl hin-təttəwa wälä-däx ad-has-tarr emm n-ehän, tošäl, täqqäl ammas n-ehän, təja isälan däx-älžämaçät n-a-s Bətrus a itakawkawän emm n-ehän.

¹⁵ Ʒslän i-a-wa jänna ças, əjän-tät tenəbbəddəlt, ənnän-as: «A-di änjälos-net ças a-s təsled.» Məšan, tənn'-asän: «Tidət-in, əjlayäx a-s ənta.»

¹⁶ Jannen a-wen-däx, itakawkaw-asän Bətrus emm n-ehän. Ʒglän, orän-as-t, əqqälän-dd ças, tof'-en təkunt n-a-s tidət-däx a-s ənta a-wa.

¹⁷ Äswär-asän assəkäđ emm-net, ästafäy-asän d-ad-susəmän, ad-hasän-itajj çarät-a-wen isälan n-əmmək wa s-t-dd-ikkäs Emäli däx-takärmüt. Inn'-asän day: «Äglät, əjät ämära isälan däx-Yaçub d-ayətma-näx däx-äddin wi iyyäđnen.» Ifäl-tän çarät-a-wen, ikk' edägg iyyän.

18 Äffäw ɣas tēja tämdärwäy mäqqoorät däɣ-əssärdusa, hak iyyän isastan amidi-net d-a-wa ija Bətrus.

19 Ässomäɣ-asän-t Harudəs mäšan, äba-hasän-t-dd. Issäɣrä-dd əssärdusa wi s-käla t-äɣläfän, omär s-ad-ətwəsəstənän təzzar, ämmätän. Ifäl Harudəs ɗarät-a-wen teje ta n-Älyähudəyät, ikk' aɣrəm wa n-Qäyşära i-ad-däɣ-s isəssikəy a län išilan.

Tamättant n-ämänokal Harudəs

20 A-s itäj a-wen-däɣ, ih' adkär n-iɣärman wi n-Tir d-Säyda ämänokal Harudəs. Təssəba n-ad-äj älxer ɗär-sän a fäl dd-äşmaşälän iɣärman-en älžämäyät n-älɣafyät. Änmännakän d-Blastas-i ännihäɗän däɣ-ehän n-ämänokal Harudəs d-a-wa t-dd-iqqälän iket-net. İnta-en-däɣ a däɣ-əttärän ad-ilɣəd ämänokal i-ad-äj älxer ed isudar-näsän teje-ten-däɣ fäll-ixkäm Harudəs a dd-təffälän.

21 Aşäl wa d-əlän s-ad-sətbətən älxer jere-sän, ässahäɣ-dd Harudəs aşäl däɣ-isəlsa-net wi n-təmmənukəla, äqqima fäll-tasäqqaymut-net ta n-təmmənukəla, imməjräd i-tamətte.

22 Təsla tamətte i-mäjräd-net ɣas, täşɣäyya däɣ-işənnawän, ad-janna: «Aşäl-i, Mässinäɣ iman-net a hanäɣ-ämmijrädän, wädden ägg-adəm.»

23 Diha-däɣ d-tənna tamətte a-wen-däɣ, ad-has-äzzuggät änjälos n-Mässinäɣ ed unjäy ikfa Mässinäɣ semɣar wa ɗär-änihäjjä. A-s t-in-əjrähän äddinät, əfradnät däɣ-s tiwəkkawen har ämmut.

24 İntäj mäjräd n-Mässinäɣ däɣ-idəggan äjjootnen, omänän äddinät däɣ-işilan-win-däɣ.

25 Ässawäɗ-in Bärnäbbas d-Sawəl ämaşal-näsän i-käl-Yärussälam ɣas, əqqälän siha s-dd-hän, äddeewän ämära d-Exya wa s-itawänna Marqəs.

13

Asikəl wa äzzarän ija Sawəl äddew d-Bärnäbbas

1 Älkänisät ta hät aɣrəm wa n-İntyuş, ännäbitän-net d-imäsäɣran-net da: Bärnäbbas, Simyon wa s-itawänna «Ekäwel», Lisyus wa n-äkall wa n-Qərwan, Mänahin wa s-ənta d-Harudəs İntibbas a ədwälnen däɣ-iyyän n-ehän d-Sawəl.

2 Aşäl wa n-älɣibadät n-Emäli, äzuumän imumənän, äžziimmäɣän däɣ-iyyän n-edəgg, ɣabbädän Emäli a-s hasän-innä Unfas Şäddijän. «Äjät-ahi Bärnäbbas d-Sawəl s-edes i-ämaşal wa s-tän-dd-äɣreɣ.»

3 Äzumän, ɗälän Mässinäɣ təzzar, äswärän ifassän-näsän Bärnäbbas d-Sawəl, oyyän-tän, əglän.

4 Oɣad-tän Unfas Şäddijän, äzzubben s-aɣrəm wa n-Slukya təzzar əjjäşän turäft n-aman, jän tamdujt ta n-Qəbrus;

5 əwwäɗän-in taɣrəmt s-isəm-net Sälamin ɣas, jän isälan n-mäjräd n-Mässinäɣ däɣ-ihänan n-äddin wi n-käl-Älyähud, ämoos-asän Exya Marqəs ämadhal.

Yəlimas wa n-emässäxär

6 Əjläyän awtəl wa n-Qərwan iket-net har Bafus, əjräwän dihen ägg-Älyähud n-emässäxär s-isəm-net Bärɣisa, ijanna s-bahu, ännäbi a ämoos,

7 izzay ɣur-Sarżus Buləs-i n-ämänokal n-awtəl, ähaləs, a-wen, iknan terşe n-tayətte. İsla ämänokal Bärnäbbas d-Sawəl ɣas, issäɣr'-en-dd däɣ-derhan n-ad-t-səslən mäjräd n-Mässinäɣ.

⁸ Iggäd-dd Үәlimas wa n-emässäxär, a-wen isəm-net дәҫ-Tälyunanit, äšmäšäkkät-asän мәjрäd, ad-itattär ad-hin-išөšlөл ämänokal fäll-isälan n-immun.

⁹ Ibdäd-dd sär-s Sawəl-i s-itawänna даҫ Buləs, iḍkar-t Unfas Šaddijän, ikna asəns n-akäyad-net fäll-Үәlimas,

¹⁰ inn'-as: «Ҫыя isəm n-ägg-Iblis, käyy wär төḍneyäd a säl amsud d-təlmənuфäҫa, ašänjo n-a-wa oҫädän a tämoosäd, isəm n-eməkkerrəs, ҫas äba-hak a käy-išilləwän ar asəfraҫ n-tabarät ta toҫädät n-Emäli.

¹¹ Ämära, səjəd-ahi: ad-fälla-k isäns Emäli äfuss-net, täddärҫäläd, tähajəd wär төnheyäd täfukt s-tiḥtawen-näk.» Wärnät tihay d-tähoҫt tiḥtawen-net ässaҫät-wen-däҫ, ad-isikluluf siha d-siha, itammäҫ i-ere t-ilwäyän.

¹² Inhäy ämänokal n-äkall a-wa ijän ҫas, omän, төḍäs teҫäre ta s-islä fäll-Emäli ulh-net.

Älxuḥbät wa ija Buləs дәҫ-tayrəmt ta n-Intyuš

¹³ Ijjäš Buləs d-imidiwän-net turäft n-aman дәҫ-Bafus, əkkän aҫrəm wa n-Birga дәҫ-äkall wa n-Bänfəli, dihen-däҫ a där-sän ibḍa Marqəs, äsof ad-iqqəl Yärussälam.

¹⁴ Fälän Birga, əkkän Intyuš ta n-teje ta n-Bəssidi. Ij'-en ašäl wa n-əssəbət dihen ҫas, əkkän ehän n-äddin wa n-käl-Älyähud.

¹⁵ Äqqimän dihen-däҫ, itawäҫra alämär n-Mässinäҫ d-a-wa ənnän ännäbitän дәҫ-əlkəttabän ҫas, ənnän-asän imizärän n-ehän wa n-äddin: «Meddən, ayətma-näҫ, kunta lam isəmməterän s-tärham ad-tän-təjəm i-äddinät, äxtəbät-asän.»

¹⁶ Ästafäy Buləs i-älzämaҫät, ibdäd, inn'-asän: «Käl-Išrayil d-imaksaḍän n-Mässinäҫ, säjdät-ahi.

¹⁷ Mässinäҫ n-tamətte-ta-däҫ n-Išrayil, ənta a äsnäfränän abbatän-nänäҫ, ässet'-en härwa han äkall wa n-Mišra төzzar, izzəzjär-asän-t-dd s-tärna n-äfuss-net,

¹⁸ wär t-illa erk älxal wär has-əjjesän mäšan, äzzäydär fälla-sän har jän əkkozät timərwen n-awätay дәҫ-tenere.

¹⁹ Ḍarät a-s tän-ikfa tärna fäll-əssa əddəwəlän дәҫ-Xäna a tän-ikfa täkasit ta hasän-ämoos äkall-wen-däҫ.

²⁰ Okäy ḍarät-a-wen a ojarän əkkozät timaḍ n-awätay d-səmmosät timərwen төzzar, ikf'-en älgallitän-i fälla-sän ämnakälnen hundäҫ har äzzäman wa n-ännäbi Sumäyla.

²¹ Ənta-en-däҫ a дәҫ-əttärän käl-Išrayil ere fälla-sän ämnakälän, ij'-asän a-wa дәҫ-s əttärän, ikf'-en Mässinäҫ Sayəl ägg Kis wa n-tawset ta n-Bänyamin. Ämnakäl fälla-sän əkkozät timərwen n-awätay

²² mäšan, innäḍ fälla-s Mässinäҫ, ijä-dd Dawəd ägg Yasa-i s-ənta a fäll inna Mässinäҫ:

«Ejräwäҫ Dawəd ägg Yasa,
ənta a-s ähaləs-wa s-ulh-net ilkam i-wa-nin,
ad-ämašäl erhet-in iket-net.»

²³ Ijəllan n-Dawəd-en-däҫ a дәҫ-dd-ikkäs Mässinäҫ Үisa-i s-ənta a-s Ämaҫlas wa s-ijjäš ärkäwäl-net i-käl-Išrayil.

²⁴ Үisa, a-s ija Exya isälan-net härwa wär-issənta ämašal-net älwäqq wa d-ixatḥäb asəlmaҫ дәҫ-aman i-ad-umas a-wen ašämol n-tätubt i-tamətte n-Išrayil iket-net.

²⁵ Älwäqq wa dd-tohəz tamättant n-Exya, innä i-tamətte: «Mi s-tordam ämoosäҫ-t? Wär teҫalät näkk a-s ätwänna ilkam a dd-asäҫ; wa s-ätwänna

ilkam a dd-ass, imal-dd, ənta-en, wär-ənhəjjəy wəla-dəy d-ad-əkkəsəy tifadəlen dəy-ıdarən-net.>

²⁶ Ayətma-y wi n-ihəyawän n-Ibrahim, kəwəneḍ-i əksuḍnen Məssinəy, nəkkəneḍ a-s dd-əssawəy Eməli məjrəd wa n-əlyəllas.

²⁷ Adduuttät a-s Yərussəlam d-imizərən-net, əžžəžhəlän iman-nəsən i-Ḡisa, wär t-illa a əfhamən dəy-a-wa ənnən ənnəbitən dəy-əlkəttabən wi titwəyrinen hak əssəbət n-əlyəbadət dəy-ihənan n-əddin, əswərən Ḡisa uḍlem, ittərməs,

²⁸ a-s ija a-wen, wär t-illa uḍlem fälla-s əttijrəwän, hakd a-wen-dəy, əttərən dəy-Bilatəs ad-ətwəjjən iman-net.

²⁹ Əssəbətən a-wa fälla-s ənnən əlkəttabən ɣas, əkkəsən-t-dd fäll-tajəttewt, jən-t dəy-azəkka

³⁰ məšan, issənkar-t-dd Məssinəy jer-inəmmuttan.

³¹ Ənfaləl-dd i-əddinət əjjootnen dəy-wi dər-s əddewnen wa-dəy n-Galila har Yərussəlam, ija işilan əjjootnen ill'-e jere-sən. Əməra, əddinət-win-dəy s-dd-ənfaləl a tajəyhanen i-isəlan-win-dəy data-wän.

³² Nəkkəneḍ əməra, nətajj'-awən isəlan-win-dəy n-əlker s-ətwəjja ərkəwəl-nəsən i-abbatən-nənəy.

³³ Ərkəwəl-en, nəkkəneḍ-i əmoosnen ihəyawän-nəsən a-s t-ijjəš Məssinəy ənta-i dd-issənkarən Ḡisa jer-inəmmuttan s-əmmək wa s-iktəb dəy-əlxəsəb-wa s-əssin n-əlkəttab wa n-Əzzəbur, innə Məssinəy dəy-isəlan n-Ḡisa:

<Kəyy a-s Rure-ɣ, orəwəy-kəy əşəl-i-dəy.>

³⁴ Əywa, Ḡisa ya, Məssinəy iman-net a innən, a t-dd-issənkarən jer-inəmmuttan hərwa wär-inhey mərkəhaw wa n-azəkka. A-wen-dəy dəy a fəl innə dəy-isəlan-net:

<Ad-kəwən-əkfəy əlbəraka wa šəddijən itbətən s-jey ərkəwəl n-ad-t-əkfəy i-ənnəbi Dawəd.>

³⁵ İktab dəy a-s:

<Wär-e təyyəd Eməššeddəy-nək irakkəh dəy-azəkka.>

³⁶ Təssanəm a-s Dawəd ənta iman-net əmeşəl a-wa fälla-s irha Məssinəy dəy-əzzəman-net təzzar, əmmut, inhəy mərkəhaw wa n-azəkka şund a-wa jən abbatən-net wi has-dd əzzarnen

³⁷ məšan Ḡisa ənta, wär-inhey mərkəhaw-wen-dəy ed, issənkar-t-dd Məssinəy jer-inəmmuttan.

³⁸ Ayətma, əlmədət a-s Ḡisa-i, ənta a ɣur-hawən-t-təlla tenəşše n-ibəkkədən, ənta a-s səmdo n-a-wa hawən-ihən ələmər wa dd-əzzəbbət Məssinəy fəll-ənnəbi Mosa iket-net,

³⁹ ənta a ɣur-ijarrəw e d t-illəm amumən idəm dat-Məssinəy,

⁴⁰ a-wen-dəy a fəl, agəzət iman-nəwən iket-di d-wär fälla-wən oḍa əşşar-wa s-ənnən ənnəbitən. Innə Məssinəy:

⁴¹ <Ənhəywət, kəwəneḍ-i əḍnəynen kəssən, tərməset-kəwən təqqən n-eyəf,

ibəhet-kəwən fəl-a-s

ad-əjən ijitän dəy-əzzəman-nəwən s-kud-dəy

ij'-awən əwadəm isəlan-nəsən, wär mad-t-təfləsəm.> »

⁴² İzjər-dd Buləs d-Bərnəbbas ehən n-əddin ɣas, əttərən dəy-sən əddinət a dd-ələsən uɣəl əssəbət-wa ilkəmən i-ad-hasən-ələsən iji n-isəlan-wi-dəy.

⁴³ İmməhəş əlzəməyət ɣas, əlkəmən-asən kəl-Əlyəhud əjjootnen d-ıyyəd əlkəmən i-əddin wa n-kəl-Əlyəhud, ədwənnen dər-sən, sisibuyunən-tən, sikəsən-tən əşşək n-ad-əqqəymən ətəfən ənnuxmət n-Məssinəy.

Ija Buləs d-Bärnäbbas isälan n-älxer i-äddinät wären ämoos dägg-Älyähud

⁴⁴ Ijä ašäl wa n-əssəbət-i n-täsonfat ɣas, äddew-dd aɣrəm iket-däɣ-net i-ad-isəjəd i-mäjräd n-Emäli.

⁴⁵ Ənhäyän käl-Älyähud əjut n-tamətte ɣas, osämän, ad-šimšəkken mäjräd i-Buləs, jannen isikufor.

⁴⁶ Buləs d-Bärnäbbas ämoosän meddön ozjanen s-itbat immun-näsän, ənnän-asän: «Käwäned a-s änihäjja ad-hawän-itwäxtəb mäjräd n-Mässinäɣ s-tizarät mäšan, tunjäyäm sār-s ed, wär täsnähäjjäm iman-näwän d-tämudre ta täɣlälät, a-wen-däɣ a fäl ämära, əlmədät a-s ad-nənnäd s-inəzzulam.†

⁴⁷ Ənta-den-däɣ a-wa s-hanäɣ-omär Emäli däɣ-əlkəttab-net a-s innä: <Jeɣ käy-ännur i-tiwsaten

i-ad-hin-səssiwədəd

əɣəllas ifäyyän n-äkall iket-net.> »

⁴⁸ Əslän inəzzulam i-a-wen ɣas, əddəwen, ad-timələn mäjräd n-Emäli, omänän wi s-ätiwatäs ad-əjrəwän tämudre ta täɣlälät iket-näsän.

⁴⁹ Intäj mäjräd n-Emäli däɣ-äkall iket-net.

⁵⁰ Jän käl-Älyähud erk iman däɣ-tiɖeden ätiwäsämɣärnen d-imuzärän n-aɣrəm, oɖä-dd äɣizabät səmmän fäll-Buləs d-Bärnäbbas, äsmähädän däɣ-sän äddinät i-ad-əzjārän isäɣlay n-äkall-näsän.

⁵¹ Əbbəkəkän äboqqal n-iɖarän-näsän fäll-aɣrəm-en təzzar, əkkän aɣrəm wa n-Ikanyun.

⁵² Äqqimän-dd inəttulab wi n-Intyuš ɖarät tekle-näsän, əknan däɣ-tedäwit, iɖnay-tän daɣ Unfas Šäddijän.

14

Ija Buləs d-Bärnäbbas isälan n-älxer däɣ-Ikanyun

¹ Oläs Buləs d-Bärnäbbas däɣ-Ikanyun iji n-a-wa s-əzzäyän iji-net däɣ-äzzäman-en-däɣ, əjjäšän ehän n-äddin wa n-käl-Älyähud, jän däɣ-s mäjräd-wa-däɣ fäl omänän käl-Älyähud äjjootnen d-tamətte täjjeet däɣ-ta n-käl-Älyunan,†

² mäšan, əssənkärän-dd käl-Älyähud wi s-äqqurän ulhawän-näsän inəzzulam,† jän däɣ-sän erk iman i-ad-əššunjen äddinät-wi omännen s-Ÿisa.

³ Ädwännät Buləs d-Bärnäbbas dār-sän har jän äzzäman, tajjän-asän mäjräd ädduutten, tajjäyhen-asän fäll-Emäli. Ikf'-en daɣ Mässinäɣ ännuɣmät s-tajjän ijitän n-Mässinäɣ d-härätän ässuksädnen, wär t-illa a tän-ässirmäɣän, ed äsiwār-tän Emäli tärna-net.

⁴ Təbɖa tamətte n-aɣrəm iket-net, əlkämän iyyäd i-käl-Älyähud, əlkämän wi iyyädnen i-inəmмуšal.

† **13:46 13:46** — Ƴur-käl-Älyähud, ere wärän ämoos ägg-Älyähud s-aläšäl meɣ ere wärän ilkem i-äddin-näsän, iket-net, änəzzalim a ämoos. A-wen-däɣ a fäl tiwsaten ti iyyädnen iket-näsnät, ti n-inəzzulam. — Ašäl-i-däɣ, änəzzalim, äkafär (ere wärän issen s-Mässinäɣ). † **14:1 14:1** Itawann'-asän: Gəriktän. (Les Grecs däɣ-Təfränsit). Əzzaɣän Erobbä däɣ-äkall wa itawänna: Gəris (La Grèce däɣ-Təfränsit). Tawalt-näsän: Tälyunanit. † **14:2 14:2** — Ƴur-käl-Älyähud, ere wärän ämoos ägg-Älyähud s-aläšäl meɣ ere wärän ilkem i-äddin-näsän, iket-net, änəzzalim a ämoos. A-wen-däɣ a fäl tiwsaten ti iyyädnen iket-näsnät, ti n-inəzzulam. — Ašäl-i-däɣ, änəzzalim, äkafär (ere wärän issen s-Mässinäɣ).

⁵ Ejjäšan-dd erk iman inəzzulam d-käl-Älyähud iyyäd d-imizärän-näsän, ad-tattärän əmmək s-əsmädräyän Buləs d-Bärnäbbas, əkfən-tän sämmäjori n-tihun,

⁶ əlmädän inəttulab s-a-wen ɣas, əjewädän s-Likawni d-Listra d-Darba d-attayän n-tidbi-tin-däɣ.

Ija Buləs d-Bärnäbbas isälan n-älxer däɣ-Listra

⁷ Jän isälan n-Älənžil däɣ-iɣärman-win-däɣ iket-näsän.

⁸ Aɣrəm wa n-Listra, ih'-e ähaləs n-anäbdon s-a dd-iwa-däɣ, ibdan.

⁹ Islä i-Buləs ämmijräd ɣas, äsjäd-as. Inhäy Buləs däɣ-tiɣtawen-net a-s ila immun t-əzozäyän, iɣləs ɣas,

¹⁰ inn'-as s-afälla: «Əbdəd fäll-iman-näk.» Iggäd ähaləs, irjäš.

¹¹ Ənhäyän äddinät a-wa ija Buləs ɣas, äşyären, ənnän däɣ-tawalt ta n-Likawni: «Aşäl-i, mössaw-näɣ dd-falnen isənnawän däɣ-taɣəssa n-dägg-adəm a dd-əzzubbätnen fälla-näɣ.»

¹² Jän i-Bärnäbbas isəm Zuss, jän i-Buləs isəm Armas† ed, ənta a ämmijrädän ässaɣät-wen-däɣ.

¹³ Oşäl-dd u-tikutawen wa n-Zuss ila ehän-n-ämudd wa ihän emm n-aɣrəm, ilwäy-dd iwdesän d-täboyt n-isəhhəska, ad-itattär ənta d-tamətte əmmək s-jän härätän-win-däɣ takute i-Buləs d-Bärnäbbas.

¹⁴ Əlmädän inəmmuşal s-a-wen ɣas, äşyärrewen inkubba-näsän fäll-iman-näsän, oşälän s-tamətte äşyären,

¹⁵ jannen: «Ya meddän! Wär jem a-di, ma ämoos a-wa s-täbokäm iji-net? Näkkäneɗ dägg-adəm ɣas a nämoos, wär t-illa a där-wän nəzlay. Isälan n-älxer a häwän-näwway i-ad-təbdəwäm d-mäläyähna, tutabäm s-Mässinäɣ-i n-Ämaɣlal dd-ixläkän isənnawän d-äkall d-ijərwan d-a-wa tänihän iket-net.

¹⁶ Ibda, oyya əzzurəyyatän-ti okäyänen əlkamnät i-erhet n-iman-näsnät

¹⁷ mäšan hakd a-wen-däɣ, wär hin-issəbdäd fälla-snät älxer-net. Ənta a fälla-wän dd-əzzäbben ijənnawän, iɣmär-käwän s-əzzämanän olaɣnen, ikf'-iwän isudar, ij' älxer däɣ-ulhawän-näwän.»

¹⁸ Jannen-asän a-wen-däɣ mäšan, šärnaš d-əgdälän tikutawen-ti s-ärhan äddinät a tänät-əjən däɣ-təssəba-näsän.

¹⁹ Osän-dd härät däɣ-käl-Älyähud dd-falnen Intyuš d-Ikanyun, əzzänän s-Buləs. Əkfän-t sämmäjori n-tihun təzzar, äşräwräwän-t har t-əzzəzjārən aɣrəm ed, äyelän äba-t.

²⁰ Əlkämän-as-dd inəttulab-net, äɣläyɣäläyän-t ɣas, inkär-dd, oläs ujəš n-aɣrəm. Äffäw ɣas, äddew d-Bärnäbbas s-Darba.

Iqqäl-dd Buləs d-Bärnäbbas tayrəmt ta n-Intyuš

²¹ Äslänžen aɣrəm-wen-däɣ, jän däɣ-s inəttulab äwwädnen härät təzzar, əqqälän Listra d-Ikanyun d-Intyuš.

²² Samätärän inəttulab däɣ-idäggan-win-däɣ d-ad-əttəfän immun s-Mässinäɣ ed, itbat a-s ujəš n-Təmmənəya n-Mässinäɣ, äddeew daɣ d-älɣizabät äjjeen.

²³ Älkänisät əmmärän-däɣ, a däɣ-s səbdədän inušämän, ədölən-asän Mässinäɣ, uzamän təzzar, säɣləfän-tän i-tärna n-Emäli-i s-omänän i-ad-däɣ-sän äj älbäraka.

²⁴ Əjläyän ɗarät-a-wen teje ta n-Bəssidi, okäyän s-ta n-Bänfəli,

²⁵ äxtäbän däɣ-aɣrəm wa n-Birga təzzar ätrarän s-Antalya.

† 14:12 14:12 A-wa ismawän n-härät däɣ-asmel n-imakrašan wi jan käl-Älyunan i-iman-näsän.

26 Ejjäšan turäft n-aman dihen, jän tamdujt ta n-Intyuš-i-däx dd-ämešälän qarät a-s ässiyläfan imumənän i-ännuḡmät n-Mässinäx.

27 Osän-in ḡas, äsdäwän-dd älkänisät, ad-siḡulän i-imumənän isälan n-a-wa s-tän-ikfa Mässinäx turhajät n-iji-net, d-əmmək wa s-ora Mässinäx emm n-ehän n-immun i-inəzzulam.

28 Ähojän qarät-a-wen əzzaḡän ḡur-inəṭṭulab wi n-dihen.

15

Mäjräd wa ikkän jer-imumənän däx-isälan n-a-wa iyalläsän

1 Äzzäman-en-däx a dd-fälän meddän iyyäḡ teje ta n-Älyähudəyät, ad-saḡren imumənän n-a-s ere wärän ämeläy s-älḡadät wa dd-oyya ännäbi Mosa, wär-e iḡləs.

2 Ija dār-sän Buləs d-Bärnäbbas tamḡənnant täṣṣoohet təzzar, änmärdän imumənän fäl ad-sukən Buləs d-Bärnäbbas d-härät däx-meddän n-älkänisät-näsän Yärussälam i-ad-əjən isälan n-tamḡənnant-ta-däx i-inəmмуšal d-inušämän wi t-əllänen dihen i-ad-hasän-tät-arən.

3 Ässofädän-tän-in imumənän n-älkänisät ta n-Intyuš-i tän-täšmašälät s-tizarät, räsän teje ta n-Finisya d-ta n-Sämari, siḡulän isälan n-əmmək wa s-ätubän inəzzulam† i-Mässinäx. Ämoos umär wa tän-dd-jän a iknan asəddəwi n-ayətma-sän däx-äddin däx-idäggan-win-däx.

4 Ewwädän-in Yärussälam, täsbärräk-tän älkänisät d-inəmмуšal d-inušämän, jän däx-sän isälan n-a-wa s-tän-ikfa Mässinäx turhajät n-iji-net s-ifassän-näsän.

5 Eḡgädän-dd meddän iyyäḡ hanen taggayt ta n-käl-faris təglät fäll-tidət n-iman-net, ənnän əflasän a-s ämoos amili d-alkum i-alämär wa n-ännäbi Mosa a ifraḡän fäll-inəzzulam i-ad-əjjəšan Təmmənəya n-Mässinäx.

6 Ezzəmmäḡän inəmмуšal d-inušämän i-ad-əjrəwän äddäbara däx-isälan-wi-däx.

7 Təja däx-sän tamäzayt täṣṣoohet. Däx-a-wen-däx, ad-dd-ibdäd Bətrus jere-sän, inna: «Ayətma-ḡ, təssanäm a-s äru d-hi-äsnäfranän Mässinäx jere-wän i-ad-säsläx inəzzulam isälan n-Älənžil i-ad-amənän s-Mässinäx.

8 Mässinäx i issänän a-wa ihän ulh n-ägg-adəm a hasän-imməjrädän, ikf'en Unfas Šaddijän s-əmmək wa s-hanäx-t-ikfa näkkäneḡ-i n-käl-Älyähud,

9 wär t-illa a-s hanäx-azimäzläy dār-sän ed, immun s-Mässinäx a iššəšdäjän ulhawän-näsän.

10 Šämad tidət a-wen, adiš mafäl tirəməm Mässinäx, tajjäm fäll-errawän n-inəṭṭulab äzuk s-näkkäneḡ wäla abbatän-nänäx, indär-anäx älänji-net?

11 Wädden ännuḡmät n-Emäli ḡisa-i s-nomän, iḡläs-anäx, ənta daḡ a-s omänän əntäneḡ-däx.»

12 Tässosäm tamətte iket-net, äsjädän äddinät qarät-a-wen i-Bärnäbbas d-Buləs siḡulän isälan n-ijitän n-Mässinäx wi jän d-härätän wi ässuksäḡnen jän jer-inəzzulam.

13 Eṣṣəmdän mäjräd ḡas, idkäl-t Yaḡub, inna: «Ayətma-ḡ, säjdät-ahi.

14 Ija däx-näx Simyon Bətrus isälan n-əmmək wa s-dd-äšbašaj Mässinäx s-inəzzulam i-ad-däx-sän isənnəfrən tamətte təlcamät i-isəm-net ed,

† 15:3 15:3 — ḡur-käl-Älyähud, ere wärän ämoos ägg-Älyähud s-aläsäl meḡ ere wärän ilkem i-äddin-näsän, iket-net, änəzzalim a ämoos. A-wen-däx a fäl tiwsaten ti iyyäḡnen iket-näsnät, ti n-inəzzulam. — Ašäl-i-däx, änəzzalim, äkafär (ere wärän issen s-Mässinäx).

15 ämoos a-wen a änimännakän d-a-wa önnän ännäbitän ed, iktab a-s, innä Mässinäy:

16 <Ḍarät-a-wen, ilkam a dd-äqqələy
i-ad-aləsäy edey n-ehän n-Dawəd-wa oḍän,
səbdədəy-t-dd dəy-timšar-net, ädyäy-t.>

17 A-wen, dəy-təssəba n-ad-immäy a-wa t-illän dəy-äddinät i-Emäli, ömmäxnät-as dəy tiwsaten-ti fäll-itawäyra isəm-in. A-wen, Emäli a tän-innän, erhet-net dəy den-dəy ənta-i ilän tärna n-iji n-härätän-win-dəy dəy den-dəy,

18 wär t-illa dəy a has-idrajän dəy-a-wen-dəy, ed issän-t yur-aläšäl-net.

19 Təssəba n-a-wen-dəy a fäl hawän-janney a-s, wär täsmäxatäräm inəzzulam-wi maden-utab s-Mässinäy

20 mäšan, nəktəbet-asän təkərde n-tamätərt i-ad-əbdəwän d-härät iket-net äddooben asəmmədəs-näsän, əbdəwnet d-älxibadät n-äššanämän d-əzzəna d-tetäte n-mäysoy d-tesäse n-ašni.

21 Äduuttät a-s ila ännäbi Mosa dəy-əzzurəyatän-ti-dəy hakd-dəy ti-okäyner äddinät dəy-iḡärman iket-näsän ḡarränen əlkəttabän-net hak əssəbət-i n-täsonfat dəy-ihänen n-äddin.»

22 Ännännakän inəmмуšal d-inušämän d-älkänisät ḍarät-a-wen fäll-ad-sənnəfrənän härät dəy-meddən-näsän maden-idaw d-Buləs d-Bärnäbbas s-Intyuš, äsdəwän ḍär-sän dəy Yahudəs wa itawäyren s-isəm Bäršabas d-Sillas, əssin meddən a-wen ätiwäsämḡärnen jer-ayətma-sän dəy-äddin.

23 Əkfän-tän təkərde əktabän s-ifassän-näsän. Ənnän dəy-s:

A-wa näkkəneḍ inəmмуšal d-inušämän wi n-ayətma-wän dəy-äddin. Nähuul-in ayətma-näy wi s-käla ämoosän inəzzulam hänen Intyuš d-Surya d-Silisi.

24 Ijmaḍ-t äššək a-s nəššəwwäš a-s nəslä ass wa käwän-in-jän meddən hanäy-in-falnen wär hin-näšmašäl, nəssan a-s, ənxäsän iman-nəwän.

25 A-wen-dəy a fäl nohär iyyän n-äddäbara iket dəy-nänäy i-ad-kəwän-in-nəsuk meddən nəsidaw d-Bärnäbbas d-Buləs-i nəkna tärha ed,

26 ämoosän meddən jänen iman-näsän dəy-miši fäl təssəba n-isəm n-Emäli-nänäy YisaÄlmasex.

27 Nəšimašäl-in dəy sār-wän Yähudəs d-Sillas i-ad-hawän-aləsän asuḡəl n-isälan-wi-dəy.

28 Issəlməd-anäy Unfas Šäddijän, närḍa dəy s-ad-wär nətəjj fälla-wän äzük wäl' iyyän säl wa ämoosän färəḍ,

29 a-wen a t-ämoosän, asäxrəm n-tetäte n-takute jat i-äššanämän, asäxrəm n-tesäse n-ašni d-tetäte n-mäysoy d-təbəḍḍawt d-iji n-əzzəna. Afäl tətṭäfäm iman-nəwän fäll-härätän-win-dəy, ad-təjəm a ähuusken ed, wär mad-iḡšəd isəm-nəwän dat-äddinät.

Nähuul-kəwän-in, wässälam!

30 Ärkäbän ḍarät-a-wen, əqqälän Intyuš, äwwayän təkərde-tənnin-dəy. Əwwäḍän-in ḡas, äsdəwän-dd älkänisät, əkfän älzəmaḡät təkərde,

31 tätwäyra, ämoosän isälan-wi tät-hänen əssəbab n-tedäwit məqqoorät.

32 Äsmätär-tän dəy Yähudəs d-Sillas ed ännäbitän a ämoosän s-iməjridän äjjootnen, sasmaḍän ulhawän n-imumənän, sişuhun-tän dəy-immun-näsän.

33 Ässakäyän härät n-išilan dihen ḡas, fälän-tän imumənän-wi dd-fälnen Yärussälam dəy-älxer, əqqälän älkänisät ta tän-dd-täšmašälät [

³⁴ mäšan, äqqima Sillas ɖara-sän].

³⁵ Izzäx Buləs d-Bärnäbbas dāx-Intyuš-en-dāx, saxr'-en ɔntäneɖ d-iyyəɖ, xaṭṭābän s-älxalän äjjootnen isälan n-Emäli.

Täbəɖɖawt n-Buləs d-Bärnäbbas

³⁶ Härät n-išilan ɖarät-a-wen, innä Buləs i-Bärnäbbas: «Näqqəlet ayətma-nāx dāx-äddin wi hänen iḡarman wi dāx-nəja isälan n-mäjräd n-Emäli, nəssən ɔndek ɔmmək-näsän.»

³⁷ Ittär Bärnäbbas a-där-sän aləs Exya Marqəs tädiwt

³⁸ mäšan, wär has-irɖa Buləs s-a-wen. Inn'-as, wär-änhäjja a-där-sän idaw ed, ɔnta iman-net a hin-iḡtäsän iman-net där-sän a-s ɖara-sän ibɖa dāx-Bänfeli.

³⁹ Täkkus talḡa jere-sän har dd-orāw a-wen-dāx täbəɖɖawt-näsän s-iyyəɖ. Äddew Bärnäbbas d-Marqəs ɖarät-a-wen, ɔjjäšän turäft n-aman, ɔkkän Qəbrus.

⁴⁰ Iḡrā-dd Buləs Sillas s-iman-net, iglä ɖarät a-s t-ässeḡläfän ayətma-s dāx-äddin ännuḡmät n-Emäli.

⁴¹ Immär Buləs äkall wa n-Surya d-Silisi, isiḡuhut immun n-älkänisäten dāx-idäggan-win-dāx iket-näsän.

16

U-Mäsidunya wa ittärän tinahäxen dāx-Mässinäx

¹ Immär Buləs aḡrəm wa n-Darba d-wa n-Listra, ill'-e dihen-dāx a-s änäṭṭalib iyyän da-dāx s-isəm-net Timoti, ma-s tamumənt lan käl-Älyähud mäšan, ti-s, i n-käl-Älyunan,†

² jannen fälla-s imumənän wi n-Listra hakd-dāx wi n-Ikanyun a ähuusken.

³ Iḡr'-e-hi-dd Buləs s-iman-net i-ad-där-s idaw mäšan, äsmaläy-t təzzar i-ad-wär järrewän käl-Älyähud wi t-öllänen dihen a fälla-s ɔnnän ed, ɔssanän iket-näsän a-s abba-net, i n-käl-Älyunan.†

⁴ Aḡrəm ɔmmärän-dāx ɖarät-a-wen, ad-dāx-s səmmətärän imumənän dāx-alkum d-uɖəf n-äddäbaratän-wi hasän-äḡtäsän inəmмуšal d-inušämän dāx-Yärussälam.

⁵ Samätarän älkänisäten i-ad-iḡḡuhət immun n-inəṭṭulab, isajat-dd Mässinäx hak ašäl äddinät äynaynen dāx-älkänisät ɔkfanen iman-näsän i-Emäli.

⁶ Ijläy Buləs d-imidiwän-net Frižya d-teje ta n-Gälasya mäšan, wär hasän-irɖa Unfas Šäddijän jan isälan dāx-äkall wa n-Azya,

⁷ ɔwwäɖän-dd Masi, ɔttärän ad-ɔkkən Bətni mäšan, igdal-asän day Unfas n-Ḳisa s-a-wen,

⁸ ɔjläyän Masi, äzzubben dāx-Tärwas.

⁹ Əllan-t dihen-dāx a-s ähhurjät Buləs u-Masidunya iyyän t-iḡarrän, ibdad, iddal Mässinäx, ijann'-as: «Ya Mässinäx! Šəmmişel-dd sār-nāx ere hanāx-ohāxän tinahäxen, näḡləs.»

¹⁰ Nəfhäm s-a-wen-dāx dd-änfalälän i-Buləs, a-s irha fälla-nāx Mässinäx ad-nəsəllənžət teje-ten-dāx, ad-nətammāx ya i-ɔmmək s-nəkka Masidunya. Ḳur-dihen-dāx ad-tän-dd-ɔjjäšäḡ, ohärāx d-Buləs asikəl näkk-i iktābän isälan-wi-dāx.

† 16:1 16:1 Itawann'-asän: Gəriktän. (Les Grecs dāx-Təfränsit). Ezzaxän Erobbā dāx-äkall wa itawänna: Gəris (La Grèce dāx-Təfränsit). Tawalt-näsän: Tälyunanit. † 16:3 16:3 Gərik (Grec) dāx-Təfränsit.

11 Nəjjäš turäft n-aman dāḡ-Tärwas, nəja s-iiyyät tamdujt ta n-Somättras, äffäw nəkka Näyyabolis;

12 nəfäl dihen, nəkka aḡrəm wa n-Fəlibb-i s-ənta a itammär ere dd-ijjāšan Masidunya s-tizarät, ämoos daḡ aḡrəm fäll-ixkam Roma, nässakäy härät n-išilan dihen.

Ija Buləs isälan n-älxer dāḡ-taḡrəmt ta n-Fəlibb

13 Ašäl wa n-əssəbət-i n-täsonfat, nəzjār aḡrəm, nəkka asälim n-əjärew ed, norda s-ad-dāḡ-s nəjrəw edägg ištärän dāḡ-nədäl Mässinäḡ, nogäz-in dihen tiḡeḡen äžziimmäḡnen, näqqima ad-hasnät-nətajj isälan.

14 Täsjäd-anäḡ tiyyät dāḡ-snät n-tämaksadt n-Mässinäḡ s-isəm-net Lidya, tu-mamälat n-aḡrəm wa n-Təyatir hin-žänšet mäšär wa n-nefran n-ini säggäḡän. Orä Emäli ulh-net, tomän s-a-wa has-ijänna Buləs,

15 tätwäsälmäḡ dāḡ-aman ənta d-käl-ehän-net. Tənnä i-Buləs d-imidiwän-net ḡarät-a-wen: «Kunta təflasäm a-s tamumənt n-Emäli a ämoosäḡ, məjurətät-ahi». Laqqäd-anäḡ har hanäḡ-täšhäššäl s-a-wen.

16 Noläs daḡ nəkka edägg n-tittar a-s hanäḡ-dd-təlkäd tänaxdimt tiyyät ih' alšin iknan tälläbäst, tämoos i-məssaw-s əssəbab n-ärrəzäḡ ed, itiləḡut alšin wa tät-ihän a-wa ilkämän, təzzälän-as äddinät.

17 Tənhäy-anäḡ ḡas, təltäḡ-anäḡ, e-s nəkka-dāḡ təseḡärät ḡara-näḡ, janna: «Ya äddinät, əlmədät a-s meddən-wi-dāḡ hannäyäm, eklan n-Mässinäḡ wa iknän aḡkul, isälan n-tabarät ta n-əḡḡəllas a-s dd-osän i-ad-tän-əjən.»

18 Təj'-anäḡ alkum-wen-dāḡ har ja išilan, təglä fäw har täsyäf Buləs; ämlälläy-dd sär-s, äsmähäḡ fäll-alšin wa tät-ihän, inn'-as: «Omaräḡ-käy s-isəm n-ḡisa Älmaseḡ, əsjär-tät!» Izjār-tät alšin ässaḡät-wen-dāḡ.

19 Ənhäyän məssaw-s a-s taklit-näsän äbas-hasän-dd-saḡsal ehäre ḡas, ärmäsän Buləs d-Sillas, əlwäyän-tän s-eḡäryär wa n-tamḡənnant s-itawänna Larofaž dāḡ-itamär äššäreḡa, əssəbdädän-tän dat-älqallitän,

20 əssəknän-tän ḡarät-a-wen daḡ i-käl-äššäreḡa wi n-Roma, ənnän-asän: «Meddən-i n-käl-Älyähud hannäyäm, wär dd-äwweyän a säl äḡḡärora s-aḡrəm-nänäḡ,

21 sasäḡren äddinät äḡḡadatän s-näkkäneḡ-i n-käl-Roma wär hanäḡ-t-illa udəf-näsän wäla alkum-hasän.»

22 Təsla tamətte i-a-wen ḡas, təzzän sär-sän. Ənnän käl-äššäreḡa, ətwəkkəsnet isəlsa dāḡ-Buləs d-Sillas, ättäwätnet.

23 Əknän-tän asəsnan təzzar, jārän-tän-in dāḡ-takärmüt dāḡ-a-s ənnan i-əssärdusa ad-hasän-əknən iji n-ənniyät.

24 Ätwännä a-wen i-emännähäḡ n-takärmüt ḡas, ija dāḡ-sän tišəm, ij'-en dāḡ-səllul.

25 Ebre n-ammäs n-ehäḡ, irmäs Buləs d-Sillas äsahäḡ n-təmmal i-Mässinäḡ, äsijädän-asän käl-takärmüt wi iyyäḡnen.

26 A əndärrän-dāḡ äškäḡkäd-dd äkall daw-sän s-äššahät här äsnähäynähäy issas n-takärmüt, ämerän isäḡfal n-takärmüt iket-dāḡ-näsän ässaḡät-wen-dāḡ, ämeränät daḡ tišəm-näsän.

27 Inkär-dd emännähäḡ n-takärmüt dāḡ-eḡəs, inhäy tishar n-takärmüt ämeränät ḡas, ilbäy-dd takoba-net i-ad-sär-s idəj iman-net ed, äḡel käl-takärmüt wi iḡläf, əjmädän.

28 Mäšan, äsḡärät-as Buləs s-afälla, inn'-as: «Ahaa! Wär jed a-di, nəll'-e diha iket-nänäḡ.»

29 Irmäs-dd emännähäḡ n-takärmüt emämmäl n-efew s-inhäy data-s, ošäl-dd, irkäḡ dat-Buləs d-Sillas äšikäḡkäd,

³⁰ ikkäs-tän-dd dāx-ammās n-takārmūt tēzzar, inn'-asān: «Meddōn, ma s-leḡ s-ad-t-ājǰāḡ i-ad-āḡlōsāḡ?»

³¹ Ğnnān-as: «Amōn kāyy d-ejādāš-nāk s-Emāli Ḡisa, ad-tāḡlōsām.»

³² Āxtābān-as mājrād n-Emāli ǝnta d-kāl-ehān-net ālwāqq-wen-dāḡ.

³³ Ilwāy-tān dāḡ-tākkāwālt n-ehād-en-dāḡ s-ehān-net, issēfār ibuyēsān-nāsān, ātwāsālmaḡ dāḡ-aman ḡarāt-a-wen ǝnta hakd kāl-ehān-net iket-nāsān.

³⁴ Āsmājarāt-tān dāḡ-a-s ikna tedāwit ǝnta d-kāl-ehān-net n-a-wa somānān iket-nāsān s-Māssināḡ.

³⁵ Āffāw ḡas, āšmašālān-dd kāl-āššāreḡa meddōn s-emānnāhād n-takārmūt i-ad-hin-isəwwəy Buləs d-Sillas.

³⁶ Ija dāḡ-sān emānnāhād isālan n-a-wa ǝnnān kāl-āššāreḡa māšan,

³⁷ inn'-as Buləs: «Fāw, šāmad jān dāḡ-nāḡ tiwit dat-tamōtte, a-s ija a-wen, wār nātwašrāḡ, nākkāneḡ-i āḡḡinnen fāll-Roma, jāran-anāḡ-in dāḡ-takārmūt s-ǝmmək-wa-dāḡ, āmāra ārhan ad-hin-nətwəyy dāḡ-ufār, wār nārḡa s-a-wen, asənet-dd ǝntāneḡ iman-nāsān, səwwəyyən-anāḡ-in.»

³⁸ Īqqālān meddōn-wi dd-āmešālneḡ, āssoḡālān isālan n-a-wa inna Buləs i-imānnāhādān. Īslān i-isālan n-a-s Buləs d-Sillas āḡḡinān fāll-Roma ḡas, ārmāḡān.

³⁹ Osān-tān-dd ḡarāt-a-wen ǝntāneḡ iman-nāsān, ǝttārān tenāšše dāḡ-Buləs d-Sillas, ǝkkēsān-tān-dd dāḡ-takārmūt dāḡ-a-s dāḡ-sān ǝttārān ad-ǝfələn aḡrəm-nāsān.

⁴⁰ Īzjārān-dd takārmūt ḡas, ǝkkān ehān wa n-Lidya, ad-samātarān dihen ayətma-sān dāḡ-āḡḡin d-alkum i-Māssināḡ tēzzar, ǝḡlān.

17

Buləs d-Sillas dāḡ-aḡrəm wa n-Tāslonika

¹ Ījlāyān Ānfibbolis d-Abuləbbis, osān-dd Tāslonika ḡas, ijǰāš Buləs ehān n-āḡḡin wa n-kāl-Ālyāhud

² ed a-wen-dāḡ a-s izzay ad-t-āj. Ija dihen kāraḡ ǝssəbətān itidwənnit d-kāl-Ālyāhud dāḡ-isālan n-a-wa ǝnnān ǝlkəttabān n-Māssināḡ.

³ Itafāssar-asān-tān, isatbat-asān a-s iktab dāḡ-sān a-s Ālmaseḡ, ilzam-t ad-inhəy tersəmmawen, āmmāt tēzzar, inkār-dd jer-inəmmuttan. Ijann'-asān dāḡ a-s Ḡisa-wa hasān-ixatḡāb a-s Ālmaseḡ.

⁴ Īkkāsān iyyād dāḡ-sān āššāk dāḡ-a-wa hasān-ijanna, ǝlkāmān-asān dāḡ kāl-Ālyunan† āḡjootnen āḡḡinnen d-tiḡeḡen āḡjootnen lanen isəm dāḡ-aḡrəm.

⁵ Māšan, osāmān fālla-sān kāl-Ālyāhud, ǝḡlān, āsdāwān-dd hārāt dāḡ-erk āḡḡināt, āsmādārwayān aḡrəm tēzzar, ǝkkān ehān wa n-Yazun, ǝmmaḡān i-Buləs d-Sillas i-ad-tān-səbdədān dat-tamōtte, tēšrāḡ-tān.

⁶ Wār tān-in-ogeḡān dihen ḡas, oḡān fāll-Yazun iman-net, āšrāwrāwān-t ǝnta d-imumənān iyyād, ǝssəbdādān-tān dat-imānnāhādān n-aḡrəm, ad-tān-sawarān kāl-Ālyāhud uḡlem, jannen: «Āḡḡināt-wi-dāḡ, ākall iket-net a āsnāxānbālān siha d-siha tēzzar, ǝwwāḡān-anāḡ-dd āmāra,

⁷ ǝntāneḡ-da-dāḡ āsmājarāt Yazun, ad-tajǰān hārātān ǝšlaynen i-a-wa innā āmānokāl wa māqqārān ed, jannen ill'-e āmānokāl sāl Qāyḡār s-isəm-net Ḡisa.»

⁸ Wār-ǝjreḡān isālan-wi-dāḡ i-tamōtte wāla i-imānnāhādān n-aḡrəm,

† 17:4 17:4 Itawann'-asān: Ḡeriktān. (Les Grecs dāḡ-Təfrānsit). Īzḡāḡān Erobbā dāḡ-ākall wa itawānna: Ḡeris (La Grèce dāḡ-Təfrānsit). Tawalt-nāsān: Tālyunanit.

⁹ äytäsän i-Yazun d-imumənän wi iyyäḏnen äddäyyät s-lan s-ad-t-əzələn i-əlxəkum təzzar, ətwəyyən-in.

Buləs d-Sillas dəx-ayrəm wa n-Biri

¹⁰ Ənhäyän imumənän tukəse n-talya-ta-dəx ɣas, əssəjmädän Buləs d-Sillas ehäd-wen-dəx, əssokän-tän ayrəm wa n-Biri. Əwwäḏän-in dihen ɣas, əkkän ehän n-əddin wa n-käl-Älyähud.

¹¹ Əssəknän-tän käl-ayrəm wa n-Biri tärha tojarät ta n-käl-Täslonika, ed əntäneḏ, əslän i-mäjräd n-Mässinäx ɣas, omänän sār-s šik, ad-ɣarrän hak ašäl əlkəttabän, tassänän a-wa hasän-itawännən tidət meɣ.

¹² Omänän dəx-sän əddinät əjjootnen hanät tiḏeḏen əjjootnen n-Tälyunaniten lanen isəm d-meddən dəx əjjootnen.

¹³ Əslän käl-Älyähud wi n-Täslonika a-s itajj Buləs isälan n-mäjräd n-Mässinäx dəx-Biri ɣas, əlkämän-as-dd, ad-tattärän dəx asənkär n-tamətte fälla-s ənta d-imidiwän-net;

¹⁴ əssəglän imumənän Buləs ɗarät-a-wen dəx-armuḏ, əssəjmädän-t ayrəm s-ašrut wa n-əjärew məšan, əqquimä-dd ɣur-sän Sillas d-Timoti.

¹⁵ Äddewän meddən wi hin-əssofäḏnen Buləs har hin-əwwäḏän ayrəm wa n-Atinya təzzar, ənnäḏän-dd, əssawäy-tän Buləs əmašal i-ad-has-dd-ilkəm Sillas d-Timoti dəx-armuḏ.

Buləs, dəx-ayrəm wa n-Atinya

¹⁶ Isimäqqul-asän Buləs dəx-Atinya dihen-dəx a-s inxäs a-wa ihannäy iman-net fäl əjut-i-dəx jän əššanämän dəx-ayrəm-en-dəx.

¹⁷ Iglä, ädwännät d-käl-Älyähud dəx-ehän n-əddin-näsän, ad-itidwənnit dəx hak ašäl d-inaxbadän n-Mässinäx wi hənən eɣärɣär wa n-tamɣənnant s-itawänna Larofaž.

¹⁸ Ädwännən ɗär-s dihen käl-fälšafa wi s-itawänna käl-Ibbikur d-iyyəḏ s-itawänna käl-Stoyis. Jannen dəx-sän iyyäḏ: «Ak i n-iləs šəjren-wa, ma ijanna?» Jannen wi iyyäḏnen: «A-wa məssaw-näx iyyäḏ fäll-wär nəssen əzzaɣnen išənnawän a-s hanäx-ixattäb isälan-näsän.» Jannen a-wen fäl-a-s ij'-asän Buləs isälan n-älxer n-Ÿisa d-isälan n-tanäkra jer-inəmmuttan.

¹⁹ Ärmäsän Buləs ɗarät-a-wen, əlwäyän-t s-Larofaž, ənnän-as. «Säsəl-anäx ya ämära isälan n-teɣäre ta täynayät ɗär-hanäx-dd-tosed

²⁰ fäl-a-s käyy, tikunen ti s-hanäx-säsled, wär kälä hasnät-nəsla dəx-äddunya, fässär-anäx älmäɣna-näsnät.»

²¹ Äzzäman-en, käl-Atinya hakd-dəx iməjarän-näsän, wär t-illa ere s-wädden issan a-s wär-oren timəzzujen ar dəx-umax n-isälan d-iji-näsän.

²² Ibdäd-dd Buləs dəx-ämmas n-Larofaž, eɣärɣär wa n-tamɣənnant, innä: «Ya käl-Atinya, dəx-a-wa hannäyax, ijmaḏ-t äššäk a-s təjlayäm hullan dəx-əddin wa häm,

²³ əssäɣläyax-dd dəx-ayrəm-näwän, əkney azəjjəzz n-idəggan n-älɣibadät-näwän, əgley fäw har oḏey fäll-edəgg n-tikutawen-näwän fäll-iktäb:

<I-Ämakraš wa wär nəzzey>.

Əlmədät ašäl-i, a-s Wa ɣabbädäm wär t-təzzeyäm a-wa hawän-ija älzähälät, ənta a-s hawän-tajjäh isälan-net.

²⁴ Mässinäx-i dd-ixläkän äddunya d-a-wa tät-ihän iket-net, ənta-i n-Emäli n-išənnawän d-äkall, wär-itəzzäx ehän dayän ifassän-n-əgg-adəm,

²⁵ wär-ämɣatär s-tadhəlt n-ifassän n-əgg-adəm wälä s-härät wäl' iyyän ed, ənta a ihakkän e d t-illäm əgg-adəm tämudre, ənta dəx a ihakkän unfas d-tämudre i-härät iket-net.

26 Ænta a dd-ixlākän ähaləs-wa dd-äshäyāwän e d t-illām ägg-adəm iwarän ärori n-äkall, ðnta a ixtäsän täkost n-ikallän wi tazzäxän, ðnta daḡ a hanäḡ-dd ijän äzzāmanän.

27 A-wen, ij'-e Mässinäḡ i-ad-has-əmmäḡän äddinät kud-däḡ s-ekälelaf i-ad-t-əjrəwän ed, ijmaḡ-t äššäk a-s Mässinäḡ, wär hanäḡ-iha i ujoj.

28 Ænta a hanäḡ-ikfän tämudre d-emäremar d-tumast. Mäjräd-wen-däḡ, täsdättät täsawit-nāwän ta tønnät:

<Noläh där-s ed nāmoos aratän-net.>

29 Ḡas, šamad nāmoos aratän-net, adiš töläš fälla-näḡ torda n-a-s Mässinäḡ äñifäqqa d-a ämoosän oräḡ meḡ azrəf meḡ tähunt meḡ ättäšwer dd-izjarän tähore wäla tayətte n-ägg-adəm.

30 Ælmədät a-s Mässinäḡ, iwətyan-wi ässakäyän äddinät däḡ-älžähälät, wär tän-ixseb fäll-errawän-näsän, a-wen-däḡ a fäl ämära, omar i-e d t-illām ägg-adəm däḡ-e d-t-illām edägg s-ad-utab

31 fäl-a-s ässiibdäd ašäl däḡ-mad-išräḡ äddunya-ta-däḡ s-ähaləs-wa äsnäfrän tat-madän-išräḡ s-iqqud. A-wen, issətbät-t Mässinäḡ i-tamətte iket-net s-əmmək wa s-dd-issənkär Ḡisa jer-inəmmuttan.»

32 Təslä tamətte i-isälan n-tanäkra jer-inəmmuttan ḡas, jän-t iyyäd tekäškäšt, ənnän-as iyyäd: «Ægləw, täqqələd-anäḡ-dd ašäl iyyän säl wa i-ad-naləs asjed i-isälan-wi-däḡ.»

33 Ifäl Buləs jere-sän älwäqq-wen-däḡ mäšan, əlkämän-as iyyäd omännen s-a-wa innä.

34 Äddinät-en, ih'-en Denis wa ijän ənniyät i-Larofaž d-taməḡt tiyyät s-isəm-net Dämaris d-iyyäd daḡ säl-win-däḡ.

18

Akilas d-Briska

1 Ifäl Buləs Atinya ḡarät-a-wen, ikkä ayrəm wa n-Kurənta.

2 Ämmoqqäs dihen d-ägg-Älyähud n-äkall wa n-Fon s-isəm-net Akilas. Iket-dd ifäl İtali ðnta d-hänne-s s-isəm-net Briska fäl-a-s äzziizjär-dd ämänokal n-äkall Kələd alämär däḡ-iktab a-s, əzjänet käl-Älyähud iket-näsän Roma.

3 Ämedäw Buləs d-Akilas ed oharän älxidmät wa n-iji n-ihəktan.

Buləs d-Sillas, däḡ-ayrəm wa n-Kurənta

4 Hak əssəbət-i n-təsonfat, isatbat Buləs isälan i-äddinät däḡ-ehän n-äddin i-käl-Älyähud hakd-däḡ käl-Älyunan.†

5 Iwwäḡ-dd Sillas d-Timoti Buləs, falän-dd Masidunya ḡas, oyyä iji n-ihəktan, ikfä iman-net axətab n-mäjräd n-Mässinäḡ, itajäyha i-käl-Älyähud a-s Ḡisa a-s Älmasex.

6 Äšmäšäkken a-wa hasän-ijanna, ad-sikuforän. Ibbəkbäk Buləs isəlsanet, inn'-asän: «Æḡmanän däḡ-wän iman-nāwän, äbas däḡ-i əḡmanän, ämära, inəzzulam a-s e-ənnädäḡ, äjäḡ-asän isälan.»

7 Ifäl Buləs dihen, ikk' ehän n-ähaləs s-isəm-net Titus Istus, änaḡbad n-Mässinäḡ s-änimältaḡ ehän-net d-wa n-äddin.

8 Däḡ-a-wen-däḡ, ad-omän Krisbus wa n-älfäqqi n-ehän n-äddin s-Emäli ðnta hakd d-əjadäš-net d-käl-Kurənta äjjootnen äsijädnen i-Buləs; omänän, ad-titwəsəlmiḡän däḡ-aman.

9 Ehäd iyyän, äñfaläl-dd Emäli i-Buləs, inn'-as: «Buləs, wär käy-isärmaḡet härät, mäjräd, wär tässosämäd,

† 18:4 18:4 Itawann'-asän: Gərıktän. (Les Grecs däḡ-Təfränsit). Ezzaxän Erobbä däḡ-äkall wa itawänna: Gəris (La Grèce däḡ-Təfränsit). Tawalt-näsän: Tälyunanit.

¹⁰ əlley-t edes-hak, ədhaläx-käy, wär t-illa ere hak madän-iyšəd härät fäl-a-s ley tamətte täjjeet s-ärheey ad-tät-äxlösäx dāx-aḡrəm-wa-dāx.»

¹¹ Izzāx Buləs dihen har ija awātay d-sāḡdis orän, isayra äddinät mäjräd n-Mässināx.

¹² Äzzāman wa d-āmoos Galyon gəfar n-Akaya, änmännakän käl-Älyähud fäll-Buləs, äḡrän-t s-älqallitän i-ad-t-əšräḡän.

¹³ Äswärän-t udlem dat-gəfär, ənnän-as: «Ähaləs-i, isayra äddinät älyibadät n-Mässināx s-älḡadät änimäšrayän i-a-wa innä alämär.»

¹⁴ Ittär Buləs ad-arr emm-net i-ad-ämmäjräd ḡas, innä Galyon i-käl-Älyähud: «Ənnär anməšri i-äššäreḡa meḡ erk ämašal a fäl hi-dd-tökkäm i-ad-hawän-aräḡ äššäreḡa-net, äjāx-awän-t

¹⁵ mäšan, šamad a-wa tamädašt jat fall-tijəttewen n-teḡäre-nāwän d-ismawän wi əktābnen dāx-alämär-nāwän, wär-ärheey ad-umasäḡ älcqallināwän dāx-isälan-win-dāḡ, əšräḡät-tän käwāneḡ iman-nāwän.»

¹⁶ Äsfäl-tän Galyon ehän wa n-äššäreḡa ḡarät-a-wen.

¹⁷ Təzzän tamətte iket-net s-Sustin wa n-älḡäqqi n-ehän n-äddin, ad-təggatän dat-älqallitän mäšan, wär t-illa a hasän-inna Galyon wa n-gəfär.

¹⁸ Ähoja Buləs dāx-Kurənta təzzar, ässälläm fäll-imumənän, əkfän-t turäft n-aman ijjäš s-äkall wa n-Surya, igla, äddew d-Briska d-Akilas. Əwwäḡän-in aḡrəm wa n-Sänkərya ḡas, ästäbälbäl Buləs i-ad-umas a-wen a ässitbätän ärkāwäl wa ijjäš.

¹⁹ Osän-dd aḡrəm wa n-Ifäsus ḡas, ibḡa dār-sän Buləs, ijjäš ehän n-äddin, ad-itidwənnit d-käl-Älyähud.

²⁰ Əttārän dāx-s ad-ḡur-sän ähaj

²¹ mäšan, wär hasän-irḡa s-a-wen ed, inn'-asän: «Kunta otäs Mässināx a-wen, ilkam ad-kāwän-dd-äqqələḡ.» Ifäl-tän, ijjäš turäft n-aman,

²² äzzubbät dāx-Qäyşara ḡarät-a-wen. Ijjäš aḡrəm, ässälläm fäll-älkänisät təzzar, okäy s-Intyuš.

²³ Ija härät n-išilan dihen ḡas, ijläy s-teje ta n-Gälasya d-ta n-Frižya. Edägg immär-dāḡ, ad-dāḡ-s isəmmətär inəḡḡulab i-ad-isəşşuhət immun-näsän.

Isälan n-Äbbäloš

²⁴ A-s itäj a-wen-dāḡ, aḡrəm wa n-Ifäsus, ih'-e ähaləs n-ägg-Älyähud il' aḡrəm wa n-Iskändərya s-isəm-net Äbbäloš. Älyalim iknan musnät n-mäjräd a ämoos, ikna dāḡ teḡäre n-a-wa ənnän əlkəttabän.

²⁵ Han-t isälan n-tabarät n-Əmäli, ijlay hullan dāḡ-a-wa iha, itamäjräd, isayra s-älmäḡna oḡadän isälan n-ḡisa dāḡ-a-s wär t-təha tijya ar ta n-asəlmaḡ dāḡ-aman wa n-Exya.

²⁶ Təsl'-as Briska d-Akilas a-s ixtāb s-tihusay dāḡ-ehän n-äddin wa n-Ifäsus ḡas, äḡrän-t-dd s-iman-näsän, ad-t-sasaḡadän, tafässarän-as tabarät n-Mässināx.

²⁷ Äsdärhän Äbbäloš ḡarät-a-wen tikawt n-äkall wa n-Akaya, ədhälän-t imumənän dāḡ-derhan-net wen-dāḡ, əkfän-t təkərḡe i-inəḡḡulab wi n-äkall-en i-ad-t-səbbärrəkän afäl tän-in-iwwäḡ. Iwwäḡ-in ḡas, ämoos tadhəlt mäqqoorät i-äddinät-wi omännen s-ännuḡmät n-Mässināx.

²⁸ Isibəggut s-tayətte käl-Älyähud dat-tamətte, isasäjräh-tän a-s ḡisa a-s Älmasex.

¹ Äzzäman-wen-däx d-iha Äbbäloš Kurənta, ad-ijläy Buləs ejärew s-afälla n-äkall, ikka Ifäsus. Ijräw dihen härät däx-inəttulab,

² inn'-asän: «Ak käwäneḏ, a-s tomänäm, təjräwäm Unfas Šäddijän?»
 Ənnän-as: «Wär käla nəslä fäw a-s t-illa a-s itawänna Unfas Šäddijän.»

³ Inn'-asän: «Adiš ma ämoos asəlmaḡ wa hawän-ätwäjjan?» Ənnan-as: «Asəlmaḡ wa n-Exya.»

⁴ Inn'-asän Buləs: «Exya, issəlmäḡ tamətte däx-aman i-ad-umas a-wen ašämol n-tätubt-näsän mäšan, illäḡät i-äddinät a-s ilkam iyyän wär-ämoos, a-wen a t-ämoosän Ḳisa, ənta-en-däx a-s lan äddinät ad-sär-s amənän.»

⁵ Əslän meddən-en i-mäjräd-wen-däx ḡas, əttärän ad-ətwəsəlmäḡän däx-aman s-isəm n-Emäli Ḳisa.

⁶ Äswär-tän Buləs ḡarät-a-wen ifassän-net, äzzubbät-dd Unfas Šäddijän fälla-sän, ad-tamäjrädän tawalen äynaynen, tamajradän däx-isälan n-Mässinäḡ.

⁷ Meddən-en, märaw-essän d-əssin.

⁸ Itakk Buləs ehän n-äddin wa n-käl-Älyähud, ixatṭäb däx-s tidət s-äššahät har ässakäy dihen käraḡ orän, itidwənnit d-äddinät, isatbat-asän isälan wi n-Təmmənəya n-Mässinäḡ.

⁹ Mäšan, äsyärän iyyäḡ däx-sän ulhawän-näsän, unjäyän omänän s-a-wa ijanna, əḡlän fäw har jannen a läbasän fäll-tabarät-ta-däx s-itäjj Buləs isälan-net dat-tamətte. Ikkäs-dd Buləs iman-net däx-sän, ad-isaxra hak ašäl inəttulab däx-läkkol n-äddin ora ähaləs s-isəm-net Tiranus.

¹⁰ İsl'e a-wen-däx dihen har əssin iwətyan, əmmək-wen-däx a-s əslän käl-Azya iket-näsän i-mäjräd n-Emäli jer-wi n-käl-Älyähud-näsän hakd-däx wi n-käl-Älyunan.†

¹¹ Itajj Mässinäḡ s-ifassän n-Buləs tikunen äjjootnen, äqqannen eyäf,

¹² tišələn-dd äddinät sär-s, tazäwen imälsan d-ikärsšäyän t-ḡasnen, sänsen-tän fäll-imarhinän, tazäyän, zajjärän ḡax alšinän iməlšan.

¹³ Əḡḡädän-dd imässäxärän n-käl-Älyähud takkänen jer-ikallän, ad-ḡarrän əntäneḡ-däx fäll-iməlšan isəm n-Emäli Ḳisa-wa ixatṭäb Buləs.

¹⁴ Meddən-wi işla a-wen-däx, əssa-essän, abba-näsän u-tikutawen s-isəm-net Žibba.

¹⁵ E-d əttärän teḡäre n-isəm n-Ḳisa fäll-iməlšan, ad-hasän-änn alšin: «Näkk ya əzzaḡäḡ Ḳisa, əssanäḡ ḡax a-wa ämoos Buləs-i t-ixatṭäbän mäšan käwäneḡ, mi tämoosäm?»

¹⁶ Oḡa fälla-sän amälšon iyyän, iknäs-tän ed irn'-en äššahät, ikn'-en asəlmaḡ hundäḡ har a-s əzjärän ehän-en-däx, əzzafän, šarän.

¹⁷ Əslän käl-Älyähud hakd käl-Älyunan-wi hänen Ifäsus i-isälan-en-däx ḡas, ärmäḡän ad-samḡarän isəm n-Emäli Ḳisa.

¹⁸ A dd-tisən äddinät äjjootnen omannen s-Mässinäḡ, safäkkarän-dd terk tišašalen-näsän.

¹⁹ Äwwäyän-dd imässäxärän äjjootnen əlkəttabän-näsän, ad-tän-sarḡen dat-tamətte iket-net, äḡkädän älqim n-a-wen-däx irḡän, osän-t, iwwäḡ səmmosät timərwen n-efäḡ n-ärriyal n-azrəf.

²⁰ Əmmək-wen-däx a-s təntäm tärna n-Mässinäḡ d-äššahät n-mäjräd n-Emäli däx-ulhawän n-äddinät, ad-nattäjän ḡax isälan-net.

† 19:10 19:10 Itawann'-asän: Gəriktän. (Les Grecs däx-Təfränsit). Əzzaḡän Erobbä däx-äkall wa itawänna: Gəris (La Grèce däx-Təfränsit). Tawalt-näsän: Tälyunanit.

21 Ijjäš-dd darät-a-wen ənniyät n-Buləs tärha n-ad-ijlöy Masidunya d-Akaya, äkk Yärussälam, ijanna dāḡ-iman-net a-s afäl-hin-iwwäḡ dihen, ad-ittär əmmək s-ikka Roma.

22 Äşmaşäl Timoti d-Errast wi n-imadhalän-net s-Masidunya, ija ənta äzzäman dāḡ-Azya.

Azwi n-iji n-isälan dāḡ-Ifäsus

23 Äzzäman-en-dāḡ ad-təja tamdərwayt mäqqoorät fäl төссөба n-tabarät n-Emäli-ta isayra Buləs.

24 Iggäd-dd enhäd iyyän s-isəm-net Dimitrus, ikanna ättäşwerän n-azrəf fäll-äşsiwwär idəm n-temälit tiyyät s-isəm-net Artamis, ämoos a-wen a ih' älfäyda mäqqoorän i-inhäḡän ed, itiirəw-dd sār-sän ehäre n-tikunen.

25 Äsdäw-dd inhäḡän-wi dār-ohär älxidmät, inn'-asän: «Meddən, nəhläk, төссанәм a-s älxidmät-nänäḡ, a-s terše-nänäḡ, wädden hannäyäm, salläm daḡ dāḡ-Ifäsus hakd-dāḡ dāḡ-Azya iket-net a-s Buləs-wa-hi,

26 äsmättäy tamətte täjjeet ed edägg osa-dāḡ, ad-dāḡ-s änn a-s: <Imakraşän wi nəkann s-ifassän-nänäḡ, mälayäḡna ḡas.>

27 Ämoos-anäy a-wa t-işlän säbxas, ämoos-t daḡ i-ehän n-ämudd wa n-Artamis fäl-a-s işwar äba s-tät-ässimḡarän äddinät wi tät-ḡabbädnen dāḡ-Ifäsus d-ikallän n-äddunya wi iyyäḡnen.»

28 İşlän i-a-wen ḡas, ijjäş-tän adkär, ad-saḡären dāḡ-işənnawän, jannen: «Artamis ta n-käl-Ifäsus, ənta a-s mässa-näḡ ta tojarät dāḡ-işənnawän d-äkall.»

29 Ämdärwäy aḡrəm iket-net, ad-dd-tidaw tamətte s-ehän wa n-äddäl d-izəjraz. Təzzän tamətte s-Gayəs d-Aristarəḡ wi n-Masidunya n-imidiwän n-Buləs dār-ohär asikəl, əlwäyän-tän.

30 İttär Buləs ənta-dāḡ ad-äkk ehän wa n-äddäl d-izəjraz mäşan, əgdalän-as inəḡtulab s-a-wen,

31 äsmätärän-t daḡ imizärän n-Azya n-imidiwän-net t-əllanen dihen-dāḡ d-ad-wär-ikka ehän-en.

32 A-s itäj a-wen-dāḡ, täseḡarät tamətte dāḡ-işənnawän, ämidärwäy a-wen-dāḡ iket-net s-iḡaran, wär t-illa-i s-olähän iḡaran-net d-wi n-amidi-net, fäl-a-s төşşəm n-tamətte-ten-dāḡ, wär төssen wäla-dāḡ äddälil n-tamdərwayt-ta-dāḡ təjät.

33 Əmhälän-dd käl-Älyähud ähaləs s-isəm-net Älxader i-ad-iməl dat-tamətte, jän-as isälan n-a-wa ijän, ästafäy-asän i-ad-hasän-ämmäjräd

34 mäşan, төlmäd tamətte a-s i n-käl-Älyähud ḡas, ad-saḡären, jannen: «Artamis ta n-käl-Ifäsus, ənta a-s mässa-näḡ ta tojarät dāḡ-işənnawän d-äkall.» Täseḡäyya tamətte s-əmmək-wen-dāḡ hundäḡ har okäyän əssin ässaḡätän.

35 Iggäd-dd älmer n-aḡrəm wa n-Ifäsus, ad-isasmaḡ tamətte, ijann'-as: «Ya käl-Ifäsus, mi wärän issen dāḡ-äddunya a-s näkkäneḡ-i-dāḡ n-Ifäsus a iḡlafän ehän wa-dāḡ titwäḡbid Artamis ta tojarät, ənta d-tele-net ta täşsiwwarät dāḡ-tähunt ta dd-tätträkket dāḡ-işənnawän?»

36 ḡas, şamad a-wen, wär t-ih' äşşäk, adiş, sänsät ənniyät-nawän, wär täjjät a işlayän,

37 meddən-wi dd-täwwäyäm, wär-äskafärän, wär-ənnen daḡ a läbasän fäll-mässa-näḡ,

38 kunta äḡşadän a läbasän i-Dimitrus d-imidiwän-net, adiş, əqqəlnet i-işilan wi dāḡ-itaxätäs äşşäreḡa ed, əllan-t älqallitän i-a-wen, əşkəwnet sār-sän;

³⁹ kunta daḡ täsiwäram-tän udlem säl wen-däḡ, ad-itwäxtəs äššäreḡa-net däḡ-älžämaḡät wa ilän s-a-wen.

⁴⁰ Afäl wär nөлkem i-äddäbara-wen-däḡ, ad-hanäḡ-isewär өlxөkum udlem ed ažөmmäḡ-nänäḡ ämära-däḡ, wär-ila äddälil.»

⁴¹ Innä älmer a-wen ḡas, innä i-tamөtte, ad-tämmähäš.

20

Asikөл n-Bulөs s-Masidunya d-Älyuna

¹ Tokäy tamdөрwayt, sämmiḡ tanfust ḡas, issäḡrä-dd Bulөs inөтtulab, ad-tän-isamätar, isasmaḡ ulhawän-näsän, issөlläm fälla-sän ḡarät-a-wen, ikkä teje ta n-Masidunya.

² Issäḡläy-dd däḡ-s iket-net, isamätar imumөнän. Ifäl dihen, ikk' äkall wa n-Älyuna,†

³ ässakäy dihen, käraḡ orän; älwäqq wa d-itөffal äkall-en, äkk wa n-Surya, өjjäšan-t isälan n-taḡdärt ta s-ärhän käl-Älyähud ad-has-tät-өjөн ḡas, oläs uḡөл n-teje ta n-Masidunya,

⁴ äddeew d-Subatir ägg Birus wa n-aḡrөm wa n-Biri, d-Aristaräq d-Skändus wa n-Täslonika d-Gayөs wa n-Darba d-Timoti, d-Tušik d-Tirfim wa n-teje ta n-Azya.

⁵ Äzzarän-as meddөн-win-däḡ, өqqälän-asän däḡ-aḡrөm wa n-Tärwas,

⁶ okäy-anäḡ ämudd wa däḡ-tattän äddinät tijөлwen ti wär ha täzza ḡas, nөjjäš turäft n-aman däḡ-aḡrөm wa n-Fөлibb, nässakäy səmmөs isilan fäll-өjärew төzzar, näwwäḡ-tän-in däḡ-Tärwas-i-däḡ nässakäy өssөböḡ imdan.

⁷ Ij'-anäḡ ašäl wa n-älxad-i n-ašäl wa äzzarän däḡ-өssөböḡ dihen ḡas, näžziimäḡ iket-nänäḡ, nөtatt amөnsi wa n-tasäktot šäddijän. Issan Bulөs, a-s ašäl wa ilkämän i-wen, iglä. Däḡ-tөssөba n-a-wen-däḡ a fäl ässakäy ehäḡ-wen-däḡ, ädiwännät d-imadhalän-net d-äddinät.

⁸ Näžziimmäḡ iket-nänäḡ fäll-afälla n-ehän n-soro äsimäläwläwnät tiftөл äjjootnen,

⁹ ädiwännät Bulөs i-älžämaḡät dihen-däḡ, a-s ija a-wen-däḡ, äsihätäl ämawaḡ s-isөm-net Itikus fäll-fөnetär ämerän. Ämmiiräd Bulөs ehäḡ-en-däḡ a-s hin-ilyäd eḡөs Itikus, äträkkät-dd fäll-afälla n-soro wa s-käraḡ. A-s sär-s dd-äzzubben imumөнän, өjmaḡän-t iman.

¹⁰ Äzzubbät-dd sär-s Bulөs өnta-däḡ, ibdäd jөnnөj-s, irmäs-t-dd s-äfuss төzzar, innä i-äddinät: «Änset өnniyät-näwän, iddar.»

¹¹ Iqqäl ḡarät-a-wen afälla n-ehän, äzun amөnsi wa n-tasäktot šäddijän, oläs-asän edäwänne har tänfäraräw tifawt.

¹² Iqqäl ämawaḡ өnta ehän-net, iddar-iyłas. Ämoos a-wen өssөbab n-tedäwit ässismäḡän ulhawän n-tamөtte iket-net.

Ifäl Bulөs Tärwas, ikkä Milati

¹³ Näzzar näkkäneḡ i-Bulөs, nөjjäš turäft n-aman, nөkka Asus-i där-s nohär ed, äsof өnta ad-äj asikөл-en fäll-iḡarän-net.

¹⁴ Iwwäḡ-anäḡ-dd däḡ-Asus ḡas, nämohär där-s asikөл har näsjän däḡ-Mittilän,

¹⁵ nokäy ašäl wa iyyäḡän s-Šayo, төzzar, nokäy s-Samos d-Milati.

¹⁶ Äsof Bulөs ad-wär-immer aḡrөm wa n-Ifäsus i-ad-wär t-äwwөḡän däḡ-s äddinät wi n-teje ta n-Azya ed, äroräd Yärussälam i-ad-däḡ-s isөssikөy ämudd wa n-Fantäkawt.

† 20:2 20:2 Gəris (Grèce) däḡ-Təfränsit.

Isəmməterän wi ija Buləs i-inušämän n-älkänisät ta n-İfäsus

17 Älwäqq wa d-näsjan däx-Milati, ässoka Buləs inušämän n-älkänisät ta n-İfäsus.

18 Osän-t-dd xas, inn'-asän: «Təssanäm käwäneḏ iman-näwän tämudre ta eṭṭäfäx xur-wän däx-a-wa əkkäsäx əlley jere-wän ašäl wa d-käwän-dd-osex däx-teje ta n-Azya,

19 təssanäm əmmək wa s-äsräsäx iman-in data-wän däx-älxidmät wa heḡ i-Emäli. A-wen, jeḡ-t s-imeṭṭawän d-ahänay n-talxiwen sāmumnen sār-i dd-orawän käl-Älyähud.

20 Təssanäm daḡ a-s wär t-illa a hawän-əffaräx, äxtäbäx-awän, əssäxräx-käwän däx-ihänan-näwän hakd tifärrawen a-wa hawän-iha älfäyda iket-net,

21 wär kälä hi-okäy ašäl d-wär-äsmätäräx käl-Älyähud hakd inəzzulam† d-ad-utabän i-Mässinäx, əjən immun-näsän däx-Emäli Ƴisa.

22 Ämära näkk da-hi, izzəlzäm Unfas Šaddijän tikawt n-Yäruşsalam, wär-əssenäx a hi-iqqälän däx-s

23 mäšan, ikkas-ahi Unfas Šaddijän däx-tayḏärt n-a-s tayrəmt osex-däx, äjəḡet fäll-ujəš n-tišəm d-ahänay n-aḡäna.

24 Diha t-əlleḡ, wär-əjeḡ tämudre-nin härät, wär fälla-s ärmeḡäx ed, wär hənneyäx a säl ittus wa s-ošäläx i-ad-hin-səssiweḏäx amäšal wa hi-issäxläf Emäli Ƴisa, äxtəbäx isälan n-Älənžil-i hän isälan n-ännuḡmät n-Mässinäx.

25 Ämära, käwäneḏ-i jer-äxtäbäx isälan n-Təmmənəya n-Mässinäx, əssanäx a-s äbas ilkam ad-tənhayäm idəm-in,

26 əkkasäx-käwän däx-tayḏärt iket-däx-näwän, äbas däx-i əḏmanän iman-näwän ed, a-wa ämoosän älmäḡna n-əlxəllas n-Mässinäx wa hawän-irha,

27 əssäxräx-käwän tayətte-net iket-net, wär däx-s-in-oyyey härät.

28 Ämära, äjät ənniyät i-iman-näwän, tagəzäm daḡ älzəmaḡät n-imumənän wa käwän-issäxläf Unfas Šaddijän, umasät šund imädanän äḡdalnen, agəzät älkänisät n-Mässinäx ta ikfä iman-net s-ašni-net wa inḡälän.

29 Əssanäx a-s afäl käwän-əfäläx, ad-jere-wän dd-əlmuməsnät tiḡəs wären-e-aḏən tāhanint i-tahrut ta n-imumənän.

30 Ad-käwän-dd-əzjārän meddən n-inəsbuha maden-əttär ere äslälän ḏara-sän,

31 a-wen-däx a fäl, äjät ənniyät, əktəwät-dd a-s kərəḏ iwətyan-wi əkkäsäx jere-wän, ehäḏ d-ašäl, samätaräx-käwän s-iyyän-iyyän, dehiyyän fäw, imeṭṭawän a-s jeḡ a-wen.

32 Ämära, ayətma, ässiḡläfäx-käwän i-Mässinäx d-ännuḡmät n-mäjräd-net, Mässinäx a ilan tärna n-ad-käwän-isədwəl däx-immun-näwän, isətbət tākasit ta itwär i-iməššeddəjan iket-däx-näsän.

33 A-s t-əlleḡ jere-wän, wär-äsdärhänäx azrəf wälä oräx wälä isəlsa n-wäl' iyyän däx-wän,

34 səjrähät ifassän-in, təssanäm käwäneḏ iman-näwän a-s ifassän-in a-s äxdämäx i-a-wa s-ämiḡatäräx, näkk d-meddən-wi där-i äddewnen,

35 əssəknäx-käwän hak ašäl a-s a-wen-däx a-s təlam s-ad-t-təjəm i-ad-tədhələm tiläqqiwen. Əktəwät-dd a-wa innä Emäli Ƴisa a-s innä:

† 20:21 20:21 – Ƴur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änəzzalim a ämoos. A-wen-däx a fäl tiwsaten ti iyyädnen iket-näsnät, ti n-inəzzulam. — Ašäl-i-däx, änəzzalim, äkafär (ere wärän issen s-Mässinäx).

«Ojār älher ihän isuf uhən ajäraw.» »

³⁶ Issəmdä Buləs d-timtär-tin-däx ɣas, ärkäxän iket-däx-näsän, ad-hasän-itəddal Mässinäx.

³⁷ Hallän iket-däx-näsän, tikrirəyän däx-s, tisəsän-t däx-idmarän-näsän,

³⁸ äsniinän iman-näsän fäll-a-wa s-hasän-innä, äbas ilkam ad-t-ənhayän. Ässofädän-t-in ɗarät-a-wen hundäx har ijjäš turäft n-aman təzzar, əqqälän.

21

Tikawt n-Buləs d-imidiwän-net i-Yäruşsalam

¹ Nəbda dār-sän ɣas, nəjjäš turäft n-aman, nārmäs tamdujt n-awtəl wa n-Kus, äffāw-anäx, nokäy s-Rudus təzzar, nəkkä Batara.

² Nəjrāw dihen turäft n-aman tiyyät təkkat teje ta n-Finisya, nəjjäš-tät,

³ nohäz-in awtəl wa n-Qəbrus, noyy'-e fäll-täşalje-nänäx, nokäy s-Surya, näzzubbät däx-aɣrəm wa n-Tir-i däx-la turäft s-ad-zəzzubbət ilalän wi tät-əhänen.

⁴ Nəjrāw härät däx-inəttulab, nāssakäy ɣur-sän əssa išilan. Nəll'-e ɣur-sän dihen-däx a-s tän-dd-imhāl Unfas Şaddijän s-Buləs, ad-t-salɣadän d-ad-wär-ikka Yäruşsalam.

⁵ Okäyän-anäx išilan-en-däx dihen ɣas, ässofädän-anäx-in imumənän-win-däx, meddən, tiðeden d-aratän har nəzjār aɣrəm, nārkäx däx-asälīm n-əjärew, ad-nətəddal Mässinäx.

⁶ Nəssəmdä tittar d-isənnäɣlaf dār-sän ɣas, nəjjäš turäft n-aman, əqqälän əntəneɗ ihānan-näsän.

⁷ Nəfāl näkkəneɗ Tir, nəkkä Bätlomis. Näsjan däx-s ɣas, nəkkä ayətmanäx däx-äddin wi t-əllänen dihen, nāssälläm fälla-sän təzzar, nāssakäy ašäl ɣur-sän.

⁸ Äffāw-anäx ɣas, nəkk' ehän wa n-Filəbb wa n-amällänžal,† izzay aɣrəm wa n-Qäyşara, ənta a-s iyyän däx-meddən wi n-əssa ənnəfrānnen däx-Yäruşsalam, näzzubbät ɣur-s.

⁹ İla əkkožät tilyaden wären əzzey meddən, jarrāwnät məjräd ɣur-Mässinäx i-ad-t-in-səssiwəɗnät äddinät.

¹⁰ Nāssakäy härät n-işilan dihen-däx a-s hanäx-dd-osa ännäbi dd-ifalän Älyähudəyät s-isəm-net Äggäbbas.

¹¹ Os'-anäx-dd ɣas, idkäl taməntəka n-Buləs, osäx sār-s ifassän-net d-iɗarän-net, inna: «Ənta da a-wa innä Unfas Şaddijän: məssi-s n-taməntəka-ta-däx, ilkam ad-t-əkrədän käl-Älyähud s-əmmək-wa-däx däx-Yäruşsalam, əjən-t jer-ifassän n-inəzzulam.†»

¹² Nəslä i-isālan-win-däx ɣas, ad-nəlaqqäd näkkəneɗ hakd imumənän wi əzzäɣnen Qäyşara Buləs i-ad-wär ikkä Yäruşsalam

¹³ məšan, inn'-anäx: «Ma ämoos a-wa käwän-işlän, naxxäsäm ulh-in s-iməttawän-näwän? Näkk, diha t-əlleɣ, äsidäwäx i-tişəm hakd-däx i-taməttant däx-Yäruşsalam fäl təssəba n-isəm n-Emäli ʔisa.»

¹⁴ İssəndär-anäx ɣas, nəkf'-e älɣafyät, nənn-as: «İja Mässinäx erhet-net.»

¹⁵ Nāssakäy äzzāman däx-Qäyşara təzzar, nāsdāw, nəjožäy s-Yäruşsalam.

† **21:8 21:8** – İşəm n-awadəm wa ikkələf Mässinäx däx-älkänisät d-älxuɗbät n-Älənžil. – Afäl əjjətän a hasän-itawānnen: İməllänžalän. † **21:11 21:11** – ʔur-käl-Älyähud, ere wärän ämoos ägg-Älyähud s-alāşäl meɣ ere wärän ilkem i-äddin-näsän, iket-net, änäzzalim a ämoos. A-wen-däx a fäl tiwsaten ti iyyəɗnen iket-näsnät, ti n-inəzzulam. – Aşäl-i-däx, änäzzalim, äkafär (ere wärän issen s-Mässinäx).

16 Ässofäðän-anäx-in härät däx-inəttulab n-aɣrəm-en, äwwäyän-anäx s-ehän n-amumən s-isəm-net Mānasun ila awtəl wa n-Qəbrus, näzzubbät ɣur-s.

Amuqqəs n-Buləs d-Yaqub

17 Näwwäd-in Yārussälam ɣas, äsbärräkän-anäx däx-s ayətma-näx däx-äddin s-tedäwit.

18 Äffäw, näddew d-Buləs s-ehän wa n-Yaqub-i ɣur-äzzimmäxän in-ušämän n-älkänišät iket-näsän.

19 Nänmäjja dār-sän isofan təzzar, illäxät-asän Buləs isälan s-iyän-iyän n-a-wa ija Mässinäx iket-net jer-inəzzulam s-älxidmät wa ija jere-sän.

20 Əslän i-isälan-en-däx ɣas, ad-tiimələn Mässinäx. Ənnän-as dərät-a-wen: «Äŋŋa-näx Buləs, ənhəy ɣas afdän fäll-afdən n-käl-Älyähud wi omännən s-Mässinäx, əttafän iket-däx-näsän alkum i-alämär wa n-Mosa däx-isälan n-asəmmili n-aratän d-älɣadatän wi-iyädnen;

21 nəssan a-s ämära d-əslän a-s dd-tosed, ilkam däx-sän tənna n-härät ed əslän a-s käyy, tänimäšrayäd i-alämär wa n-Mosa.

22 Närha fälla-k ämära ad-tän-tökkəsäd däx-täqqän n-eɣäf-ten-däx.

23 Ämära, äddäbara-nänäx hak da: hann-anäx əkkoz meddən əjjašnen ärkäwäl,

24 idawnet dār-k s-edägg wa däx-šašdajän äddinät iman-näsän, šəšdəjäd iman-näk dār-sän, tökkəsäd-asän ehäre wa n-asəttəbəl-bəl-näsän, dihen, ad-əlmədän äddinät a-s a-wa fälla-k itawännən, wädden a ijan ed, a-wa mad-təjəd, äsijäyha a-s wär tänmäšrayäd i-alämär wa n-Mosa.

25 Däx-isälan n-inəzzulam wi s-ämära, omanän s-Älmasex, nəktab-asän təkərde n-tamätert däx-hasän-nənnä, wär tättänet isan ämoosnen takute i-äššanäm, wär sässänet ašni, wär tättänet mäxsoy, əbðəwnet d-e d t-illäm a isamäðasän taɣəssa.»

26 Äffäw, äddew Buləs d-meddən wi n-əkkoz, ijjäš dār-sän edägg wa n-təšədje, illäxät i-äddinät täqqän ta mad-səssikəyən təzzar işdajän, təzzar äkt hak iyyän däx-sän fäll-iman-net.

Atärməs n-Buləs

27 İšwar imda əssəboɣ wa n-təšədje-näsän, ənhäyän härät däx-käl-Älyähud n-äkall wa n-Azya Buləs däx-ehän n-ämudd wa mäqqārän ɣas jän-dd erk iman däx-tamətte, toða fälla-s,

28 saɣären äddinät, jannen: «Ya käl-İşrayil, əyyäwät! Ənhəywät äwadəm-wa s-edägg osa-däx, išinməšrəy tamətte-nänäx s-a-wa ixattäb fäll-alämär wa n-Mosa d-a-wa ijän fäll-ehän n-ämudd wa mäqqārän, ənhəywät-ak, igla fäw har dd-äššojäš däg-Älyunan† iyyäð ehän n-ämudd wa mäqqārän, äsmäðäs-t.»

29 Ənnän a-wen fäl-a-s innin, ənhäyän Tirfim wa n-İfäsus äddeew d-Buləs däx-amməs n-aɣrəm, äɣelän, äššojäs-t-dd ehän n-ämudd wa mäqqārän.

30 İwäs aɣrəm-ənnin-däx iket-net, tošäl-dd tamətte, ärmäsän äddinät Buləs, äšräwräwän-t har t-əzzəzjārän ehän n-ämudd təzzar, äɣfälän tishar-net dāra-sän.

31 Tättārän iji n-iman-net dihen-däx a-s osän isälan n-tamdərwayt ta jat däx-aɣrəm kumända wa ännihäðän däx-əssärdusa wi n-käl-Roma hänen Yārussälam.

† 21:28 21:28 Gərik (Grec) däx-Təfränsit.

³² Issäğrä-dd älwäqq-wen-däğ kabtänän d-össärdusa, äddew där-sän şik s-tamötte. Tönhäy-t tamötte imal-dd ənta d-össärdusa-net ɣas, əbdän d-Buləs.

³³ Ikkä-dd kumända Buləs, omär s-ad-däğ-s ətwəjjənät sənätät tişəm təzzar, issəstän-t d-ere wa ämoos d-a-wa iğşäd.

³⁴ Täsiğärät tamötte iket-net, hak aşrut-däğ wär-oher d-amidi-net iğäran, indär i-kumända ad-isəl i-a-wa has-ijanna Buləs. Omär ɗarät-a-wen s-ad-ättälwäy Buləs s-ehän wa n-əlyəşkär.

³⁵ Älwäqq wa d-itiwən Buləs asəggaggən wa işijuşän äwadəm ehän wa n-əlyəşkär, amsiwi a t-əjän əssärdusa fäl tössəba n-aşunəy-i-däğ sār-s təja tamötte i-ad-t-änğ. Issəntä Buləs uješ n-ehän, təzzän sār-s tamötte har dd-əqqälän əssärdusa jan-as afäraj.

³⁶ Täsiğärät tamötte iket-däğ-net, janna: «Ämmätet, ämmätet.»

Ämewäy Buləs s-ehän wa n-əlyəşkär

³⁷ Älwäqq wa d-äbok Buləs uješ n-ammas n-ehän wa n-əlyəşkär, innä i-kumända: «Ak äddobəğ ad-hak-ännäğ härät meğ?» Inn'-as kumända: «Käh! ɣas käyy tössänäd Tälyunanit?»

³⁸ Adiş käyy, wädden u-Mişra-wa s-a äynayän d-äsfälläg əkkoğ afdän n-äwadəm wi has-əlkämnen s-tenere?»

³⁹ Inn'-as Buləs: «Näkk, ägg-Älyähud, əweğ däğ-tayğrəmt ta n-Tarša däğ-teje ta n-Silisi, a-wen tayğrəmt təlat isəm. Ämära, ärheğ däğ-k, ad-hi-təkfəd turhajät n-ad-äjäğ härät n-mäjräd i-tamötte-ta-däğ.»

⁴⁰ Ikf'-e kumända mäjräd ɣas, ibdäd Buləs, ikkə-dd tamötte, ibdäd fäll-isəgguggan n-ehän, illäf i-tamötte i-ad-susəm, tässosäm. Imməjräd-asän älwäqq-wen däğ-ğäbranəyya, tawalt ta-däğ ənkäsän. Inn'-asän:

22

Mäjräd wa ija Buləs i-ad sār-s ixləs iman-net (Ijitän 9:1-9; 26:12-18)

¹ «Ayətma-ğ, abba-tän-in, säjdät ämära i-mäjräd wa s-ärheğ ad-hawän-t-äjäğ i-ad-sār-s əkkəsäğ uɖlem fäll-iman-in.»

² Əslän a-s ɣäbranəyya-ta-däğ əttädän a däğ-hasän-ässewäl, əttäfän ṭabb, äsjädän-as. Inn'-asän:

³ «Näkk, ägg-Älyähud, əweğ däğ-tayğrəmt ta n-Tarša təhät Silisi mäšan, ayğrəm wa n-Yäruşsalām a däğ-ədwäläğ. A-wa əlmädäğ iket-net, əlmädäğ-t daw-təlyuləma n-Gamälyäl. Ənta a hi-issäğrän alkum i-a-wa innä alämär n-abbatän-nänäğ iket-net. Əjjəlyät-in däğ-tuksəda n-Mässinäğ a hi-iwwäyän s-əşşənju n-tabarät ta-däğ n-ğisa s-əmmək wa s-tät-täşşunjem aşäl-i-däğ.

⁴ Əgleğ däğ-əşşənju wa has-jeğ har tājğäğ iman n-äddinät wi əlkämnen i-zäbo-wen-däğ, tājğäğ tişəm däğ-iyğäɖ, təjğaräğ-tän däğ-takärmut, wär-əzleyäğ meddən d-tiɖeden.

⁵ A-wen, äjjəyh'-as ämänokal n-käl-tikutawen, äjjəyhän-as dağ in-uşämän wi ɣattäsnen äşşäreɣa ed əntäneɖ iman-näsän a hi-əkfanen tikarɖiwen əkkanen käl-Älyähud wi n-ayğrəm wa n-Dämasäq i-ad-əjrəwäğ tabarät n-asəttärməs n-äddinät-wi əlkämnen i-tabarät-ta-däğ, äjğäğ däğ-sän tişəm təzzar, əlwəyğ-tän-dd s-Yäruşsalām.

(Ijitän 9:1-19; 26:12-18)

⁶ Ässokaläy däx-isälan n-a-wen-däx har hin-ohäzäx Dämašaq. Diha-däx tät-in-ohäzäx s-tarahut, wäla a hin-əjrähäx, a-s fäll-i dd-äzzubbät ännur, dd-ifalän išənnawän, ijan amləwləw n-tikunen,

⁷ əheḡ-dd oḡeḡ, əsleḡ i-eməsli hi-innän: <Sawəl, Sawəl! Ma käy-orämän sār-i, tiḡəzzubud-ahi?>

⁸ Ənneḡ: <Emäli, mi tämoosäd?> Inn'-ahi: <Näkk a-wa ḡisa wa n-Näširät tiḡəzzəbud.>

⁹ Ənhäyän meddən wi dār-äddewäy ännur wa dd-ämläwläwän mäšan, wār-əslen i-eməsli wa hi-ämmijrädän.

¹⁰ Ənneḡ-as: <Emäli! Ma s-leḡ s-ad-t-äjäx?> Inn'-ahi Emäli: <Əbdəd, äkk aḡrəm wa n-Dämašaq, ad-hak-itwənn dihen a-wa s-led s-ad-t-təjəd.>

¹¹ A-s itäj a-wen-däx, wār t-illa a hannäyäx ed, äsdärḡäl-ahi ännur wa fäll-i dd-äzzubben. Əlwäyän-ahi imidiwän-in s-äfuss har nəjjäš Dämašaq.

¹² Ill'-e dihen ähaləs äddiinän däx-a-wa innä alämär wa n-Mosa, ässiimḡärän käl-Älyähud s-isəm-net Änanyas,

¹³ ənta-en-däx a hi-dd-osän, äzozäy-ahi iman-net, inn'-ahi: <Äḡḡa-ḡ Sawəl, arr tiḡtawen-näk>. Ämeränät-dd tiḡtawen-in, ənhäyäx-t.

¹⁴ Inn'-ahi daḡ: <Mässinäx-i s-əlkämän abbatän-nänäx a-s äru d-käy-äsnäfrän i-ad-käy-isəlməd erhet-net, tənḡəyäd wa s-itawänna Ämaḡdal, təsləd i-a-wa fälla-k irha s-emm-net,

¹⁵ tumasäd tajuhe-net dat-dägg-adəm, tälläḡed-asän a-wa tənḡəyäd d-a-wa s-təsled iket-net.

¹⁶ Ämära, ma käy-iwwaxän? Əbdəd, tətəwəsəlmäḡäd däx-aman, säḡləfäd iman-näk Mässinäx i-ad-käy-išəšdəj däx-ibäkkadän-näk.>

¹⁷ Älwäqq wa d-äqqäläx Yärussälam ḡarät-a-wen, təddaläx Mässinäx däx-ehän n-ämudd wa mäqqärän ašäl iyyän a-s hi-tässaḡa tänäfalilt dd-falät Mässinäx.

¹⁸ Ənhäyäx Emäli, inn'-ahi: <Tärmaḡ, əzjār Yärussälam šik fäl-a-s wār mad-ärḡdən imuzäḡän-net s-tajuhe ta fäll-i mad-təjəd.>

¹⁹ Ənneḡ-as: <Emäli, wädden, əssanän imumənän əmmək wa s-əkkeḡ jer-ihänan n-äddin wi n-käl-Älyähud, naqqäx iyyäd däx-sän, tājḡäx tiwit s-ebärtäk däx-iyyäd, təjjaräx-in wi iyyädnen däx-takärmüt.

²⁰ Ašäl wa d-inḡäl ašni n-Stifan†-i n-tajuhe-näk, əbdadäx, taqqäsäx i-wi t-naqqänen, näkk fäw a əssäḡläfän isəlsa-näsän.>

²¹ Inn'-ahi Emäli älwäqq-wen: <Əḡləw, ad-käy-sukäx tiwsaten n-inəzzulam† ti hənən ikallän wi uḡəjnen.,> »

Uḡəš n-Buləs i-takärmüt

²² Äsijädän-as äddinät hundäx har ten-däx ḡas, äsḡären däx-išənnawän, ad-jannen: «Əlhəsät fälla-näx äwadəm-wa-däx, wār-ilä s-ad-äqqayəm iddar.»

²³ Naḡḡawän iḡäran, täkkäsän isəlsa-näsän fäll-iman-näsän, nabbäsän-as äkall.

²⁴ Omär kumända älwäqq-wen i-ad-t-šujəšan əssärdusa ammas n-ehän wa n-əḡəškär, əjən däx-s tiwit i-ad-t-šəhhəššəlän tənna n-äddälil-wa fäl fälla-s saḡarat tamətte.

† 22:20 22:20 Jannen-as iyyäd: Älmüştafa. † 22:21 22:21 — ḡur-käl-Älyähud, ere wärän ämoos ägg-Älyähud s-aläsäl meḡ ere wärän ilkem i-äddin-näsän, iket-net, änäzzalim a ämoos. A-wen-däx a fäl tiwsaten ti iyyädnen iket-näsnät, ti n-inəzzulam. — Ašäl-i-däx, änäzzalim, äkafär (ere wärän issen s-Mässinäx).

²⁵ Karrädän-t əssärdusa dihen-däx i-ad-däx-s əjən tiwit a-s innä Buləs i-käbtän wa t-illän dihen: «Ajän, ijraw-awän älqanun ad-təjəm tiwit däx-u-Roma wär-əswär äššärexa udlem.»

²⁶ Isla käbtän-en i-a-wen xas, ošäl s-kumända, inn'-as: «Hekäyy! Äj ənniyät i-a-wa s-tärhed iji-net, əhaləs-i, i n-Roma.»

²⁷ İkkä-dd kumända Buləs, inn'-as: «Xas, tidət käyy u-Roma?» Inn'-as Buləs: «Eyya.»

²⁸ Inn'-as kumända: «Näkk, azrəf äjjeen a zäläx i-ad-əjrəwäx tumast-ten-däx.» Inn'-as Buləs: «Näkk, a əweyx-däx, ämoosäx-t.»

²⁹ Əššənkäšän fälla-s əssärdusa wi s-ihənnin ärhan ad-t-əkrədän, əjən däx-s tiwit. İrmäx kumända ed, ija tišəm däx-ere la Roma iket-di d-ittiwəşreş.

Ätwäxrä-dd Buləs s-imizärän n-käl-Işrayil

³⁰ Äffaw xas, ad-itammäx kumända i-äddälil n-äddärora wa t-əswärän käl-Älyähud, ikkäs Buləs däx-tišəm, issäxrä-dd darät-a-wen imänokalän n-käl-tikutawen d-inušämän-wi xattäsnen äššärexa təzzar, issäxrä-dd Buləs, ij'-e jere-sän.

23

¹ İkna Buləs akäyad n-inušämän wi n-Sinhidrin† xattäsnen äššärexa təzzar, inn'-asän: «Ayətma-x, wär t-illa a däx-əššakäx iman-in, a-wa s-ila ägg-adəm s-iji-net däx-isälan n-ta n-jere-s d-Mässinäx, wär käla has-änmäşräyäh har näkk-da-däx.»

² İggäd-dd sār-s Änanyas wa n-ämänokal n-käl-tikutawen, omär i-əssärdusa wi t-əllanən edes i-Buləs s-ad-has-ənfäzän, isusəm s-iyyät.

³ Ənfäzän əssärdusa i-Buləs xas, innä i-ämänokal n-käl-tikutawen: «İnfäz-ak Mässinäx isəm n-erk äwadəm; ənde d-ämmukkän a-s käyy-i s-äniihäjja d-ad-hi-təşräxad s-iqqud s-a-wa innä alämär, käyy-da-däx ämära has-itinməşriyän, sasänxəd-ahi.»

⁴ Ənnän-as äddinät: «Käyy, ma käy-äsihälän tigəggar n-ämänokal n-käl-tikutawen n-Mässinäx?»

⁵ Inn'-asän Buləs: «Ayətma, änsät-ahi-dd, wär-əssenäh a-s ənta-i-däx a-s ämänokal n-käl-tikutawen ed əssanäh a-s iktab a-s: <Wär tənned a läbasän fäll-ämänokal-näk.> »

⁶ Däx-a-wen-däx, ad-ilmäd Buləs a-s aşrut n-tamətte iyyän, i n-taggayt ta n-käl-sadus, wa iyyädän, i n-ta n-käl-faris. İdkäl emäsli-net dat-käl-Sinhidrin,† innä: «Ayətma-x, näkk u-faris n-ägg-u-faris a ämoosäh, kunta ill'-e udlem hi-iwarän aşäl-i-däx, wär t-illa a ämoos kunta wädden wa n-ättäma-i järäh n-a-s təlkam tanäkra jer-inəmmuttan.»

⁷ İnnä a-wen xas, tənkar tamənnant jer-käl-faris d-käl-sadus, təzun tamətte.

⁸ Ämoos aşrut iyyän wa n-käl-sadus-i jannänen wär təlkem tanäkra n-inəmmuttan, wär t-əllen änjələsän wəla alšinän; ämoos aşrut wa iyyädän wa n-käl-faris-i əssiitbätän emel n-härätän-win-däx iket-näsän.

⁹ Təwäs tamətte iket-net, ja təkät. Əggädän älxulam wi n-taggayt ta n-käl-faris, əwärän s-əşşahät s-aşrut wa n-Buləs, ad-jannen: «Ähaləs-i-däx,

† **23:1 23:1** A-wa älzəməxät n-inušämän d-imizärän n-käl-Işrayil wa itirən äššärexa, əntəneq a-s älqallitän, osaxän dax tamətte d-əlxəkum d-äddin. † **23:6 23:6** A-wa älzəməxät n-inušämän d-imizärän n-käl-Işrayil wa itirən äššärexa, əntəneq a-s älqallitän, osaxän dax tamətte d-əlxəkum d-äddin.

wär t-illa uđlem fälla-s nəhannäy, ak mi issanän fäw kunta wädden a dd-ifalän išənnawän meḡ änjalos iyyän a has-imməjrädän?»

¹⁰ Inhäy kumända tukəse n-talḡa ta dd-təšräyät ḡas, irmäḡ fäll-ad-t-təmzəyözəy tamətte, tənəkədnəkəđ-t. Omär i-əssärdusa s-ad-t-əlwəyän s-ehän wa n-əlyəškär i-ad-t-səssijəjän tamətte.

¹¹ Ehəđ wa ilkämän i-wen, änfaläl-dd Emäli i-Buləs, inn'-as: «Buləs, kuyəd, wär käy-išäšlalet härät fäll-ämašäl wa käy-əssäḡlāfäḡ, əmmək wa s-hi-tämoosäd tajuhe dāḡ-Yärušsalam, əmmək-wen-dāḡ daḡ a-s mad-hi-tumasäd tajuhe dāḡ-Roma.»

Tayđärt ta s-əttärän käl-Älyähud ad-tät-əjön i-Buləs

¹² Äffäw ḡas, həđän käl-Älyähud n-a-s wär t-illa a mad-əkšən wäla a mad-əswən a əkkän wär-əssäḡdärän Buləs, əjön iman-net.

¹³ Əkkožät timərwen n-əhaləs a jänen tahuđe-ten-däḡ.

¹⁴ Däḡ-a-wen-däḡ, ad-əkkän ämänokal n-käl-tikutawen d-imännähəđän n-tamətte, ənnän-asän: «Nəj'-awän tahuđe, ilḡän-anäḡ daḡ Mässinäḡ kunta ill'-e a he-näkš wäla a he-nəsəw a nəkkäs wär nəja iman n-Buləs.

¹⁵ Nārha dāḡ-wän ämära, ad-təttäräm dāḡ-kumända d-käl-Sinhidrin, ad-dd-səbdədän Buləs data-wän dāḡ-äsaru n-a-s tärham asəstan-net, afäl təjäm a-wen, ad-näj näkkäneđ əmmək fäll-has-in-nəssəmdä.»

¹⁶ Təsla tejäše n-Buləs i-tayđärt-näsän ḡas, ikka ehän n-əssärdusa wa iha Buləs, ija dāḡ-s isälan.

¹⁷ Iḡrä-dd Buləs iyyän dāḡ-käbtänän, inn'-as: «Əlwəy alyəđ-i-däḡ s-kumända fäl-a-s ila a-s irha ad-has-tän-änn.»

¹⁸ Äddew dār-s käbtän-en s-kumända, innä i-kumända: «Buləs wa n-u-takärmüt a hi-innän ad-sär-k dd-əlwəyāḡ ämawađ-i-däḡ fäl-a-s äwway isälan s-irha ad-däḡ-k tän-äj.»

¹⁹ Ikkäs-dd kumända alyəđ s-takše təzzar, issəstän-t d-isälan wi äwwäy.

²⁰ Inn'-as alyəđ: «Änmännakän käl-Älyähud fäll-ad-däḡ-k əttärän ašəkka ad-dd-təyyəd Buləs sār-sän i-ad-t-səbdədän dat-käl-Sinhidrin älmät ärhan ad-t-əknən asəstan d-a-wa iḡšäd,

²¹ wär käy-səswadnet fäl-a-s, a iwwəđän əkkožät timərwen n-əhaləs a ihəđän n-a-s wär mad-əkšən, wär mad-əswən a əkkän wär jen iman-net, wär-əqqelän ämära ḡas ar i-ad-sār-sän t-dd-təyyəd.»

²² Älwäqq wa d-isigləw kumända ämawađ-ənnin-däḡ, äsmätär-t d-ad-wär ija isälan-wi-däḡ i-äwadəm wäl' iyyän.

Ujəš n-Buləs i-takärmüt dāḡ-ayrəm wa n-Qäyšära

²³ Issäḡrä-dd đarät-a-wen əssin käbtänän, inn'-asän: «Sädwät-dd sänatät-timađ n-əssärdusa, əssayät timərwen n-əssärdasi dāḡ-wi näynen ibəjwan d-sänatät timađ dāḡ-wi ärjašnen, äwwayän allaxän, sədəwəm afäl okäynät tisudəsen i-tikawt n-Qäyšära,

²⁴ əstəjät i-tisnay, səssiwəđäm-in Buləs iddar-iḡlas Filiks wa n-gəfär.»

²⁵ Iktäb kumända təkarđe đarät-a-wen-däḡ innä:

²⁶ A-wa näkk Kəlod Lisyas hin-əhuulän gəfär Filiks-i əkney semḡar.

²⁷ Ähaləs-i-däḡ sār-k-in-əssiigläḡ, ärmäsän-t käl-Älyähud, əttärän ad-əjön iman-net. Əlmädäḡ a-s äđđiin fäll-Roma ḡas, ässokäsäḡ-t-dd jer-ifassän-näsän s-əjhän n-əssärdusa.

²⁸ Dāḡ-derhan-in n-almud n-a-wa fäl ärhän tenäḡe-net, əssəbdädäḡ-t-dd dat-inušämän-wi ḡattäsnen äššäreḡa i-ad-əlmədäḡ äddälil n-uđlem wa t-əsiwārän,

²⁹ əlmädäx a-s a ihalän ebre n-tijəttewen n-alämär-näsän xas, wädden a änihäjjän d-tamättant wäla takärmüt.

³⁰ İket hi-əjjäšän isälan n-a-s ärhan käl-Älyähud asäxdär-net i-ad-əjən iman-net. Däx-təssəba n-a-wen-däx a fäl t-in-əssärmädäx sār-k, səlmədäx day wi has-dd-əškänen a-s käyy a ännihädän däx-isälan-net.

Wässälam!

³¹ Əjän əssärdusa älwäqq-wen-däx a-wa hasän-innä kumända, əglän d-Buləs ehäd-en-däx har t-in-ässawädän taXRəmt ta n-Antibatris.

³² Äffaw xas, əqqälän əssärdusa wi ärjäšnen Yärussälam, ässofädän-in wi näynen ibəjwan Buləs s-Qäyşara.

³³ Əwwädän-in xas, jän tākardə-tənnin-däx ifassän n-gəfär, əssəbdädän-dd day Buləs data-s.

³⁴ İyra gəfär tākardə təzzar, issəstän d-teje ta lät Buləs. İlmäd a-s Silisi a t-lät xas, inn'-as:

³⁵ «Ad-käy-dd-säxräx afäl dd-əwwädän äddinät wi hak-dd-əškänen.» Omär darät-a-wen i-əssärdusa i-ad-t-əjən däx-ehän s-ätiwäjja ənniyät, däx-ehän n-təmmənukəla wa äsdäy ämänokal Harudəs.

24

Tebädde n-Buləs dat-ämänokal Filiks

¹ Səmmos isilan darät-a-wen, osä-dd Änanyas wa n-ämänokal n-käl-tikutawen ifal-dd Yärussälam, äddeew d-härät däx-inušämän d-änabdid s-isəm-net Tartaloš. Osän-dd xas, əškän i-Buləs s-gəfär.

² Ätwäxrä-dd Buləs. Diha-däx dd-osa, ad-sär-s äšonäj Tärtaloš, ad-t-isawar uqləm, ijanna:

³ «Ämänokal-nänäx Filiks, nämmoy-ak älxal wa ähusken d-älxafyät wa s-təzozäxäd äkall-nänäx, a-wen, wär t-illa äwadəm s-wädden issan sār-s.

⁴ Ämāra, wär nārha asxəf-näk s-mäjräd äjjen, ärheex däx-k däx-milxaw-näk, ad-hanäx-təkfəd ässaXät əndärrän n-mäjräd.

⁵ Ähaləs-i-däx n-əgg-äddärora, edəgg osa-däx, ad-däx-s isəffəlləg käl-Älyähud, ittär əsənnəməšri-näsän, ämoos iyyän däx-imizärän n-taggayt ta təglät fäll-tidət n-iman-net s-itawänna ta n-käl-Näširät.

⁶ Däx-təmxäre n-anməšri-i-däx ija, ittär fəw ad-isəmmädəs ehän n-ämudd wa mäqqärän. Nästärmäs-t s-a-wa innä alämär-nänäx [

⁷ mäšan, ohäx-t däx-näx Kumända Lisyas s-äşşahät.

⁸ Täddebəd käyy iman-näk ad-t-səstənnäd d-uqləm wa t-näswär ed ənta iman-net, ill'-e diha].»

⁹ Ohärän käl-Älyähud wi iyyädnen iket-näsän iyyän n-əmm, ad-jannen isälan-den-däx.

¹⁰ Ästafäy gəfär darät-a-wen i-Buləs, inn'-as ad-ämmäjräd. İdkäl Buləs mäjräd, innä: «Əssanäx ämänokal-in a-s käyy äru tämoosäd ägg-äşşärexa i-käl-äkall-i-däx, a-wen-däx day a fäl əflasäx a-s ad-hi-təkkəsäd tekäridt.

¹¹ A ilan märaw isilan d-əssin dd-əjjäšäx Yärussälam i-ad-däx-s äxbədäx Mässinäx, täddobed käyy iman-näk ad-səbbuyənäd isälan-win-däx,

¹² wär t-illa ere hi-inhayän əntajäx tamətte, wäla ämiixännanäx d-äwadəm däx-ehän n-ämudd wa mäqqärän, wäla däx-ihānan n-äddin wi n-käl-Älyähud, wäla däx-aXRəm,

¹³ wär t-illa day däx-äddinät wi-hi-sawarnen uqləm data-k-i äddooben asətbət n-a-wen ed, wär len tjuhawen.

14 Hakd a-wen-däx, härät iyyän, ädduuttät, janney-t day data-k: näkk, Mässinäx wa n-abbatän-nänäx a-s əlkamäx s-əmmək wa s-tän-innä alämär d-əlkəttabän n-ännäbitän. A-wen-däx a-s jannen əntäneḍ taggayt təglät fäll-tidət n-iman-net.

15 Mässinäx a däx-jaräx ätṭäma, jarän-t däx-s əntäneḍ-däx n-a-s təlkam tanäkra n-inəmmuttan, jer-wi oläxnen, wäla wi läbasnen.

16 Təssəba n-a-wen-däx a fäl tattäräx, ad-wär-itəmmil a däx-əššakäx iman-in, dat-Mässinäx wäla dat-dägg-adəm.

17 A ilan iwətyan d-əzjāräx äkall-i-däx, a-s t-dd-äqqäläx, äwwayäx takute n-azrəf təmoosät tadhəlt i-imumənän n-äkall-in, äwwayäx day näkk a-wa s-ärheḡ ad t-əkətäx i-Mässinäx.

18 Ašäl wa d-əssəmdäx a-wa iktäbän däx-alämär däx-isälan n-təšədje-nin, əbdadäx däx-ammäs n-ehän n-ämudd wa mäqqārän, wär xur-i t-təlla tamətte wäla tamdərwayt wäl'-iyyät. Əbdadäx dihen-däx a-s fäll-i toḍa tamətte.

19 A-wa wär-ih' äššäk ənta da: käl-Älyähud wi dd-fälnen Azya a fäll-i oḍänen, a-wen-däx a fäl äniihäjja day a-s kunta ill'-e uḍlem hi-iwarän, əntäneḍ-en-däx a lanen s-ad-hi-səwrən uḍlem data-k i-ad-səddəttun a-wa fäll-i itawännen.

20 Kunta a-wen, wär-ija, adiš, läxätnet meddən-wi əbdädnen diha uḍlem wa hi-iwarän a-s dd-əbdädäx dat-käl-Sinhidrin-wi† xattäsnen äššärexa.

21 Wär t-illa uḍlem hi-iwarän säl wa n-a-s ənney: təlkam tanäkra jer-inəmmuttan, tənna day n-a-wen-däx a fäl əbdadäx data-k ašäl-i-däx.»

22 Äsfäl Filiks äddinät iman-net ḍarät-a-wen ed issan a äjjeen fäll-taggayt-ta-däx təglät fäll-tidət n-iman-net, inn'-asän: «Afäl dd-osa Lisyas wa n-ämänokal n-əssärdusa, ad-käwän-dd-säxräx.»

23 Omär ḍarät-a-wen i-käbtän iyyän i-ad-äj ənniyät i-Buləs məšan, äkfet-t turhajät n-ad-t-dd-tisən äddinät-net, tassänän däx-s.

24 Härät n-išilan ḍarät-a-wen, iqqäl-dd Filiks äddeew d-Dərusil ta n-hänne-s län käl-Älyähud. Issäxrä-dd Buləs, äsjäd i-isälan-wi itäj fäll-immun s-ḡisaÄlmasex.

25 Itajj'-as Buləs isälan har dd-iwwäḍ edägg-wa däx-has-ijanna əmmək wa s-ila ägg-adəm ad-sär-s iddär dat-Mässinäx, ijrəw älxafyät, isədəw i-äššärexa wa dd-imalän, ännähäḍ däx-iman-net xas, irmäx Filiks, innä i-Buləs: «Əgləw ämära, afäl sär-k əjräwäx, ad-käy-dd-aləsäx asäxär.»

26 E-d ähoj a dd-isäxär Buləs, isəddəwənnət-t, däx-a-s, ijar ätṭäma n-ad-t-äkf Buləs a ila azrəf.

27 Ija a-wen-däx har okäyän əssin iwətyan, izjär Filiks Təmmənəya, ijjäš Bursəs Fistus edägg-net. Ässof ənta, ad-itṭəf Buləs däx-takärmüt i-ad-izəjrəz iman-net i-käl-Älyähud.

25

Iyra Buləs Qäyšär i-ad-has-ikkəs tekäriḍt

1 Käraḍ išilan ḍarät a-s idkal Fistus tanäya, ifäl-dd Qäyšära, teje ta fäll-ixkäm, ikkä Yärussälam.

2 Əškän-dd sär-s imänokalän n-käl-tikutawen d-imizärän n-Älyähud däx-isälan n-Buləs,

† 24:20 24:20 A-wa älzämaḡät n-inušämän d-imizärän n-käl-Išrayil wa itirən äššärexa, əntäneḍ a-s älqallitän, osayän day tamətte d-əlxəkum d-äddin.

3 laqqädän-t d-ad-hasän-dd-isəwwəyy Buləs i-ad-t-əšräyän däx-Yărussälam, jannen a-wen, a-s ija a-wen, äru d-əjän äddäbara n-ad-t-säxdärän däx-tabarät, änxən-t kərəf.

4 Inn'-asän Fistus: «Buləs iha takärmüt däx-Qäyşära, qarät-a-wen daḡ, näkk iman-in, əkkeḡ Yărussälam däx-išilan-i-däx,

5 idawnet dār-i iyyäd däx-wän təflasäm i-ad-əbdədän fälla-wän, umasän tjuhawen-näwän däx-isälan n-əhaləs-wa-däx sawarän uḡlem.»

6 Ikkä Fistus Yărussälam, ija däx-s a t-illan jer-əttam təkəkəd mārəw išilan təzzar, iqqäl-dd Qäyşära. Aşäl wa ilkämän i-wa n-uḡəl-net, issäḡrā-dd Buləs s-edägg wa däx-iḡattäs äššäreḡa.

7 Ijjaš-dd Buləs ehän-en ḡas, äḡläyḡäläyän-t-dd käl-Älyähud wi-dd fälnen Yărussälam, ad-t-sawarän bahutän d-uḡlemän s-wär t-illa ere äddoben asəddəttu-näsän.

8 Iḡkäl Buləs mäjräd i-ad-ihəl iman-net, isəbbuggət a-wa fälla-s itawännen, inna: «Wär t-illa uḡlem hi-iwarän, wär t-illa a läbasän äḡşadäḡ wäla ənneḡ fäll-alämär n-käl-Älyähud, wäla fäll-ehän n-ämudd wa mäqqārän, wäla fäll-Qäyşär-i n-ämänokal wa mäqqārän.»

9 Innä Fistus älwäqq-wen i-Buləs i-ad-ijrüz i-käl-Älyähud: «Ak tärḡed s-ad-təkəkəd Yărussälam i-ad-käy däx-s əšräyḡ meḡ?»

10 Inn'-as Buləs: «Näkk, ämära, Qäyşär-i n-ämänokal wa mäqqārän ihän Roma, ənta a-s ärheḡ tebädde data-s i-ad-hi-işrāḡ. Käl-Älyähud-i sār-k dd-əškänen, wär t-illa a hasän-äḡşadäḡ, a-wen, käyy iman-näk, hannäyäd-t.

11 Kunta ill'-e a äḡşadäḡ wäla a jeḡ läbasän, ärḡeḡ s-taməttant mäšan, kunta a wa fäll-i itawännen bahu, adiş, wär-əley s-ad-ətwəjjäḡ jer-ifassän-näsän. Ämära, šamad tanfust-da-däḡ, äḡreḡ Qäyşär wa n-ämänokal mäqqārän.»

12 Änmänhäy Fistus d-inušämän wi ḡattäsnen äššäreḡa təzzar, innä i-Buləs: «Šamad käyy iman-näk a iḡrän ämänokal wa mäqqārän, adiş, ad-hak-sukäḡ.»

Tebädde n-Buləs dat-Fistus d-Ägribba

13 Hārät n-išilan qarät-a-wen-däḡ, osä-dd ämänokal iyyän s-isəm-net Ägribba äddeew d-wälätma-s s-isəm-net Berenis, jan-dd tāboşajt s-Fistus däx-Qäyşära.

14 Jän išilan dihen ḡas, iḡkäl-asän-dd Fistus isälan n-Buləs, inn'-asän: «Ill'-e diha ähaləs dd-oyya Filiks däx-takärmüt,

15 əškän-dd sār-i fälla-s imänokalän n-käl-tikutawen d-inušämän n-käl-Älyähud, əttärän däx-i ad-t-siḡəwäḡ däx-äššäreḡa

16 mäšan, əlläḡeḡ-asän a-s älqanun-nänäḡ näkkäneḡ-i n-käl-Roma, wär hanäḡ-ijrew ad-nəsiḡəw əwadəm däx-äššäreḡa ar s-ad-t-dd-nässibdəd dat-äššäreḡa təzzar, nəlməd kunta a-wa fälla-s itawännen tidət meḡ.

17 Osän-ahi-dd däx-Qäyşära ḡas, əssäḡrāḡ-asän-dd näkk iman-in ähaləs wa s-sār-i dd-əškän.

18 Äḡeläḡ däx-a-wa fälla-s jannen, iḡşad a mäqqoorän mäšan, oseḡ-t wär-ija a-wen

19 ed, isälan n-äddin-näsän d-isälan əkkanen ähaləs iyyän ämmun s-isəm-net Ḳisa, s-orda ənta a-s inkär-dd jer-inəmmuttan, ənta-den-däḡ a-wa ikkän jere-sän,

20 wär-əssenäḡ a has-e-äjäḡ, əttäräḡ däx-s ad-äkk Yărussälam i-ad-däḡ-s itwəşrāḡ ed, näkk iman-in, wär hənneyäḡ uḡlem t-äswäräḡ

²¹ mäšan, ässof teyäre n-Qäyşär wa n-ämänokal mäqqärän ed, ijraw-as älqanun-nänäx a-wen.»

²² Iggäd-dd Ägribba älwäqq-wen, inna i-Fistus: «Ähaləs-wa-däx, säsl'-ahi-has näkk-däx.» Inn'-as Fistus: «Aşəkka, ad-t-dd-səbdədäx data-k, təsləd-as.»

²³ Äffäw yas, ässahäx-dd Ägribba ašäl s-älxal wa n-imänokalän ənta d-Berenis ta n-wälätma-s, əjjäšan ehän wa n-äššärexa äddewän d-kumända d-inušämän n-aşrəm. Issäxra-dd Fistus Buləs, ittəlwäy-dd.

²⁴ Imməjräd Fistus, innä: «Ämänokal Ägribba, käwäned-i dd-əžžəmmäyən diha-däx ašäl-i, ähaləs-i-däx hannäyäm, wär t-illa däx-Yärussälam hakd diha-däx, ere s-wädden innä, äbas änihäjja d-tämudre.

²⁵ Däx-a-wa hi-dd-iqqälän näkk, wär t-illa uđlem fälla-s əjrawäx t-äsinähäjjän d-tamättant mäšan, šamad ənta iman-net a äsnäfränän ad-t-işräx ämänokal wa mäqqärän, adiş ad-has-t-sukax i-ad-t-işräx.

²⁶ Hakd a-wen-däx, wär-ärheş, ad-has-t-sukax ar s-ad-t-äsidäwäx d-täkarde däx-iktab uđlem wa t-iwarän. Təssəba n-a-wen-däx a fäl ässofäx ad-t-dd-səbdədäx data-k i-ad-hi-təkfəd tayətte n-a-wa mad-əktəbäx däx-täkarde i-ämänokal wa mäqqärän qarät isəstanän wi t-mad-äjäx

²⁷ ed, wär-il' əmmək n-ad-sukax ämänokal u-takärmüt s-wär-ätwässän a-wa işšäd.»

26

Edäwänne wa ija Buləs i-ad-ikkəs uđlem fäll-iman-net (Ijtän 22:6-16; 26:12-18)

¹ İdkäl Ägribba mäjräd, inna i-Buləs: «Mäjräd! İkkəs uđlem fäll-iman-näk.» İdkäl Buləs äfuss-net i-ad-has-səjed tamətte, innä:

² «Ämänokal Ägribba, ämoos-ahi a mäqqorän turhajät n-mäjräd wa hi-təkfəd ašäl-i-däx i-ad-əkkəsäx fäll-i uđlem wa hi-äswärän käl-Älyähud wi hi-dd-əškänen sär-wän.

³ İssanäx a-s wär t-illa a hak-idrajän däx-älxadatän-näsän, wäla däx-tijəttewen n-äddin-näsän, a-wen-däx a fäl əttaräx däx-k tazidert n-ad-hi-səjedəd.

⁴ Näkk, wär t-illa ägg-äkall-i-däx wärän issen a-s təmmädrit-in iket-net, jəx-tät jer-käl-tumast-in däx-Yärussälam-i-däx ədwäläx.

⁵ Äru əzzayän-ahi, əssanän day a-wa ämoosäx kunta äbokän i-a-wen, tämudre-nin iket-net, əjəx-tät däx-alkum i-a-wa saşra taggayt ta n-käl-faris, wär t-təlla taggayt tät-tojarät isəm, wäla älşadalät däx-äddin-nänäx.

⁶ Ašäl-i, əbdadäx dat-äššärexa fäl təssəba n-ättaşma wa jərəx däx-ärkäwäl-wa ijjäş Mässinäx i-abbatän-nänäx wi n-ibda,

⁷ ätaşma-en-däx, a-s äqqalnät tiwsaten-nänäx ti n-märawät d-sänatät n-İşrayil ed, a-wen-däx a sär-snät dd-orawän älşibadät n-Mässinäx ehäd d-ašäl. Ämänokal-in, wär t-illa uđlem hi-äsiwärän käl-Älyähud wi hi-dd-əškänen säl wen-däx.

⁸ Ak ajän ämoos-awän täkunt a-wa s-ilkam ad-dd-isənkär Mässinäx inəmmuttan?

⁹ Däx-a-wa hi-dd-iqqälän näkk, wär t-illa a-wa-däx wär-əjəx i-ad-hin-aləməx s-iyät isəm wa n-Şisa wa n-Näşirät.

¹⁰ A-wen, jəx-t däx-aşrəm wa n-Yärussälam-i däx-hi-əjrawän imänokalän n-käl-tikutawen asəttärməs n-e d t-illäm ere ilkamän i-Şisa Almasex, äjäx-t däx-takärmüt. Afäl ənhäyäx i däx-sän äniihäjjän d-tamättant, ifassän-in a-s tajjäx iman-net.

11 Ëkkeḡ jer-ihānan n-āddin wi n-kāl-Älyāhud i-ad-tān-sāknāḡ dāḡ-sān aḡāna, šahāššalāḡ-tān s-asəkkufār, dāḡ-təmyāre n-aḡkār-nāsān wa hi-ihān, āhoreḡ-tān har ikallān wi iyyāḡnen dāḡ-əzzaḡān.

(Ijitän 9:1-19; 22:6-16)

12 Dāḡ-isālan n-a-wen-dāḡ a fāl əkkeḡ Dāmašāḡ, āwwayāḡ tikardiwen hi-əkfān imānokālān n-kāl-tikutawen, hi-əjrawnen tādabit n-a-wa s-ārheḡ iji-net.

13 Āmānokāl-in, əgleḡ dāḡ-a-wen-dāḡ a-s hin-ohāzāḡ Dāmašāḡ s-ammas n-tarāhut, wāla a hin-əjrahāḡ nākk d-imidiwān-in a-s ənhāyāḡ ānnur dd-ifalān išənnawān ojarān tāfukt amləwləw.

14 Nəhā-dd noḡa iket-dāḡ-nānāḡ, əsleḡ dihen i-emāslī hi-innān dāḡ-Ÿābranəyya: <Sawəl, Sawəl! Ma kāy-orāmān sār-i, tiḡəzzəbud-ahi? Ad-hak-indār amzəzzaj dār-i hārkuḡ.>

15 Īneḡ-as: <Emāli, mi tāmoosād?> Inn'-ahi Emāli: <Nākk a-wa Ÿisa wa tiḡəzzəbud.>

16 Āmāra, əbdəd fāl-iman-nāk, ānfalālāḡ-ak-dd i-ad-tumasād ānāmmašul-in, tumasād daḡ tajuhe-nin dāḡ-a-wa tənḡāyād ašāl-i-dāḡ d-a-wa hak dd-madān-infiləl ḡarāt a-wa,

17 ad-kāy-dd-āḡləsāḡ dāḡ-kāl-Älyāhud d-inəzzulam† šəmmišəläḡ-kāy sār-sān,

18 i-ad-tarəd tiḡtawen-nāsān, əzjarān-dd tihay s-ānnur, əzjarān-dd tārna n-Iblis s-Māssināḡ, amənān sār-i i-ad-tān-ākfaḡ tenāšše n-ibākkaḡān i-ad-ahərən tākasit d-iməššeddəjan wi iyyāḡnen.>

19 Āmānokāl-in Āgribba, wār-ətterāḡ anməšri i-a-wa hi-dd-ānfalālān dd-ifalān išənnawān ed, Māssināḡ ad-dd-ifal.

20 Īmməjradāḡ s-tizarāt i-kāl-Dāmašāḡ d-kāl-Ÿārussālam təzzar, okāyāḡ s-Älyāhudəyāt d-iḡārman wi iyyāḡnen hān inəzzulam, xaḡḡābāḡ-asān iket-dāḡ-nāsān isālan n-a-s lan s-ad-utabān, əjən tānudre tāddewāt d-imārkedān olaḡnen əssiitbātneḡ tiḡnəya ta dd-təšrāyāt fälla-sān.

21 Təssəba n-a-wen dāḡ, a fāl fāl-i oḡān kāl-Älyāhud dāḡ-ammas n-ehān n-āmudd wa māḡḡārān, əttārān tenāḡe-nin

22 māšan, idhāl-ahi Māssināḡ, ikkās-ahi-dd dāḡ-ifassān-nāsān i-ad-udabeḡ tebadde, əjjayhāḡ fāl-isālan-net har ašāl-i-dāḡ i-wi lānen isəm hakd wi t-wären əla. A-wa jāneḡ daḡ ašāl-i-dāḡ, wār-āmoos a āynayān, āru dāḡ-s əssewālān ānnābitān d-Mosa-i əssətbātneḡ a-s əlkamān isālan-wi-dāḡ hawān-tajjāḡ.

23 A-wen a t-āmoosān, a-s ilkam ad-inhəy Ÿisa Ālmasex tersəmmawen təzzar, umas teḡāfādde n-āddināt wi dd-maden-ənkār jer-inəmmuttan i-ad-ətwəjjən isālan n-ānnur n-əḡḡəllas i-kāl-Älyāhud hakd inəzzulam.»

Älwižab n-Āgribba i-Buləs

24 Āmmiijrad Buləs itakkās uḡlem fāl-iman-net dihen-dāḡ a-s idkāl Fistus emāslī-net, innā: «Kāyy Buləs, ābas təssanād a jānneḡ, təkkas dāḡ-k təmyāre n-təḡuləma tayətte.»

25 Inn'-as Buləs: «Āmānokāl-in Fistus, nākk ḡas ozja ənniyāt-in, əjrahāḡ a-wa heḡ; a-wa jāneḡ iket-net, wār-āmoos ḡas ar tidət lat ujhəh.

† 26:17 26:17 – Ÿur-kāl-Älyāhud, ere wārān āmoos āḡḡ-Älyāhud s-alāšāl meḡ ere wārān ilkem i-āddin-nāsān, iket-net, ānāzzalim a āmoos. A-wen-dāḡ a fāl tiwsaten ti iyyāḡnen iket-nāsnāt, ti n-inəzzulam. — Ašāl-i-dāḡ, ānāzzalim, ākafār (ere wārān issen s-Māssināḡ).

26 Käyy day ämänokal-in Ägribba, wär hak-ödrejän isälan-win-däx, a-wen-däx day a fäl wär-äksudäx mäjräd data-k, ed wär t-illa däx-isälan-wi-däx a-s wädden tössanäd sär-s e-d, økkasäx äššäk a-s isälan-wi-däx, wär jen däx-ufär.

27 Ämänokal-in Ägribba, tomanäd s-a-wa önnän ännäbitän, wädden?»

28 Iggäd-dd Ägribba älwäqq-wen s-Buləs, inn'-as: «Käyy, hannäyäx-käy, a øndärrän xas teçaläd ämoosäx älmässexi.»

29 Inn'-as Buləs: «Jer-a øndärrän wäla a hin-illan i-ad-tumasäd a-wen, daläx-ak Mässinäx käyy hakd älzämaḡät wa hi-äsijädän, ad-där-i taləhəm härät iket-net, a säl tišəm-ti-däx hi-hänen.»

30 Issəmdä Buləs mäjräd-wen-däx xas, ibdäd ämänokal Fistus hakd Ägribba d-Berenis, təlkäm-asän day tamətte,

31 zəjjärän äddinät, tinmännin: «Ähaləs-i-däx, wär t-illa a iḡsad t-äsinähäjjän d-tamättant wäla tišəm.»

32 Inna Ägribba i-Fistus älwäqq-wen: «Ennär wädden teḡäre-i ija ähaləs-i-däx i-Qäyšär wa n-ämänokal mäqqärän, itwəyy'-in.»

27

Asikəl n-Buləs s-Roma

1 Täwwäd-dd täqqän ta n-tikawt n-äkall wa n-Iṭali xas, jän käl-əlaxəkum Buləs d-käl-takärmüt wi iyyädnen däx-ifassän n-käbtän s-isəm-net Yulyus, ønta a ännihädän fäll-ejhän n-ølyøskär wa s-isəm-net: «Wa tän-ojārän».

2 Nəjjäš turäft n-aman jat isəm Adäramit, nəkkä äkall wa n-Azya, näddeew däx-asikəl-nänäx d-Aristarəq wa n-Täslonika.

3 Ašäl wa ilkämän i-wen, näsjän däx-teje ta n-Sidon. Ämoos käbtän Yulyus äwadəm s-ikna Buləs øjjärüzät, iglä fäw har t-ikfä turhajät n-ad-äkk imuzäyän-net wi hänen aḡrəm-en i-ad-has-arəjän däx-asikəl.

4 Nəfäl dihen, nällil asälim n-aman, nämsadäx i-awtəl wa n-Qəbrus i-ad-nəmjušət d-aḡu d-tinäzzämären-ti dd-bahhəlnen i-turäft.

5 Nəjläy ḡarät-a-wen ejärew wa səmmän ošälän däx-äkall wa n-Silisi d-Banfəli, näsjän däx-taḡrəmt ta n-Mira təhät äkall wa n-Lisya.

6 Ijräw käbtän-nänäx dihen turäft n-aman təkkat Iṭali, ij'-anäx däx-s.

7 Nəjä išilan näsilaläm sollan fäll-aman har šärnaš d-nänmawäd d-aḡrəm wa n-Känida, igdäl-anäx øššuhu n-aḡu ad-nakəy xas, närmäs tamdujt ta n-ajus n-äkall wa n-Kritus, nəkkä dawa-s har nämsadäx d-Sälmuni.

8 Šärnaš d-nällil asälim n-ejärew har dd-näwwäd edägg ijan isəm: tasiənt ta n-tihusay, a-wen edägg, änimahəzän d-taḡrəmt ta n-Lazaya.

Anməntaš n-ejärew fäll-turäft n-aman ta iha Buləs

9 Nəja išilan s-əmmək-en-däx a-s fälla-näx änməntaš ejärew, nəjjäš miši, økäy fälla-näx day äzum wa n-tajrəst.

10 Dihen-däx, ad-äsmätär Buləs iməssukal wi iyyädnen hänen turäft n-aman, inn'-asän: «Meddən, hannäyax a-s asikəl-nänäx wär-mad-äj wäla šäḡsad d-miši; näkkäneḡ hakd a-wa ihän turäft, nəha miši d-šäḡsad-wen-däx.»

11 Mäšan ojar taflest ija käbtän a-wa has-innä u-taḡäya-net a-wa innä Buləs.

12 Ənhäyän a-s edägg-wa-däx äsjänän wädden edägg däx-isasakay äwadəm tajrəst xas, äsoḡälän tisdas n-turäft, ärmäsän tamdujt n-aḡrəm wa n-Fənikus daw-awtəl wa n-Kritus i-ad-däx-s səssikəyän tajrəst.

13 Ellan-t dihen-däx a-s dd-isräj ađu dd-ifalän ajus, orän-dd turäft, ärkăbän däx-a-s ällilän tasăja n-ejărew ed, äxelän äxlăsän däx-ăššar-net.

14 A  ndărr n đar t-a-wen-d x, tođ -dd f lla-s n t šikwalt t ššoohet s-itaw nna d x-T lyunanit: Erakilun.

15 Izz w t  ššah t-net tur ft, igl  d r-s em n n,  bas t-illa ere d x-s  nnih đ n.

16 Ija a-wen-d x har nok y af lla n-awt l wa n-Kluda, ij'-an x ađr m-en eff  as, n tt r  dd bara s-n nmaw đ d-is xlas wi h nen tur ft.

17  jr w n medd n ađkul n-as xl s wa n- nd rr n ih n tur ft,  st r kken-t d x-aman,  kr s n-t d x-tur ft s-iđunan, n đk l tisdas i-ad-t n t-is k f ađu i-ad- bas han x- zziw t ađu. N šinan j s- mm k-wen-d x har n nmaw đ d-Libya, noyya iman-n n x s-ašrut wa d x-w r š jr t n aman.

18 Ok y f lla-n x aš l imdan n bbill n d-ađu s- mm k-wen-d x, har han x-ilz m aš l wa iyy đ n, ad-hin-n j r ilal n wi h nen tur ft i-ad-tifsas.

19 Aš l wa s-k rađ, j r n-in inaxdim n a-wa  zzay n ih n tur ft iket-net.

20 N j   zz man w r n nhey t fukt w la etran, a ija a-wen-d x, itiw w -dd f lla-n x  ššah t n-ađu har  bas han x-ih  ere ijar n  t t ma n-t mudre.

21 Išilan-win-d x, n ssak y-t n w r t-illa a n kša, d x-a-wen-d x ad-dd-ibđ d Bul s, inn  i- ddin t: «Imidiw n-in,  nn r hi-t sij d m ih nnin a-s haw n- mm jr d x d x-awt l wa n-Kritus, w r n t j š miši d-š xšad ogđ h n d-a-wa-d x.

22  rheey f lla-w n  m ra, ad-hi-s jđ m: s ns t  nniy t-n w n,  đman x-aw n a-s w r t-illa i d x-n x mad-iba m šan, tur ft  nta,  kk s t  t t ma-net.

23  nfal l-ahi-dd  nj los n-M ssin x  nd had,

24 inn'-ahi: Bul s, w r t rm x d ed, w r t-illa ad-w r t bđed d dat-Q yš r wa n- m nok l m qq r n. Ad k y-iđl s M ssin x k yy d-im ssuk l wi d r-t ddew d.

25  as, imidiw n-in, kuy d t, w r t kkes m  t t ma,  flas x a-s M ssin x a-wa hi-inn , ad- j,

26 ilkam d x-n x ad-n s j n f ll-awt l iyy n.»

27 N ja eh đ-n n x wa s-m raw d- kkođ m šan,  zziw t-an x ađu h rwa f ll-ej rew wa s mm n s-itaw nna Ad rya, a-wen, d x-ej rew wa s mm n m qq r n n-Miditerani. Ebre n-ammas n-eh đ, ofr y n k l-tađ ya n-tur ft a-s ohaz n ed gg d x-w r  knen aman  jut.

28 J r n ađan d x-aman i-ad-s r-s  k t n t šš jr t n-aman, os n aman jan t šš jr t n-k rađ t tim rwen n-met r d- ssa.  gl n har dihen, ol s n d x ejer n-ađan- nnin d x-aman, im l-as n ider n-aman  m ra, d x-s n t t tim rwen n-met r d- ttam.

29  ksuđ n k l-tađ ya ad-tiđ w tur ft-n s n, t nk f i-tihun,  as, j r n  kkođ t tizolyawen d x-aman i-ad- h ln t tur ft,  qq l n đar t-a-wen i-teb dde n-aš l.

30 D x-a-wen-d x, ad-tatt r n k l-tađ ya  mm k s- jm đ n,  sr s n d x-aman as xl s  nd rr n, j n  saru n-a-s  rhan ad-hin-š š nk š n tizolyawen ti j n d x-aman i-ad- kn n t antum,  t t fn t tur ft.

31 Ilm d Bul s f ll-amsud-n s n  as, inn  i-k bt n d- ss rdusa: « nn i-medd n-n k, af l w r- qqim n medd n-wi-d x d x-tur ft, adiš,  kk s net  t t ma n-t mudre.»

³² Äytäsän ɵssärdusa darät-a-wen iɣunan n-asäɣləs wa ɵndärrän, oyyän-t iglä, äwwäyän-t aman.

³³ A ɵndärrän dat-äbaqqu n-tifawt, äsmätär Buləs imidiwän-net i-ad-əkšən härät fäl-a-s lan a iwwäðän märaw išilan d-əkkoɣ wär t-illa a ikkan imawän-näsän.

³⁴ Inn'-asän Buləs: «Ənfəwät iman-näwän s-härät iyyän, ɵfləsät a-s wär t-illa däɣ-wän-i s-mad-hin-iba wäla-däɣ emzäd iyyän ɣas däɣ-eyäf-net.»

³⁵ Inn'-asän Buləs a-wen-däɣ ɣas, idkäl-dd tijəlwen, ämmoy i-Mässinäɣ dat-äddinät wi hanen turäft, äzun-tänät darät-a-wen, ad-itatt.

³⁶ Tokäy-tän tarəmmex̄t, ad-tattän ɵntäneð-däɣ.

³⁷ Däɣ-turäft-en-däɣ, näwwäð sänatät timað n-ähaləs d-ɵssayät timərwen d-säðis.

³⁸ Älwäqq wa d-ɵyyəwänän äddinät, ɵssänɣälän-in älkäma däɣ-eyärew i-ad-səfsəsän turäft.

³⁹ Ja tifawt, ɵšlämän däɣ-ijəj taɣmärt däɣ-ijjət äkall mäšan wär-ɵssenän ma ämoos äkall-wen-däɣ. Ənnän ad-sär-s ɵnnäðän turäft, səjnən-tät dihen-däɣ kunta ämmukkän a-wen.

⁴⁰ Əkkäsän isässärän wi ittäfnen turäft, oyyän-tän-in s-aman, orän iɣunan wi n-taɣäya sasaxadnen turäft, jän tisdas i-aðu s-data n-turäft i-ad-tän-in-imhəl aðu s-edägg wa äqqurän ɵšlämän.

⁴¹ Diha-däɣ d-əkkän s-data a ɵndärrän ad-oðän fäll-härät n-tejeft, tɵntäm-asän turäft däɣ-äkall. Ittəytäy äkumkum-net däɣ-äkall hundäɣ har äbas timtəkwəy, irzä-dd daɣ ajilal-net fäll-äššahät wa ija anməntäs n-eyärew wa səmmän.

⁴² Ənhäyän ɵssärdusa a-wen ɣas, änmännakän i-ad-əjən iman n-käl-takärmüt i-udaɣ ad-ijmäð wäl' iyyän däɣ-eššaf,

⁴³ mäšan unjäy-asän käbtän s-a-wen fäl tärha-i ija i-Buləs. Dihen-däɣ ad-innä käbtän i-äddinät wi ɵssännen eššaf, ad-ɵyyən iman-näsän s-tizarät s-aman, ɵšyəfän s-asälim.

⁴⁴ Innä i-wi iyyäðnen, ad-əjən äddäbara fäl näyän iferəsän n-tisəjwen n-turäft wi dd-irza aðu. Əmmək-wen-däɣ a-s hin-əwwäðän iket-däɣ-näsän asälim n-aman, ɵddarän-äɣlasän.

28

Täsjan turäft n-aman ta iha Buləs däɣ-awtəl wa n-Malta

¹ Näɣläs-dd däɣ-a-wen-däɣ iket-däɣ-nänäɣ, nəzjər-dd aman ɣas, nəslä a-s awtəl wa däɣ-näsjan, isəm-net Malta.

² Äsmäjaren-anäɣ käl-awtəl-en, ɵssärɣän-anäɣ efew, nəzzäh sär-s iket-nänäɣ ed, iwat ajənna, ija esämed.

³ Ikkəmät-dd Buləs isuksukän s-äshäjäljäl efew mäšan, täkwättät-t taššält dd-təstəy tukəse n-efew, tärmäm däɣ-äfuss-net.

⁴ Ənhäyän käl-awtəl a-wen ɣas, ad-tinmənnin: «Ähaləs-i-däɣ, wär t-ih' äššäk a-s emäj j n-iman, ɵnta da-däɣ s-iket dd-iɣläs däɣ-aman mäšan, ilkäm-as-dd əɣədär n-a-wa iɣšäd i-Mässinäɣ.»

⁵ Irsäy-in Buləs taššält darät-a-wen fäll-iman-net, ännunnäzät-tät däɣ-efew, wär t-illa a has-täɣšad.

⁶ Ija a-wen ɣas, äsbälaläɣän käl-awtəl däɣ-Buləs, ija ɣur-sän a-s a ɵndärrän ɣas a has-in-äqqimän ihðəði, meɣ ämmüt älwäqq-wen-däɣ. Ähojän wär t-illa a ijan däɣ torda-näsän ɣas, ɵqqälän s-a-wa ɵnnän, ad-jannen ämära: «A-wa, härät däɣ-imälan wi n-išənnawän.»

⁷ Edägg-en, ohazän-t išəkraš n-ämānokāl n-awtəl s-isəm-net Bubləs. Isl'-anəx ɣas, əsməjarät-anəx s-ehän-net, nəssakəy ɣur-s kərađ išilan.

⁸ Nəll'-e dihen-dəx a-s tərməs tenəde təddewät d-tanənəxət abba n-ämānokāl. Os'-e Buləs, əswär-t ifassän-net, ittär-as dəx-Mässinəx, izzäy.

⁹ Äwwäyän-dd käl-äkall ɗarät-a-wen imarhinän-näsän, əzozäy-tän Buləs əntäned-dəx.

¹⁰ Əssəmyārän-anəx käl-awtəl en-dəx fäl təssəba n-a-wen-dəx. Nəssawəd tekle ɣas, jän-anəx əzzad igdähän i-a-wa hanəx-in-əqqimän dəx-asikəl.

Ujəš n-Buləs i-ayrəm wa n-Roma

¹¹ Šamad fälla-nəx okayän kərađ orän n-asikəl, ad-nəjrəw turäft n-aman təššiwwərat idmawän d-ismawän n-imālan n-eknewän wi s-itawänna: Kästur d-Boləkəs dd-falät Iskändərya, nəjjäš-tät, təssakəy ɗär-nəx tajrəst dəx-awtəl-wen-dəx.

¹² Nəfäl dihen, nəsjän kərađ išilan dəx-Sirakuz,

¹³ təzzar nəllil asəlim n-aman har Rajyo. Ašäl wa ilkämän i-wen, inkär-dd fälla-nəx ađu dd-ifalän əjus, izzəwät-anəx emänän har nəsjän dəx-Bəzula.

¹⁴ Nəjrəw dihen hərät dəx-ayətma-nəx dəx-əddin, əsməjaren-anəx; nəssakəy ɣur-sän əssəbox imdan. ɣur-sän en-dəx, ad-nərməs tamdujt ta n-Roma.

¹⁵ Əslän-anəx hərät dəx-əlməssexitän n-Roma ɣas, əlkədən-anəx-dd s-əssuk n-ayrəm wa n-Abyud, əssəlkədən-anəx-dd dəx iyyəd s-əssuk wa n-ayrəm wa n-kərađät tihənzubba. Inhəy-tän Buləs ɣas, irəš i-Mässinəx, ikf'-e a-wen-dəx əttəma d-əššahät əynayän.

¹⁶ Nəwwəd-in Roma ɣas, irɗa əlxəkum i-Buləs s-ad-ifär ehän n-iman-net, izzäy dəx-s ənta d-əssərdasi wa has-ijän ənniyät.

Ajəyh wa ija Buləs dəx-ayrəm wa n-Roma

¹⁷ Kərađ išilan ɗarät-a-wen, issəxərə-dd Buləs inušämän n-käl-Əlyəhud wi əzzəxnen Roma. Əžžəmməxän-dd sār-s ɣas, inn'-asän: «Ayətma-x, wär t-illa a əxšadəx s-əniməšrəyəx i-tumast-nənəx, wəla i-əlyədatän-nənəx. Ayrəm wa n-Yərussəlam a dəx-dd-əttərməsəx, əjjəšəx dəx-s takərmüt, ətwəjjəy jer-ifassän n-käl-Roma,

¹⁸ əttärän əntäned əlmud n-a-wa əxšadəx ɗarät a-s hi-əsiməjrädän məšan, wär t-illa ədɗərəra fäll-i əjrawän hi-əsinəhəjjän d-taməttant, əttärän fəw ad-hin-səwwəyyən məšan,

¹⁹ ənkärän-dd käl-Əlyəhud dihen fäll-i, unjəyän ərdän a-wa hi-əxtəsän käl-Roma. Ənhəyəx a-s wär t-illa a ərhan səl taməttant-in ɣas, təmoos-ahi teɣəre n-Qəyşär wa n-ämānokāl məqqārən ihän Roma təhəššilt. Məšan, həkd a-wen-dəx, wär-iha ənniyät-in n-ad-səwərəx tumast-in uɗlem wäl' iyyän.

²⁰ A-wa-dəx a fäl əsdərhənəx ahənəy-nəwän, səfhəməx-kəwän a-s tišəm-ti-hex, wär tənät-dd-orew sār-i a səl əttəma wa ohərəx d-käl-Işrayil iket-nəsän.»

²¹ Inn'-as əlzəməxət wa sār-s dd-əddewän: «Dəx-a-wa hanəx-dd-iqqälän nəkkənəd, wär t-təlla təkarɗe hanəx-dd-tosat dd-falät Əlyəhudəyät hanəx-təjat isəlan-nək, wär t-illa dəx ere nənhay dəx-ayətma-nəx dd-ifalän dihen hanəx-kəy-omalän wəla i hanəx-kəy-ozəmän.

²² Əməra, nəssof, ad-hak-nəsəll nəkkənəd iman-nənəx ed taggayt ta hed təglät fäll-tidət n-iman-net, nəssan a-s wär t-illa edəgg s-wədden əššunjen-tät dəx-s əddinät.»

²³ Ohärän dār-s darät-a-wen ašäl dāḡ-t-dd-mad-äqqəlän äddewän d-äddinät ojärnen wi dd-osänen äsihe-wa. Osän-dd ašäl-en, immöjräd-asän wa-dāḡ n-tifawt har toḡa tāfukt, itafässar-asän tijöttewen n-a-wa isaḡra, ixaṭṭāb-asän isālan n-Təmmənəya n-Mässināḡ d-a-wa innä alāmār wa n-Mosa d-ännābitän wi iyyäḡnen, isafham-tän daḡ a-wa ənnän fäll-ḠisaÄlmasex.

²⁴ Issətbät ašrut iyyän dāḡ-sän tənna-net, äsḡär-as ašrut wa iyyäḡän ulh-net, unjäyän omänän s-mäjräd n-Mässināḡ.

²⁵ A-s t-fälän äddinät, äzunän dāḡ-a-wa ordän fäll-Ḡisa Älmasex. Inhäy Buləs tāzune ta jān ḡas, inn'-asän: «Ijmaḡ-t äššāk a-s tidət a-wa innä Unfas Šaddijän i-imārāwän-nänāḡ s-emm n-ännābi Saya† a-s t-äšmašäl Mässināḡ. Äzzāman-en, inn'-as:

²⁶ <Ḡgləw, äkk äddinät-i-dāḡ, tənnəd-asän:

ad-sallām s-timəzzujen-nāwän māšan,
wār t-illa a mad-təfhəmäm,
ad-təswaḡäm s-tiṭṭawen-nāwän māšan,
wār t-illa a mad-tənhəyäm

²⁷ fäl-a-s tamətte-i, täḡär-ahi ulh-net,
täḡfäl-ahi timəzzujen-net,
täḡär-ahi tiṭṭawen-net i-ad-wār hənnəy,
wār səll,

i-ad-wār t-illa a isalmaḡän ulh-net,
i-ad-sār-i dd-tənnäḡ, zuzəḡäḡ-tät.> »

²⁸ Inn'-asän Buləs darät-a-wen: «Elməḡät, ḡur-ašäl-i-dāḡ a-s, əḡəllas wa kəwän-ikfa Mässināḡ, ikf'-e daḡ i-inəzzulam† -i has-e-səjəḡnen.» [

²⁹ Issəmda Buləs tənna n-a-wen ḡas, fälän-t käl-Älyāhud ämiḡännän jer-iman-nāsän.]

³⁰ Izzāḡ Buləs dāḡ-ehän-wen-dāḡ ifār har dāḡ-s ässakäy əssin iwəṭyan əmdanen. Ijraw iman-net, ehän-en-dāḡ, a dāḡ-t-dd-tisən äddinät iket-nāsän wi ärhānen ahānay-net,

³¹ ixaṭṭāb-asän isālan n-Təmmənəya n-Mässināḡ, isaḡr'-en, wār t-illa daḡ ere has-igdalän tənna n-a-wa s-irha, ad-tän-änn fäll-Emäli Ḡisa Älmasex.

† **28:25 28:25** A-wa ännābi dd-äzzarän i-Ḡisa, äloläy dāḡ-isālan-net əssayät timaḡ n-awätay dat-tiwit-net. † **28:28 28:28** — Ḡur-käl-Älyāhud, ere wārän ämoos ägg-Älyāhud s-aläšäl meḡ ere wārän ilkem i-äddin-nāsän, iket-net, änāzzalim a ämoos. A-wen-dāḡ a fäl tiwsaten ti iyyäḡnen iket-nāsän, ti n-inəzzulam. — Ašäl-i-dāḡ, änāzzalim, äkafār (ere wārän issen s-Mässināḡ).

Täkarde-ta iktäb Buləs i-käl-Roma

Äšajəš

¹ A-wa näkk Buləs wa n-akli n-ŸisaÄlmasex dd-iŸra s-iman-net i-ad-umasəŸ änämmašul ixatṭābān Älənžil n-MässinəŸ i-dägg-adəm.

² Älənžil, isälan-net, äru d-äsjar MässinəŸ äṭṭāma-näsän däŸ-өлkəttābān wi šäddijnen өktābān ännābitān

³ i-ad-өjən däŸ-sän isälan n-Ÿisa Älmasex wa n-Rure-s n-MässinəŸ.

⁴ Ÿisa, s-eŸäs-net, ahäya n-ämānokāl Dawəd a ämoos mäšan, tumast-net i-Rure-s n-MässinəŸ, äsdättāt-tāt MässinəŸ s-tärna n-Unfas Šäddijän-i t-dd-issənkarän jer-inəmmuttan.

⁵ Təssəba n-Ÿisa Älmasex-i n-Emäli-nänəŸ-en-däŸ, ad-fälla-nəŸ dd-äzzäbbāt MässinəŸ ännuŸmät-net, ij'-anəŸ inəmmušal-net i-ad-amənnät tiwsaten ti n-inəzzulam,† ämašäl-nät erhet-net, səmŸärnät isəm-net.

⁶ Inəzzulam, käla tän-ham käwāneḍ-däŸ, mäšan, ašäl-i-däŸ, iŸr'-iwän-dd Ÿisa Älmasex s-iman-net.

⁷ Təssəba n-a-wen-däŸ a fäl hawän-in-kattābäŸ täkarde-ta-däŸ, käwāneḍ-i n-iməššeddəjän ikna MässinəŸ tärha əzzaŸnen aŸrəm wa n-Roma. ÄhuuləŸ-käwän-in, ikf'-iwän MässinəŸ-i n-Abba-nänəŸ d-Emäli Ÿisa Älmasex ännuŸmät d-älxer.

Tenere n-käl-Roma ta tärmäsät Buləs

⁸ DäŸ-eŸäf n-a-wa s-ärheŸ ad-hawän-tän-ännəŸ, ärheŸ ad-umayəŸ i-MässinəŸ däŸ-idəm n-ŸisaÄlmasex fäl-a-s, wär t-ill' äwadəm däŸ-äddunya s-wädden isl' isälan n-iqqud n-immun-näwän.

⁹ A-wa heŸ däŸ-asəssiwäḍ n-isälan n-Älənžil n-Rure-s n-MässinəŸ, heŸ-t s-ulh imdan. MässinəŸ-i ŸabbädäŸ s-ulh imdan a-s tajuhe-nin, wär käla okäy ašäl s-wädden kittəwəŸ-käwän, təddaləŸ-awän-t

¹⁰ hak ašäl n-a-s kunta erhet-net a-wen, isärŸəset-ahi əmmək fäl käwän-in-ökkeŸ.

¹¹ Ijmad-t äššäk a-s äsidärhänəŸ hullan ahänay-näwän, əzzəyəŸ-käwän, äkfäŸ-käwän härät däŸ-isuf wi hi-ija Unfas Šäddijän i-ad-iššuhət immun-näwän,

¹² tənfüm-ahi, ənfəwəŸ-käwän näkk-däŸ däŸ-immun wa hanəŸ-osaŸän.

¹³ Ayətma-Ÿ, ärheŸ ad-təssanäm a-s äru d-äsdärhänəŸ ad-käwän-in-äkkäŸ mäšan, har ašäl-i-däŸ, wär-otes MässinəŸ a-wen. ÄsidärhänəŸ hullan ad-ikrəš älxidmät wa heŸ fälla-wän älfäyda s-əmmək wa s-t-ikrəš jer-tiwsaten ti iyyäḍnen n-inəzzulam

¹⁴ fäl-a-s däŸ-isälan wi n-Älənžil, wär t-illa ere s-wädden ila fäll-i älyar jer-käl-iŸärman wäla käl-ejef, jer-älŸulam wäla älzuhäl.

¹⁵ Iba n-a-zəmmäzli n-äddinät-en-däŸ a sār-i dd-oräwän derhan n-ad-käwän-in-äkkäŸ käwāneḍ-däŸ i əzzəŸnen Roma, äjäŸ-awän isälan n-Älənžil.

† 1:5 1:5 — Ÿur-käl-Älyähud, ere wärän ämoos ägg-Älyähud s-aläšäl meŸ ere wärän ilkem i-äddin-näsän, iket-net, änəzzalim a ämoos. A-wen-däŸ a fäl tiwsaten ti iyyäḍnen iket-näsän, ti n-inəzzulam. — Ašäl-i-däŸ, änəzzalim, äkafär (ere wärän issen s-MässinəŸ).

Immun a ihakkän idəm dat-Mässinäx

¹⁶ Wär-äkrakädäx Älənžil ed ənta a-s tärna ta s-iḡalläs Mässinäx ere sār-s omänän-däx, käl-Älyähud təzzar əlkämän-asäl inəzzulam.

¹⁷ Älənžil-en-däx a hanäx-isalmadän mi ilan idəm dat-Mässinäx s-əmmək wa s-tän-ənnän əlkəttabän n-Mässinäx a-s ənnän:
«Ḳur-sänto har sämdo,
immun a ihakkän ägg-adəm idəm dat-Mässinäx
i-ad-äj tämudre ta fälla-s irha Mässinäx.»

A-wa tamaşalän inəzzulam

¹⁸ Tidət, Mässinäx, izazäbbat-dd aḡkär-net fäll-dägg-adəm däx-təssəba n-iba n-tuksəda ta t-wär jen d-iba n-iqqud däx-a-wa tamaşalän, əgdälän i-iman-näsän tidət, ənkazän-tät daḡ i-äddinät wi iyyäḡnen s-a-wa läbasän tamaşalän.

¹⁹ A-wa s-ämiḡatär ägg-adəm i-ad-sār-s izzəy Mässinäx, inbaj tiṭṭawen ed äsnäfaläl-t-dd.

²⁰ A-wa dār-oläh Mässinäx, wär t-illa ere t-inhayän s-tiṭṭawen-net mäşan, tärna-net ta täḡlälät, tumast-net i-Mässinäx, a-wen-däx iket-net, afäl däx-s äznäzjamät ägg-adəm, ad-t-inhöy däx-a-wa dd-ibna a-s dd-ixläk äddunya.

²¹ Təssəba n-a-wen-däx a fäl äbas t-illa asäru wäl' iyyän i-iba n-tuksəda-net ed, dägg-adəm, əssanän a-s Mässinäx ill'-e mäşan, unjäyän s-ad-t-səmyārän wäla s-ad-has-umayän. Əzzəwen-tän erk inəzjam-näsän s-mäläyähna, oraw-dd sār-sän a-wen-däx tekke däx-tihay d-täḡart n-ulh.

²² Jan iman-näsän äddinät äzizäbbättnen musnät, a-s ija a-wen, irmas-tän iba n-tayətte.

²³ Ənnär lan tayətte, wär həkkən iroriyawän-näsän Mässinäx-i iḡlälän n-Mässi-s n-ännur, samäskalän-t älyibadät n-äşşänämän äşşiwwärnen dägg-adəm-i s-a ijan-däx, ad-tän-iba, ad-ḡabbädän taliwen d-igḡad d-irəzzejän d-izlulam.

²⁴ Inhäy Mässinäx erk əzzənəf wa əjjäşän ḡas, äsräs-tän, oyy'-en, iwway-tän aḡu, oşäl dār-sän ḡarät erk derhanän n-ulhawän-näsän, ad-samāḡdasän iman-näsän, şilləwnät-tän tikrukaḡ.

²⁵ Äsmättäyän tidət ta n-Mässinäx, jän-tät bahu; əqqälän-dd ḡabbädän amätäwäxlak, oyyän Ämaxlak-i änihäjjän d-təmmal härkuk. Amin!

²⁶ Təssəba n-a-wen-däx a fäl fälla-sän innäḡ Mässinäx, oyy'-en, oḡän däx-tikrukaḡ-tin-däx. A-wa issäxräm Mässinäx, ässiixlälän-t əntäned; əbdänät tiḡeḡen-näsän d-meddən-näsnät, oyyänät a-wa ilän əmmək, äqqälän-dd tinmökkinät jer-iman-näsnät.

²⁷ A-wen-däx daḡ a jän meddən-näsnät, järän-in a-wa dd-äzzäbbät Mässinäx aşäl äzzarän, ad-tän-işilləw a äsikärakädän. Oyyän meddən tiḡeḡen-näsän, izzəwät-tän iblis-näsän ad-itakk ähaləs-ähaləs, ämoos a-wen-däx tän-işlän älxəqq wa dār-änihäjjän imojjan-näsän d-təmyäre n-tanməşrayt-näsän.

²⁸ Şamad, unjäyän s-ad-uksadän Mässinäx, işläy-asän ənta-däx däx-xorəzzəma wa əkfän iman-näsän, immär härät tiyətwen-näsän, ad-tän-işilləw a äsikärakädän wärän itətwəjj.

²⁹ Äsisakäyän ulhawän-näsän däx-iba n-iqqud d-tälläbäst d-erk derhan, d-tismiten d-iji n-iman d-ikənnasän d-əkkäzzu d-erk inəzjam d-ukşaf.

³⁰ Ämoosän imawayän n-ännämima, äşşunjen Mässinäx, əkfärän, həlän, əḡnayän əttəkəbru d-ibərajän, äsisakäyän däx-musnät n-iji n-a-wa läbasän, inəbbudar iket-däx-näsän,

³¹ irmas-tän iba n-tayette, imärzan n-ärkäwäl, äqqurän, käwalän ulhawän-näsän, wär tän-ha tähanint.

³² Işl'-en a-wen-däx kud-däx əssanän a-s ilkam däx-sän äşşärexa n-Mässinäx ed iktab däx-mäjräd-net a-s äddinät wi şillun härätän-win-däx, əlhəllak ɣas a däx-sän ilkamän. Ässetän däx-a-wa ässuksädän tän-işlän har eqqas fäw a tājjan i-äddinät wi tamaşalnen a-wen-däx tän-işlän wärän il' əmmək.

2

Hak əwadəm d-a-wa has-jän imojjan-net

¹ Äywa, käyy-i isawarän äddinät wi iyyädnen udlem, ere tämoosäd-däx, äbas hak t-illa äsarü; dədi-däx fäw d-sawaräd äddinät wi iyyädnen udlem, ad-satbatäd a-s käyy iman-näk, iwar-käy udlem ed a-wa-däx tän-sawaräd a xaddämäd käyy iman-näk.

² Wär t-ih' äşşäk, nəssan iket-däx-nänäx, a-s äddinät wi tamaşalnen härätän-win-däx läbasnen, ad-tän-işrəx Mässinäx s-äşşärexa wär-iha bahu.

³ Uhen käyy, ma ɣur-k ijan? Käyy-i s-a-wa täjjäd, i läbasän, sawaräd udlem äddinät, torded a-s ad-täxləsäd däx-äşşärexa n-Mässinäx wa ilkamän?

⁴ Meɣ käyy şäɣnet, wär təssəfräräd təmɣäre n-milyaw wa ija Mässinäx d-tazidert-net d-maruşät-net? Äniihäjjä s-oräw-dd sār-k a-wen-däx tämujrizt, tutabäd.

⁵ Mäşan, käyy wa hannäyäx, äqqur ulh-näk, wär tärhed ad-tutabäd. Äşşar ɣas n-Mässinäx a-s ilkam ad-t-dd-izəzzəbbət fälla-k aşäl wa n-aḍkär-net d-äşşärexa-net wa oɣädän.

⁶ Aşäl-en, hak əwadəm d-a-wa has-jän imojjan-net.

⁷ Äddinät-wi äkoyädnen däx-amışəl n-a-wa oläxän d-təmmal n-Mässinäx d-semɣar-net d-umäx i-tämudre ta n-tidət, ad-tän-äkf Mässinäx tämudre ta täxlälät

⁸ mäşan, wi has-äffüllägnen, ässofnen iba n-iqqud uhen tidət, ad-tän-isəlməd a-s wär has-ijreɣ əlxal-näsän, izəzzubbət-dd aḍkär-net fälla-sän.

⁹ Ad-tärməs tissust d-tizɣurt e d t-illäm ägg-adəm itamaşalän a läbasän, isänt a-wen s-käl-Älyähud, akəy s-tiwsaten ti iyyädnen n-inəzzulam.†

¹⁰ Mäşan, äddinät-wi tamaşalnen a-wa oläxän, ad-əjrəwän semɣar d-təmmal d-älxer ɣur-Mässinäx, isänt a-wen s-käl-Älyähud, akəy s-tiwsaten ti iyyädnen

¹¹ fäl-a-s Mässinäx, wär-əzmäzläy äddinät.

¹² Äddinät wi ofänen abäkkad a-s ija a-wen əzhalän i-a-wa innä alämär n-Mässinäx wa dd-əzzäbbät fäll-ännäbi Mosa, ad-dd-ətwäxrən s-äşşärexa əntäneḍ-däx mäşan, wär mad-ətwəşrəxän s-tijəttewen ti n-alämär-wen-däx. Käl-Älyähud-i ha tijya n-a-wa innä alämär, wär t-illa a hasän-idrajän däx-s, tijəttewen n-alämär-en-däx a-s tän-e-işrəx Mässinäx.

¹³ Wädden äddinät-wi sajadnen i-a-wa innä alämär s-timəzzujen-näsän a he-əkrəşnen idəm ɣur-Mässinäx, änn-ak, wi has-sajadnen s-ulhawän-näsän, tamaşalän a-wa däx-s iktabän, a data-s-e-əkrəşnen idəm.

¹⁴ Kunta tiwsaten ti n-inəzzulam, wär-əssennät s-alämär wa dd-əzzäbbät Mässinäx fäll-ännäbi Mosa, mäşan tamaşalnät d-iman-näsnät

† 2:9 2:9 – ɣur-käl-Älyähud, ere wärän ämoos ägg-Älyähud s-aläşäl meɣ ere wärän ilkem i-äddin-näsän, iket-net, änäzzalim a ämoos. A-wen-däx a fäl tiwsaten ti iyyädnen iket-näsnät, ti n-inəzzulam. — Aşäl-i-däx, änäzzalim, äkafär (ere wärän issen s-Mässinäx).

däx-älzähälät a-wa däx-s ätwännän, ässiilmäd-anäx a-wen-däx a-s, ɵssannät a-wa oläxän d-iman-näsnät, ämešälñät-t.

¹⁵ Ěnta-den-däx a-wa hanäx-isalmaidän a-s a-wa innä alämär n-Mässinäx, iktab-t däx-ulhawän-näsnät i-ad-t-ämašälñät, ässiilmäd-tänät däx ɵnniyät-näsnät sär-s, mäqqär däx iššaki wa jänät däx-iman-näsnät, tänät-isalmaidän s-išk wa jänät kud-däx dehiyyän unjaynät s-a-wen.

¹⁶ Wär t-illa a-s wädden ilkam ad-itbət, infiləl-dd iket-däx-net ašäl wa ilkämän d-e-išräx Mässinäx äddinät s-ŸisaÄlmasex, isənnəfiləl-dd a-wa iffärän däx-ulhawän n-dägg-adəm s-ɵmmək wa s-tän-innä Älənžil-i xaṭṭäbäx.

Uḍlem wa iwärän käl-Älyähud

¹⁷ Käyy-i ijännən ägg-Älyähud a tämoosäd, tabärajäd n-a-s il'-ik Mässinäx, täsifälläd fäll-a-wa s-tamašaläd a-wa innä alämär wa n-Mosa,

¹⁸ ija xur-k a-s tɵssanäd a-wa fälla-k irha Mässinäx, issəlmäd-käy alämär jer-a-wa oläxän d-a-wa läbasän,

¹⁹ təkkašäd äššäk a-s äddinät wi iyyäḍnen, iməddorxal, käyy a-s ämalway-näsän, käyy a-s ännur i-wi ɵzzäxnen däx-tihay;

²⁰ tärhed tumast n-älyalim i-älzihal, emässäxär n-aratän, təflasäd iman-näk s-tidət ta käy-issäxra alämär wa n-Mosa.

²¹ Uhən käyy-i s-härkuk tɵmmaxäd i-ere tɵssäxrad, ma s-hak-indar ad-säxred iman-näk? Xaṭṭäbäd i-äddinät iba n-tikra, a-s ija a-wen, tikəred;

²² xaṭṭäbäd-asän täxärme n-ɵzzəna, a-s ija a-wen, zinnud; janned-asän, uday ad-xabbädän äššänämän, a-s ija a-wen, tikəred a-wa ihän ihänan wi däx-ɵzzäxän äššänämän-win-däx, ad-t-in-žanšed.

²³ Tabärajäd n-a-s tɵssanäd alämär wa n-Mosa, a-s ija a-wen, tänimäšräyäd-as; ɵnta-den-däx iba n-tuksəḍa-näk i-Mässinäx.

²⁴ A-wen-däx a fäl inna əlkəttab n-Mässinäx däx-isälan n-käl-Älyähud:

«Təssəba-näwän käwäned-di-däx

a fäl wär-ätwäsämjar isəm n-Mässinäx jer-inəzzulam.»

Wär t-illa a ihan amili wäla iba-net

²⁵ Tidət, amili infa härät afäl itamašäl äwadəm a-wa fälla-s ifraḍ alämär mäšan, ere irazzän a-wa innä alämär, wär-ižley amili-net d-iba-net

²⁶ fäl-a-s, kunta ere wa wärän ämeläy, ilkam i-a-wa ifraḍ alämär fäll-ägg-adəm, ajän wädden dat-Mässinäx, ad-äbas izlay d-wa ämeläyän.

²⁷ Käwäned, tɵssanäm a-wa fälla-wän ifraḍ alämär, samalayäm iman-näwän, a-s ija a-wen, wär käwän-išla ar teräzze n-a-wa fälla-wän ifraḍ alämär, kunta inəzzulam ɵntäned, wär səmiləyän iman-näsän mäšan, tamašalän a-wa fälla-sän ifraḍ alämär, ɵntäned-en-däx a-s ilkam ad-käwän-səḍləmän dat-Mässinäx, səkkərukəḍän-käwän.

²⁸ Säjdät ämära, tidət, ɵnta da: ägg-Älyähud wa n-tidət, wädden ere iwar əšwäl ilan mänhoy wäla amili, änn-ak,

²⁹ ämoos-t ere wa s-äsmaläy Mässinäx ulh-net, wädden ere wa xur-ija a-s itamašal a-wa innä alämär däx-täkarḍe-net. Ěnta-den-däx, ägg-Älyähud wa n-tidət. Ḍarät-a-wen däx, amili wa n-tidət, a t-ämoosän a-wa ija Unfas Šäddijän n-Mässinäx däx-ulh n-ägg-adəm wädden härät n-taknəšset jat däx-taxəssa. Amili wa dd-oräw Unfas Šäddijän s-ägg-adəm, kud irha wär-ikreš idəm dat-dägg-adəm, ad-t-ikreš dat-Mässinäx.

3

Wär t-illa ere s-wädden iwar-t uđlem

¹ Adiš, ɛndek abäraj wa ihän tumast n-ägg-Älyähud? Meş daş: amili-i-däş, ma infa?

² Ila tänfo mäqqärät ed käl-Älyähud ɛntäneđ a fäll-dd-äzzäbbät Mässinäş mäjräd-net.

³ Nössan a-s wär has-äsjadän, ed, wär-ämeşälän a-wa hasän-innä mäşan hakd a-wen-däş, ajän a-wen a hin-äsibättaşälän älşädalät n-Mässinäş-hasän? Äbo, wär-ämmukkän a-wen ed,

⁴ kunta dägg-adəm razžän däş-tənnä-näsän, Mässinäş, tidət şas a t-dd-təffälät s-əmmək wa s-tän-innä əlkəttab n-Mässinäş a-s innä:

«Mässinäş, a innä-däş, oşad.

Ere has-işkän daş,
ad-fälla-s ikrəş tidət.»

⁵ Mäşan, kunta iba n-iqqud-nänäş ɛnta, a ızazharän iqqud wa n-Mässinäş, ma nənnä däş-a-wen? Ämära, edäwänne wa itäjğ ägg-adəm däş-isəstanän-net a hawän-tajğäş näkk-däş. Ak ajän Mässinäş-i-däş, wär-oşed fäl-a-s innin itakkäs däş-näş älxaqq?

⁶ Aa fäw ed ɛnnär ha wäla-däş tafräşyt tiyyät şas Mässinäş, ɛndek əmmək wa s-mad-işräş äddunya?

⁷ Ämmukkän a-s däş-a-wa jänneş, əllan-t äddinät jannänen a-s: kunta bahu wa janneş, isinfiləl-dd tidət i-ad-iwwađ semşar fäll-isəm n-Mässinäş, adiš mafäl hi-itəggar uđlem, tumasäş anəsbäkkad bännan?

⁸ Adiš şamad isälan ɛntäneđ-den-däş, nilbaset şas i-ad-dd-tarəw təlläbäst-nänäş-en-däş imärkedän. Tordam a-s bahu şund-wen-däş, häläş ad-t-səssäşräş. Äddinät wi tiwəynen ännämimatän şund-win-däş, iskar äşşäreşə wa dər-änihäjjän şur-Mässinäş.

A-wa s-olähän dägg-adəm

⁹ Adiš, ɛndek tidət däş-a-wa-däş? Ak, ajän näkkäneđ-i n-käl-Älyähud, nufa äddinät wi iyyäđnen? Ma n-əmmək? Əssəjrähäş-käwän-in a-s käl-Älyähud hakd inəzzulam,† wär-əşleyän, ännihäđ däş-sän abäkkad iket-däş-näsän.

¹⁰ Isälan n-a-wen-däş a däş-hanäş-ässewäl əlkəttab n-Mässinäş a-s innä:

«Wär t-illa ägg-adəm oşadän,
wäla-däş iyyän şas,

¹¹ wär t-illa-i ijrahän härät,
wäla-i itattärän ad-ukşad Mässinäş.

¹² Oşkan iket-däş-näsän, wär-äşnen härät,
wär tän-iha wäla-däş iyyän şas itamaşälän a-wa oläşän.

¹³ A-wa dd-izajğärän imawän-näsän,
ija märkähaw wa ija azəkka ämerän;
ilsawän-näsän a-s saswadän äddinät;
a-wa jännen s-idlay-näsän,
irn' ihäräynänän n-emäjäl.

¹⁴ Laqqänän äddinät, sasmamän fälla-sän
s-a-wa dd-ijammäđän imawän-näsän,

† 3:9 3:9 — Şur-käl-Älyähud, ere wärän ämoos ägg-Älyähud s-aläşäl meş ere wärän ilkem i-äddin-näsän, iket-net, änäzzalim a ämoos. A-wen-däş a fäl tiwsaten ti iyyäđnen iket-näsän, ti n-inəzzulam. — Aşäl-i-däş, änäzzalim, äkafär (ere wärän issen s-Mässinäş).

15 ärorädän iji n-iman,

16 edägg əmmärän-däx,

wär däx-s dd-tiyyən a säl ahälak d-älmäşşibät.

17 A-wa s-itawänna tabarät n-älxer, wär hen zäbo-net,

18 wär ha tukşəda n-Mässinäx tiṭṭawen-näsän.»

19 Nəssan ya a-s a-wa innä alämär wa n-Mosa iket-net, inn'-en i-äddinät əssannen s-alämär-en, hakd a-wen-däx, han-tän-i äsisändärnen. A-wen, äduuttät i-ad-wär-itəmmil äwadəm itabarajän dat-Mässinäx ed äddunya iket-däx-net, a iwar uḍlem dat-Mässinäx.

20 A-wen älmäxna-net a-s wädden amişəl n-a-wa innä alämär a hanäx-ihakkän idəm dat-Mässinäx ed wär t-ih' äşşäk a-s a-wa innä alämär, indär i-dägg-adəm ad-t-ämaşälän. Ənta-den-däx a-wa ässiitbätän a-s ägg-adəm-i-däx, tidət-däx a-s anäsbäkkəḍ a ämoos.

Immun a ihakkän ägg-adəm idəm dat-Älmasex

21 Ämära, a-wa hanäx-ihakkän idəm dat-Mässinäx, äsnäfaläl-anäx-t-dd. Iktab däx-alämär d-a-wa ənnän əlkəttabän wi n-ännäbitän,

22 äsdätten iket-däx-näsän a-s immun s-ḶisaÄlmasex a ihakkän imunənän idəm dat-Mässinäx, a-wen, wär sār-s izley dägg-adəm.

23 Dägg-adəm iket-däx-näsän a ofän abäkkəḍ, ibḍ'-en a-wen d-ännur n-Mässinäx

24 mäšan, hakd a-wen-däx, ixtäs Mässinäx däx-ännuymät-net n-a-s ere omänän s-Ḷisa Älmasex-däx, ad-ikrəş idəm dat-Mässinäx ed ämoos-as Ḷisa Älmasex, Ämaşlas wa has-in-inaşşän ibäkkəḍän-net bännan.

25 Mässinäx däx-tärha-net i-iqqud, ija Ḷisa tasəbdärt i-ad-isəlməd s-iqqud, inxäl ašni-net fäll-tajəttewt, ämmut däx-idäggan-nänäx i-ad-izəl ibäkkəḍän-nänäx. Ibda, Mässinäx däx-tazidert-net, wär-işreḡ ibäkkəḍän wi ämeşälän äddinät

26 mäšan ämära, takute n-täfaşke-ta-däx ijä a hanäx-salmaqät s-iqqud n-a-wa ija, a-wen-däx a hanäx-isalmaqän a-s ila tärna n-ad-äkf idəm dat-Mässinäx i-ere wa omänän s-Ḷisa.

27 Əndek ḡas a-wa däx-mad-äbbäräj ägg-adəm? Wär t-illa ed ämära, immun s-ḶisaÄlmasex a iḡalläsän wädden amişəl n-a-wa ifrəḍ alämär.

28 Ənta-den-däx a-wa hanäx-isawännen a-s: immun a ihakkän ägg-adəm idəm dat-Mässinäx wädden amişəl n-a-wa fälla-s ifrəḍ alämär.

29 Meḡ daḡ a tordam a-s Mässinäx-i-däx, i n-käl-Älyähud wädden in-əzzulam?

30 İ näsän lab iket-däx-näsän ed Mässinäx, iyyän ḡas, ənta a ihakkän ere wa sār-s omänän idəm, tawset t-lät-däx, jer-ti n-käl-Älyähud-i jänen amili hārät wäla ti n-inəzzulam-i wären əja amili hārät.

31 Ajän a-wen-ş älmäxna-net a hin-ikkasän alämär wa n-ännäbi Mosa fäl-a-s innin nənna a-s immun a ih' älfäyda? Äbo, wär nənnä a-wen, alämär, ih' edägg-net.

4

Älmital wa hanäx-ämoos Ibrahim

1 Ämära, ännäbi Ibrahim-i hanäx-äshäyāwän, ma däx-s-e-nänn, ma t-ikfän idəm dat-Mässinäx?

2 Ənnär timaşalen-net a t-əkfänen idəm dat-Mässinäx, umas-as a-wen abäraj, mäšan, wär-äddobät a-wen dat-Mässinäx

3 ed, əlkəttab n-Mässinäx iman-net a hanäx-innän a-s:

«Omän Ibrahim s-Mässinäx, ikräš data-s idəm.»

⁴ Ägg-adəm ya, afäl ixdam härät, timzal-net dihen, wädden bännan, äniihäja d-älxaqq n-tide-net

⁵ mäšan ägg-adəm, immun-net s-Mässinäx a t-ihakkän data-s idəm, wädden älxidmät ija s-ässhät-net. Enta-den-däx əmmək wa s-ihakk Mässinäx idəm i-wi wären äddin.

Təttəlal ta hanäx-əmoos Dawəd

⁶ Däx-təssəba n-a-wen-däx ijarräw äwadəm ikrašän idəm xur-Mässinäx wäla imärkedän a fäl innä ämänokal Dawəd:

⁷ «Təndəđ i-wi s-hin-inša Mässinäx erk imojjan-näsän, omäs-in ibäkkadän-näsän,

⁸ təndəđ i-wa s-hin-inša Emäli ibäkkadän-net, wär tän-dd-iđkel däx-međan.»

Amili, wär-ihəkk idəm dat-Mässinäx

⁹ Äl-xer-wen-däx, ajän wädden, ill'-e fäll-wi ämeläy-nen hakd wi wären ämeläy? Wädden, ätwänn'-anäx a-s:

«Omän Ibrahim s-Mässinäx, ikräš data-s idəm.»

¹⁰ Əmme d-ikräš Ibrahim idəm-wen-däx dat-Mässinäx? Ak ajän a-s t-ikräš, äzizäbbät-dd Mässinäx amili mex? Äbo, a-s ikräš Ibrahim idəm dat-Mässinäx, wär fälla-s ins' absär.

¹¹ Šamad oman s-Mässinäx, ikräš xur-s idəm, ad-ämeläy i-ad-umas a-wen tamätart tässitbätät idəm wa ikräš. Otäs Mässinäx s-a-wen-däx ad-umas Ibrahim abba n-e d t-illäm amumən däx-təssəba n-ad-xur-s əkrəšan wi ämeläy-nen hakd-däx wi wären ämeläy idəm

¹² s-əmmək wa s-t-xur-s ikräš Ibrahim-i s-ənta a-s abba n-äddinät-wi wären äsfälla fäll-amili, änn-ak wär-omenän ar s-Mässinäx s-əmmək wa s-sär-s omän Ibrahim-i n-abba-nänäx-i xur-s ikräšan idəm härwa wär t-immer absär.

Immun a ihakkän ägg-adəm ärkäwälän wi ijjäš Mässinäx

¹³ Ijjäš Mässinäx ärkäwäl i-Ibrahim, inn'-as, ad-ikus äddunya ənta d-ihäyawän-net mäšan, täkasit-en, wädden alkum i-a-wa innä alämär a has-tät-e-ikfən, immun s-Mässinäx d-idəm wa xur-s ikräš a has-ijrəwän a-wen.

¹⁴ A-wen-däx afäl kunta täkasit-ten-däx, alkum i-alämär a-s əssəbab-net, adiš ma infa immun s-ŸisaÄlmasex ed, ärkäwäl-wa t-ässitbätän, ibbətäl-in?

¹⁵ Mäšan, alämär, wär dd-itirəw sār-näx ar ađkär n-Mässinäx ed, ənnär wär dd-ixlek, wär-itəmməl musnät n-a-wa əmoos abäkkad, wär-itəmmil dihen ere iwar uđlem.

¹⁶ Däx-təssəba n-a-wen-däx a fäl, ere wa omänän s-Mässinäx xas a-s tətwar täkasit-ten-däx i-ad-tumas isuf ätiwäjjänen däx-ännuxmät-net. Ÿas, a-wen-däx a dd-orəwän a-s ärkäwäl wa ijjäš Mässinäx i-Ibrahim, oharän-t dār-s ihäyawän-net iket-däx-näsän jer-wi ətəfən alämär hakd wi omännen s-Mässinäx s-əmmək wa s-sär-s omän Ibrahim-i n-abba-nänäx iket-däx-nänäx.

¹⁷ Isälan n-a-wen-däx a fäl innä əlkəttab n-Mässinäx:

«Ibrahim, jex-käy abba n-abrək n-tiwsaten.»

Ÿas, Ibrahim-en-däx dat-Mässinäx-i dd-isankarän inəmmuttan, ixalläk-dd a wärän t-illa, a-s abba-nänäx däx-təssəba n-immun wa ija s-Mässinäx.

¹⁸ Ibda, wär t-illa ätəmə ijar Ibrahim mäšan, omän s-Mässinäx xas, ikräš-t. Təssəba n-a-wen-däx a fäl t-ija Mässinäx:

«Abba n-tiwsaten äjjootnen»,
inn'-as:

«Ad-ətəyän ihäyawän-näk, agdähän d-etran.»

¹⁹ A-s ijä Mässinäx mäjräd-wen-däx, ikn' Ibrahim tušäre, lämmed hullan däx-tayəssa-net ed ila temede n-awätay məšan, wär-ifnez immun-net. Saräta day i n-hänne-s, wär tänmäjjaj d-a-wen, äbas təjar ättäma n-ad-təkrəš ara.

²⁰ Hakd a-wen-däx, wär-ifnez immun n-Ibrahim, wär ij' äššäk däx-ärkäwäl wa has-ijjäš Mässinäx, ikf'-e immun-net äššahät n-ad-ifləs Mässinäx, ad-t-itəmmal,

²¹ ikkas äššäk n-a-s ärkäwäl wa has-ijjäš Mässinäx, ad-t-äj.

²² Təssəba n-a-wen-däx a fäl ikräš idəm xur-s, ädđin jer-imaɣdalän

²³ məšan, tifer-tin-däx n-a-s ikräš idəm dat-Mässinäx, wädden ənta xas a-s ätwännänät,

²⁴ ätwännänät-anäx näkkäned däx-i ässeđän Mässinäx däx-imaɣdalän däx-təssəba n-immun wa sār-s nəja ənta-i dd-issənkärän Emäli-nänäx Ƴisa jer-inəmmuttan.

²⁵ Ənta-en-däx a ämmun däx-təssəba n-timəntal n-ibäkkəđän-nänäx təzzar, issənkär-t-dd Mässinäx jer-inəmmuttan i-ad-nəkrəš idəm data-s.

5

Ušreyän n-immun, älxer d-Mässinäx

¹ Ämära d-hanäx-ikfä immun-nänäx idəm dat-Mässinäx, imäl-t älxer jere-näx dār-s däx-äddimmät n-Emäli-nänäx ƳisaÄlmasex,

² ənta-en-däx a hanäx-ijräwän tabarät s-Mässinäx i-ad-nəjrəw ännuxmət-net, intəm immun-nänäx. Ənta-en-däx ämära a-s ättäma wa fäll-näsifälla ed, nəjar ättäma n-a-s ilkam ašäl wa d-fälla-näx dd-mad-izəzzəbbət Mässinäx älxurmät-net, a-wen-däx a hanäx-äsihäläyläyän.

³ Älyizabät nənhäy-däx, ad-sār-näx-dd-arəw akuyəd däx-alkum-has,

⁴ arəw-dd sār-näx akuyəd, immun išmäran, arəw sār-näx a-wen, ättäma ädduutten

⁵ wär henät tikərras, itbat ed, Mässinäx iman-net a ijän tārha-net däx-ulhawän-nänäx s-tärna n-Unfas Šəddijän-i hanäx-ikfa.

Tārha n-Mässinäx i-dägg-adəm, Älmasex a tät-dd-äsnäfalän

⁶ Darät-a-wen-däx, Älmasex, härwa wär t-illa älfäyda hanäx-ihan a-wa-däx hanäx-ija abäkkəđ, tosä-dd täqqän ta issəbdäd Mässinäx xas, ämmut däx-äddimmät n-inəsəkəđän.

⁷ Izzəwät ere madän-äj iman-net däx-miši däx-təssəba n-iyyän kud-irha fəw umas a-s ənta a ojärän älɣədalät däx-äddunya, šärnaš d-e-isəmməskəl əwadəm iman-net iman n-iyyän, a ija däx-milɣaw-däx.

⁸ Məšan Mässinäx, ij'-anäx tārha-ta-däx s-härwa-däx nəmoos äddinät warän ibäkkəđän-näsän, ämmut Älmasex däx-təssəba-nänäx.

⁹ Ƴas, kunta nəkrəš idəm ogdähän d-a-wen-däx xur-Mässinäx däx-təssəba n-ašni n-Ƴisa Älmasex wa inɣälän, äb' ättäma n-əddəttu wa ija igguz wa hanäx-e-äj däx-äššar wa ilkämän.

¹⁰ Ƴas, kunta härwa nəmoos isənja n-Mässinäx, äznäməzäl-anäx Mässinäx d-iman-net s-taməttant ta ija Rure-s, äb' ättäma n-əddəttu wa ija anməzəl-nänäx dār-s däx-təssəba n-tanəkra ta dd-ija Ƴisa-i hanäx-iɣalläsän jer-inəmmuttan.

¹¹ A-wen-däx a fäl ämära, naddiiwät, näsifälla fäll-Mässinäx däx-idəm n-Emäli-nänäx Yisa Älmasex-i hanäx där-s äznämäzälän.

Adəm, ässoða dägg-adəm; Älmasex, issəbdäd-tän-dd

¹² Adəm a dd-orāwän abäkkad s-äddunya iket-net, abäkkad-wen-däx ofa, a dd-orāwän tamättant s-äddunya. Emmək-wen-däx a-s toða tamättant fäll-dägg-adəm iket-däx-näsän ed wär t-illa fäw ere s-wädden itra-dd abäkkad-wen-däx.

¹³ Abäkkad, ämoos a ihan äddunya härwa wär dd-äzzäbbät Mässinäx alämär fäll-ännäbi Mosa mäšan, ibäkkadän wi ämešälän äddinät dat-äzabbu n-alämär-wen-däx, wär tän-ixseb Mässinäx fäll-dägg-adəm

¹⁴ mäšan, hakd a-wen-däx, a-wen, wär hin-ikkəs a-s a dd-täxläk äddunya-däx, xur-Adəm hundäx har ännäbi Mosa, tamätten äddinät wären ämešäl abäkkad olähän d-wa ämešäl Adəm-i ämoosän tele n-wa s-ätwänna ilkam ad-dd-ass.

¹⁵ Ännuymät wa ihäkk Mässinäx bännan d-abäkkad wa ämešäl Adəm, wädden a oharän härät. Təssəba n-abäkkad wa ofa iyyän n-ähaləs, Adəm, a fäll-dd-toða tamättant fäll-e d t-illäm ägg-adəm, mäšan ännuymät wa ihäkk Mässinäx d-ännuymät wa sār-näx dd-orāw iyyän n-ähaləs, YisaÄlmasex, ih'-e älfäyda mäqqoorän.

¹⁶ A-wen wädden fäw a-s äddobät äwadəm ad-t-isənnəfäqq ed, däx-təssəba n-anməšri n-iyyän n-ähaləs xas a fäl dd-oða ässäreya n-Mässinäx-wa äswärän udlem e d t-illäm ägg-adəm mäšan, ännuymät wa dd-äzzäbbät Mässinäx, ikf'-anäx idəm xur-Mässinäx, äsdärfät-anäx.

¹⁷ Yas, kunta šaxšad n-iyyän n-ähaləs a sār-näx dd-orāwän tärna ta fällanäx təkraš tamättant, äb' ättäma n-ärrəzäx wa mäqqārän sār-näx dd-mad-arəw ännuymät n-Mässinäx wa hanäx-ikfän tämudre d-Təmmənəya däx-təssəba n-Yisa Älmasex-i n-iyyän.

¹⁸ A-wen-däx a fäl kunta šaxšad n-iyyän n-ähaləs a dd-orāwän udlem fäll-e d t-illäm ägg-adəm, orāw-dd sār-näx daḡ iqqud n-iyyän n-ähaləs, Yisa Älmasex, ajärəw n-idəm xur-Mässinäx d-tämudre täxlälät.

¹⁹ Emmək-wa-däx s-anməšri n-iyyän n-ähaləs a ijän e d t-illäm ägg-adəm anäsbäkkad dat-Mässinäx, əmmək-wen-däx daḡ a-s iqqud n-iyyän n-ähaləs, a ijrāwän idəm xur-Mässinäx i-e d t-illäm ägg-adəm.

²⁰ Alämär, äzzäbbät-t-dd Mässinäx fäll-Mosa i-ad-isəlməd dägg-adəm a-s inäsbäkkadän a ämoosän mäšan, əjut dd-ija abäkkad-däx, äsjät-dd fälla-s Mässinäx ännuymät

²¹ däx-ittus n-a-s əmmək-wa-däx s-käla fälla-näx ixkäm abäkkad-i sār-näx dd-orāwän tamättant, ad-fälla-näx ixkəm ämära ännuymät n-Mässinäx wa ihäkkän idəm xur-s i-ad-nəjrəw tämudre ta täxlälät s-ämoos Yisa Älmasex-i n-Emäli-nänäx əssəbab-net i-e d t-illäm ägg-adəm.

6

Tassayt d-Älmasex a ihakkän ašäl fäll-abäkkad

¹ Mäjräd-wa-däx, ma ämoos älmäxna-net? Adiš näkfet xas ämära iman-nänäx i-abäkkad i-ad-itwənhəy əjut n-ännuymät n-Mässinäx.

² Xäša! Näkkäneḡ-i ämmutnen däx-isälan n-abäkkad, əndek əmmək wa s-has-e nəddar, nəhakk'-e iman-nänäx daḡ? Wär-əmmukkän a-wen.

³ Ajän wär təssenäm a-s näkkäneḡ-i ätwäsälmäxnen däx-aman s-isəm n-YisaÄlmasex i-ad-där-s nasäx, atwəsəlməx-nänäx-en, älmäxna-net a-s nohär där-s tamättant ta ija,

⁴ ämoos a-wen šund ɣas a-s ašäl wa d-ijjäs Älmasex azəkka, nohär-t dār-s, nohär dār-s day tanäkra ta dd-ija jer-inəmmuttan s-əmmək wa s-dd-inkär jere-sän s-tärna n-älxurmät n-Abba Mässinäɣ i-ad-nəkrəš ašäl, nərjəš dəɣ-tämudre ta täynayät ihäkk.

⁵ Ädduuttät day a-s kunta nohär dār-s azəkka, ad-dār-s nahär day tämudre ed, inkär-dd jer-inəmmuttan

⁶ fäl-a-s nəlmədet a-s ägg-adəm n-anəsbäkkad wa s-käla t-nämoos, ätwäšläb d-Ÿisa fäll-tajəttewt i-ad-hin-tämmät tasna ta tärəwät i-ad-äba s-näkkilät i-abäkkad

⁷ ed, ere wa ämmun ya, ibda s-iyvät d-a-wa s-itawänna abäkkad.

⁸ ɣas, šamad ädduuttät a-s nohär d-Älmasex tamättant, adiš, ädduuttät a-s ad-dār-s nahär day tämudre ed,

⁹ nəssan day a-s Älmasex-i dd-inkärän jer-inəmmuttan, äbas ilkam ad-olas tamättant tiyyät fäl-a-s äbas fälla-s təla tamättant tärna.

¹⁰ Ija tiyyät tamättant i-ad-äbas ila abäkkad äššar; ämära dd-iddär, iddar i-amışəl n-erhet n-Mässinäɣ.

¹¹ A-wen-däɣ a fäl käwäned, äjät iman-näwän äddinät ämmutnen däɣ-isälan n-a-wa ämoosän abäkkad däɣ-a-s tämoosäm ämära äddinät əddarnen i-Mässinäɣ däɣ-tassaɣt-näwän d-Ÿisa Älmasex.

¹² Wär toyyem abäkkad ännihäd däɣ-taɣəssa-näwän-i fäll-la tamättant tärna i-ad-tättäläläm erk derhanän-net.

¹³ Wär toyyem ašrut n-taɣəssa-näwän wäl' iyyän ännihäd däɣ-s Iblis, isawäjj'-et a wärän oyed, änn-ak, äkfät iman-näwän i-Mässinäɣ, taləhəm d-äddinät äynaynen, təkfəm-t day tiɣəswen-näwän, tämašäläm iqqud.

¹⁴ Afäl jäm a-wen, wär däɣ-wän-e-ännähäd abäkkad ed, äbas t-təllam daw-älxikmät n-alämär, änn-ak, mäläm ämära daw-ännuɣmät n-Mässinäɣ.

Amumən, Mässinäɣ a-s äkkilät wädden abäkkad

¹⁵ Ma ämoos day älmäɣna n-mäjräd-wa-däɣ s-iket t-jeɣ n-a-s äbas-t-nəlla daw-alämär wa n-Mosa, nəmä-l-t ämära daw-ännuɣmät n-Mässinäɣ? Ak ajän a-wen älmäɣna-net, niðəwet ɣas däɣ-abäkkad? Xäša!

¹⁶ Ajän wär tössenäm a-s ere təkfäm tanhaɣt fäll-iman-näwän däɣ, ad-has-täkkäläm, ad-tamašäläm erhet-net, umas mässi-wän. Emmək-wen-däɣ day a-s afäl toyyäm abäkkad ännihäd däɣ-wän, ad-has-täkkäläm, arəw-dd sär-wän a-wen-däɣ tamättant. Umasät eklan n-Mässinäɣ i-ad-sär-wän dd-arəw a-wen tämudre toɣadät.

¹⁷ Naməlet Mässinäɣ ed kunta ibda täkkilem i-abäkkad, ašäl-i, tamašäläm s-taɣärha tøjlayät tijəttewen n-äddin ti təlmädäm.

¹⁸ Təntäšäm-dd iman-näwän däɣ-tanhaɣt n-abäkkad i-ad-däɣ-wän ännähäd ämära amišəl n-a-wa oɣädän.

¹⁹ Mäjräd šund wa tadjän dägg-adəm a hawän-in-jeɣ i-ad-tudabem ujreh n-isälan-wi-däɣ. ɣas, kunta ibda, täsnähädäm abäkkad däɣ-tiɣəswen-näwän s-iba n-təšədje d-azzal qarät a-wa äsikärakädän, adiš ämära, sənnəhäɣät iman-näwän däɣ-amišəl n-a-wa oɣädän däɣ-ittus n-ad-təzzäɣäm tämudre šäddijät.

²⁰ Ibda, a-s däɣ-wän ännihäd abäkkad, wädden wär täkkuläm däɣ-iji n-a-wa oɣädän mäšan,

²¹ əndek a-wa sär-wän dd-iššəšräy a-wen? Ajän wädden, wär sär-wän dd-iššəšräy a-wen ar täkrakiɣt n-a-wa tamašäläm ed tamättant dat-Mässinäɣ ɣas a sär-wän dd-orəw a-wen.

²² Mäšan ämära d-käwän-äsdärfät Mässinäx däx-isälan n-abäkkad, önta a-s tämoosäm eklan-net i-ad-tamašaläm a-wa šaddijän sär-wän dd-madän-isäxsäl tämudre ta täxlälät ed,

²³ älxaqq n-abäkkad, tamättant, mäšan, ännuxmät n-Mässinäx wa ihäkk bännan a t-ämoosän, tämudre ta täxlälät däx-idöm n-Emäli-nänäx YisaÄlmasex.

7

Älmital dd-izjarän adubən

¹ Ayətma-χ! Èssanäx a-s a-wa s-əkkey tønna-net däx-isälan n-a-wa innä alämär, wär has-təžheläm. A ikkäs äwadəm iddar-däx, ifrad fälla-s amišöl n-alämär.

² Älmital da ässiifhämän a-wen: tamädt tädobänät, a ikka ähaləs-net iddar, wär has-t-illa däx-a-wa innä alämär a däx-s tärkəb eχäf-net mäšan afäl ašäl wa d-äba ähaləs-net, təjräw ya iman-net, ad-äbas fälla-s ifrad a-wa innä alämär.

³ Afäl tärkäb eχäf-net däx-ähaləs-net, təglä, tējä adubən iyyän äynayän, a-di tözna mäšan, afäl ijmađ ähaləs-net äddunya, təjräw ya iman-net däx-a-wa ixtäs alämär däx-isälan-win-däx. Afäl toläs adubən çarät iba n-ähaləs-net, wär mad-has-umas a-wen əzzəna.

⁴ Ämära, ayətma-χ, šund a-wen-däx a jam käwäned-däx: däx-tössəba n-tassayt ta jäm d-tayəssa n-Älmasex, tämoosäm i-a-wa innä alämär äddinät s-äbas əddarän. Ämoos a-s önta a käwän-ikräšän, önta-i dd-inkärän jer-inəmmuttan i-ad-tamašaläm erhet n-Mässinäx.

⁵ Ibda a-s nəl käm i-erk derhanän n-tiχəswen-nänäx d-mäläyäχnatän wi iyyäçnen, ällil-anäx alämär s-a-wen ed, wär sär-näx dd-orew a-wen a säl tamättant mäšan,

⁶ ämära d-nämmut däx-isälan n-a-wa fälla-näx ifrad alämär-i hanäx-ikradän däx-tišəm n-tansit n-tiχəswen-nänäx, näddoobät amišöl n-erhet n-Mässinäx s-tasna täynayät däx-ixkam Unfas Šaddijän. Ènta-en-däx a-s tärna ta ihäkk, təžlay d-tärna ta ila alämär-i s-älkad χas a fäll-təktab.

Isälan n-alämär d-abäkkad

⁷ Ma ämoos älmäχna n-mäjräd-wen-däx? Adiš alämär wa n-Mosa, önta a hanäx-isidəwän däx-abäkkad? Xäša! Änn-ak alämär-en-däx a hi-issəlmädän s-abäkkad ed, önnär wär hi-innä alämär: «Wär täsdärhänäd a ila äwadəm wär led», wär ləmmədäx s-a-wen.

⁸ A-wen-däx a fäl ayätal-wen-däx hi-ija alämär a ijräwän i-abäkkad tašləlt ta sär-i-dd-toräwät e d t-illäm erk derhan. Ènnär wär dd-ixlek alämär, wär hi-təjjəš tijya n-a-wa s-itawänna abäkkad.

⁹ Ibda, əddaräx wäla alämär mäšan, äzzubbät-dd a-wa ifrad alämär χas, innähäd däx-i abäkkad, ämoos šund a-s äbas əddaräx.

¹⁰ Färəd n-alämär wa s-änihäjjä a-s tämudre a sär-i dd-oräw, tamättant χas a sär-i dd-iwwäy

¹¹ ed, ämoos-dd färəd-wen-däx äsarü wa s-hi-äsjaçlät abäkkad däx-tamättant.

¹² Hakd a-wen-däx, alämär, wär t-illa a t-ijrawän, Mässinäx ad-dd-ifal, a-wen-däx a-s: šaddij, oçad, ifran.

¹³ Adiš, ma n-əmmək n-a-s a-wa oläχän, oräw-dd sär-i tamättant? A-wen ya, wär il' əmmək. Tidət önta da: alämär-en-däx šaddijän, a sär-i dd-oräwän äsarü wa dd-äwwäyän asənnəfiləl wa dd-ija abäkkad iman-net däx-i.

Tumast n-ägg-adəm

14 Nəssan, ädduuttät day a-wen, a-s alämär, Unfas n-Mässinäx a-s əssəbab-net məšan älwäxla a-s näkk-i-däx n-ägg-adəm, a wär-iha älfäyda s-ämešäläx a-wa ifräd ed, äkkilex i-abäkkad šund azənš a hi-ijä.

15 A-wa tamašaläx, iqgan eyäf-in, indär-ahi ad-t-əjrähäx ed a-wa s-ärhey amišəl-net, wär t-təmišiläx; a-wa-däx dār-okädäx xas a tamašaläx.

16 Yas, šamad a-wa dār-okädäx xas a tamašaläx, ənta-den-däx a-wa ämoosän tajuhe xur-i n-a-s alämär-i-däx, wär t-illa älyib t-iwarän.

17 Tidət-däx a-s abäkkad wa däx-i ännihädän a itamašalän härätän-win-däx, wädden näkk

18 ed, əssanäx a-s a-wa oläxän, näkk-i n-ägg-adəm, wär iha taḡəssa-nin. A-wa oläxän, ärheex iji-net məšan, indar-ahi. Ijmad-t äššäk a-s əkfäräx däx-amišəl n-a-wen-däx,

19 wär təmišiläx a-wa oläxän, wär təmišiläx xas ar a-wa läbasän dār-əkney mikdaw.

20 Šamad äbas tamašaläx ar a-wa dār-okädäx, adiš, äbas näkk a itamašalän tälläbäst-ten-däx, änn-ak abäkkad wa däx-i ännihädän a t-itamašalän.

21 Issəjräh-ah'-in a-wen-däx härät iyyän: äsidärhänäx iji n-a olayän məšan a-wa läbasän a fäll-i ikarräšan ašäl.

22 Däx-ammäs n-ulh-in, ijraz-ahi alämär n-Mässinäx

23 məšan, taḡəssa-nin ənta, ih'-et alämär iyyän säl wa ärhey. Alämär-wen-däx a hi-iknasän hak ašäl, iṭtaf-ahi däx-tišəm n-alämär n-abäkkad wa däx-i ännihädän.

24 Amäskoy näkk-i s-wär t-illa älfäyda hi-ihan! Mi hi-e-aḡənän tähanint, ikkəs-ahi-dd däx-taḡəssa-ta-däx hi-tähobet s-tamättant?

25 Təmmal i-Mässinäx däx-äddimmät n-ḲisaÄlmasex-i n-Emäli-nänäx hanäx-ijräwän ad-dd-nəkkəs errawän-nänäx däx-a-wen-däx. Ämära, ənniyät-in, alämär wa n-Mässinäx a-s äkkiilät, a-s ija a-wen, taḡəssa-nin ənta, alämär wa n-abäkkad a-s täkkilät.

8*Tämudre ta n-tidət ihäkk Unfas Šaddijän*

1 Ämära, ḡarät-a-wen-däx ätwännän, äddinät wi osäxnen d-Ḳisa Älmasex, äbas t-illa fäw-fäw uḡlem tän-iwarän dat-Mässinäx ed ənniyät-näsän wädden tiḡəswen-näsän a däx-sän ännihädän.

2 Unfas Šaddijän-i ihakkän alämär wa n-tämudre ta n-tidət dd-tirəw tassaxt d-Ḳisa Älmasex, tärna-net a hi-täsdärfet, təbd'-ahi d-alämär wa n-abäkkad d-tamättant.

3 A-wa s-käla ämoos isəssəndar i-alämär wa n-Mosa-i ännihädän däx-e d t-illäm ägg-adəm däx-təssəba n-abror wa təja taḡəssa-net, issärxäs-t-dd Mässinäx ed, äšmašäl-dd Rure-s, ämoos-dd ägg-adəm i-ad-umas tasəbdärt ta jarräwät i-ägg-adəm tenäšše n-ibäkkadän xur-Mässinäx.

4 A-wa fälla-näx ifräd alämär, ämešäl-t ed, ämära, wädden a-wa tärha taḡəssa-nänäx xas a däx-näx ixkamän, Unfas Šaddijän n-Mässinäx a däx-näx ännihädän.

5 Ädduuttät a-s ere ättilälän erhet n-taḡəssa-net, wär mad-ämašäl day xas ar a-wa fälla-s tärha taḡəssa-net məšan, wa s-Unfas n-Mässinäx a ättiläl, wär-e ämašäl xas ar erhet n-Unfas Šaddijän.

⁶ Ijmaḍ-t äššäk a-s a-wa tärha taḡəssa n-ägg-adəm, tamättant ḡas a sār-s dd-itirəw, a-s ija a-wen, Unfas ənta, tāmudre ta n-tidət d-älxer a dd-itiirəw s-ägg-adəm.

⁷ Äwadəm wa wärän izənnəzjumət ar dəḡ-a-wa fälla-s tärha taḡəssa-net, ašänjo n-Mässināḡ, wär-äddobät asrəs n-iman-net dat-alämär n-Mässināḡ, wär t-äddobät kud t-irha-däḡ.

⁸ A-wen-däḡ a fäl äddinät wi ättilälnen erhet n-tiḡəswen-näsän, wär t-illa əmmək s-əjrəzän i-Mässināḡ.

⁹ Kāwāneḍ, äbas təglam fäll-derhan wa n-tiḡəswen-nāwän, änn-ak, jām iman-nāwän daw-tärna n-Unfas wa ija Mässināḡ dəḡ-ulhawän-nāwän. Ere daḡ wa s-wär-ihä Unfas Šäddijän n-Älmasex ulh-net, wär t-ila Älmasex.

¹⁰ Kunta daḡ iha Älmasex ulhawän-nāwän, kud-däḡ tamättant a mad-təjəm dəḡ-abäkkäḍ, ill'-awän-t əlḡəllas ed ij'-iwän Mässināḡ dəḡ-təssəba n-tassaxt ta jām d-Unfas Šäddijän n-Älmasex äddinät ḡur-s lanen idəm.

¹¹ A-wen-däḡ a fäl kunta iha Unfas Šäddijän n-Mässināḡ-i dd-issənkärän ḡisa jer-inəmmuttan ulhawän-nāwän, adiš, ad-kāwän-äkf daḡ ənta-i dd-issənkärän Älmasex jer-inəmmuttan tāmudre ta dd-e-sənkärät tiḡəswen-nāwän jer-inəmmuttan s-tärna n-Unfas wa izzäḡän ulhawän-nāwän.

¹² Ayətma-ḡ, kunta ill'-e färəḍ hanāḡ-iwarän, əlmədät a-s wädden wa n-alkum i-erk derhanän n-tiḡəswen-nänäḡ.

¹³ Ere ättilälän erhet n-taḡəssa-net, tamättant ḡas a dd-e-arəw s-iman-net māšan, ere wa hin-ijärän s-tärna n-Unfas Šäddijän erhet n-taḡəssa-net, tāmudre ta n-tidət a dəḡ-s təlkamät.

Mässināḡ d-aratän wi dd-ija s-iman-net

¹⁴ Ere wa s-Unfas n-Mässināḡ a t-oyadän, ara n-Mässināḡ a ämoos.

¹⁵ Unfas daḡ wa kāwän-ikfä Mässināḡ, wädden Unfas kāwän-ijan eklan s-härkuk han tarəmməxt, änn-ak, ikf'-iwän Mässināḡ Unfas-net i-ad-talähäm d-äddinät dd-ija s-iman-net. A-wen-däḡ a hanāḡ-ikfän turhajät n-ad-nəḡarr Mässināḡ s-isəm: «Abba».

¹⁶ Tärna n-Unfas Šäddijän-en-däḡ hanāḡ-ikfa Mässināḡ a hanāḡ-ämoosän tajuhe ta hanāḡ-satbatät n-a-s tidət-däḡ a-s aratän n-Mässināḡ a nāmoos.

¹⁷ ḡas, šämad ädduuttät a-s aratän n-Mässināḡ a nāmoos, adiš, nāmoos iməkkusa, ad-hanāḡ-äkf Mässināḡ a-wa s-hanāḡ-ijjāš ärkāwäl-net, nahär daḡ d-Älmasex terše-net. Kunta närḍa s-ad-där-s nahär aḡäna wa inhäy, adiš, ad-där-s nahär älxurmät-net.

Älxurmät wa ilkämän

¹⁸ Ija ḡur-i a-s tersəmmawen ti nəhannäy ämära-däḡ, wädden wäla a əndärrän edes i-älxurmät wa s-ilkam ad-hanāḡ-dd-infiləl.

¹⁹ Älxurmät wa s-äqqalän aratän n-Mässināḡ, wädden əntäneḍ ḡas a irmas iba n-tazidert n-ad-äj; a-wa iwärän ärori n-äkall iket-net a ärorädän ad-dd-ass.

²⁰ Ämoos a-wa iwärän ärori n-äkall a wärän issen e-s ihäl, wädden ad-t-dd-ikkasän a-wen, Mässināḡ a has-iḡtäsän a-wen. Māšan, a-wen, wär hin-ikkəs ättäma wa äsjär Mässināḡ taxləkt iket-net.

²¹ Imal-dd ašäl d-mad-isəttäḡləl Mässināḡ taxləkt-net iket-net dəḡ-əlhəllak wa s-täšewäj, əjrəwän aratän n-Mässināḡ älxurmät wa s-hasän-innä.

²² Nəssan a-s ašäl-i-däḡ, taxləkt iket-net a täššorsät, təkna tiḡzurt tolähät d-ta rammäsät tamäḍt jarräwät eḡäf-net.

²³ Wädden day ənta ɣas a irmas a-wen-däx, irmas-anäx näkkäneḍ däx-i ija Mässinäx tiḡaffaddiwen n-Unfas-net. Näkkäneḍ day, nətihneffit däx-iman-nänäx, näqqal i-ašäl wa d-e-numas s-tidət-däx aratan n-Mässinäx, ikkəs-anäx däx-tissust ta däx-hanäx-jänät tiḡəswen-ti-däx.

²⁴ Ed näkkäneḍ, tidət-däx a-s əlɣəllas-nänäx itbat māšan har əməra-däx, əmoos a däx-nəjar ättäma. Äywa, ättäma wa ihannäy əwadəm, ad-əbas əmoos ättäma; əndek ättäma wa ilkämän däx-a-wa-s išwār, inhäy-t əwadəm? Wār t-illa.

²⁵ Māšan afäl ättäma-nänäx, əmoos a wār nəhənnəy, dihen, ad-has-nəqqəl s-tazidert d-ulh ijlayän.

²⁶ A-wen-däx fäw a fäl hanäx-itilal Unfas Šaddijän däx-tələmḍe-nänäx ed a-wa s-əniihäjja ad-t-nəttär däx-Mässinäx, wār t-nəssen. Ənta-en-däx a hanäx-itəddalän Mässinäx s-tihneffa wären la afəssär.

²⁷ Tidət a-wen, Mässinäx-i issanän a-wa ihän ulhawän, issan day a-wa ihän ənniyät n-Unfas. A-wen-däx a fäl ənta, erhet n-Mässinäx a itattär i-iməšseddəjän.

Tihusay d-təmyäre n-tärha ta hanäx-ija Ƴisa Älmasex

²⁸ Darät-a-wen day, nəssan a-s äddinät wi ərhänen Mässinäx d-äddinät wi dd-iḡrā s-iman-net däx-erhet-net, a tän-irmäsän-däx, a əmoos-däx, Mässinäx iman-net a itajjän a-s tišrayäten n-tanfust-ten-däx tän-tärmäsät, i n-tänfo-näsän.

²⁹ Mässinäx äddinät wi əsnäfrän dat-axälak i-ad-umasän aratan-net, iḡtäs-asän milhaw d-Rure-s i-ad-umas Rure-s teḡäfädde n-əḡḡatän əjjootnen.

³⁰ Mässinäx, äddinät wi s-dd-iḡtäs a-wen, iḡr'-en-dd s-iman-net; wi dd-iḡra s-iman-net, ikf'-en idəm data-s, wi ikfa idəm data-s, ikf'-en day əlxurmät-net.

Tärha n-Mässinäx ta hanäx dd-əsnäfaläl däx-Älmasex

³¹ Šəmad isälan-den-däx, ma s-näddoobät tənna-net day? Kunta Mässinäx-i-däx, tidət-däx a-s ašrut wa-nänäx a iha, mi fälla-näx ilan tärna?

³² Zənnəzjumətät ɣas: kunta Mässinäx, Rure-s iman-net wa n-iyyän ila, wār t-iḡles däx-tamättant, ənn-ak, oyy'-e əmmut däx-təssəba-nänäx, əndek ɣas ḍarät-a-wen-däx a-wa hanäx mad-unjəy? Wār t-illa.

³³ Äddinät wi əsnäfrän Mässinäx, mi tän-e-isəwārən udlem? Wār t-illa ed Mässinäx iman-net a tän-ikfän idəm data-s.

³⁴ Mi äddoben ad-tän-isəwār udlem? Ajän wädden Älmasex əmmut māšan, isälan, wār-əmden dihen ɣas, a ojarän a-wen, inkär-dd jer-inəmmuttan, ikk' išənnawän, əqqima dihen daw-aḡil n-Mässinäx, itattär-anäx s-Mässinäx.

³⁵ Əndek ɣas a-wa-däx hanäx-e-ibḍəwän d-tärha ta hanäx-ija Älmasex? Ak tirəmmaḡ meḡ erk əmmək, ak əlɣizabät meḡ laḡ meḡ ɣəlləl, ak miši meḡ təkoba? Wār t-illa fäw a hanäx-där-s-e-ibḍəwän, a əmoos-däx.

³⁶ Däx-isälan n-a-wen-däx a däx-hanäx-innä əlkəttab n-Mässinäx:

«Təssəba-näk, Mässinäx a fäl nətamättat hak ašäl,

jän-anäx äddinät ɣas šund taḡsiwen

däx-wär-ilkem a säl aḡaras.»

³⁷ Māšan, hək d a-wen-däx, däx-a-wen-däx iket-net, nəmoos imärnan, nokäy fäw tumast n-imärnan, nəkräš ašäl imdan fäll-išənja-nänäx s-turhajät n-Wa hanäx-irhän.

³⁸ Ëkkasäy äššäk a-s wär t-illa fäw a hanäx-e-ibḏewän d-tärha ta hanäx-ija Mässinäy: ak tamättant wäla tämudre wäla änjälosän wäla išənnawän wäla käl-tärna, a-wa t-illän d-a-wa ilkämän,

³⁹ käl-äššahät wi n-išənnawän d-a-wa iwäran ärori n-äkall, wär t-illa fäw a dd-ätiwäxläkän äddooben ad-hanäx-ibḏew d-tärha n-Mässinäy ta hanäx-dd-äsnäfaläl däx-Emäli-nänäy Yisa Älmasex.

9

Tisnant n-iman ta ija Buləs däx-təssəba n-käl-Išrayil-i äsxärnen ul-hawän-näsän i-Mässinäy

¹ Näkk-i s-ašäl-i-däx osayäx d-YisaÄlmasex, tidət a hawän-jannej wädden bahu, Unfas Šaddijän iman-net a hi-oḡadän däx-ənniyät-in däx-a-wa s-ärheḡ ad-hawän-tän-ännäx.

² Äryän iman-in, äryän; jan tisnant wärat köttəl.

³ Äsniinän day hullan däx-isälan n-a-wa dd-iqqälän ayətma wi n-käl-Išrayil. Diha t-əlleḡ, kud irha fäw təwär-ahi tilḡant, ənməjjəjäḡet fäw d-Älmasex i-ad-där-s ənmihəzän əntäned, əjrəwän əlḡellas.

⁴ Käl-Išrayil, Mässinäy a tän-dd-ijän s-iman-net, äswär-tän ännur-net, änmäjäš dār-sän ärkäwälän n-tassaḡt, äzzäbbät fälla-sän alämär wa n-Mosa, issəlmäd-tän älyibadät n-Mässinäy wa n-tidət, ijjäš-asän ärkäwälän äjjootnen.

⁵ Əntäned a länen imärawän-nänäy wi n-ibda dd-izjär Älmasex s-eḡäs-net ənta-i n-Mässinäy-i t-illan jənnəj-härät iket-net. Naməlet-t, amin!

Mässinäy, a-wa s-ijjäš ärkäwäl-net, ad-t-äj

⁶ A-wa hawän-janneḡ, wädden i n-a-s innin ärkäwäl wa hasän-ijjäš Mässinäy, äbboṭṭäl-in. Äbo, änn-ak, wädden äddinät iket-näsän wi-dd-əzjären Išrayil a ämoosnen dägg-Išrayil wi n-tidət.

⁷ Wädden day äddinät iket-näsän wi dd-əzjären Ibrahim a-s ihäyawän-net wi n-tidət, əktəwät-dd a-s Mässinäy iman-net a innän i-Ibrahim: «Isxaqq a hak dd-e-əzjären ihäyawän.»

⁸ A-wen älmäḡna-net a-s wädden aratan wi s-dd-issəbäb ägg-adəm, a-s wi n-Mässinäy, änn-ak, aratan-net a tän-ämoosän, wi s-dd-issəbäb ärkäwäl wa ijjäš i-Ibrahim.

⁹ Ärkäwäl-en, ənta da a-wa däx-s innä Mässinäy i-Ibrahim:

«Ad-käy-dd-äqqələḡ däx-äzzäman šund wa-däx, a-s käy-dd-e-äqqələḡ s-äzzäman-en, təkraš-ak Saräta alyad.»

¹⁰ A-wa has-innä Mässinäy, wädden Saräta ḡas a ḡur-dd-imdä, inn'-en day i-Räbka ta n-hänne-s n-Isxaqq-i n-abba-nänäy iket-nänäy ed təkraš-as eknewän s-əmmək-wen-däḡ.

¹¹ Härwa wär-əwen eknewän-en-däḡ, härwa wär-ämešälän a oläḡän wäla a läbasän a-s imməjräd Mässinäy i-Räbka, issəlmäd-tät s-wa äsnäfrän jere-sän; ämoos a-wen erhet n-Mässinäy wädden fäl təssəba n-emärked jan i-ad-dd-iḡär s-iman-net wa s-irha.

¹² A-s itäj a-wen, innä Mässinäy i-Räbka:

«Ad-äkkälät wa n-amäqqar i-wa n-amäḡray.»

¹³ Ənta-den-däḡ a-wa ijän ed innä Mässinäy iman-net:

«Äsofäḡ Yaḡub uhən Iso.»

Mässinäy, enəsdebbär n-iman-net

14 Ak ajän a-wa ija Mässinäx, ajän ad-hanäx-isəwwənn a-s Mässinäx, wär-oyed? Aa fäw, wädden a ijan a-wen

15 ed Mässinäx iman-net a innän i-Mosa:
«Sansey ärräxmät-in fäll-ere wa s-ärheç,
naqq'-ahi tähanint n-ere wa s-ärheç.»

16 A-wen wädden a dd-izjarän erhet n-ägg-adəm wäla äşşahät-net, tähanint n-Mässinäx a dd-ifal.

17 Iktab däç-əlkəttab a-s innä Mässinäx i-Firçäwna:
«Jeç-käy əssəbab i-ad-səlmədäç s-tärna-nin
i-ad-itwäxteb isəm-in fäll-ärori n-äkall iket-net.»

18 A-wen-däç a fäl ere wa s-oðän Mässinäx tähanint, oðän-as-tät, wa s-äsçär ulh-net daç, ad-içar.

Mässinäx a-s ämaxlak d-ämänokal

19 Ämmukkän a-s afäl əslän iyyäð däç-wän i-mäjräd-wen-däç, ad-dd-əggədän, ənnən: Mässinäx adiş, ma s-isawar dägg-adəm udlem? Ajän mi äddooben azeççəwi n-iman-net data-s? Wädden a-wa s-irha ças a itajj.

20 Uhən käyy-i n-ägg-adəm dd-tajjäsän inəzjam şund-win-däç, mi tämoosäd fäw tamäzaçäd d-Mässinäx? Käla tənçayäd açäs isastan ere wa t-iknän d-äddälil wa fäl t-dd-ikna.

21 Wädden ere wa ikannän içsas, a-wa s-irha ças a itajj, tälaçt a idarräç təzzar ikən sär-s jer-açäs ilan älmim d-i t-wärän ila. Tälaçt-en-däç a-s ikann a-wen-däç iket-net.

Derhan n-Mässinäx i-käl-Işrayil

22 Mässinäx daç, isakna adkär-net i-ad-isəlməd s-tärna-net. Ähoja äziçäydär i-wi änihäjjänen d-adkär-net wären änhäçja ar d-əlhəllak

23 mäşan wi s-oðän tähanint s-irha ad-t-səmyärän, irha daç ad-tän-isənnəfləy däç-älxurmät-net.

24 Teçäre ta hanäç-dd-ija Mässinäx s-iman-net näkkäneð-i n-käl-Älyähud, ənta daç a dd-ija i-tiwsaten ti iyyäðnen n-inəzzulam†

25 s-əmmək wa s-tän-innä ännäbi Ozi däç-əlkəttab-net a-s innä, innä Mässinäç:

«Tamətte ta s-ibda wär tämoos ta-nin,
ənta ämära a he-äjäç tamətte-nin.

Tamətte ta s-ibda tätiwäksän,
ənta a he-tumasät ta əkneç tärha.»

26 Edägg daç wa-däç hasän-ätwännä:

«Wär tämoosäm tamətte n-Mässinäç»,
edägg-wen-däç iman-net a däç-e-ətwäçrən s-isəm:
«Aratän n-Mässinäç wa iddarän.»

27 Ännäbi Saya† ənta, innä:

«käl-Älyähud, kud-ärhan əjən əjut
wa wär jenät timətwen n-äkall
däç-asälim n-ejärew wa səmmän
tasəkkemt däç-sän ças a he-ijrəwän əlxəllas»

28 Emäli daç a-wa s-innä, ad-t-äj, äşşäreça wa s-innä ilkam ad-t-dd-izəzzubbət fäll-äddunya, ad-t-äj şik şik.

† 9:24 9:24 — Çur-käl-Älyähud, ere wärän ämoos ägg-Älyähud s-aläsäl meç ere wärän ilkem i-äddin-näsän, iket-net, änəzzalim a ämoos. A-wen-däç a fäl tiwsaten ti iyyäðnen iket-näsnät, ti n-inəzzulam. — Aşäl-i-däç, änəzzalim, äkafär (ere wärän issen s-Mässinäç). † 9:27 9:27 A-wa ännäbi dd-äzzarän i-çisa, äloläy däç-isälan-net əssayät timäð n-awätay dat-tiwit-net.

²⁹ Oläs day ännäbi Saya innä:
 «Ēnnär wär hanäx-dd-ooya
 Mässinäx-i n-Mässi-s n-ajhanän
 härät dāx-əzzurəyāt-nänäx,
 ašäl-i-dāx, noolāh ɣas
 d-iɣärman wi n-Sodoma d-Gomora-i ihläk.»

Äddälil wa fäll-innäđ Mässinäx fäll-käl-Işrayil

³⁰ Ma säl a-wen? Inəzzulam-i wären təmmäx i-iqqud dat-Mässinäx, ij'-en immun-näsän s-Mässinäx imaɣdalän data-s lanen idəm. Immun-näsän s-Mässinäx a sār-sän dd-orāwän a-wen.

³¹ A-s ija a-wen käl-Işrayil əntäneđ, amişel n-a-wa innä alämär a-s tattärän ad-tän-äkf idəm dat-Mässinäx məšan, indär-asän ad-dd-säɣsəlän a-wen.

³² A-wen-ş ma t-ijän? Adiš əttärän ad-əjrəwän iqqud išlayän i-wa ihakk immun s-Mässinäx. Ēttärän ajäraw n-a-wen s-a-wa tamaşalän, ämoosän ɣas şund äddinät s-tärsal təhünt har išwar ođan.

³³ Ija a-wen s-əmmək-wa-dāx s-ätwännä, innä Mässinäx dāx-isälan n-Ÿisa:
 «Ēnhəywät! Sanseɣ təhünt rassälät i-äddinät
 dāx-aɣrəm wa n-Sayon.
 Ad-tumas əssəbab n-əjäđäl i-iyäđ məšan,
 ere fälla-s äşhätälän-dāx,
 wär-ilkem ad-ämmujräz.»

10

¹ Ayətma-ɣ, derhan n-ulh-in d-a-wa tattäräx hak ašäl dāx-Mässinäx da: äɣləsnet käl-Işrayil.

² Ädoobex tajuhe n-a-s käl-Işrayil, ədgažän hullan dāx-isälan wi n-Mässinäx məšan, wär jen a-wen s-ənniyät ijarahän härät.

³ Ēžhalän härwa dāx-isälan n-a-s Mässinäx a isaydalän ägg-adəm i-adɣur-s ikrəş idəm wädden imärkedän-net, a-wen, unjäyän sār-s.

⁴ Älmaseɣ, a ɣur-dd-imdä a-wa innä alämär, ere sār-s omänän-dāx, ad-ikrəş idəm dat-Mässinäx.

Ere omänän s-Ÿisa Älmaseɣ, ad-iɣləs

⁵ Dāx-isälan n-a-wa ihakkän ägg-adəm idəm dat-Mässinäx, innä Mosa:
 «Ere ämeşälän färəđän
 wi əktäbnen dāx-alämär,
 ad-has-umas a-wen-dāx
 əssəbab n-əɣəllas.»

⁶ Məšan ašäl-i, immun-nänäx s-Mässinäx, issəlmäd-anäx a-wa hanäx-ihakkän idəm dat-Mässinäx, inn'-anäx:

«Wär tənneđ dāx-iman-näk:
 mi he-ikkən išənnawän?»
 A-wen, azəzzəbbu n-Älmaseɣ dāx-sän;

⁷ wär tənneđ day:
 «Mi he-ikkən ider n-äkall?»
 Ajän wädden Älmaseɣ, äru dd-inkär jer-inəmmuttan.

⁸ Isälan n-a-wen-dāx, a dāx-hanäx-innä mäjräd n-Mässinäx:
 «Ašäl-i, mäjräd n-Mässinäx,
 ohaɣ-käy, ih'-emm-näk, ih'-ulh-näk.»

Isälan-win-däx a hin-nəsasawaḍ dāgg-adəm i-ad-amənän s-Ḡisa.

⁹ Ere iṭṭāfän däx-tämudre-net tənna n-a-s Ḡisa, Emäli, iflās däx-ulh-net a-s issənkär-t-dd Mässināx jer-inəmmuttan, ad-iḡləs

¹⁰ fäl-a-s immun wa dd-ifälän ulh n-āwadəm a t-ihakkän idəm xur-Mässināx, wa iṭṭāfän tənna n-a-wen s-əmm-net, ad-t-iḡləs Mässināx.

¹¹ Ǝnta-den-däx a-wa innä əlkəttab n-Mässināx a-s innä:

«Ere omänän s-Emäli-däx,

wär-ilkem ad-ämmujräz.»

¹² A-wen ämära, wär sār-s iḡley ägg-Älyāhud wäla wa t-wärän ämoos ed iket-näsän, iyyän n-Emäli ihakkän a olaḡän s-əjut a oharän, ere t-iḡrändäx, ad-has-ākawən.

¹³ Iktab a-s:

«Ere iḡrän isəm n-Emäli,

omän sār-s däx, ad-iḡləs.»

Täxart n-ulhawän n-käl-Älyāhud

¹⁴ Mäšan, äddinät ya, əndek əmmək wa s-mad-əḡrən isəm n-Emäli a-s wär sār-s omenän? Ǝndek dəx əmmək wa s-mad-sār-s amənän a-s wär kälä əslän i-isälan-net? Ǝndek əmmək wa s-mad-əslən i-isälan-net a-s wär t-illa ere hasän-tän-ixṭabän?

¹⁵ Ǝndek əmmək wa s-mad-hasän-ətwäxṭəbän a-s wär t-illa ere sār-sän ämešälän? Təssəba n-a-wen-däx a fäl innä əlkəttab n-Mässināx:

«Tihusay ija ass n-imawayän n-isälan n-Älənžil,

edägg äkokälän idarän-näsän däx,

älxer a sār-s dd-tirəwän.»

¹⁶ Älwäxla a-s a äjjeen däx-äddinät, unjay s-Älənžil. A-wen-däx a äswännän ännäbi Saya:†

«Emäli, a ija a-wa-däx nəssewäl,

mi omänän s-a-wa nəxattäb?»

¹⁷ Immun wa iḡalläsän, a-wa s-isäl āwadəm ihän Älənžil-wa-däx nəxattäb dd-ifälän Älmasex, a iha.

¹⁸ Ak ajän a-wen älmäḡna-net a-s har ämära-däx, wär-əslen käl-Älyāhud i-isälan-win-däx? Ǝslan-asän lab ed a-wen-däx fäw a däx-innä əlkəttab n-Mässināx:

«Ässewälän imawayän n-isälan fäll-ärori n-äkall iket-net,

wär t-təlla tamdujt däx-äddunya s-wädden təsl'-asän.»

¹⁹ Ad-käwän-səstənāx:

«Tordam a-s isälan-wi-däx,

wär tän-əjrehän käl-Işrayil?»

Ǝjrahän-tän lab. Ǝntäneḍ-en-däx fäw a-s innä ännäbi Mosa s-tizarät, innä Mässināx:

«Ad-däx-wän äjāx tismiten

fäll-tamətte wärät tämoos ta-nin,

zəzzəkənzärāx-käwän fäll-tawset jam tawset n-älžuhal.»

²⁰ Oläs dəx ännäbi Saya, iglä har innä:

«Äddinät wi s-ibda, əkfan-ahi iroriyawän-näsän,

əqqälän-ahi-dd;

wi s-ihənnin, wär däx-i äkkulän,

äsnäfalälāx-asän-dd iman-in.»

²¹ Däx-a-wa dd-iqqälän käl-Işrayil, ənta da a-wa däx-sän innä Mässināx:

† **10:16 10:16** A-wa ännäbi dd-äzzarän i-Ḡisa, äloläy däx-isälan-net əssayät timaḍ n-awätay dat-tiwit-net.

«Ẽzzäläy äfuss-in har äqqur
i-tawset hi-tänkarät,
osey-tät a-wa tawset hi-täsiyärät ulh-net,
tawset sär-i tunjayät.»

11

Mässinäy, wär hin-inḏew käl-Işrayil

¹ Ässistänäy-käwän ämära, ak ajän Mässinäy ijär-in tamötte ta n-käl-Işrayil äsnäfrän? Äbo! Näkk-i hawän-äsewälän, ägg-Işrayil n-ahäya n-Ibrahim la tawset ta n-Bänyamin a ämoosäy.

² Mässinäy, tawset ta äsnäfrän i-iman-net härwa wär dd-täxlek äddunya, wär tät-in-ijer. Ẽktəwät-dd ɣas a-wa innä ännäbi Ẽli däy-isälan n-käl-Işrayil a-s hasän-işkä s-Mässinäy, inn'-as:

³ «Emäli, tamötte-ta-hi, tänyä ännäbitän-näk,
tärzä idäggan wi däy-tajjänät tikutawen-näk.
Näkk day-i dd-äqqimän, təzzan sär-i,
tärha ad-täj iman-in.»

⁴ Innä a-wen ɣas, inn'-as Mässinäy:

«Ẽli, änsät önnyät-näk,
leɣ əssa afḏän n-ähaləs wär-iha wäl' iyyän
s-käla irkäy dat-Baal-i n-ämänokal n-äşşänämän.»

⁵ A-wa ijän däy-äzzäman-wen-däy, ənta day a ijan däy-äzzäman-wa-däy, iɣlaf Mässinäy däy-ännuymät-net tamötte wärät təjjət dd-äsinäfrän jer-käl-Işrayil.

⁶ Şamad ännuymät n-Mässinäy a äsnäfränän tamötte-ten-däy i-ad-tät-iɣləs, adiş, wädden imärkedän-näsän a tän-e-iɣləsän ed, afäl ija a-wen, ad-äbas ämoos ännuymät, ännuymät wa n-tidət.

⁷ A-wen-ş, ma ämoos älmäyña-net? Ajän a-wa s-əmmäyän käl-Işrayil, wär t-əjrewän? Ẽjräwän-t däy-sän lab wi däy-sän äsnäfrän Mässinäy. Wi iyyäḏnen wären əjrew a-wen, asɣär a has-jän ulhawän-näsän.

⁸ Isälan n-a-wen-däy a däy-innä əlkəttab n-Mässinäy:

«İşşəşläl-tän-in Mässinäy
i-ad-wär hönnöyän, wär səllən.
Ẽnta-den-däy a-wa ijräwän käl-Işrayil har aşäl-i-däy.»

⁹ Oläs day ḏarät-a-wen, innä ännäbi Dawəd:

«Umasnet injora-näsän
a hasän-iha sunsəj,
ättärmäsnet däy-tändärbaten;
idəwet-dd fälla-sän älmäşşibät tän-in-immärän.

¹⁰ Təwäret təməlle tiṭṭawen-näsän i-ad-äbas hannäyän,
äjənet aləḏḏeş wa-däy fäll-hak iyyän däy-sän,
umaset ɣas, şund äzuk a ällinjät.»

Ejädäl d-tebädde n-käl-Işrayil

¹¹ Ak ejädäl wa jän käl-Işrayil, i n-härkuk meɣ? Äbo! Änn-ak şäɣşad-näsän əntäneḏ-en-däy a dd-oräwän taşləlt i-əlyəllas i-tiwsaten ti iyyäḏnen i-ad-asəmən käl-Işrayil.

¹² Ẽas kunta wäla şäɣşad-näsän däy, älfäyda a dd-oräw s-äddunya, äb' äṭṭäma n-təmyäre ta he-äj älfäyda wa sär-s dd-e-arəwän afäl dd-əqqälän Mässinäy i-ad-utabän. İjmaḏ-t äşşäk a-s ad-umas a-wen älxer mäqqoorän.

Älənzil a iha əlyəllas i-inəzzulam

¹³ Ämära käwäneḍ-i n-inəzzulam a-s ämmijrädäḡ: Näkk-i-hi, Mässinäḡ a hi-ijän änämšaḡul-hawän, iśl'-ahi daḡ ämašal hi-ijrazän.

¹⁴ Ija ḡur-i a-s ämašal wa hi-issäḡläf Mässinäḡ ija təmyäre-ta-däḡ s-afäl t-in-ässawäḍäḡ, ad-dd-arəw a-wen tismiten n-käl-tumast-in, utabän, iḡləs Mässinäḡ iyyäḍ däḡ-sän

¹⁵ fäl-a-s, kunta ämära, ij'-en Mässinäḡ s-edes i-ad-dd-arəw a-wen tanməzalt n-äddunya d-Mässinäḡ, ma he-äj afäl ätubän käl-Işrayil? Ad-umas a-wen täkunt tolähät d-äddinät äba, oläsän-dd tanäkra jer-inəmmuttan.

¹⁶ Kunta afärs n-tajella wa n-eḡäf a ikät äwadəm i-Mässinäḡ, adiš tajella daḡ, iket-net ti-net ed šäddiij. A-wen-däḡ a ijän a-s kunta ikewän n-ahəšk, i n-Mässinäḡ, adiš, iləktan-net daḡ, iket-näsän, i-net ed šäddiij.

¹⁷ Tamətte ta n-Işrayil, toläh d-ahəšk n-əzzäytun s-hin-inkäḍ Mässinäḡ härät däḡ-iləktan-net təzzar issärmäm-käy-dd käyy-i wärän ämoos ägg-Älyähud i-ad-käy-infəw käyy-däḡ a-wa dd-itəffalän ikewän, isidorän ahəšk iket-net.

¹⁸ Təssəba n-a-wen-däḡ a fäl, käyy-i n-änäzzalim, he käyy! Wär təlkehäd iləktan wi hin-əttənkäḍnen. Ma däḡ-tabärajäd? Wädden käyy a iṭṭafän tämudre i-ikewän, änn-ak, ikewän a hak-tät-əṭṭafnen.

¹⁹ Ämmukkän a-s ad-hi-tənnəd a-s: ajän wädden iləktan, əttənkäḍän-in i-ad-dd-ətwəsärmämäḡ däḡ-edägg-näsän?

²⁰ Tidət lab a-wen mäšan, əlməd a-s iba n-immun-näsän a fäl hin-əttənkäḍän, tätwäsärmämäd-dd däḡ-edägg-näsän ed tomänäd. ḡas, wär sakaf iman-näk, uksaḍ Mässinäḡ!

²¹ Fäl-a-s Mässinäḡ wär-oyya iləktan-wi s-aläšäl-däḡ, ärmamän d-ahəšk äb' äṭṭäma n-käyy-i s-a äynayän dd-təjjäšäd a-wa-däḡ iket-net.

²² Ənhəywät ḡas əmmək wa s-isalmaq Mässinäḡ miḡaw-net wa äddewän d-aḍkär-net: wi t-wären äksuḍ, ad-ənmənhəyän d-älmäššibät-net, wi t-äksuḍnen, ad-äḡləsän däḡ-äššar-net. ḡas, äj äṭṭäma-näk däḡ-miḡaw n-Mässinäḡ ed afäl wär jed a-wen, ad-hin-tättänkäḍäd šund eläkät.

²³ Afäl dd-əzjarän käl-Älyähud täḡart n-ulh ta tän-tärmäsät, ad-ətwəsärməmän däḡ-edägg-näsän ed Mässinäḡ ila tärna s-tän-dd-äsoḡäl idäggan-näsän.

²⁴ Käyy ibda, wär təzleyäd d-eläkät irmamän däḡ-ahəšk n-täkoyt, tätwänkäḍäd-dd fälla-s, tätwäsärmämäd däḡ-ahəšk n-əzzäytun olaḡän kud-däḡ a-wen, əssin ihəşkan wären oleh iyyän n-əzzənəf. Käl-Işrayil-i s-aläšäl-däḡ ärmamän d-ahəšk-en, räqqiis i-Mässinäḡ, ad-tän-dd-isuḡəl edägg-näsän.

Ännuymət n-Mässinäḡ, äddinät iket-näsän a-s t-irha

²⁵ Ayətma, əkkasäḡ-käwän däḡ-taḡdärt däḡ-isälan n-əddäraj wa s-käla ättunkäl dd-änfalälän i-ad-wär tordem iman-näwän tayətte. Əlmədät a-s täḡart n-ulh ta tärmäsät təššəm n-käl-Işrayil ämära-däḡ, ti n-ad-dd-əjjəšnät tiwsaten ti iyyäḍnen iket-däḡ-näsnät, amənnät s Mässinäḡ, iḡləs-tänät.

²⁶ Ənta-den-däḡ əmmək wa s-mad-əḡləsän käl-Işrayil iket-däḡ-näsän s-əmmək wa s-tän-innä əlkəttab n-Mässinäḡ a-s innä:

«Tadaḡt ta n-Sayon ad-dd-e-ifəl ämukäs n-tekäriḍt wa hin-e-ikkəsän iba n-äddin fäll-ihäyawän n-Yaqub.

²⁷ Dihen, ad-där-sän ahäräḡ ärkäwäl n-tassaḡt, aməsäḡ-in ibäkkäḍän-näsän iket-däḡ-näsän.»

28 Afäl täqqäl tanfust s-isälan n-anmøšri wa jän i-Älønžil, ij'-en a-wen-däx išenja n-Mässinäx iket-däx-näsän, mäšan ämoos-awän a-wen käwäned, tänfo mäšan, afäl täqqäl tanfust s-ebre n-nefran wa n-Mässinäx, iṭṭaf-asän ärkäwäl däx-idəm n-imärawän-näsän

29 ed Mässinäx, wär-itäqqəl s-a-wa ikfä, wär-itäqqəl s-ämašal-net.

30 Ibda, täddinäm däx-inämäšrayän mäšan ašäl-i, təlmädäm s-tāhanint n-Mässinäx ed änmäšrayän käl-Älyähud.

31 Anmøšri-näsän ad-dd-oräwän tāhanint-ten-däx däx-a-s irha Mässinäx ad-ämarənät tiṭṭawen-näsän i-ad-əlmədän əntāneḍ-däx ämāra s-tāhanint-net.

32 Mässinäx a oyyän dagg-adəm oḍan däx-tanmøšrayt i-ad-isəlməd hak iyyän däx-sän s-tāhanint-net.

Təmyäre n-tärna n-Mässinäx

33 Isälan n-a-wen-däx a däx-äsewäl əlkəttab n-Mässinäx a-s innä:

«Təmyäre n-tihusay ij'-enät ärrözäx wa n-Mässinäx
Mi äddoben ad-dd-isäxləy sārho-net wāla tayətte-net

A-wa itäjj, ojar tayətte n-ägg-adəm,
wär t-illa ere dd-e-isäxləyän zäbotän-net.

34 Mi issanän a-wa ihän ənniyät n-Emäli?

35 Mi s-kāla t-ikfa härät äb' äṭṭāma
n-ad-ijär äṭṭāma n-timzal n-älxer-net?»

36 Wär t-illa ed ənta a dd-ibnän a-wa-däx iket-net, tärna-net a-s t-illa a-wa t-illän, wär t-illa a-s wädden i-net. Ənta ɣas a änihäjjän d-semɣar härkuk. Amin!

12

Ihuk n-iman d-tayəssa i-Mässinäx

1 Ayətma-ɣ! Jaräx-käwän s-idəm n-təmyäre n-tāhanint ta hanäx-oḍän Mässinäx, äkfät-t iman-nawän däx-tiyəswen-näwän iket-di təddaräm s-älxal šaddijän, ənta-den-däx takute ta has-təjrəzät, ənta-den-däx älyibadät wa n-tidət.

2 Wär təlkemäm i-a-wa fäll-təgl' äddunya-ta-däx, änn-ak äyyät Mässinäx ad-isəynəy ənniyätän-näwän i-ad-tudabem azəmmäzli däx-a-wa ämoosän erhet-net, wa oläxän, a-wa has-ijrəzän d-a-wa ifränän.

Ašəmmišəl n-isuf wi hanäx-ija Unfas Šaddijän

3 Əttaräx däx-hak iyyän däx-wän däx-idəm n-ännuxmät wa fäll-i issənsä Mässinäx d-ad-wär-ija wäl' iyyän däx-wän iman-net jənnəj-a-wa t-ija Mässinäx. Isärəset hak iyyän iman-net dat-amidi-net s-a-wa ilän əmmək. A-wa s-käwän-ikfä Mässinäx turhajät n-iji-net, äjät-t s-a-wa dār-ogdäh immun-näwän.

4 Wädden tayəssa n-ägg-adəm tiyyät ɣas mäšan, əjjətnät tizunawen-net, hakd a-wen-däx, wär t-təlla täzunt tolähät d-tamidit-net älxidmät, hak iyyät d-a-wa tənfa.

5 Əmmək-wen-däx a-s näkkäneḍ-i omännen s-Mässinäx, nəjjət, mäšan däx-təssəba n-tassaɣt-nänäx d-Älmasex, nämoos šund tiyyät tayəssa s-hak iyyän däx-näx-däx änimätṭaf d-amidi-net.

6 Mässinäx, däx-ännuxmät-net, ij'-anäx isuf s-hak iyyän-däx izlay d-wa n-amidi-net. A-wen-däx a fäl wa ijrəwän ɣur-Mässinäx mäjräd s-ila s-ad-t-isuxəl i-äddinät, ixṭəbet s-älxal wa ihälän ebre n-immun.

⁷ Wa ijrāwān ħur-Mässināḡ turhajät n-ad-idhöl äddinät wi iyyäḍnen, ijlöyet dāḡ-a-wen; wa isāḡren, isāḡret s-sārho.

⁸ Wa ijrāwān turhajät n-a-s e-d imməjräd, isəsmäḍ ulhawān n-imidiwānet, iśləwet-t a-wen; wa ijrāwān turhajät n-ihuk, wār-itəməjruzet a-wa ikfa; wa ikfā Mässināḡ turhajät n-ad-izar i-äddinät, ijlöyet dāḡ-a-wen. Wa n-āmadhal n-tilāqqiwen, idhəlet-tānät s-ulh əsriiwān.

Akuyəd dāḡ-təlməssexəya

⁹ Tārha ta n-tidət, wār ḡəddār, akəḍät d-a-wa läbasān, əjlöyät hullan dāḡ-amisəl n-a-wa olāḡān.

¹⁰ Nəmārḡhät hullan jer-iman-nāwān šund āḡḡatān, nəsemḡārät, zāzrät äddinät wi iyyäḍnen iman-nāwān.

¹¹ Ədḡəzät dāḡ-a-wa ḡäm, äyyät fälla-wān sendad, ukasät dāḡ-älxidmät n-Emäli s-ənniyät imdan.

¹² Isəddəwətet-kāwān äḡḡāma wa kāwān-əsjar Mässināḡ, ijəšet-kāwān əššābarät afäl kāwān-tärmäs tissust, əjlöyät dāḡ-tamädilt n-Mässināḡ.

¹³ Iməšsedəjäḡ wi tärmas tāmāḡatert, ədhəlä-tän, səmməjurətät wi kāwān-dd-tisənen.

¹⁴ Ədölät Mässināḡ i-äddinät-wi kāwān-ḡazzäbnen, ärḡhät-asān älḡer, wār ḡasān-jem terk tettert.

¹⁵ Ahrät tedāwit d-wi äddiwätnen, tahərəm imeḡḡawān d-wi hallänen.

¹⁶ Nəmənnəkät jer-iman-nāwān s-älḡal, wār tətteräm a-wa dār-wār togdeḡäm wāla a-wa wār tāmoošäm, sārəsät iman-nāwān, wār jem iman-nāwān äddinät s-wār t-illa a-s wädden əssanän-t.

¹⁷ Wār zəlām tālläbäst s-tālläbäst i-āwadəm, məšälät a-wa olāḡān i-äddinät iket-näsān.

¹⁸ A təkḡäs talḡa, tāqqal-kāwān-dd, iməlet älḡer jere-wān d-äddinät iket-näsān.

¹⁹ Ayətma-i əkneḡ tārha, wār təkkesäm əḡa i-iman-nāwān, səḡləfät talḡa-nāwān i-Mässināḡ ed Emäli iman-net innä dāḡ-əlkəttab-net:

«Näkk a ḡawān-e-ikkəsān əḡa, näkk a ḡawān-e-ikkəsān älḡär.»

²⁰ Oläs daḡ, inn'-anāḡ məjräd n-Mässināḡ:
«Ašänjo-näk wa inäqq laz, šäkš'-e;
kunta äffud, säsw'-e ed afäl ḡas-jed a-wen,
ad-t-tāḡ tākrakidḡ wārät təzley
d-a-s tahəst a jed fäll-əḡäf-net.»

²¹ Wār toyyed tālläbäst təkraš fälla-k əšäl, änn-ak, mišəl a-wa olāḡān i-ad-təkrošäd əšäl fäll-tālläbäst.

13

Asjəd i-a-wa innä əlxəkum

¹ İlzam ḡak āwadəm ad-āməšäl a-wa s-omär əlxəkum ed wār t-təlla təmmənəya warät ärori n-äkall-i-dāḡ s-wädden a-wa la dāḡ-tārna Mässināḡ a dd-ifal; ənta daḡ a tät-əssiibdädän.

² Təssəba n-a-wen-dāḡ a fäl ere issəkfärän iman-net i-əlxəkum n-əddəwəl, ilmədet a-s wār-izley d-a-s tənna n-Mässināḡ a-s änmäšräy. Ere daḡ wa änmäšräyän i-a-wa innä Mässināḡ, ijmaḍ-t əššäk a-s, tāborit n-əššäreḡa n-Mässināḡ a-s irḡa ad-tiḍəw fälla-s.

³ Äwadəm wa itamašälän a läbasān, a əssirmäḡän älqallitän, məšan wa itamašälän a olāḡān, wār t-e-särmäḡän. Kunta tärhed ad-wār kāy-issärmäḡ əlxəkum, adiš məšäl a-wa fälla-k irḡa, dihen, ad-ḡur-s təkrošäd tisənen.

⁴ Elxəkum, tänfo-näk a fäl t-dd-ixlāk Mässinäx, mäšan afäl wär käy-išla ar a-wa läbasän, adiš uksađ-t ed wädden bännan a fäl iṭṭaf tāborit ta n-äššäreḡa. A-wen älmäḡna-net, a-s, ilkam ad-dd-isənnəfiləl Mässinäx ađkär-net fäll-wi tamašalnen a-wa läbasän.

⁵ Uf'-awän ad-tamašaläm a-wa fälla-wän irha əlxəkum wädden ḡas fäl tuksəda n-ad-fälla-wän isiḡəw Mässinäx ađkär-net, änn-ak daḡ, i-ad-wär t-illa fäw a dāḡ-təššakäm iman-nāwän.

Anmärh jer-iman-nänäx

⁶ Təssəba n-a-wen-dāḡ a fäl ḡaymät təzḡaläm tiwse ed käl-tiwse-i dāḡ-wän tät-tattärnen, wär-izley d-a-s Mässinäx a-s äxdamän.

⁷ Hak äwadəm, äkfät-t a-wa fälla-wän ila jer-tiwse wäla äddäyyät wäla tuksəda wäla semḡar.

⁸ Ayətma-ḡ, wär käwän-iräwwäset äwadəm wäl' iyyän a säl tärha. Ere wa s-ha tärha n-äddinät ulh-net, äzizäbbät ämišəl n-a-wa fälla-s ifräḡ alämär iket-net.

⁹ Wädden ätwännä:

«Wär jed əzzəna,

wär jed iman,

wär tokeräd,

wär täsdärhänäd a ila äwadəm wär led»,

d-a-wa säl a-wen.

Alämärän-win-dāḡ, äsdäw-tän-dd iket-dāḡ-näsän wa innän:

«Äj i-änhäraj-näk

tärha-ta-dāḡ jed i-iman-näk.»

¹⁰ Tärha, ere wa s-ha ulh-net, wär mad-iḡšəd härät i-änhäraj-net. Äwadəm daḡ wa s-ha tärha n-äddinät wi iyyäḡnen ulh-net, šund ḡas äzizäbbät a-wa innä Mässinäx dāḡ-alämär.

Ašäl wa dd-imiddəw əlyəllas, ohäz-dd

¹¹ Mäjräd-wa-dāḡ, äjät-as ənniyät ed təh'-iwän tijya n-äzzäman a nəha, äbas ija ässaḡät n-eḡəs, ənkärät-dd. Ašäl wa n-əlyəllas, äbas ujəj, ojär ihəz wa dd-ija ašäl-i-dāḡ uhən ašäl wa d-tomänäm.

¹² Ehäḡ iglä, tifawt, täsmäqqät-dd, nəkkəset-in fäll-iman-nänäx a-wa osäḡän härät d-tihay, nasäḡet d-a-wa ohärän härät d-ännur.

¹³ Närjəšet šund tarähut a fäll-anäḡ ijan, tumaset tämudre-nänäḡ, tämudre šäddijät s-wär t-illa a nətajj dāḡ-ufär, najəjet iba n-asəgdah dāḡ-härät d-tesäse n-asməd d-asri wa n-kəššəf d-asəmmäḡəs n-iman-nänäḡ d-härät n-kənis-kənisän iyyäḡ wären ənfa härät d-tismiten.

¹⁴ Tumaset-awän tämudre ta iṭṭaf Emäli ḲisaÄlmaseḡ šund asälso äynayän, älsät-t. Wär täsbäläläm erk derhanän n-tiḡəswen-nänäḡ, tiyyəm-tän ännihäḡän dāḡ-wän.

14

Nəməšmārät jer-iman-nāwän

¹ Ayətma-ḡ, äwadəm wa s-rəkkəm immun-net, arät-as ifassän-nāwän, wär has-jem erk mäjräd.

² Ellan-t äddinät ordanen a-s wär t-illa amənsi s-wädden äddooben tetäte-net, əllan-t daḡ iyyäḡ s-rəkkəm immun-näsän wären tət ar isudar wi n-išəkraš.

³ Ämära, wär-isämäḡdrayət wa s-a ijräw-dāḡ, ad-t-äks, wa iyyäḡän igdälän i-iman-net tetäte n-imənsiwän iyyäḡ; wär-isäwaret daḡ wa wärän

itətt härät iyyän uđlem ere wa s-a ijrāw-dāx, ad-t-ākš ed ij'-as Mässināx edägg ənta-dāx.

⁴ Ak kāyy fāw-i isawarān akli n-iyyän uđlem, mi tāmoosād? Ajän wādden jer-ibdad wāla ođa, mās-s a iqqal a-wen, ma tākkuulād? Əlməd a-s ad-ibdəd fäll-iman-net ed Emāli-i t-illān ila tārna n-ehel-net.

⁵ Iyyād əddināt, ija xur-sān a-s ill'-e ašāl ufān iyyän, ija xur-iyyād a-s, a-di, wār-əzleyän härät; äyyät hak əwadəm d-a-wa orda, igdāh xas ad-ikna ukəs n-āššāk dāx-a-wa iha.

⁶ Wa əzinämäzläyän išilan, ittaf əlxal-wa dāx-ašāl-wa, izənnəməzləyet-tän i-ad-isəmxār Emāli s-a-wen; ere dāx wa s-a ijrāw, ad-t-ākš, isəmxāret Mässināx ed a ijrāw-dāx, ad-irəš i-Mässināx isuf-win-dāx t-ija. Ere dāx wa s-ill'-e a wār-itətt, isəmxār Emāli dāx-a-wen-dāx ed ənta dāx, itumay i-Mässināx a-wa has-ija.

⁷ Wār t-illa dāx-nāx ere wārān idder ar i-iman wi-net xas, wār t-illa dāx ere madān-əmmāt i-iman wi-net xas.

⁸ Xas kunta nəddar, Emāli a-s nəddar, kunta dāx nəmmut, ənta a-s nəmmut. A-wen-dāx a fäl jer-nəddar wāla nəmmut, Emāli a hanāx-ilān.

⁹ Wār t-ihā əššāk a-s Əlmasex əmmut, inkār-dd jer-inəmmuttan i-ad-ixkəm fäll-inəmmuttan hakd-dāx d-əddināt wi əddārnen.

¹⁰ Adiš, kāyy, ma s-đallāmād əñña-k, samədrayāt-t? Iket-dāx-nānāx, ilkam ad-dd-nəbdəd dat-Mässināx i-ad-hanāx-išrāx?

¹¹ A-wen-dāx a dāx-hanāx-əssewāl əlkəttab n-Mässināx a-s innā:

«Innā Emāli:

Nākk əddarāx,

wār t-illa ägg-adəm s-wādden ilkam ad-dat-i irkāx,

ilkam ad-hi-aməlān iket-dāx-nāsān.»

¹² Ašāl-en n-tebādde dat-Mässināx, hak ägg-adəm d-a-wa has-jän imojjan-net.

Nəbdəwet d-amsəwār n-uđlem jer-iman-nānāx

¹³ Nāyyet anməsrəx jer-iman-nānāx, əttəfāt ənniyāt n-ad-wār jem dat-əñña-wān a t-isijärtəqqilān wāla a t-e-isiđəwən dāx-immun-net.

¹⁴ Dāx-a-wa ordex, a-wen dāx torda sār-i dd-falāt Emāli Xisa, əkkasāx dāx əššāk dāx-a-wen, wār t-illa fāw a itaməkšen xāramān, māšan afäl issəxrām əwadəm härät i-iman-net, adiš, xāram-as.

¹⁵ Kunta kāyy, təssəba n-a itakkān emm-nāk a fäl mad-šənnəməsrəyād əñña-k, adiš, əndek tārha dāx-a-wen? Wār təšnəmāsrəyād əñña-k dāx-təssəba n-a itakkān emm ed ənta-dāx, təssəba-net a dāx-əmmut Əlmasex.

¹⁶ Wār hawān-itumaset härät tārham əssəbab fäl kāwān-tizəmən əddināt, əbdəwāt dār-s

¹⁷ ed, isālan wi n-Təmmənəya n-Mässināx, wādden isālan n-tetäte d-tesəse xas, isālan n-iqqud d-əlxeer d-tedəwit s-tārna n-Unfas Šəddijän.

¹⁸ Ere wa itamašalān erhet n-Əlmasex s-a-wen-dāx, ad-ijrəz əlxal-net i-Mässināx, əqqəsān-as dāgg-adəm.

¹⁹ Ayətma-x, nədgəzet dāx-umāx n-əlxeer d-anmədhal jer-iman-nānāx i-ad-nəşsuhət dāx-immun-nānāx.

²⁰ Wār-itumaset a itakkān emm əssəbab inaxxāsān a-wa ija Mässināx dāx-ulh n-əñña-k. Ədduuttāt a-s wār t-illa härät s-wādden šəddij māšan hakd a-wen-dāx uf'-ak, ad-tajələd härät uhən, ad-siđəwād əñña-k dāx-abākkađ.

²¹ Uf'-ak ad-təyyəd fälla-k isan hakd-dāx asməd d-a-wa sāl a-wen iket-net əddooben ad-işənməsrəy əñña-k.

²² A-wa dāḡ-təkkasād äššāk, eṭṭef-t jere-k d-Mässināḡ, igdāh dihen-dāḡ. Təndəḡ i-ere wa wārān iššek iman-net dāḡ-ijitān-net.

²³ Ere wa ässokān härāt emm-net uhən-dāḡ iššak iman-net, äwadəm-en, asiḡəw ḡas a itajj iman-net dāḡ-äššäreḡa n-Mässināḡ. A ij' äwadəm-dāḡ, dāḡ-iššak iman-net, abākkaḡ.

15

Zäydärät fäll-wi s-fäsus immun-näsän

¹ Näkkäneḡ-i äššohätnen dāḡ-immun-nänāḡ s-Mässināḡ, nəšmäret i-wi s-rəkkəm wa-näsän. Wār nətumaset äddināt wären zənəzjumut ar dāḡ-iman wi-näsän ḡas,

² änn-ak, nədgəzet dāḡ-a-wa infän äddināt wi iyyäḡnen i-ad-əššuhun dāḡ-immun

³ fäl-a-s Älmaseḡ ya, wädden iman wi-net ḡas a dāḡ-äznəzjamät. Isälan-net ənta-en-dāḡ a dāḡ-innä əlkəttab:

«Innä Mässināḡ:

Äddināt wi käy-gaggärnen, näkk, a gaggärän.»

⁴ Əlkəttabān wi ärəwnen, a-wa dāḡ-sän iktābān iket-net, iktab i-ad-hanāḡ-umas isəkta hanāḡ-samätarnen i-ad-nəšmär dāḡ-alkum i-Mässināḡ, ismaḡān ulhawän-nänāḡ, nəkrəš äṭṭāma itbatän.

⁵ Mässināḡ-i ihakkän əššəmurät dāḡ-alkum-has, isasmaḡ ulhawän, ädoobät ad-sär-nāḡ dd-arəw tanmənnak jer-iman-nänāḡ, nalāh d-ḡisa Älmaseḡ.

⁶ Afäl ija a-wen, ad-nəṭṭef iyyän n-ənniyät, nəqqayəm nətəmmal Mässināḡ-i n-Abba-i dd-izjār Emäli-nänāḡ ḡisa Älmaseḡ.

ḡisa, tamətte iket-net a-s dd-osa

⁷ Nəmāqbəlät jer-iman-nāwän s-əmmək wa s-kāwän-iqbäl Älmaseḡ i-ad-itwəsəmyār isəm n-Mässināḡ.

⁸ Təssanäm a-s Älmaseḡ, Mässināḡ a t-dd-äšmašälän s-käl-Älyähud i-ad-tän-isəlməd a-s ärkəwälän wi ijjäš ibda i-imḡarän-näsän ənta a ḡur-dd-əmdän, ənta a-s tasəṭbat-näsän, Mässināḡ daḡ, wār-irəzz dāḡ-tənnan-net.

⁹ S-tizarät, käl-Älyähud a-s dd-osa, təzzar, əlkämän-asän äddināt-wi iyyäḡnen wären ämoos dāḡḡ-Älyähud. A-wen, ij'-e Mässināḡ i-ad-t-aməlän inəzzulam dāḡ-təssəba n-tāhanint-net s-əmmək wa s-tän-innä əlkəttab n-Mässināḡ a-s innä:

«Ad-käy-aməlāḡ jer-tiwsaten,

itwəsəmyār isəm-näk.»

¹⁰ Iktab daḡ a-s:

«Ya tiwsaten!

Ahärmät tedawit d-tamətte ta n-Emäli.»

¹¹ Iktab daḡ a-s:

«Ya tiwsaten! Aməlmät Emäli iket-dāḡ-näkmät, əzzəjmät imäslan-näkmät, taməlmät-t.»

¹² Isälan n-a-wen-dāḡ a dāḡ-innä ännäbi Saya:†

«Ilkam ad-ikrəš Yasa ahäya,

ad-immukəl fäll-tiwsaten n-äddunya iket-dāḡ-näsnät,

ad-umas äṭṭāma-näsnät.»

† 15:12 15:12 A-wa ännäbi dd-äzzarän i-ḡisa, äloläy dāḡ-isälan-net əssayät timaḡ n-awätay dat-tiwit-net.

13 Ikf'-iwän Mässinäx-i s-ənta ɣas a isajarän ättäma, isanäflay dāx-tedāwit d-älxer dāx-äddimmät n-immun-nāwän i-ad-imɣar ättäma-nāwän sār-s s-tärna n-Unfas Šaddijän.

Äddälil n-täkarde n-Buləs

14 Ayətma-ɣ, əkkasāx äššäk a-s tøjlayäm dāx-a-wa häm, wär t-illa musnät hin-tođanäm, täddoobem daɣ ad-tənməkfəm äddäbaratän jer-iman-nāwän dāx-isälan n-immun.

15 Mäšan hakd a-wen-dāx, ijjäš-ahi-dd derhan n-ad-kāwän-dd-səktoɣ härätän iyyäđ s-hi-ikfa Mässinäx turhajät-näsän d-iba n-tasäja n-ad-hawän-tän-in-səssiwəđäx.

16 Ənta a hi-äsnäfränän dāx-ännuxmät-net i-ad-umasāx akli n-ŸisaÄlmasex ixdamän jer-äddinät-wi wären ämoos dägg-Älyähud i-ad-tän-säsläx Älənžil n-Mässinäx əntäneđ-dāx, umasän šund takute äššišdäj Unfas Šaddijän, takute has-təjrazät.

17 Abäraj-in, tassaxt d-Ÿisa Älmasex ed Mässinäx a hi-ijän dāx-ämašal-wa-dāx.

18 Kunta hannäyäm a-s häläx mäjräd, ärheey ad-təlmədäm a-s a-wa jänney iket-net, jänney-t dāx-isälan n-a-wa ija Älmasex s-iman wi-nin jer-inəzzulam† i-ad-ämašälän erhet n-Mässinäx.

19 A-wen ij'-e Mässinäx s-a-wa xaṭṭäbäx d-a-wa tajjäx. Ässewäđ fäll-a-wen a-s ikf'-ahi turhajät s-tärna n-Unfas-net amišəl n-ijitän n-Mässinäx d-härätän ässuksäđnen äqqannen eɣäf. A dd-fäläx Yärussäläm har äkall wa n-Ilirya, wär t-illa edägg s-wädden jey dāx-s isälan n-Älənžil n-Älmasex.

20 Dāx-iji n-isälan-en, jey ittus i-iman-in n-a-s wär səllənžey ar idäggan wi s-käla wär əslən i-isəm n-Älmasex ed, wär-ärhey ad-ädyäx fäll-ässas ässinta äwadəm dat-i.

21 Jey a-wen dāx-ənniyät n-ad-ämašäläx a-wa innä əlkəttab n-Mässinäx a-s innä:

«Wi s-wär käla əslän i-isəm-net,
ad-t-ənhəyän;
wi s-wär käla əslän i-isälan-net,
ad-t-əjrahän.»

22 Ənta-den-dāx a ija a-wa-dāx, a-wa hi-ikkäsän ad-kāwän-in-asāx.

Derhan wa ija Buləs n-ad-äkk Roma

23 Ämära, hannäyäx a-s äbas hi-itṭaf härät dāx-idäggan-win-dāx, wär-ärhey ɣas ämära ar ad-kāwän-in-äkkäx ed a ilan iwətyan äsidärhänäx a-wen,

24 ənhəyäx-kāwän afäl əkkeɣ äkall wa n-Isbanya. Dihen, afäl əkkäsäx tenere-nāwän, ad-hi-təjəm äddäbara s-hin-äwwäđäx siha s-əkkeɣ.

25 Iket-di d-itäj a-wen-dāx, əkkeɣ Yärussäläm, äwwayäx tirjit i-iməšeddəjän wi t-əllänen dihen, tärmäs tämäxatert.

26 Əssäxläfän-ahi iməšeddəjän wi hänen älkänisäten ti hänen tajiwen ti n-Masidunya d-Akaya tasəssiwit jan i-älmässexitän wi n-käl-Älyähud tärmäs tämäxatert dāx-Yärussäläm.

27 A-wa jän, wädden äwadəm a hasän-t-äšhäššälän, a tän-dd-ikkäsän, änihäja daɣ a-wa jän ed kunta imumənän wi n-käl-Älyähud, əntäneđ

† 15:18 15:18 – Ÿur-käl-Älyähud, ere wärän ämoos ägg-Älyähud s-aläšäl meɣ ere wärän ilkem i-äddin-näsän, iket-net, änäzzalim a ämoos. A-wen-dāx a fäl tiwsaten ti iyyäđnen iket-näsnät, ti n-inəzzulam. — Ašäl-i-dāx, änäzzalim, äkafär (ere wärän issen s-Mässinäx).

a äzozäynen Mässinäy i-inəzzulam, änihäjjä s-ämära-däy d-tän-tärmäs tämāyatert, käwāned a hasän-tät-itakkäsän s-a-wa tətṭäfäm.

²⁸ Afäl hin-ässawädäy isälan-win-däy har jey tasəssiwit-ten-däy jer-ifassän n-käl-Yärussälam, ad-käwän-in-əmmäräy təzzar akəyāy s-Isbanya.

²⁹ Əssanäy a-s a-s käwän-in-e-asäy, ad-hi-umas a-wen imraš äjjootnen sār-i dd-oraw Älmasex.

³⁰ Ayətma-ç, jey-awän idəm Emäli-nänäy Ƴisa Älmasex d-tārha ta ija Unfas Šaddijän däy-ulhawän-nänäy, d-ad-täqqayməm hin-təddaläm Mässinäy, tahərəm dār-i anmäny wa hey

³¹ i-ad-dd-əzjāräy ifassän n-inämäšrayän wi hānen Älyähudəyät, tumas tadhəlt ta äwwäyāy i-iməšseddəjän wi hānen Yärussälam əssəbab n-tedäwit.

³² Afäl otäs Mässinäy a-wen, a-s käwän-in-mad-asäy, əjrazän-ahi iman-in, əjrəwäy ya s-ad-äjäy išilan n-täsonfat çur-wän.

³³ Oyyey-käwän d-älxer n-Mässinäy. Amin!

16

Timtär d-tihulawen

¹ Ässiçlāfäy-käwän Fibya ta n-wälätma-näy däy-äddin, tədhäl s-a äjjeen älkänisät ta n-açrəm wa n-Sinkərya.

² Afäl ašäl wa d-käwän-in-tosa, səbbärrəkät-tät s-asəbbärrək wa dār-änihäjjän iməšseddəjän ilä Emäli, a-s tämyätär-däy, äkfät-as-t. Sārhone, ijmaç-t äššäk a-s ännufläyän däy-s äddinät äjjootnen hey näkk iman-in.

³ Tähuuläm-ah'-in Briska d-Akilas-i n-imadhalän-in däy-älxidmət wa nəha i-ƳisaÄlmasex.

⁴ Iräš-asän Mässinäy; jän iman-näsän däy-miši i-ad-hi-ədhəlän. A-wen, wädden näkk ças a t-ijannen, jannen-t daç imumənän wi hānen älkänisäten ti n-tiwsaten ti iyyäçnen.

⁵ Tähuuläm-ah'-in älkänisät ta täžžämmayät däy-ehän-näsän.

Tähuuläm-ah'-in Ibäntus-i əkney tārha, ənta-en-däy a äzzarän s-immun s-Älmasex däy-teje ta n-Azya.

⁶ Tähuuläm-ah'-in Märyäma, tədgäz hullan däy-älxidmət wa ha fälla-wän.

⁷ Tähuuläm-ah'-in Idrinikus d-Yunya-i n-käl-äkall-in, käla dār-sän ohäräy takärmüt. Meddən, a-wa ätiwäsämçärnen jer-inəmmušal, äzzarän-ahi immun s-Älmasex.

⁸ Tähuuläm-ah'-in Änbliyatus-i əkney tārha däy-Emäli.

⁹ Tähuuläm-ah'-in Urban wa n-ämadhal-in däy-a-wa hey i-Älmasex, ähuuläç-in Stakis-i əkney tārha.

¹⁰ Tähuuläm-ah'-in Äbbelis, änhäynähäy däy-immun-net, mäšan, itbat. Tähuuläm-ah'-in ehän wa n-Aristubul.

¹¹ Tähuuläm-ah'-in Haruddin-i n-ašäçqqaç-in.

Tähuuläm-ah'-in imumənän wi ila Emäli əzzäçnen ehän wa n-Narsisus.

¹² Tähuuläm-ah'-in Trifina d-Trifusa, ədgäznät hullan däy-a-wa hānät i-Emäli.

Tähuuläm-ah'-in Bärsidya ta n-wälätma-näy däy-äddin-i əkney tārha däy-Emäli, tədgäz ənta-däy hullan däy-a-wa ha i-Emäli.

¹³ Tähuuläm-ah'-in Rufus, ähaləs n-nefran n-Emäli a ämoos.

[Tähuuläm-ah'-in daç ma-s-i wärät təçley d-ta-nin.]

- 14 Tähuuläm-ah'-in Asinkiritus d-Fälγun d-Armis d-Bäṭrubbas d-Irmas d-ayətma-wi əzzäḡnen γur-sän.
 15 Tähuuläm-ah'-in Fäylalug d-Yulya.
 Tähuuläm-ah'-in Nere d-wälätma-s ənta d-Olinbas d-iməššeddəjän iket-näsän wi t-əllänen γur-sän.
 16 Nəməjjät jer-iman-nāwän isofan n-tārha təmdat, ähuulnät-kāwän-in älkänisäten n-Älmasex iket-däḡ-näsnät.

Timtär

17 Ayətma, äsimätäräḡ-kāwän d-ad-tagəzäm iman-nāwän däḡ-äddinät-wi dd-tirəwnen täbəḍḍawt jere-wän, tattārän ere äšnämäšräyän. Äddinäten, wär-əlkemän i-a-wa kāwän-nəssäḡra, sənnəməjjəjjät iman-nāwän dār-sän s-iyyəät.

18 Wädden Älmasex-i n-Emäli-nänäḡ a-s äxdamän, a ästäräjjen däḡ-tisatten-näsän ḡas a-s əmmaḡän. Əkkan jer-äddinät wi s-wär ikna immun-näsän tenəḡḡe, takärrasän-tän s-täzude n-iləs d-tiläqqad.

19 Kāwänəḍ, äjjəyhän äddinät iket-däḡ-näsän a-s təssanäm a-wa häm, sajadäm i-mäjräd n-Mässinäḡ. Äddiwəḡ hullan däḡ-isälan-nāwän, siwəḍät härwa fäll-a-wen, tumasäm iməssorha tamašalnen a-wa oläḡän, wär toseḡäm fäw härät d-a-wa läbasän.

20 Elməḍät a-s Mässinäḡ-i n-Mässi-s n-älxer, šik däḡ a-s-e-ilkäz Iblis daw-ıdarän-nāwän, ikf'-iwän Emäli-nänäḡ ḡisa ännuḡmät-net.

21 Ähuul-kāwän-in Timoti-i n-ämadhal-in, ähuul-kāwän-in Lisyus d-Yasun d-Sosibäṭrus; dägg-äkall-in əntänəḍ-däḡ.

22 Näkk Tärtəyas-i isaktab Buləs täkarḍe-ta-däḡ, ähuuläḡ-kāwän-in däḡ-idəm n-tassayt ta nəja d-Emäli.

23 Ähuul-kāwän-in Gayəs-i γur-tizəbbuḡ, ənta daḡ a γur-tazämḡäḡ älkänisät. Ähuul-kāwän-in Irastus wa n-änazraf n-aḡrəm, ähuul-kāwän-in äḡḡa-näḡ Kartus. [

24 Ikf'-iwän Emäli-nänäḡ ḡisaÄlmasex ännuḡmät-net. Amin!]

Təmmal i-Mässinäḡ

25 Təmmal i-Mässinäḡ-i ilän tärna n-ad-kāwän-isəşşuhət däḡ-immun-nāwän s-əmmək wa s-t-xatṭäbäḡ däḡ-Älənžil-i ämoosän mäjräd n-ḡisa Älmasex. Älənžil, isälan-net, käla ämoosän əddäraj mäšan, äsnäfaläl-tän-dd Mässinäḡ.

26 Ašäl-i, isälan-en, əlmädän sār-sän äddinät, əktäbän-tän day ännäbitän s-a-wa s-hasän-omär Mässinäḡ-i n-Amäḡlol. A-wa s-käla iffär dd-änfalälän, äsnäfaläl-t-dd Mässinäḡ i-ad-isəlməd tiwsaten ti n-inəzzulam† s-Älənžil, amənnät s-ḡisa, ämašäl-nät erhet n-Mässinäḡ.

27 Mässinäḡ ḡas a-s Ämusän. Naməlet isəm-net härkuk däḡ-äddimmät n-ḡisaÄlmasex. Amin!

† 16:26 16:26 – ḡur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änäzzalim a ämoos. A-wen-däḡ a fäl tiwsaten ti iyyäḍnen iket-näsnät, ti n-inəzzulam. — Ašäl-i-däḡ, änäzzalim, äkafär (ere wärän issen s-Mässinäḡ).

Täkarde ta täzzarät iktäb Buləs i-käl-Kurənta

Äšajəš

¹ A-wa näkk, Buləs, wa dd-iyra Mässinäx dəx-erhet-net, i-ad-umasäx änämmašul n-ŶisaÄlmasex, hawän-in-iktabän näkk d-Sustin-i n-änŶa-x dəx-äddin.

² Nəktab-awän-in käwäneḍ-i n-iməššeddəjän hänen älkänisät ta n-aŶrəm wa n-Kurənta, nəktab-in daŶ i-iməššeddəjän wi iyyäḍnen Ŷarränen isəm n-Emäli Ŷisa Älmasex, edägg hän-däx, Emäli-näsän a-s wa-nänäx.

³ Nähuul-käwän-in, nəttar s-Mässinäx-i n-Abba-nänäx d-Emäli-nänäx Ŷisa Älmasex a käwän-ikfän ännuymät d-älxer.

Tämayit n-Buləs i-Mässinäx dəx-təssəba n-käl-Kurənta

⁴ Ämmoyäx i-Mässinäx, timələx-t hak ašäl dəx-təssəba n-ännuymät wa sār-wän-dd-torāw tassaŶt ta jām d-ŶisaÄlmasex,

⁵ wār t-illa fāw a-s wädden ikf'-awän-t; ikf'-iwän musnät n-mäjräd, ikf'-iwän daŶ musnät n-erhet-net.

⁶ Hannäyäx a-s isälan n-Älmasex wi fäl hawän-näjjəyḥ, təsläm-asän, təjrahäm-tän, əntämän dəx-ulhawän-nāwän.

⁷ Dəx-isälan n-isuf wi itäj Unfas Šäddijän i-dägg-adəm, wār t-illa dəx-sän-i hin-toḍanäm, təjrawäm-tän iket-dəx-näsän; diha t-təlläm ašäl-i-dəx, wār täqqeläm Ŷas ar i-uḡəl n-Emäli-nänäx Ŷisa Älmasex-i

⁸ äddooben ad-käwän-isəntəm dəx-immun-nāwän, itṭəf-käwän i-ašäl wa n-tebädde dd-mad-iqqəl Ŷisa Älmasex, wār t-illa uḍlem käwän-iwarän.

⁹ Mässinäx-i käwän-dd-iŶrän s-iman-net i-ad-tärtəyäm d-Rure-s Ŷisa Älmasex-i n-Emäli-nänäx, ämaḡdal a ämoos.

Bäḍḍo-bäḍḍo wa ijän dəx-älkänisät ta n-Kurənta

¹⁰ Ayətma! Əttaräx dəx-wän dəx-idəm n-Emäli-nänäx ŶisaÄlmasex d-ad-tahərəm iyyän n-emm, wār itəmmalet bäḍḍo-bäḍḍo wäl' iyyän jere-wän, äjät härät iket-net s-iiyät tayətte d-iiyän n-ənniyät.

¹¹ A-wen janneŶ-awän-t, ayətma-x, fäl-a-s, jan dəx-i äddinät n-ehän wa n-Kəluwi isälan ädduuttätnen n-a-s, əllan-t ikənnasän dd-orawnen tibəḍḍawen jere-wän.

¹² Əgley har əsley fāw a-s Ŷur-wän dihen, əllan-t iyyäḍ jannänen: «Näkkäneḍ, a-wa fäll-igla Buləs a fäll-nəgla.» Iyyäḍ jannen: «Näkkäneḍ, Äbbäloš a nəssof», jannen daŶ iyyäḍ: «Aa, näkkäneḍ Ŷas, Bəṭrus a-s nəlkam», jannen daŶ wi iyyäḍnen: «Fāw, näkkäneḍ, Ŷisa a-s nəlkam.»

¹³ Uhen käwäneḍ, ma käwän-ijrāwän? Ajän Älmasex, ibḍa meŶ äzun? Ajän Buləs a ätwäšläbän dəx-təssəba n-ibäkkəḍän-nāwän? Ajän, isəm wa-nin Buləs a-s tätwäsälmaŶäm dəx-aman?

¹⁴ Ämmoyäx i-Mässinäx a-s, wār t-illa ere dəx-wän ässilmäŶäx, kunta wädden, Krisbus d-Gayəs

¹⁵ i-ad-wār ijənn äwadəm wäl' iyyän a-s isəm wa-nin a-s ätwäsälmaŶ dəx-aman.

16 Änsät-ahi-dd, əkteɣ-dd a-s näkk a issəlmäɣän käl-ehän wa n-Stifanas. Ɖarät äddinät-win-däɣ, wär-əssenäɣ fäl ere ässilmäɣäɣ däɣ-aman ɣur-wän ed, näkk,

17 wädden asəlməɣ n-äddinät däɣ-aman a fäl hi-dd-äšmašäl Älmaseɣ, änn-ak, äšmašäl-ahi-dd i-ad-səllənžey äddinät, wädden s-a iglan s-tayette ta säɣren dägg-adəm i-ad-wär fənnəžäɣ härät däɣ-tärna ta hät tamättant ta ija Älmaseɣ fäll-tajəttewt.

Tärna n-Mässinäɣ ta təhät tajəttewt ta fäll-ämmut ɣisa

18 Tidət, älxuɓbät wa ihälän ebre n-isälan n-tamättant ta ija ɣisa fäll-tajəttewt, ämoos i-wi halläknen mälayäɣna mäšan, näkkäneɗ-i dd-iɣləs Mässinäɣ, ämoos-anäɣ tärna ta t-dd-fälät.

19 Däɣ-isälan n-a-wen-däɣ a däɣ-innä əlkəttab n-Mässinäɣ:

«Ad-äɣšədäɣ iɣäfawän n-iməssorha, səbboɗtələɣ musnät n-käl-musnät.»

20 Šamad isälan-den-däɣ, ma s-äddooben iməssorha tənna-net? Ma s-äddooben käl-musnät iji-net? Ma s-äddooben inəsdebbärän n-äddunya-ta-däɣ tənna-net? Mässinäɣ iman-net a issətbätän a-s särho n-äddunya-ta-däɣ, mälayäɣna ɣas

21 fäl-a-s, šamad äddunya-ta-däɣ, ənta hakd särho-net, indär-as ad-təzzəy Mässinäɣ-i s-a-wa ija iket-net, särho a-s t-ija, ijrəz-as ad-iɣləs imumənän s-immun sär-s, a-wen, jan-t wi sär-s wären omen, mälayäɣna.

22 Ənhəywät ɣas, käl-Älyähud, wär-ošelän ɣas ar ɗarät ahänay n-ijitän n-Mässinäɣ, käl-Älyunan† əntäneɗ, särho wa n-fälšäfa a ɗarät ošalän,

23 mäšan, näkkäneɗ, Älmaseɣ wa ätwäsläbän fäll-tajəttewt a nəxaɗtəb, ämoos a-wen i-käl-Älyähud a-s wär-ərhen məsällät-net, ämoos i-inəzzulam† mälayäɣna.

24 Hakd a-wen-däɣ, ämoos i-äddinät-wi dd-iɣrə Mässinäɣ s-iman-net i-ad-tän-iɣləs, jer-i n-käl-Älyähud wäla i n-käl-Älyunan, tärna d-särho wa tän-isalmadän s-Mässinäɣ.

25 A-wa dd-ifälän Mässinäɣ wär jen äddinät härät, ojär särho wa t-ihän, uhən wa ihän dägg-adəm iket-däɣ-näsän, a-wa dd-ifälän Mässinäɣ wär jen dägg-adəm härät, ojär äššahät wa t-ihän, wa ihän dägg-adəm iket-däɣ-näsän.

26 Səjrähät ɣas, ayətma, əmmək wa s-käwän-dd-iɣrə Mässinäɣ s-iman-net. A-s käwän-dd-iɣra, wär däɣ-wän əjjətän iməssorha s-a-wa əɗkädän dägg-adəm s-särho, wär käwän-hen daɣ iməšsuha wäla ilällan s-əjut,

27 mäšan a-wa-däɣ ämoosän dat-tiɗtawen n-äddunya-ta-däɣ mälayäɣna, ənta a äsnäfrän Mässinäɣ i-ad-iqqən iɣäfawän n-iməssorha, a-wa-däɣ wär jen käl-äddunya härät, a äsnäfrän i-ad-tän-isəmmäxəlxəl sär-s.

28 Härätän-win-däɣ, wär-əssəfrärän, əlkähän, wären əla idəm data-sän, a äsnäfrän Mässinäɣ i-ad-tän-isəmmäɗrəy sär-sän.

29 A-wen, ij'-e Mässinäɣ i-ad-wär-isəkif äwadəm wäl' iyyän iman-net data-s.

† 1:22 1:22 Itawann'-asän: Gəriktän. (Les Grecs däɣ-Təfränsit). Əzzaɣän Erobbä däɣ-äkall wa itawänna: Gəris (La Grèce däɣ-Təfränsit). Tawalt-näsän: Tälyunanit. † 1:23 1:23 — ɣur-käl-Älyähud, ere wärän ämoos ägg-Älyähud s-aläšäl meɣ ere wärän ilkem i-äddin-näsän, iket-net, änäzzalim a ämoos. A-wen-däɣ a fäl tiwsaten ti iyyäɗnen iket-näsän, ti n-inəzzulam. — Äšäl-i-däɣ, änäzzalim, äkafär (ere wärän issen s-Mässinäɣ).

³⁰ Ənta-en-däx a kăwăn-osăyăn d-ŶisaĂlmasex-i hawăn-dd-ămoosăn sărho wa dd-ifălăn Măssinăx d-iqqud; idəm-net a dăx-kăwăn-işşəşdăj Măssinăx, əsdărfăt-kăwăn-dd dăx-ibăkkadăn-năwăn

³¹ s-əmmək wa s-tăn-innă əlkəttab a-s innă:
«Ere s-ăsriwăn iman-net-dăx,
israwnet dăx-təssəba n-a-wa has-ija Măssinăx.»

2

A-wa ibdăn fälşäfa ta n-dăgg-adəm d-tănăfalilt ta n-Măssinăx

¹ Ayətma, aşäl wa d-kăwăn-in-osex i-ad-hawăn-ăjăx isălan n-əddəraj wa dd-ăsňăfalăl Măssinăx, wăr hawăn-jeş iman-in ere ojărăn əddinăt wi iyyădnen musnăt n-măjrad, wăla ere tăn-øjărăn sărho.

² A-wa əkkăsăx əlley jere-wăn, wăr t-illa anəzjum hi-dd-ijjaşăn kunta wădden wa n-ad-hawăn-ăjăx isălan n-isəm n-ŶisaĂlmasex d-taməttant ta ija fäll-tajəttewt; a-wa săl a-wen-dăx, wăr hawăn-əjjeşăx isălan-net.

³ Əsrăkkămăx-awăn iman-in, jeş tarəmmeyt-ta-dăx fäl aşkədkəd a tajjăx,

⁴ a-wa ənney d-a-wa əxtăbăx, wăr-insa fäll-musnăt n-măjrad wăla fäll-tihusay-net s-əmmək wa s-tăjjăn dăgg-adəm a-wen i-ad-ăkkărrăsăn imidiwăn-năsăn, ənn-ak, a-wa hawăn-ənney, tărna ta ihăkk Unfas Şăddijăn a fäll insa

⁵ i-ad-əns immun-năwăn fäll-tărna ta n-Măssinăx wădden fäll-sărho n-tayətə wa n-dăgg-adəm.

⁶ Ədduuttăt a-s əddinăt wi ərhanen afăham d-tikawt n-s-data dăx-immun, əmoos-asăn a-wa hawăn-nəxaţţăb sărho măşan sărho-wen-dăx, wăr-oher hărăt d-sărho wa fäll-təgl' əddunya wăla wa fäll-əglăn iməşşuha n-əddunya-ta-dăx-i s-a ijăn-dăx, ilkam ad-tăt-iba.

⁷ Năkkăneđ, sărho wa dd-ifălăn Măssinăx a-s nəxaţţăb, a-wen, əddəraj a-s kăla t-əmoos s-aşäl-i-dăx, əsnăfalăl-dd Măssinăx əlmăxna-net; ənta-den-dăx a-wa hanăx-dd-əsmăjnăt Măssinăx hărwa wăr dd-tăxlek əddunya i-ad-nəkrəş idəm şur-s.

⁸ Wăr t-illa dăx-iməşşuha n-əddunya-ta-dăx-i ijrawăn sărho-wen-dăx ed ənnăr săr-s əssanăn, wăr təyyən Emăli-i n-măssi-s n-ənnur ətiwəşləb fäll-tajəttewt.

⁹ Əmoos a-wen a əssiitbătăn a-wa innă əlkəttab n-Măssinăx a-s innă:

«A-wa s-wăr kăla t-tənhăy tiţ,
wăr kăla has-təslă taməzzujt,
wăr kăla dd-ijjăş ulh n-əgg-adəm
fäl təmxăre n-tihusay-i-dăx ija,
ənta-den-dăx a-wa dd-əsmăjnăt Măssinăx
i-imărhan-net.»

¹⁰ A-wen, əsnăfalăl-anăx-t-dd Măssinăx s-tărna n-Unfas-net, ənta-i s-wăr t-illa a-s wădden isafăyk'-e-hi-dd, isafăyk-dd wăla a-wa ikittəw Măssinăx.

¹¹ Əndek şas dăx-dăgg-adəm-i issanăn inəzjam n-amidi-net? Wăr t-illa ere tăn-issanăn kunta wădden ənta iman-net, əmmək-wen-dăx day a-s, wăr t-illa ere issanăn a-wa ihăn inəzjam n-Măssinăx, kunta wădden Unfas n-Măssinăx iman-net.

¹² Năkkăneđ, wădden unfas wa n-əddunya a nəjraw, Măssinăx a hanăx-ikfăn Unfas-net i-ad-nəlməd s-isuf wi əhuuskătnehanăx-ija.

¹³ A-wen-dăx a fäl a-wa nəxaţţăb, wădden sărho iglan fäll-tayətə ta n-dăgg-adəm, sărho hanăx-ihakk Unfas Şăddijăn a-s nətamăjrad, nəsaşra

äddinät a-wa ämoos Unfas Šaddijän s-əmmək wa s-irha Unfas Šaddijän iman-net ad-nəsiwəl dəḡ-isälan-net.

14 Äwadəm wa iglän fäll-iman-net, wär-ihä Unfas Šaddijän ulh-net, wär-äddoobät ad-ijräh a-wa innä Unfas n-Mässinäḡ ed wär t-ija härät, wär-äddoobät ad-ijräh isälan-en ed härätän wi n-Unfas n-Mässinäḡ, tärna n-Unfas Šaddijän a-s tän-ijarräh äwadəm.

15 Äwadəm wa s-ihä Unfas Šaddijän ulh-net, ijraw musnät n-härät iket-net, issan ebädđi n-härätän, wär t-illa ere t-madän-išənnəməšrəy.

16 Ēnta-den-däḡ a-wa äsdättät Mässinäḡ a-s innä:

«Mi issanän a-wa ihän inəzjam n-Mässinäḡ bäršey ad-has-umas enəsdebbär?»

Näkkäneḡ-i omännen, ikf'-anäḡ Älmaseḡ ənniyät wa t-ihän.

3

Bäḡḡo-bäḡḡo, i läbasän

1 Ayətma-ḡ, a-wa hawän-janneḡ, wär hawän-t-jənnəḡ s-əmmək wa s-t-mad-ännäḡ i-äddinät dəḡ-änniihäḡ Unfas Šaddijän, änn-ak, jeḡ-awän-in mäjräd wa mad-äjäḡ i-äddinät əglanen fäll-derhan n-iman-näsän, ed ija ḡur-i a-s dəḡ-isälan-wi-däḡ n-immun, tämoosäm aratan härwa.

2 A-wen-däḡ a fäl mäjräd wa hawän-in-tajjäḡ, ämoos sär-i a-s šund axx, wädden imənsiwän äzzaynen, ed wär täddobem aləmaḡ-net, älwäxla a-s hannäyäḡ a-s har ašäl-i-däḡ, wär has-täddobem härät, ed wädden Unfas Šaddijän a dəḡ-wän ännihädän.

3 Käwäneḡ dəḡ har ämära-däḡ, wär t-illa a käwän-izlayän d-inəzzulam† ed hak iyyän dəḡ-wän, osam fäll-amidi-net, kannäsäm jer-iman-näwän. Ēntäneḡ-den-däḡ härätän wi käwän-əšlanen äsidättätnen a-s wär təzleyäm d-äddinät əglanen fäll-derhan n-iman-näsän.

4 Wädden, afäl dd-iggäd iyyän dəḡ-wän ad-ijanna: «Näkk Buləs a-s əlkamäḡ», ijann'-as wa iyyädän: «Aa fäw, näkk Äbbäloš a-s əlkamäḡ», ajän wädden ənta-den-däḡ a wa äsidätten a-s təttafäm älxal n-äddinät əglanen fäll-derhan n-iman-näsän.

5 Uhən Äbbäloš-i-däḡ fäw, mi ämoos? Näkk dəḡ Buləs, mi ämoosäḡ? Ēnhəywät! Näkkäneḡ, wär nämoos ḡas ar inaxdimän n-Mässinäḡ hawän-dd-ija əssəbab i-ad-käwän-in-nəsəssiḡəd isälan n-immun sär-s, wär hanäḡ-ihä dəḡ ere s-wädden a-wa itamašal iket-net, Emäli a t-ikfän turhajät n-amišəl-net.

6 A-wa ämešäläḡ, oläh ḡas d-ahəšk s-näkk a t-äddomen, äddomeḡ-t mäšan, Äbbäloš, a t-issəswän, issədwäl-t-dd Mässinäḡ.

7 A-wen-däḡ a fäl wa äddomen hakd wa issəswän, wär-ämoosän wäla, änn-ak Mässinäḡ-i dd-issədwälän a-s härät.

8 Wa äddomen hakd wa issəswän, wär t-illa a-s änimajärän ed hak iyyän dəḡ-sän, ad-t-äkf Mässinäḡ älxəqq n-tide-net.

9 Iket-nänäḡ, Mässinäḡ a där-nänniixdäm, käwäneḡ a-s ašəkrəš-net wa dəḡ-ixdäm, käwäneḡ dəḡ a-s ehän-net wa itədday.

A-wa iwärän imäsäḡran

† 3:3 3:3 – ḡur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änäzzalim a ämoos. A-wen-däḡ a fäl tiwsaten ti iyyädnen iket-näsän, ti n-inəzzulam. — Ašäl-i-däḡ, änäzzalim, äkafär (ere wärän issen s-Mässinäḡ).

¹⁰ Däx-a-wa hi-dd-iqqälän näkk, ikf'-ahi Mässinäx ännuymät n-ad-alähäx d-älbänna n-emässärho issanän älxidmät-net, ökney asəns n-ässas n-ehän, osä-dd dar'-i älbänna iyyän, ikräs fälla-s. Hakd a-wen-däx, ənta da a-wa dār-kāwän-äsīmätäräx: hak äwadəm-däx, äjet ənniyät i-əmmək wa s-itədday fäll-ehän-en

¹¹ ed wär t-illa ere äddoben asəns n-ässas säl wa s-išwār insä, a-wen a t-ämoosän Yisa wa n-Älmasex.

¹² A-wen-däx a fäl ässas-en, jer-ikras fälla-s äwadəm s-oräx wäla s-azrəf wäla s-timäxwanen ti n-tilällaten länen älqim, wäla s-isäxerän wäla s-aləmmoz wäla s-ajäbäl,

¹³ hak äwadəm-däx, ilkam ad-dd-infiləl a-wa ämešäl ed, ad-t-dd-isəffukkär ašäl wa ilkämän fäl-a-s ašäl-en, ähijäljäl efew wa išäšdajän härät iket-net i-ad-dd-infiləl a-wa ämešäl hak äwadəm.

¹⁴ Wa s-dd-äqqimän ijitän-net, wär tän-ikša efew, ad-ijrəw älhäk-net,

¹⁵ wa s-ikša efew ijitän-net, ad-ifut. Tidət, ad-ixləs mäšan, ad-aläh əlxəllas-net d-i n-ere fäll-intäs efew, ixläs-dd däx-s.

¹⁶ Ajän, wär tessenäm a-s kāwäneḍ a-s ehän n-ämudd wa šäddijän n-Mässinäx? Izzaḡ Unfas Šäddijän däx-uhlawän-nāwän.

¹⁷ Elmədät a-s ere äsmädäsän meḡ ere iḡšädän ehän n-ämudd-en-däx, ad-t-ihlək Mässinäx fäl-a-s ehän n-Mässinäx, šäddiij. Ehän-en daḡ, kāwäneḍ a t-ämoosän.

¹⁸ Wär däx-wän itäkərraset wäl' iyyän iman-net, i däx-wän ordän iman-net tayətte s-timtar ti fäll-təgl' äddunya, äsimätäräx-t d-ad-äj iman-net enəbbeddəl i-ad-t-äkf Mässinäx tayətte ta n-tidət

¹⁹ fäl-a-s, musnät wa tättiläl äddunya, əbbuddəl dat-Mässinäx. A-wen-däx a fäl iktab däx-əlkəttab n-Mässinäx a-s:

«Imusänän n-äddunya-ta-däx,
tikərras-näsän a-s tän-irammäs Mässinäx.»

²⁰ Iktab daḡ a-s:

«Issan Emäli a-wa ihän inəzjam
n-imusänän n-äddunya-ta-däx,
musnät-näsän, wär sār-s izley d-äho ähohän.»

²¹ Ayətma, wär täjjät fella-nāwän däx-äwadəm wäl' iyyän bäršəx ad-jannem: əlkamäx i-mändam wa wäla wa, ed wär t-illa fəw a-s wädden, ikf'-awän-t Mässinäx,

²² jer-näkk Buləs, wäla Äbbäloš, wäla Bətrus wäla äddunya wäla tämudre, wäla tamättant, a-wa t-illän ämära-däx hakd a-wa ilkämän. A-wen-däx iket-net, i-nāwän,

²³ mäšan, kāwäneḍ, il'-iwän Älmasex, Yisa Älmasex ənta, i n-Mässinäx.

4

A-wa iwärän inəmmušal dat-Mässinäx

¹ Ayətma-x, näkkäneḍ-i n-inəmmušal, eklan n-Älmasex a nämoos, ikf'-anäx Mässinäx turhajät n-ad-näwwäkkäl əddəraj wa s-dd-äsnäfaläl älmäxna-net.

² Ämära, äddinät äwwikkälnen härät, wär t-illa a däx-sän ätiwärhän a säl iqqud däx-a-wa äxläfan.

³ Däx-a-wa hi-dd-iqqälän, wär-äkkuläx däx-a-wa däx-i jannem kāwäneḍ, wäla däx-a-wa däx-i jännen äddinät wi iyyäḍnen, wär-ədgezäx däx-almud n-ak, a-wa fäll-i itawännen i olaḡän meḡ i läbasän.

4 Wār t-illa a dāḡ-əššakāḡ iman-in, hakd a-wen-dāḡ, wādden a fäll-i ikkasān udlem, Emāli a-s eməššerrāḡ-in.

5 A-wen-dāḡ a fāl hawān-janneḡ, wār tās-wārām āwadəm wāl' iyyān udlem a ikkās āzzāman n-a-wen wār dd-iwweḡ. Āyyāt a-wen i-ašāl wa dd-mad-ass Emāli-i he-ijən ānnur-net fäll-a-wa tājjān āddināt dāḡ-tihay, isənnəfiləl-dd a-wa ihān ulhawān n-āddināt. Ašāl-en, hak āwadəm, ad-ijrəw ḡur-Māssināḡ təmmal ta dār-ānihājja.

6 Ayətma-ḡ, əḡkälāḡ-awān-dd isālan-in nākk d-Ābbāloš i-ad-umas a-wen ālmital wa s-kāwān-safhamāḡ a-s: «Wār itākket āwadəm wāl' iyyān jənnəj a-wa ənnān əlkəttabān n-Māssināḡ.» A-wen-dāḡ a fāl wār-itābārajət wāl' iyyān dāḡ-wān dāḡ-tənnā n-a-s āssof iyyān dāḡ-nāḡ amidinet.

7 Kāyy daḡ-i itabārajān s-a-wen, ma led wār len āddināt wi iyyādnen? Ma led fāw s-wādden Māssināḡ a hak-t-ikfān? Šāmad daḡ a-wa led iket-net, Māssināḡ a hak-t-ikfān, adiš ma dāḡ-tabārajād šund a-s wādden Māssināḡ a kāy-ikfān.

8 Ayətma, kāwāneḡ ya, āru d-təyyəwānām, tärzāḡām, təssəntām fāw təmmənukəla, ābas sār-nāḡ tāmiḡatārām. Kunta tidət-dāḡ a-s tāmnakālām, tanəmmirt, adiš, nahret dār-wān təmmənukəla-ten-dāḡ.

9 Nākkāneḡ-i n-inəmmušal, s-tənnəḡ, ij'-anāḡ Māssināḡ adday n-āddināt, nolāh d-āddināt s-āru d-tāḡtās tamāttant-nāsān, nāmoos i-āddināt hakd ānjālosān taliwen dāḡ-sabāryaḡān.

10 Nāmoos āddināt wāren əjreh hārāt dāḡ-təssəba n-isəm n-Ālmaseḡ, māšan kud-dāḡ wār nəjreh hārāt, kāwāneḡ ya təmdam, tāssorhem dāḡ-tassaḡt ta jān d-Ālmaseḡ; nəbrar, nātiwālkāh māšan, kāwāneḡ tāmoosām iməşşuha, āssimḡārān-kāwān āddināt.

11 Har āmāra-dāḡ, isimmənniḡ-anāḡ laḡ d-fad, irmas-anāḡ ḡəlləl, nəjarrāw tiwit, nəmitānjār siha d-siha,

12 hak ašāl təffay tide-nānāḡ fāl əşşuhu n-ālxidmət wa nəha s-ifassān-nānāḡ i-ad-nəkkəs aḡāna fäll-iman-nānāḡ. Wi hanāḡ-gaggārnen, nəlaqqān-asān iman-nānāḡ, wi hanāḡ-ḡazzābnen, nəšammār-asān,

13 wi ḡaššādnen ismawān-nānāḡ, nəḡazād-asān məjrād; nāmoos ḡas dat-āddināt šund ānnikal hin-ifarrāḡ āwadəm, har āmāra-dāḡ, wār t-illa ere hanāḡ-āssifrārān.

Isəmmāḡḡ d-āddābaratān n-abba i-aratān-net

14 Ayətma, wār hawān-in-əkətbāḡ isālan-wi-dāḡ i-ad-kāwān-səkməḡ iman, wāla i-ad-kāwān-səkkurəkəḡdāḡ, ānn-ak, āddābaratān šund wi itājj abba isamātarān məddana-s a hawān-in-tājjāḡ, ed tidət-dāḡ a-s, aratān əkneḡ tārha a tāmoosām.

15 Āmāra, kud-dāḡ lam māraw afdān n-imāsāḡran kāwān-saḡranen isālan n-Ālmaseḡ, iyyān n-abba a lam, nākk a t-āmoosān ed nākk a kāwān-in-āssawāḡān isālan n-Ālənžil-i kāwān-osaḡān d-Ālmaseḡ.

16 A-wen-dāḡ a fāl, āsimātārāḡ-kāwān d-ad-hi-tāttālālām.

17 Dāḡ-isālan n-a-wen-dāḡ a fāl sār-wān-in-āšmašālāḡ Timoti-i n-rure-ḡ əkneḡ tārha, iḡdal hullan dāḡ-alkum-net i-Emāli, afāl kāwān-in-osa, ad-kāwān-dd-isəktəw tašniwen ti s-əlkamāḡ i-ḡisa Ālmaseḡ d-əmmək wa s-tānāt-salmadāḡ i-ālkānisāten iket-dāḡ-nāsnāt.

18 Iyyād dāḡ-wān ordan a-s wār-ilkem ad-kāwān-in-āqqalāḡ, itājj dāḡ-sān a-wen-dāḡ aḡu,

19 änsət ənniyät-nāwän, kunta irða Mässinäx s-a-wen, ad-kāwän-in-äkkäx šik, dihen äddinät wi xur-ija a-s wär-ilkem ad-kāwän-in-äqqaläx, ad-ənhöyäx a-wa äddoben

20 fäl-a-s Təmmənəya n-Mässinäx, Mässinäx a tät-isatbatän dāx-imojjan-nāwän wädden täzude n-mäjräd d-milyaw n-iləs.

21 Ma tärham dāx ämära? Ak ma tässofäm ad-kāwän-in-äkkäx äwwayäx taborit mex ad-kāwän-in-äkkäx d-ənniyät äzedän?

5

Asəmmädəs n-iman okäyän ämaku

1 Ayətma! Ma ämoos erk älxal wa fälla-wän nəsal? Ätiwäsla a-s ih'-iwän äwadəm ittafän erk älxal, erk älxal s-käla wär-ätwäsla wäla jer-inəzzulam,† ed itawänna a-s ih'-iwän ähaləs itihrən asəftäx d-hänne-s n-ti-s.

2 Yas kāwäned, ija xur-wän xorəzzəma ogdähän d-a-wen-däx, uhən-däx, häläm ad-tabärajäm, änihäjja a-s iba a təttafäm, isnanän iman-nāwän, təkəkəsəm-in äwadəm wa ämešälän təkunt togdähät d-a-wen-däx jere-wän.

3 Tidət, wär t-əllex xur-wän mäšan, a-wen wär hin-ikkəs a-s ham inəzjam-in, äwadəm wa ämešälän təkunt-ten-däx, äru t-əssədlämäx šund yas əllex jere-wän.

4 Ämära, žämmäxät s-isəm n-Emäli-nänäx Yisa, təjəm xas šund a-s näkk iman-in a t-illan jere-wän, ad-fälla-wän dd-izəzzubbət Emäli-nänäx tärna-net,

5 təjəm dihen äwadəm wa ämešälän təkunt-ten-däx dāx-ifassän n-Iblis i-ad-umas a-s kud-däx, təhläk taçəssa-net, asäl wa ilkämän dd-mad-ass Emäli, ad-ijjəš älzännät.

6 Təluše n-ibärajän han-kāwän! Ajän wär tössenäm a-s takmöttet n-täzza əndärrät a sakafät ejel äjjeen.

7 Abäkkad-wen-däx, oläh d-täzza ta tärəwät, əkkəsät-t-in jere-wän i-ad-tišdajäm šund a-wa ija ejel äynayän. Älmasex a-s Faska-nänäx, ənta a hanäx-dd-ija Mässinäx Ašäxol wa n-tenäšše n-ibäkkadän.

8 A-wen-däx a fäl, azəmmäx-nänäx, wär-ija fäll-täzza tärəwät, nəbdəwet d-a-wa ärəwän läbasän hanäx-išlän d-amsud, umaset azəmmäx-nänäx a ijan fäll-tijəlwen ti wär ha täzza, a-wen älmäxna-net a-s, nənmənnət tidət jer-iman-nänäx s-ənniyät šäddijän.

9 Däx-täkarde-nin ta säl ta-däx, əktabäx-awän-in a-s əbdəwät iman-nāwän d-ere isamädasän iman-net.

10 A-s hawän-in-əktabäx a-wen, wär-otesäx xas äddinät wi samädasnen iman-näsän, wäla wi n-imärhan n-azrəf, wäla wi tamašalnen taxärbənit, wäla wi n-imäkrädän, wäla wi n-imäššanämän dāx-äddunya-ta-däx, ed dihen, ad-hawän-iqqəl äššil, ad-təzjäram äddunya-ta-däx.

11 A hawän-ənnex, əbdəwät iman-nāwän, wär särtayät härät d-äwadəm ijannen ämoos äñña-wän dāx-äddin, a-s ija a-wen, isamädas iman-net, mex təšl'-e taxärbənit, mex ämoos emäššanäm, mex ägg-ännämima, mex emäsaw n-asməd, mex itihäx; äwadəm itamašälän härätän-win-däx, wär dār-s toheräm wäla äkoss.

† 5:1 5:1 – Xur-käl-Älyähud, ere wärän ämoos ägg-Älyähud s-aläšäl mex ere wärän ilkem i-äddin-näsän, iket-net, änəzzalim a ämoos. A-wen-däx a fäl tiwsaten ti iyyädnen iket-näsän, ti n-inəzzulam. — Ašäl-i-däx, änəzzalim, äkafär (ere wärän issen s-Mässinäx).

¹² Wädden näkk a iwar asədlam n-äddinät wi n-ajäma wären əzzey Mässinäḡ, Mässinäḡ a-s ilkam ad-tän-işrəḡ mäšan, älmässexitän wi hänen ammas n-äkkänisät, käwäneḡ a iwar ad-tän-täḡtələm, səssiḡedäm-tän.

¹³ Äddinät wi n-ajäma wären ämoos älmässexitän, Mässinäḡ a-s ilkam ad-tän-işrəḡ, isədləm-tän, mäšan, käwäneḡ, innä əlkəttab n-Mässinäḡ: «Əkkəsät enälläbäs jere-wän.»

6

Amumən, wär-isərrəwrəw i-amidi-net s-əlxəkum

¹ Ənd'-e-d-il' älməḡna n-a-s e-d iḡşäd iyyän dəḡ-wän härät i-ənḡa-s, ad-äyy-wen älzämaḡät wa n-iməşşeddəjän-i s-əniihäjja ad-dəḡ-sän əj isälan, aşəl, isərrəwrəw-as s-äşşərəḡa wa n-inəzzulam† i-ad-has-əkkəsän tekəriḡt.

² Meḡ käwäneḡ, wär təssenäm a-s iməşşeddəjän a he-əşrəḡnen käl-äddunya-ta-dəḡ? Kunta daḡ dəḡ-təssəba-nänəḡ näkkäneḡ-i-dəḡ a-s ilkam, ad-işrəḡ Mässinäḡ äddinät, mafäl hawän-indar ad-təjrəwäm äddäbara jer-iman-nəwän i-härät wärän färor.

³ Ajän wär təssenäm a-s wäla ənjälosän, ilkam ad-tän-nəşrəḡ əb' ätṡäma n-ad-hanəḡ-indar ad-nəjrəw äddäbara i-talḡa wärät färor jat fäll-äröri n-əkall-wa-dəḡ.

⁴ Kunta ill'-e a ikkan jere-wän, käwäneḡ-i n-imumənän, ma tattärän isälan n-a-wen s-käl-äşşərəḡa wären oher härät d-äkkänisät?

⁵ Äsikärakäd a-wa jäm, ḡas käwäneḡ, älzämaḡät-nəwän imda, äbä-dd dəḡ-s enəsdebbär iwar sārḡo ikkän jer-əssin ənḡatän jer-ikka härät.

⁶ Wär käwän-əjrehäḡ! Ma n-əmmək n-ad-itişk iyyän dəḡ-wän i-amidi-net s-inəzzulam, iḡaşşäd isəm-net.

⁷ Äyyät-ahi ad-käwän-səlmədəḡ a-s uḡşad-wen-dəḡ toyyəm ikka jere-wän, ənta a əssiitbätän iba n-iqqud-nəwän. Uhen käwäneḡ, ma ja tazidert-nəwän? Kunta idläm-käwän äwadəm, ma hawän-ikkasän ad-fälla-s təşbäräm?

⁸ ḡas, käwäneḡ, tokäyäm-dd a-wen har ämära-dəḡ, wär t-illa ere s-wädden, issan s-iba n-iqqud-nəwän, käwäneḡ-di-dəḡ a iwar uḡlem ed tihäḡäm ayətma-wän.

⁹ Ajän wär təssenäm a-s äddinät wi wären oḡed, xäram-asän uješ n-Təmmənəya n-Mässinäḡ? Wär säswadät iman-nəwän: inämmäḡdäsän, iməşşänämän,† iməzzəna, meddən wi sasalahnen iman-näsän d-tiḡedən, meddən wi tinmökkönen jer-iman-näsän,

¹⁰ imäkrädän, käl-taxərbənit, iməswan n-asməd, käl-tinawen d-wi tihäḡnen, xäram-asän uješ n-Təmmənəya n-Mässinäḡ.

¹¹ Əntäneḡ-den-dəḡ härätän wi s-täkkilem ibda, tamaşalän-tän iyyäd dəḡ-wän mäšan, aşäl-i-dəḡ, tärriḡäm-dd dəḡ-a-wen, išşəşdäj-käwän Mässinäḡ, ikf'-iwän idəm s-isəm n-Emäli-nänəḡ ḡisaÄlmasex s-tärna n-Unfas Şaddijän n-Mässinäḡ-i hanəḡ-ilän.

Tuksəḡa n-Mässinäḡ, wär tidaw d-tämudre dəḡ-ännihäd abäkkad

† **6:1 6:1** — ḡur-käl-Älyähud, ere wärän ämoos ägg-Älyähud s-aläşäl meḡ ere wärän ilkem i-äddin-näsän, iket-net, ənəzzalim a ämoos. A-wen-dəḡ a fäl tiwsaten ti iyyädnen iket-nəsnät, ti n-inəzzulam. — Aşäl-i-dəḡ, ənəzzalim, äkafär (ere wärän issen s-Mässinäḡ). † **6:9 6:9** Iməşşänämän (eməşşänäm): Äddinät wi ḡabbäden äşşänämän.

¹² Æjrawäx s-härät iket-net, mäšan wädden härät iket-net a infan härät, wär t-illa a-s wädden øjrawäx sär-s mäšan, wär-e äyyäx härät wäl' iyyän ännihäd däx-i.

¹³ Iyyäd däx-wän, jannen: imənsiwän, täsa a takkän, täsa daḡ, imənsiwän a-s dd-täxläk, tidət a-wen, mäšan, əlmədät a-s täsa hakd imənsiwän, ilkam ad-tän-iba. Taḡəssa, wär tänhäjjä d-ad-tät-isamädəs äwadəm ed taḡəssa, ti n-Emäli, Emäli daḡ, i n-taḡəssa, ənta a ilan s-ad-däx-s ännihäd.

¹⁴ Mässinäx daḡ-i dd-issənkärän Emäli ʒisa jer-inəmmuttan, ənta daḡ a-s ilkam ad-hanäx-dd-isənkär jere-sän s-tärna-net.

¹⁵ Ajän wär təssenäm a-s taḡəssa-näwän, ašrut n-ta n-Älmasex a tämoos? ʒas ənd'-e-d-il' əmmək ad-iḡkəl äwadəm ašrut la taḡəssa n-Älmasex, asäx-t d-taḡəssa n-tälkäxbat? Xäša!

¹⁶ Meḡ, ajän, wär təssenäm a-s ere ohärän isəftaḡ d-tälkäxbat, ämoos dār-s tiyyät taḡəssa ed iktab a-s:

«Ähaləs, afäl osäx d-tamäḡt, ämoosän tiyyät taḡəssa.»

¹⁷ Emmək-wen-däx daḡ a-s ere ikfän iman-net i-Emäli, ad-dār-s ahär iyyän n-ənniyät.

¹⁸ Ayətma, jawädät i-asəmmädəs n-iman-näwän. Abäkkad ämešäl äwadəm-däx, wär-ohər härät d-taḡəssa-net, mäšan, ere isamädəsän iman-net, han-t iman-net.

¹⁹ Meḡ ajän, wär təssenäm a-s taḡəssa-näwän ämära, ənta a-s ehän n-ämudd wa mäqqārän däx-izzax Unfas Šaddijän wa käwän-ikfa Mässinäx, ikraš-käwän, äbas lam iman-näwän.

²⁰ Äsdärfät-käwän Mässinäx s-älqim mäqqārän, a-wen-däx a fäl, səmḡarät-t däx-ənniyät-näwän hakd-däx tiḡəswen-näwän. [Däx-isälan n-a-wen-däx a fäl iktab a-s:

Taḡəssa hakd ənniyät, i n-Mässinäx.]

7

Isälan n-adubən d-iba-net d-aməzzi

¹ Ämära, ad-hawän-dd-äqqələx isəstanän wi hi-jäm däx-täkarde ta hi-dd-təktäbäm. Däx-a-wa ordeḡ, ufa ad-äqqayəm ähaləs wär-ädobän

² mäšan, i-ad-wär-itidəw äwadəm däx-asəmmädəs n-iman-net, hak ähaləs, ikrašət hənne-s, təkrəšet daḡ hak tamäḡt ähaləs-net.

³ Äkfet ähaləs hənne-s älxaqq wa fälla-s la, täkfet daḡ tamäḡt älxaqq wa fälla-s ilə ähaləs-net.

⁴ A-wen-däx a änihäjjän fäl-a-s, wädden tamäḡt a tännihädät däx-taḡəssa-net, ähaləs-net a däx-s ännihädän; wädden daḡ ähaləs a ännihädän däx-taḡəssa-net, hənne-s a däx-s tännihädät.

⁵ Wär-igäddälet wäl' iyyän iman-net i-wa iyyädän kunta wädden ad-tänimärdäm s-a-wen i-härät n-äzzäman i-ad-təkfəm iman-näwän i-tamädilt n-Mässinäx. A-wa säl a-wen, uday fäw, ad-igdəl iyyän iman-net i-amidi-net i-ad-wär käwän-jämmäd tanämagizt, ijrew sär-wän Iblis tašlət s-käwän-äzzurräb, isiḡəw-käwän däx-abäkkad.

⁶ Mäjräd wa hawän-in-jəx ämära-däx, əssəyasa wädden alämär.

⁷ Ənnär sär-i täqqal näkk ʒas, iket-di, ännäx i-e d t-illäm ähaləs ad-dār-i aläh iba n-adubən mäšan, hak äwadəm, wär-e äj ar a-wa dār-t-äskälläf Mässinäx: äwadəm iyyän, ijraw a-wa, a-s ija a-wen, iyyän daḡ ijraw härät iyyän säl wa ijraw amidi-net.

⁸ Ämära, äddinät wi wären ädobän, əntäneḡ d-tinuḡäfen, ənney-asän: kunta äddoben ad-əjən a-wa jeḡ, adiṣ, äqqaymənet wär-ädobänän, ikna
⁹ mäšan, kunta hannäyän a-s, wär-äddoben ad-ännähäḡän däḡ-iblis-näsän, adiṣ dubənnət, ed ufa, ad-idubən äwadəm, uhən ad-t-äj derhan-net däḡ-a t-e-iṣəkṣən temse.

¹⁰ Äddinät wi ädobännen, omaräḡ-tän, änn-ak, Emäli a tän-omarän s-a-wen, wädden näkk, wär bädḡəwet tamäḡt d-ähaləs-net,

¹¹ kunta daḡ fäl-t, adiṣ wär tiləset adubən, tətḡäret əmmək s-tät-dd-äsoḡäl ähaləs-net; ähaləs daḡ ənta, wär hin-itəyyet hənne-s.

¹² Äddinät wi iyyäḡnən, ənney-asän, näkk daḡ a hasän-ijannen, wädden Emäli: afäl ädobän amumən tamäḡt wärät tämoos tamumənt, wär tät-in-itəyyet a təkäs tärḡa s-taḡimit ḡur-s,

¹³ kunta daḡ ädobän ähaləs wärän ämoos amumən tamumənt, wär tətḡäret tamumənt-en efel-net a ikkäs ähaləs-en irḡ'-as s-taḡimit ḡur-s,

¹⁴ fäl-a-s, tamäḡt-en, täddoobät ad-tumas əssəbab wa t-madän-äj däḡ-tabarät n-Mässinäḡ, iṣḡaj. Ähaləs daḡ wa n-amumən s-wär tämoos hənne-s tamumənt, äddoobät ad-umas əssəbab wa madän-äj hənne-s däḡ-tabarät n-Mässinäḡ. Afäl wär jem a-wen, har təbḡäm, wär mad-ärməsän aratän-näwän zäbo olaḡän.

¹⁵ Jer-ähaləs wa wärän omen wäla tamäḡt ta wärät tomen, afäl äbas irha iyyän däḡ-sän taḡimit ḡur-amidi-net, adiṣ, ijrəwet-as tekle, dihen, wär t-illa udlem iwarän amumən wäla tamumənt ed Mässinäḡ-i hanäḡ-dd-iḡrän s-iman-net, älxer jer-iman-nänäḡ a-s hanäḡ-dd-iḡra.

¹⁶ Kämm-i n-tamäḡt, ma təssanäd kunta wädden kämm a madät-tumas i-ähaləs-näm əssəbab wa s-t-mad-iḡləs Mässinäḡ? Käyy daḡ-i n-ähaləs, ma təssanäd kunta wädden käyy a madän-umas əssəbab wa s-mad-iḡləs Mässinäḡ hənne-k?

Hak äwadəm, äqqaymet däḡ-taḡärha-net

¹⁷ Darät-a-wen daḡ, hak äwadəm-däḡ, iṡṡəfet tämudre ta t-ikfa Emäli, hak äwadəm, iṡṡəfet tämudre ta iha a-s t-dd-iḡrä Mässinäḡ s-iman-net; ənta-den-däḡ a-wa säḡreḡ däḡ-älkänisäten iket-däḡ-näsnät.

¹⁸ Kunta iyyän däḡ-wän a-s dd-ätwäḡra, wär-ämeläy, wär-itätḡäret ad-isəmmiləy iman-net; kunta daḡ käyy a-s käy-dd-iḡra Mässinäḡ tämeläyäd, adiṣ, wär hak itumaset a-wen asäkor.

¹⁹ Jer-amili wäla iba-net, wädden a-wen a infan härät, härät a t-infan, amiṣəl n-alämärän n-Mässinäḡ.

²⁰ Hak iyyän däḡ-wän, iṡṡəfet əmmək wa s-t-dd-iḡrä Mässinäḡ s-iman-net.

²¹ Kunta a-s käy-dd-iḡrä Mässinäḡ, akli a tämoosäd, wär tämmujrəzäd tumast-näk; mäšan kunta ill'-e əmmək s-təjrəwäd iman-näk, äj'-e.

²² Akli daḡ wa dd-iḡrä Emäli s-iman-net, ämoos eläll-net; wa n-eläll daḡ dd-iḡrä Emäli s-iman-net, ämoos ämära, akli n-Älmasex.

²³ Wär toyem äddinät äsikälən-käwän ed Emäli-i käwän-dd-iḡrän s-iman-net i-ad-käwän-isəddärfət, a ilan älqim a-s käwän-äslällät.

²⁴ Ayətma, hak iyyän däḡ-wän-däḡ, äqqaymet däḡ-əmmək wa s-t-dd-iḡrä Mässinäḡ s-iman-net, ḡaymät təlcamäm i-Mässinäḡ.

Edäwänne i-timawaḡen d-äddinät wi s-käla wär-ädobänän

²⁵ Däḡ-isälan n-timawaḡen ti wären əzzey meddən d-ti s-käla wär-ädobänänät, wär ḡur-i t-illa alämär hi-ikfa Emäli hasnät, mäšan, ad-käwän-sənnəmhələḡ däḡ-isälan-näsnät, äjāḡ-awän daḡ asənnəmhəl n-ähaləs ijrawän ḡur-Mässinäḡ s-a-wa ijänna tidət, ed Mässinäḡ a dd-ifal a-wen.

²⁶ Ænta da a-wa hawän-janneḡ: ordeḡ a-s dāḡ-təssəba n-tirəmmaḡ ti t-əllänen ämära-dāḡ, ufa i-hak äwadəm-dāḡ, ad-äqqayəm dāḡ-taḡärha-ta-dāḡ-t-dd-iḡrä Emäli.

²⁷ Ak käyy, osaḡ-käy härät d-tamädt? Wär tətteräd aməzzi. Ak käyy, wär käy-oseḡ härät d-iyyät? Adiš, wär tətteräd adubən

²⁸ mäšan, hakd a-wen-dāḡ, kud tädobänäd-dāḡ, wär tofed abäkkad; tämawaḡt daḡ ta wärät təzzey meddən tässofät ad-tədubən, afäl ja a-wen, wär tof' abäkkad. A ärheḡ ad-təssanäm a-s təlcam tissust s-ässofäḡ ad-käwän-əkkəsäḡ dāḡ-taḡdärt-net i-ad-has-täsidäwäm iket-di dd-tiḡəw fälla-wän.

²⁹ Ayətma, ajilal n-äddunya a nəha, a-wen-dāḡ a fäl ḡur-ašäl-i-dāḡ, wa ädobänän, idḡəzet hullan dāḡ-älxidmät n-Emäli wa iha šund wär-ädobän,

³⁰ wa s-äsniän iman-net, idḡəzet hullan dāḡ-älxidmät n-Emäli wa iha šund ḡas wär t-illa a t-ijrawän; wa äsriwän, idḡəzet hullan dāḡ-älxidmät n-Emäli wa iha šund ḡas a-s wär-iddəwət; wa iżänšen, idḡəzet hullan dāḡ-älxidmät n-Emäli wa iha šund ḡas wär t-illa a iżänša;

³¹ wi rabbäxnen dāḡ-äddunya-ta-dāḡ, əjənet iman-näsän šund a-s wär t-illa a dāḡ-s əjrawän ed äddunya-ta-dāḡ d-a-wa tät-ihän, ilkam ad-t-iba.

³² Wär käwän-isärmaḡet härät. Idḡəzet wa wärän ädobän dāḡ-härätän wi n-Emäli, wen ənta, a itäj-dāḡ, ad-t-äj i-ad-izəjrəz iman-net i-Emäli

³³ mäšan, wa ädobänän, härätän n-äddunya-ta-dāḡ a dāḡ-idḡaz, a itäj-dāḡ, ad-t-äj dāḡ-umaḡ n-ad-izəjrəz iman-net i-hänne-s,

³⁴ ad-änimäntaş ənniyät-net ebre n-hänne-s d-ebre n-Mässinäḡ. Emmək-wen-dāḡ daḡ a-s tamädt wärät tädobän meḡ tämawaḡt wärät təzzey meddən, tiḡəswen-näsnät d-ənniyätän-näsnät, ebre n-älxidmät i-Emäli ḡas a-s orakän mäšan, tamädt tädobänät, wär zənnəzjumət ḡas ar dāḡ-äddunya-i-dāḡ d-əmmək s-təzzəjrəz iman-net i-ähaləs-net.

³⁵ A-wa hawän-ənnəḡ, tänfə-näwän a dāḡ-hawän-t-ənnəḡ, wär hawän-əḡdeläḡ adubən, änn-ak, a ärheḡ, ad-təlcamäm i-Emäli s-ulh imdan, təjəm tämudre wär ih' anməntaş, tämudre, tässiitbätät tüksəḡa-näwän i-Mässinäḡ.

³⁶ Kunta inhäy abba n-talyadt elle-s har tokäy adubən har has-ämoos a-wen a äsikärakädän, kunta ijräw äddäbara s-təja elle-s ehän, äjet-as-t, wär-ofa abäkkad.

³⁷ Äwadəm wa irhän adubən, idubənet mäšan daḡ, afäl dd-inkär abba innä, wär t-äšhäššäl äwadəm s-a-wen, a-s täqqaymet elle-s wäla adubən, äjet-as a-wa t-dd-ijjäšan, ikna.

³⁸ Abba, wa irḡän s-ad-täj elle-s wärät təzzey meddən ehän, ija a iknan, wa äqqimän daḡ wär-äsdobän elle-s, ija a ufän a-wa ija-wənnin.

³⁹ Tamädt a ikkäs ähaləs-net iddar, wär has-t-illa adubən iyyän säl-wen-dāḡ ha, mäšan, afäl t-äba, idubənet-tät ere wa s-tärha, täjet ḡas a-wen s-älmäḡna ilkamän i-Emäli.

⁴⁰ Hakd a-wen-dāḡ, tənḡəḡ i-tamädt ta täqqimät wär toles adubən. Ænta-den-dāḡ mäjräd wa s-ärheḡ ad-hawän-t-in-səssiwəḡdāḡ dāḡ-isälan-wi-dāḡ, ordeḡ daḡ a-s a-wa ənnəḡ, iha erhet n-Unfas Šäddijän n-Mässinäḡ iket-net.

8

Isälan n-isän wi itəkkat äwadəm i-äššanämän

¹ Ayətma! Dāḡ-a-wa dd-iqqälän isälan n-isän wi itəkkat äwadəm i-äššanämän, ənta da a-wa hawän-janneḡ dāḡ-sän: musnät, iket-nänäḡ nəla dāḡ-s härät mäšan, musnät, isabäraj, a-s ija a-wen, tärha, sartay;

² ere ordän iman-net musnät, ilmødet a-s wär-äzzäbbät almud härwa
³ mäšan, äwadøm wa irhän Mässinäx s-ulh imdan, wen ønta, izzay-t
 Mässinäx.

⁴ Däx-isälan n-isän wi ämoosnen takute i-ässhänämän, ässhänämän,
 wädden wäla a øndärrän, Mässinäx, ønta xas, wär-ila amidi.

⁵ Tidøt, han härätän äjjootnen isønnawän d-äkall jan äddinät imälan
 fäll-iman-näsän, ordan day äddinät a-s a-wen-däx tidøt

⁶ mäšan, xur-näx näkkäneð, wär t-illa a säl Mässinäx, ønta a-s Abba-
 nänäx, ønta a dd-ixläkän a-wa t-illän iket-net, ønta a hanäx-ilän; wär t-illa
 ar iyyän n-Emäli, Yisa Älmasex, idøm-net a däx-dd-ixläk härät iket-net,
 ønta day a hanäx-iṭṭafän tämudre.

Iššaki n-iman

⁷ Mäšan, kud-däx næssan a-s ässhänämän wädden härät-däx, äddinät,
 wär-ogdehän musnät. Iyyäð, äynayän s-älyibadät n-ässhänämän, a-wen-
 däx a fäl ed øksän isän ikat äwadøm i-ässhänämän, ad-øššökän iman-näsän
 a-s jan a ämmiðäsän.

⁸ Darät-a-wen day, wädden amønsi a hanäx-e-ižønnømihezän d-
 Mässinäx; isän-win-däx, jer-tøkšed-tän wäla, wär käy-ifnez, wär käy-
 ässewäð a-wen s-wäla a øndärrän.

⁹ Äjät ønniyät i-iman-näwän, wär t-illa a-s wädden xälal-awän mäšan,
 a tättäm-däx, wär-itumaset a äddoben ad-isidøw ere wärän ikna øššuhu
 däx-immun-net däx-abäkkäð.

¹⁰ Kunta käyy-i ijrähän härät, inhay-käy ere wärän ikna ujreh n-härät
 täqqiimäd tattäd däx-ehän n-ässhänämän, wädden ad-käy-iššök, arøw-dd
 sär-s a-wen-däx ad-äks ønta-däx isän-win-däx ikät äwadøm i-ässhänämän?

¹¹ Dihen, ad-umas ujreh-näk i-härät øssøbab n-tanmøšrayt i-änṇa-k wa
 wärän ikna ujreh n-härät s-ønta däx-ämmut-as Älmasex s-ømmøk wa s-
 hak-ämmut käyy-däx.

¹² Ere ässøðän äṇṇa-s däx-tanmøšrayt šund-ten-däx, ad-däx-s øðmønän
 iman-net ed a-wa ija abäkkäð, toyyäm-t day käwäneð, ij'-e. Ere day wa
 ijän a-wen, Älmasex a-s itajj tihäyyen, itirøm-t.

¹³ A-wen-däx a fäl kunta amønsi a madän-umas øssøbab n-tanmøšrayt
 i-änṇa-k, adiš säxrøm-t i-ad-wär-itumas a-wen, tanmøšrayt i-änṇa-k däx-
 äddin.

9

Älfäyda d-älxidmät wa ihän tumast n-änämmašul

¹ Ayøtma, näkk-i-däx, wädden øjrawäx iman-in. Äjän wädden,
 änämmašul a ämoosäx? Äjän wädden ønhayäx Emäli-nänäx Yisa s-
 tiṭṭawen-in? Äjän wädden käwäneð iman-näwän a-s tasøtbat n-a-wa
 äxdämäx i-Emäli.

² Kud-däx ija xur-iiyyäð a-s wädden änämmašul a ämoosäx, äniihäjja
 a-s wädden käwäneð ed käwäneð-di-däx a-s tasøtbat n-tønnømušøla-nin
 dat-Emäli.

³ Äddinät day wi hi-tižømmen, sawarän-ahi bahu, älwižab-in hasän da:

⁴ wädden näkkäneð nøjraw s-ad-näks, næsøw s-ømmøk wa s-t-täjjän
 äddinät wi iyyäðnen?

⁵ Mex øndek diha d-ätiwänna a-s wär näddøbät ad-nødubøn härät
 däx-šätma-näx ti n-tälmässexiten, nidaw där-snät däx-isikilän-nänäx s-
 ømmøk wa s-t-jän inømmušal wi iyyäðnen d-ayøtma-s n-Yisa d-Bøṭrus?

⁶ Meḡ näkk d-Bärnäbbas ḡas a iwar älxidmät s-ifassän-nänäḡ i-ad-nəṭṭəf tāmudre n-iman-nänäḡ?

⁷ Mi s-kāla inhäy əssärdasi ihan əlḡəskär wāla timḡal, meḡ mi s-kāla äddomät ašəkrəš äqḡayəm wär dāḡ-s ikša? Mi s-kāla idän ehäre, äqḡayəm wär-äzoḡāj, isəw?

⁸ A-wa hawän-janneḡ, wādden älḡadät dd-əkkašän dägg-adəm dāḡ-iḡāfawän-näsän, änn-ak, alāmär wa n-Mosa a tän-innän.

⁹ Iktab dāḡ-Äṭṭāwrät a-s:

«E-d jed awdes dāḡ-tijenen n-älkäma
i-ad-dāḡ-snät isəbbäḡtəš i-ad-hak-ibḡəw tiblalen d-ahošär,
wär has-jed äkinbāb.»

Ak tordam a-s Mässināḡ-i-dāḡ, iwdesän a dāḡ-idḡaz s-əmmək-wen-dāḡ?

¹⁰ Näkkäneḡ-i-dāḡ n-inəmmušal a-s iha isālan-nänäḡ. Tidət-dāḡ a-s dāḡ-təssəba-nänäḡ a fäl dd-äzzäbbät alāmär-wen-dāḡ ed äwadəm äddomen ašəkrəš-net, ähhuuššäl-t ḡas ad-ijar äṭṭāma n-ad-has-t-dd-izjār härät.

¹¹ Näkkäneḡ, näxtāb-awän mäjrād n-Mässināḡ, ämoos a-wen šund ašəkrəš näddoomät, ajän afäl dd-izjār härät ifassän-nāwän sār-nāḡ, ajän a-wen a iqqanän eḡāf ḡarät älxer n-Mässināḡ wa nəja dāḡ-ulhawän-nāwän?

¹² Kunta ill'-e ere s-kāwän-iwar älxaqq-net, ajän wär t-nojer sār-wän? Māšan, hakd a-wen-dāḡ, wär kāwän-iha i näzzilzām d-härät, änn-ak, näqbäl härät iket-net i-ad-wär nəja täsahayt wäl' iyyät i-Älənžil n-Älmasex.

¹³ Ajän, wär təssenäm a-s äddinät wi äxdammen dāḡ-ehän n-ämudd wa mäqḡarän, ehän-en-dāḡ a hasän-itṭafän tāmudre? Meḡ, ajän wär təssenäm a-s äddinät wi ḡarräsnen i-tikutawen fäll-tasəskärt ta n-tikutawen, a-s äḡräsän-dāḡ, lan dāḡ-s ejädär?

¹⁴ Emmək-wen-dāḡ daḡ a fäl omär Emäli a-s äddinät wi xaṭṭābnen Älənžil, əddärnet s-Älənžil.

¹⁵ Näkk, wär t-illa äḡuk fälla-wän jeḡ. Akātab daḡ wa hawän-in-tajjāḡ ämāra-dāḡ, wär hawän-t-in-təjjāḡ fäl-a-s innin ärheḡ dāḡ-wän härät, wär t-illa a dāḡ-wän ärheḡ, änn-ak, äsidāwät-ahi hullan a-wa s-hawän-äxtābāḡ Älənžil wär t-illa a dāḡ-wän əttarāḡ, ässofāḡ fāw tamättant uhən ad-dāḡ-i ikkəs äwadəm tedāwit-ten-dāḡ n-a-s wär t-illa a dāḡ-wän əttarāḡ a-s hawän äxtābāḡ Älənžil.

¹⁶ Asəllənzi wa təjjāḡ i-äddinät, wär təttärāḡ ad-hi-umas abāraj, änn-ak, färəḡ a hi-ämoos, amäskoy näkk afäl äqḡimāḡ wär-äxtəbāḡ Älənžil.

¹⁷ Ənnär älxuṭbät wa təjjāḡ, ämoos a təjjāḡ dāḡ-izəjraz n-iman-in, adiš, äniihäjja d-ad-əjrəwāḡ älxaqq n-tide-nin māšan, wādden a-wen a ijän, Mässināḡ a hi-ijän dāḡ-a-wen, ənta a hi-issäḡläfän ämašal-wen-dāḡ.

¹⁸ Ma sār-i dd-issäḡsäl a-wen-dāḡ? Adiš, emärked-in ḡur-Mässināḡ a t-ämoosän ad-salänžəḡ äddinät dāḡ-a-s, wär t-illa a dāḡ-sän rammäsāḡ i-ad-umasän isālan-en, a əjrawän bännan.

Ässaḡdäh Buləs iman-net d-äddinät iket-dāḡ-näsän

¹⁹ Näkk, wär t-illa ere s-ämoosāḡ akli-net māšan, hakd a-wen-dāḡ, wär t-illa ere s-wādden äsräsāḡ iman-in data-s i-ad-umas a-wen, əssəbab n-əlḡəllas n-təššəm n-äddinät.

²⁰ Käl-Älyāhud, jeḡ-asän iman-in ägg-Älyāhud i-ad-səjədən i-a-wa hasän-janneḡ, utabän, iḡləs-tän Mässināḡ; wi əḡlänen s-a-wa tənna Äṭṭāwrät, jeḡ-asän iman-in ere iglan fäll-a-wa tənna Äṭṭāwrät kud-dāḡ

äduuttät a-s wädden önta a tännihädät dāḡ-a-wa fäll-ögleḡ; a-wen, jeḡ-t i-ad-söjedön i-a-wa hasän-xaṭṭäbäḡ, utabän, iḡlös-tän Mässinäḡ.

²¹ Äddinät wi wären össen fäll-Mässinäḡ, ässalähäḡ iman-in dār-sän, a-s ija a-wen, näkk, ijmaḡ-t äššāk a-s össanäḡ s-Mässinäḡ ed älqanun wa n-Älmasex a fäll-ögleḡ. A-wen, jeḡ-t i-ad-söjedön i-a-wa xaṭṭäbäḡ, utabän, iḡlös-tän Mässinäḡ.

²² Äddinät wi rökkömmen, jeḡ-asän iman-in iyyän dāḡ-sän i-ad-äḡlösän öntäned-dāḡ, älxal hi-ijjäš ägg-adöm-dāḡ, ad-has-sössilähäḡ iman-in dār-s i-ad-umas a-s emäremar jeḡ-dāḡ, ad-iḡlös Mässinäḡ iyyäḡ dāḡ-sän.

²³ Jeḡ a-wen-dāḡ iket-net dāḡ-tössöba n-Älönzil i-ad-öjrwäḡ näkk-dāḡ ejädär-in.

Tabillänt a ijarräwän tärna

²⁴ Ajän, wär tössenäm a-s äddinät wi timšöšijnen dāḡ-eḡarḡär, ösalän iket-dāḡ-näsän mäšan, iyyän dāḡ-sän ḡas a madän-ijröw älhäk wa fäll-igla azzal. Dāḡ-isälan wi n-immun, ašölät käwäned-dāḡ i-ad-töjrwäm älhäk-wen-dāḡ.

²⁵ Tössanäm a-s käl-azzal, wär t-illa aräkan d-asömänönnäḡ s-wädden tājjan-t i-tiḡswen-näsän i-ad-ännehädän dāḡ-snät. Entäned-i išla a-wen-dāḡ, älhäk wärän-e ähaj a dāḡ-sän ilkamän, a-s ija a-wen näkkäned, älhäk wa mad-nöjrwöw, afäl nöjläy dāḡ-azzal wa n-immun-nänäḡ, iḡlal.

²⁶ A-wen-dāḡ a fäl näkk, ösaläḡ mäšan, wädden azzal n-derhan n-iman-in ḡas a jeḡ s-tönnöd äwadöm änikäfnäkäfän siha d-siha, wär-issen a iha, näkk, wär šöšlöyäḡ,

²⁷ ännihädäḡ dāḡ-iman-in hullan, wär-ölkemäḡ ḡas i-a-wa fäll-i tärha taḡössa-nin, änn-ak, Mässinäḡ a oyyeḡ a dāḡ-i ännähäd i-ad-ämasäläḡ erhet-net dāḡ-a-s äksudäḡ ad-äbas heḡ azzal-wen-dāḡ ḡarät älxuṭbät wa jeḡ i-äddinät.

10

Älmital dd-izjarän äzzäman wa ökkäsän käl-Işrayil dāḡ-tenere

¹ Ayötma, wär ärheḡ ad-tözhaläm dāḡ-isälan n-a-wa irmäsän imḡarän-nänäḡ ibda dāḡ-tenere. Äzzäman-en, töllay jönnöj-sän tejäräkt, sasaxad-tän, ijräw-asän Mässinäḡ ad-öjlöyän ejärew wa sömmän,

² oläh a-wen d-a-s ätiwäsälmäḡän dāḡ-tejäräkt-en d-ejärew wa sömmän dāḡ-idöm n-tassayt ta jän d-ännäbi Mosa,

³ äzzäbbät-dd Mässinäḡ fälla-sän amönsi n-talömmizt dd-ifalän išönnawän, öksän,

⁴ öswän dāḡ-aman wi fälla-sän dd-äzzäbbät Mässinäḡ. Aman-en, taḡayt dd-falät išönnawän a dd-özjarän, tärjäš ḡära-sän e-s ökkän dāḡ; taḡayt-en, tamätart n-Älmasex a tämoos.

⁵ Hakd a-wen-dāḡ, tunjäy töššöm-näsän amišöl n-erhet n-Mässinäḡ, äbjänjänän fälla-s, hän-dd-i äjjootnen dāḡ-sän ämmuun dāḡ-tenere-endāḡ.

⁶ Härätän-win-dāḡ, älmitalän a hanäḡ-ämoosän i-ad-wär nöjješ älxal wa öjjäšan, i-ad-wär nösedärhön a-wa läbasän äsdärhänän.

⁷ Ebdöwät d-älḡibadät n-äššanämän, wär jem a-wa jän iyyäḡ dāḡ-sän ed ätwänn'-anäḡ:

«Täqqima tamötte, tökšä, töswä, töbdad ad-dalläl dat-äššanämän-net.»

8 Wār nəsämädaset iman-nänäx šund a-wa jän iyyäđ däx-sän; win-hi ɵntäneđ, ihläk däx-sän Mässinäx sänatät timərwen d-kärađ n-efäđ n-ähäləs däx-iyyən n-ašäl.

9 Wār nətirmet Älmasex šund a-wa jän iyyäđ däx-sän, ed wi jänen a-wen, əkšänät-tän taššälen.

10 Wār täbjänjänäm šund a-wa jän iyyäđ däx-sän ed, tössanäm a-s, os'-endd änjälos wa ittäfän tamättant, ilhäs-tän iket-däx-näsän.

11 A-wa tän-irmäsän, ifäqqän n-a-wa äddoben ad-hanäx-irməs a ämoos i-ad-näj ɵnniyät i-iman-nänäx. Isälan-wi-däx, ɵktäbän i-ad-hanäx-səfhəmän härät näkkäneđ-i hänen ajilal n-äddunya.

12 A-wen-däx a fäl ere ordän iman-net tebädde, äjet ɵnniyät i-ad-wär-öđä.

13 A-s käwän-äžžurräb Iblis-däx, ɵnta a-s itizärrub dägg-adəm iket-näsän, Mässinäx Ämaıdal a ämoos, wär käwän-e-äyy äžžurräb-käwän Iblis s-a t-illän jɵnnɵj-tädabit-näwän, änn-ak, e-d käwän-äžžurräb-däx, ad-käwän-äkf däx tädabit n-äššäbarät s-dd-tɵntäšäm iman-näwän däx-a-wen.

Imumənän, wär ıəbbədän äššänämän

14 Ayətma wi ɵkney tärha, jawäđät i-älııbadät n-äššänämän,

15 meddən ɵjrahnən härät a-s ässewäläx, a-wen-däx a fäl zɵnnɵjumətät hullan däx-a-wa hawän-janneı.

16 Afäl älwäqq wa d-nətihär amənsi wa šäddijän n-Emäli, afäl älwäqq wa d-nəsass däx-alkas wa šäddijän i-ad-numay i-Mässinäx, ajän wädden ɵnta-den-däx a-wa isidɵttun tartit-nänäx d-Älmasex s-tärna n-ašni-net. Ajän wädden tajəlla ta nətuzan jer-iman-nänäx i-ad-hanäx-dd-səktəw tamättant ta ija ıısa däx-tössəba n-ibäkkäđän, tamättant-ten-däx inhäy däx-taxəssa-net, a hanäx-tössärtäyät dār-s.

17 Šamad wär t-illa ar tajəlla tiyyät, a-wen a t-ämoosän taxəssa n-Älmasex, a-wen-däx däx a-s näkkäneđ, kud nɵjjət-däx, nämoos tiyyät taxəssa däx-tössəba n-tassaxt-nänäx dār-s.

18 Ɛkyədät ıas däx-käl-Işrayil, ıur-sän wi tattänen isan n-tikutawen ti jänen i-Mässinäx, osaxän däx däx-tössəba n-takute-ten-däx d-Mässinäx ed asäırəs wa fäll-ıarräs takute, i n-Mässinäx.

19 Ma tordam, ma ɵkkey däx-a-wen? Tordam a-s isan ikat äwadəm i-äššänämän, ämoosän härät? Meı äššänämän iman-näsän fäw, ak härät? Wār-ämoosän wäla a ɵndärrän,

20 änn-ak, a ärheı, ad-käwän-səlmədäx a-s a ikat äwadəm i-äššänämän-däx, wädden Mässinäx a-s t-ikät, alšinän a-s t-ikät. Äywa! Näkk, wär-ärheı ad-tasıəm härät d-alšinän.

21 Wār täddobem ad-sassäm däx-alkas wa käwän-dd-isakten tanäıla ta ija ašni n-Emäli ıısa däx-tössəba n-ad-təjrəwäm tenäšše n-ibäkkäđän-näwän, taləsäm däx đarät-a-wen, tesäse däx-alkas wa däx-sassän inaxbadän n-alšinän ässaxät wa d-tän-ıabbädän. Wār täddobem ad-təksəm tajəlla ta käwän-dd-saktet taxəssa n-ıısa-i ämmun i-ad-təjrəwäm tenäšše n-ibäkkäđän-näwän, taləsäm däx đarät-a-wen tetäte n-tajəlla ta tättän inaxbadän n-alšinän ässaxät wa d-tän-ıabbädän.

22 Meı, käwäneđ, a tärham ad-asəm Emäli fälla-wän? Tordam a-s täddobem ad-täıləsäm däx-äšsar-net afäl t-ıjıäš ađkär fälla-wän?

Atsəmyar n-Mässinäx däx-härät iket-net

23 Wār t-illa a-s wädden nəjraw sār-s mäšan, wädden härät iket-net a infan härät.

²⁴ Wār dāx-wān itämmäxet wäl' iyyān i-tənfā ta n-iman-net ənta xas, ānn-ak, izəzāret tənfa ta n-imidiwān-net ta n-iman-net.

²⁵ Isan təjrāwām nazzān dāx-āssuk-dāx, a āmoosān-dāx, āksāt dāx-sān kunta wār tən-əkrehān ulhawān-nāwān

²⁶ ed əlkəttab n-Māssināx, innā:

«Ākall d-a-wa t-ihān iket-net, i n-Emāli.»

²⁷ Afāl kāwān-dd-āsmājarāt ere wārān āmoos amumən, afāl t-təkkām, amənsi hawān-dd-issəskār-dāx, āksāt dāx-s, wār t-kārrāhnet ulhawān-nāwān

²⁸ māšan, afāl kāwān-ixtāl āwadəm, inn'-awān: «Hewāt, isan-di, i n-teyxse ikat āwadəm i-āššānām, wār tən-təksəm dāx-təssəba n-āwadəm wa hawān-illāxən i-ad-wār tāxšedām iman-net.»

²⁹ Wār hawān-ənnex a-wen dāx-təssəba n-aχāšad n-iman wi-nāwān, ānn-ak, ənnex-awān-t dāx-təssəba n-ad-wār tāxšedām iman n-āwadəm wa kāwān-ikkāsān dāx-taxdārt d-ad-wār təššekām iman-nāwān dārat a-wa.

Īssanāx a-s ad-hi-ənnən iyyād dāx-wān: «Ajān nākk, mafāl təyyāx āwadəm ikmam-ahi dāx-tārha n-iman-in, dāx-təssəba n-a-s ikrah a-wa tajjāx?

³⁰ Nākk a-wa dāx-āmmoyāx i-Māssināx ālwāq q wa d-tattāx, əndek a-wa ijrāwān i-āwadəm ad-ijjəš ti-nin fäll-amənsi s-išwār āmmoyāx i-Māssināx dāx-təssəba-net?»

³¹ Āmāra, ənnex-awān: jer-tattām wāla sassām, a tājjām-dāx, ājāt-t dāx-derhan n-ad-səmxārām Emāli.

³² Wār tumasāt i-āwadəm wäl' iyyān əssəbab n-tanməšrayt jer-āmoos āgg-Ālyāhud wāla āgg-Ālyunan† wāla amumən.

³³ Tālālāt-ahi, wār təjjāx fāw a dāx-hi-əššakān āddināt, wādden tənfa n-iman-in xas a dārat ošalāx, ānn-ak, dāx-a-wa tājjāx iket-net, āzizārāx tənfa n-āddināt wi iyyādnen ta-nin i-ad-tən-iχləs Māssināx.

11

A-wa ātwānnān i-tiḏeḏen dāx-isālan n-aswār

¹ Tālālāt-ahi s-əmmək wa s-āttilālāx Ālmasex.

² Ayətma, āmmoyāx-awān əmmək wa s-hi-kittəwām hak ašāl, hannāyāx dāx a-s a-wa kāwān-əssāxṛāx d-a-wa dār-kāwān-āsmātārāx, tamašālām-t iket-net.

³ Āmāra, ārheχ ad-kāwān-in-səjṛāhāx hārāt iyyān: Ṽisa a ixkamān dāx-hak āhaləs, āhaləs a ixkamān dāx hānne-s, Ṽisa dāx Māssināx a dāx-s ixkamān.

⁴ A-wen-dāx a fāl e-d itəddal āhaləs Māssināx, meχ ijraw χur-Māssināx mājrād s-ila s-ad-t-āffāssār i-āddināt, wār-itājjēt a-wen injaḏ ed asəmmāḏri a itajj Ṽisa-i n-āmānokāl-net.

⁵ Tamāḏt dāx, e-d təddal Māssināx, meχ e-d təjrāw χur-Māssināx mājrād s-la s-ad-t-tāffāssār i-āddināt, wār la s-ad-tāj a-wen wār təswār ed tamāḏt wārāt təswār, asəmmāḏri a tajj āhaləs-net ed wār təzley d-ere āsitābālbālān; asəttəbəl bəl ya, āsikārakāḏ fäll-tamāḏt.

⁶ A-wen-dāx a fāl tamāḏt ta wārāt tārha aswār, adiš šəjwəšet dāx, māšan, kunta ija χur-wān a-s āsikārakāḏ ad-šəjwəš tamāḏt meχ təstābālbāl, adiš, uf'-as ad-səwār.

† 10:32 10:32 Gərik (Grec) dāx-Təfrānsit.

⁷ Ähaləs ənta, wär-ämγatär s-ad-injađ e-d itəddal Mässināγ ed Mässināγ, ixläk-anāγ dāγ-milhaw wa-net i-ad-t-nəsəmyār, a-s ija a-wen, semγar wa ila ähaləs, hānne-s a dd-ifal,

⁸ ed ašäl wa dd-ixlāk Mässināγ äddunya, wädden ähaləs, a dd-iknän dāγ-tamäđt, änn-ak tamäđt a dd-təknät dāγ-ähaləs.

⁹ Wädden ähaləs a dd-iknän dāγ-təssəba n-tamäđt, änn-ak, tamäđt a dd-təknät dāγ-təssəba n-ähaləs.

¹⁰ Dāγ-təssəba n-a-wen-dāγ d-dāγ-təssəba n-änjälösän wi äsijädnen hak ässaγät, a fäl iwar tamäđt ad-täsiwār eγäf-net i-ad-tässikna s-a-wen-dāγ a-s täqbal a-s ill'-e jənnəj-s ähaləs-net.

¹¹ Mäšan, hakd a-wen-dāγ dāγ, näkkäneđ-i s-ašäl-i-dāγ, nosāγ d-Emäli s-immun wa sār-s nəja, ähaləs, wär t-illa ar s-tamäđt, tamäđt daγ, wär t-təlla ar s-ähaləs

¹² fäl-a-s, ašäl wa dd-ixlāk Mässināγ äddunya, ähaləs a dāγ-dd-ikkäs tamäđt mäšan, ašäl-i-dāγ, wär t-illa ähaləs s-wädden tamäđt a t-torāwät. A-wen iket-net, Mässināγ ad-dd-ifal.

¹³ Əjrähät-in γas käwäneđ iman-nāwän: ak, ähuuskät ad-dd-təjjəš tamäđt wärät täswär älzämaγät n-imumənän təddalnen Mässināγ, ad-t-təddal ənta-dāγ?

¹⁴ Ajän wädden, a-wa hanāγ-ixläyän iket-net, isakn'-anāγ a-s wär dd-osenät tišəkkađ fäll-ähaləs? İläš fälla-s a-wen

¹⁵ mäšan, tamäđt ənta, a-wa hanāγ-ixläyän iket-net, ässiikn'-anāγ a-s tišəkkađ, tamäđt a fäll-ähusknät ed Mässināγ a has-tänät-ikfän i-ad-tudabät ad-təštär iman-net.

¹⁶ Äywa, kunta han-kāwän äddinät ha tamädašt dāγ-isälan-wi-dāγ, əlmədnet a-s wär t-illa agna nəzzay säl wa-dāγ, wär t-illa daγ agna əzzaynät älkänisäten n-Mässināγ ti iyyädnen säl wa-dāγ.

Isälan n-amənsi wa šäddijän

¹⁷ Ämära, ässiilmädäγ-kāwän a-s wär γur-i lem tisenen ed, əsleγ a-s käwäneđ, e-d tažammaγäm, wär tinγəymim i-ad-təhələm s-data, änn-ak, a-wa käwän-isahalän s-ider γas a fäl tažammaγäm.

¹⁸ S-tizarät, əsleγ a-s e-d tažammaγäm i-älγibadät, tizunawen a tadjäm, əflasāγ a-s a-wen, ija dāγ-s härät,

¹⁹ ed bəđđo-bəđđo, ähhuuššäl γas i-ad-itwənhəy wi s-itbät a-s tidət a-s əlkamän.

²⁰ Əsleγ a-s tažammaγäm mäšan, ažəmmāγ-nāwän i-ad-tahərəm amənsi wa n-tasäktot šäddijän n-Emäli, wär-itəjj s-älmāγna

²¹ fäl-a-s, e-d iwwäđ älwäqq wa n-tetäte n-amənsi-en, hak iyyän dāγ-wän, ad-idəw dāγ-a-wa dd-iwwäy ad-t-itatt, umas a-s aγil-nāwän iyyän, älluz, a-s ija a-wen, aγil wa iyyädän, äyyiwän har dāγ-s ikkäs faw asməd ənniyät.

²² Ma jän ihānan-nāwän təksəm-dd, təswəm-dd dāγ-sän təzzar təkkəm-dd älkänisät n-Mässināγ? Meγ käwäneđ, wär təssəmyāräm älkänisät ta n-Mässināγ? Meγ a tärham ad-səmmäđrəyäm äddinät wi käwän-hänen wären la härät? Ak əndek γas a-wa s-tärhäm ad-hawän-tän-ännāγ dāγ-a-wen? Ak a tärham ad-hawän-äqəəsāγ? Xäram-awän!

Tasäktot ta šäddijät

(Mätti 26:26-29; Marqəs 14:22-25; Luqa 22:14-20)

²³ Ämära, a-wa hi-issāγra Emäli a-s ärheγ ad-hawän-t-in-səssiwəđäγ: Ehäđ wa dāγ-ila Emäli Yisa s-ad-ättärmäs, idkäl tajəlla,

²⁴ ämmoy i-Mässinäx təzzar, äzun-tät jer-inəttulab-net, inn'-asän: tajəlla-ta-däx a-s taçəssa-nin ta mad-äkfäx däx-idäggan-näwän. Үäymät tažəmmaçäm, tuzanäm-tät jer-iman-näwän i-ad-hi-dd-kittəwäm.

²⁵ Əssəmdän tetäte ças, ijä a ənnin-däx daç i-kara wa n-tesäse, idkäl-t, innä: «A-wa ihän kara-wa-däx a-s tasäktot n-ärkäwäl n-tassayt wa äynayän madän-iməl jer-i dār-wän afäl inçäl ašni-nin däx-təssəba-näwän. E-d t-təswäm-däx, çaymät hi-dd-kittəwäm,

²⁶ e-d təžəmmäçäm-däx har tohäräm tajəlla d-kara-wa-däx, isälan n-tamättant n-Emäli a tajjäm har ašäl wa dd-mad-iqqəl.»

A-wa wärän il' əmmək

²⁷ A-wen-däx a fäl ere ikšän tajəlla-ta-däx dd-siktəwät taçəssa n-Emäli, meç ere iswän kara-wa-däx dd-isiktəwän ašni-net, däx-a-s, wär-ikfa a-wen semçar, asəffätçi ças a itajj däx-taçəssa d-ašni n-Emäli-i ikfa i-əlxəllas n-dägg-adəm.

²⁸ A-wen-däx a fäl hak äwadəm-däx, izəjjəzzet iman-net, ikkəset abäkkəç däx-tämudre-net təzzar, ijrəw s-ad-äks tajəlla n-Emäli, isəw daç kara-net

²⁹ fäl-a-s, ere ikšän tajəlla n-Emäli meç iswä kara-net däx-a-s wär-omen a-s a-wa taçəssa n-Emäli d-ašni-net, äwadəm-en, ilmədet a-s ədmanän däx-s iman-net.

³⁰ Däx-təssəba n-a-wen-däx fäw a fäl käwän-han äddinät ässilmäçnät turhənnawen d-inəbdan, iyyäç fäw, ämmun.

³¹ Afäl nädoç i-iman-nänäx, wär hanäx mad-iwär uçlem dat-Mässinäx.

³² Mäšan, kud hanäx-iwär uçlem däx-äššərəça n-Emäli-däx, ija a-wen däx-ittus n-ad-naçəd, dihen, wär mad-nahär d-äddunya uješ n-temse.

³³ Ayətma, e-d təžəmmäçäm i-ad-təksəm tajəlla ta dd-siktut taçəssa n-Emäli, çəzzidärät, nəmäqqəlät jer-iman-näwän,

³⁴ kunta ih'-iwän ere älluzän, äkšet-dd çur-ehän-net təzzar, i-ad-wär-itumas ažəmmäç-näwän a fälla-wän dd-isidəwän äššərəça n-Mässinäx.

Harätän wi iyyäçnən hin-oyyeç wär tän-ənnəç, ad-hawän fälla-sän ədwənneç afäl käwän-in-oseç.

12

Isuf wi itäjj Unfas Šäddijän i-dägg-adəm

¹ Ayətma, ämära, däx-isälan n-isuf wi itäjj Mässinäx s-tärna n-Unfas Šäddijän i-äddinät wi omännen s-Älmaseç, wär-ärheç ad-däx-sän təžhaläm.

² Təssanäm a-s ibda a-s tänimäšräyäm i-Mässinäx, äššanämän ças a çarät tošaläm siha d-siha, a-s ija a-wen, wär t-təlla täfert täddobet ad-dd-təzjär imawän-näsän.

³ A-wen-däx a fäl ärheç, ad-hawän-älläçəç a-s, wär t-illa ere s-ihä Unfas Šäddijän ulh-net dd-e-iggədän, ad-ijanna: «Ilyän Mässinäx Үisa», wär t-illa daç ägg-adəm äddooben tənna n-a-s: «Үisa a-s Emäli» ar s-ad-t-dd-intaj Unfas Šäddijän s-tənna n-a-wen.

⁴ Isuf n-Mässinäx wi itäjj i-dägg-adəm s-tärna n-Unfas Šäddijän, əjjətän ännuçän-näsän mäšan, Unfas ənta iyyän ças;

⁵ imašalän wi issäçläf Mässinäx i-dägg-adəm s-tärna n-Unfas-net, əjjətän, əzlayän mäšan, a-wen, wär hin-ikkəs a-s Emäli iyyän a ihakkän a-wen;

⁶ tädabit daγ ta ihäkk Mässinäγ i-asəssiwəð n-imaşalän-win-däγ, təbða s-äwadəm-äwadəm maşan, Mässinäγ iyyän a isarγasän a-wen-däγ iket-net i-äddinät iket-näsän.

⁷ Hak amumən-däγ, ijraw γur-Unfas Şaddijän tädabit tiyyät s-ixdäm a infan imumənän wi iyyäðnen.

⁸ Äwadəm iyyän, ijraw γur-Unfas Şaddijän tädabit n-tənna n-mäjräd ilan ujreh, iyyän ijraw γur-Unfas Şaddijän təlγuləma, a-wen iket-net, Unfas-en-däγ n-iyän a t-ihakkän.

⁹ Äwadəm iyyän, ihakk'-e Unfas immun, äkf iyyän tädabit n-ad-izizuy imarhinän,

¹⁰ äkf iyyäð tädabit n-tijawt n-tikunen, äkf iyyäð tädabit n-asəssiwəð i-äddinät isälän fälla-s dd-äzizäbbät Mässinäγ, äkf iyyän musnät jer-äddinät, iyyäð tädabit n-asiwəl n-awalän wären ätwässan, äkf daγ iyyäð tädabit n-ättäfässir n-awalän-en-däγ.

¹¹ Unfas Şaddijän-en-däγ a itajjän härätän-win-däγ iket-däγ-näsän. Hak äwadəm-däγ d-tädabit ta s-irha ad-has-tät-äkf, hak äwadəm-däγ, wär-ässaläh a-wa t-ikfä d-a-wa ikfä amidi-net.

Imumənän əjjətän maşan, ämoosän tiyyät taγəssa

¹² Äyyät-ahi ad-käwän-äkfäγ älmital s-käwän-əssəfhəməγ edägg wa-däγ: wädden taγəssa n-äwadəm-i-däγ, tiyyät γas maşan, tämmuzjäl, tartit n-izəmmuzjal-en-däγ iket-näsän a-s taγəssa. Ənta-den-däγ daγ a-wa nəja däγ-tassaγt-nänäγ d-Älmasex,

¹³ iket-nänäγ, iyyän n-Unfas a däγ-nätwäsälmäγ i-ad-nasäγ, numas tiyyät taγəssa. A-wen, wär sār-s əzleyän käl-Älyähud wäla käl-Älyunan† wäla eklan wäla ilällan ed iket-däγ-näsän, Unfas-wen-däγ n-iyän a əjräwän.

¹⁴ Taγəssa ya, wär tämoos azämmäzjul iyyän γas, əjjətän izəmmuzjal-net.

¹⁵ Afäl dd-iggäd ađar, inna: «Näkk, wär hi-təla taγəssa ed wär-ämoosäγ äfuss», ajän ikkäs-t a-wen däγ-tumast n-azämmazjul n-taγəssa?

¹⁶ Kud dd-təggäd daγ taməzɣujt, tənna: «Näkk, wär hi-la taγəssa ed, wär-ämoosäγ tiṭṭ», ajän a-wen ikkas-tät däγ-tumast n-härät däγ-taγəssa?

¹⁷ Ənnär tämoos taγəssa iket-net tiṭṭ, ma s-mad-isəl ägg-adəm härät? Ənnär tämoos taγəssa iket-net taməzɣujt, ma s-mad-isunsej äwadəm härät?

¹⁸ Wädden əmmək-wen-däγ daγ a-s dd-ixläk Mässinäγ taγəssa, änn-ak a-s tät-dd-ixläk, hak azämmazjul n-taγəssa-däγ d-edägg wa s-has-irha däγ-taγəssa.

¹⁹ Ənnär azämmazjul iyyän γas a t-illan, iket-di, wär t-təmmil taγəssa.

²⁰ Däγ-təssəba n-a-wen-däγ a fäl, taγəssa, əjjətän izəmmuzjal-net maşan, taγəssa ənta, tiyyät γas.

²¹ A-wen-däγ a fäl wär täddobät, ad-dd-təggəd tiṭṭ, tänn i-äfuss: «Näkk, wär däγ-k leγ əşşəγəl», wär-äddobät daγ eγäf, ad-dd-iggəd, änn i-ıdarän: «Wär sār-wän ämγatäräγ.»

Hak azämmazjul n-taγəssa-däγ, iṭṭaf amidi-net

²² Wädden, hannäyäm a-s izəmmuzjal n-taγəssa-nänäγ wi wär nəkna asəfrar, əntäneð-en-däγ a hanäγ-ənfanen s-härät,

† 12:13 12:13 Itawann'-asän: Gəriktän. (Les Grecs däγ-Təfränsit). Əzzaγän Erobbä däγ-äkall wa itawänna: Gəris (La Grèce däγ-Təfränsit). Tawalt-näsän: Tälyunanit.

²³ ija gur-näx a-s izəmmuzjal n-taḡəssa-nänäx wi nəkna məlkəhaw, əntəneḡ, a nəkna asəbbələl, wi s-hanäx-əsikərakəḡ wəla ad-näḡər ismawän-nəsän, əntəneḡ-en-däḡ a nəkkan aṣatar.

²⁴ Wi iwär särho, wär nāmḡatär s-aṣatar-nəsän fäl-a-s Mässinäx iman-net-i dd-iknän taḡəssa, ij'-asän äddäbara fäl iwär särho išrutän wi ifäl.

²⁵ A-wen ij'-e Mässinäx i-ad-wär kənnəs taḡəssa d-iman-net, dihen, hak azämmazjul-däḡ, äkkuul däḡ-amidi-net.

²⁶ A-wen-däḡ a fäl e-d əsnin edəgg iyyän däḡ-taḡəssa, taḡəssa iket-net daḡ a təsniinät, e-d irxäm daḡ edəgg iyyän däḡ-taḡəssa, taḡəssa iket-net a madät-tisraw.

²⁷ Kəwəneḡ, a-s taḡəssa n-Älmasex, hak iyyän däḡ-wän-däḡ, ämoos azämmazjul-net iyyän.

²⁸ A-wen-däḡ a fäl dd-äšmašäl Mässinäx inəmmušal s-tizarät däḡ-älxidmət-net wa n-älkənisät, issəlkəm-asän-dd ənnəbitän, əlkəmən-asän əlḡulam, əlkəmən-asän äddinät wi lənen tədabit n-iji n-tikunen, əlkəmən-asän wi lənen tədabit n-azuzi n-imarhinän, əlkəmən-asän wi ha tərha n-ad-ədhəlan imidiwän-nəsän d-wi lənen tədabit n-asəssiḡəd-nəsän d-wi lənen tədabit n-mäjräd n-awalän wəren ätwässan.

²⁹ Ənhəywät, wädden äddinät iket-däḡ-nəsän a-s inəmmušal, wädden iket-däḡ-nəsän a-s ənnəbitän, wär ämoosän iket-nəsän əlḡulam, wädden iket-nəsän a əjrawnen tədabit n-tijawt n-tikunen

³⁰ wəla azuzi n-imarhinän wəla mäjräd n-awalän wəren ätwässan wəla tədabit n-ättäfässir-nəsän.

³¹ Šamad isəlan-den-däḡ, adiš, ärheḡ däḡ-wän ad-səddärhənəm isuf n-Unfas Šaddijän wi ufänen, win-däḡ a-s lam s-ad-tədgəzəm däḡ-umäḡ-hasän. Äyyät-ahi ad-kəwän-səlmədäḡ a-wa ufän däḡ-a-wen-däḡ iket-net.

13

Tərha ta n-tidət

¹ Kud-irha siwəläḡ awalän wi n-dəgg-adəm hakd-däḡ wi n-ənjəlosän, kunta ämmuukkän a-wen, afäl wär-əsdəwəḡ a-wen d-tərha n-ulh təmdat, wär izley mäjräd-in d-eməsli n-təzoli təssewələt bannän meḡ tefelt n-daroḡ təzyakät.

² Kud-irha fəw umas a-s wär t-illa mäjräd n-Mässinäx s-wädden äzizəbbät-t-dd fäll-i i-ad-t-in-səssiwəḡäḡ äddinät, kud-irha fəw, wär t-illa əddəraj s-wädden əssanäḡ-t, kud-irha äzizəbbəḡ musnät, kud-irha ley immun wa isahanen iḡayän, afäl wär-əsdəwəḡ a-wen d-tərha n-ulh təmdat, wär-əmoosəḡ wəla a əndərrän.

³ Kud-irha, ärməsəḡ ehäre-nin iket-net, äjəḡ-t takute i-tiləqqiwen, kud-irha fəw äjəḡ i-Eməli alkum-wa-däḡ s-wär-äkkuləḡ a-s ärḡeḡ däḡ-efew däḡ-təssəba-net, afäl wär-əsdəwəḡ a-wen d-tərha n-ulh təmdat, wädden wəla a əndərrän.

⁴ Äwadəm wa s-ha tərha təmdat ulh-net, he tazidert, oolay, wär-itisəm fäl a ikfa Mässinäx wär t-ikfa, wär-itəbəriḡ, wär-ässakäḡ,

⁵ wär itəjj a iləšan, wär-igla fäl derhan n-iman-net, išmər, ilamməz-in a äjjeen,

⁶ wär-itəqqəs i-a wərən oḡed, tidət a t-isadəwen,

⁷ inašš, iflas, ijar äṡṡama, işbär.

⁸ Tərha, wär-ilkem ad-tät-äba, təlluləya däḡ-isəlan n-Mässinäx, ad-təmdəw; awalän wi wəren ätwässan, ad-tän-iba, musnät ad-imdəw

⁹ ed musnät, hakd-däḡ təlluləya däḡ-isəlan n-Mässinäx, hak iyyän däḡ-näḡ ila däḡ-s hərät

¹⁰ māšan, afäl dd-osa a-wa imdän, ad-imdew a-wa dārrusän, ijjəš a-wa imdän edägg-net.

¹¹ A-s nämoos aratan, mäjräd n-aratan a nətajj, inəzjam n-aratan a nəttaf, tayette n-ara a-s närjaš māšan, nämoos meddөн ɣas, noyy'-in fällanäɣ a-wa län aratan.

¹² Tidət-däɣ a-s ämära-däɣ, wär nännufläy däɣ-ahānay n-härätän wi n-Mässinäɣ ed ahānay-nänäɣ, oläh d-ahānay wa itäj ăwadəm i-iman-net däɣ-tiset wäššärät, wär-äddobät s-iyiyät ad-däɣ-s inhöy iman-net iket-net māšan, ašäl wa n-tebädde, ad-nənhöy Mässinäɣ s-tiṭṭawen-nänäɣ, nəzzöy-t s-əmmək wa s-hanäɣ-izzäy ašäl-i-däɣ.

¹³ Iket-di d-itäj a-wen, əllan-t kəraḍ härätän äɣlalnen: immun, äṭṭäma d-tārha māšan, toojär-tän tārha iket-däɣ-näsän.

14

Isuf wi itäj Unfas i-äddinät

¹ Ayətma! Təjjəšet tārha təmdat ulhawän-näwän, ärhät isuf wi itäj Unfas Šaddijän i-dägg-adəm hullan wi n-asəssiwəd n-mäjräd dd-äzizäbbät Mässinäɣ fälla-wän i-äddinät.

² Äwadəm wa äddooben ad-isiwəl awalän wären ätwässan, Mässinäɣ a-s itamäjräd wädden dägg-adəm, wär t-illa ere t-ifhamän ed, Unfas a t-dd-intäjän i-ad-isiwəl əddärajän-wi däɣ-ässewäl.

³ Äwadəm wa fäll-dd-äzzäbbät Mässinäɣ mäjräd hin-ässawäd dägg-adəm, dägg-adəm a-s itamäjräd i-ad-tän-isəşsuhət däɣ-immun, isəmmətär-tän, isəsmäḍ ulhawän-näsän.

⁴ Wa isawalän awalän wären ätwässan, iman-net ɣas a iniffew, isişuhut-tän s-a-wa ijänna māšan, wa fäll-dd-äzzäbbät Mässinäɣ mäjräd hin-ässawäd dägg-adəm, älkänisät iket-net a iniffew, isişuhut-tät.

⁵ Ayətma, derhan-in a-s ad-siwəläm iket-näwän awalän wären ätwässan māšan, ässofäɣ ad-təjrəwäm tädabit n-ad-hin-sasawäḍäm äddinät mäjräd fälla-wän dd-äzizäbbät Mässinäɣ ed wa ijräwän turhajät-ten-däɣ, ojar wa isawalän awalän wären ätwässan hullan afäl wär-äddobät wa isawalän awalän-en, ad-äffässär a-wa ijänna i-ad-isəşsuhət sār-s älkänisät.

⁶ Ayətma, kud käwän-in-əkkeɣ ämära, ad-hawän-sawaläɣ awalän wären ätwässan, ma s-mad-infew a-wen? Wädden ufa ad-käwän-səfhəməɣ a hi-dd-äsinäfaläl Mässinäɣ meɣ ad-hawän-siwəḍäɣ musnät meɣ ad-käwän-in-səssiwəḍäɣ mäjräd fäll-i dd-äzizäbbät Mässinäɣ meɣ ad-hawän-t-säɣrəɣ?

⁷ Əḍkələɣet-dd ɣas älmital fäl härät wär iha unfas šund taɣänibt meɣ tehärdänt, afäl eməsli wa takkäsän, wär ija ewet olayän, əndek a-wa he-äj äwadəm ibḍew eməsli wa n-taɣänibt d-wa n-tehärdänt?

⁸ Täsinsäɣt daɣ ta dd-ɣarrät əlɣəškär s-tebädde, afäl wär tät-äshäd äwadəm s-əmmək-net, ma ämoos əssärdasi wa dd-e-ibdödän i-amjar?

⁹ Əmmək-wen-däɣ daɣ a-s, mäjräd wa täjjäm, afäl wär-issəfhäm, mi madän-ijrah a-wa jännem? Ad-talähäm ɣas d-ere ässewälän däɣ-aḍu.

¹⁰ Awalän, əjjötän däɣ-äddunya māšan wär t-illa-i s-wädden il' älmäɣna,

¹¹ afäl wär-əssenäɣ älmäɣna n-iyiyän däɣ-sän, ad-umasäɣ älzahil i-wa t-ämmijrädän, umas-ahi näkk-däɣ wa t-ämmijrädän, älzahil.

¹² ɣas, šämad käwäned təknam tārha n-ajäraw n-isuf wi ihakk Mässinäɣ i-dägg-adəm s-tärna n-Unfas Šaddijän, adiš, əmmäɣät däɣ-sän i-wi ufänen sişuhutnen älkänisäten.

¹³ A-wen-däx a fäl, äwadəm wa ijrāwän däx-Mässinäx turhajät n-ad-ämmäjräd awalän wären ätwässan, ittäret däx däx-Mässinäx ad-t-äkf turhajät n-ättäfässir-näsän

¹⁴ fäl-a-s, e-d töddaläx Mässinäx däx-awal wär-össenäx, Mässinäx a çabbädäx s-önniyät-in mäšan a-wa jänneç, näkk iman-in, wär sär-i ila ujuh.

¹⁵ Adiš, ma änihäjän? Äddoobeç ad-ödäläx Mässinäx däx-mäjräd wärän ätwässan s-tärna n-Unfas Šaddijän mäšan, a-wen, wär hin-ikkas a-s äddoobeç ad-t-ädäläx s-tayötte-nin däx-mäjräd öfhamän äddinät, äddoobeç ad-amöläx Mässinäx däx-awal wärän ätwässan mäšan a-wen wär hin-ikkas a-s äddoobeç ad-t-amöläx s-tayötte-nin s-älmäçna öjrahän äddinät.

¹⁶ Afäl wär jeç a-wen har çabbädäx Mässinäx däx-mäjräd wärän ätwässan, öndek ömmök wa s-mad-äkawönän äddinät wi hänen älzämaçät n-imumönän hi-äsijädnen, önnön-ak: «Amin!» a-s wär t-illa a öfhamän däx a-wa önnex?

¹⁷ Kud-däx tittar n-tämayit i-Mässinäx a täjjäx s-a-wen, wär-idhel a-wen amumön wa hi-äsijädän i-ad-işçuhöt däx-immun-net ed wär-issen a jänneç.

¹⁸ Näkk, ämmoyäx i-Mässinäx, öjäreç-käwän iket-näwän mäjräd däx-awalän wären ätwässan

¹⁹ mäšan, e-d heç älkänisät, ässofäç ad-ännäx sëmмосät tifer sayranen härät däx-erhet n-Mässinäx uhön ad-ännäx märaw afdän n-tifer däx-imöjridän wären ätwässan s-wär t-illa ere tän-ifhamän.

²⁰ Ayötma-ç, iwşarät, töyyöm tumast n-aratän; tidöt, däx-isälan wi hänen ebre n-tälläbäst, umasät şund aratän mäšan, däx-isälan n-a-wa ihälän ebre n-tayötte ta n-almud n-erhet n-Mässinäx, umaşät meddön ömdanen.

²¹ Iktab däç-alämär n-Mässinäx a-s, innä Mässinäç:

«Tamötte-ta-däç,

ad-sär-s dd-şemmişöläç äddinät ämmijrädnen

awal säl wa tamäjräd,

ad-has-ämmäjrädäç s-içlay n-imäjarän

mäšan hakd a-wen-däç iket-net, wär hi-mad-söçöd.»

²² A-wen, ässiilmäd-anäç a-s awalän wi wären ätwässan, iji n-Mässinäç dd-äsisawäy i-ad-umas aşämöl wädden i-imumönän, änn-ak i-wi wären ömen, a-s ija a-wen, asiwöl däç-mäjräd dd-äzizäbbät Mässinäç fäll-äwadəm, imumönän a-s ämoos aşämöl wädden äddinät wi wären ömen.

²³ İssönät ças afäl täççimmäç älkänisät iket-net, ad-tamäjradän äddinät wi tät-hänen iket-näsän s-awalän wären ätwässan, äddinät wi s-a äynayän d-ömänän, ma he-önnön däç-a-wen? Meç däç ma däç-wän-e-önnön wi wären ömen? Wädden ad-hasän-talähäm ças d-inöbbuddal iket-däç-näwän?

²⁴ Mäšan, afäl mäjräd fälla-wän dd-äzizäbbät Mässinäç a hin-sasawaçäm äddinät, kud fälla-wän dd-ijjäs äwadəm wärän ömen wäla-i s-a äynayän d-ömän, ämzäyyen-dd d-mäjräd n-Mässinäç wa siçuläm, ad-ölmödän a-s tidöt a däç-tässewäläm, öşşökän iman-näsän, ölmödän däç s-ibäkkadän-näsän

²⁵ ed, ad-dd-isöffukkär mäjräd wa jäm a-wa iffärän däç-ulhawän-näsän. Dihen, äwadəm-en, ad-irkäç dat-Mässinäç, içböd-t, äjjayh däç a-s tidöt-däç a-s ill'-e Mässinäç jere-wän.

Hak härät-däç, äçet s-älçal

²⁶ Ayətma-χ, əndek äddäbara? Ärheχ dāχ-wān a-s e-d təžəmmāχām, kunta, ih'-iwān ere irhan iji n-təmmal i-Mässināχ dd-təjmaḍāt a-wa iχra dāχ-Äzzäbur, meχ ere irhan ad-isāχār äddināt, meχ-i s-dd-äsināfaläl Mässināχ härät, meχ-i ijrawān χur-Mässināχ turhajät n-ad-ämmäjräd awal wārān ätwässan, meχ-i χur-s ijrawān turhajät n-ad-ällāχāt älmāχna n-mäjräd wārān ätwässan, äjät härätān-win-dāχ iket-nāsān dāχ-ənniyät n-ad-səşşuhum älkānisät.

²⁷ Wi tamäjrädnen awalān wāren ätwässan, əgdähān əssin meχ kərəḍ, əmzizärnet s-mäjräd, ämlet-t ere itafässarān a-wa jännən,

²⁸ afäl wār t-illa ere iffəssārān a-wa jännən, adiş susəmet dāχ-älkānisät, ämmäjrädet hak iyyān dāχ-sān i-Mässināχ dāχ-iman-net.

²⁹ Äddināt wi fäll-dd-äzzäbbät Mässināχ mäjräd hin-ässawäḍān äddināt, mäjrädnet dāχ-sān əssin meχ kərəḍ s-emäzezar, səjədnət-asān äddināt wi iyyäḍnen, zəjjəznet-tān hullan i-ad-əbḍəwān a-wa olāχān dd-ifälān Mässināχ d-a-wa dd-əkkāsān äddināt-en dāχ-iχāfawān-nāsān.

³⁰ Afäl dāχ-wān-in-isasawaḍ iyyān i-tamətte mäjräd fälla-s dd-äzizäbbät Mässināχ har dd-inkār iyyān s-dd-äsināfaläl Mässināχ härät s-irha tənna-net, isusəmet wa äzzarān i-ad-ämmäjräd wa dd-işrāyān.

³¹ Täddebem s-emäzezar, ad-hin-səssiwəḍām tamətte mäjräd fälla-wān dd-äzizäbbät Mässināχ i-ad-sāχrəm imumənān iket-nāsān, səmmətäräm-tān

³² fäl-a-s ännäbitān, änihäjjā ad-t-illa ənniyät-nāsān daw-wa n-ännäbitān wi iyyäḍnen.

³³ Hak härät-dāχ, äjet s-älxal ed Mässināχ, älxer wädden tämsärşär.

Dāχ-isālan n-tiḍəḍen ämära, ärheχ dāχ-wān, ad-təjəm a-wa jänät älkānisäten n-iməşşeddəjān,

³⁴ susəmet dāχ-älkānisät, ed wār hasnät t-illa mäjräd dāχ-s, änn-ak sərəsnet iman-nāsān, səjədnät ed a-wen-dāχ a innä alämār n-Mässināχ.

³⁵ Ti dāχ-snät lät asəstan, täqqəlet ehān-net təzzar sətənet ähaləs-net fäl-a-s ilāş fäll-taməḍt, ad-tämmäjräd dāχ-älkānisät.

³⁶ Ajān kəwāneḍ, ija χur-wān a-s mäjräd n-Mässināχ, kəwāneḍ ad-dd-ifäl? Meχ ija χur-wān a-s kəwāneḍ χas a fäll-t-dd-äzzäbbät?

³⁷ Kunta ih'-iwān ere ordan a-s ənta ännäbi a ämoos, meχ orda s-ijraw χur-Unfas Şäddijān, a wār-əjrewān äddināt wi iyyäḍnen, adiş, ilmədet dāχ a-s a-wa-dāχ hawān-in-əktäbāχ, alämār dd-ifälān Emāli a ämoos.

³⁸ Ere dd-iggädān innä a-wen bahu, wār t-in-təjrehām, Mässināχ a fäl wār-issen.

³⁹ Ayətma-χ, ədgəzät dāχ-asəssiwəḍ n-äddināt i-mäjräd fälla-wān dd-äzizäbbät Mässināχ, wār təgdelām i-äddināt wi iyyäḍnen mäjräd dāχ-awalān wāren ätwässan

⁴⁰ mäşan, äjät a-wen iket-net s-äneḍām d-älxal.

15

Isālan n-tanākra n-Ÿisa Älmasex jer-inəmmuttan

¹ Ayətma-χ, ärheχ ämära ad-kəwān-dd-səktoχ a-s Älənžil wa s-hawān-jeχ isālan-net, tomānām sār-s, tətḥäfām-t, iḥḥaf dāχ tämudre-nāwān hak aşāl,

² Älənžil-en, ənta a-s əssəbab n-əlxəllas-nāwān afäl has-jäm uḍəf s-əmmək-wa-dāχ s-hawān-t-in-ässawäḍāχ, afäl wār has-jem a-wen, ad-umas immun-nāwān, i n-bānnan.

³ Ayətma-γ, a-wa äγreγ a käwän-əssäγräγ näkk-däγ. A-wa käwän-əssäγräγ daγ, eγäf-net da:

Inn'-anäγ əlkəttab n-Mässinäγ a-s Älmasex, ämmut däγ-təssəba n-ibäkkadän-nänäγ;

⁴ inn'-anäγ daγ əlkəttab n-Mässinäγ a-s ijjäš azəkka mäšan, ašäl wa s-kärad darät tamättant-net, inkär-dd jer-inəmmuttan,

⁵ issəknä iman-net i-Bətrus, dara-s inəttulab wi n-märaw d-əssin,

⁶ dara-sän əntäneđ, issəknä iman-net i-imumənän okäynten səmmosät timađ n-awadəm s-təššəm-näsän, təddar kud-däγ aγil-näsän iyyän, äba-t,

⁷ dara-sän, issəknä iman-net i-Yaqub, təzzar ənhäyän-t daγ inəmmušal iket-näsän.

⁸ Dara-sän iket-däγ-näsän, änfaläl-ahi-dd näkk-däγ Buləs, näkk-i n-aγri

⁹ ed, näkk a-s wa əndärrän n-ajijal däγ-inəmmušal, wär-ənhäjjäγ faw d-ad-itwənn näkk ənəmmašul fäl təmγäre n-älγizabät-i-däγ əssəknäγ əlkänisät n-Mässinäγ.

¹⁰ Mäšan, a-wen, wär hin-ikkəs a-s, Mässinäγ a hi-ijän däγ-ännuγmät-net a-wa ämoosäγ ašäl-i-däγ, ännuγmät daγ wa fäll-i ija, wär hin-inγel bännan, ed, ašäl-i-däγ, äddoobeγ ad-ännäγ a-s ojaräγ inəmmušal iket-näsän əlxidmät mäšan, əlxidmät-en, wädden näkk a t-ijän, ännuγmät n-Mässinäγ-i däγ-i ixdamän a t-ijän.

¹¹ Jer-näk wäla inəmmušal wi iyyäđnen, härät iyyän a hawän-näxtäb, ənta-den-däγ daγ a-wa s-tomanäm.

Isälan n-tanäkra n-imumənän jer-inəmmuttan

¹² Kunta näkkäneđ nənn'-awän a-s Älmasex, inkär-dd jer-inəmmuttan, adiš ma isawannen iyyäđ däγ-wän a-s wär təlkem tanäkra jer-inəmmuttan?

¹³ Kunta tidət-däγ a-s wär t-təlla tanäkra jer-inəmmuttan ašäl ilkämän, adiš Älmasex-däγ, wär dd-inker jere-sän.

¹⁴ Kunta daγ Älmasex wär dd-inker jer-inəmmuttan, adiš əlxuṭbat-nänäγ, taxxalen γas, wär t-illa a infa, adiš, immun-nawän daγ sär-s, wär t-illa a infa.

¹⁵ Kunta inəmmuttan wär-ilkem ad-dd-ənkärän, adiš, terk tjuhawen a nämoos, nənänä bahu ed nənänä issənkär-dd Mässinäγ Älmasex jer-inəmmuttan, a-s ija a-wen, wär t-dd-issənkär jere-sän.

¹⁶ Afäl γas inəmmuttan, wär dd-nəkkärän däγ-tamättant, adiš, Älmasex daγ, wär dd-inker jere-sän.

¹⁷ Kunta daγ Ḡisa Älmasex, wär dd-inker jer-inəmmuttan, adiš immun-nawän sär-s, wär infa härät ed tənsam härwa daw-äzük n-ibäkkadän-nawän.

¹⁸ Kunta daγ a-wa tordäm tidət, adiš, wi s-a-s tän-äba-däγ omanän s-Älmasex, adiš äba-tän bännan, wär hasän t-illa äṭṭäma wäl' iyyän.

¹⁹ Kunta daγ äṭṭäma-nänäγ wa nəjar däγ-Älmasex, imdä-dd däγ-äddunya-ta-däγ γas, adiš, iməskay näkkäneđ däγ-dägg-adəm, wär t-illa ere hanäγ-ojarän təla n-təhanint.

²⁰ Ayətma-γ, Älmasex, tidət-däγ a-s inkär-dd jer-inəmmuttan, ənta a dd-issənkär Mässinäγ s-tizarät i-ad-hanäγ-isəfləs a-s inəmmuttan wi iyyäđnen, ilkam əntäneđ-däγ ad-dd-ənkärän.

²¹ Əmmək-wa-däγ s-əhaləs iyyän ad-dd-orawän tamättant s-dägg-adəm iket-näsän, əmmək-wen-däγ daγ, a-s əhaləs iyyän-däγ γas ad-dd-orawän a-s təlkam tanäkra n-äddinät iket-näsän jer-inəmmuttan.

²² Dägg-adəm, təlcam dəχ-sän tamättant iket-näsän ed Adəm ad-dd-əzjarän iket-dəχ-näsän; əmmək-wen-dəχ daχ a-s mad-əjrəwän äddinät iket-näsän wi ärtäynten d-Älmasex tämudre täynayät täχlalät.

²³ Ämära, tanäkra n-inəmmuttan, ad-täj s-emäzəzar: Älmasex a dd-inkärän s-tizarät jer-inəmmuttan i-ad-umas ädđimmana i-äddinät wi has-əlkämnen, dara-s, ad-dd-ənkärän äddinät wi sār-s omänneren, win, tanäkra-näsän, ad-täj ašäl wa dd-mad-iqqəl Yisa.

²⁴ Yur-a-wen-dəχ, ad-mad-təmdəw äddunya. Älwäqq-wen-dəχ ad-mad-isuk Yisa Iblis äkall ənta d-a-wa ila dəχ-alšinän d-tärna d-äššahät, äkf dihen Təmmənəya iket-net Abba Mässinäχ.

²⁵ Yisa, ähhuuššäl ad-iṭṭaf Təmmənəya hundəχ har äj Mässinäχ išənja-net daw-iḍarän-net, ikrəš fälla-sän ašäl.

²⁶ Ašänjo-net wa s-mad-išrəy, tamättant

²⁷ fäl-a-s, iktab dəχ-əlkəttab n-Mässinäχ a-s:
«Ikf'-e Mässinäχ ašäl fäll-härät iket-net.»

Tidət, Mässinäχ ija härät iket-net daw-iḍarän n-Älmasex, məšan, kunta ija Mässinäχ härät iket-net daw-iḍarän n-Yisa, Mässinäχ ənta iman-net, wär-iha härätän wi mälnen daw-iḍarän n-Yisa.

²⁸ Afäl ija Mässinäχ e d t-illäm härät daw-iḍarän n-Älmasex, dihen, Yisa iman-net a madän-äj iman-net daw-tanhaḍt n-Mässinäχ i-ad-titbat təmmənukəla n-Mässinäχ fäll-e d t-illäm härät d-e d t-illäm ägg-adəm.

²⁹ Zənnəzjumətät χas dəχ-mäjräd-wa-dəχ: kunta wär təlcam tanäkra dəχ-inəmmuttan, adiš äddinät wi titwəsəlmixnen dəχ-təssəba n-tasäktot n-ayətma-sän wi äba, ma s-tän-išilləw a-wen a-s əssänän a-s wär təlcam tanäkra jer-inəmmuttan? Ma tordam, mafäl šalḍaşän iman-näsän?

³⁰ Uhən kunta inəmmuttan-i-dəχ, wär dəχ-sän təlcam tanäkra, adiš, näkkəneḍ-i-dəχ, ma dəχ-nədgaz, nətajjäs hak ašäl miši bännan-bännan?

³¹ Hak ašäl, əkkey edes i-tamättant. Ayətma-χ, a-wa hawän-jänney ija əddəttu-wa-dəχ fäl käwəneḍ a-s mad-əbbäräjəχ dat-Yisa Älmasex-i n-Emäli-nänəχ.

³² Kunta näkk erhet n-dägg-adəm χas a-s əlkaməχ, wär hi-t-illa äṭṭama n-a-s təlcam tanäkra jer-inəmmuttan, adiš ma s-hi-infa akənnas wa jey d-iwəχsan dəχ-aχrəm wa n-Ifäsus? Šəmad wär təlcam tanäkra jer-inəmmuttan, adiš, «Näkšet, nəswet ed ašəkka, wär dəχ-nəχ ilkem ar tamättant.»

³³ He käwəneḍ, wär təssəswädäm iman-nəwän!

«Erk amidi jed,
ad t-tumasād.»

³⁴ Iqqəlet-kəwän-dd ənniyät, əbdəwät d-abəkkaḍ ed a-wen-dəχ a äniihəjjän fäll-äddinät äksuḍnen Mässinäχ. Tidət-dəχ a-s han-kəwän äddinät wären əzzey Mässinäχ, a-wen janney-awän-t i-ad-dəχ-wän äjəχ tasəja.

Taxəssa ta täynayät mad-əkrəšen imumənän

³⁵ Əssanəχ a-s mäjräd-wa-dəχ, afäl has-əslän iyyäḍ, ad hi-ənnən: «Əndek əmmək wa s-mad-dd-ənkärän inəmmuttan? Ma dār-mad-taläh taxəssa ta dar-mad-dd-ənkärän?»

³⁶ Iba n-tayətə yaden! Ajän wär təssenäd a-s afäl täddomed tablalt ämära-dəχ, wär-ilkem ad-hak-dd-təssidwäl ar s-ad-tämmät təzzar.

³⁷ A-wa mad-təddumud, wädden ənta a dd-madän-idwəl, jer-tablalt n-älkəma wəla tiyyät n-allonän wi iyyäḍnen, tablalt-net χas a täddomed wädden ahəšk-net iket-net a täddomed.

³⁸ Hakd a-wen-däx, tablalt-ten-däx täddomed, ad-tät-äkf Mässinäx turhajät n-ad-dd-sədwəl a-wa s-irha s-ad-t-dd-sədwəl, hak ädomm-däx, ikf'-e əzzənəf-net.

³⁹ A-wa iwärän ärori n-äkall, wär-oleh tixəswen iket-net, taçəssa ta n-dägg-adəm, təzlay d-ta n-irəzzejän, təzlay d-ta n-igdađ, təzlay d-ta n-imənan.

⁴⁰ Emmək-wen-däx daç a-s t-əllanät tixəswen n-härätän wi əlläyən däx-işənnawän d-tixəswen n-härätän wi wärnen ärori n-äkall; təssanäm a-s härätän wi əlläyən däx-işənnawän, wär olehän d-wi rajjšən fäll-ärori n-äkall.

⁴¹ Asmäqqi wa n-täfukt, izlay d-təmölle n-ewär, täfukt d-ewär daç, asmäxmäx-näsän, izlay d-wa n-etran; etran iman-näsän, əllan-t iyyäđ ojärnen imidiwän-näsän asmäxmäx.

⁴² A-wen-däx a dər-toläh tanäkra jer-inəmmuttan. A-s tajjšän äddinät azəkka, olähän d-tablalt äddomät äwadəm, ad-tənbəl, tämmät təzzar. Afäl dd-täsfäqqät, tədwäl, äbas däx-s ilkam märkähaw, inəmmuttan daç a-s dd-mad-ənkärän, wär fälla-sän təla tamättant tärna.

⁴³ A-s tajjš tablalt ider n-äkall, wär färör, wär t-illa ere fälla-s issanän; inəmmuttan daç a-s tajjšän azəkka, wär t-illa äşşahät tän-ihan mäšan, a-s dd-mad-ənkärän, ədnayän äşşahät şund tablalt-ten-däx s-ad-dd-tifäqqut, la mänhoy.

⁴⁴ Enəmmettən, a-s itajjš azəkka, ämoos tafəkka wär-iha unfas mäšan, a-s dd-mad-inkär, ih'-e unfas. Emmək-wa-däx s-əllanät tixəswen iha unfas wa tänät-ässodärän, əmmək-wen-däx daç a-s mad-əməlnät tixəswen ässodär Unfas Şäddijän n-Mässinäx.

⁴⁵ Däx-isälan n-a-wen-däx fäw a fäl innä əlkəttab n-Mässinäx a-s:

«Adəm a-s ähaləs wa dd-ixläk Mässinäx s-tizarät,

ixläk-t-dd ças,

ija däx-s Mässinäx unfas,

ämoos äwadəm han iman»

mäšan, Çisa-i n-Adəm wa dd-işräyän, Unfas Şäddijän-i ihakkän tämudre a t-ikfän tämudre.

⁴⁶ Wädden taçəssa ta täynayät ihäkk Unfas Şäddijän a dd-täzzarät, änn-ak taçəssa ças ta ikarräş ägg-adəm a dd-täzzarät, təlkäm-as çarät a-wa taçəssa ta täynayät ihäkk Unfas Şäddijän.

⁴⁷ Adəm-i dd-äzzarän fäll-ärori n-äkall, äzarəz n-äkall a däx-dd-ikna; ij'-e a-wen ere ila ärori n-äkall-i-däx mäšan, Çisa-i n-ähaləs wa iyyäđän, işənnawän a dd-ifäl.

⁴⁸ Äddinät wi wärnen ärori n-äkall, olähän d-ere wa tän-dd-äşhäyävän dd-iknän däx-äzarəz n-äkall mäšan, ähaləs wa dd-ifälän işənnawän, äddinät wi ila əkkänen älžännät, ähhuşşäl ad-där-s alähän ənta-en-däx dd-ifälän işənnawän.

⁴⁹ Emmək daç wa-däx a-s ämära-däx, noläh d-ere wa hanäx-äşhäyävän dd-iknän däx-äzarəz n-äkall, əmmək-wen-däx daç a-s ilkam däx-näx ad-naläh näkkäneđ d-ere wa dd-ifälän işənnawän.

⁵⁰ Ayətma, əlmədät a-wa ihälän ebre n-taçəssa d-aşni, wär-e ikus Təmmənəya n-Mässinäx ed taçəssa-ta-däx, təlkam däx-s tamättant, äywa, a däx-təlkam tamättant, wär mad-ijjəş tämudre ta täylälät dd-malät.

⁵¹ Ənta da əddäraj wa s-käwän-salmadäx: wädden iket-däx-nänäx a maden-ənhəy edəs wa n-tamättant, änn-ak, ad-əmmuttəynät tixəswen nänäx iket-däx-nänäx.

⁵² A-wen, ad-äj dāḡ-tamāzäyyat n-ewet n-täsinsäḡt, fäl ešäfälli n-titt, afäl ija a-wen, ad-dd-ənkärän inəmmuttan dāḡ-tiḡeska d-tiḡeswen äynaynen fäll-wär təla tamättant tärna. Tanākra n-inəmmuttan-ten-dāḡ, ad-təmzəyyət d-amutti n-tiḡeswen-nänäḡ näkkəneḡ-i əddärnen i-ad-ābas fälla-snät la tamättant tärna

⁵³ fäl-a-s, ähhuuššäl a-s taḡessa-nänäḡ ta-dāḡ fäll-la tamättant tärna, wär t-illa ar ad-ābas fälla-s la tamättant tärna, ähhuuššäl dāḡ a-s taḡessa-nänäḡ ta-dāḡ tamättet, wär t-illa ar ad-tiynəy, tumas taḡessa s-ābas fälla-s la tamättant tärna.

⁵⁴ Afäl tämmuttäy taḡessa-nänäḡ ta n-ämära-dāḡ, tämoos taḡessa täynayät, ilsa a-wa wärän irəkkäh a-wa irəkkähän, ilsa a-wa fäll-wär la tamättant tärna, dihen, ad-itbət a-wa innä əlkəttab n-Mässinäḡ a-s innä: «Tamättant, tətəlməz-in, tamättant tämmut!»

⁵⁵ Ätwännä dāḡ:

«Onin tamättant, ya tamättant, əndek tärna-näm?

Ma ja tistant ta s-təddajäd äddinät a ija a-wa-dāḡ,

naqqäd-tän sär-s?»

⁵⁶ Abäkkəḡ a ikfän tamättant tistant-ten-dāḡ s-hanäḡ-näqq. Alämär wa n-ännäbi Mosa s-hanäḡ-indär ad-nəmašäl a-wa innä a ikfän abäkkəḡ tärna ta s-hanäḡ-isikəw äkall.

⁵⁷ Tidət ənta-den-dāḡ mäšan, ənhəywät, näkfet Mässinäḡ-i hanäḡ-ikfän tärna fäll-abäkkəḡ semḡar dāḡ-idəm n-Emäli-nänäḡ YisaÄlmasex.

⁵⁸ A-wen-dāḡ a fäl, ayətma-i əkneḡ tärha, əbdədät fäll-iman-nəwän, tətəməm dāḡ-immun-nəwän, ədgəzät hak ašäl i-ad-ihəl älxidmət wa häm i-Emäli s-data dāḡ-a-s təssanäm a-s tiluyyayḡ-nəwän, wär-e umasnät bännan dat-Emäli.

16

Tirjit n-käl-Kurənta i-imumənän wi əzzäḡnen Yärussälam

¹ Ayətma! Dāḡ-isälan n-a-wa s-tärhäm ad-t-sədwəm i-ad-sär-s tədhələm iməššeddəjan wi hänen Yärussälam, äjät ḡas a-wa dāḡ-s ənney i-älkänisäten ti n-teje ta n-Gälasya.

² Hak älxad-i n-ašäl äzzarän dāḡ-əssəboḡ, äjet hak äwadəm a-wa s-irha s-edes s-a-wa dār-ogdäh ajaraw-net, dihen, wär hi-mad-täqqələm har hin-asäḡ təzzar ad-tattäräm asdu n-härät siha d-siha.

³ Afäl kəwän-in-oseḡ, ad-sənnəfrənäm jer-iman-nəwän meddən wi s-tärhäm, dihen, ad-tän-äkfäḡ tikarḡiwen tan-əḡmännən təzzar, sukäḡ-tän-in Yärussälam d-tirjit-nəwän.

⁴ Kunta dāḡ ənhäyāḡ a-s wär hi-t-illa ar ad-där-sän idawäḡ, adiš, ad-hi-ilzəm a-wen.

A-wa inna Buləs i-käl-Kurənta dāḡ asikəl wa ikittəw

⁵ Ilkam dāḡ-i ad-kəwän-in-äkkäḡ mäšan, ad-əmmäräḡ teje ta n-Masidunya təzzar.

⁶ Dāḡ-a-wa kittəwäḡ, ärheḡ ad-äjäḡ äzzäman ḡur-wän, səssikəyāḡ iha miši tajrəst ḡur-wän, tədhələm-ahi dāḡ-asikəl-in s-idəggan wi iyyäḡnen.

⁷ Wär-ärheḡ ad-kəwän-in-əmmäräḡ ḡas akəyāḡ, änn-ak, ärheḡ ad-ähajäḡ ḡur-wän kunta irḡa Emäli s-a-wen.

⁸ Iket-di, ad-äqqaymäḡ dāḡ-aḡrəm wa n-Ifäsus har dāḡ-s səssikəyāḡ ämudd wa n-Fantäkawt,

⁹ hannäyāχ a-s amer-ahi dāχ-s emm hērəwān s-hin-ässawāḍān isālan n-Älənžil, ārhan äddināt äjootnen mäsällāt n-isālan-en kud-dāχ wār-āba išənja s-wār-ijrez a-wen.

¹⁰ Afäl kāwān-in-osa Timoti, äjät ənniyāt i-ad-wār t-issärmāχ hārāt jere-wān, iyyān n-əššāχəl i-Emāli a nəha nākk d-ənta χur-wān,

¹¹ wār t-iläkkāhet āwadəm wāl' iyyān dāχ-wān, änn-ak, sārχəsāt-as asikəl-net i-ad-hi-dd-iqqəl šik dāχ-älxer ed, nākk hakd ayətma-nāχ dāχ-äddin wi iyyāḍnen, nāqqal-as.

¹² Dāχ-a-wa dd-iqqälān isālan n-āḅḅa-nāχ, Äbbāloš, əttärāχ dāχ-s hullan ad-hin-nidaw sār-wān nākkāneḍ d-ayətma-nāχ dāχ-äddin, māšan, s-tənnəd χas, wār ija fäll-a-wen ämära-dāχ, afäl ijraw s-a-wen, ad-kāwān-in-äkk ənta-dāχ.

Isəmməterān d-ajilal n-mäjrād

¹³ Ayətma-χ, ählāt iman-nāwān dāχ-immun, umasāt meddən əmdanen, suhətāt.

¹⁴ Zāzrāt tārha dāχ-hārāt iket-net.

¹⁵ Äsimätärāχ-kāwān d-ad-təssanām hārāt i-Stifanas d-eχewən-net, əntāneḍ a äzzarnen s-immun s-Ÿisa dāχ-teje ta n-Akaya, ixdām hullan i-ad-idhəl iməššeddəjän. Ayətma, ärheχ dāχ-wān

¹⁶ ad-sajadām i-äddināt šund-win-dāχ, əntāneḍ hakd d-äddināt wi iyyāḍnen ədgāznen dāχ-älxidmāt n-Mässināχ.

¹⁷ Təjraz-ahi tābošajt ta sār-i dd-ija Stifanas d-Furtinatus d-Akäyyākos, ənhäyāχ-tān χas, olāh-ahi d-a-s kāwāneḍ a hannäyāχ,

¹⁸ əssənsān ənniyāt-in s-əmmək wa s-əssənsān wa-nāwān. Əjraznet-awān meddən šund-win-dāχ, səmχārāt-tān.

¹⁹ Ähuulān-kāwān-in imumənān wi hānen älkānisäten ti n-Azya. Ähuul-kāwān-in Akilas d-Briska d-älkānisāt ta tazāmmaχāt dāχ-ehān-nāsān. Ähuulān-kāwān-in hullan hullan dāχ-idəm n-tassaχt ta nəja d-Emāli Älmaseχ.

²⁰ Ähuulān-kāwān-in ayətma-wān dāχ-äddin wi t-əllānen diha-dāχ iket-nāsān. Afäl tāχrām tākarḍe-ta-dāχ, nəməjjāt jer-iman-nāwān isofan janen s-tārha təmdat.

²¹ Nākk dāχ Buləs, ähuulāχ-kāwān-in. Hannäyām-t edägg wa-dāχ dāχ-tākarḍe, nākk iman-in a t-iktābān.

²² Ilyān Mässināχ ere wārān irha ŸisaÄlmaseχ. «MARANATA», a-wen älmāχna-net: Emāli, əqqəl-dd šik.

²³ Ikf'-iwān Emāli Ÿisa älxer-net.

²⁴ Oyyeχ χur-wān iket-dāχ-nāwān tārha-nin dāχ-idəm n-tassaχt ta nəja d-ŸisaÄlmaseχ. Amin!

Täkarðe ta s-sänatät iktäb Buləs i-käl-Kurənta

Äšajəš

¹ A-wa näkk, Buləs, wa ija ƳisaÄlmasex änəmmašul dāx-erhet n-Mässināx hin-iktabän näkk d-Timoti wa n-ənḡa-nāx dāx-äddin i-älkänisät n-Mässināx ta häť ayrəm wa n-Kurənta.

Nāhuul-kāwän-in, nāhuul-in dāx iməššeddəjan wi əzzāxnen äkall wa n-Akaya,

² ikf'-iwän Mässināx-i n-Abba-nänāx d-Emäli Ƴisa Älmasex ännuymät d-älxer.

Tämāyit i-Mässināx

³ Näkfet Mässināx-i n-Abba n-Emäli-nänāx ƳisaÄlmasex semḡar, naməlet-t ənta-i n-mässi-s n-tāhanint, isasmaḡän ulhawän-nänāx dāx-tersəmmawen ti hanāx-rammäsən,

⁴ i-ad-nudabät näkkäneḡ-dāx, asəmaḡ n-ulhawän n-äddinät wi tärmas tissant, arəw-dd sär-sän a-wen-dāx, tälawit n-ulh tolähät d-ta hanāx-ikfa Mässināx.

⁵ Emmək-wa-dāx s-a äjjeen dāx-a-wa hanāx-irammäsän, irammäs-anāx dāx-təssəba n-a-wa s-hanāx-ila Älmasex, əmmək-wen-dāx dāx a-s ikann Mässināx asəmaḡ n-ulhawän-nänāx dāx-təssəba n-tassaḡt ta nəja d-Älmasex.

⁶ A-wen-dāx a fäl a-wa hanāx-irammäsän näkkäneḡ dāx-tissant, wär-ämoos ḡas ar a sär-wän dd-oraw Mässināx i-ad-ismaḡän ulhawän-nāwän, täḡləsäm. Äššahät dāx wa hanāx-ihakk Mässināx, i n-ad-kāwän-nədhəl kāwāneḡ-dāx i-ad-tudabem äššabarät dāx-a-wa hanāx-irmäsän s-ašäl-i-dāx, irmas-kāwän kāwāneḡ-dāx.

⁷ Nəkkas äššäk dāx-isälan-nāwän ed, nəflas a-s a-wa hanāx-irmäsän dāx-tissant šund ḡas kāwāneḡ a irmäs, a-wa nəjrāw dāx näkkäneḡ dāx-tälawit, nohar-t dār-wän.

⁸ Ayətma! Elmədät a-s äkall wa n-Azya, nənhay dāx-s älyizabät ässuksäḡän, izbāb-anāx dāx-s a hanāx-irnan här näḡel fāw a-s sämdo-nänāx, osä-dd.

⁹ Nəkkäs ättāma dāx-iman-nänāx šund ḡas a-s tamättant a hanāx-tätiwäḡtäsät mäšan, a-wen, otäs-t Mässināx i-ad-umas a-s fella-nänāx ənta, wädden iman-nänāx, ed Mässināx, ila tärna n-ad-dd-isənkär inəmmuttan;

¹⁰ ənta a hanāx-dd-intäšan dāx-tamättant-ten-dāx tässuksäḡät, ənnär wädden a-wen, äru d-nəssəmḡa. Nəflas dāx a-s ənta ḡas a hanāx-e-ägezän dāx-e d t-illäm äššar.

¹¹ Nəssan a-s tədhäläm-anāx s-tittar-nāwän, ədhalän-anāx dāx äddinät äjjootnen hanāx-təddalnen Mässināx, tittar-nāwän iket-dāx-nāwän, a sär-nāx-dd-orāwnen ännuymät n-Mässināx, ämoos a-wen-dāx əssəbab wa fäl tiimələn äddinät äjjootnen tihusay n-Mässināx, dāx-təssəba n-a-wa hanāx-ija.

Äddälil n-isikilän n-Buləs

¹² Kunta ill'-e a-s naddoobät ad-sär-s näbbäräj, wär t-illa a ämoos kunta wädden a-s wär t-illa a dāḡ-nəššak iman-nänāḡ, tajuhe-ten-dāḡ a hanāḡ-salmadät a-s a-wa nəjā dāḡ-äddunya hakd a-wa nəjā jere-wän iket-net, oḡad. A-wen wädden a dd-ifalän särho-nänāḡ, Mässināḡ a t-ijän dāḡ-ännuymət-net, ənta-i hanāḡ-ikfän turhajät n-iji n-a-wen s-älxal räqqiisän dāḡ-iman šäddijnen d-tidət.

¹³ Närha ad-təssanäm a-s dāḡ-tikardiwen-nänāḡ, a-wa ilän ujreh s-ənta a ḡarräm ḡas a dāḡ-hawän-nässewäl, wär hawän-nässewäl dāḡ-a säl a-wen-dāḡ, əflasāḡ daḡ a-s, ad-iwwaḡ härät fäll-ujreh-nāwän dāḡ-isälän-win-dāḡ.

¹⁴ Ämära, wädden härät iket-net a sär-wän ilan ujreh; a-wen-dāḡ a fäl ašäl-i-dāḡ, nämoos abäraj-nāwän, mašan afäl dd-osa ašäl wa issəbdäd Emäli-nänāḡ ḡisa, ašäl-wen, käwäneḡ a he-umasnen abäraj-nänāḡ.

Äddälil wa fäl wär-oles Buləs uḡəl n-Kurənta

¹⁵ Təssəba n-tafləst-ten-dāḡ hawän-jeḡ a fäl hi-dd-ijjäs s-tizarät derhan n-ad-kāwän-in äkkāḡ i-ad-tumas tedāwit-nāwän, tedāwit təmdat,

¹⁶ ed dāḡ-derhan-in, äḡelāḡ ad-kāwän-in-əmmärāḡ təzzar; akəyāḡ s-teje ta n-Masidunya, aləsāḡ-kāwän-dd daḡ umär afäl tät-dd-fälāḡ i-ad-hitarəjäm dāḡ-asikəl-in s-teje ta n-Älyähudəyät.

¹⁷ Kunta a-wa äsdärhänāḡ, wär-ija, ajän, ija ḡur-wän a-s, wär-əjleyāḡ dāḡ-a-wa hawän-ənnəḡ? Meḡ ajän tordam a-s derhan-in, a dd-əkkašāḡ ḡas dāḡ-eḡäf-in šund a-wa täjjän dāḡg-adəm s-ad-hak-änn iyyän: Əyya, igləw, iqqəl-kāy-dd a əndärrän ḡarät-a-wen, änn-ak: Äbo?

¹⁸ Mässināḡ a hi-äjəyhän dāḡ-a-wa hawän-nəjanja, wär käla hawän-nəssärtäy tidət d-bahu.

¹⁹ A-wen, janneḡ-awän-t fäl-a-s ḡisaÄlmasex-i n-Rure-s n-Mässināḡ-i s-hawän-nətajj isälän-net näkk d-Sillas d-Timoti, wär ämtälla əyya-net d-äbo-net, tidət ḡas a ijanna.

²⁰ Ənta-en-dāḡ, a dāḡ-äsdättät Mässināḡ a-wa s-ija ärkäwäl-net, a-wen-dāḡ a fäl, a nəttär dāḡ-Mässināḡ-dāḡ, isəm-net a dāḡ-nəjanja: «A|scMIN|d», i-ad-itwəsəmyär Mässināḡ dāḡ-təssəba-net.

²¹ Mässināḡ iman-net a hanāḡ-osāḡän s-äššahät dār-wän d-Älmasex-i hanāḡ-ijän inəmmušal-net ašäl wa d-hanāḡ-äsnäfrän.

²² Ənta daḡ a hanāḡ-iššəšwälän s-ešwäl šund wa itäj äwadəm i-təla-net, ija daḡ Unfas-net dāḡ-ulhawän-nänāḡ i-ad-itbat a-s ənta a hanāḡ-ilän, nəkkəs äššäk dāḡ-marušät wa hanāḡ-itwär s-ilkam ad-hanāḡ-t-äkf.

²³ Mässināḡ a hi-äjəyhän wädden äḡg-adəm, inḡ'-ahi daḡ kunta bahu a hawän-janneḡ, wär t-illa a hi-ikkasän ad-kāwän-in-äkkāḡ dāḡ-Kurənta ar iba n-tärha n-ad-änxəsāḡ iman-nāwän,

²⁴ fäl-a-s, dāḡ-isälän wi n-immun, wär-iha ənniyät-nänāḡ ad-fälla-wän nəfräd a-wa wäla a-wa, ed nəkkəs äššäk a-s immun-nāwän, itbat, änn-ak, a-wa hanāḡ-išlän, išl'-anāḡ fäl-a-s innin, närh'-awän älxer.

2

Inəzjam wi iṡṡäf Buləs i-käl-Kurənta

¹ Ärheḡ dāḡ-iman-in, ad-wär käwän-in-tiləsāḡ uḡəl i-ad-äḡšədāḡ iman-nāwän

² ed kunta näkk-i-dāḡ a dd-iqqälän ḡaššädāḡ-awän iman, mi hi-e-isəddəwen? Kunta käwäneḡ-i n-əssəbab n-tedāwit-in, äḡšədāḡ iman-nāwän, əndek əmmək wa s-hi-e-səddəwem?

³ A-wen-däx fäw a dd-orāwän a-s ässofäx ad-hawän-in-əktəbäx, uhən ad-kāwän-in-äkkäx näkk iman-in, ed əssanäx a-s afäl kāwän-in-əkkey s-əmmək-wa-däx, ad-äxšədän iman-in fälla-wän ed əkkasäx äššäk a-s tedāwit-in, a-s tedāwit-nāwän.

⁴ Təkarde-ta-däx, kattäbäx-awän-tät-in mäšan, ärmäsnät-ahi tirəmmax, osas ulh-in, jey tisanant ta n-imeṭṭawän däx-təssəba-nāwän mäšan hakd a-wen-däx, akātab wa hawän-jey, wädden i n-ad-äxšədäx iman-nāwän, änn-ak, i-ad-təlmədäm fäll-tärha-i-däx mäqqārät hawän-jey.

Änsät i-äwadəm wa ämmujrəzän a-wa läbasän ämešäl

⁵ Ämära, äwadəm wa sār-wän dd-äwwäyän uṣšad n-iman-wen-däx, wädden näkk ḡas a-s iṣšād härät, iṣšād-awän-t day kāwäned, änn-ak, ännäyet: iṣšād iman n-təššəm-nāwän, mäšan, wär-ärheṣ ad-šəššəjrey mäjräd däx-isälan n-a-wa iṣšād.

⁶ Äwadəm-en-hi, igdäh-as ämära uḍlem-wen-däx t-täswär təššəm-nāwän, ed täsmäqqäm fälla-s.

⁷ Ämära d-ämmujrəz a-wa ija, ätub, adiš, äjät-t-dd s-iman-nāwän, tənšəm-as, səsməḍäm ulh-net i-ad-wär t-näqq tämujriṣt tojārät ta t-tärmäsät s-tizarät.

⁸ Ättaräx däx-wän, ad-t-səknəm tärha t-tässiilmädät a-s täkkuläm däx-s.

⁹ Təkarde ta hawän-in-əktəbäx, ti s-kāwän-tirəmäx i-ad-əlmədäx ak fäw tamašaläm a-wa hawän-janney meṣ.

¹⁰ Elmədät a-s ere s-tənšäm-däx, ənšey-as. Ere day wa s-ənšeeṣ, kunta ill'-e ere hi-iṣšadän härät, ämiiḡatārän s-ad-has-änšäx, ilmədet a-s ənšey-as-in däx-təssəba-nāwän, ənšey-as day däx-təssəba n-Älmasex.

¹¹ Afäl nətajj a-wen, wär sār-näx dd-mad-ijrəw Iblis tašləlt s-hanäx-ikkärräs ed tiddas-net, wär hanäx-ədrejnät.

Äzzäman wa ija Buləs däx-ayrəm wa n-Tärwas

¹² Äzzäman wa d-əjjäšäx ayrəm wa n-Tärwas i-ad-däx-s äxtəbäx Älənžil n-Älmasex, orä-hi däx-s Emäli emm hərəwän, issärḡäs-ahi iji n-isälan däx-idäggan äjjootnen

¹³ mäšan, hakd a-wen-däx, wär-insa ənniyät-in, fäl-a-s wär däx-s inogezäx Titus-i n-änḡa-näx däx-äddin, a-wen-däx a fäl fäläx ayətma däx-äddin wi t-əllänen dihen, okäyāx s-teje ta n-Masidunya.

Yisa Älmasex ihakk ašäl fäll-Iblis

¹⁴ Təmmal i-Mässinäx-i ihakkän ašäl fäll-Iblis, däx-äddimmät n-Älmasex-i dār-nosaḡ, ənta day a hanäx-ikfän turhajät n-ad-nətajj isälan n-Älənžil i-äddinät däx-edägg iket-net, isälan a-wen s-ašäl-i-däx, jän abḡänḡəl wa täjjän aḍutän äzednen.

¹⁵ A-wen-däx a fäl näkkäned-i ila Älmasex, nämoos i-Mässinäx šund aḍutän-win-däx äzednen ikna tärha, a-wen-däx day a nämoos i-äddinät wi hänen tabarät ta n-əlyəllas hakd wi hänen tabarät ta n-əlhəllak

¹⁶ mäšan äddinät wi hänen tabarät ta n-əlhəllak, aḍu wa hasän-nämoos, erk aḍu dd-itiirəwän sār-sän tamättant, a-s ija a-wen, äddinät wi iyyäḍnen, nämoos-asän, aḍu äzedän dd-itiirəwän sār-sän tämudre täḡlalät.

Ässiistänäx-kāwän: mi s-əgdähän iman-net däx-älxidmät ogdähän d-a-wen-däx?

17 Näkkäneḍ, wär noleh d-äddinät wi iyyäḍnen jänen mäjräd n-Mässinäḅ mamäla s-əbbäḅärän; Mässinäḅ a hanäḅ-ijän däḅ-a-wa hanäḅ-işlän iket-net, a-wa hanäḅ-issäḅläf daḅ, nətajj'-e s-ənniyät şäddijän dat-Mässinäḅ däḅ-təssəba n-tassayt ta nəja d-Älmasex.

3

Tihusay n-ärkäwäl n-tassayt wa äynayän

1 Edäwänne-wa s-iket hawän-t-jeḅ, ajän idəm äynayän a nətattär ḅur-wän? Äbo! Meḅ ajän näkkäneḍ, nämiiyatär s-täkarḍe əktabän dägg-adəm tässiilmädät a-s inəmmušal s-tidət a nämoos? Əllan-t äddinät ämiyatärnen s-a-wen i-ad-səlmədän a-wa ämoosän mäšan, näkkäneḍ, wär däḅ-wän närha a-wen.

2 Täkarḍe-nänäḅ, käwäneḍ-di-däḅ. Täkarḍe a-wa, təktabät däḅ-ulhawän-nänäḅ, əssanän sär-s dägg-adəm, ḅarrän-tät daḅ iket-däḅ-näsän.

3 Älmasex a iktäbän täkarḍe-ten-däḅ däḅ-ulhawän-nänäḅ, ij'-anäḅ näkkäneḍ imawayän-net i-ad-tät-näj däḅ-ifassän-näwän mäšan, täkarḍe-en, wädden adäloş a-s təktab, änn-ak, Unfas n-Mässinäḅ-i n-Amäḅlol a tät-iktäbän, wädden isəllam n-tihun a fäll-tät-iktäb, ulhawän n-dägg-adəm a däḅ-tät-iktäb.

4 Nəkkas äşşak däḅ-tärna n-Mässinäḅ ta hanäḅ-ikfa däḅ-äddimmät n-Älmasex.

5 Wär nəhel wäla-däḅ ad-nänn a-s, a-wa-däḅ hanäḅ-işlän, işl'-anäḅ s-tärna dd-nəkkas däḅ-iman-nänäḅ, änn-ak, Mässinäḅ a hanäḅ-ikfän turhajät n-tädabit n-iji-net,

6 ənta a hanäḅ-ikfän turhajät n-ad-numas inaxdimän n-ärkäwäl n-tassayt äynayän wärän äşhätäl fäll-alämär wa n-Mosa änn-ak fäll-tärna n-Unfas Şäddijän:

Alämär, tamättant
Unfas, tämudre.

Älənžil a isidorän wädden alämär

7 Alämär wa s-janneḅ dd-itirəwän tamättant s-ägg-adəm, äzzäbbät-t-dd Mässinäḅ fäll-ännäbi Mosa, iktab fäll-isəllam n-tihun. Ija däḅ-s Mässinäḅ älxurmät ijan tihusay s-indär wäla-däḅ i-käl-Işrayil ad-däḅ-s əjən wäla-däḅ härät n-ässayät əndärrän n-akäyad fäl təssəba n-ännur-i äsmäḅmäḅän fäll-idəm n-ännäbi Mosa, uhən-däḅ ännur-en, wär-əhoja äsimäḅmäḅ fälla-s.

8 Kunta älxurmät n-ässayät-wen-däḅ əndärrän, ija tihusay ogdähnen d-a-wen-däḅ, äb' ätṭäma n-təmyäre n-tihusay ti ija ämaşal wa dd-ässawäḍ Unfas n-Mässinäḅ-i s-ənta ad-ähaj.

9 ḅas, kunta, alämär-wen-däḅ, wärän sär-näḅ dd-itirəw ar tamättant, ila älxurmät ogdähän d-a-wen-däḅ, äb' ätṭäma n-təmyäre n-älxurmät wa mad-äj alämär-i hanäḅ-itajjän äddinät lanen idəm dat-Mässinäḅ.

10 A-wen-däḅ fäw a fäl älxurmät-wen-däḅ dd-äzzarän, äba-hin älxurmät-net ed osä-dd-i t-iknan mijraw,

11 fäl-a-s, kunta a-wa t-illän s-ilkam ad-t-iba, ila älxurmät ogdähän d-a-wen-däḅ, äb' ätṭäma n-älxurmät wa mad-ikreş a-wa s-ənta a iḅlalän.

12 Ätṭäma ogdähän d-wen-däḅ a fäll-näsifälla, a-wen-däḅ a fäl ozja ənniyät-nänäḅ,

13 wär noleh d-ännäbi Mosa-i s-älwäqq wa d-fälla-s dd-äsmäḅmäḅ ännur n-Mässinäḅ, äşkänbaş-as i-ad-wär hənneyän käl-Işrayil a-s äsmäḅmäḅ wa ija idəm-net, ifannäḅ-in s-a əndärrän a əndärrän.

¹⁴ Äşyärän käl-Işrayil ulhawän-näsän, a-wen-däx a fäl har ašäl-i-däx, ed çarrän ölkəttab wa n-ärkäwäl n-tassaçt wa ärəwän, indar-asän afäham-net ed oläh-asän ölkəttab-en d-a hasän-ilsa härät, s-əmmək-wa-däx s-äškänbəš ännäbi Mosa idəm-net i-ad-wär t-hənnəyän äddinät. Ämära, a-wa ilsän tiçtawen n-äddinät hasän-igdälän uçreh, wär t-illa uçreh-net ar s-tartit d-Älməsex.

¹⁵ İjmad-t äššäk a-s har ašäl-i-däx, kud-äçyrän ölkəttabän wi iktäb ännäbi Mosa-däx, ad-tän-asən, wär hasän-len uçreh ed, ilsa härät tiçtawen n-ulhawän-näsän,

¹⁶ məšan äddinät wi ökfänen iman-näsän i-Emäli, äbas äşikänbəš härät i-idmawän-näsän.

¹⁷ Emäli, Unfas a ämoos, ere s-ihä Unfas n-Emäli ulh-net, a-di, ijraw iman-net.

¹⁸ Näkkäned daç-i s-ämära-däx, äbas äşikänbəš härät i-idmawän-nänäç, ere däx-näç ikyädän däç, ad-inhöy şund däç-tiset älxurmät n-Emäli məšan, ilkam ad-təmmuttəy talça-nänäç, äkf'-anäç Unfas n-Emäli älxurmät oçrən wa-däç nəçrəw ämära-däç.

4

Älxidmət wa ihä Buləs ənta d-imidiwän-net

¹ Şamad Mässinäç, oçän-anäç təhanint-ta-däç fäl ija ämaşal ogdähän d-a-wa-däç däç-ifassän-nänäç, adiş, kuyədät-anäç,

² nəbdəwet d-a-wa äsikärakädän tamaşalän äddinät däç-ufär, wär nətəttäret tikərras n-äwadəm, wär nəşəməşkil məçräd n-Mässinäç, tidət ças a nəçanna i-äddinät dat-Mässinäç i-ad-əlmədän a-s a-wa hasän-nəçanna iket-net tidət.

³ Kunta daç Älənçil, əllan-t äddinät s-iffar älmäçna-net, a-di wi ökfänen iman-näsän i-əlhəllak a-s ättunkäl,

⁴ änimäşrəyän i-Mässinäç, äsdäryäl-tän İblis-i äminakälän fäll-äddunya-ta-däç, igdäl-asän ahänay n-ännur wa məçqärän äsmäçmäçän ihän isälän n-Älənçil-i hanäç-isalmadän s-älxurmät n-ännur wa ihän Älməsex-i s-äwadəm wa t-inhäyän, inhäy Mässinäç.

⁵ Wädden isälän n-iman-nänäç a nəçatçäb i-ad-hanäç-in-əçrähän äddinät, isälän n-Älməsex a nəçatçäb. Däç-təssəba-net ənta-en-däç a fäl nəçä iman-nänäç eklan-nəwän,

⁶ ed Mässinäç-i innän ašäl äzzarän:

«Äməlet ännur i-ad-iba tihay»,

ənta-en-däç, a dd-ijän ännur wa s-ämära-däç, äsimäçmäç däç-ulhawän-nänäç i-ad-nudabät ahänay n-tihusay n-ännur wa äsimäçmäçän fäll-idəm n-Älməsex.

Älyizabät wa inhäy Buləs ənta d-imidiwän-net

⁷ Härät-wen-däç, ij'-anäç-t Mässinäç, məšan hakd a-wen-däç ufa ad-nəşşan nəçittəw a-s wär t-illa a nəmoos. Wär nəmoos ças ar şund härät ilan älçim itwarän däç-iləkkan s-räççiiş teräççe-näsän i-ad-itbət a-s tärna ta n-Mässinäç, wädden ta n-iman-nänäç a-s nəçdam i-Mässinäç.

⁸ Əzbäbän-anäç äddinät siha d-siha məšan, wär nəlfäççät, nəşşəwwäş məšan, wär nəçkes äççäma;

⁹ äştäçäynän-anäç äddinät məšan, wär çara-näç iqçel Mässinäç, indär-asän ad-hanäç-ärməsän; təççatän-anäç s-äkall məšan, indär-asän ad-hanäç-in-səmdun, issəbdäd-anäç-dd Mässinäç.

¹⁰ Hak ässaḡät-däḡ, ärhan-anäḡ äddinät tösomme n-tamättant šund ta ija ḡisa mäšan, intäš-anäḡ-dd Mässinäḡ däḡ-sän i-ad-əlmödän a-s tämudre-ta-däḡ ija ḡisa, a nəja näkkäneḡ-däḡ, šämad iddar, adiš, nəddar näkkäneḡ-däḡ däḡ-tössəba-net.

¹¹ Äšeräkken ḡas däḡ-äddunya-ta-däḡ tamättant-nänäḡ däḡ-tössəba n-alkum-nänäḡ i-ḡisa. Tidət, təbrar taḡəssa-nänäḡ, mäšan, nəddar; ämoos a-wen a ässiitbätän i-äddinät tämudre ta ija ḡisa däḡ-ulhawän-nänäḡ.

¹² Ärhan tamättant-nänäḡ däḡ-tössəba n-älxutbät wa nətäjj mäšan, hakd a-wen-däḡ, oräw-dd sär-wän a-wen-däḡ hanäḡ-täjjän, tämudre täynayät.

¹³ Nəṭṭaf ḡas ənniyät wa s-innä ännäbi iyyän däḡ-əlkəttab n-Mässinäḡ: «Omanäḡ s-Mässinäḡ, a-wen-däḡ a fäl ämmijrädäḡ däḡ-isälan-net.»

Ämära, immun šund-wen-däḡ a nəṭṭaf näkkäneḡ-däḡ, nomän ḡas, ad-nəḡattäb isälan-net.

¹⁴ Nəkkas äššäk a-s Mässinäḡ-i dd-issenkärän Emäli ḡisa jer-inəmmuttan, ilkam ad-hanäḡ-dd-isenkär jere-sän, isəbdəd-anäḡ näkkäneḡ hakd käwäneḡ edes-has dat-Mässinäḡ.

¹⁵ A-wa hanäḡ-išlän iket-net, käwäneḡ a he-infəw i-ad-imḡar ännuḡmät n-Mässinäḡ, iwwaḡän-dd fälla-wän äddinät äjjootnen, ijatän wi tiiməlneḡ Mässinäḡ.

A-wa t-illän ad-t-iba, išrəy-t-dd a-wa iḡlälän

¹⁶ A-wen-däḡ a fäl, kuyədät-anäḡ ed nəssan a-s kud-däḡ ašäl-i-däḡ, tikməmməḡ taḡəssa-nänäḡ s-a əndärrän a əndärrän, hak ašäl-däḡ iti-wwaḡ-dd, a äynayän fäll-tiynəya n-ulhawän-nänäḡ.

¹⁷ Härät n-aḡäna wa nəhannäy ämära-däḡ, tazidert, ilkam ad-t-iba, išrəy-t-dd älxurmät iḡlälän, äsinäfläyän wärän il' asuḡəl.

¹⁸ Wär-inäbbäjet a-wa inabbäjän tiṭṭawen n-dägg-adəm tiṭṭawen-nänäḡ, änn-ak, näknet akäyad däḡ-a-wa wärän ila mänhoy t-illän ḡur-Mässinäḡ fäl-a-s, a-wa ilän mänhoy, ad-t-iba, a-s ija a-wen, a-wa t-wärän ila t-illan ḡur-Mässinäḡ, iḡlal härkuk.

5

Isälan n-tämudre ta täynayät d-taḡəssa ta täynayät təlkämät

¹ Ämära, nəssan a-s taḡəssa-ta-däḡ nəha tolähät ḡas d-ehäket, ilkam ad-tumas šund ebäršäj mäšan, nəssan a-s ašäl wa n-sämdo n-härät iket-net, a-s e-äj, äsimäjnat-anäḡ-dd Mässinäḡ ehäket äynayän däḡ-išənnawän. Wen ənta, wädden a əknan ifassän n-ägg-adəm, Mässinäḡ iman-net a t-dd-iknän, iḡlal daḡ.

² Ämära, noḡar däḡ-ehäket-wa-däḡ, näsidärhän ad-nəddək ḡur-Mässinäḡ i-ad-nəjjəš ehäket wa n-tiḡəswen ti äynaynen,

³ s-afäl ašäl wa tänät-nəjjäš, ad-äbas nəzzaf.

⁴ A nəkka nəzzaḡ däḡ-taḡəssa-ta-däḡ, ad-noḡar, näsnin hak ašäl mäšan, wädden arurəd a nəja ad-hanäḡ-ikkəs Mässinäḡ däḡ-äddunya-ta-däḡ, änn-ak a närha, ad-fälla-näḡ-in-ikkəs taḡəssa ta tärəwät s-hak ašäl tamättat, äj ta täḡlälät däḡ-edägg-net.

⁵ Mässinäḡ iman-net a hanäḡ-dd-ixläkän i-a-wen, ənta-i hanäḡ-ikfän Unfas-net i-ad-umas tasəṭbat d-äḡḡimmana n-ärkäwäl wa hanäḡ-ijjäš.

⁶ Äsikayad-anäḡ a-wen-däḡ hak ašäl ed, nəssan a-s a nəkka nəha taḡəssa-ta-däḡ, ad-nuḡəj Emäli.

⁷ Tidət, wär t-nəhənnəy s-tittawen-nänəy ämära-däy məšan, näkkäneḍ immun wädden a-wa hannäynät tiṭṭawen-nänəy a fäl näsifälla.

⁸ Nəflas hullan a-wa s-nomän məšan, nässoof ad-nəhan, nəzjār taḡəssa-ta-däy, nəddək edes i-Emäli.

⁹ A-wen-däy a fäl jer-näqqima däy-taḡəssa-ta-däy wäla nəzjar-tät, nəjrəzet i-Emäli däy-härät iket-net,

¹⁰ fäl-a-s ähhuuššäl, ad-dd-nəbdəd iket däy-nänəy däy-edägg n-äššäreḡa wa n-Älmasex i-ad-hanəy-išrəḡ. Dihen, hak äwadəm d-a-wa has-jän imojjan-net. Wa ämešälän a-wa oləḡän, ad-ijrəw marušät-net, wa s-a-wa läbasän daḡ ḡas a ämešäl, ad-ijrəw älhäk-net.

Älmasex a-s əssəbab n-tanməzalt jer-Mässinəy d-dägg-adəm

¹¹ Šämad nəssan a-wa s-itawänna tuksəḍa n-Emäli, nətattär daḡ ad-təjješ tuksəḍa-ten-däy ulhawän n-dägg-adəm, Mässinəy, wär has-tədrej talḡa-nänəy, norda daḡ a-s käwäneḍ, däy-ulhawän-nəwän, təssanäm fälla-nəy.

¹² A-wa hawän-nəjanna, wär hawän-t-nəjənn fäl-a-s innin nərha ad-hanəy-in-təjrähäm, änn-ak, nəjann'-awän-t i-ad-tudabem abəraj däy-təssəba n-a-wa näxdäm jere-wän, dihen, ad-təlmədäm a-wa mad-tənnəm i-wi tabərajnen dat-äddinät, a-s ija a-wen, wär šəddijän ulhawän-näsän.

¹³ Kunta iyyäd ija ḡur-sän a-s iba n-tayətə a hanəy-irmasän, wär-iḡšed härät a-wen ed älxidmät n-Mässinəy wa nəha, a hasän-ijrəwän tənna n-a-wen; kunta daḡ, jän-anəy äddinät əssannen a-wa hän, a-wen, tänfonəwän.

¹⁴ Älxidmät wa nəha, təntaj-anəy sār-s tərha ta mäqqärät hanəy-ija Älmasex, a-wen-däy a fäl nədgaz. Nəkkas äššäk a-s ənta-i n-iyjän, ämmut däy-təssəba-nəwän, ämoos a-wen-däy a-s šund iket-däy-nänəy a ämmutnen däy-a-wa ämoosän amišəl n-erk härätän wi nətamašal ibda.

¹⁵ Däy-təssəba-nänəy iket-nänəy a fäl ämmut i-ad-umas a-s äddinät wi ikfa tämudre ta täynayät, ad-äbas ärjašän däy-derhan n-iman-näsän, änn-ak, ärjašän s-a-wa fälla-sän irha Älmasex-i ämmun, inkär-dd jer-inəmmuttan.

Tämudre ta täynayät ihäkk Älmasex

¹⁶ Ašäl-i, äbas nəḍkaḍ äwadəm wäl' iyyän s-a-wa s-t-əḍkäḍän dägg-adəm. Ibda a-wen-däy a-s nəḍkaḍ Älmasex iman-net məšan ämära, wädden tayətə-ten-däy a-s nəgla.

¹⁷ E-d osäy äwadəm d-Älmasex-däy, ämoos äwadəm äynayän, a-wa n-ibda ibbədäy; ənhəywät-t, härät iket-net, äynay-dd sār-s.

¹⁸ A-wen, Mässinəy-i hanəy-äzməzälän d-iman-net s-Älmasex a t-ijän, ijä daḡ ašäl-i-däy ämašal-wen-däy n-azəmməzəl n-dägg-adəm d-Mässinəy däy-ifassän-nänəy.

¹⁹ Däy-təssəba n-tärna n-Älmasex-en-däy, ad-ija Mässinəy tanməzalt dār-s d-äddinät iket-däy-näsän, ənta a ijjäšän ärkäwäl wa n-ad-äbas hasän-e-iṭṭaf udlem-näsän, ij'-anəy näkkäneḍ-däy inəmmejrədän äwwikkälnen tanməzalt-net.

Ämašal wa n-azəmməzəl n-dägg-adəm d-Mässinəy

²⁰ Ämära, näkkäneḍ a-s älzəmaḡät n-imawayän n-isälan n-älxer n-Älmasex šund ḡas a-s Mässinəy iman-net a itaməjradän i-dägg-adəm däy-təssəba-nänəy; a-wen-däy a fäl däy-wän nətattär, nəj'-awän isəm wa n-Älmasex, ehäff, məzälät d-Mässinəy iket-di.

21 ʒisa-i s-wār kála ofa abäkkäq, ij'-e Mässinäḡ dāḡ-edägg n-inäsbäkkäqän i-ad-nasāḡ dār-s, nəkrəš idəm dat-Mässinäḡ.

6

Ašäl-i-dāḡ a-s ašäl wa n-tätubt

¹ Näkkäneḡ, Mässinäḡ a dār-nännixdäm, a-wen-dāḡ a fäl käwän-näsimätär d-ad-wār hin-täsbätḡäläm ännuḡmät n-Mässinäḡ-wa käwän-ikfa

² ed Mässinäḡ iman-net innä:

«Ḥsleḡ i-tittar-nāwän,

ašäl wa əssəbdādāḡ i-ad-kāwän-āḡləsāḡ osä-dd ḡas, ogāzāḡ-kāwän.»

Ämāra, ašäl-en n-əḡḡellas issəbdād Mässinäḡ, osä-dd, ənta-da-dāḡ nəha ašäl-i-dāḡ.

³ Näkkäneḡ, wār t-illa a nətəjj i-ad-nəkkəs äwadəm dāḡ-tuksəḡa n-Mässinäḡ, i-ad-wār-ijärrəw äwadəm a läbasän innä dāḡ-ämašäl wa nəha.

⁴ A-wa nətəjj iket-net, nətəjj'-e i-ad-itbət dat-äddinät, a-s inaxdimän dd-äšimašäl Mässinäḡ a nämoos. A ijän-dāḡ, nəbdad fäll-iman-nänāḡ, wār t-illa aḡāna s-wädden nəhannāy-t jer-äḡizabät, wāla tissust, wāla tirəmmaḡ mäšan, nəḡbar dāḡ-a-wen-dāḡ iket-net.

⁵ Ḥjjäšnät-anāḡ tiwit, nəjjäš tikärmuten, oḡāyän-anāḡ äddinät, ehäd d-ašäl nälluyyāḡ ed nəḡḡal, dehiyyän fāw wār nəjärrəw s-eḡəs, nətəjj išilan wār t-illa a nəkša.

⁶ Mäšan, šäddiij tämudre-nänāḡ, tämudre n-äddinät əzzaynen Mässinäḡ. Hanāḡ-tazidert, noolaḡ, idhal-anāḡ Unfas Šäddijän, närha äddinät s-ulh imdan.

⁷ Nəxaḡḡab mäjräd n-Mässinäḡ s-tidət-net d-tärna-net, iqqud a-s härät dāḡ-imutaj wi s-nəkannäs d-išənja-nänāḡ, ənta a nəja täkoba hakd aḡärh.

⁸ Dāḡ-a-wa nəha, ässiimḡärän-anāḡ iyyäḡ, əlkähän-anāḡ iyyäḡ; təmmalän-anāḡ iyyäḡ, gaggärän-anāḡ iyyäḡ; jan-anāḡ iyyäḡ inəsbuha, a-s ija a-wen, wār t-illa a dd-izajjārän imawän-nänāḡ säl tidət;

⁹ jan-anāḡ iyyäḡ äddinät wären ätwässän, a-s ija a-wen, nəkna atwəzzi; ija ḡur-iyäḡ a-s nässiija-hin fāw mäšan, wār nämmut härwa, äḡtasän-anāḡ tamättant mäšan, nəddar härwa.

¹⁰ Jan-anāḡ iyyäḡ iməskay mäšan, härkuk näddiwät; jan-anāḡ iyyäḡ tiläqqiwen mäšan, nətirəw-dd ärrəzāḡ s-äddinät äjjootnen; jan-anāḡ iyyäḡ äddinät s-wār t-illa a lan uhən-dāḡ, wār t-illa a hin-noḡan.

Ulhawän olwanen

¹¹ Ayətma-ḡ wi n-käl-Kurēnta, wār t-ih' äššäk a-s nor'-awän imawän-nänāḡ i-tidət, nor'-awän daḡ ulhawän-nänāḡ, wār t-illa fāw a hawän-nəffar;

¹² änn-ak, ulhawän-wi-di-dāḡ-nāwän a hanāḡ-wären-olwa, ənnär wädden a-wen, olwan-awän wi-nänāḡ hullan hullan.

¹³ Šämäd ilyaḡän-in a tämoosäm, äyyät-ahi ad-hawän-äjäḡ mäjräd wa he-äj abba i-arätän-net: äjät-anāḡ a-wa hawän-nəja, arät-anāḡ ulhawän-nāwän s-əmmək wa s-hawän-nora wi-nänāḡ.

Ännur d-tihay ya, wār t-illa a osayän

¹⁴ Wār toseḡäm iman-nāwän d-äddinät wi wären oher härät d-Emäli. Ma ohar a-wa olāḡän d-a-wa läbasän, meḡ ma ohar ännur d-tihay?

¹⁵ Ma tämoos tassayt ta t-töllät jer-Älmasex d-Iblis meḡ jer-amumən d-änäzzalim?

¹⁶ Ma ohar ehän wa šaddijän n-Mässinäḡ d-äššanämän. Elmödät a-s näkkäneḡ a-s ehän n-ämudd wa šaddijän n-Mässinäḡ. Mässinäḡ-i iddärän innä:

«Ad-əzzäḡäḡ jere-sän,
ədhələḡ-tän e-s əkkän-däḡ,
umasäḡ-asän Mässinäḡ, umasän əntäneḡ tamətte-nin.»

¹⁷ A-wen-däḡ a fäl innä Emäli:

«Əzjārät-dd jer-inəzzulam,
əbdəwät iman-nāwän där-sän,
wār ɸesäm a ämmiɸäsän.
Afäl jäm a-wa fälla-wän ärheḡ,
ad-kāwän-dd-äjäḡ s-iman-in,
səbbələləḡ-kāwän,

¹⁸ umasäḡ-awän Abba,
tumasäm məddana-ḡ d-ešše-ḡ.
Näkk-i n-Emäli-i ilän tärna a innän a-wen.»

7

¹ Ənhəywät ḡas ayətma-ḡ wi əkneḡ tärha, šamad näkkäneḡ a-s ija Mässinäḡ ärkəwälän-win-däḡ, adiš, nəbdəwet d-asəmməɸəs n-tiḡəswen-nänäḡ d-ənniyätän-nänäḡ, nišdajet, tännähəɸet däḡ-näḡ tuksəɸa n-Mässinäḡ.

A-wa dd-orāwän tedāwit ta ija Buləs

² Ayətma, arät-anäḡ ulhawän-nāwän, äjät-anäḡ edägg. Wār t-illa ere näddiḡwät, wäl' ere nässok' äkall, wäl' ere näkkirräs i-ad-näks ehärenet.

³ A-wa hawän-janneḡ, wār teḡalät janneḡ-awän-t i-ad-kāwän-səɸləməḡ, ham ulhawän-nänäḡ, nəj'-awän tärha-ta-däḡ s-wār hanäḡ-e-ibdəw a säl tamättant.

⁴ Əjrawäḡ s-mäjräd däḡ-isälan-nāwän, ämoos-ahi daḡ abəraj ad-fälla-wän äbbäräjäḡ, əssənsän isälan wi fälla-wän əsleḡ ənniyät-in har jeḡ tedāwit-ta-däḡ hin-tästəwät wəla däḡ-tersəmmawen ti nənhäy.

⁵ A hin-nāwwäɸ teje ta n-Masidunya-däḡ har ašäl-i-däḡ, wār kəla nəja härät n-ässayät n-təsonfat. Iwwäḡwäḡ-anäḡ älḡizabät siha d-siha, əknäsän-anäḡ äddinät, närmäḡ fäll-iman-nänäḡ hakd-däḡ fäll-tiḡəswen-nänäḡ,

⁶ məšan issəsməɸ Mässinäḡ-i n-enəssesməɸ n-talḡiwen ulhawän-nänäḡ, ed nəha a-wen-däḡ, a-s hanäḡ-dd-osa Titus.

⁷ Äsdəwät-anäḡ ass-net, äsdəwen-anäḡ daḡ isälan-nāwän wi däḡ-näḡ ija. Illäḡät əmmək wa s-t-täsbäläläm, ija däḡ-näḡ isälan n-awnaḡ wa hanäḡ-jäm, illäḡät-anäḡ daḡ tisanant ta jäm däḡ isälan n-a-wa ijän; iglä har hanäḡ-innä a-s ašrut wa-nin a tärmäsäm däḡ-isälan-win-däḡ har äməra, näkk a fäll-təknasäm d-išənja-nin. Əsleḡ i-isälan-en-däḡ ḡas, ässakäyäḡ däḡ-tedāwit.

⁸ Əssanäḡ a-s ikm'-iwän a-wa s-kəla hawän-t-in-əktäbäḡ məšan, wār t-ämmujrəzäḡ, kud-däḡ ämmujrəzäḡ-t, hannäyäḡ a-s wār tähoja tisanant-nāwän.

⁹ Äməra, äddiweḡ däḡ-isälan-nāwän məšan, wädden tisanant ta kāwän-tärməsät a hi-täsidəwet, änn-ak, tätubt ta jäm s-Mässinäḡ sār-wän-dd-orāw məjräd wa hawän-in-jeḡ a hi-äsidəwen.

¹⁰ Tisnant ta s-Mässinäx a tät-dd-orāwän sär-näx, wär la imujraz ed tiirəw-dd sär-näx täbəddawt d-a-wa läbasän nətamaşal, näxləs, a-s ija a-wen, tisnant ta s-äddunya a sär-näx-tät-dd-orāwän, ten, usreyän-net, əlhəllak ɣas.

¹¹ Tidət, ikm'-iwän a-wa hawän-ənnex mäşan, ämoos a-wa sär-wän dd-orāw a ihan erhet n-Mässinäx. Ənhəywät käwāneḍ iman-nāwän əlxal wa ähusken tärmäsäm ämära, təşşäkäm iman-nāwän, täkrakädäm, tärmäxäm, täsdärhänäm ad-hi-taləsäm ahänay, tärdäm iket-nāwän dəx-armuḍ a-s äwadəm wa ämeşälän təluşe-ten-dəx jere-wän, inmənəhəyet d-imojjan-net; ənta-den-dəx a-wa issətbätän a-s ənta a iwar uḍlem, wädden käwāneḍ.

¹² Ärheex ad-təssanäm a-s täkarḍe ta iyyädät hawän-in-əktäbäx, wär tät-in-əkṭebäx dəx-təssəba n-äwadəm wa änmäşräyän wäla wa ittəḍlämän, änn-ak, əktäbäx-awän-tät-in dəx-təssəba n-əddəguzät wa jəm fälla-näx s-Mässinäx a-s əssəbab-net.

¹³ Ämära-dəx, issəsmäḍ a-wa jəm ulhawän-nänäx, tässewäḍ dəx tedäwit ta ija Titus fäll-ta-nänäx, ikkäs-anäx dəx-täqqän n-eyäf dəx-isälan-nāwän,

¹⁴ əbbäräjäx data-s dəx-isälan-nāwän, ənhäyäx a-s a-wa ähusken has-ənnex fälla-wän, wär t-ämmujräzäx ed wär-äbbuggät. Tidət d-tärha ɣas a käwän-nəssəkna, nosa dəx a-s a-wa nənna i-Titus dəx-isälan-nāwän, tidət.

¹⁵ Aşäl-i, e-d dd-iktä asəbbələl wa t-jäm a-s käwän-in-osa d-əjjəluuyät d-semyar wa jəm dəx-amişəl n-a-wa hawän-nəjana, ad-käwän-itiməl s-tärha.

¹⁶ Tedäwit-ten-dəx ija, a jex näkk-dəx, ed əssanäx a-s äddoobex ad-fälla-wän səffəlläx, əfləsäx-käwän dəx-härät iket-net.

8

Isälan n-tirjit i-imumənän wi n-teje ta n-Masidunya

¹ Ayətma-x, närha ad-hawän-näj isälan n-ännuxmät wa ikfa Mässinäx əlkänisäten ti hānen teje ta n-Masidunya.

² Wär t-illa əlyizabät s-wädden ənhäyän-t mäşan, wär-ifnez a-wen təmyäre n-tedäwit-näsän, läqqəwän mäşan wär-əsɣärän ifassän-näsän i-imumənän wi wāren əṭṭef härät.

³ Äjjəyhäx a-s jän a-wa äddooben, änn-ak, jän fäw a okäyän a-wa äddooben, ämoos a-wen a tän-dd-ifalän, wädden a-s tän-äşihäşşäl äwadəm.

⁴ Əntāneḍ iman-näsän a dd-ifäl ənniyät-wen-dəx, tiläqqad fäw a hanäx-jän fäll-tärha-i-dəx jän n-ad-ədhəlän iməşşeddəjan-wi hānen Yärussälam.

⁵ Tanəmmirt-näsän, jän a okäyän a-wa tän-norda. Emäli a əkfän iman-näsän, əkfän-anäx dəx iman-näsän dəx-erhet n-Mässinäx.

⁶ Isälan n-a-wen-dəx jəm a fäl näsmätär Titus i-ad-käwän-in-iqqəl, isəmdəw a-wa issənta jere-wän, awəy-dd tirjit ta s-täbokäm i-imumənän.

⁷ Tidət-dəx a-s wär t-illa a-s wädden əsnäfläy-käwän Mässinäx dəx-s, jer-immun wäla musnät wa n-tayətte wäla musnät n-mäjräd, wäla äddägažät dəx-iji n-isälan-net wäla tärha təmdat. A-wen-dəx a fäl isälan-wi-dəx n-tirjit i-imumənän, əjləyät dəx-sän hullan.

⁸ A-wa dār-käwän-äsimätäräx, wär-ärheex ad-hawän-umas tähaşşilt. Isälan ɣas n-armuḍ wa s-əkfänät əlkänisäten ti iyyäḍnen a dəx-wän tajjäx i-ad-təjləyäm käwāneḍ-dəx, sətbətäm tärha ta jəm i-ayətma-wän wi iyyäḍnen.

Älmital wa hanäx-dd-oyyä Älmasex

⁹ Tössanäm iman-nāwän təmyğare n-ännuymət wa kāwän-ikfä Emäli-nänäx Yisa Älmasex dəx-tössəba-nāwän, ənta-i n-amärrəzəx, əsläqqəw iman-net i-ad-tärzəxäm kāwəneḍ, dəx-əlläqqu-net.

¹⁰ Äddäbara-nin hawän da: səmdəwät-in a-wa ähusken tössəntäm; ənhaḍ, kāwəneḍ a äzzarnen s-ajəraw n-ənniyät-wa-dəx, kāwəneḍ dəx a äzzarnen s-iji-net.

¹¹ A-wen-dəx a fäl ärheç a-s a-wa dəx-tössəntäm äddəgazät, sämdät-t-in s-tädabit-nāwän.

¹² Ere ikfän härät i-Mässinəx s-ulh imdan, ikf'-e s-ənniyät n-a-wa ila wädden a wär-ila, ad-ijrəz əlxal-net i-Mässinəx, Mässinəx dəx, wär dəx-nəx-e ittär a wär nəla, wəla a wär nəddobät.

¹³ Wär hawän-jəneç, käykäyät-dd a-wa tətṭäfäm i-ad-səyyəwənam äddinät iyyäḍ, fəw, änn-ak, a tattärəx ad-tagdəhäm iket-dəx-nāwän dəx-a-wa ləm.

¹⁴ Tidət, əşäl-i, kāwəneḍ, əsnäfləy-kāwän Mässinəx, a-wen-dəx a fäl dəx-wän tattärəx ad-tədhələm ayətma-wän wi tärmas təməxatert ed äddobät a-s əşəkka, ad-təbrəjwəl talça, umas a-s win-dəx tədhələm əşäl-i-dəx, a he-isənnəfləy Mässinəx, a-s ija a-wen, kāwəneḍ, tärmas-kāwän təməxatert. Dihe, əntəneḍ a iwar ad-kāwän-ədhələn.

¹⁵ Ənta-den-dəx migdəhaw wa s-hawän-jəneç dəx-hanəx-əsəwəl əlkəttab n-Mässinəx a-s innä:

«Wa dd-əjlaben a əjjen, wär-əssakəy,
wa s-a-əndərrän dəx a dd-əjlabät,
wär fälla-s in-əba härät.»

Asikəl n-Titus d-imidiwän-net s-açrəm wa n-Kurənta

¹⁶ Nəmmoy i-Mässinəx ed issəjləy Titus dəx-isəlan-nāwän s-əmmək wa s-dəx-sən-əjlayəx nəkk iman-in.

¹⁷ Titus iman-net a irḍän s-ad-kāwän-in-əkk, nəttär dəx-s dəx ad-kāwän-in-əkk şik, ija dəx fäll-a-wen.

¹⁸ Dəx-isəlan n-asikəl wa sər-wän-in-ija, nəsidəw-t-in d-əñña-nəx iyyän dəx-äddin s-wär t-illa əlkənisät s-wädden tajəyha fäll-tihusay n-əlxidmət-wa t-işlän dəx-efes n-Ələnžil.

¹⁹ Wädden dəx-tössəba n-a-wen-dəx ças a fäl sər-wän-t-in-nəsidəw d-Titus, ənta-en-dəx dəx a əsnəfrännät əlkənisäten i-ad-isärtəy tirjiten iket-di d-tuzannät. Əlxidmət-wen-dəx, nəh'-e i-ad-itwəsəmyçar isəm n-Emäli, nəşətbət tərha n-tadhəlt ta s-nərha ad-tät-nəj i-ayətma-nəx.

²⁰ Dəx-isəlan n-tasəssiwit-ta-dəx, azrəf əjjeen a-wa, a-wen-dəx a fäl wär nərha ad-hanəx-işşək əwadəm dəx-isəlan n-əmmək wa s-t-nəṭṭäf hundəx har əşäl wa d-e-ijjəş ifassän n-məssaw-s

²¹ ed, nərha amişəl n-a-wa oləxän dat-Emäli hakd-dəx dagg-adəm.

²² Meddən-wi hin-nəşməşäl sər-wän, nəsidəw-tän-in dəx d-əñña-nəx iyyän nəkna azəjjəzz, nənhəy a-s əwadəm irhan tadhəlt n-äddinät wi iyyäḍnen, a-wen-dəx a fäl t-noyya, ikk'-iwän-in. Ijləy hullan dəx-derhan n-ad-kāwän-in-əkk, ikn'-iwän dəx tafləst, ijlay hullan dəx-derhan n-amişəl n-erhet n-Mässinəx.

²³ Əməra, taçəlift-nāwän Titus wa n-amidi-nin dər-oharəx əlxidmət, taçəlift-nāwän meddən wi iyyäḍnen dər-nänniixdəm dər-s äddewnen. Iket-nənəx kāwəneḍ-di-dəx a-s nəxdam. Meddən wi n-əssin dər-äddew Titus, əlkənisät a tän-in-təşiməşälät i-ad-əxdəmən jere-wän, səmyçarən isəm n-Älmasex.

²⁴ Säknät-tän tärha təmdat i-ad-umas a-wen tajuhe i-älkänisäten-ti tän-dd-äšmašälne, əlmədnät a-s wär-äbbuggät abəraj wa fälla-wän nətajj.

9

Tadhəlt n-imumənän wi n-Älyähudəyät

¹ Dəx-isälan n-tadhəlt ta təkät iməšseddəjän wi hənən teje ta n-Älyähudəyät, əjrähəx-in a-s wär-əmyətärəx ad-hawän-siwələx dəx-isälan-net,

² ed diha t-təlləm, təjlayəm hullan dəx-a-wen. Iwwäy-dd sār-i fəw a-wen ad-kəwän-amələx dat-imumənän wi əzzəxnen teje ta n-Masidunya; ənneç-asən a-s: imumənän-wi hənən teje ta n-Akaya, wa-dəx n-ənhađ jan əmmək i-ad-ədhəlän imumənän wi əzzəxnen Älyähudəyät. Hannäyäm əməra a-s əjjəluçyät-nəwän, orəw-dd derhan s-əddinät əjjootnen n-ad-ərəjän əntəneđ-dəx.

³ A-wen, wär hin-ikkəs a-s əməra, əšimašäləx-in sār-wän härät dəx-ayətma-nəx iyyəđ dəx-əddin i-ad-wär-itəbəggut a-wa fälla-wän ənneç. A-s kəwän-in-tisən, əjrəwnet-kəwän təknam dəx-asdu i-ad-titbat təmmal ta kəwän-jeç dəx-isälan n-azrəf-wa-dəx.

⁴ Äksuudəx a-s afäl kəwän-in-əkkeç, nəkk d-härät dəx-imumənän wi n-Masidunya, har kəwän-in-nosa wär təsdəwäm, ad-hi-umas a-wen təkraçit, umas-awän-tät kəwəneđ-dəx çarät təmmal ta kəwän-jeç hasən.

⁵ Təssəba n-ad-wär ija a-wen-dəx a fäl hi-dd-ijjəš ənniyät n-ad-əttärəx dəx-ayətma-win-dəx n-kəraç, ad-hi sār-wän-in-izarän, sədəwən tirçit ta s-çəm ärkəwäl-net i-ad-təmdəw talça-ten-dəx iket-di d-kəwän-in-tisəx. A-wen a madän-isətət a-s a-wa çəm, wədden əwadəm a kəwän-əšhəššälän sār-s, ənn-ak, əmoos a çəm d-iman-nəwän dəx-tedəwit.

Äfuss wa ihakkän, wär has-e-iba a ikfä

⁶ Əlmədät a-s əwadəm wa əddomen a əndərrän, wär-e aləy a əjjeen, məšan, wa əddomen a əjjen, ad-aləy a əjjeen.

⁷ Hak əwadəm, əkfet a-wa issəbdəd dəx-ulh-net, wär-itumaset a-wa ihakk a dəx-əçikänçär, wəla a t-əhhuuššälän ed Məssinəx, əwadəm ças wa ihakkän s-ulh əsriiwän a has-ijrazän.

⁸ Məssinəx a əddoben ad-kəwän-əkf a ojarän a-wa s-təmiçatäräm, isənnəfləy-kəwän i-ad-tudabem kəwəneđ-dəx ad-tədhəläm əddinät wi iyyəđnen, təjrəwäm imärkedän,

⁹ s-əmmək wa s-tän-innä əlkəttab n-Məssinəx a-s innä:

«Äfuss n-eməssərho wa izzäyän ihuk,
wär kəla has-əba a ikfa, imärkedän-net əçlälän.»

¹⁰ Məssinəx a ihakkän idommän i-anəsdamu, isajat fälla-s isudar, ənta day a he-isənnəçfəsän əjaraw-nəwän i-ad-tudabem amişəl n-imärkedän.

¹¹ Məssinəx a əddoben asəbbələl-nəwän dəx-a-wa itçäf əhusken i-ad-əmerän ifassän-nəwän i-əddinät. Dəx-a-wen-dəx a-s afäl hin-nəssawəđ azrəf-wa-dəx n-tadhəlt məssaw-s, ad-aməlän əddinät əjjootnen Məssinəx dəx-təssəba n-tadhəlt ta kəwän-dd-fälät.

¹² Içmad-t əššək a-s azrəf n-tadhəlt wa mad-təkçəm, ad-ikkəs iməšseddəjän əjjootnen dəx-timçutar-nəsən, arəw-dd a-wen-dəx dəç s-ad-aməlän əddinät əjjootnen Məssinəx.

¹³ Tihusay n-a-wen-däx jām a he-isətbətān tārəddawt ta jām s-Älənžil n-Älmasex d-amışəl wa täjjām i-erhet n-Mässināx. Afäl jām a-wen har t-ənhäyān äddināt, ad-aməlān Mässināx, umayān-as däx-təssəba n-tadhəlt ta jām i-imumənān d-äddināt wi iyyādnen ed wār hasān-täşxärām ifassān-nāwān.

¹⁴ Ēntāneḍ day āmāra, däx-təssəba n-təmyāre n-ännuymət wa kāwān-issəknā Mässināx, təddalān-awān Mässināx i-ad-kāwān-səlmədān s-tārha ta kāwān-jān.

¹⁵ Āmāra ayətma, naməlet Mässināx fäl tihusay n-isuf wi hanāx-ija wāren la milhaw.

10

Mäjrād wa ija Buləs i-ad-isəddəttət tənnəmuşəla-net

¹ Ayətma-x, näkk Buləs, ənnān däx-wān iyyād e-d t-əlleḡ xur-wān, ad-sərəsāx iman-in; e-d kāwān-ujəjāx, ad-əhhuləsāx. Āmāra, härāt iyyān a däx-wān ärheḡ däx-idəm n-tāzude d-milxaw-i ija Älmasex:

² wār hi-tāşhāşşälām ad-kāwān-in-äkkāx səlmədāx-kāwān a-s hālāx. Äddināt wi ordanen a-s a-wa hanāx-işlān, a dd-nəkkas ḡas däx-iḡāfawān-nānāx, əlmədnet a-s afäl-tān-in-oseḡ, wār tān-e-äyyāx s-ākall, ad-tān-səlmədāx a-wa āmoosāx.

³ Tidət a-s dāgg-adəm ḡas a nāmoos māşan, itbat a-s anmānx wa nəha, wār t-nəha s-imutaj dd-təkna tayətte n-ägg-adəm,

⁴ ed tāzoli ta s-nəknās, wādden a dd-ikna ägg-adəm, Mässināx a hanāx-tāt-dd-iknān i-ad-nəknəs s-äşşahāt wa-net, nudabāt teräzze n-iḡallan wi äşşohātnen idāy Iblis,

⁵ nəсібəggut əttəkəbru wa sabdadān dāgg-adəm i-ad-əgdəlān i-äddināt muzəyāt n-Mässināx. Nətattār ad-ännähäḍ Mässināx däx-ənniyāt n-hak ägg-adəm i-ad-āmaşäl erhet n-Älmasex.

⁶ Afäl itbāt a-s kāwāneḍ, təmdam-dd däx-amışəl n-a-wen-däx, ijmaḍ-t äşşāk a-s äddināt wi wāren təmişil a-wen, ad-ənmənhəyān d-iman-nāsān.

⁷ Səjrähāt däx-tidət, wār təḍkelām āwadəm wāl' iyyān s-a-wa fälla-s hannāyām, kunta ih'-iwān ere iflasān s-təla ta t-ija Älmasex, adiş, ilmədət xur-iman-net a-s, əmmək wa s-t-ila Älmasex, a-s hanāx-ila näkkāneḍ-däx

⁸ ed älxiqmāt wa hanāx-ikfā Emāli, ikf'-anāx-t i-ad-nəşşuhət, wādden i-ad-nəhəl ider, a-wen-däx a fäl a-wa fäl tabārajāx, wār hi-āmoos tākrakidət ed Emāli, a dd-ifal.

⁹ Wār teḡalāt a-s däx-tikardiwen-in, wār tətärāx ḡas ar asārmaḡ-nāwān;

¹⁰ əsleḡ a-s ənnān iyyād däx-wān: wa Buləs, tikardiwen-net ḡas a däx-ihāl, isimāqqəw fälla-nāx māşan, e-d t-illa jere-nāx, ad-t-izjār aḍu, iqqəl ākall.

¹¹ Äddināt wi jānnānen a-wen, əlmədnet a-s afäl tān-in-nosa, ad-tān-nəsəlməd a-s a-wa-däx nəkattāb däx-tikardiwen-nānāx e-d t-nəlla xur-wān, ənta day a nətamaşal jere-wān.

¹² Äddināt-en jānen iman-nāsān härāt, ijmaḍ-t äşşāk a-s wār nətəttār ad-nəḍkəl wāla ad-nəsənnəfäqq iman-nānāx dār-sān, āmoosān äddināt wār-işla ar utār n-asəgdah n-iman-nāsān jer-iman-nāsān, irmas-tān iba n-tayətte.

¹³ Näkkāneḍ, wār nəḍəkkəl iman-nānāx s-əmmək-wen-däx, wār nətəjj a sāl a-wa s-hanāx-ikfa Mässināx turhajāt n-iji-net, ənta day a hanāx-ijrāwān s-ad-kāwān-in-näkk.

¹⁴ Aşäl day wa d-käwän-in-nosa näwway-awän Älənžil, wär nøja jere-wän a-s wädden Mässinäx a hanäx-ikfän turhajät-net. Tössanäm day a-s näkkäneḍ a sār-wän-in-äzzarän i-ad-hawän-näj isälan n-Älənžil n-Älmasex.

¹⁵ Ämära, wär nətəbärij s-a wärän ämmukkän ija äwadəm iyyän data-näx. Däx-a-wa nəkkäs näxdam jere-wän, wär näxdem fäll-a ässinta ägg-adəm. Darät-a-wen däx, nøjar ätṭäma n-a-s afäl mäqqār immun-näwän s-Mässinäx, ad-timḡar däx təkost ta nəla jere-wän däx-a-s nogaz təkost ta hanäx-issäyläf Mässinäx.

¹⁶ Dihen, ad-nudabät axätab n-Älənžil däx-tajiwen ti hawän-in-əllanen, wär närha fäw, ad-nəḍəs edägg iḍas äwadəm data-näx i-ad-wär nəbbäräj fäll-a ija äwadəm iyyän data-näx.

¹⁷ Ere itabärajän däx, äbbäräjjet däx-a-wa ija Emäli.

¹⁸ Təssəba n-a-wen-däx a fäl innä əlkəttab n-Mässinäx:
«Abäraj wa ijä äwadəm i-iman-net,
uf'-e wa has-ijä Mässinäx.»

11

Tumast n-änammaşul wa n-tidət

¹ Ayətma, əşbärät ämära härät n-iba n-tayətte hi-dd-ifalän, əyya, əşbärät fäll-i a ənḍarrän

² fäl-a-s, jey-awän tärha ta n-tismiten, tismiten däx s-Mässinäx a dd-falnät. Ija xur-i a-s Älmasex a dār-käwän-äsdobänäx i-ad-tumasäm şund tämutärt şaddijät wärät təzzey meddön s-wär t-illa fäw əlxib tät-iwarän, ärheey däx ad-täqqayməm däx-təşədje-ten-däx.

³ Mäşan, ässirmäx-ahi a-s, tassaḡt ta n-tidət jäm d-Älmasex, äbas däx-s tøjlayäm. Hannäyax a-s tärham, ad-təşləyäm i-tabarät s-əmmək wa s-has-təşləy Xəwwa-i təkkräs taşşält, täşnämäşräy-tät.

⁴ Əjrähäx-in a-s afäl käwän-in-osa ere hawän-ixatṭabän isälan n-Ÿisa wärän oher härät d-a-wa hawän-näxtäb, meḡ ere hawän-ijän isälan n-unfas wärän oher härät d-Unfas wa ihän ulhawän-näwän, meḡ ere hawän-ijän isälan n-Älənžil säl wi hawän-nəja, şik-däx a-s hasän-tirəm timəzzujen-näwän, təyyəm-t s-mäjräd.

⁵ Əyya, ija xur-wän a-s äddinät wi jäm inəmmuşal mäqqornen, ojärän-ahi tumast n-änammaşul. Tazidert! Wär t-illa a-s hi-øjärän.

⁶ Tidət, ämmukkän a-s ojärän-ahi ällifaḡ n-mäjräd mäşan, däx-isälan wi n-musnät, əssanäx a-wa heḡ, nəssəkn'-awän-t s-älxalän äjjootnen, nəsdättät-t data-wän s-a-wa nənänä d-a-wa nøjä.

⁷ Tössanäm a-s aşäl wa äzzarän d-hawän-näxtäb isälan n-Älənžil n-Mässinäx, bännan a-s hawän-t-näxtäb meḡ ämmukkän a-s a-wa jey a-s hawän-äsräsäx iman-in i-ad-timḡaräm käwāneḍ, i läbasän; ak ajän əlxeḡ wa hawän-jey, iqqäl emänkäs?

⁸ Əgleḡ fäw har əlkänisäten tiyyäd a hi-ədhälneḡ däx-əlxidmət wa jey jere-wän, əfnäzäx-tänät i-ad-käwän-siwəḍäx käwāneḍ.

⁹ A-wa əkkäsäx əlleḡ jere-wän, tidət-däx a-s ämḡatäräx mäşan, wär t-illa ere s-käla has-əmoosäx əzuk, wär-ärheey däx ad-t-umasäx i-äwadəm wäl' iyyän aşäl-i-däx wäla aşəkka. Tössanäm a-s ayətma däx-äddin dd-falnen Masidunya a hi-ədhälneḡ äzzäman-wen-däx.

¹⁰ Ašäl-i, ənta-den-däx abäraj-in, wär t-illa ere s-əkšey ehäre-net. A-wen äddoobey ad-däx-s äbbäräjäx däx-äkall wa n-Akaya iket-däx-net. A-wen, täsiidättät-t tidət ta n-Älmasex hi-hät.

¹¹ Ma hi-äswännän a-wen-däx? Ak iba n-tärha-näwän? Äbo, Mässinäx a issanän a-s ärheey-käwän.

¹² A-wa jey jere-wän, ad-t-aləsäx iji. Dihen, äddinät wi tabärajnen a-s wär dār-sän nəzley, ad-ənmənhəyän d-iman-näsän ed, wär mad-əjrəwän fälla-näx əlxib s-hanäx-äkkulmen.

¹³ Äddinät-win-däx, inəmmušal n-bahu a ämoosän, erk inaxdimän ässiijbärnen tumast n-inəmmušal n-Älmasex s-bahu xas.

¹⁴ A-wen, wär-iqgen eḡäf ed Iblis iman-net dehiyyän itajj-dd iman-net dat-äddinät älmät änjəlos n-ännur äwwayän tidət,

¹⁵ wär-iqgen adiš eḡäf kunta inaxdimän-net, sajbarän tumast n-inaxdimän oḡadnen dat-Mässinäx; ajilal-näsän, imojjan-näsän.

A-wa ibdän Buləs d-inəmmušal wi n-bahu

¹⁶ Ənney-awän härwa a-s wär-itəxalet äwadəm, irmas-ahi iba n-tayətə məšan, kud-däx ija xur-wän a-s a-wen-däx a ijan, säjdät-ahi, təyyəm-ahi ad-äbbäräjäx a n-bännan.

¹⁷ Mäjräd wa hawän-in-tajjəx ämära-däx, wädden mäjräd ija Emäli dəx-emm-in, änn-ak, mäjräd šund wa he-äj ere irmas iba n-tayətə a hawän-in-tajjəx.

¹⁸ Əllan-t äddinät äjjootnen tabärajnen s-a-wär ih' älfäyda, äyyät-ahi näkk-däx, ad-äbbäräjäx a n-bännan.

¹⁹ Təjraw-ahi täkunt-näwän! Käwäned-i ənnänen lam tayətə, šik-däx a-s riḡdum s-a-wa hawän-jannen äddinät wi irmäs iba n-tayətə käwän-in-tisənen.

²⁰ Tännufläyäm dəx-əkkəlu-hasän, əntäned-i käwän-tihəxnen, saməḡrayän-käwän, əlkähän-käwän, sattəxän-awän dat-äddinät.

Tinfusen ti ärmäsnen Buləs

²¹ Jan-awän tanhaḡt, ed näkkäned, nəkkas-awän äššahät dəx-iman-nänəx, wär nəhel ad-hawän-nəj šund a-wen. Mäjräd n-ere irmas iba n-tayətə a hawän-tajjəx i-ad-käwän-səlmədəx a-s äddoobey näkk-däx əhhuləs-wen-däx.

²² Kunta äddinät wi käwän-takərrasnen ənnän əntäned Yəbranitän a ämoosän, ämoosəx-t näkk-däx, kunta dəgg-Işrayil a ämoosän, ämoosəx-t näkk-däx, kunta ihəyawän n-Ibrahim a ämoosän, ämoosəx-t näkk-däx.

²³ Kunta inəmmušal n-Älmasex a ämoosän, ämoosəx-t, ojärx-tän dəx tumast-net. Äyyät-ahi ämära ed edəwänne n-ere s-äba eḡäf-net a hawän-tajjəx. Äddinät wi tordäm härät, kunta tiluyyaḡ, ojärx-asän-tänät; kunta tikärmuten, ojärx-tän ahənay-nəsnät; wär tän-iha-i inhayän tiwit ti ənhəyəx, wär tän-iha-i ijjašan miši wa əjjašəx. Dəx-idəgḡan äjjootnen, əjjašəx miši-wa-däx fäl dəroḡ hin-ässijjəx.

²⁴ Səmmos ihändəgḡan, salalän-ahi käl-Älyəhud tiwit ti n-kəraḡät timərwen d-təzḡa wär dd-išərrəy äwadəm.

²⁵ Har kəraḡ ihändəgḡan, hakkän-ahi käl-Roma tiwit s-ebärtək wa səmmän, kəla hi-əkfän äddinät səmməjori n-tihun, har kəraḡ ihändəgḡan xəššəd turəft n-aman ta heḡ fäll-əjərew wa səmmän, okəy fäll-i ehəḡ d-ašäl heḡ ammas n-aman.

²⁶ Ässekaləx fäll-idarän s-iḡərman äjjootnen, dehiyyän a əndərrän xas a hin-əqqimän, əkšən-ahi aman, dehiyyän inaxtafän a fäll-i oḡänen,

dehiyyän äddinät-wi-däx n-tumast-in, dehiyyän inəzzulam† a fäll-i ođänen i-ad-hi-änxən. Wär t-illa aɣāna wär-ənheyäx däx-iɣärman wāla däx-tinariwen wāla fäll-ijərwan, hək-däx miši wa sār-i dd-tirəwän wi jannänen s-bahu a-s älmässexitän a ämoosän.

²⁷ Wär t-illa aləddeš wär-ənheyäx, ənhäyäx aɣāna, jän-ahi ihādan n-iba n-eđəs, jeɣ išilan n-laz d-fad, itikəy fäll-i äzzāman d-wär jərrəwäx a əkšəx, əskäbäybäy-ahi esämed, ɣäluläx.

²⁸ Ill'-e a äjjeen s-äddobey tənna-net mäšan, ufa ad-susəməx kud-däx a-wen-däx iket-net, irn'-e sār-i a-wa s-hak ašäl-däx, əjrawän-ahi inəzjam n-älkänisäten.

²⁹ Amumən irmäs härät-däx, ad-äjäx adəgəz-wa-däx s-šund näkk a irmäs a-wa t-irmäsän, afäl əsleɣ-i däx-sän ođan däx-tanməšrayt, ad-ärɣ ulh-in däx-təssəba-net.

³⁰ Näkk, kunta ill'-e a tajjäx abəraj, wär t-illa a ämoos kunta wädden iba n-əššahät-in.

³¹ Mässinäx-i n-Abba n-Emäli ɣisa-i änihäjjän d-təmmal härkuk a äjjəyhän a-s tidət a janney.

³² Ašäl iyyän d-heɣ aɣrəm wa n-Dämašaq, issəbdäd gəfär, wa äsmänakäl Aritas-i n-ämänokal n-äkall, ejhän n-älgomitän däx-imawän n-aɣrəm iket-net i-ad-hi-äxtəfän, səttärməsän-ahi

³³ mäšan, jän-ahi imumənän wi t-əllänen dihen däx-deke hərəwän, ästärarän-ahi s-fənetär ihan aɣälla wa fäll-idäy aɣrəm, əmmək-wen-däx a däx-əzjäx aɣrəm, äɣləsəx däx-äššar n-gəfär.

12

Tänäfalilt d-asrəs n-iman wa ija Buləs i-iman-net

¹ Ayətma, əttəkəbru, ma t-ihan? Wär t-illa! Äyyät-ahi ämära ad-hawän-äjäx härät däx-isälan n-a-wa ənhäyäx d-a-wa hi-dd-äsnäfaläl Emäli.

² Əzzayäx ähaləs n-älmässexi immədkälän s-ašəna wa s-kärad a ilan mərəw iwətyan d-əkkoz. Ähaləs-en, wär-əssenäx kunta ənta iman-net a osän edəgg-en, meɣ anfiləl a has-dd-ija a-wa inhäy, a-wen, Mässinäx a t-issanän,

³ əssanäx ɣas a-s ähaləs-en-däx, osa ašəna wa s-kärad, iqqäl-dd. Kunta ənta iman-net a t-osän, meɣ Mässinäx a has-dd-äsnäfalälän a-wa inhäy, wär t-əssenäx, Mässinäx a t-issanän.

⁴ Ähaləs-en-däx, älwäqq wa d-osa älzännät, ašəna wa s-kärad, islä i-isälan-i-däx ähuuskätnen s-wär t-illa ägg-adəm ijrawän s-asuxəl-näsän fäl tihusay-i-däx jän.

⁵ Ähaləs šund wa-däx, äddoobey ad-əbbäräjäx däx-isälan-net mäšan, a-s təkäsäm a-wen-däx, wär t-illa a däx-e-əbbäräjäx kunta wädden iba n-əššahät-in.

⁶ A-wen-däx a fäl kud-ärheɣ ad-ədkäläx iman-in däx, wär hi-ija a-wen ere wärän ijreh härät, wär-ämoosäx enəbbeddəl ed a-wa he-ännäx iket-net, a-s mad-t-tasəm, tidət. Wär təbərijäx ed wär-ärheɣ ad-hi-idkəd əwadəm ar s-a-wa jänney d-a-wa täjjäx. A-wa säl a-wen, mälayäxna.

A-wa əswär Mässinäx Buləs

† 11:26 11:26 — ɣur-käl-Älyähud, ere wärän ämoos ägg-Älyähud s-aläšäl meɣ ere wärän ilkem i-äddin-näsän, iket-net, änäzzalim a ämoos. A-wen-däx a fäl tiwsaten ti iyyädnen iket-näsnät, ti n-inəzzulam. — Ašäl-i-däx, änäzzalim, äkafär (ere wärän issen s-Mässinäx).

⁷ Tinfilal-ti-däy ähuuskätnen s-hi-ikfa Emäli turhajät n-ahänay-näsnät, äddoobätntät ad-hi-sössəffənnəynät mäšan, i-ad-wär tējjäy a-wen, ija däy i Mässinäy älyib hi-olähän d-asənnan ihan adär n-äwadəm, älyib olähän d-tewete n-änjälös n-Iblis i-ad-wär səffənnəyäy.

⁸ Har kärađ ihändäggan, təddaläy Emäli i-ad-hi-ibđəw d-älyib-wen-däy,

⁹ mäšan, inn'-ahi: «Buləs, igdäh-ak ännuymät-in ed xur-i, dədi-däy d-lämmed äwadəm, ad-t-ikann äşşahät-in uđəf.» A-wen-däy a fäl ässoofäy, əbbäräjäy däy-iba n-äşşahät-in i-ad-fäll-i ikən Älmasex asəns n-tärna-net.

¹⁰ A-wen-däy a fäl iba n-äşşahät hi-irmäsän-däy, jer-wa n-tirəbbađ, wäla tissusen wäla wa n-älyizabät wäla tirəmmaş, a hi-irmäsän-däy däy-təssəba n-Älmasex, äsidäwät-ahi ed dihen-däy iman-net d-əbraräş, ad-tumasäy emäşşehi.

A-wa ämoosän abäraj i-Buləs

¹¹ Ənhəywät! Käwänəđ a hi-äşhäşşälnen d-ad-hawän-in-äjäy mäjräd wa itäj ere irmas iba n-tayətə; käwänəđ a-s äniihäjja a-s timələm-ahi dat-äddinät wi s-tordam a-s ojarän-ahi tumast n-inəmmušal. Əssanäy a-s wär t-illa a ämoosäy mäšan, wär t-illa a-s hi-ufän äddinät wi jəm inəmmušal täskakäm däy-işənnawän.

¹² Ämära, ijitän wi satbatnen tumast n-änämmaşul, jän jere-wän: əşşumorät, ijitän n-Mässinäy, härätän ässuksäđnen, tikunen, ämeşäläy a-wen-däy iket-net jere-wän.

¹³ Läxätät-ahi şas a jeş däy-älkänisäten ti iyyäđnen wär jeş xur-wän säl wa n-a-s unjäyäy ad-hawän-umasäy äzuk; kunta a-wen, ikm'-iwän, adiş, änsät-ahi-dd.

¹⁴ Ämära, näkk da äbokän ad-sär-wän-in-äjäy asikəl-in wa s-kärađ, mäšan əlmədät a-s wär käwän-in-əkkeş i-ad-hi-təkfəm härät änn-ak, əkkeş-käwän-in ed tojaräm sär-i ehäre, a ämoos-däy. Ajän wädden abbatän a-s äniihäjja ad-əttəfän tämudre i-aratän-näsän a əkkän mädrəyän wädden aratän a iwar a-wen.

¹⁵ S-iman wi-nin näkk, wär t-illa a leş hawän-ənkaşäy ed diha t-əlleş, äsidäwäş i-ad-käwän-äkfäş wäla-däy tämudre-nin. Ak, ajän käwänəđ tärha ta mäqqärät hawän-jeş, wär sär-wän dd-torew ar iba n-tärha-nin?

¹⁶ Təssanäm a-s wär käwän-ihä fäw ere äddoben ad-äjjäy a-s käla has-ämoosäy äzuk. Adiş, ma äsihälän iyyäđ jannen: wa Buləs, imsäd, amsud dəş şas a-s ikša ehäre-nänäş.

¹⁷ Läxätät-ahi şas däy-meddəw wi sär-wän-in-äşməşäläy i käwän-ikkan s-täkkärzəzzäl i-ad-äks ehäre-näwän?

¹⁸ Näkk a äsmätärän Titus d-ad-käwän-in-akk ənta d-əŋŋa-ş däy-äddin wa s-hawän-jeş isälan-net. Ak, ajän a-s käwän-in-osän, əksän ehäre-näwän? Näkk hakd Titus, iyyän n-ənniyät a nəttäf jere-wän, iyyän n-emm a nohär däş-a-wa nämeşäl iket-net.

Inəzjam n-Buləs

¹⁹ Täkarde-ta-däş, wär hawän-tät-in-nəkəb fäl-a-s innin nərha ad-näkk iman-nänäş tidət. A-wa nənnä iket-net, Mässinäy a dat-tän-nənnä däş-təssəba n-tassaşta ta nəja d-Älmasex. Ayətma-ş, ittus n-mäjräd wa hawän-in-jeş, i n-ad-təşşuhum däş-immun-näwän.

²⁰ Assiirmäş-ahi a-s afäl käwän-in-oseş, ad-käwän-in-asäş wär hem älxal wa dər-käwän-əzzäyäş, əkrukəđäş; a-wen, älmäşna-net a-s ässiirmäş-ahi ad-käwän-in-asäş, əllan-t ikənnasän d-tismiten d-akfor d-tärha n-anmijar d-mawmaw d-əhhuləs d-asənnäxəmbəl n-äddinät jere-wän.

²¹ Ässiirmäx-ahi a-s afäl käwän-in-osex, ad-hi-isärəs Mässinäx, isäkn'-ahi a-s han-käwän äddinät äjjootnen s-har ämära-däx, wär-ämmujräžän a-wa jän, utabän; ad-hi-umas a-s šund iba a əttafäx däx-tössəba n-iyyäd däx-wän s-har ämära-däx, əkfan iman-näsän iba n-təšədje d-erk älxal, d-asəmmədəs n-iman-näsän.

13

A-wa ikittəw Buləs afäl ikka Kurēnta

¹ Näkk-da-hi äbokän ämära ad-sär-wän-in-äjäx asikəl-in wa s-kärad. Ere itəggar udlem-däx, ad-tiwär s-a-wa ənnänät sänatät mex käradät tjuhawen ed a-wen-däx a ixtäs əlkəttab n-Mässinäx.

² A-s sär-wän-in-jex asikəl-in wa s-əssin, əlläxex-awän a-s äddinät wi ämešälnen abäkkad hakd wi iyyädnen, əlmədnet a-s kud-däx ujəjäx-tän ämära-däx, afäl hin-osex, wär hasän-e-səlmədəx iman-in

³ ed, wädden tənnäm tärham ad-səbbuyənäm kunta Älmasex a-s ämoosäx enəmmejrəd-net mex. Sollanät, išwar təkkašäm äššäk däx-a-wen. A-wa əkkäsäx äxdamäx jere-wän, ijmaḍ-t äššäk a-s wädden Älmasex ibrarän a tənhyäm, səjrähät xas däx-əššahät wa s-ihä ulhawän-näwän i-ad-təkkəsäm äššäk a-s tidət-däx a-s əššohät.

⁴ Tidət a-s ibrar ašäl wa d-ätwəšlāb fäll-tajəttewt məšan, təssənkär-t-dd tärna n-Mässinäx jer-inəmmuttan. Näkkäneḍ-i dār-s osäxnen, nəbrar məšan, nohär dār-s təmudre ta təšsohet ija s-tärna n-Mässinäx ta dd-e-tənfiləlat jere-wän.

⁵ Zəjjəzzät xas iman-näwän: ak ma dār-ogdäh immun-näwän? Äqqələt-in iman-näwän, zəjjəzzəm-tän. Ak ajän wär hənneyäm a-s YisaÄlmasex, izzax däx-ulhawän-näwän. Wär-äyeläx han-käwän äddinät wären äddin,

⁶ ija xur-i näkk a-s təssanäm a-s inəmmušal n-tidət a nämoos, tənhyäm-t a-wen,

⁷ nəttar däx-Mässinäx ad-təbdəwäm d-e d t-illäm a läbasän. Issan Mässinäx a-s wär närha fəw, ad-käwän-nəšəhhəššəl s-tərəḍḍawt n-a-wa nämoos, wär närha xas ar ad-käwän-išləw a-wa oläxän, kud-däx wär hanäx-təkfem tidət.

⁸ A-wa ämoosän tidət, wär t-dd-nəkka d-härät, wär näddobät xas ar tənna-net.

⁹ Äsidawät-anäx abror wa nəja, igdäh xas a-s käwäneḍ, təšsohem, tittar-nänäx däx-Mässinäx, ad-tumasäm meddən əmdanen, šəddijnen.

¹⁰ Ğnta-den-däx äddälil wa fäl hawän-in-əssəktäbäx təkarḍe-ta-däx ašäl-i-däx; derhan-in a-s, afäl käwän-in-osex, uday ad-käwän-säknäx ezawe wa äddobex ed, tədabit ta hi-ikfa Emäli, ti n-ad-käwän-səbdədəx, təšsuhum, wädden ti n-ad-käwän-siḍəwäx.

Isəmməterän d-tihulawen

¹¹ Darät-a-wen day, ayətma-x, dəwätät, umasät meddən əmdanen, išdajät, nəmsəkkuyədät jer-iman-näwän, əttafät iyyän n-ənniyät, nəmhirəjät däx-älxer i-ad-käwän-idhəl Mässinäx-i dd-ijän tärha d-älxer.

¹² Nəməjjät jer-iman-näwän tärha təmdat. Ähuulän-käwän-in iməšseddəjän wi t-əllänen diha-däx.

¹³ Issənsä fälla-wän Emäli YisaÄlmasex ännuxmət, ikf'-iwän Abba tärha-net, osäx-käwän Unfas Šəddijän iket-däx-näwän. Amin!

Täkarde ta iktäb Buləs i-käl-Gälasya

Äšqješ

¹ A-wa näkk Buləs wa s-tumast-net i-änammašul wär dd-təfel tärha n-ägg-adəm, wär has-dd-issəbäb daḡ ägg-adəm wäl' iyyän, Mässinäḡ-i n-Abba dd-issənkārān ḲisaÄlmaseḡ jer-inəmmuttan d-Ḳisa Älmaseḡ iman-net a hi-äsnäfränän i-ämašal-wen-däḡ.

² Ähuuläḡ-käwän-in, näkk d-ayətma-ḡ wi ḡur-i-t-əllänen dār-oharäḡ immun s-Emäli Ḳisa Älmaseḡ a hawän-in-əktabnen käwäneḡ-i hānen älkānisäten ti n-Gälasya.

³ Ettaräḡ s-Mässinäḡ-i n-Abba-nänäḡ d-Emäli-nänäḡ Ḳisa Älmaseḡ a käwän-ikfän ännuḡmät d-älxer.

⁴ Ḳisa Älmaseḡ, iman-net a ikfa i-ad-nəjrəw tenäšše n-ibäkkadän-nänäḡ, ištäf-anäḡ dāḡ-a-wa läbasän fäll-təglä äddunya, äzzehäz-anäḡ-dd d-iman-net, ənta-den-däḡ a-wa ihan erhet n-Abba-nänäḡ Mässinäḡ-i

⁵ änihäjjän härkuk d-təmmal. Amin!

Täqqän n-eḡäf n-Buləs dāḡ-isälan n-käl-Gälasya

⁶ Käwäneḡ ya təjraw-ahi täkunt n-armuḡ wa dār-täqqäläm ḡarät wa käwän-dd-iḡrān s-ännuḡmät-net i-ad-təlkəmäm i-Älənžil iyyän säl wa-net.

⁷ Äyyät-ahi ad-käwän-səlmədäḡ a-s wär t-illa ar iyyän n-Älənžil, a t-ämoosän wa n-Älmaseḡ. He käwäneḡ, wär toyem erk äddinät wi tattärnen tikārras-näwän, samäskalän-awän Älənžil wa n-iyyän iha əlḡəllas.

⁸ Ənney-awän: ere käwän-dd-osän, kud-irha umas iyyän dāḡ-näḡ wäla änjälos dd-ifalän išənnawän, ad-hawän-ixatṭäb Älənžil säl wa hawän-näxṭäb, inzäy-t Mässinäḡ.

⁹ A-wen, äru d-hawän-tän-nənnä, nəjann'-awän-t daḡ ämära, ere hawän-ixṭäbän Älənžil säl wa n-iyyän hawän-näxṭäb, täqbäläm, inzäy-t Mässinäḡ.

¹⁰ Ämära, ajän dägg-adəm a-s tattäräḡ ad-əkrəšäḡ idəm data-sän meḡ Mässinäḡ? Fäw! Meḡ tordam a-s tattäräḡ ad-zəjrəzäḡ iman-in i-dägg-adəm? Fäw! Ənnär tattäräḡ ad-zəjrəzäḡ iman-in i-dägg-adəm, wär tumasäḡ akli ixdamän i-Älmaseḡ.

Əmmək wa s-ikfä Mässinäḡ tənnəmušəla Buləs

¹¹ Ayətma, əlmədät a-s Älənžil wa hawän-äxṭäbäḡ, wädden a dd-ikkas ägg-adəm dāḡ-eḡäf-net,

¹² wädden äwadəm a hi-t-issäqbälän, wäla äwadəm a hi-t-issäḡrān, ḲisaÄlmaseḡ iman-net a hi-t-dd-äsnäfalälän i-ad-t-əfhəməḡ.

¹³ Ḋarät-a-wen daḡ, han-käwän isälan n-a-wa s- kälä t-heḡ ibda a-s əlkamäḡ i-äddin wa n-käl- Älyähud. Äqquzzäbeḡ älkānisät n-Mässinäḡ s-a-wa äddobeḡ iket-net, wär t-illa a äsidärhänäḡ ar ad- tät-in-aləmäḡ fäll-ärori n-äkall.

¹⁴ Äzzäman-en, ojäräḡ imigdähän-in dāḡ-tumast-in uḡəf n-äddin wa n-käl-Älyähud, ojäräḡ-tän s-a äjjeen dāḡ-tärha n-igguz n-älḡadatän wi hanäḡ-dd-oyyän imärawän-nänäḡ.

15 Mäšan, Mässinäx, dāx-tārha ta hi-ija, äsnäfrän-ahi härwa wär-əwey, osä-dd ašäl wa issəbdäd i-a-wen ɣas, iɣr'-ahi-dd s-iman-net dāx-ännuymät-net i-ad-umasäx akli-net,

16 äsmäqqäs-ahi d-Rure-s wa dd-ifälän isənnawän i-ad-äjäx isälan-net i-inəzzulam.† Ija a-wen ɣas, əgley, wär t-illa ere dāx-əttaräx äddäbara n-a-wa wäla a-wa.

17 Wär-əkkey wäla Yärussälam i-ad-dāx-s ənməzzəyäx d-meddən wi hi-äzzarnen s-tumast n-inəmmušal, əkkey äkall wa n-arabän, təzzar, äqqäläx-dd aɣrəm wa n-Dämasäq.

18 Šamad okayän kərəḍ iwətyan ḍarät-a-wen-dāx, ad-əkkey Yärussälam, änməzzayäx d-Bəṭrus-i ɣur-äzzubbeɣ har jeɣ märaw išilan d-səmmos.

19 A-wa säl ənta-en-dāx, wär-ənheyäx dāx-inəmmušal ar Yaqub wa n-əḥḥa-s n-Ḡisa.

20 Isälan-wi-dāx hawän-in-kattäbäx, Mässinäx a-s tajuhe-nin, tidət wädden bahu.

21 Fäläx dihen ɣas, əkkey tajiwen ti n-Surya d-Silisi.

22 A-s itäj a-wen-dāx, wär kälə ənhäyän älməssexitän wi əzzäɣnen teje ta n-Älyähudəyät idəm-in,

23 mäšällät ɣas a jän n-a-s ähaləs wa s-kälə itiɣəzzəbut älkänisät, ənta-da-dāx ämära s-ənta iman-net a ixatṭäbän immun wa s-kälə itattär ad-t-in-aləm fäll-ärori n-äkall.

24 Ad-timələn Mässinäx dāx-təssəba n-a-wa hi-ija.

2

Ämašal n-Buləs s-aɣrəm wa n-Yärussälam

1 Märaw iwətyan d-əkkoḗ ḍarät-a-wen-dāx ad-oläsäx ajozi s-Yärussälam äddeewäx äsihe-wa d-Bärnäbbas d-Titus.

2 Ajozi-nin daɣ s-Yärussälam, Mässinäx a hi-t-dd-äsnäfalälän, jeɣ-t. Əžžəmmäxäx dihen d-inušämän n-älkänisät ta t-təllät dihen, ässoɣäläx-asän isälan n-Älənžil wa xaṭṭäbäx i-inəzzulam,† əffəsäräx-asän s-iyän-iyän isälan n-a-wa jeɣ d-a-wa hi-išlän iket-net i-ad-wär-itumas älxidmät wa s-išwär jeɣ-t, a jeɣ bännan.

3 Jeɣ-där-sän anəfham-wa-dāx fäl wär-äshäššälän wäla dāx-Titus-i dār-i äddewän asəmmili n-iman-net ed əssanän a-s ägg-Älyunan† a ämoos.

4 Wär t-illa fäw ere dd-iḍkalän isälan n-amili wäla iba-net har jerenäx dd-älmamäsän käl-Älyähud iyyäḍ jannänen s-bahu a-s älməssexitän a ämoosän, ad-tattärän asəmmili-net mäšan, nəlmäd šik a-s a-wa inaramän hanäx-dd-əjjašnen i-ad-zəjjəzzən ajärəw n-iman wa hanäx-ikfa ḠisaÄlmaseɣ a-s nomän sār-s. Nəlmäd a-s wär tətṭärän ɣas ar ad-näj äššäk dāx-əlləllu wa nəjrəw, aləsän-anäx asəkkəlu i-alämär wa n-ännäbi Mosa.

5 Äddinät-en-dāx, wär hasän-noyya iman-nänäx s-äkall, nəssəkfär-asän iman-nänäx, nunjäy s-a-wa säɣren i-ad-täqqayməm käwänəḍ tətṭafäm Älənžil-i ämoosän tidət ta s-tärḍäm.

† **1:16 1:16** — ɣur-käl-Älyähud, ere wärän ämoos ägg-Älyähud s-aläsäl meɣ ere wärän ilkem i-äddin-näsän, iket-net, änəzzalim a ämoos. A-wen-dāx a fäl tiwsaten ti iyyäḍnen iket-näsnät, ti n-inəzzulam. — Ašäl-i-dāx, änəzzalim, äkafär (ere wärän issen s-Mässinäx). † **2:2 2:2** — ɣur-käl-Älyähud, ere wärän ämoos ägg-Älyähud s-aläsäl meɣ ere wärän ilkem i-äddin-näsän, iket-net, änəzzalim a ämoos. A-wen-dāx a fäl tiwsaten ti iyyäḍnen iket-näsnät, ti n-inəzzulam. — Ašäl-i-dāx, änəzzalim, äkafär (ere wärän issen s-Mässinäx). † **2:3 2:3** Gərik (Grec) dāx-Təfränsit.

⁶ Däy-tayimit-nänäy-ten-däy, ad-ənnän meddən wi n-inušämän n-imizärän, kud-däy, s-iman wi-nin, wär-äkkuläy d-a-wa ämoosän ed Mässinäy, wär-idökkəl äddinät s-əddəkud wa däy-tän-jän imidiwän-näsän, hakd a-wen-däy, wär t-illa äššäk jan däy-a-wa säxreç,

⁷ änn-ak, ärđän iket-däy-näsän a-s näkk, ikkəlläf-ahi Mässinäy axätab n-Älənžil i-inəzzulam-i wären əja amili härät s-əmmək wa s-ikkəlläf Bətrus d-a-wen i-käl-Älyähud-i çur-ämoos amili härät.

⁸ Əfhämän iket-näsän a-s tärna n-Mässinäy ta hi-jät däy-tənnəmuşəla n-Älənžil i-inəzzulam, ənta daç a jät Bətrus däy-tənnəmuşəla-net i-käl-Älyähud.

⁹ Däy-edäwänne-nin d-inušämän, irđa Yaqub d-Bətrus d-Exya-i ämoosnen imizärän wi əššämnen n-älkänisät a-s näkk-däy, ikf'-ahi Mässinäy turhajät n-ad-äjäy isälan n-Älənžil-net i-inəzzulam. Çur dihendäy ad-där-näy jän näkk d-Bärnäbbas ifassän n-älxer, nänmärđa dər-sän i-ad-näkk näkkäneç inəzzulam, əkkən əntäneç käl-Älyähud.

¹⁰ Härät iyyän a dər-hanäy-äsmätärän, ənnän-anäy: «Wär hintəttəwäm tiläqqiwen n-älkänisät ta häť Yärussälam». Ämoos a-wen-däy däy-näy əttärän a däy-əkneç əjjəluçat çarät-a-wen.

Äsmäqqa Buləs fäll-Bətrus

¹¹ Təglä tanfust hundäy har ašäl wa dd-osa Bətrus açrəm wa n-Intyuş. İndär-ahi dihen anəfham dər-s ed iwar-t uçlem däy-a-wa ija

¹² fäl-a-s iket-di dd-tisən meddən dd-äšimaşäl Yaqub, itihär imənsiwän d-älməssexitän wi wären ämoos dägğ-Älyähud mäšan, osän-dd inämmaşälän n-Yaqub ças, imäl ənta s-edes şund kälä wär-inhey älməssexitän-win-däy, äbas dər-sän itihär wälä imənsiwän a-wa-däy has-təja tüksəda n-a-wa he-ənnən käl-Älyähud wi jännänen ifraç amili fäll-äddinät iket-näsän.

¹³ Ənhäyän käl-Älyähud wi iyyäçnen n-älməssexitän a-wa ija Bətrus ças, əlkämän-as əntäneç-däy har dd-iha ilkam-asän Bärnäbbas iman-net däy-təlmənufäça ta ijjäş Bətrus.

¹⁴ Ənhäyäy a-s ifraç Bətrus i-tidət n-a-wa inna Älənžil ças, äçtäläy-t dat-äddinät iket-näsän, ənneç-as: kunta käyy-i n-ägg-Älyähud təkamäd i-agna wa s-əlkämän inəzzulam, ənd'-e-d-il' əmmək ämära-däy, ad-təttäräd däy-inəzzulam ad-ilälän agna wa n-käl-Älyähud?

İmmun s-Çisa Älmasex ças a içalläsän ägg-adəm

¹⁵ Tidət, s-aläşäl-däy, dägğ-Älyähud a nämoos, wär hanäy-iha ašni n-tiwsaten ti n-inəzzulam wären əssen s-alämär n-Mässinäy

¹⁶ mäšan, hakd a-wen-däy, nəssan a-s äwadəm, immun s-ÇisaÄlmasex ças a t-ihakkän idəm dat-Mässinäy wädden amişəl n-a-wa innä alämär wa n-ännäbi Mosa kud-irha ittaf-t iket-däy-net. A-wen-däy, a fäl näkkäneç-däy, nomän s-Çisa Älmasex i-ad-hanäy-äkf immun-nänäy sər-s idəm dat-Mässinäy wädden imärkedän-nänäy ed wär t-illa äwadəm madän-ijrəw idəm çur-Mässinäy fäl-a-s innin ämeşäl a-wa innä alämär wa n-ännäbi Mosa.

¹⁷ Näkkäneç, Älmasex a-s nətattär ad-hanäy-ijrəw idəm çur-Mässinäy mäšan, kunta hakd a-wen-däy iket-net, äffukkär-dd a-s nämoos inäsbäkkäçän, ajän a-wen älmäçna-net a-s Älmasex a hanäy-äsoçän däy-ibäkkäçän-win-däy? Xäša!

18 Ädduuttät a-s afäl dd-äqqäläx alämär wa n-ännäbi Mosa wa äbboṭäläx, ad-janney i-iman-in, ädoobey amišel-net, a-di, udlem xas a sawaräx iman-in ed a-wen wär-ämmukkän.

19 Alämär, iman-net a hi-madän-änx i-ad-äbas eeddaräx i-alämär, änn-ak, Mässinäx a-s eeddaräx.

20 Näkk, ohäräx d-Älmasex atwəşləb wa ätwäjjä fäll-tajəttewt, kunta ämära eeddaräx, äbas näkk a iddarän, Älmasex a iddarän däx-taxəssa-nin. Tä mudre-nin däx-äddunya-ta-däx, jex-tät däx-təssəba n-immun wa jex s-Rure-s n-Mässinäx-i hi-ijän tärha-ta-däx fäl ämmut däx-təssəba-nin i-ad-äyləsäx.

21 A-wen-däx a fäl wär-ärdey sibəṭṭuläx ännuymät wa hi-ikfa Mässinäx ed ädduuttät a-s ənnär ihakk amišel n-alämär wa n-Mosa idəm xur-Mässinäx, adiš Älmasex-i-däx, ämmut bännan.

3

Älyädalät wa ilän älfäyda xur-Mässinäx

1 Ya käl-Gälasya! Ajän käwäneḍ iba n-tayətte a käwän-irmäsän? Mi käwän-äkrakäwän i-ad-täqqəläm ḍarät Yisa-i s-hawän-nəffəssär äddälil wa fäl ätwäşləb fäll-tajəttewt?

2 Sastanäx-käwän ämära: amišel n-a-wa innä alämär meyx immun s-Älənžil-i s-täsjädäm a käwän-ikfän Unfas Šäddijän?

3 Ajän käwäneḍ irmas-käwän iba n-tayətte ogdähän d-a-wen-däx! End'-e-d-il' əmmək a-s a-wa təssəntäm s-tärna n-Unfas Šäddijän, täsbäṭṭäläm-t-in har dd-täqqäläm ämära, täsifälläm fäll-iman-näwän?

4 Xas käwäneḍ a-wa-däx dd-tokäyäm iket-net däx-immun-näwän, wär t-illa a käwän-ikfa däx-tayətte? Wär il' əmmək a-wen!

5 Ak Unfas Šäddijän wa käwän-ikfa Mässinäx d-tikunen ti ija jere-wän, ma tordam, mafäl ija a-wen-däx iket-net jere-wän? Ak ajän tordam a-s amišel-näwän i-alämär n-ännäbi Mosa a fäl hawän-ija a-wen meyx a-wa s-innin tomänäm s-Älənžil-i s-täsjädäm?

6 Ektəwät-dd mäjräd wa innä Mässinäx fäll-ännäbi Ibrahim a-s innä: «Omän Ibrahim s-Mässinäx, ikräş data-s idəm.»

7 Älmäxna n-a-wen a-s äddinät wi omännen s-Mässinäx a-s aratän n-Ibrahim wi n-tidət.

8 Äru d-ätwäktäb däx-əlkəttab n-Mässinäx n-a-s ilkam ad-amənän inəzzulam† s-Mässinäx, äkf'-en immun-näsän-en-däx idəm dat-Mässinäx. Äru d-ija Mässinäx i-Ibrahim isälan n-älxer-wi-däx a-s has-innä:

«Ad-äjäx älbäraka däx-tiwsaten iket-däx-näsnät däx-äddimmät-näk.»

9 A-wen-däx a fäl ere omänän s-Yisa-däx, ad-däx-s äj Mässinäx älbäraka wa ija däx-Ibrahim.

10 Däx-isälan n-äddinät wi järnen äṭṭäma n-a-s amišel-näsän i-alämär wa n-ännäbi Mosa a tän-madän-işləs, əlmədnet a-s iwar-tän udlem dat-Mässinäx, ed iktab däx-əlkəttab n-Mässinäx a-s:

«Ilxän Mässinäx äwadəm wärän itəmişil hak ässaḡät a-wa ənnän

† 3:8 3:8 – Xur-käl-Älyähud, ere wärän ämoos ägg-Älyähud s-aläşäl meyx ere wärän ilkem i-äddin-näsän, iket-net, änəzzalim a ämoos. A-wen-däx a fäl tiwsaten ti iyyäḍnen iket-näsnät, ti n-inəzzulam. — Aşäl-i-däx, änəzzalim, äkafär (ere wärän issen s-Mässinäx).

färedän wi hānen alāmār wa n-ännābi Mosa.»

¹¹ Wār t-illa āwadəm mad-āj alāmār āmaḡdal dat-Māssināḡ ed iktab a-s:
«Immun a ihakkān āgg-adəm idəm dat-Māssināḡ
i-ad-āj tāmudre ta fälla-s irha Māssināḡ.»

¹² Nəssan a-s immun, wār-oseḡ hārāt d-alāmār ed iktab daḡ dāḡ-
əlčkəttabān a-s ere āmešālān s-iqqud färedän n-alāmār wa n-Mosa iket-net,
ad-iddār sār-sān.

¹³ Iwar-anāḡ uḡlem dat-Māssināḡ ed indār-anāḡ ad-nāmašāl a-wa innā
alāmār māšan, osā-dd Ālmaseḡ ḡas, āsdārfāt-anāḡ dāḡ-tilḡant ta hanāḡ-
āswār, idkāl-tāt fäll-iman-net, āmmut i-ad-nāḡləs ed iktab a-s:

«Iḡān Māssināḡ āwadəm
ātiwāšlābān fäll-tajəttewt.»

¹⁴ Tamāttant ta ija ḡisa fäll-tajəttewt, ij'-et i-ad-ənmiwəḡdān inəzzulam
dāḡ-idəm-net d-ālbāraka wa s-ijjāš Māssināḡ ārkāwāl-net i-Ibrahim,
nəjrəw daḡ nākkāneḡ-i sār-s omānnen Unfas Šaddijān dāḡ-təssəba n-ḡisa
Ālmaseḡ.

Ārkāwāl wa ijjāš Māssināḡ i-Ibrahim

¹⁵ Ārheḡ ayətma āmāra, ad-hawān-āffāssārāḡ isālan-wi-dāḡ s-ālmital
iglan fäll-agnatān wi dāḡ-nānāḡ: təssanām a-s ed iktāb āhaləs tākarḡe
dāḡ-ija isālan n-əmmək wa s-mad-tuḡan tākasit ta dd-mad-āyy, afāl
issəmda akātab-net, iḡfāl-tāt, ad-ābas t-illa ere āddooben asiwəḡ wāla
afānaz n-a-wa s-išwār iktāb-t.

¹⁶ Ēmmək-wen-dāḡ daḡ a-s ijjāš Māssināḡ ārkāwālān-net i-Ibrahim d-
ahāya-net. Ējrāhāt-in a-s wār-innā əlkəttab:
«Ad-dār-k əjjəšāḡ ārkāwāl kāyy d-ihāyawān-nāk.»

A innā: «Kāyy d-ahāya-nāk», i-ad-əlməḡdān āddināt a-s āwadəm iyyān ḡas
a-s iha Māssināḡ ti-net, a t-āmoosān Ālmaseḡ.

¹⁷ Āmāra, ālmāḡna n-a-wen, ənta da: Māssināḡ, ijjāš d-Ibrahim ārkāwāl
n-tassayt, šāmad okaynāt əkkəzāt timaḡ d-kāraḡāt timərwən n-awātay
ad-dd-āzzābbāt Māssināḡ alāmār wa n-ännābi Mosa fäll-kāl-Ālyāhud,
āmāra, alāmār-wen, wār-āddobāt ad-hin-ikkəs ārkāwāl wa s-išwār ijjāš-t
Māssināḡ s-tizarāt.

¹⁸ Ēnnār ija a-wen, adiš, ma ija ārkāwāl wa s-išwār ijjāš-t Māssināḡ i-
Ibrahim? Nəssan a-s Ibrahim, issətbāt Māssināḡ ārkāwāl wa has-ijjāš,
wādden s-alāmār māšan s-tənnā-net ed Māssināḡ iman-net a has-innān:
«Ad-kāy-ākfāḡ ānnuḡmāt-in.»

Āddālil wa fāl dd-āzzābbāt Māssināḡ alāmār

¹⁹ Alāmār, adiš, ma infa? Alāmār, temāhidt hanāḡ-salmadāt a-s
nākkāneḡ-i-dāḡ, ināsbākkāḡdān a nāmoos āmiiḡatārnen s-tənāšše hundāḡ
har ašāl wa dd-mad-ass ahāya n-Ibrahim wa s-ātwānna ed ənta-en-dāḡ
a-s ijjāš Māssināḡ ārkāwāl-wen-dāḡ. Alāmār-en, təssanām a-s ānjālosān
a t-dd-āwwāyən s-ännābi Mosa-i t-dd-āwwāyān s-tamətte ta jer-imāl d-
Māssināḡ.

²⁰ Dāḡ-ārkāwāl wa ijjāš Māssināḡ d-Ibrahim, wār t-illa ere imalān jere-
s d-Ibrahim ed Māssināḡ, ənta ḡas a ijjāšān ārkāwāl-wen-dāḡ i-Ibrahim
wāla əssəbab wāl' iyyān.

²¹ A-wen ak ālmāḡna-net a-s alāmār wa n-ännābi Mosa, ill'-e a-s
ānimāšrāy i-ārkāwāl wa ijjāš Māssināḡ? Ābo, wār-āmmukkān a-wen ed
ənnār t-illa alāmār āddooben ihuk n-ālžānnāt, əjrəwān-t āddināt, āj'-en
alāmār-en-dāḡ āddināt əjrawnen idəm dat-Māssināḡ

²² māšan, illäxät-anäx əlkəttab n-Mässinäx a-s äddunya iket-net a t-təllat daw-tärna n-abäkkad, ämoos a-wen a itbatän däx-təssəba n-ad-əjrəwän äddinät wi omännən s-Ŷisa Älmasex a-wa s-hasän-ijjäs Mässinäx ärkäwäl-net.

²³ Ämära, dat-äzzäman wa dd-issäryäs Mässinäx immun s-ŶisaÄlmasex, alämär wa n-ännäbi Mosa a däx-näx ännihädän, nämoos-as šund käl-takärmüt ikna uḍəf däx-tišəm-net, ännihäd däx-näx hundäx har ašäl wa dd-äsnäfaläl Mässinäx immun s-Älmasex.

²⁴ A-wen, isalmaq-anäx a-s alämär wa n-ännäbi Mosa, taḡälift a hanäx-ija; iḡlaf-anäx i-äzzäman wa dd-mad-ass Älmasex i-ad-hanäx-äkf immun-nänäx idəm ḡur-Mässinäx.

Ušreyän n-immun s-Mässinäx

²⁵ Ämära-däx d-nəjjäs äzzäman wa n-immun, äbas fälla-näx ila änaḡlaf-en tärna

²⁶ ed ḡur-ašäl-wa-däx d-tomänäm, tämoosäm aratan n-Mässinäx däx-təssəba n-Ŷisa Älmasex,

²⁷ ənta-i s-isəm-net a däx-tätwäsälmäxäm däx-aman, ämoos a-wen a ässiitbatän tassaxt-näwän dār-s, tärmäsäm daḡ älxal wa irmas Älmasex.

²⁸ Ämära-hi, äbas izlay wa n-ägg-Älyähud d-wa n-Älyunan, äbas izlay wa n-eläll d-wa n-akli, äbas izlay ähaləs d-tamäḡt ed tämoosäm iket-däx-näwän iyyän n-äwadəm däx-təssəba n-tassaxt-näwän d-Ŷisa Älmasex.

²⁹ Ŷas, šamad Ŷisa Älmasex a käwän-ilan, adiš tämoosäm ihäyawän n-Ibrahim, ad-təjrəwäm täkasit ta s-hawän-ijjäs Mässinäx ärkäwäl-net.

4

Azäjor n-əkkəlu s-ajəraw n-iman

¹ Ärheey daḡ däx-edägg-wa-däx, ad-käwän-äknäx asəssəjrah n-a-wa s-ärheey tənna-net: wädden ara s-ilkam ad-ikus ti-s, a ikka wär-ikreš tayətte, wär-izley d-akli n-mässi-s kud-däx wär t-ih' äššäk a-s a-wa ila abba-net däx-ehäre iket-net, i-net.

² A ikka ämoos ara əndärrän, ad-ila imännähädän d-älwäkilän has-janen ənniyät ənta hakd a-wa ila iket-net. Ad-ija a-wen-däx hundäx har ašäl wa d-ikkäs abba-net äššäk a-s rure-s, ämoos ähaləs ilan tanhaḡt ämära.

³ Šund a-wen-däx a fälla-näx ijan näkkäneḡ-däx, noläh d-aratan s-käla äkkilen i-tärna ta fäll-təgl' äddunya

⁴ māšan, täwwäḡ-dd täqqän ta issəbdäd Mässinäx ḡas, äšmašäl-dd sār-näx Rure-s toraw tamäḡt i-ad-izzäx jere-näx, ämašäl ənta-däx a-wa innä alämär wa n-käl-Älyähud,

⁵ a-wen, ij'-e Mässinäx däx-təssəba n-ad-isəddärfət äddinät wi əzzäḡnen daw-alämär-wen-däx, äkf'-anäx daḡ näkkäneḡ turhajät ta n-tumast n-aratan-net.

⁶ Tidət-däx a-s aratan-net a tämoosäm ed tasətat n-a-wen, a tät-ämoosän, Unfas Šaddijän n-Rure-s n-Mässinäx wa ija däx-ulhawän-nänäx. Unfas-net-en-däx a hanäx-ijräwän s-ad-nəḡarr Mässinäx s-isəm: Abba.

⁷ A-wen-däx a fäl, äbas tämoosäm eklan, änn-ak aratan n-Mässinäx a tämoosäm. Ŷas šamad aratan n-Mässinäx a tämoosäm, adiš, tämoosäm iməkkusa wi s-irh' älxer iket-net.

Isəmməterän wi ija Buləs i-käl-Gälasya

8 Ibda, a-s wär tēzzeyām Mässināḡ, aššānāmān-i n-mālayāḡna ḡas a-s tākkilem, ḡabbādām-tān

9 māšan, ašāl-i d-tēzzeyām Mässināḡ, ānn-ak, ānnāḡet, ašāl-i d-kāwān-izzāy Mässināḡ, ənd'-e-d-il' əmmək n-ad-taləsām ihuk n-iman-nāwān i-mālayāḡnatān wi fäll-təḡl' āddunya s-wār t-illa fāw a ənfan wāla a tān-ihan, adiš kāwāneḡ a tārham ad-tāḡḡələm əkkəlu-wa-dāḡ dd-təzjārām?

10 Əjrahāḡ-in a-s təknam asəmyar n-uḡəf n-išilan iyyāḡ d-orān iyyāḡ d-āzzāmanān iyyāḡ d-iwətyan iyyāḡ,

11 āssiirmāḡ-ahi hullan a-wa kāwān-išlān har āmmukkān fāw a-s ija ḡur-i a-s ālxidmāt wa jeḡ jere-wān, ābbotḡāl-in bānnan.

12 Ayətma! Asəḡad a kāwān-tajjāḡ āmāra, tālālāt-ahi ed āzzāman wa əkkāsāḡ əlleḡ-t jere-wān, jeḡ iman-in iyyān dāḡ-wān, wār-ənhēyāḡ daḡ a hi-tāḡšadām.

13 Təssanām fāw a-s ašāl wa āzzarān d-kāwān-in-oseḡ i-ad-hawān-ājāy isālan n-Ālənžil, a-s kāwān-in-oseḡ, ārhiināḡ,

14 ja taḡəssa-nin tələmḡe-ta-dāḡ fāl təsijālālhāy māšan, hakd a-wen-dāḡ, wār hi-təkrehām, wār hi-tājlālhāyām, ānn-ak, təsbārrākām-ahi šund ḡas ānjālos n-Mässināḡ a kāwān-dd-osān, šund ḡas a-s nākk iman-in a-s ḡisaĀlmasex.

15 Ma ija ālxer wa hi-təssəknām āzzāman-wen-dāḡ? Ma kāwān-ijrāwān? Ajān tətəwām-in a-s āzzāman-en-dāḡ d-kāwān-in-oseḡ, ārhiināḡ, təssəknām-ahi tārha-ta-dāḡ fāl ənnār āmmukkān a-wen-dāḡ, təkukkərem-dd tiḡḡawen-nāwān i-ad-hi-tānāt-təkfəm.

16 Ajān tidət ta hawān-jānnēḡ, tēj'-ahi ašānjo-nāwān?

17 Āddināt wi ədgāznen dāḡ-asəmməskəl n-isālan wi hawān-nəja, wār teḡalāt əkkulān dāḡ-wān, ānn-ak tārha ḡas n-ad-kāwān-sənnəməjjəjan dār-i i-ad-hasān-təlkəmām a dāḡ-ošalān.

18 Tidət, idḡəzet āwadəm māšan, idḡəzet dāḡ-amišəl n-a-wa olāḡān. Nākk, āssofāḡ ad-tamašalām a-wa olāḡān s-ālwāḡḡ iket-net jer-əlleḡ ḡur-wān wāla wār ḡur-wān t-əlleḡ.

19 Ilyadān-in, āssiilmādāḡ-kāwān a-s ozarāḡ dāḡ-təssəba-nāwān, ijmad-t āššāk daḡ a-s jeḡ tiḡzurt ta tājj tamāḡt jarrāwāt eḡāf-net, tiḡzurt daḡ ta jeḡ, ad-tāt-əḡḡafāḡ hundāḡ har ašāl wa d-mad-ikən Ālmasex āntum dāḡ-uhawān-nāwān.

20 Āsiidārhanāḡ ad-t-əlleḡ ḡur-wān āssaḡāt-wa-dāḡ i-ad-hawān-ājāy mājrād sāl wa-dāḡ fāl-a-s iqqan eḡāf-in fäll-təmyāre n-asəmmāxəl-xəl-i-dāḡ hi-ija a-wa kāwān-išlān.

Ālmital dd-ātiwāḡkālān fäll-tanfust ta n-Sarāta d-ta n-Xāzrāta

21 Āyyāt-ahi ad-kāwān-səstənāḡ kāwāneḡ-i ədgāznen s-əmmək-wa-dāḡ dāḡ-utār n-amišəl n-a-wa innā alāmār wa n-ānnābi Mosa. Ak ajān təknam fāw teḡāre n-a-wa innā?

22 Wādden, iktab dāḡ-s a-s ikrāš Ibrahim əssin ilyadān, iyyān, ohar-t d-Xāzrāta ta n-taklit, wa iyyāḡān, ohar-t d-Sarāta ta n-telāllit-i issāxlāl.

23 Ara wa ohār d-taklit, ohār-t dār-s s-əmmək-wa-dāḡ s-itihār āhaləs d-tamāḡt ara māšan, ara wa ohār d-telāllit, āmoos ara n-ārkāwāl wa ijjās Mässināḡ i-Ibrahim.

24 Tanfust-ta-dāḡ jāt fäll-tiḡeḡen-ti-dāḡ n-sānatāt, la ālmāyḡna šəjreen, ālmāyḡna-net da: tiḡeḡen-ti-dāḡ n-sānatāt, ānifāḡḡānāt d-ārkāwālān wi n-əssin: Ārkāwālān-en, wa āzzarān, tamāḡtart-net, Xāzrāta; a-wen ārkāwāl

wa ijjaš Mässinäx d-ännäbi Mosa fäll-aḍay wa n-Säynay, wen ärkäwäl, a-wa t-dd-ijmäḍän däx-aratän iket-net eklan ed Xäžräta-i n-ma-sän, taklit.

²⁵ Xäžräta-en-däx a-s šund aḍay wa n-Säynay ihän äkall wa n-arabän, tooläh day d-aḡrəm wa n-Yärussälam-i s-ašäl-i-däx, mössaw-s iket-däx-näsän, äkkiilen härwa i-alämär-en-däx.

²⁶ Mäšan, Yärussälam ta n-tidət t-töllät ḡur-Mässinäx däx-išənnawän, ənta a-s tamäḍt ta n-telällit n-anna-nänäx.

²⁷ A-wen-däx fäw a fäl iktab däx-isälan n-tamäḍt ta n-telällit a-s:

«Tamäḍt, kämm-i n-teməjjejrut, däwät,
säqqələlət day kämm-i s-käla
wär käm-tärmes tizzurt ta n-ajäraw n-eḡäf
ed ädduuttät a-s tamäḍt ta tätwäksänät,
fäl-a-s innin wär tətəy,
ad-tajär ta dār-ohär ähaləs-net aratan.»

²⁸ Ayətma, əlmədät a-s käwäned aratan dd-oraw ärkäwäl n-Mässinäx a tämoosäm šund əmmək wa s-ijjaš Mässinäx ärkäwäl i-Ibrahim ḡas, ikräš Isxaqq.

²⁹ S-əmmək-wa-däx s-ibda iwä-dd alyad wa təkraš Xäžräta, idwäl ḡas, ad-isakna wa n-Saräta aḡana; əmmək-wen-däx day a ijan jer-äddinät har ašäl-i-däx.

³⁰ Ämära, ilyaḍän-win-däx n-əssin, ma hanäx-innä əlkəttab n-Mässinäx däx-isälan-näsän? Wädden iktab a-s innä Mässinäx i-Ibrahim:

«Səfəl iman-näk taklit d-rure-s ed
wär t-illa əmmək s-ohär alyad
wa n-taklit täkasit d-alyad wa n-telällit.»

³¹ Ayətma, näkkäned, anna-nänäx telällit wädden taklit.

5

Älmässexitän, əjräwän iman-näsän däx-təssəba n-Älmasex

¹ Älmasex a hanäx-ijräwän iman-nänäx, nəjräw-tän day s-älxal imdan. A-wen-däx a fäl, əhələt iman-näwän, wär jem iman-näwän toläs daw-äzük wa n-Iblis i-ad-has-täkkälem.

² Näkk Buləs, ənney-awän: afäl täsmaläyäm iman-näwän s-əmmək wa s-t-ifräd alämär, adiš, wär käwän-e-infəw Älmasex s-wäla a əndərrän.

³ Ärheḡ day ad-əkkəsäx äwadəm iket-net irhan ad-isəmmiləy iman-net däx-tayḍärt, afäl äsmaläy iman-net, ämoos-as färəḍ ad-ämašäl day färəḍän wi iyyäḍnen əktäbnen däx-alämär.

⁴ Käwäned-i tattärnen ad-käwän-äj amišəl n-färəḍän n-alämär wa n-ännäbi Mosa äddinät lanen idəm dat-Mässinäx, ässiilmädäx-käwän a-s ibḍ'-iwän a-wen d-ḡisa Älmasex, äsiinämäjjäy-käwän d-ännuḡmät n-Mässinäx.

⁵ Näkkäned-i omännen s-ḡisaÄlmasex, Mässinäx a ih' ätṭäma-nänäx i-ad-hanäx-äj imayḍalän. Ätṭäma-en, näqqal-as s-tazidert ta ihakk Unfas Šäddijän-i s-ənta a ässixdämän immun-nänäx.

⁶ Äwadəm, afäl išwär irtäy d-ḡisa Älmasex, wädden amili wäla ibanet a infan härät, a-wa infän härät, immun d-asətbət-net s-tärha-nänäx i-äddinät.

⁷ Änna säbxas yaden, uhən käwäned-i s-a ija a-wa-däx tosasäm däx-azzal wa n-immun s-əmmək-wa-däx, ma käwän-dd-iwwäḡän, igdäl-awän amišəl n-tidət?

⁸ Erk ənniyät-wen-däx, wädden Mässinäx-i käwän-dd-iḡrān s-iman-net a dd-ifal,

⁹ ajän təttəwäm-in a-s təzza əndərrät a sakafät ejel n-älkäma äjjeen.

¹⁰ Näkk, ikf'-ahi Emäli däx-isälan-näwän taflest n-a-s wär-e təjəm ḡas ar inəzjam šund wi jeḡ māšan, ärheey ad-təssanäm a-s əwadəm wa itattārān uḡən n-iḡäfawän-näwän, ilmədet a-s ad-t-irməs Mässinäx ed anməšri šund-wen-däx, wär sār-s izley Mässinäx äddinät.

¹¹ Ayətma, däx-a-wa hi-dd-iqqälän näkk, ənnär isälan wi täjjäx, əfraḡäḡ fäll-äddinät amili, adiš mafäl hi-tiḡəzzuben käl-Älyähud bännan? Ənnär a-wen-däx a xaṡṡäbäx, iket-di, wär tumas tajəttewt ta fäll-ämmut Älmasex älmuxal i-əwadəm wäl' iyyän.

¹² Ärheey däx-äddinät wi käwän-šaškanen ad-käwän-əkfən älyafyät kud-ärhan ḡarät-a-wen, səmməkəḡməkəḡdän iman-näsän.

A-wa ibḡan ere iddarän i-taḡəssa d-ere iddarän s-Unfas Šäddijän

¹³ Ayətma, ajärāw n-iman-näwän a-s käwän-dd-iḡra Älmasex s-iman-net, wär täjjät a-wen əsarū fäll-hakkäm iman-näwän abäkkäḡ, änn-ak, kunta ill'-e a däx-wän itanähäḡän, umaset tanmədhalt jer-iman-näwän däx-tärha

¹⁴ fäl-a-s alämär wa n-ännäbi Mosa iket-net, äkiläwkäläw-t-dd mäjräd wa innän:

«Äj i-änhäraj-näk tärha-ta-däx jed i-iman-näk.»

¹⁵ Mäšan, afäl dd-täqqäläm täniḡäqqäm d-iwäḡsan, tinmədidäm, tinməksim jer-iman-näwän, dihen, äjät ənniyät i-ad-wär tənməlhisäm jer-iman-näwän.

¹⁶ Äyyät Unfas Šäddijän ad-ännähäḡ däx-wän, dihen, ad-äbas təlkamäm i-erk derhanän n-tiḡəswen-näwän.

¹⁷ A-wa läbasän isadärhan ägg-adəm, iknas Unfas Šäddijän; Unfas Šäddijän daḡ iknas a-wa läbasän isadärhan ägg-adəm. Wär käla imda akənnas wa n-jere-sän, a-wen-däx a dd-oräwän a-s, wädden a dd-ijjäšan eḡäf n-əwadəm-däx, ad-t-äj.

¹⁸ Afäl Unfas Šäddijän a däx-wän ännihäḡän, wär däx-wän-e-ännähäḡ alämär wa n-ännäbi Mosa.

¹⁹ Erk imojjan wi läbasnen itamašal ägg-adəm, wär-əfferän, ätiwässanän, əntänəḡ da: əlkäxbu, iba n-təšəḡje, asəmmäḡḡəs n-iman,

²⁰ älyibadät n-əššanämän, əkkəriku, amšənji, akənnas, tismiten, asjət n-aḡkär, tärha n-mijraw, bädḡo-bädḡo, ejhän-ejhän,

²¹ munkäzi, tesäse n-asməd, täruft d-a äjjeen wärän izley d-a-wen-däx. Ekkasäḡ-käwän däx-taḡḡärt s-əmmək wa s-käla hawän-t jeḡ, ənney-awän: äddinät wi tamašalnen häratän-win-däx, xäram-asän uješ n-Təmmənəya n-Mässinäx.

²² A-wa oläḡän dd-itirəw Unfas Šäddijän s-ulh n-ägg-adəm ənta da: tärha, tedäwit, älher, tazidert, tähanint, milḡaw, immun,

²³ täzude, tanhaḡt däḡ iman. Häratän-win-däx, wär tän-iha-i iknas alämär.

²⁴ Äddinät wi əkfänen iman-näsän ḡisa Älmasex, əšläbän fäll-tajəttewt ta fäll-ätwäšläb ḡisa derhanän-näsän wi läbasnen tän-əlwaynen.

²⁵ Šämad Unfas Šäddijän a däx-näḡ ännihäḡän, adiš, näyyet-t daḡ ad-ännähäḡ däx-tämudre-nänäḡ s-a-wa oläḡän.

²⁶ Wär nətumaset äddinät tabärajnen wäla tinməkənḡzernen jer-iman-nänäḡ, wär-itisəmet wäl' iyyän fäll-a ila amidi-net wär ila.

6

Isəmməterän wi n-ajilal

¹ Ayətma, ärheey dəx-wän, käwäneḍ-i dəx-ännihäd Unfas Šaddijän n-Mässināx a-s, e-d tärmäsām āwadəm iḡsadän härät, səssiḡədät s-ənniyät āzedän, wär t-tāxweläm. Käyy day-i t-isasaḡadän, āj ənniyät i-iman-nāk i-ad-wär toḍed dəx-abākkaḍ šund wa dəx-oḍa.

² Iḍkəlet hak iyyän dəx-wän āzuk wa ällinjät amidi-net, dihen, ad-təmašäläm alämär wa n-Älmasex.

³ Ere ordän iman-net härät-dəx, a-s ija a-wen, wär-ämoos wäla a ənḍärrän, ilmədet a-s iman-net ḡas a isaswad,

⁴ iššəkət āwadəm imojjan-net təzzar iššək wi n-āwadəm iyyän, dihen kunta ihannāy fäll-iman-net a ännihäjjän d-təmmal, adiš aməlet iman-net s-a-wen-dəx, māšan, wär-itäjjet fāw əmmək s-āsnāfäqqa iman-net d-äddinät wi iyyādnen,

⁵ fäl-a-s, hak āwadəm ad-itwəsəstən d-āzuk n-a-wa ämešäl.

⁶ Wi käwän-saḡranen məjräd n-Mässināx, ifraḍ fälla-wän ad-där-sän tahərem a-wa s-kāwän-irxäm Mässināx iket-net.

⁷ Wär təkärrasät iman-nāwän, Mässināx, wär t-itəjj āwadəm tekäškäšt, wär-e aləy āwadəm ar a-wa äddomät:

⁸ wa s-taḡəssa-net ḡas a-s ixdam derhan-net, ad-sär-s dd-arəw a-wa itamašal əlhəllak māšan, wa s-Unfas Šaddijän a-s itamašal derhan-net, ad-sär-s dd-arəw a-wen təmudre təḡlalät.

⁹ Wär hanāx-itäjjäšet sendad n-amışəl n-a-wa olāḡän ed, afäl dd-tosa tāqḡän ta issəbdäd Mässināx, kunta wär sāmmed fälla-nāx iji n-a-wa olāḡän, ad-nəjrəw älxer n-a-wa nəjä.

¹⁰ A-wen-dəx a fäl ämära, iket-di nəjraw s-a-wen, ihəlet miḡyaw-nänāx ebre n-e d t-illām āwadəm hullan ebre n-wi dār-nohär immun.

Ajilal n-məjräd wa ija Buləs

¹¹ Ənhəywät təššuhärt n-akätab dəx-edägg-wa-dəx i-ad-təlmədäm a-s näkk iman-in a hawän-in-iktābän təkərḍe-ta-dəx.

¹² Äddinät wi tattärnen ad-hawän-əjən amili färəḍ, əjrähät-ah'-in ḡas a wa tän-išlan, wär-ərhen ahānay n-aḡāna, a-wen-dəx a fäl, wär helän ad-ənnən i-äddinät a-s əḡəllas wär-iha ar tajəttewt ta fäll-ämmut Älmasex.

¹³ Təzzar day äddinät-en əṯṯāfnen amili, əjrähät-in ḡas a-s əntāneḍ iman-nāsän, wär təmišilän färəḍän n-alämär iket-net, jan dəx-sän nefran, wär fälla-wän əfreḍän amili ḡas ar dəx-tārha n-ad-ābbäräjän n-a-s əntāneḍ a ämoosnen əssəbab n-amili-nāwän.

¹⁴ Näkk, wär t-illa a jeḡ abərəj kunta wädden tidət ta n-a-s Emäli-nänāx ḡisa Älmasex, ämmut fäll-tajəttewt. Tamättant day ten-dəx ija a təmoosät əssəbab wa fäl sār-i olāh a-wa-dəx ihän äddunya-ta-dəx šund a ämmun, olāhāḡ-as day näkk d-ere ämmun.

¹⁵ Wädden amili wäla iba-net a-s härät, tumast n-āwadəm ässiynāy Mässināx a-s härät.

¹⁶ Əttarāḡ s-Mässināx, ad-äkf älxer-net d-tāhanint-net i-e d t-illām ere ilkamän i-a-wa ənneḡ, ijrāw day a-wen i-e d t-illām ere ihan Iḡrayil wa n-Mässināx.

¹⁷ Əttarāḡ dəx-wän, käwäneḍ ašäl-i-dəx, ad-wär dəx-wän itiləs āwadəm asəsnan n-iman-in, əgdähän-ahi ibuyəsän-wi-dəx äššišwälnen taḡəssa-nin s-əntāneḍ a-s tajuhe n-a-s näkk, il'-ahi ḡisa.

¹⁸ Ayətma-γ dāγ-āddin, āhuulāγ-kāwān-in, ətтарāγ day dāγ-Emāli-nānāγ
Yisa Ālmasex, ad-āj ānnyūmāt-net dāγ-ənniyāt-nāwān. Amin!

Täkarde ta iktäb Buləs i-käl-Ifäsus

Äsajəš

¹ A-wa näkk, Buləs, wa ija erhet n-Mässinäx änammašul n-ŸisaÄlmasex hin-iktabän i-iməššeddəjän wi äxdälnen s-Ÿisa Älmasex əzzäxnen aɣrəm wa n-Ifäsus.

² Ähuuläx-käwän-in, ikf'-iwän Mässinäx-i n-Abba-nänäx d-Emäli Ÿisa Älmasex ännuɣmät d-älxer.

Tämeyit i-Mässinäx i-əlyəllas wa ikfä däx-idəm n-Ÿisa Älmasex

³ Təmmal i-Mässinäx-i n-Abba n-Emäli-nänäx ŸisaÄlmasex-i fälla-näx dd-äzzäbben s-tärna n-Unfas-net e d t-illäm ärräxmät ihan isənnawän itatäjrəwän ɣur-Mässinäx däx-idəm n-Älmasex.

⁴ Mässinäx a hanäx-äsnäfränän härwa wär dd-täxlek äddunya i-ad-numas data-s däx-təssəba n-Älmasex iməššeddəjän, wär-iwer uɖlem wäl' iyyän.

⁵ Däx-təssəba n-tärha ta hanäx-ija a fäl ixtäs däx-tihusay n-erhet-net s-ad-numas aratan-net dd-ija s-iman-net däx-idəm n-Ÿisa Älmasex.

⁶ Ämära, naməlet-t däx-təssəba n-təmxäre n-ännuɣmät-net-wa hanäx-ikfa bännan däx-äddimmät n-Wa ikna tärha.

⁷ Tädarfit ta hät ašni n-Rure-s, wa inɣälän a hanäx-ijrəwän tenäšše n-ibäkkadän, äzzäbbät-dd fälla-näx ärrəzäx n-ännuɣmät-net ed,

⁸ äsnäfläy-anäx däx-a-wen s-särho d-tayette ta hanäx-ikfä i-ad-nəjräh erhet-net.

⁹ Iffəssär-anäx-dd əddäraj n-erhet wa s-dd-äsnäfaläl älmäxna-net ašäl-i-däx: a-wen, a t-ämoosän äddäbara ähuusken s-äru d-t-issəbdäd Mässinäx,

¹⁰ innä afäl dd-äddewän äzzämanän har dd-osa wa n-Älmasex, ad-dd-isədəw a-wa ihän isənnawän d-äkall, imnukəl fälla-s.

¹¹ Däx-təssəba-net ənta-en-däx d-a-wa hanäx-ikittəw a fäl äru, härwa wär t-illa fäw a dd-ixlakän, ad-ixtäs Mässinäx s-ad-hanäx-isənnəfrən däx-erhet-net wa issəbdäd.

¹² Adiš, naməlet älxurmät n-a-wa hanäx-ija Mässinäx, näkkänəɖ-i järnen ätṭäma-nänäx s-tizarät däx-Älmasex.

¹³ Ənta-den-däx a-wa jəm käwänəɖ-däx, ed təsläm i-tidət ta ämoos Älənžil-i iɣalläsän, tomänäm sär-s, jəm a-wen ɣas, iššəšwäl-käwän s-Unfas Šäddijän-i s-hawän-ijjäs ärkäwäl-net.

¹⁴ Unfas Šäddijän a-s äɖdimmana n-täkasit ta hanäx-itwär Mässinäx. Ijjäs-anäx ärkäwäl n-a-s ašäl wa dd-e-isəmdəw sär-näx tädarfit-net, ad-äj jer-ifassän-nänäx imraš wi ähuuskätnen hanäx-itwär, a-wen-däx a fäl, naməlet älxurmät n-Mässinäx.

Tittar ti ijä Buləs i-käl-Ifäsus

¹⁵ Däx-isälan n-a-wen-däx, a fäl näkk-däx, əjjäšän-ahi isälan n-immun-nəwän s-Emäli Ÿisa d-tärha ta säknem iməššeddəjän,

¹⁶ ad-t-təddaläx hak ašäl, tumayäx-as däx-təssəba-nəwän.

¹⁷ Təddaläx Abba n-Emäli-nänäx Ÿisa Älmasex, ənta-i t-illän jənnəj-härät iket-net i-ad-käwän-äkf särho, isənnəfiləl-dd-hawän iman-net i-ad-t-təknəm muzəyät,

¹⁸ isəmmələwləw ulhawän-näwän s-ännur-net i-ad-təkkəsäm äššäk dəḡ-äṭṭäma wa käwän-äsjär a-s käwän-dd-iḡră s-iman-net, təlmədäm day fäll-təmyäre n-täkasit ta s-irha ad-hawän-tät-uḡan käwäneḡ d-iməššeddəjän, ¹⁹ d-təmyäre n-tärna ta s-wär t-illa a där-togdäh ihäkk imumənän s-a-wa där-ogdäh äššahät-net, tädabit-net d-tärna-net.

Tärna n-Mässinäḡ ta dd-täsnäfaläl tanäkra n-Ḳisa jer-inəmmuttan

²⁰ Tärna-ten-dəḡ, äšmašäl-tät-dd s-äššahät ašäl wa dd-issənkär Älmaseḡ jer-inəmmuttan təzzar, äsḡäym'-e daw-aḡil-net dəḡ-išənnawän,

²¹ jənnəj-e d t-illäm änjälos, d-e d t-illäm ämänokal, d-e d t-illäm härät ilan tärna dəḡ-išənnawän, d-e d t-illäm amänay; ässajär isəm-net e d t-illäm isəm itawäḡren dəḡ-äddunya hakd-dəḡ e d t-illäm isəm s-ilkam ad-dəḡ-s ätiwäḡra.

²² Ija härät iket-net daw-iḡarän-net, ij'-e eḡäf n-älkänisät iket-net-i

²³ tämoosät taḡəssa ta dəḡ-izzäḡ ənta-i dd-äsnäfalälän Mässinäḡ-i ilsän äkall s-älmäḡna imdan.

2

Ännuymät n-Mässinäḡ a iḡalläsän

¹ Käwäneḡ ibda, tämmum dat-Mässinäḡ, a-wa-dəḡ hawän-jän älyibän-näwän d-ibäkkadän-näwän.

² Tättäläläm äzzäman-en a-wa fäll-təḡl' äddunya, tamašaläm a-wa fällawän irha Iblis-i äminakälän fäll-alšinän-i əlläynen, ämiinakäl day fäll-inämašrayän wi n-iməffelləḡän.

³ Äddinät-win-dəḡ, käla dəḡ-sän näḡḡdin näkkäneḡ-dəḡ, nəlkam ḡas i-derhanän wi läbasnen n-tiḡəswen-nänäḡ d-erk inəzjam-nänäḡ; ässiitbät a-wen tumast-nänäḡ n-käl-äddunya wären əzley d-imidiwän-näsän. Wär hin-äqqima ḡas ar ad-fälla-näḡ dd-izəzzubbət Mässinäḡ aḡkär-net s-əmmək wa s-t-dd-mad-izəzzubbət fäll-äddinät wi iyyäḡnen t-wären äksuḡ.

⁴ Mäšan Mässinäḡ, mäqqär tähanint-net, ij'-anäḡ tärha-i-dəḡ mäqqärät,

⁵ s-härwa nämmut dat-Mässinäḡ, a-wa-dəḡ hanäḡ-jän uḡlemän-nänäḡ, ässodär-anäḡ näkkäneḡ hakd Älmaseḡ ed ännuymät-net a käwän-iḡalläsän.

⁶ Dəḡ-təssəba n-Ḳisa Älmaseḡ-en-dəḡ a fäl hanäḡ-dd-issənkär Mässinäḡ näkkäneḡ hakd ənta jer-inəmmuttan, äsnäḡäym'-anäḡ där-s dəḡ-išənnawän.

⁷ A-wen, ij'-e dəḡ-milḡaw-net i-ad-əlmədän äddinät fäll-təmyäre, d-əjut n-ännuymät wa ihän Ḳisa Älmaseḡ s-wär-ilkem ad-istak.

⁸ Ännuymät n-Mässinäḡ äddewän d-immun sär-s a iḡalläsän; a-wen, wädden äḡḡ-adəm a dd-ifal, ihuk n-Mässinäḡ a ämoos.

⁹ Wär t-järrəwän imärkedän ämešäl äwadəm i-ad-wär-itəbəriḡ wäl' iyyän.

¹⁰ Mässinäḡ a dd-ifäl a-wen, ənta a hanäḡ-dd-ixläkän s-tiḡusay s-tärna n-Ḳisa Älmaseḡ i-ad-nudabät amišəl n-imärkedän wi s-äru d-tän-dd-äsmäjnät Mässinäḡ i-ad-tän-nämašäl.

Tassaxt ta täynayät t-təllät jer-imumənän dəḡ-älkänisät

11 A-wen-däx a fäl ämära, wär hin-töttewäm a-s käla tämoosäm inөzzulam,† jannen-awän käl-Älyähud-i yur-ämoos amili härät: «Ed-kärameläy», kud-däx, amili-en, wär-ämoos ar härät n-tamөнkiqt dd-inakkäq äwadөm s-äfuss-net däx-taxөssa.

12 Äzzäman-en-hi, wär t-illa a toharäm d-Älmasex, wär t-illa a tässirtäyäm d-tamөtte ta n-käl-Israyil, wär toheräm där-sän ärkäwäl wäla ärkäwälän n-tassaqt wi hasän-ätwäjjan, wäla ättäma n-Mässinäx däx-äddunya wäla däx-älaxärät.

13 Enta-den-däx a-wa däx-wän ijan mäšan, ašäl-i-däx, käwäneq-i s-käla tujөjäm, äzzehäz-käwän-dd Mässinäx iman-net s-ašni wa n-Älmasex inxälän, tosaxäm d-Visa Älmasex.

14 Enta-en-däx a-s älxer-nänäx, өnta-i issärtäyän käl-Älyähud d-inөzzulam, ämoosnen ihөnnin, sänatät tiwsaten, ij'-en iyyän n-äwadөm, ikkäs-in jere-sän ajäzzar wa ikkän jere-sän ed ikfa taxөssa-net ašäl wa ämmut i-ad-hin-änd äxalla wa tän-ibqän.

15 Tamättant-ten-däx ija a-s hin-issөmdä a-wa hin-äba däx-a-wa innä alämär wa n-ännäbi Mosa däx-isälan n-a-wa xälälän d-a-wa xaramän. Issärtäy ämära käl-Älyähud d-inөzzulam, imäl-t älxer jere-sän i-ad-umasän fäll-өssin-essän tiyyät tawset där-s tosaxät,

16 äzmäzäl äddinät d-Mässinäx d-jer-iman-näsän s-tamättant ta ija fäll-tajөttewt, ij'-en tiyyät taxөssa i-ad-äbas t-illa anmөkšar jere-sän.

17 VisaÄlmasex, ašäl wa dd-osa, osä-dd i-ad-ixtөb isälan n-Älөнzil-i hawän-ih' älxer käwäneq-i n-inөzzulam-i änimäjjäjnän d-Mässinäx hakd-däx käl-Älyähud-i sär-s dd-өllänen;

18 өnta-en-däx a ikfän Unfas iyyän Šaddijän i-käl-Älyähud hakd inөzzulam i-ad-өjrөwän tabarät s-Abba.

19 Ämära, äbas tämoosäm imäjarän wäla äddinät өzaxnen äkall wär len, toharäm äkall d-imөššeddөjän, tämoosäm d-ägg-ehän wa n-Mässinäx,

20 tolähäm d-ibөlyan n-tihun wi s-ikräs ehän däx-a-s ässas n-ehän-en, a-wa äxtäbän inөmmušal d-ännäbitän a t-ämoosän; VisaÄlmasex iman-net a-s tähunt n-ehän ta n-aymär fäll-idäy ehän iket-net.

21 Visa-en-däx a fäl änimättäfnät tihun ti s-ikräs ehän i-ad-wär t-isidөw härät, oqdäh iket-net, itimxar i-ad-umas ehän-en, ehän šaddijän däx-izzax Emäli.

22 Käwäneq daq-i n-imumөнän, tänimättäfäm där-s, i-ad-tumasäm ehän däx-izzax Mässinäx s-Unfas-net.

3

Bulөs a-s änämmašul n-Mässinäx s-inөzzulam

1 A-wen-däx a fäl, näkk Bulөs, ašäl-i-däx, ämoosäx u-takärmüt däx-tөssөba n-VisaÄlmasex-i hi-ijän änämmašul hawän käwäneq-i n-inөzzulam,

2 äšmašäl-ahi-dd sär-wän Mässinäx däx-ännuxmät-net i-ad-käwän-in-sөssiwөdäx isälan-net,

3 өnta-i hi-dd-äsnäflälän өddäraj wa s-hawän-odäšäx isälan-net a өndärrän däx-armuq,

† 2:11 2:11 — Yur-käl-Älyähud, ere wärän ämoos ägg-Älyähud s-aläsäl meq ere wärän ilkem i-äddin-näsän, iket-net, änäzzalim a ämoos. A-wen-däx a fäl tiwsaten ti iyyäqnen iket-näsän, ti n-inөzzulam. — Ašäl-i-däx, änäzzalim, äkafär (ere wärän issen s-Mässinäx).

⁴ mäšan afäl täyräm takarḍe-ta-däx, ad-təjrähäm a-wa-däx s-hawän-ässewäläx ed näkk, Älmasex a hi-issefhämän älmäxna n-əddäraj-wen-däx.

⁵ Isälan-wi-däx, əzzurəyatän ti hin-okäynen, wär tänät-dd-izjer ägg-adəm s-dd-äsinäfaläl Mässinäx älmäxna-näsän-has mäšan, ašäl-i-däx, issəlmäd älmäxna-näsän s-tärna n-Unfas Šaddijän i-inəmmušal-net wi n-iməšseddəjän d-ännäbitän.

⁶ Əddäraj-en-hi, älmäxna-net a-s inəzzulam hakd käl-Älyähud, iyyän n-ajäraw a jän xur-Mässinäx, ämoosän tiyyät tawset, ohärän iket-däx-näsän d-Ÿisa Älmasex ärkäwäl wa s-ätwäjjän isälan-net däx-Älənžil.

⁷ Näkk-i, ij'-ahi Mässinäx s-tärna n-ännuymät-net akli-net, wa ixaṭṭabän isälan n-Älənžil,

⁸ näkk-i n-adday jer-iməšseddəjän, ikf'-ahi Mässinäx ännuymät-net i-ad-äjäx i-inəzzulam isälan n-təmyäre n-ärrəzäx wa ihän Älmasex,

⁹ äffäsäräx-asän iket-däx-näsän isälan n-əddäraj wa s-käla ättunkäl iket-di dd-ixalläk Mässinäx äddunya, s-ašäl-i-däx, änfaläl-dd älmäxna-net.

¹⁰ Isälan-en, äsnäfaläl-tän-dd Mässinäx i-ad-tumas älkänisät əssəbab wa s-lammädän imänokalän d-käl-äššahät wi əzzäxnen isənnawän s-tihusay d-əjut wa ija sārho n-Mässinäx.

¹¹ A-wa s-äru t-issəbdäd Mässinäx däx-isälan-win-däx, ämešäl-t Emälinänäx Ÿisa Älmasex-i

¹² hanäx-ijräwän däx-təssəba n-immun wa sār-s nəja, anmihaž d-Mässinäx s-ənniyät t-iflasän.

¹³ A-wen-däx a fäl däx-wän ärheex, ad-wär hawän-igəddəl aḡäna wa hannäyäx akuyəd, änn-ak, umaset-awän a-wen əssəbab n-aḍkul n-iḡäfawän-näwän.

Təmyäre n-tärha ta ija Ÿisa Älmasex i-tamətte-net

¹⁴ A-wen-däx a fäl rakkäxäx dat-Abba i-ad-t-ädäläx,

¹⁵ ənta-i s-wär t-illa ejädäš iwarän isənnawän wäla äkall s-wädden iḡarr isəm-net,

¹⁶ təddaläx-t ənta-i s-irzäx ännuymät-net, wär t-illa a-s wädden ill'-e jənnəj-s i-ad-käwän-isəššuhət däx-iman-näwän s-tärna n-Unfas-net,

¹⁷ ikən immun s-Älmasex antum däx-ulhawän-näwän, təknəm daḡ anmärh jer-iman-näwän,

¹⁸ tudabem käwänəḍ d-iməšseddəjän iket-näsän ujreh n-tärha-net-i-däx mäqqärät: tärha daḡ jat tähhərut d-təššəjrət d-aḍkul d-atrəjji-i-däx s-wär t-illa fäw a tät-madän-iktəl.

¹⁹ Təddaläx Mässinäx i-ad-təknəm ujreh n-tärha n-Älmasex-i-däx mäqqärät tojarät a-wa s-äddoobät eḡäf n-ägg-adəm ad-t-dd-isäxləy, idney Mässinäx ulhawän-näwän s-a-wa idnäy wa-net.

²⁰ Mässinäx-i äddoben ad-äj a ojarän a-wa s-äddooben iḡäfawän-nänäx utär-net d-azənnəzjəmi däx-s, ənta-i äddooben ad-hanäx-idhəl s-tärna-net ta simrumirät ulhawän-nänäx,

²¹ tumaset təmmal ti-net däx-älkänisät, d-däx-təssəba n-Ÿisa Älmasex härkuk. Amin!

4

Tassaḡt däx-alkum i-Ÿisa Älmasex

¹ Ayətma! Äsimätäräy-käwän näkk-i n-u-takärmüt däy-tössəba n-Emäli d-ad-təjəm tämudre tänihäjjät d-teyəre ta käwän-dd-ija Mässinäy s-iman-net.

² Särəsät iman-näwän däy-härät iket-net, ızadät, zäydärät, tənmešmāräm jer-iman-näwän däy-tärha.

³ Äjät a-wa täddobem iket-net i-ad-təttəfäm tassaxt ta n-iyyəät däy-käwän-ija Unfas Šäddijän, ämlet älxer jere-wän.

⁴ Tiyyät tağəssa a tämoosäm,

Unfas dağ iyyän ɣas,

iyyəän n-ättäma

a käwän-äsjär Mässinäy a-s

käwän-dd-iyrä s-iman-net;

⁵ Emäli iyyän,

immun iyyän,

atwəsəlmaɣ däy-aman dağ iyyän.

⁶ Mässinäy, iyyän ɣas,

ənta a-s Abba n-e d t-illäm ägg-adəm,

ill'-e jənnəj-härät iket-net,

ässodär härät iket-net,

ih' ulhawän iket-näsän.

⁷ Däy-ännuɣmät-net, hak äwadəm-däy, ij'-as isuf wi itäj Älmasex i-äddinät i-ad-hin-səssiwədən ämašal-net.

⁸ A-wen-däy a fäl innä əlkəttab n-Mässinäy däy-isälan n-Ÿisa:

«A-s ikk' išənnawän,

irna imiksänän-net,

äšräwräw-tän ɗara-s

təzzar ija isuf wi s-irha i-dägg-adəm.»

⁹ Ma ämoos älmäɣna n-täfert ta tənnät: «Ikk' išənnawän»? Älmäɣna-net a-s Ÿisa-i ijjäšän ider n-äkall, ənta dağ a ikkän išənnawän.

¹⁰ Ənta-en-däy s-hawän-heɣ ti-net, ənta-i ijjäšän ider n-äkall, ənta dağ a ikkän ašəna wa hin-illan däy-išənnawän, ämnakäl fäll-härät iket-net.

¹¹ Ämära, däy-isälan n-isuf wi ijä, ənta iman-net a ijän iyyäd inəmmušal, iyyäd ännäbitän, iyyäd imällänžalän,† iyyäd ärrabexän wi n-imännähədən d-imäsäɣran n-älkänisät.

¹² Isuf-win-däy, ij'-asän-tän i-ad-särɣəsän i-iməšseddəjän tadäwla, əkfən-tän imutaj wi s-ämiɣatärän i-ad-təhəl älkänisät-i tämoosät tağəssa n-Älmasex s-data.

¹³ Dihen, ad-näj issuɣ imdan däy-immun wa nohär, nəkən təməzzuyt n-Rure-s n-Mässinäy, numas äddinät äɣradnen s-toläh tämudre-näsän d-ta n-Älmasex-i wär-iwer älyib wäl' iyyän.

¹⁴ Ad-äbas nämoos aratan s-täšikwält n-teyəre tän-dd-təmmärät-däy, ad-tän-təzzawät; näɣləs däy-a-wa sälmadän dägg-adəm wi wären tətär ar ere äšnämäšräyän s-tikärras-näsän.

¹⁵ Numaset äddinät tinmənninen tidət täddeewät d-tärha i-ad-nədwəl, naläh d-Älmasex-i n-ämizär-nänäy.

¹⁶ Ənta-en-däy a-s əssəbab wa dd-isadawän äddinät i-ad-asəɣən s-əmmək wa s-osäɣän izəmmuz tağəssa n-ägg-adəm. Tağəssa, afäl hak taslädt-net däy, isl'-eet a-wa tät-iwārän, ad-däggäl iket-net, togdäh, tosaɣ. A-wen-däy a fäl, nənmärhet i-ad-nəhəl s-data.

A-wa s-käla t-nämoos d-a-wa nämoos ašäl-i-däy

† 4:11 4:11 Isəm n-äddinät wi s-ämašal-näsän, iji n-isälan n-Älənžil.

¹⁷ Ämära, a-wa, önney-t, tilösäx day tønna-net däx-tössöba n-Emäli: wär tolehäm d-inözzulam† -i wären øgla ar fäll-mälâyäxna n-älxal,

¹⁸ tihay a däx-ärjašan, øzhalän, äqpurän ulhawän-näsän, tødraj-asän tämudre ta ihäkk Mässinäx.

¹⁹ Ässetän däx-tözzulöma d-iba n-täkrakiđt d-asömmäđös n-iman-näsän d-tärha n-ajäraw okäyän ämaku.

²⁰ Mäšan, käwäneđ, wädden erk älxal-wen-däx a käwän-issäxra Älmasex

²¹ kunta ønta a fäl tölmädäm, tölkämäm i-tidöt ta käwän-issäxra Yisa.

²² Äyyät fälla-wän erk älxal wa s-käla t-tättiläläm, tøbđöwäm d-derhanän n-tixöswen-näwän ed a-wen wär dd-itiiröw ar ølhøllak s-ägg-adöm.

²³ Äyyät Mässinäx ad-isöynöy inözjam-näwän, äj'-iwän äddinät ärjašnen s-tayøtte täynayät,

²⁴ økröšät älxal wa ikarräš äwadöm ässiynäy Mässinäx, äxødät, išdajät, tønñem tidöt däx-härät iket-net.

²⁵ A-wen-däx a fäl, øbđöwät d-bahu, ännnet hak iyyän däx-wän tidöt i-amidi-net ed ämära-däx, hak iyyän däx-näx, ämoos ašrut n-iiyyän.

²⁶ Afäl käy-ijjäš ađkär, wär töyy ađkär-näk ässođ'-ik däx-a išlayän, wär toyyed täfukt tođa ha tösømme n-a-wen ulh-näk,

²⁷ wär jem i-lblis tašlølt s-käwän-oräm.

²⁸ Wa itikrøn, wär-itiløset tikra, änn-ak, ixdømet s-ifassän-net i-ad-ijröw s-älxaqq n-tide-net, idhøl ønta-däx wa tärmäs tämäyatert.

²⁹ Wär dd-izäjjäret mäjräd sömmän, a ämoos-däx, imawän-näwän, änn-ak, i däx-wän orän emm-net i-mäjräd-däx, izjäret-t-dd a infan härät, iknan, wärän inxes iman n-äddinät wi has-äsijädnen.

³⁰ Wär zäzzäkänzärät Unfas Šaddijän n-Mässinäx-i s-käwän-iššøšwäl i-ašäl wa dd-e-isømdöw sär-wän tädarfit ta s-innä.

³¹ Wär toyyem tösømme wäla äšo wäla ađkär wäla terk tettert wäla tigøggar, wär toyyem wäla däx-härätän-win-däx ikraš ekew däx-ulhawän-näwän. Èbđöwät d-tälläbäst a tämoos-däx.

³² Izadät jer-iman-näwän, nømiđønät tähanint, xaymät tinmønšim jer-iman-näwän s-ømmøk wa s-hawän-in-inša Mässinäx däx-idöm n-Älmasex.

5

Ättäbexa n-äddinät hanen ännur

¹ Ayøtma! Šämad aratan n-Mässinäx ikna tärha a tämoosäm, adiš, tälälä-t.

² Tännähäđet tärha däx-a-wa täjjäm iket-net s-ømmøk wa s-hawän-tät-issøkna Älmasex-i ikfän iman-net, ämmut i-ad-umas takute lat älqim, s-ijraz ađu-net i-Mässinäx.

³ A-wen-däx a fäl wär jere-wän dd-tätwäđkalnet isälan n-äwadöm ikfan iman-net iba n-täkrakiđt wäla asömmäđös n-iman-net wäla utär n-terše tokäyät ämaku. A-wa härätän s-wär-änhäjja fäw ad-dd-titwäxrin jer-imøšseddöjän.

† 4:17 4:17 — Yur-käl-Älyähud, ere wärän ämoos ägg-Älyähud s-aläšäl mex ere wärän ilkem i-äddin-näsän, iket-net, änäzzalim a ämoos. A-wen-däx a fäl tiwsaten ti iyyäđnen iket-näsnät, ti n-inözzulam. — Ašäl-i-däx, änäzzalim, äkafär (ere wärän issen s-Mässinäx).

⁴ Wār safäl̄yaxät, wār täjjät mäjräd wārān ila älmäyna, wāla tekäškäšt wārät la äddälil, änn-ak, a täjjäm-däx, xaymät tumayām i-Mässināx ijitan-net.

⁵ Elmödät a-s äddinät wi ökfänen iman-näsän iba n-täkrakid̄t d-wi samādasnen iman-näsän d-wi ha tārha n-härät-i wārät tözley d-äl̄yibadät n-äşşänämān; äddinät-en, xāram-asān ahānay n-Tömmənöya ta n-Älmasex d-Mässināx.

⁶ Wār kāwān-isās wadet āwadēm s-tāzude n-ilēs wārān infa härät ed anmēsri šund-wen-däx ad-dd-itirōwān aḍkār n-Mässināx fäll-äddinät wi unjäynen s-āmišöl n-tōnna-net.

⁷ Äddinät wi tamašalnen härätān-win-däx, wār tān-tāsmadāwām.

⁸ Kāla hām kāwāneḍ-däx tihay māšan, ašāl-i-däx, tosāxām d-Emāli, adiš, øṭṭefät älxal wa n-dägg-ännur;

⁹ ännur daḡ, wār t-dd-izøjjar ar milḡaw, iqqud d-tidöt.

¹⁰ Šāmad dägg-ännur a tāmoosām, ölmödät a-wa ijrāzān i-Emāli, tāmašälām-t.

¹¹ Wār tihrät härät d-mäl̄ayāxnatān wi tamašalān käl-tihay, änn-ak, səffukkārät a-wa tamašalān

¹² ed a-wa tān-išillun däx-ufār, äsikārakāḍ wāla edāwānne däx-s.

¹³ Wār tākarrasnet iman-näsän, ilkam ad-dd-isəffukkār ännur a-wa tān-išlān iket-net,

¹⁴ ed ännur, wār t-dd-izøjjar ar ännur. A-wen-däx a fäl ätwānnä:

«Jāy! Käyy-i itṭāsān, önkār-dd däx-eḍēs

Ḥnkār-dd jer-inömmuttan wi jer-tōnsed

i-ad-fälla-k isəmmөлөлöw Älmasex ännur-net.»

¹⁵ Äjät önniyät i-tāmudre-nāwān, uday ad-tumasām äddinät wāren la tayötte, umasāt iməssorha.

¹⁶ Äjät ärramät däx-tayrəst-nāwān, äyyät fälla-wān a-wa wār-iha älfäyda ed, išilan läbasnen a fälla-näx janen.

¹⁷ Wār tāmoosām äddinät irmas iba n-tayötte, øjrähät erhet n-Emāli.

¹⁸ Wār sässät asməd har däx-wān itakkäs önniyät ed iba n-älxal a-wen, änn-ak, äyyät Unfas Šäddijān a däx-wān ännähäḍ.

¹⁹ Nömätṭefät jer-iman-nāwān s-tömmalen dd-özjarnen Äzzābur, d-tömmalen kāwān-samātarnen d-isuhay sār-wān dd-oraw Unfas Šäddijān. Amölät Emāli s-ullh imdan.

²⁰ Umayät härkuk i-Mässināx-i n-Abba a-wa hawān-ija iket-net däx-isəm n-Emāli-nānāx Ḳisa Älmasex.

²¹ Isārəset hak iyyān däx-wān iman-net i-amidi-net däx-tössəba n-tuksəḍa ta jān i-Älmasex.

Ehān n-älmässexitān

²² Tidēden! Sārəsmät iman-näkmät dat-meddön-näkmät šund a-s Emāli a dat-tāsräsmät iman-näkmät,

²³ āniihājja a-wen fäl-a-s, āhalēs a-s āmizār n-hānne-s s-ömmək wa s-āmoos Älmasex eḡaf n-älkānisät-i tāmoosät tayəssa-net ta dd-iḡlās.

²⁴ Emmək-wa-däx s-tāsirās älkānisät iman-net dat-Älmasex, ömmək-wen-däx daḡ a-s lanät tidēden ad-sārəsnät iman-nāsnät dat-meddön-nāsnät däx-härät iket-net.

²⁵ Meddön! Ärhet hak iyyān hānne-s s-ömmək wa s-irha Älmasexälkānisät-net-i s-ija tārha ta fäll tāt-ikfä iman-net,

²⁶ i-ad-tāt-dd-isəbdəd dat-Mässināx, wār tāt-iwer älxib wäl' iyyān ed, önta iman-net a tāt-iššəşḍājān, ässiräd-tāt s-mäjräd-net-i išaşḍājān,

²⁷ i-ad-dd-təbdəd data-s təkna tihusay, täsisahäx ašäl, wäla älyib wäla ešer wäla ankəmmi wäl' iyyän.

²⁸ Emmək-wen-däx daḡ a-s lan meddön s-ad-əṭṭafän tiḡeden-näsän, əjən-asnät tärha d-ənniyät wa jän i-tiḡəswen-näsän. Tärha ta jed i-iman-näk, äjet i-hänne-k

²⁹ ed wär t-illa ere iksanän iman-net, änn-ak, hak äwadəm ija ənniyät i-taḡəssa-net, išakš'-et, isals'-et. Emmək-wen-däx daḡ a ija Älmasex i-älkänisät

³⁰ ed näkkäneḡ-i sär-s omänner, nämoos tisləḡ n-taḡəssa-net.

³¹ A-wen-däx a fäl innä mäjräd n-Mässinäḡ:
«Ad-ifəl ähaləs ti-s d-ma-s, asäḡ d-hänne-s,
umasän fäll-əssin-essän tiyyät taḡəssa d-iiyän n-äwadəm.»

³² Mäjräd-wa-däḡ hawän-jəḡ dəḡ-isälan n-əddäraj wa tämoos tassaxt ta ija Älmasex d-älkänisät-net, əssanäḡ a-s wär räqqis ujreh-net

³³ mäšan, ifraḡ fäll-hak ähaləs-däḡ, ad-ärh hänne-s s-əmmək-wa-däḡ s-irha iman-net; səmyäret daḡ hak taməḡt, ähaləs-net.

6

Isälan n-a-wa dd-iqqälän imärawän d-aratän-näsän

¹ Aratän! Sajadät i-imärawän-näwän, ənta-den-däḡ a-wa oḡädän fälla-wän irha Emäli.

² Innä iyyän dəḡ-alämärän n-Mässinäḡ:

«Səmyär ti-k d-ma-k»;

alämär-wa-däḡ, ənta a-s wa äzzarän äsdäw Mässinäḡ d-ärkäwäl, innä:

³ «Afäl təssəmyäräd ti-k d-ma-k,
ad-təjrəwäd älxer, təkərəšad taḡrəst.»

⁴ Käwäneḡ-i daḡ n-imärawän, wär täzzäkänzäräm aratän-näwän änn-ak, äjät-asän asədwal dəḡ-tän saxrem, tadäbbaräm-asän s-a-wa innä Emäli dəḡ-mäjräd-net.

Isälan dd-äqqalnen eklan d-mössaw-sän

⁵ Eklan! Säjdät i-imälan-näwän, uksadät-tän, səmyäräm-tän s-ulhawän šäddijnen šund ḡas a-s Älmasex iman-net a-s jəm a-wen.

⁶ Udaḡ ad-tajjäm a-wa fälla-wän ärhän dihad käwän-hannäyän ḡas šund a-s tärham ad-käwän-in-əjrähän äddinät, änn-ak, äjät a-wa fälla-wän ärhän s-ulh irdan, ed a-wen-däḡ a fälla-wän irha Mässinäḡ.

⁷ Äjät a-wa käwän-iwärän s-ulh imdan šund a-s Emäli a-s t-tajjäm wädden dägg-adəm.

⁸ Təssanäm a-s hak äwadəm, jer-akli wäla eläll, hak äwadəm-däḡ, ad-t-äkf Emäli a-wa has-jän imojjan-net.

⁹ Käwäneḡ daḡ-i n-mössaw-s n-eklan, tajjät a olaḡän i-eklan-näwän, udaḡ ḡas ad-fälla-sän samahaḡäm ed təssanäm a-s käwäneḡ hakd eklan-näwän, Emäli-näwän wa n-tidət ih' išənnawän, wär təzleyäm data-s.

Imutaj n-akənnas wi ikfa Mässinäḡ i-imumənän

¹⁰ Darät-a-wen daḡ, əṭṭəfät tärna n-Emäli i-ad-käwän-isəşşuhət.

¹¹ Əjbəsät, təḡkəläm əzzənəfän n-imutaj n-amjār wi käwän-ikfa Mässinäḡ i-ad-tudabem ehel n-iman-näwän dat-Iblis d-tidämäten-net.

¹² Ämära, anmäḡ wa nəha, təssanäm a-s wädden dägg-adəm a dər-t nəja, änn-ak, nəj'-e d-käl-tärna d-käl-əlxəkum d-käl-tädabit wi n-äddunya ärjäšnen dəḡ-tihay, nəj'-e d-a-wa-däḡ iglän fäll-tälläbäst d-alsinän wi əlläyenen dəḡ-älhəwa.

¹³ Šämad isälan-den-däx, adiš, əjbəsät s-əzzənəfän n-imutaj n-akənnas wi käwän-ikfä Mässinäx i-ad-tudabem ehel n-iman-näwän, afäl fälla-wän dd-oda erk ašäl, tudabem akənnas s-a-wa tətəfäm, wär täjewädäm.

¹⁴ Əhəlät iman-näwän: tumaset-awän tidət, taməntəka; umaset-awän iqqud, əltäx-idmar wa wär nəbbəjnət tidij,

¹⁵ əmmək-wa-däx s-tässirmäčäm esel n-tifadəlen-näwän, əmmək-wen-däx daç a-s härkuk, çaymät täsidäwäm i-iji n-isälan n-Älənžil-i sär-wän-dd-äwwäyän älxer.

¹⁶ A täjjäm-däx, umaset immun s-Mässinäx açařh wa hin-itiwäçän fälla-wän ässämän wi əhijäljälnen s-käwän-itəjjar Iblis.

¹⁷ Umaset-awän əlxəllas wa käwän-ikfa Mässinäx takənbut ta hin-itiwäçät fälla-wän tisäwaten, əšləjät təkoba ta ämoos mäjräd n-Mässinäx-i käwän-ikfä Unfas Šäddijän.

¹⁸ Təddalät Mässinäx härkuk s-tärna n-Unfas Šäddijän, əjləyät hullan däx-a-wen-däx, wär toyyem sendad n-a-wen irmas-käwän, təddalät Mässinäx i-iməššeddəjan iket-däx-näsän.

¹⁹ Ädəläť-ah'-in Mässinäx näkk-däx a hi-issäryäsän mäjräd, udabex asuxəl n-isälan n-əddäraj wa ämoos Älənžil s-ənniyät ozjan.

²⁰ Älənžil-en-däx a-s ämoosäx älwakil, kud-däx ašäl-i-däx, däx-təssəba n-iji n-isälan-net a fäl heç takärmüt. Əttärät-ah'-in ad-əjrəwäç iman-in i-ad-udabex iji n-isälan-en s-a-wa ilän əmmək d-esäwe.

Tihulawen ti n-tišrayät

²¹ Däx-a-wa dd-iqqälän taçarha-nin hakd-däx a-wa hi-išlän, ad-däx-wän əj, Tušik-i emärh-in n-əŋça-ç n-ämaçdal däx-ämašal-wa-däx hanäç-ija Emäli, isälan-in;

²² äšimašäläç-t-in sär-wän i-ad-hawän-əj isälan-nänäç, isəsmäç ul-hawän-näwän.

²³ Ähuuläç-käwän-in, əttaräç daç s-Mässinäx-i n-Abba d-Emäli YisaÄlmasex a käwän-ikfän älxer käwäneç hakd imumənän iket-däx-näsän, tənmarhəm jer-iman-näwän, iwwaç immun-näwän.

²⁴ Ikfä Mässinäx änuçmät-net i-äddinät wi jänen tärha təmdat i-Emäli-nänäç Yisa Älmasex. Amin!

Täkarde ta iktäb Buləs i-käl-Fəlibb

Äşajəş

¹ A-wa Buləs d-Timoti, eklan n-ŸisaÄlmasex, hin-əktabnen i-e d t-illäm eməşšeddəj n-Ÿisa Älmasex izzaxän ayxrem wa n-Filəbb, nəktab-in day i-ärrabexän wi n-imännähädän n-älkänisät d-imadhalän-näsän.

² Nähuul-käwän-in, ikf'-iwän Mässinäx-i n-Abba-nänäx d-Emäli Ÿisa Älmasex ännuxmät d-älxer.

Tämeyit d-tedawit n-Buləs dəx-isälan n-käl-Fəlibb

³ E-d käwän-dd-əkter-däx, ad-dd-äqqələx xas tumayax i-Mässinäx dəx-təssəba-nəwän,

⁴ e-d t-däläx-däx, ad-has-äjäx tamädilt-hawän täddewät d-tedawit

⁵ fäl-a-s xur-aşäl-i-däx d-käwän-in-ässawädäx isälan n-Älənžil har näkk-da-däx, käwäned a-s imadhalän-in wi n-tidət.

⁶ Äkkasäx äşşäk a-s Mässinäx-i käwän-dd-intäjän s-a-wa-däx oläxän, ənta a käwän-e-idhəlän s-amişəl-net s-särho hundäx har aşäl-wa dd-e-ıqqəl ŸisaÄlmasex.

⁷ Inəzjam-in hawän-den-däx, ənta-den-däx day a-wa äniihäjjän ed wär käla okäy aşäl s-wädden təjraw-ahi tenere-nəwän ed, ämaşäl-wa hi-issäxläf Mässinäx dəx-ännuxmät-net, oharäx-t där-wän härwa wär hey takärmüt äzzäman wa d-xatäbäx Älənžil, əknasäx fälla-s bärşey aşäl-i-däx d-hey tişəm.

⁸ Mässinäx a äjjəyhän i-tärha ta mäqqärät hawän-jey, tärha-nin day hawän, tooläh d-ta hawän-ija Ÿisa Älmasex.

⁹ Tattäräx s-Mässinäx, ad-timxar tärha-nəwän, təhələm s-data, təjrwäm musnät wa n-tidət, äddewän d-särho

¹⁰ i-ad-tudabem täbəddawt jer-a-wa oläxän d-a-wa läbasän, i-ad-tişdajäm, tumasäm äddinät wär-iwer älxiib, äqqalnen i-aşäl wa dd-e-ıqqəl Älmasex.

¹¹ Ÿisa Älmasex-en-däx a käwän-e-idhəlän i-ad-tumas tämudre-nəwän, tämudre dd-tirəwät ıqqud ed a-wen-däx a ämoosän älxurmät d-təmmal i-Mässinäx.

Uşreyän n-a-wa s-ıha Buləs takärmüt

¹² Ayətma-x, ärhey ad-təlmədäm a-s a-wa səmmän hi-irmäsän, ehel n-s-data n-Älənžil a dd-oräw dəx-ulhawän n-äddinät äjjootnen

¹³ fäl-a-s, aşäl-i-däx, jer-däx-ehän n-ämänokal wa mäqqärän wälä dəx-idäggan wi iyyädnen diha-däx, wär t-illa ere s-wädden issan a-s tişəm ti hey, təssəba n-isəm wa n-Älmasex a fäl tänät-hey.

¹⁴ Təşşəm n-ayətma dəx-äddin, təkäs äşşäk dəx-alkum i-Ÿisa ed hannäyän tişəm ti-hey, ikf'-en a-wen-däx hi-irmäsän taholät täynayät d-ıba n-tasäja dəx-ıji n-isälan n-Mässinäx.

¹⁵ Tidət, äddinät iyyäd, erk ənniyät d-utär n-asəgdah n-ıman där-i a tän-ıjän dəx-ıji n-isälan n-Älmasex məşan, a-wen, wär hin-ıkkes a-s äddinät iyyäd, ənniyät olaxän a-s xatäbän Älənžil.

¹⁶ Wi əntənəđ, ərhan a-wa hən, əjlayən dəx-s ed əssanən a-s Məssinəx a hi-əsnəfrənən i-ad-sətbətəx i-əddinət tidət ta əmoos Ələnzil.

¹⁷ Wi tattərnen asəgdah n-iman-nəsən dər-i dəx-iji n-isəlan n-Əlmasex, erk ənniyət wa n-əjrähət-ah'-in a əwwayən, ordan a-s a-wen-dəx a fəll-i dd-e-isiwəđän təsəmme d-erk əmmək wa hex dəx-tişəm-in.

¹⁸ Əməra, ma ixsad a-wen? Jer-s-isoran wəla s-tidət, Əlmasex, ad-titwəjjin isəlan-net i-əddinət. Ənta-den-dəx a-wa hi-əsidadəwen, hak əşal dəx timxar-dd tedəwit-in

¹⁹ ed əflasəx a-s a-wa hannəyəx dəx-əlxižabət iket-net, i n-tənfə-nin. Əssanəx a-s, ad-dd-əzjərəx a-wen-dəx iket-net ed, təddaləm-ahi Məssinəx, idhal-ahi dəx Unfas n-Yisa Əlmasex.

²⁰ Əkney asəddərhen n-ad-əj a-wen-dəx ed, wər-əkkesəx əttəma-net, a-wen-dəx a fəl, wər hi-əskərakəđ iji n-isəlan-net. A-wa ərheç dəx-Məssinəx a-s jer-əşal-i-dəx wəla əşəkka, umaset derhan-in asəmxar n-isəm n-Yisa Əlmasex dəx-təxəssa-nin jer-əddarəx wəla əmmux

²¹ fəl-a-s xur-i, Əlmasex a-s təmudre-nin, təmoos-ahi taməttant təsonəđt.

Ma ufən i-amumən jer-taməttant d-təmudre?

²² A hi-ikfa Məssinəx dəx-təxrəst-dəx, ad-əşxaləx a ih' əlfəyda i-Yisa Əlmasex, a-wen-dəx a fəl wər-əssenəx əndek a-wa he-sənnəfrənəx jer-taməttant d-təmudre;

²³ əniməntəşəx jer-hərətən-win-dəx n-əssin: itajjəş-ahi-dd derhan n-a-s uf'-ahi, ad-əjməđəx əddunya, əkkəx diha t-illa Əlmasex, ənta-den-dəx dəx a-wa ufən s-a əjjeen,

²⁴ məşan dəx hannəyəx a-s, dəx-təssəba-nəwən, išşəm-ah'-in, əqqiiməx əddarəx edes-hawən.

²⁵ Əkkasəx əşşək a-s ad-əkkəsəx hərwa əzzəman jere-wən i-ad-təhələm s-data, timxar dəx tedəwit n-immun-nəwən.

²⁶ Dihen, əşal wa d-kəwən-in mad-əqqələx, ad-hawən-umas əşal n-tedəwit s-dd-təssibəb tassaxt-nənəx d-Yisa Əlmasex fəl təssəba n-a-wa hi-ija.

Təmudre təmmittälət Ələnzil

²⁷ Təssəba n-a-wen a fəl, əttəfət dat-əddinət təmudre təssitbətət alkum-nəwən i-Ələnzil wa n-Əlmasex; jer-əqqaləx-kəwən-in wəla, umaset a-s salləx a-s təttafəm Ələnzil s-əşşahət, təttafəm iyyən n-ənniyət d-iyən n-ulh, jam iyyən n-akənnas dəx-isəlan n-immun s-Ələnzil.

²⁸ A ijən-dəx, wər kəwən-sərməxnet isənja-nəwən s-wəla a əndərrən. A-wa tamaşalən a-s təsətbət n-əlhəllək-nəsən, a-s ija a-wen kəwənəđ, təmudre-nəwən a salmadət s-əlxəllas wa kəwən-ikfa Məssinəx, a-wen, Məssinəx a t-ijən.

²⁹ A-wen, janney-awən-t, i-ad-təssanəm a-s teçərə ta hanəx-dd-ija Məssinəx dəx-ənnuxmət-net s-Əlmasex, ij'-anəx-tət-dd i-ad-sər-s namən, nənhey dəx ayəna dəx-təssəba n-isəm-net,

³⁰ təhərəm dər-i dəx kəwənəđ, anmənx wa s-hi-tənhəyəm heç-t, heç-t dəx har əşal-i-dəx.

2

Tassaxt d-asrəs n-iman jer-imumənən

¹ Ämära, šamad tinmødhiläm jer-iman-näwän däx-tössöba n-tassayt ta jäm d-Älmasex, šamad tänimätäfäm jer-iman-näwän däx-tärha i-ad-tätäfäm iyyän n-emm s-tärna n-Unfas, adiš, nömärhät jer-iman-näwän, tønmoðinäm tähanint.

² Ämära d-jäm tartit jat s-iiyän n-ulh, kunta tärham ad-hi-ijröz a-wa häm, adiš, nömötäfät jer-iman-näwän, tønmärhäm jer-iman-näwän, tumasäm šund iyyän n-äwadöm, talähäm d-äddinät oharnen iyyän n-ittus.

³ Wär täjjät a däx-wär köttöwäm ar iman wi-näwän, wär säjarät iman-näwän äddinät, änn-ak, särösät iman-näwän, tøjöm fäw äddinät wi iyyäðnen jønnøj-wän.

⁴ Wär tošeläm ɣas ðarät tønfa n-iman-näwän, änn-ak, immäɣet hak iyyän däx-wän i-a-wa he infun tamötte iket-net.

Älmital n-asrös n-iman wa dd-oyya Älmasex

⁵ Tälälät önnyät wa fäll-igla ʒisa Älmasex, tögloem fälla-s käwäneð-däx.

⁶ Enta, a-wa ämoos Mässinäx, ämoos-t iket-net mäšan, wär-itter ad-has-tumas tumast n-Mässinäx mältay däx-äkkermämmäy i-ad-isigdäh iman-net d-Mässinäx s-äššil,

⁷ änn-ak, oyyä a-wen-däx iket-net, ijä-dd iman-net akli,

oläh-dd d-dägg-adöm i-ad-där-sän aläh härät iket-net.

⁸ Äsräs iman-net i-ad-ämasäl erhet n-Mässinäx, irða s-tamättant, tamättant ta sømmät n-tajöttewt.

⁹ Tössöba n-a-wen-däx ämešäl, a fäl t-iðkäl Mässinäx jønnøj-härät iket-net, ikf'-e isöm t-illan jønnøj-ismawän iket-näsän.

¹⁰ A-wen, ij'-e Mässinäx däx-tössöba n-a-s ed ätwäɣra isöm wa n-ʒisa, ad-data-s irkäx a-wa ihän išönnawän d-a-wa ihän äkall d-a-wa t-illän daw-äkall, iɣbød-t;

¹¹ äjjayhön äddinät iket-däx-näsän, a-s ʒisa Älmasex, a-s Emäli; itwösömyär s-a-wen-däx isöm wa n-Abba Mässinäx.

Akuyød d-amišöl n-erhet n-Mässinäx

¹² Ayötma, käwäneð-i ökneɣ tärha, mašälät mäjräd n-Mässinäx, säxdömäm öɣöllas wa käwän-ikfa Mässinäx däx-tuksöða-net d-asömyar-net. A-wen äjät-t jer-ölleɣ-t jere-wän bärseɣ ašäl-i-däx d-wär ɣur-wän t-ölleɣ, öjlöyät ðay hullan däx-a-wen-däx ed

¹³ Mässinäx iman-net i sär-wän dd-oräwän tärha d-tädabit n-iji n-a-wen a käwän-e-idhölän i-ad-tudabem amišöl n-erhet-net.

¹⁴ A täjjäm-däx, äjät-t wäla abjønjen, wäla tekenzart.

¹⁵ Wär käwän-itöggaret udlem wäl' iyyän, išdajät, umasät aratän n-Mässinäx wär-iwer älɣib wäl' iyyän kud-däx tözzaɣäm jer-özzuröyät töfrayät, tänimäšräyät i-Mässinäx. Umasät i-äddinät šund ännur ämiläwläwän däx-tihay s-ömmök-wa-däx s-äsimäɣmäxän etran däx-išönnawän.

¹⁶ Äjät-asän isälan n-Älönzil-i tötäfäm ihäkkän tämudre, dihen, afäl ašäl-wa dd-iqqäl Älmasex, ad-hi-umas alkum-näwän-has täsonðadt tässiitbätät a-s wär-äxdemäx, wär-önheyäx aɣäna bännan.

17 Təssəba n-a-wen a fäl wär hi-issärmäx fəw ad-inyəl ašni-nin, ämmätäx fəw, umasəx šund takute təwwədət fäll-immun-nəwän s-Mässinäx. Äddiwəx, oharəx dər-wän dəx tedəwit-ten-dəx.

18 A-wen-dəx a fäl dəwätət i-ad-dər-wän ahərəx näkk-dəx tedəwit ta jəm.

Imadhalän n-Buləs: Timoti d-Ibbafärodit

19 Kunta otäs Emäli Yisa s-a-wen, diha-dəx s-a əndərrän, jarəx ättäma n-ad-sär-wän-in-šəmmişələx Timoti i-ad-hanəx-dd-äj isälan-nəwän, ismaḍ ulh-in.

20 Ənta-en-dəx xas a dər-i oharän äddəgazət wa jəx fälla-wän, wär xur-i t-illa dəx ere səl ənta.

21 A-wa iyyädän dəx-äddinät, əššəxəlän n-iman-nəsän xas a dəx-ošalän wädden dəx-wi n-Yisa Älmasex.

22 Dəx-a-wa dd-iqqälän Timoti, təssanəm kəwəneḍ iman-nəwän a-s ənaxdim s-tidət a əmoos; ikf' iman-net hullan i-iji n-isälan n-Älənžil, nəmoos näkk d-ənta šund abba d-rure-s.

23 Ənta-en-dəx a-s jarəx ättäma n-ad-t-in-šəmmişələx sər-wän, afäl əlmädəx a-wa dəx-i-dd-e-išrəyän.

24 Əkkasəx əššək a-s kunta otas Emäli a-wen-dəx, wär-e əhajəx wär kəwän-in-osey näkk iman-in.

25 Məšan, iket-di d-itəjj a-wen, əšimašäləx-in sər-wän Ibbafärodit wa n-əñña-x dəx-äddin dər-oharəx əlxidmət i-Yisa. Wär t-illa anmənx əjjašəx dəx-iji n-isälan n-Älənžil s-wädden ənməjjaš-t dər-i, ənta-en-dəx a sər-i dd-təšmašäləm, əwway-ahi tirjət-nəwän.

26 Naqq'-e tenere-nəwän. Ikm'-e məsällət wa jəm n-a-s ərhin hullan.

27 Tidət-dəx a-s ərhin har əbas t-norda təmudre məšan, oḍän-as Mässinäx təhanint, oḍän-ahi-tət näkk-dəx i-ad-wär fäll-i dd-tiwwaḍ tisanant tojarət ta hi-tärmasət əməra-dəx.

28 A-wen-dəx a fäl t-in-əsrarədəx sər-wän i-ad-t-taləsəm ahənay, təddəwem, təfnəz fäll-i tisanant näkk-dəx.

29 Səbbərrəkət-t afäl kəwän-in-iqqäl, təjəm-as dəx asəbbərrək wa dər-ənihəjja ere ila Emäli ed äddinät šund-win-dəx a ənihəjjänen d-ad-tän-səmyärəm.

30 Ənta-en-dəx a dəx-hawän-əssewäləx, ənney-awän, dəroyx hin-əssijjä a-wa-dəx has-ija əlxidmət i-Älmasex. Iglä har ijä iman-net dəx-miši, ij'-ahi dəx-idəggan-nəwän a-wa s-ənihəjja a-s kəwəneḍ a hi-t-ijän ənnär t-təllam edes-hahi.

3

Iqqud wa s-ənihəjja itəf-t əwadəm ilkamän i-Älmasex

1 Dərət-a-wen, ayətma-x, səddəwətət-kəwän tassaxt ta jəm d-Emäli. Wär hi-ikma ad-hawän-sənniləsəx məjräd wa s-əru d-hawän-in-əktəbəx dəx-isälan-net. Tənfo-nəwän a ihan a-wen i-ad-taxədäm.

2 Ağəzət iman-nəwän dəx-erk inaxdimän, olähän xas d-iyyədan ənsaynen, ağəzət iman-nəwän dəx-sän; ağəzət iman-nəwän dəx-erk äddinät-win-dəx xur-ija s-bahu a-s amili a itajjän əwadəm dəx-tamətte n-Mässinäx.

3 Ənhəywät! Näkkəneḍ-i-dəx a-s äddinät wi jänen amili wa n-tidət s-ənta Mässinäx a-s əssəbab-net, nəxabbəd-t s-tärna n-Unfas, abərəj-nənəx YisaÄlmasex wädden fərəḍän wəla əlxadatän əssiibdädän dəgg-adəm.

⁴ Ənnär t-illa ere äddooben ad-isəffullət iman-net fäll-fərəḏän wäla älyadatän ässiibdädän dagg-adəm, adiṣ näkk a he-izarän s-əlyəllas. Ləxätät-ahi xas ere hi-ojərän dəx-isəlan-win-dəx?

⁵ Näkk, əmeləyəx ašäl wa s-əttam ɗarät tiwit-in, ägg-Işrayil wa n-tidət a əmoosəx, la-hi tawset ta n-Bənyamin, əmoosəx Yəbrani orawän Yəbranitän. Dəx-a-wa əmoosän aləmār wa n-ännäbi Mosa, kəla heɣ taggayt ta n-käl-faris;

⁶ wär t-illa ere hi-ojərän əjjəloyät wäla akfor, äqquzzəbey älkənisät; dəx-isəlan n-a-wa ifrəḏ aləmār fäll-ägg-adəm d-iqqud-has, wär t-illa uḏlem hi-iwarän.

Yisa a ha tänfo

⁷ Ämāra, hərätän-win-dəx jəx ibda abəraj, əbas dat-i əzlayän d-a wərän infa hərät dəx-təssəba n-Älməsex,

⁸ əgley fəw har ašäl-i-dəx, ija xur-i a-s wär t-illa a hi-infan s-hərät fäl təssəba n-azəzər-i jəx i-muzəyät wa jəx i-Yisa Älməsex-i n-Eməli-nin, uf'-ahi muzəyät-net hərät iket-net. Təssəba n-a-wen-dəx a fäl əsserädəx ifassän-in dəx-a-wa-dəx s-kəla hi-əmoos abəraj iket-net, əbas sār-i izlay d-ännikal ed wär t-illa a ärheɣ ar ad-təntəm təmudre ta n-Älməsex dəx-ta-nin,

⁹ äqqayməx dəx osaxəx dər-s hak ašäl, ättəjrəwəxet əsifälləx iqqud-in fäll-alkum-has ənta uhən iqqud i-alkum i-a-wa innə aləmār ed xur-Məssinəx, wär t-illa iqqud ilan idəm data-s səl wa ihəkk immun s-Älməsex.

¹⁰ Wär t-illa a əsidərhanəx a səl muzəyät-net ənta, äknəx dəx muzəyät n-tərna ta t-dd-təssənkərät jer-inəmmuttan, əhərəx dər-s tərsəmmawen ti inhəy, aləhəx dər-s taməttant ta ija

¹¹ ed a ijän-dəx, jarəx ättəma n-ad-dd-aləsəx näkk-dəx tanəkra jer-inəmmuttan, əjrəwəx təmudre ta təynayät.

Alkum i-Yisa har təmdəw äddunya

¹² A-wen janney-awän-t wədden i n-a-s innin əssəmdəx azzal wa heɣ, meɣ dəx i n-a-s innin əsisəgdəhəx dəx-hərät iket-net; əbo! Änn-ak, diha t-əlleɣ, osasəx hullan dəx-azzal-wen-dəx i-ad-əjrəwəx marušät wa hi-itwār Məssinəx ed näkk, ijrəw-ahi YisaÄlməsex.

¹³ Ayətma-x, wär-ordeɣ hərwa a-s näkk-i-dəx, hərätän-win-dəx, əzizəbbey-tän məšan, hərät iyyän xas a iwwayän inəzjam-in: əkfey ärorin-in i-a-wa s-kəla hi-išla ibda iket-net, wär t-illa a dəx-ədgazəx ar a-wa t-illän dat-i.

¹⁴ A-wen-dəx a fäl əjlayəx hullan dəx-a-wa hi-išlän i-ad-əjrəwəx marušät wa hanəx-itwār Məssinəx dəx-işənnawän s-hanəx-ija Məssinəx ärkəwəl-net dəx-idəm n-Yisa Älməsex.

¹⁵ Ämāra, näkkəneḏ-i əmoosnen meddən əmdanen dəx-isəlan wi n-immun s-Məssinəx, nəttəfet əlxal-wen-dəx hak ašäl, kunta dəx təll'-e talxa təmiišəkkem, ədələt Məssinəx i-ad-arr tiṭtawen-nəwän dəx-isəlan-win-dəx.

¹⁶ Hakd a-wen-dəx, a ijän-dəx, šəmad nərməs tabarät-ten-dəx toɣädät, adiṣ nəjləyet dəx-s, nəmsidəxet dəx-tekle-nənəx.

Älmital wa dd-oyya Buləs

¹⁷ Ayətma-x, tələlət təmudre ta əttəfəx, səjrəhəm dəx təmudre n-meddən-wi əlkəmnen i-älmital wa tən-nəkfa, tələləm-tän əntəneḏ-dəx.

Işənja n-Älmasex

¹⁸ Əllan-t äddinät äjjootnen wären əja taməttant ta ija Älmasex fäll-tajəttewt härät. Äddinät-en, äru d-käwän-äsmätärəx i-ad-hasän-təjəm ənniyät, ärheex dax əməra ad-käwän-aləsəx axtal fälla-sän. Äsninän iman-in a-s hawän-janney a-wa-dəx.

¹⁹ İlkam dəx-sän erk ajilal, əşläyän i-Mässinəx, ənnähədnät dəx-sän tisatten-näsän. A-wa s-käla inəqq, əbas tän-əsikərakəq, jän-t abəraj; wär-əlkemän inəzjam-näsän ar i-a-wa fäll-təgl' äddunya.

Äkall-nənəx wa äynayän

²⁰ Win-äddinät, wär dər-sän noleh ed näkkəneq, äkall-nənəx wa äynayän, işənnawän a iha. İşənnawän-en-dəx a-s ilkam ad-hanəx-tän-dd ifəl Eməli YisaÄlmasex-i n-Äməxlas-nənəx.

²¹ Ənta a iha ättəma-nənəx ed afäl dd-iqqäl, ad-fälla-nəx-in-ikkəs taçəssa-ta-dəx tärna taməttant, äkf'-anəx tiyyät täynayät lat älxurmät sund ta-net ed ila tärna s-innähəq dəx-härät iket-net.

4*İsəmməterän wi ija Buləs i-käl-Fəlibb*

¹ Ayətma-x-i əkney tərha, naqq'-ahi tenere-nəwän ed tedəwit-in d-abəraj-in a təmoosəm; ayətma-i əkney tərha, äknät uqəf n-Eməli.

² İwədyə d-Sintəkya-i n-şätma-nəx, əttarəx dəx-snät ad-əjənät əlxer jer-iman-nəsnät, əttəfnət iyyän n-ənniyät dəx-alkum-nəsnät i-Eməli.

³ Käyy dax-i n-əməxdal wa n-tidət dəx-älxidmət-wa nohər, səlxən-tənät İblis, tilaləd-asnät i-ad-ənməzəlnät. A-wa tiqəden hi-ədhälne hullan hullan dəx-iji n-isälən n-Älənzil, əntənəteq d-Klima d-äyətma wi iyyädnen dər-änniixdəməx, itbat a-s əktabän ismawän-nəsän dəx-əlkənnaş wa-dəx əktabän ismawän n-äddinät wi əkkənən əlzännät.

⁴ Ayətma-x, dəwätät härkuk dəx-Eməli; a-wen, oləsəx-t tənna, ənney-awän: dəwätät härkuk.

⁵ Əlmədnet äddinät iket-dəx-nəsän s-təzude-nəwän ed Eməli ya, os'-iwän fəw.

⁶ Wər käwän-itəşəwəşet härät wäl' iyyän, a-s təmətärəm-dəx, təlləxəm-t i-Mässinəx s-tamədilt d-tittar əjlaynen äddewnen d-təmayit;

⁷ afäl jəm a-wen, ad-əj Mässinəx əlxer dəx-ulhawän-nəwän, əj'-asən igguz ojərən a-wa s-əddobät ənniyät n-əgg-adəm ad-t-dd-awəy, asəx ulhawän-nəwän d-ənniyät-nəwän d-YisaÄlmasex.

⁸ Dərät-a-wen dax, ayətma-x, a-wa ädduutten, a-wa ilən təmmal, a-wa oçädən, a-wa şəddijän, a-wa əmoosən isəşərha d-izəjraz d-a-wa ilən tənna d-a-wa ilən əlxal olaxən d-təmmal, əntənəq-den-dəx härätən wi s-əniihəjja a-s jam-asən edəgg dəx-ulhawän-nəwän.

⁹ Məşälät a-wa käwän-əssəxərəx d-a-wa tənəyäm fäll-i d-a-wa s-hi-təsləm har t-ənney d-a-wa jeç iket-net. Afäl jəm a-wen, ad-käwän-idhəl Mässinəx, äkf'-iwän əlxer.

Təmayit ta ija Buləs i-käl-Fəlibb

¹⁰ Wər t-ih' əşşək a-wen, äddiwen iman-in hullan dəx-Eməli dəx-təssəba n-əmmək wa s-hi-dd-təktəm, təssəlmədəm-ahi a-s wər hin-jerəm. İssənəx a-s äru d-təsdərhanəm iji n-a-wen, änn-ak, äddəbara-net ças a wər təjrewəm.

¹¹ A-wen janney-awän-t wədden i n-a-s innin əmiçatärəx s-härät, diha t-əlleç, əzzayəx ad-əjəx ərramät dəx-a-wa leç dəx-talxiwen iket-dəx-nəsnät.

¹² Wār t-illa a-s wädden onanäx-as, jer-əlläqqu wäla terše n-ehäre. Wār t-təlla talxa s-wädden ənhayäx-tät, jer-tewwant wäla laz, wār sār-i təzley terše d-iba-net.

¹³ Wār t-təlla tanfust s-wädden, əštäfäx-dd dəx-s iman-in dəx-tössəba n-tärna ta hi-ikfa Älmasex.

¹⁴ Mäšan, hək d-a-wen-däx, a-wen, wār hin-ikkəs a-s irəš-awän Mässinäx tadhəlt ta hi-jäm fäll-i təfnəzät timxutar.

¹⁵ Ya ayətma-x wi əzzäxnen axrəm wa n-Fəlibb, təssanäm kəwəneḍ iman-nəwän a-s, a-s əssəntäx iji n-isälan n-Älənžil, äzzäman wa dd-fäläx teje ta n-Masidunya, a-wa-däx səl älkänisät ta-nəwän, wār t-təlla älkänisät dār-wän tolähät anufli dəx-a-wa säxreḡ, wār t-təlla dəx ti hi-tədhälät s-əmmək wa s-hi-tədhäläm kəwəneḍ.

¹⁶ A-wen, kəwəneḍ xas a t-ijän ed härwa heḡ axrəm wa n-Täslonika, har əssin ihändəggan tirəjəm-ahi a-s əkkəsäx timxutar-in.

¹⁷ Wädden ihuk-nəwän a dərät ošaläx, änn-ak, derhan a tattäräx n-ad-ijatän imärkedän-nəwän ed ilkam, ad-təjrəwäm imraš-nəsän xur-Mässinäx.

¹⁸ Elmədät a-s a-wa hi-dd-tässawäyäm, əjrəwäx-t iket-däx-net. A ija Ibbafärodit a-wa hi-dd-tässawäyäm dəx-ifassän-in-däx, wār t-illa fəw a fäll-in äba wäla a hin-oḍanäx. Ämoos dat-i a-wa jäm a olähän d-aḍutän n-nefran isihəwhəw äwadəm. Tirjit-nəwän-hahi, tooläh d-takute lat idəm dat-Mässinäx, irḍa sār-s, təjraz-as.

¹⁹ Mässi-x, Mässinäx, wār t-illa a-s wädden ittaf-t, ənta-en-däx a kəwän-e-ikkəsän dəx-e d t-təlläm təmäxatert s-a-wa dār-togdäh terše-net i-ad-itwəsəmxär isəm-net dəx-tössəba n-ḶisaÄlmasex.

²⁰ Imxaret isəm n-Mässinäx-i n-Abba-nänäx härkuk. Amin!

Tihulawen

²¹ Tähuuläm-in iməššeddəjän n-ḶisaÄlmasex iket-däx-nəsän, ähuulän-kəwän-in dəx ayətma wi xur-i t-əllanən diha-däx.

²² Ähuulän-kəwän-in dəx iməššeddəjän iket-nəsän, hullan wi äxdämnen dəx-ehän wa n-Qäyşär-i n-ämänokal n-äkall wa məqqārən.

²³ Ija Emäli Ḷisa Älmasex ännuxmət-net dəx-ənniyät-nəwän iket-däx-nəwän. Amin!

Tăkarđe ta iktăb Bulës i-käl-Kulës

Ăşajěş

¹ A-wa năkk, Bulës, wa ija erhet n-Măssinăş ănămmaşul n-ŶisaĂlmaseş. Ăhuulăş-in năkk d-ăŋŋa-ş dăş-ăddin wa s-isəm-net Timoti

² ayətma-năş wi n-iměşşeddějăn n-imayđalăn dăş-tassaş d-Ălmaseş ezzăşnen aşrəm wa n-Kulës. Ikf'-iwăn Abba-nănăş Măssinăş d-Emăli Ŷisa Ălmaseş ănnuşmăt-net d-ălşer-net.

Tămayit d-tittar n-Bulës

³ Wăr kăla hanăş-okăş aşăl d-wăr nămmoy i-Măssinăş-i n-Abba n-Emăli-nănăş ŶisaĂlmaseş dăş-tittar ti has-nětăjj dăş-těssəba-năwăn.

⁴ Nětumay-as hak aşăl făl-a-s, osăn-anăş-dd isălan n-immun wa jăm s-Ŷisa Ălmaseş d-tărha ta n-tidət jăm i-iměşşeddějăn.

⁵ A-wen, jăm-t ed těssănăm făl ătăma wa kăwăn-ăşjăr Măssinăş-i ihăn išənnawăn. Ăttăma-en, măjrăd wa n-tidət ămoos Ălənşil a hawăn-t-issəslăn, tomănăm săr-s.

⁶ Ălənşil dăş wa s-kăwăn-in-əwwăđăn isălan-net, əmmək-wa-dăş s-has-təslăm a-s titwəjjin isălan-net dăş-ăddunya iket-net, jarrăwăn ăddinăt tămudre ta tăşlălăt dăş-těssəba-net. Əmmək-wen-dăş dăş s-takkăn isălan-en s-data şur-wăn, şur-aşăl wa d-hasăn-təslăm, tějrahăm əddəttu wa ija ănnuşmăt n-Măssinăş, əmmək-wen-dăş dăş a-s tēhhalăn s-data dăş-ifăyyăn n-ăkall.

⁷ Ălənşil wa s-təslăm, issăşr'-awăn-t Ibbafraş wa n-emărh-nănăş dăr-nohăr əşşăşəl, ənta-i n-ămayđal ixđămăn i-Ălmaseş dăş-idăggan-nănăş-hawăn.

⁸ Ənta-en-dăş a hanăş-ijăn isălan n-tărha ta dd-işşəşăr Unfaş Şăddijăn dăş-ulhawăn-năwăn.

⁹ Těssəba n-a-wen-dăş a făl năkkăneđ-dăş, şur-aşăl-i-dăş d-hanăş-əjjăşăn isălan-năwăn-dăş, wăr kăla năssunfa dăş-tamădilt n-Măssinăş-hawăn, nětattăr dăş-s ad-kăwăn-ăkf musnăt imdan n-erhet-net, ăkf'-iwăn dăş s-tărna n-Unfaş Şăddijăn sărho d-ujreh iket-net

¹⁰ i-ad-təlmədăm əmmək wa s-ăniihăjja ad-săr-s təkəmăm i-Emăli, tějřžăm-as dăş-hărăt iket-net. Dihen, ad-təkrəşăm ănnuş n-imărkedăn iket-năsăn, tēhələm dăş s-data dăş-təməzzuyt n-Măssinăş,

¹¹ tēşşuhum s-tărna n-ălşurmăt-net, tudabem tebădde dăş-hărăt iket-net s-tazidert tăddeewăt d-tedăwit.

¹² Dăwătăt, tumayăm i-Abba-i kăwăn-ikfăn turhajăt n-ad-tějješăm ănnur-net, tahərəm d-iměşşeddějăn tăkasit ta hasăn-itwăr dăş-Təmmənəya-net.

¹³ Măssinăş, ohăş-anăş-dd dăş-tărna n-tihay n-Iblis, iwwăy-anăş s-Təmmənəya n-Rure-s wa ikna tărha.

¹⁴ Idəm n-Rure-s-en-dăş a dăş-dd-nějřrăw əlləllu dăş-tişəm n-Iblis d-tenăşşe n-ibăkkađăn.

Wăr t-illa a-s wădden uf-e Ŷisa Ălmaseş

¹⁵ Măssinăş, wăr-itətwənhiy, a-wa ămoos iket-net, itawănhay dăş-ŶisaĂlmaseş-i n-Rure-s-i t-illăn hărwa wăr t-illa a t-illan.

16 Tössöba n-tärna-net ənta-en-däx a däx-dd-ixläk Mässinäx härät iket-net, jer-a-wa ihän išənnawän wäla a-wa iwärän äkall, a-wa ilän mänhoy hakd a-wa t-wärän ila; imänokalän, imännähädän, iməşsuha, imärnan, wär t-illa a-s wädden ənta a t-dd-ixläkän, ənta daḡ a-s dd-ixläk.

17 Ənta a dd-əzzarän i-härät iket-net, ənta daḡ a iṭṭafän tämudre n-härät iket-net.

18 Ənta a-s eḡäf n-taḡəssa ta tämoos älkänisät, ənta a issənsän itabbän n-əddunya, ənta a dd-əzzarän tanäkra jer-inəmmuttan i-ad-wär-itiłəs tamättant, umas əmizär däḡ-härät iket-net.

19 Fäl-a-s, ijrəz i-Mässinäx, ad-izzäḡ s-a-wa ämoos iket-net däḡ-Rure-s Ȳisa.

20 Ənta a dd-ija Mässinäx əssəbab i-ad-izəmməzəl d-iman-net a-wa t-illän iket-net, jer-a-wa izzäḡän išənnawän wäla a-wa izzäḡän äkall; ašni n-Ȳisa wa inḡälän a-s ätwäşläb fäll-tajəttewt a-s əssəbab n-älxer jer-Mässinäx d-dägg-adəm-i dd-ixläk.

21 Kəwəneḡ daḡ i s-ibda, jan-kəwän erk inəzjam-nəwän d-erk imojjan-nəwän, iməjarän d-išənja n-Mässinäx,

22 äzməzäl-kəwän Mässinäx äməra-däḡ d-iman-net s-tamättant ta ija Rure-s a-s dd-ämoos ägg-adəm fäll-ärori n-äkall. A-wen, ij'-e däḡ-tössöba n-ad-tudabem tebädde data-s šäddijäm, wär kəwän-iwer älḡib wäl' iyyän, wär t-illa daḡ uḡlem kəwän-iwarän.

23 A-wen, ad-itbət afäl wär dd-tärzem däḡ-immun-nəwän, təkənəm antum däḡ-s i-ad-wär kəwän-äsnämäjjäj härät wäl' iyyän d-äṭṭäma wa kəwän-äsjarän isälan n-Älənžil wi s-təsläm; isälan-en-hi, wär t-illa ere s-wädden, isl'-asän. Näkk daḡ, Buləs, ij'-ahi Mässinäx ämaway n-isälan n-Älənžil.

Älyizabät wa ihannäy Buləs d-täbbillänt ta ija i-ad-täkk älkänisät s-data

24 Ayətma-ḡ, äməra-däḡ, äsidəwät-ahi a-wa hannäyäḡ däḡ-tersəmmawen fälla-wän ed oläh sär-i d-a-s näkk -i-däḡ a hin-isimdun älḡizabät wa hin-oḡän Älmasex; ärḡeḡ s-ahänay n-äḡana-wen-däḡ däḡ-tössöba n-älkänisät-i tämoosät taḡəssa n-Älmasex.

25 Älkänisät-en-däḡ a-s ämoosäḡ änaxdim ed, ikkəlläf-ahi Mässinäx däḡ-turhajät-net d-ad-kəwän-säḡrəḡ s-ujreh məjräd-net iket-net,

26 səlmədäḡ-kəwän s-əddäraj wa s-käla ättunkäl iwətyan fäll-iwətyan i-əddunya iket-däḡ-net məšan, ašäl-i-däḡ, äsnäfaläl-t-dd Mässinäx i-iməşseddəjan-net

27 wi äsnäfrän i-ad-tän-isəlməd s-təmyäre n-ärrezäḡ, d-älxurmät n-a-wa s-käla t-iffär i-tiwsaten iket-däḡ-nəsnät. Əddäraj-en-hi s-ašäl-i-däḡ änfaläl-dd, älmäḡna-net da: Älmasex däḡ-ülhawän-nəwän, a-di, təjjäšäm təmyäre n-ännur n-Mässinäx.

28 Älmasex-en-däḡ a-s nəxəṭṭäb isälan-net, nətakkäs hak ägg-adəm däḡ-taḡdärt, nəsaḡra hak ägg-adəm s-särho ilan ujreh i-ad-dd-nəsəbdəd hak ägg-adəm iḡrad, imda däḡ-tassaḡt-net d-Älmasex.

29 Tössöba n-a-wen-däḡ a fäl ədgaḡäḡ däḡ-älxidmət wa heḡ, äbbiillänäḡ s-tärna ta hi-ikfa Älmasex ed tärna-net a fäl äsifälläḡ däḡ-a-wa heḡ iket-net.

2

1 Ayətma-ḡ, ärheəḡ ad-təssanäm fäll-ezəwe wa ija amjär wa heḡ fälla-wän, kəwəneḡ d-käl-Ləwdisa, d-äddinät wi iyyəḡḡnen s-wär käla ənhäyän idəm-in.

² A-wa hey, hey-t fälla-sän ɔntäned-däx i-ad-ismaḏän ulhawän-näsän, tasäxäm däx-tärha s-iyyän n-ənniyät, ɔnnuflöyän däx-ärrözäx n-ännuxmät n-Mässinäx, äkf'-en musnät imdan i-ad-udaben ujreh n-əddäraj n-Mässinäx wa s-käla ättunkäl s-ašäl-i-däx änfaläl-dd älmäxna-net; a-wen a t-ämoosän Älmasex.

³ Ǝnta-en-däx a xur-dd-imdä ärrözäx wa n-särho hakd-däx tayötte.

Hewät fälšäfa ta n-bahu

⁴ A-wa, janney-awän-t i-ad-wär käwän-isəswid äwadəm wäl' iyyän s-täzude n-iləs

⁵ fäl-a-s, kud-käwän-ujəjäx däx-taxəssa-nin-däx, ärtayäx där-wän s-ənniyät-in ed tartit ta tähuusket jām jer-iman-näwän d-antum wa ija immun-näwän däx-tassaxt d-Älmasex, ij'-ahi asəddəwi wa fäl sär-i, šund xas, əlley-t xur-wän, hannäyäx-käwän.

Tihusay n-tämudre ta ikarräš äwadəm irtayän d-Ÿisa Älmasex

⁶ Ämära, ayətma-x, šämad tidət-däx a-s tärḏam s-Emäli ŸisaÄlmasex, adiš, äjät-as alkum itbatän.

⁷ Äjet alkum-näwän-has antum wa täjjän ikewän n-ahəšk däx-äkall, umaset asəxär wa təjräwäm a äsišahen immun-näwän däx-a-s täsidäwäm a-wen härkuk d-tämayit.

⁸ Agəzät iman-näwän, wär käwän-isəswadet äwadəm wäl' iyyän s-tiddas n-fälšäfa dd-ikkas däx-əxäf-net wäla s-bahutän äsihätälnen fäll-agna dd-əknan dägg-adəm i-iman-näsän, wäla s-a-wa fäll-təgl' äddunya, a-s ija a-wen, wär t-illa a osax a-wen d-Älmasex.

⁹ Wär hasän-täsjädäm. Mässinäx, a-wa ämoos, äsbayän-anäx-t-dd iket-net däx-Ÿisa Älmasex.

¹⁰ A-wen-däx a fäl, a hin-toḏänäm-däx, ill'-awän-t xur-Älmasex-i äminakälän fäll-iməşsuha d-imärnan iket-däx-näsän.

¹¹ Ǝnta-en-däx a xur-təjräwäm amili äynayän wärän oleh d-wa täjjän ifassän n-dägg-adəm, ed amili wa s-Älmasex iman-net a t-itajjän i-inəṭṭulab-net, älmäxna-net a-s, ad-təjrəwäm tärna fäll-abäkkad, təkrəšäm ašäl fäll-erk imojjan-näwän.

¹² Käwäned day i omänner s-tärna n-Mässinäx ta dd-təssənkärät Ÿisa jer-inəmmuttan, əlmədät a-s atwəsəlmax wa tätwäjjäm däx-aman, älmäxna-net a-s tohäräm där-s tamättant. Azənjäz day wa dd-jäm ḏarät alämax-näwän däx-aman, älmäxna-net a-s tohäräm d-Älmasex tanakra ta dd-ija jer-inəmmuttan i-ad-där-s tärtəyäm.

¹³ Käwäned-i s-ibda jan-käwän erk ijitän-näwän šund inəmmuttan dat-Mässinäx, äsisalähän-käwän d-inəzzulam† wären ämeläy; ašäl-i-däx, däx-idəm n-Älmasex, issənkär-käwän-dd Mässinäx däx-tamättant, ikf'-iwän tämudre täynayät; inš'-anäx näkkäned hakd käwäned ibäkkadän-nänäx.

¹⁴ Älkad wa itwärän s-ənta a fäl əktabän uḏlemän-nänäx däx-isälan n-anməšri-nänäx i-färəḏän d-alämär n-Mässinäx, omäs-t-in Ÿisa, ikkäs-t-in s-iyyät s-tärna n-atwəşləb wa ätwäjjä fäll-tajəttewt.

¹⁵ Äzzäman wa d-ämmut Ÿisa fäll-tajəttewt, ikräš tärna fäll-iməşsuha d-imärnan, ikšäf-tän dat-tiṭṭawen n-äddunya iket-net, ija iḡunan däx-errawän-näsän, iwät-tän data-s.

† 2:13 2:13 — Xur-käl-Älyähud, ere wärän ämoos ägg-Älyähud s-aläsäl mex ere wärän ilkem i-äddin-näsän, iket-net, änəzzalim a ämoos. A-wen-däx a fäl tiwsaten ti iyyädnen iket-näsät, ti n-inəzzulam. — Ašäl-i-däx, änəzzalim, äkafär (ere wärän issen s-Mässinäx).

Täbəḏdawt d-a-wa fäll-təgl' äddunya

¹⁶ A-wen-däx a fäl wär käwän-isäwaret äwadəm wäl' iyyän uḏlem däx-isälan n-a-wa tättäm wäla a-wa sässäm; däx-isälan n-ašäl n-ämudd s-wär tälkemäm, wäla däx-iba n-uḏef n-tebädde n-orän; wäla däx-isälan n-ašäl n-əssəbət-i n-täsonfat s-wär tälkemäm.

¹⁷ Härätan-win-däx iket-däx-näsän, taliwen n-a dd-imalän a ämoosän. Ämära tidət ənta tosä-dd, a tät-ämoosän, Älmasex.

¹⁸ Wär toyyem äwadəm wäl' iyyän isiləbbuḏän taḡəssa-net, älmät əmmək-wen-däx a-s isaras iman-net dat-Mässinäx, wäla i iḡabbädän änjälösän, ija däx-wän tasäja fäl-a-s innin itajj a wär təjjəm. Äddinät wi išilləw a-wen, sakafän iman-näsän, jannen s-bahu a-s a-wa tän-išlän, Mässinäx a hasän-t-dd-äsnäfalälän däx-täharjit, wär hasän-täsjadäm fäl-a-s inəzjam-näsän, wär-əglen ar fäll-a-wa fäll-təgl' äddunya.

¹⁹ Äddinät-en, wär-änmäṭṭafän d-Älmasex-i ämoosän eḡäf-wa ihakkän taḡəssa a-wa s-tämiḡatär, ənta-en-däx a-s əssəbab n-tassaḡt ta t-təllät jer-izəmmuz d-aḡarän, isadwal-tät Mässinäx s-əmmək wa s-irha.

²⁰ Šamad ämära, toharäm d-Älmasex tamättant däx-isälan n-a-wa fäll-təgl' äddunya, mafäl təyyəm dägg-adəm sawarän-käwän färəḏän wi təggarnen äddinät əglanan fäll-a-wa fäll-təgl' äddunya?

²¹ Jannen-awän: «He käwäneḏ, wär təkkeläm härät wa, i läbasän; wär täkräbbem härät-wədi, ixäramän; wär ḏesäm härät-wen, wär-oley»,

²² jannen a-wen-däx a-s ija a-wen härätän-win-däx iket-däx-näsän, wädden wäla a əndärrän ed wär t-illa a ənfan afäl išwär iks'-en äwadəm. Ḑarät-a-wen daḡ, färəḏän-win-däx, wär-ämoosän ḡas ar a saḡren dägg-adəm, wädden Mässinäx a dd-falän.

²³ Äduuttät a-s färəḏän-ənnin-däx, äniḑäqqän d-a isawaḏän särho fäll-ägg-adəm, ässiiktän-dd älyibadät dd-ifalän ulh d-asiinən n-taḡəssa d-tanhadt däx-s mäšan, wär t-illa a-s ənfan ägg-adəm irhan ad-ikrəš tärna fäll-erk derhanän wi ännihäḏnen däx-taḡəssa-net.

3

Tämudre ta täynayät tatäjrawät däx-ḡisa Älmasex

¹ Šamad tidət-däx a-s toharäm d-Älmasex tanäkra ta dd-ija jer-inəmmuttan, adiš, əmmäḡät i-a-wa hawän-itwär Mässinäx däx-išənnawän-i däx-äqqiima Älmasex, ämiinakäl daw-aḡil n-Mässinäx,

² äḡləbnet-käwän härätän-win-däx hänen išənnawän, təyyəm fälla-wän azənnuzjəm däx-wi n-äddunya.

³ Käwäneḏ, ḡur-ašäl wa d-tomänäm s-ḡisa Älmasex, tämoosäm šund äddinät ämmuutnen däx-isälan n-a-wa fäll-təgl' äddunya, tämudre ta täynayät təjrawäm, toohar d-ta n-Älmasex atunkəl ḡur-Mässinäx.

⁴ A-wen-däx a fäl ašäl wa dd-mad-infiləl Älmasex-i ämoosän tämudrenäwän, ad-där-s dd-təmzəyyim anfiləl däx-älxurmät-net.

⁵ Təssəba n-a-wen-däx a fäl däx-wän ärheḡ ad-təbḏəwäm d-erk imojjan-näwän iket-däx-näsän, əbḏəwät d-a-wa isamäḏasän tiḡəswen-näwän d-iba n-təšəḏje d-derhan dārḡalän d-derhan äsisakäyän, tärha n-härät-i wärät təzley d-älyibadät n-äššanämän.

⁶ Təssəba n-härätän-win-däx a fäl dd-izizəbbut Mässinäx äšsar-net [fäll-äddinät wi has-änimäšräyenen].

⁷ Härätän-win-däx a-s käla tän-tamašäläm käwäneḏ-däx a-s təṭṭafäm tämudre-ten-däx

8 mäšan, ämära, əbdəwät dār-sän iket-däx-näsän, wär tän-tolesäm amişel. Äyyät fälla-wän aḍkär d-tukəse n-ulh d-tälläbäst d-tizmiten, wär säfälyaxät,

9 wär tinmənnit bahu jer-iman-näwän käwäneḍ-i əbdänen d-tasna-näwän ta-däx ännihäd abäkkəḍ d-timaşalen-net,

10 ed ämära, təlsäm tasna ta täynayät-i s-Mässinäx-i n-Ämaxlak-nänäx a hawän-tät-ikfän, isaynay-tät dəx härkuk dəx-təssəba n-ad-t-təknəm muzəyät, taləhəm dār-s.

11 Däx-tasna ta-hi täynayät, wär-izley wa n-Älyunan d-wa n-ägg-Älyähud; wär-izley wa ämeläyän d-wa wärän ämeläy; wär-izley wa n-änäzzalim d-wa n-älzahil; wär-izley eläll d-akli, äbas t-illa ar Älmasex, ənta a-s härät dəx-härät iket-net.

Yaymät tinmədhiläm jer-iman-näwän

12 Şamad äddinät äsinäfrän Mässinäx a tämoosäm, ij'-iwän iməşseddöjän s-tətbət tärha ta hawän-ija, adiş, nəməddənät tähanint käwäneḍ-däx jer-iman-näwän, tənmedhəläm jer-iman-näwän, isərəset hak iyyän iman-net dat-amidi-net, ızadät jer-iman-näwän, tənmezəzəydäräm,

13 tənmeşmāräm, tənmenşəm jer-iman-näwän; ere s-ixşäd äñña-s härät-däx, änşet-as-in s-əmmək wa s-hawän-inşa Emäli.

14 Äjät jənnəj-a-wen-däx iket-net anmärh imdan jere-wän ed ənta a ddiirəwən tartit təmdat.

15 Äyyät älxfayät wa ihäkk Älmasex ad-ännähäd dəx-ulhawän-näwän ed ənta a käwän-dd-ixrän s-älxfayät-wen-däx, issärtäy-käwän i-ad-tumasäm tiyyät tağəssa, tumayät i-Mässinäx.

16 İjatet mäjräd wa n-Älmasex jere-wän s-särho, tənmeşfəm tayətte, tənmeşkəsäm dəx-taydärt s-särho imdan, tamələm Mässinäx s-ulhawän əmdanen, tumayäm-as s-təmmalen dd-əzjarnen əlkəttab wa n-Äzzäbur d-təmmalen janen fäll-tuksəḍa n-Mässinäx d-isuhay dd-oraw sār-wän Unfas Şaddijän i-ad-sār-sän tamələm Mässinäx.

17 A jännem d-a tajjäm-däx, äjät-t dəx-derhan n-ad-səməxäräm isəm n-Emäli Yisa dəx-a-s tumayäm i-Abba Mässinäx dəx-təssəba n-isəm wa n-Yisa.

Ejädäş wa n-älməssexitän

18 Tidəḍen! Sərəsmät iman-näkmät dat-meddən-näkmät s-a-wa änihäjjän ed a-wen-däx a ijrazän i-Emäli.

19 Meddən! Ärhət hak iyyän dəx-wän hänne-s, wär təssəsmämäm fälla-snät.

20 Aratän! Säjdät i-imärawän-näwän dəx-härät iket-net ed a-wen-däx a ijrazän i-Emäli.

21 Abbatän! Wär täzəkänzäräm aratän-näwän i-ad-wär fälla-wän wär-änxesän iman-näsän.

22 Eklan! Säjdät i-wi käwän-länen dəx-äddunya-ta-däx dəx-härät iket-net, wädden dihad käwän-hannäyän xas dəx-ittus n-ad-käwän-amələn, änn-ak, jer-hannäyän-käwän wäla, äknät əşşəxəl-näwän s-ulh ijlayän dəx-tuksəḍa n-Emäli.

23 Əşşəxəl häm-däx, äjät-t s-ənniyät imdan şund Emäli a-s täxdamäm wädden dagg-adəm,

24 älhäk wa s-ilkam ad-t-təjrəwäm, itwar-awän-t Emäli dəx-işənnawän. Älmasex a-s Emäli, umasät eklan-net

²⁵ fäl-a-s, ere iydärän däḡ-a-wa iha, ilkam däḡ-s ad-ijrəw älxaqq n-taydärt-net ed Mässināḡ ya, wär-izley äddinät.

4

¹ Məssaw-s n-eklan! Äjät i-eklan-nāwän a-wa olāḡän d-a-wa oḡädän däḡ-a-s təssanäm a-s käwäned-däḡ, lam Mässi-wän, iha älžännät, däḡ-išənnawän.

Infəšet Älənžil fäll-äröri n-äkall

² Təddalät Mässināḡ härkuk, əjləyät hullan däḡ-a-wen, äkfät Mässināḡ semḡar, tumayäm-as.

³ Təddalät-anāḡ-in näkkäned-däḡ i-ad-hanāḡ-ijrəw Mässināḡ tašləlt s-näxtäb i-äddinät isälan n-Älənžil, nəsefhəm-tän əddəraj n-Älmaseḡ wa hasän-ättunkälän s-ašäl-i-däḡ, änfäläl-dd älmāḡna-net ed däḡ-təssəba n-iji n-isälan-en-däḡ a fäl heḡ tišəm.

⁴ Təddalät-ah'-in Mässināḡ i-ad-xatṭäbäḡ isälan-en-däḡ s-əmmək iknan asəjrah ed a-wen-däḡ a hi-iwarän.

⁵ Iwäret-kāwän särho jer-äddinät wi n-ajäma wären əzzey ḡisaÄlmaseḡ, tašləlt tejrəwäm-däḡ, äjät-asän isälan-net; təyyəm fälla-wän a-wa wär-iha älfäyda.

⁶ E-d tazəwwabäm i-äddinät däḡ-isälan n-ḡisa Älmaseḡ, äjät-asän mäjräd əzedän, ilan temde, təlmədäm daḡ a-wa jännem i-häk əwadəm.

Tihulawen d-ajilal n-mäjräd

⁷ Däḡ-a-wa hi-dd-iqqälän näkk, isälan-nin, ad-däḡ-wän tän-äj äḡḡa-ḡ wa əkneḡ tärha Tušik. Nohar näkk häd ənta älxidmät wa hanāḡ-issäḡläf Emäli, äjjəyhäḡ a-s iḡdal däḡ-a-wa itäj iket-net.

⁸ Näkk iman-in a hawän-t-in-ässökän i-ad-hawän-äj isälan-nänāḡ, isəsmäd ulhawän-nāwän.

⁹ Äsiidäwäḡ-t-in d-Unažəm wa n-älkänisät-nāwän, äḡḡa-ḡ n-ämaydal əkneḡ tärha a ämoos ənta-däḡ. A däḡ-wän əjən isälan n-a-wa ijän dihadäḡ iket-net.

¹⁰ Ähuul-kāwän-in amidi-nin Aristarəq-i dər-oharəḡ takärmüt, ähuul-kāwän-in daḡ Marqəs wa n-ara n-meddən n-Bärnäbbas. Ənta-en-däḡ a-s äru d-kāwän-äsmätärəḡ dər-s, a-s hawän-ənneḡ, afäl kāwän-in-osa, səbbələlä-t.

¹¹ Ähuul-kāwän-in ḡisa wa itawäḡren s-isəm Istus. Meddən-wi-däḡ n-kärad ḡas däḡ-däḡg-Älyähud wi n-älmässexitän, a hi-ədhälnen a ija a-wa-däḡ däḡ-älxidmät wa heḡ i-ad-tətbət Təmmənəya n-Mässināḡ; ijmad-t äššäk a-s əknän asəsmad n-ulh-in.

¹² Ähuul-kāwän-in Ibafras wa n-änaxdim n-Älmaseḡ, ənta-däḡ, i-älkänisät tedi-däḡ-nāwän. Itajəynan härkuk dat-Mässināḡ i-ad-təbdadäm däḡ-immun, wär t-illa älḡib kāwän-iwarän i-ad-təlmədäm erhet n-Mässināḡ iket-net.

¹³ Äjjəyhäḡ i-əddəgozät wa ija däḡ-təssəba-nāwän käwäned d-käl-Läwdisa d-käl-Irabolis.

¹⁴ Ähuul-kāwän-in Luqa wa n-läxtur nəkna tärha, ähuul-kāwän-in daḡ Dimas.

¹⁵ Tähuuläm-anāḡ-in ayətma-näḡ wi hänen aḡrəm wa n-Läwdisa, tähuuläm-in daḡ Ninfa d-älkänisät ta tazəmmaxät däḡ-ehän-net.

¹⁶ Afäl ħur-wän tätwäḡra tăkarḡe-ta-däḡ, äjät ömmək fäl tätwäḡra day däḡ-älkänisät ta n-käl-Lăwdisa, tăḡröm day ta tän-dd-madät-töfel sär-wän.

¹⁷ Ännät-ahi i-Aršibb, önnex-as: «Hekäyy! Äj önniyät i-ämašal wa käy-issäḡläf Emäli, aḡəd däḡ-s.»

¹⁸ Edägg-wa-däḡ däḡ-tăkarḡe-ta-däḡ, näkk iman-in Bulös a t-iktäbän s-äfuss-in: «Näkk, Bulös, ähuuläḡ-kăwän-in.» Kittöwät-dd a-s näkk ya, takärmüt a heḡ.

Issensä fälla-wän Măssinäḡ ännuymät-net. Amin!

Täkarde ta täzzarät iktäb Buləs i-käl-Täslonika

Äšajěš

¹ A-wa näkk, Buləs, hin-iktabän näkk d-Silwan d-Timoti i-älkänisät n-Mässinäx-i n-Abba, osäx d-Emäli YisaÄlmasex hät ayrəm wa n-Täslonika. Nähuul-käwän-in, nöttar dāx-Mässināx ad-kāwän-äkf ännuymät d-älxer.

² Hak ašäl-dāx nämmoy i-Mässināx dāx-tössəba-nāwän, e-d t-nədäl-dāx, ad-hawän-t-nədəl kāwāneḍ-dāx.

Tihusay n-immun n-käl-Täslonika

³ E-d nədäl Abba-nänāx Mässināx-dāx, ad-dd-nəktəw əmmək wa s-tässixdāmäm immun-nāwän d-anmārḥ wa n-tidət jām jer-iman-nāwän d-akuyəd wa jām dāx-ätṭāma wa kāwän-äsjar Emäli-nänāx YisaÄlmasex.

⁴ Ayətma-nāx! Nəssan a-s, Mässināx, irh'iwän, äsnäfrän-kāwän i-ad-tumasām tamətṭe-net.

⁵ Isälan n-Älənžil wi kāwän-in-nässawäd, tärna n-Unfas Šaddijän a-s hawän-tän-in-nässawäd wädden s-mäjräd xas, a-wen, tənḥayäm-t kāwāneḍ iman-nāwän, nämešäl-t data-wän i-ad-kāwän-infəw s-härät.

⁶ Təttəläläm-anāx, təttəläläm dāx Emäli, wär hawän-təgdəl tizzurt ta tənḥayäm ad-täqbeläm mäjräd n-Mässināx s-tedāwit ta ihäkk Unfas Šaddijän.

⁷ A-wen-dāx fāw, a dd-orāwän ašäl-i-dāx derhan s-älməssexitän wi əzzāxnen teje ta Masidunya hakd wi əzzāxnen teje ta n-Akaya n-ad-ättälälän əntāneḍ-dāx, älxal-nāwän.

⁸ Älxidmät wa ija mäjräd n-Emäli xur-wän, ikräš mawmaw-wa-dāx fäl t-əslän wäla äddinät wi hänen teje ta n-Masidunya d-ta n-Akaya. Əssäxläyän-dd isälan n-immun-nāwän s-Mässināx äkall iket-net har äbas nämiḡatär fāw ašäl-i-dāx s-asuḡəl-näsän.

⁹ Wär t-illa ere s-wädden isixul isälan n-asəbbärrək wa hanāx-jām d-əmmək wa s-tomänäm s-Mässināx a-s täqqäläm ḍarät äššanämän i-ad-tamašäläm erhet n-Mässināx-i iddärän äddutten,

¹⁰ täqqäläm s-äššahät ämära i-uḡəl n-Yisa-i n-Rure-s n-Mässināx dd-issənkär jer-inəmmuttan dd-e-ifələn išənnawän i-ad-hanāx-iḡləs dāx-aḍkär n-Mässināx wa ilkämän.

2

Ämašal d-älxidmät n-Buləs dāx-Täslonika

¹ Ayətma-x, təssanäm kāwāneḍ iman-nāwän a-s asəbbärrək wa hanāx-jām a-s kāwän-in-nosa, wär-ämoos bännan.

² Təssanäm a-s dat-ass-nänāx-hawän, nənḥay aḡāna d-əmmädri dāx-ayrəm wa n-Fəlibb mäšan, Mässināx xas a dāx-nəjar äṭṭāma, ikf'-anāx turhajät s-hawän-näxtäb Älənžil kud-dāx wär t-illa əmmək s-wädden əttärän äddinät ad-hanāx-əgdəlän s-a-wen.

³ A-wa dār-kāwän-näsmätär wädden i n-ad-nəšənnəməšrəy äwadəm, wär t-nəja d-erk ənniyät wäla s-tikärras n-äddinät,

⁴ änn-ak, Mässinäx a hanäx-äzjazzän təzzar, issäyläf-anäx ämašal wa n-Älənžil-net-i s-däx älxuṭbät wa has-nətäjj, Mässinäx-i izajäzzen ulhawän-nänäx a-s närha ad-has-nəjräz, wädden dägg-adəm.

⁵ Mässinäx a hanäx-äjjəyhän, wädden mäjräd n-tikärras wäla-i n-utär n-tetäte n-ehäre n-iiyän däx-wän s-milḡaw n-iləs a hawän-nəja, a-wen təssanäm sär-s.

⁶ Wär nətter təmmal n-dägg-adəm jer-käwäned wäl' iyyäd säl käwäned.

⁷ Ənnär närha a-wen, näddoobät ad-käwän-nəsəlməd a-s inəmmušal n-Älmasex a nämoos, mäšan, wär hanäx-dd-ijješ ənniyät-wen-däx, änn-ak, äzzäman wa nəkkas jere-wän tärha šund ta täjj anna i-aratän-net d-asəbbələl wa hasän-täjj a käwän-nəssəkna.

⁸ Nəj'-awän tärha-ta-däx fäl näsdärhän ad-käwän-in-nəsəssiwoḍ Älənžil n-Mässinäx, nämmät daḡ däx-idäggan-näwän, kunta a-wen-däx a ihan erhet n-Mässinäx fäl təssəba n-təmxäre n-tärha-i-däx hawän-nəja.

⁹ Ayətma, əktəwät-dd əşşuhu n-älxidmät d-tiluyyaḡ ti nənhäy jere-wän a-s hawän-nəxaṭṭäb Älənžil n-Mässinäx, ehäd d-ašäl näxdam s-ifassän-nänäx i-ad-wär nətumas äzuk i-wäl' iyyän däx-wän.

¹⁰ A-wen, täjjəyhäm-as, äjjəyh'-as daḡ Mässinäx. A-s t-nəlla ḡur-wän, nəṭṭäf jere-wän tämudre ta täjjän imumənän šäddijnen, tämudre toxadät, wär t-illa älyib fäw hanäx-iwarän.

¹¹ Təssanäm a-s hak iyyän däx-wän-däx, nəj'-as šund a-wa mad-äj abba i-məddana-s.

¹² Hak ašäl, nəsamätar-käwän i-ad-təkuyədäm, tətṭəfäm tämudre täniihäjjät d-teḡäre ta käwän-dd-ija Emäli s-iman-net i-ad-där-s tärtəyäm däx-Təmmənəya-net d-älxurmät-net.

Älənžil, tidət-däx a-s mäjräd n-Mässinäx

¹³ Nämmoy i-Mässinäx, nämmoy-as daḡ hak ašäl ed ḡur-ašäl-i-däx käwän-in-nəssawäd mäjräd-net, taqbaläm-t, wär t-jem mäjräd dd-ifalän dägg-adəm, änn-ak, jäm-t mäjräd n-Mässinäx iman-net, a-wen-däx daḡ a ämoos ed ixdam s-äşşahät däx-ulhawän-näwän käwäned-i sär-s omännen ašäl-i-däx.

Isälan n-älyizabät

¹⁴ Ayətma, a-wa irmäsän älkänisäten n-Mässinäx ti hänen teje ta n-Älyähudəyät osäḡnen d-ḡisaÄlmasex a käwän-irmäsän käwäned-däx ed käwäned-däx, äqquzäben-käwän käl-äkall-näwän s-əmmək wa s-əntäned-däx, äqquzäben-tän käl-Älyähud.

¹⁵ Käl-Älyähud, əntäned a änyänen ännäbitän s-tizarät, änyän daḡ Emäli ḡisa, ašäl-i, näkkäned a tiḡəzzəbun, änimäšräyän i-Mässinäx, wär t-illa daḡ ere s-wädden äşşunjen-t,

¹⁶ gaddälän-anäx ad-näj i-inəzzulam† isälan i-ad-tän-iḡləs Mässinäx, okäyän ibäkkadän-näsän ämaku. İlkam ad-dd-izəzzəbbət Mässinäx aḡkär-net fälla-sän.

Äzuy Buləs i-käl-Täslonika

¹⁷ Ayətma, tidət, ibd'-anäx ässaḡät, tujəjäm tiṭṭawen-nänäx mäšan, ham ulhawän-nänäx. Wär t-illa a-wa-däx wär nəja i-ad-käwän-naləs ahänay ed naqq'-anäx tenere-näwän.

† 2:16 2:16 — ḡur-käl-Älyähud, ere wärän ämoos ägg-Älyähud s-aläsäl meḡ ere wärän ilkem i-äddin-näsän, iket-net, änəzzalim a ämoos. A-wen-däx a fäl tiwsaten ti iyyädnen iket-näsnät, ti n-inəzzulam. — Ašäl-i-däx, änəzzalim, äkafär (ere wärän issen s-Mässinäx).

18 Nəttär a-wa-däx he-näj näkk'-iwän-in; näkk Buləs, har əssin ihändäggan, tattäräx ad-käwän-in-äkkäx mäšan, igdäl-anäx Iblis s-a-wen.

19 Şamad isälan-den-däx, əndek ättäma-nänäx? Əndek əssəbab n-tedäwit-nänäx? Əndek abäraj-nänäx? Käwäned a hanäx-əmoosän a-wen-däx iket-net ašäl wa dd-mad-iqqəl Emäli-nänäx Yisa.

20 Tidət-däx a-s käwäned a-s abäraj-nänäx, käwäned a-s əssəbab n-tedäwit-nänäx.

3

Aşəmmişəl wa ija Buləs Timoti s-Täslonika

1 Ayətma, təndär-anäx taçimit wäla isälan-näwän, a-wen-däx a fäl nässof ad-näqqayəm näkkäned däx-ayrəm wa n-Atinya,

2 nəşəmmişəl-in sār-wän äŋŋa-näx Timoti-i dār-nohār älxidmət-nänäx i-Mässinäx däx-isälan n-asəssiwəd n-Älənzil n-Älmasex i-ad-käwän-isəşşuhət däx-immun-näwän, isəsməd ulhawän-näwän.

3 Wār-itəggädet älyizabät wa hannäyäm ašäl-i-däx d-ənniyät n-wäl' iyyän däx-wän, isinhəynəhəy immun-näwän, təssanäm a-s älyizabät iha a-wa s-hanäx-dd-içra Mässinäx s-iman-net, nəjet fälla-s.

4 Äzzāman wa nəkkäs çur-wän, nəkkäs-käwän däx-taydärt n-a-s ad-näqquzzəbät s-işəkkelän n-tersəmmawen äjjootnen. Mäjräd-wen-däx hawän-nəja, itbät, ənta-da-däx hannäyäm ija ašäl-i-däx.

5 Indär-ahi ad-ähajäx əşbaräx iba n-isälan-näwän ças, äşmaşäläx-in sār-wän Timoti i-ad-hi-dd-ilməd isälan n-immun-näwän ed, ässiirmäx-ahi hullan a-s ämmukkän, äžžurräb-käwän Iblis däx-utär n-asəbbuṭṭəl n-älxidmət wa äşsohen nəja çur-wän.

Äsdäwen isälan n-käl-Täslonika Buləs

6 Ässiilmädäx-käwän a-s Timoti iket hi-dd-osa, ifal-käwän-dd, ija däx-näx isälan n-älxer n-a-wa dār-ogdäh immun d-anmärh wa jām jer-iman-näwän. İlläyät-anäx daç a-s wār hanäx-təkyedäm ed tenere-näwän ta hanäx-tärmäsät, tärmas-käwän käwäned-däx.

7 Ärheex ayətma-ç, ad-hawän-älläxex a-s isälan-näwän-win-däx s-nəslä, äsdätten-anäx immun-näwän, əmoos-anäx a-wen a ässismädän tirəmmaç d-tersəmmawen ti hanäx-ärmäsnen.

8 Ämāra-däx, wār-izley d-a-s nofray i-iman-nänäx, nakkärän-dd däx-tamättant ed nəslä, a-s həlām iman-näwän däx-alkum-näwän i-Emäli.

9 Əndek ças təmçäre n-təmayit ta s-näddobät ad-tät-näj i-Mässinäx i-ad-tagdäh d-tedäwit-i-däx nəja a-s nəsla isälan-n-immun-näwän?

10 A-wen-däx a fäl, ehäd d-ašäl, nətajäynan dat-Mässinäx i-ad-hanäx-äkf turhajät n-ad-käwän-naləs ahänay i-ad-sār-wän-in nəşəmdəw a-wa hin-sär immun-näwän.

Derhan n-Buləs i-käl-Täslonika

11 Daläx Mässinäx-i n-Abba-nänäx, daläx-t ənta d-Emäli-nänäx Yisa däx-ad-hanäx-isəfrär tabarät s-käwän-in-nəkka,

12 daläx-t i-ad-isiwäd tärha jer-iman-näwän, isənnəfləy ulhawän-näwän däx-tärha n-e d t-illām ägg-adəm, tagdäh tärha-näwän d-ta hawän-nəja,

13 işşuhət immun-näwän, işdajän ulhawän-näwän, ifəl-käwän e d t-illām udlem dat-Abba-nänäx Mässinäx ašäl wa dd-mad-iqqəl Emäli-nänäx Yisa Älmasex, äddeew d-iməşşeddəjän-net iket-däx-näsän. [Amin.]

4

Uđəf n-tämudre dāx-tännihəđ təšədje

¹ Darät-a-wen daḡ, ayətma, nəttar dāx-wän, näsimätär-kāwän dāx-idəm n-Emäli ʒisa d-ad-təttəfäm tämudre təjrazät i-Mässināḡ, nəssəlmäd-kāwän taḡārha n-tämudre-ten-dāḡ, nəjrah-in a-s tamašalām a-wa kāwän-nəssāḡra māšan, nārha dāx-wän, ad-siwəđäm härwa dāx-a-wen.

² Isəmməterän wi sār-nāḡ dd-fälnen Emäli ʒisa Älmaseḡ kāwän-in-nässawəd, təssanäm-tän.

³ Erhet n-Mässināḡ a t-ämoosän, ad-təhələm s-data dāx-təšədje, təbđəwäm d-e d t-illäm a kāwän-isaməđasän.

⁴ Hak äwadəm-dāḡ, təgdähet-as hänner-s, təttəfäm tämudre təjrazät, tässimḡärät Mässināḡ.

⁵ Wār toyym erk derhanän əlwayän-kāwän, šinməšrəyän-kāwän šund a-wa täjjan inəzzulam†-i wären əzzey Mässināḡ,

⁶ wār-itäkərraset wäl' iyyän dāx-wän amidi-net, wār-idällämet wäl' iyyän dāx-wän äḡḡa-s dāx-isälan əkkanen hänner-s wäla əkkanen adubən-net. Äru d-hawän-nənnä, noläs-t, a-s ere itajjan a-wen, ilmədet a-s ilkam ad-dāḡ-s dd-ikkəs Emäli älxaqq-net.

⁷ Mässināḡ, wār hanāḡ-dd-iḡra s-iman-net i-ad-nəsaməđas tiḡəswen-nänāḡ, änn-ak, i-ad-nəttəf tämudre dāx-tännihəđ təšədje.

⁸ A-wen-dāḡ a fäl ere unjāyän s-asjəd i-isəmməterän-wi-dāḡ, wädden ägg-adəm a-s unjāy s-asjəd-has, Mässināḡ-i kāwän-ihakkän Unfas Šaddijän-net daḡ a-s unjāy s-asjəd-has.

⁹ Ämāra ayətma-ḡ, dāḡ-isälan wi n-anmärh jer-iman-nāwän, wār tämḡatāräm s-ere hawän-in-iktäbän i-ad-kāwän-isəmmətär d-a-wen ed, Mässināḡ iman-net a kāwän-isəlmädän anmärh jer-iman-nāwän.

¹⁰ Äduuttät daḡ a-s tārha-ten-dāḡ təttəfäm, təssəknäm-tät i-e d t-illäm älməssexi izzāyän teje ta n-Masidunya māšan, hək d a-wen-dāḡ, nəttar dāx-wän ad-siwəđäm fälla-s härwa.

¹¹ Əjləyät dāḡ-tārha n-täməzzuḡt dāḡ-älxer, əjjəšät əššāḡəl-nāwän, äxdəmät s-ifassän-nāwän, äyyät fälla-wän sendad, ənta-den-dāḡ a-wa dār-kāwän-näsimätär

¹² i-ad-təttəfäm älخال ässimḡärän äddinät wi n-ajāma wären ämoos älməssexitän i-ad-äbas tämoosäm äzük i-äwadəm wäl' iyyän.

Isälan n-tanäkra jer-inəmmuttan

¹³ Ayətma! Wār nārha ad-təžhaläm dāḡ-isälan n-ayətma-nāḡ dāḡ-äddin wi s-ašäl-i-dāḡ, han eđəs wa n-iba, wār ḡäššədnet iman-nāwän šund a-wa jän wi n-äddinät wi iyyäđnen s-wār dd-ixlek ättäma dāḡ-Mässināḡ.

¹⁴ Kunta nəflas a-s ʒisa, äba-t māšan, inkär-dd jer-inəmmuttan, adiš, nəfləset daḡ a-s ilkam ad-dd-isənkär Mässināḡ jer-inəmmuttan imumənän wi äba i-ad-əmələn edes-has.

¹⁵ Ämāra, dāḡ-isälan-win-dāḡ, edāwänne wa hanāḡ-ija Emäli, ənta a hawän-nəsiḡul: ätwänn'-anāḡ a-s näkkäneđ-i dd-mad-agəz uḡəl n-Emäli nəddar, wār mad-nəšwār äddinät wi hānen eđəs wa n-iba ahānay-net,

¹⁶ änn-ak, ašäl-en, ad-isiwəl Emäli s-afälla təzzar, ilkəm-as eməsli n-ämānokäl n-änjələsän, təwət đara-s täsinsāḡt ta n-Mässināḡ, ifəl-dd Emäli

† 4:5 4:5 — ʒur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änəzzalim a ämoos. A-wen-dāḡ a fäl tiwsaten ti iyyäđnen iket-näsän, ti n-inəzzulam. — Ašäl-i-dāḡ, änəzzalim, äkafär (ere wärän issen s-Mässināḡ).

Yisa iman-net älwäqq-wen isənnawän, ənkärän-dd ya äddinät wi s-a-s tän-äba-däx omanän s-Älmasex,

¹⁷ darät-a-wen, näkkäneḍ-i dd-ogəz älwäqq-wen-däx nəddar, ad-där-sän nahär aməḍkəl fäll-tijäräken s-isənnawän, nəlkəḍ i-Emäli iket-nänäx, närtəy dər-s dihen härkuk.

¹⁸ Isəsməḍet hak iyyän däx-wän ulh n-amidi-net s-isälan-wi-däx.

5

Isälan n-uyəl n-Emäli Yisa

¹ Ayətma, ämära, däx-isälan n-äzzäman wäla älwäqq wa d-mad-äj a-wen, wär tämḡatäräm s-ad-hawän-in-iktəb äwadəm däx-isälan-win-däx;

² təssanäm käwäneḍ iman-näwän a-s ašäl wa dd-itaqqäl Emäli, ad-dd-iḍəw fäll-äddinät s-əmmək wa s-dd-itidəw emäkräḍ fäll-äwadəm s-tišrayät n-ehäḍ.

³ Ad-äqqiimän äddinät jannen: «Älyafyät ija, xayy, täzude n-tämudre, wär fälla-näx ija härät», har fälla-sän dd-iḍəw älmäššibät ijan armuḍ ässuksäḍän, olähän d-ejädäl wa dd-täjj tizzurt fäll-tamäḍt lat ənniyät, wär däx-sän dd-e-iḡləs äwadəm.

⁴ Ayətma, käwäneḍ, wär käwän-iha ere ihan tihay har fälla-wän dd-iḍəw ašäl-en šund emäkräḍ,

⁵ dägg-ännur wädden dägg-ehäḍ wäla dägg-tihay a tämoosäm, wär t-illa a iffarän däx-a-wa täjjäm.

⁶ A-wen-däx a fäl wär hanäx-irämmäset eḍəs šund äddinät wi iyyäḍnen, näjet ənniyät, nəṭṭəfet älxal däx-härät iket-net.

⁷ Äddinät wi taṭṭäsnen, s-ehäḍ a-s taṭṭäsän, wi sassänen asməḍ, itakkäs däx-sän ənniyät, ehäḍ a-s tajjän a-wen,

⁸ näkkäneḍ, dägg-ännur a nämoos, nəṭṭəfet älxal däx-härät iket-net, umaset-anäx immun d-tärha šund aḡärh ilsan taḡəssa-nänäx, umaset-anäx əlḡəllas wa s-nəjār äṭṭäma-net šund takənbut n-täzoli tigəzät eḡäf n-äwadəm däx-tisäwaten

⁹ fäl-a-s Mässinäx, wär hanäx-äsnäfrän i-temse, änn-ak, äsnäfrän-anäx, i-ad-hanäx-ijrəw əlḡəllas däx-idəm n-Emäli-nänäx YisaÄlmasex.

¹⁰ Däx-təssəba n-a-wen-däx a fäl ämmut Yisa Älmasex däx-idäggan-nänäx i-ad-där-s nahär tämudre jer-nämmut wäla nəddar.

¹¹ Yas, hak iyyän däx-wän däx, isəsməḍet ulh n-amidi-net, tənmedhəläm jer-iman-näwän s-əmmək-wədi-däx s-käwän-išla a-wen ämära-däx.

Isəmməterän d-ajilal n-mäjräd

¹² Darät-a-wen, ayətma, imizärän wi käwän-ikfa Emäli, tiləyyoḡnen däx-asənnəmhəl-näwän däx-tabarät-net, əssənät däx-sän,

¹³ äkfät-tän semḡar d-tärha däx-təssəba n-a-wa äxdämän jere-wän; iməlet älxer jere-wän.

¹⁴ Ayətma, näsmätär-käwän d-ad-täḡtəläm äddinät wi ämišäršärnen wären ərha älxidmət s-äššahät-näsän, səkkuyəḍät wi ha tasäja, ədhələt wi lämməḍnen, zəzzidärät fäll-äddinät iket-näsän.

¹⁵ Äjät ənniyät i-iman-näwän; wär zəläm təlläbäst s-təlläbäst, änn-ak, asəsät härkuk däx-amišəl n-a-wa oləḡän jer-jere-wän käwäneḍ wäla jere-wän d-äddinät wi iyyäḍnen.

¹⁶ Däwätät härkuk,

¹⁷ ädələt Mässinäx härkuk,

¹⁸ umayät i-Mässinäḡ dāḡ-härät iket-net, ənta-den-dāḡ a-wa fälla-wän irha Mässinäḡ dāḡ-tassaxt-nāwän d-ḢisaĀlmasex.

¹⁹ Wār təktelām ālxidmät n-Unfas Šaddijän dāḡ-ulhawän-nāwän,

²⁰ wār täsfättem daḡ a-wa hawän-jannen äddinät wi ikfa Mässinäḡ mājrad-net i-ad-hawän-t-in-səssiweḡän,

²¹ äknät azəjjəzz n-a-wa hawän-jannen iket-net, tətəfäm dāḡ-s a-wa olāḡän, təšləyäm i-bahu,

²² udayät i-a-wa läbasän, a ämoos-dāḡ.

Tihulawen n-Buləs

²³ Mässinäḡ-i n-Mässi-s n-älxer iman-net a dalāḡ i-ad-kāwän-išəšdəj təmdam, əttarāḡ dāḡ-s ad-agəz ənniyät-nāwän d-iman-nāwän d-tiḡəswen-nāwän i-ad-wār kāwän-itəwwer uḡlem wäl' iyyän har ašäl wa dd-mad-iqqəl Emäli-nänāḡ ḢisaĀlmasex.

²⁴ Mässinäḡ-i kāwän-dd-iḡrān s-iman-net, oḡad, ənta daḡ a kāwän-e-agəzän dāḡ-e d t-illām äššar.

²⁵ Ayətma, ädələt-anāḡ-in Mässinäḡ näkkäneḡ-dāḡ.

²⁶ Nəməjjät jer-iman-nāwän isofan janen s-tārha təmdat.

²⁷ Əttarāḡ dāḡ-wän dāḡ-idəm n-Emäli, ad-tāḡrəm tākarḡe-ta-dāḡ i-ayətma dāḡ-äddin iket-dāḡ-näsän.

²⁸ Ikf'-iwän Emäli-nänāḡ ḢisaĀlmasex ännuḡmät-net. Amin!

Täkarđe ta s-sänatät iktäb Bulös i-käl- Täslonika

Äšqješ

¹ A-wa näkk, Bulös, hin-iktabän näkk d-Silwan d-Timoti i-älkänisät n-Mässinäx-i n-Abba-nänäx d-Emäli YisaÄlmasex ta häť ayrəm wa n-Täslonika.

² Nähuul-käwän-in, nöttar dāx-Mässinäx-i n-Abba-nänäx d-Emäli Yisa Älmasex ad-käwän-äkf ännuymät d-älxer.

Äššäreya wa ilkämän afäl dd-iqqäl Älmasex

³ Ayətma, hak ašäl nämmoy i-Mässinäx dāx-tössəba-näwän, äniihäjjä a-wen ed itəhhal immun-näwän s-data, tiwwađ dađ tārha ta tänimäjjäm jer-iman-näwän.

⁴ A-wen-dāx a dd-orāwän a-s wär t-təlla älkänisät n-Mässinäx s-wädden nətəbərəj-as dāx-isälan-näwän, ed kud-dāx, wär t-illa älyizabät wäla talxa wär tənheyäm, təšbäräm, wär-ifnež a-wen wäla a əndärrän dāx-akuyəd-näwän wäla immun-näwän.

⁵ Hakd a-wen-dāx, ayətma-x, a-wa käwän-irmäsän a ämoos-dāx, asəddəttu xas a ämoos n-a-s ilkam ašäl dāx-mad-išräx Mässinäx s-iqqud. Älyizabät käwän-irmäsän-dāx, wär-ämoos xas, ar a käwän-isininhöjjin d-ujəš n-Təmmənəya n-Mässinäx ed Təmmənəya-net a fäl hannäyäm a-wa hannäyäm.

⁶ Itbat a-s Mässinäx-i oxadän, wär-e äyy ere käwän-itaxəzzäben ässunfa, ässilkäm dāx-s.

⁷ Ilkam ad-käwän-äkf täsonfat, käwäned-i hannäyən älyizabät ašäl-i-dāx, äkf'-anäx-tät näkkäned-dāx ašäl wa dd-e-infiləl Emäli Yisa ifal-dd išənnawän, äddeew d-änjälösän wi n-iməşsuha.

⁸ Ad-dd-iqqəl dāx-ammäs n-efew ähijäljälän, išəj eya dāx-äddinät wi has-äşärnen ulhawän-näsän, unjäyən ämişəl n-a-wa innä Älənzil n-Emäli-nänäx Yisa.

⁹ Äddinät-en, təlcam dāx-sän tisanť səmmät d-teräzze täxlalät jat dāx-anməjjaj d-Emäli d-tärna n-älxurmät-net. Wär dāx-sän ilkem ad-tənhayän.

¹⁰ Ašäl-en dd-mad-ass Emäli, ad-səmyärän iməşseddəjän wi sār-s omännen älxurmät-net ed äsidäwät-tän ass-net. Käwäned, äddinät-en, ham-tän ed tomänäm s-isälan wi hawän-näxtäb.

¹¹ Ayətma, a-wen-dāx dađ a fäl hawän-nətattär s-Mässinäx hak ašäl, nətattär dāx-s ad-täqqayməm təttafäm tabarät ta dāx-käwän-ija, tənhöjj tämudre-näwän d-teşäre ta käwän-dd-ija Mässinäx s-iman-net, idhəl-käwän s-tärna-net i-ad-tamaşäläm a-wa oläxän iket-dāx-net, umas immun-näwän, immun ih' älfäyda.

¹² Emmək-wen-dāx a dāx-mad-itwəsəmyär Emäli-nänäx Yisa dāx-tämudre-näwän, təkrašäm idəm data-s dāx-ännuymät n-Mässinäx d-Emäli-nänäx YisaÄlmasex.

2

Isälan n-uxəl n-Yisa Älmasex

¹ Ayətma, hakd a-wen-däx ämära, däx-isälan n-uḡəl n-Emäli-nänäx ḡisa Älmasex d-ažəmmäx wa s-ilkam ad-t-nənməjj dār-s, nənn'-awän:

² tazidert, wār-itäggädət äwadəm wäl' iyyän d-ənniyät-näwän, wār säryasät i-äwadəm wäl' iyyän aḡāšad n-iman-näwän s-a has-dd-änifalälän wäla s-a nənna wäla s-täkarde hawän-in-nəktab däx-nənna a-s ašäl n-uḡəl n-Emäli äru dd-osa.

³ Wār käwän-isäswwadət äwadəm s-wäla a əndärrän fäl-a-s ašäl wa n-uḡəl n-Emäli, iket-di d-itäjj, ad-irməs iba n-äddin ässuksäđän äddinät äjjootnen təzzar ass-dd u-tanməšrayt wa s-itawänna Äddäžžal† he-ihlək Mässinäx.

⁴ İnta-en-däx a-s ämakšar n-e d t-illäm a ititwäxbidän. Däx-tanməšrayt-net, ad-igləw har äqqayəm däx-ehän n-ämudd wa mäqqārän, isigdäh iman-net d-Mässinäx.

⁵ Ajän tətəwäm-in a-wa hawän-ənnex a-s t-ölley ḡur-wän.

⁶ Təssanäm a-wa t-in-iṭṭafän, a ikkäs daḡ wār dd-äwweđ ašäl-net, wār dd-e-ass.

⁷ Təmxäre n-əddäraj n-iba n-äddin-net ixdam däx-äddunya-ta-däx, afäl has-dd-təssəlwas tärna ta t-in-təṭṭafät fälla-näx, ad-dd-infiləl a-wa t-išlän, os'-iwän fäw.

⁸ Afäl dd-osa anämäšray-wen-däx, ad-has-dd-ilkəm Emäli ḡisa-i t-in-e-isähəđän s-tärna-net, ikkəs däx-s älfäyda iket-net s-tiyyät tashäđt n-emmet-net.

⁹ Ähaləs wa t-illän dərät-a-wen-däx, ad-t-äkf Iblis tärna s-mad-itajj ijitän ässuksäđnen, tikunen d-tišušab s-issəswwad tamətte,

¹⁰ wār t-təlla təlläbäst d-iba n-iqqud s-wädden ad-t-äj i-ad-isəswwəd äddinät wi hānen tabarät n-tanməšrayt s-əlhəllak ḡas a hasän-iqqalän, äšyārän ulhawän-näsän i-tidət ta lät s-ad-tän-täyləs.

¹¹ Däx-təssəba n-a-wen-däx, a fäl hasän-išläy Mässinäx, oyy'-en ođän däx-a-wa tän-itakärrasän, išinməšrəy-tän.

¹² İlkam ad-ənmənhəyän d-äššäreḡa ed ässofän bahu tidət, ässofän färräx, iqqud.

Təmayit d-tittar

¹³ Ayətma-ḡ, iwar-anäx hak ašäl ad-numay i-Mässinäx däx-təssəba-näwän. Emäli iman-net a käwän-issəlmädän s-tārha-net, äsnäfrän-käwän Mässinäx, iḡläs-käwän s-tärna n-Unfas Šäddijän, iššəšdäj-käwän i-ad-tumasäm tamətte-net ed tomänäm s-tidət.

¹⁴ İyr'-iwän-dd s-iman-net i-ad-təsləm i-Älənžil wa hawän-näxtäb, təjrəwäm ejädär-näwän däx-älxurmät n-Emäli-nänäx ḡisaÄlmasex.

¹⁵ Ayətma! A-wen-däx a fäl əkfärät i-Iblis, äknät uđəf n-älḡadatän wi käwän-nəssäḡra s-imawän-nänäx hakd-däx s-tikarđiwen ti hawän-in-nəktab.

¹⁶ Emäli-nänäx ḡisa Älmasex hakd-däx Mässinäx-i n-Abba-nänäx, tətbat tārha-näsän hanäx, əntāneđ a hanäx-əkfanen däx-ännuḡmät-näsän turhajät n-ad-näkk s-data, nəhləyləy härkuk däx-ätṭäma ädduuten.

¹⁷ Nəttar däx-Mässinäx ad-iđnəy ulhawän-näwän tārha n-tikawt n-s-data, ija däx-wän älbāraka n-ad-tamašaläm a-wa oläḡän däx-ijitän-näwän hakd-däx däx-mäjräd-näwän.

3

Derhanän n-Buləs i-käl-Täslonika

† 2:3 2:3 Ämakšar, ašänjo d-eməkkənəs n-Älmasex.

¹ Ayətma, tasämdot n-mäjräd-nänäx da: təddalät-anäx-in Mässinäx i-ad-ihəl mäjräd n-Emäli s-data šik dəx-idägğan iket-näsän, səmyxärän äddinät mäjräd-en s-əmmək wa s-t-tässimxäräm kəwäned.

² Ädölät-anäx-in Mässinäx i-ad-hanäx-ixləs dəx-erk imojjan n-erk äddinät d-inälläbäsän ed wädden äddinät iket-näsän a əttafnen immun.

³ Emäli, oxad, ənta-en-dəx a kəwän-e-isəşsuhun dəx-immun-nəwän, agəz-kəwän dəx-Iblis-i n-Anämsod.

⁴ Emäli a ih' ättäma-nänäx dəx-isälan-nəwän, nəkkas äššäk a-s a-wa dər-kəwän-nəsmätär, təttafäm-t, ad-t-təknəm dəx uđəf.

⁵ Ij'-iwän Emäli dəx-tabarät, ässewəđ Mässinäx tärha-net dəx-ulhawän-nəwän, ija dəx-wän akuyəd dəx-tazidert šund ta hət Älmasex.

Äxdəmät, äyyät fälla-wän sendad

⁶ Ayətma, näsimätär-kəwän hullan dəx-isəm n-Emäli-nänäx YisaÄlmasex i-ad-sənnəməjjəjam iman-nəwän d-ere ijannen ənta əññawän dəx-äddin, a-s ija a-wen, unjay s-ad-ittef əlxadatän wi kəwän-nəssäxra, unjay s-älxidmət s-ifassän-net, tämišäršär tāmudre-net.

⁷ Tāmudre ta tättälälät a-wa kəwän-nəssäxra, təssanäm-tät; təssanäm a-s, a-s t-nəlla jere-wän, wär hanäx-təzzeyäm d-a-wärän oyed.

⁸ Wär t-illa ere s-nəkša əsink-net bännan, ehəd d-ašäl näxdam s-əşšahät-nänäx, tidət, nälluyyax məšan, wär t-illa fəw ere s-nəmoos əzuk.

⁹ A-wen, nəj'-e, wädden i n-a-s innin wär-ənhäjjä d-ad-näks isinkawän-nəwän məšan, nəssof ad-wär nəja a-wen, i-ad-hanäx-tättäläläm kəwäned-dəx, təlmədäm a-s älxidmət, a iwarän hak ägg-adəm.

¹⁰ Äzzäman wa nəkkäs jere-wän, nəkna azəzzəwi fälla-wän tənna n-a-s: «Äwadəm wa wärän irha ad-ixdəm, adiš, wär-itättet.»

¹¹ Kəwäned, nəsla a-s han-kəwän äddinät əmišäršärnen wären ərha ad-äxdəmän, tajjäsän isälan wären tän-dd-äqqel.

¹² Äddinät-en, närha ad-nəsəmmäqq fälla-sän, nəsəmmətär-tän: nəj'-asän isəm n-Emäli YisaÄlmasex idəm n-ad-äxdəmän s-əşšahät-näsän, əyyənet sendad i-ad-udaben uđəf n-tāmudre n-iman-näsän.

¹³ Kəwäned-i n-ayətma-x, wär kəwän-isälədaşet əmişəl n-a-wa oläxän.

¹⁴ Isəmməterän wi hawän-nətəjj dəx-təkarde-ta-dəx, ere sār-sän unjayän, əzzəyät-t, širəšäm fälla-s i-ad-ikrukäd,

¹⁵ wär t-jem ašanjo-nəwän, səmmäqqät fälla-s šund əññawän.

Tittar d-tihulawen

¹⁶ İkf'-iwän Emäli-i n-Mässi-s n-älxer, älxer s-əjut hak əssağät, idhəl-kəwän Emäli iket-dəx-nəwän.

¹⁷ Tihulawen-ti-dəx, näkk iman-in, Buləs a hawän-tänät-in-iktäbän s-äfuss-in; ešwäl-in dəx, dəx-tikardiwən-in iket-dəx-nəsnät da-dəx.

¹⁸ Ähuuläx-kəwän-in, ətтарəx dəx-Emäli-nänäx YisaÄlmasex ad-kəwän-äkf ännuxmət iket-dəx-nəwän. Amin!

Tăkarde ta tăzzarăt iktăb Buləs i-Timoti

Ăşajəş

¹ A-wa năkk, Buləs, wa s-omăr Măssinăx-i n-Ămaylas-nănăx d-ŶisaĂlmasex-i iha ättăma-nănăx, tumast n-anămmaşul-net.

² Ähuulăx-kăy-in Timoti kăyy-i n-rure-x wa n-tidət dăx-immun.

Ikf'-ik Măssinăx-i n-Abba-nănăx d-Emăli-nănăx Ŷisa Ălmasex ännuymăt, tărha d-ălxer.

Agəzăt iman-năwăn dăx-inămăşrayăn

³ Timoti, a-s kăy-fălăx, əkkex teje ta n-Masidunya, əsmätärăx-kăy d-ad-tăqqayməd dăx-aşrəm wa n-İfăsus, səmməqqəd fäll-ăddinăt wi t-hänen saşranen tijəttewen animăşrayən i-tidət ta tădduttet,

⁴ i-ad əyyən fälla-săn tinfusen ti n-ibda wăren ənfa hărăt d-tamădaşt dăx-ättarexăn n-imşarăn wăren dd-itirəw ar təşəjrət n-măjrad. Wăr t-illa a dd-isayşal a-wen-dăx dăx-amışəl n-erhet n-Măssinăx wăla dăx-ehel n-s-data dăx-immun.

⁵ Dăx-a-wa s-kăy-omărăx, ənnex-ak, əttəfnət äddinăt jer-iman-năsən tărha təmdat d-ad-wăr t-illa a dăx-əşşakăn iman-năsən d-immun wăr ha təlmənuşəya.

⁶ Hărătən-win-dăx, əşləyăn-asən äddinăt äjjootnen, əşşəşkăn iman-năsən s-taxxalen.

⁷ Äddinăt-en, ərhan tumast n-ălyulam n-alămăr wa n-ännăbi Mosa, a-s ija a-wen, a-wa jănnen s-şur-săn ija a-s wăr t-illa ere hasən-t-øjărăn musnăt, hakd-dăx a-wa săşren äddinăt, wăr t-illa a dăx-s əjrahăn əntăneđ iman-năsən.

⁸ Alămăr wa n-Mosa, wăr t-ijrew hărăt, olax iket-net afəl t-itamaşal əwadəm s-ălmăşna.

⁹ Nəssan a-s alămăr, a əmoos-dăx, wăr dd-əzzubbăt i-ăddinăt oşadnen, änn-ak, osă-dd i-inăllăbăsən d-iməffelləgăn d-ăddinăt wi wăren äddiin d-inăşbăkkadăn d-inămăşrayăn d-ikufar d-imăjjan n-iman n-imărawăn-năsən d-imăjjan n-iman n-ăddinăt

¹⁰ d-wi samăđasnen tişəswen-năsən d-meddən wi tajjănen meddən tiđeden, d-wi hin-şanşanen äddinăt d-inəşbuha d-imărşan n-ărkăwăl d-e d t-illăm ägg-adəm animăşrayăn i-tijəttewen n-teşəre ta n-tidət tădduttet təjrăwăm, əntăneđ-den-dăx äddinăt wi s-dd-əzzăbbăt Măssinăx alămăr-net.

¹¹ Teşəre-en-hi, isălan n-Ălənşil-wi hi-issăşlăf Măssinăx a ha. Ēnta-enedăx daş a hanăş-itajjăn isălan n-ălxer d-tănoflayt ta hanăş-t-təllăt şur-Măssinăx-i n-Măssi-s n-ălxurmăt.

Tămayit n-Buləs i-Măssinăx

¹² Ämmoyăş i-Emăli-nănăx ŶisaĂlmasex ənta-i hi-ikfăn əşşahăt wa s-əşyatărăş, iflăs-ahi i-ad-hin-səşsiwəđăş əmaşal wa dăr-hi-ăşnăhăjja,

¹³ wăr hi-ittef eşa n-a-wa s-kăla əmoosăş akafăr d-ălmuşăzzăb n-enăllăbăs s-ăkkus aşni-net măşan, tătwađăn-ahi tăhanint ed a-wa əmeşălăş, əlşăhalăt d-tăşart n-ulh a dăx-t-əmeşălăş.

¹⁴ A-wen iket-net, ojar-t sār-i ānuymāt wa māqqārān fäll-i issensā Emāli-nānāḡ, āsnāflāy-ahi dāḡ-immun d-tārha ta dd-tirəw tassayt d-Ḡisa Ālmasex.

¹⁵ A-wa mājrād itbatān s-ānihājja ad-sār-s iqbəl e d t-illām āgg-adəm: Ḡisa Ālmasex, ijjāš-dd āddunya i-ad-ixləs ināsbākkaḡān s-nākk Buləs a-s wa āzzarān, dāḡ-sān ojarān iket-dāḡ-nāsān.

¹⁶ A-wen-dāḡ a fäl hi-oḡān Māssināḡ tāhanint i-ad-umasāḡ ālmital i-āddināt wi iyyāḡnen n-a-s Ḡisa Ālmasex, h'-e tazidert n-a-s ere sār-s omānān, ad-ijrəw tāmudre tāḡlalāt. A-wen hi-ija, āddoobāt daḡ ad-t-āj i-e d t-illām āgg-adəm.

¹⁷ A-wen-dāḡ a fäl nākfet hārkuḡ Māssināḡ semḡar d-ālxurmāt, ənta a-s Āmānokāl wa n-Āmaḡlal, wār fälla-s la tamāttant tārna, wār-itətwənhəy, ənta a-s Māssināḡ wa n-iyyān. Amin!

Ḥhəl iman-nāk dāḡ-immun

¹⁸ Alyaḡ-in Timoti, a-wa s-ārheḡ ad-kāy-səmmətārāḡ dār-s, wār-izley d-mājrād wa s-kāla t-innā Māssināḡ i-āddināt i-ad-hak-t-ənnən, ənnān-aktān daḡ. Umaset mājrād-wen-dāḡ hak-āt-wānnān a kāy-āsināmānḡān dāḡ-ālxidmāt wa āhuusken hed i-ad-ākk s-data.

¹⁹ Əttəf immun, wār-itəmmalet a dāḡ-təššakād iman-nāk, əhlākān āddināt ājjootnen wāren ja a-wen, ānmāšrāyān i-immun;

²⁰ āddināt en-dāḡ, ih'-en Himni d-Ālxader-i jeḡ dāḡ-ifassān n-Iblis, ānmānhāyān d-iman-nāsān i-ad-əlmədān a-wa ihān asəkkufār.

2

Tajjāt ālhimmāt

¹ Dat-hārāt iket-net, āsimātārāḡ-kāwān d-ad-tədələm Māssināḡ, təjəm ālhimmāt, tājjāynānām-t, tumayām-as i-ad-aḡən tāhanint i-e d t-illām āgg-adəm.

² Ādəlāt Māssināḡ i-imānokālān d-kāl-əlxəkum i-ad-ozja ākall, ija dāḡ-s ālxeḡ, nəttəf tāmudre tāddiināt, tāssiimḡārāt Māssināḡ.

³ Tittar-tin-dāḡ āhuskātnen a əjraznen i-Māssināḡ-i n-Āmaḡlas-nānāḡ-i

⁴ irhan əlxəllas n-e d t-illām āgg-adəm, əzzəyān tidət iket-dāḡ-nāsān.

⁵ Māssināḡ, iyyān ḡas, wār dd-ija daḡ ar iyyān n-əssəbab s-āzmāzāl iman-net d-dāgg-adəm, a t-āmoosān Ḡisa Ālmasex-i dd-āmoosān āgg-adəm.

⁶ Ikfā iman-net i-ad-isəddārfət e d t-illām āgg-adəm dāḡ-ibākkaḡān-net, ənta-den-dāḡ əmmək wa s-ājjəyha ālwāqq wa dd-tāwwād, tāqqān ta issəbdād Māssināḡ n-a-s irha əlxəllas n-āddināt iket-dāḡ-nāsān.

⁷ Dāḡ-təssəba n-a-wen-dāḡ a fäl hi-ija Māssināḡ āmaway n-isālan-net d-anāmmašul; tidət a janneḡ wādden bahu, Māssināḡ a hi-dd-āšmašālān i-ad-sāḡrāḡ inəzzulam† immun d-tidət ta-net.

⁸ A-wen-dāḡ a fäl dāḡ-wān ārheḡ kāwāneḡ-i n-meddən, ad-təddalām Māssināḡ dāḡ-edāgg iket-net, tajjām ālhimmāt dāḡ-ḡakkālām ifassān šāddiijnen, wāla aḡkār wāla abjənən.

A-wa ātiwāttārān dāḡ-tiḡeḡen

† 2:7 2:7 — Ḡur-kāl-Ālyāhud, ere wārān āmoos āgg-Ālyāhud s-alāšāl meḡ ere wārān ilkem i-āddin-nāsān, iket-net, ānāzzalim a āmoos. A-wen-dāḡ a fäl tiwsaten ti iyyāḡnen iket-nāsāt, ti n-inəzzulam. — Ašāl-i-dāḡ, ānāzzalim, ākafār (ere wārān issen s-Māssināḡ).

9 Tiðeðen day, ärheý dāy-snāt, ad-əjənāt a-wen-dāy. Ärheey dāy-snāt ad-tajjānāt isəlsa tənāt-wären-əkşef, isəlsa tənāt-əştarnen; uday ad-sasahaɣnāt aşāl i-ad-tənāt-in-əjrāhān äddināt, wār tajjānet i-iɣāfawān-nāsnāt asəssəkən s-izzəwāt əlqim-net, wār tajjānet orāy wāla timāɣwanen okāynen āmaku wāla isəlsa s-ikna əlqim-nāsān eɣāwe,

10 änn-ak, zəzjānet-dd tihusay n-imārkedān wi ānihājjanen d-tiðeðen jannānen äksuðnāt Mässināy.

11 Älwāqq wa n-älxuṭbāt n-mājrad n-Mässināy dāy-älkänisāt, susəmnet dāy-a-s äsidāwnāt a-wen d-asjəd d-asrəs n-iman;

12 əgdalāy-asnāt ad-xaṭṭābnāt meɣ ad-tanāhaðnāt dāy-meddən d-a-wa s-lān s-ad-t-əjən dāy-älkänisāt, susəmnet.

13 Mässināy, Adəm a dd-ixlāk s-tizarāt təzzar, issəlkām-as-dd Xəwwa.

14 Wādden Adəm a ikkārās Iblis s-tizarāt i-ad-inməsrəy, änn-ak, tamāḏt a āšnāmāşrāy; tənāmāşrāy s-a-wen-dāy ja i-mājrad n-Mässināy.

15 Hakd a-wen-dāy, a-wen wār hin-ikkəs a-s ad-tumas anna, təkřeş arātān, iɣləs-tāt Mässināy. Sādəwet immun-net d-tārha təmdat d-tämudre şaddijāt, təştarāt.

3

Tumas n-emännähäð n-älkänisāt

1 A-wa mājrad ānihājjan: ere irhān tumast n-ärrabex-i n-emännähäð n-älkänisāt, ilmədet a-s äsidārhan āmaşal ällullen.

2 A-wen-dāy a fäl, emännähäð n-älkänisāt, ilzam ad-:

Wār t-iwer uḏlem,
umaset āhaləs n-iyyāt tamāḏt,
ere ilan älxal d-esāwe,
inhəjjet d-semɣar,
ijjəşet-t amājaru,
umaset ere äddoben asəɣər n-äddināt,

3 wār-itumaset emäsāw n-asməd
wāla ere ih' əjad;
umaset ere əzedān, ägg-älxer,
wār-itumaset emārḥ n-azrəf.

4 Umaset ere ännihäðän hullan dāy-ehān-net
d-ere s-äsijädän arātān-net,
ässiimɣārān-t dāy-hārāt iket-net

5 fäl-a-s ere s-indar ad-ännähäð dāy-əjadāş-net,
əndek əmmək wa s-mad-udabāt tüzert
i-älkänisāt n-Mässināy?

6 Wār-itumaset ere s-iket omān i-ad-wār t-irəmməs əttəkəbru,
isəddärɣəl-t, iḏəw dāy-uḏlem
wa dāy-oða Iblis iman-net.

7 Umaset ere ilan tajuhe tähusket
dat-äddināt wi n-ajāma wären āmoos älməssexitān,
dihen, wār mad-itwəlkāh,
wār mad-iḏəw dāy-tänḏärbaten n-Iblis.

Imadhalān n-ärrabexān

8 Imadhalān n-ärrabexān-i n-imännähäðän n-älkänisāt, ilzam-tān ad-:
Tān-iwar sārḥo,
wār tumasnet äddināt n-əssin ilsawān,
əkrəşnet tənna tətbatāt,
wār sāsakaynet tesāse n-asməd,

wär tämmäynet i-terše n-azrəf s-taxärbənit,
äsiikäkäđ a-wen.

⁹ İddäraj n-immun wa tän-issəlmäd Mässinäx dəx-mäjräd-net,
əttəfnət-t dəx-a-s wär t-illa
a dəx-əššakän iman-näsän.

¹⁰ Zəjjəzzənet-tän äddinät,
itwəlməd a-s wär t-illa uđlem tän-iwarän təzzar,
əjjəšan ämašal-wen-dəx.

¹¹ Tidəden dəx, iwaret-tänät sərho, wär tänät-itäjjäšet ännämima,
əkrəšnet älxal ähuusken, äxdəlnət dəx-härät iket-net.

¹² İmadhalän n-emännähäđ n-älkänisät, hak iyyän, iyyät tamäđt,
nähäđnət dəx-aratän-näsän d-ijədsän-näsän.

¹³ Äddinät-win-dəx, wi işla ämašal-näsän s-igqud, ad-ətwəsəməxärän,
ad-äbas tän-ha tasäja dəx-təssəba n-immun-näsän d-tassaxt ta jän d-
YisaÄlmasex.

İddäraj wa dd-änfalälän

¹⁴ Timoti, təkarđe-ta-dəx, kattäbäx-ak-tät-in dəx-a-s jarəx ättäma n-ad-
käy-in-asəx šik

¹⁵ məšan, kunta wär-otes Mässinäx a-wen har hin-əhojəx fälla-k, ärhey
ad-hak-tilal təkarđe-ta-dəx i-ad-təlmədäd älxal wa s-led s-ad-t-təttəfäd,
səssiğədäd sār-s tamətte ta n-imumənän n-Mässinäx, a-wen a t-ämoosän
älkänisät n-Mässinäx-i iddärän, ənta a-s təmankayt ta təbnät fäll tidət,
wär t-illa dəx a dəx-s tät-madän-ikkəs.

¹⁶ Tidət n-Mässinäx ta s-ärđän äddinät dəx-isälan n-əddäraj wa n-
immun, ti-mäqqärät, a-wen a t-ämoosän a-s:

Yisa Älmasex,
änfaläl-dd dəx-äddunya, ämoos-dd ägg-adəm,
ənhäyän-t dəx dägg-adəm,
illəxät Unfas Šəddijän s-idəm wa ikrəš dat-Mässinäx,
əjjunfän dəx-s änjəlosän,
ätwəjjän isälan-net i-inəzzulam,†
omänän sār-s äddinät iyyäđ,
imməđkäl s-išənnawän s-edägg wa n-älxurmät.

4

Älyulam wi sayranen bahu

¹ Ämära, dəx-isälan-wi-dəx n-ajilal n-äddunya, Unfas Šəddijän iman-net
a innän, ad-əkfən äddinät iyyäđ iman-näsän iba n-äddin, əltəxän iyyäđ
tän-saswadnen. Äddinät-en, a-wa säxren, a sār-sän dd-orawän alšinän,

² imäsəxran n-inəsbuha n-älmunafəxän s-əssiikwäl əjut-i-dəx jän
ibäkkäđän-näsän ulhawän-näsän,

³ ad-əzzənän s-imumənän əssannen a-wa ämoosän tidət, säxrəmən-
asän adubən, əgdələn-asän tetäte n-imənsiwän iyyäđ, a-s ija a-wen,
härätän-win-dəx, Mässinäx a tän-dd-ixläkän i-tənoflayt n-imumənän i-ad-
tän-əkšən dəx-təmayit-has.

⁴ A-wa dd-ixläk Mässinäx, oləx iket-net, wär t-iha fəw a xəramän,
umayət xas əwadəm i-Mässinäx təzzar äkšət a-wa s-irha tetäte-net

† **3:16 3:16** — Yur-käl-Älyähud, ere wärän ämoos ägg-Älyähud s-aläsäl mex ere wärän ilkem
i-äddin-näsän, iket-net, änəzzalim a ämoos. A-wen-dəx a fäl tiwsaten ti iyyäđnen iket-nəsnät,
ti n-inəzzulam. — Ašäl-i-dəx, änəzzalim, äkafär (ere wärän issen s-Mässinäx).

⁵ fäl-a-s, wär t-illa amønsi s-wädden, äššiišdäj-t mäjräd n-Mässinäx d-tittar.

Änaxdim wa ufän dat-ÿisa Älmasex

⁶ Timoti, fässär i-ayətma-k däj-äddin härätän-wi-däj, afäl jed a-wen, ad-tumasäd änaxdim n-ÿisaÄlmasex ifranän, sətbetäd käyy-däj a-s a-wa innä mäjräd wa ihakkän immun a-s tøddaräd, tössanäd daj a-wa ønnänät tijøttewen ti n-teḡäre n-tidøt ta tädduttet.

⁷ A-wen-däj a fäl hak-janneḡ, wär säjad i-tinfusen ti n-käl-äddunya d-ti n-käl-ibda siḡulnät timḡaren, mälayäḡna ḡas a-wen wärän oher härät d-Mässinäḡ.

⁸ Käyy, šømmišøl äššahät-näk däj-isälan wi n-äddin ašøšrah n-taḡøssa, wär-infa s-a äjjen, a-s ija a-wen, ašøšsuhu n-iman däj-äddin, infa s-a äjjeen ed ere äddiinän, ijraw ḡur-Mässinäḡ ärkäwäl n-tämudre däj-äddunya hakd-däj älxärät.

⁹ A-wa hak-janneḡ, mäjräd änihäjjan d-ad-itwäqbøl iket-däj-net.

¹⁰ Tidøt, nosas däj-älxidmät, nøha amjär äššohen ed ätḡäma-nänäḡ, Mässinäḡ-i iddärän a iha, ønta a-s Ämaḡlas n-e d t-illäm ägg-adøm hullan imumønän.

¹¹ Entäned-den-däj isälan wi s-led s-ad-tän-saḡred, sømmøtäräd äddinät där-sän i-ad-tän-øknøn uḡreh.

¹² Wär käy-iläkkähet äwadøm fäl-a-s innin mädrøyäd, änn-ak, øtḡøf dat-imumønän tøttølal däj-mäjräd d-älxal d-tärha d-immun d-tøšødje n-ulh.

¹³ Iket-di d-käy-in-tisäḡ, ḡarr ølkøttabän n-Mässinäḡ dat-äddinät, xaḡḡab-asän-tän, tafässaräd-asän-tän.

¹⁴ Wär toyyed isuf wi hak-ija Unfas Šäddijän i-ad-tudabed s-älxidmät-näk, isuf-en, Mässinäḡ a hak-tän-ikfän, ølläḡen-ak sär-sän daj äddinät s-inna Mässinäḡ a-wen, äswär-käy daj älzämaḡät wa n-inušämän ifassän-näsän i-ad-däj-k äj Mässinäḡ älbäraka.

¹⁵ Härätän-win-däj s-hak-ønneḡ, ärdøl-tän, ødgøz däj-sän i-ad-dd-ibbuyøn ehel-näk s-data dat-äddinät iket-näsän.

¹⁶ Hekäyy! Äj ønniyät i-iman-näk, tøjød-t daj i-a-wa säḡred äddinät, kuyød däj-tazidert däj-a-wen. Afäl jed a-wen, ad-täḡløsäd iman-näk, täḡløsäd daj iman n-äddinät wi hak-äsijädnen.

5

A-wa iwärän Timoti däj-isälan n-täzert i-imumønän

¹ Timoti! Wär täsnärḡämäd fäll-ere wäššärän, änn-ak, äj'-as mäjräd šund wa mad-tøjød i-abba-näk. Imawaḡän øntäned, äj'-asän mäjräd wa mad-tøjød i-ayətma-k,

² tøjød i-timḡaren mäjräd wa mad-tøjød i-matte-k, tøjød daj däj-tøšødje i-timawaḡen ašømmøtär wa mad-tøjød i-šätma-k.

Isälan økkanen tadhølt ta där-änihäjjanät tinuḡäfen

³ ḡayøm tössanäd däj-tinuḡäfen, hullan ti n-tiläqqiwen s-wär t-illa ere lanät tänät-idhälän.

⁴ Afäl la tänuḡäft aratan meḡ ihäyawän, ølmødnet dat-härät iket-net a-s dat-Mässinäḡ, øntäned-en-däj a iwar älxäqq n-imärawän-näsän. Emmøkwen-däj a-s mad-øzølen i-imärawän-näsän d-imärawän n-imärawän-näsän ašødwal wa tän-jän. Enta-den-däj daj a-wa ijräzän i-Mässinäḡ.

⁵ Tānuḍāft ta wārāt tēla ere dār-s, tāqqimā-dd ənta ɣas, tēzɣay d-iman-net, tājet aṭṭāma-net dāɣ-Māssināɣ, tāqqaymet tattār dāɣ-Māssināɣ ehād d-ašāl i-ad-tāt-ikkəs dāɣ-tāmāɣatert.

⁶ Māšan, tānuḍāft ta wārāt tēttār ar izəjraz n-iman-net, əlməd a-s wār tēzley d-ere āba kud-dāɣ tēddar.

⁷ Əntāneḍ-den-dāɣ hārātān wi s-led s-ad tən-dd-suktəwād äddināt i-ad-əṭṭəfnāt tinuḍāfen tāmudre-ten-dāɣ i-ad-wār tənāt-itizəm āwadəm wāl' iyyān.

⁸ Āmāra, ere hin-ijjārān imārawān-net hullan wi t-orāwnen, ilmədet a-s äkkuddāl immun, iššam-as-in āmāra wāla-dāɣ ānāzɣalim.

⁹ Āmāra, tānuḍāft ta tārhat ad-təjjəš tiḍeḍen ti tēdhāl älkānisāt, wār has-t-illa a-wen ar s-ad-tēla sādīsāt timərwen n-awātay d-ad-wār kāla tēja ar iyyān n-adubən ɣas.

¹⁰ La daɣ s-ad-tātiwāzɣay s-imārkedān wi tamašal d-asədwal olayān i-arātān-net d-ad-tāt-ih' amājaru d-ad-tāt-ihā älxidmāt i-iməššeddəjān d-ad-kann hārāt i-tilāqqiwen, d-ad-tamašal a-wa olāɣān iket-net.

¹¹ Wār tāqbelād s-tadhəlt n-tinuḍāfen ti mādroynen fāl-a-s afāl tənāt-dd-iqqāl iblis-nāsnāt, ad-əšləynāt i-tabarāt ta n-Ālmasex, umas a-s wār t-illa a ihan ənniyāt-nāsnāt kunta wādden adubən āynayān.

¹² Ənta-den-dāɣ əmmək wa s-sawarnāt uḍlem iman-nāsnāt ed ārkāwāl wa jänāt i-Ālmasex n-a-s ənta ɣas a-s mad-əddārnat, äxdəmnāt-as, äqqālnāt sār-s.

¹³ Afāl jänāt a-wen, wār t-illa a tənāt-išillun kunta wādden tikawt jer-ihānan, d-sendad, a-wen daɣ, ojar-t a-wa s-wār tənāt-išla ar aggay n-tinawen, wār t-illa a-s wādden hanāt-t kud-dāɣ wār tənāt-iqqel a-wen, wār tənāt-āskarakād asəffəlyāɣ.

¹⁴ Dāɣ-tuksəda n-a-wen-dāɣ a fāl tānuḍāft əndərrāt, ässofāɣ-as ad-taləs adubən, təkroš arātān, tānnāhād dāɣ-əjadāš-net s-sārho i-ad-wār fālla-nāɣ jārrowān fāw išənja-nānāɣ tašləlt s-hanāɣ-əssəḍlāmān.

¹⁵ A-wa jāneɣ, jāneɣ-t fāl-a-s a äjjeen dāɣ-tinuḍāfen-tin-dāɣ mādroynen, āru d-änmäšräynāt i-tabarāt n-Māssināɣ, əlkāmnāt i-Iblis.

¹⁶ Afāl t-təlla tamāḍt hat n-älkānisāt tēla tinuḍāfen dāɣ-ehān-net, tēdbəlet-tənāt ənta iman-net, wār tumasnet āzuk i-älkānisāt i-ad-tudabāt älkānisāt dihen ad-kann hārāt i-ti wāren dāɣ-snāt ila ere hasnāt-iknān hārāt.

Semyar wa dār-ānihəjjān imizārān n-älkānisāt

¹⁷ Imizārān n-älkānisāt wi əknānen issus dāɣ-älxidmāt-nāsān s-sārho, sənnəḍfəsāt-asān semɣar hullan wi s-əntāneḍ a ännuṭṭāfnen d-älxidmāt wa izzəwen āmoos älxuṭbāt d-asəssāɣār n-imumənān.

¹⁸ Dāɣ-isālan n-a-wen-dāɣ fāw a dāɣ-innā əlkəttab n-Māssināɣ:

«E-d šišbāɣtišād awdes dāɣ-əttāɣam i-ad-tiddəš, wār has-jed äkinbāb.»

Innā əlkəttab daɣ a-s:

«Hak ānaxdim, ānihəjja d-älxaqq n-tide-net.»

¹⁹ Wār tāqbelād a ätiwānnān fäll-ānušām n-älkānisāt ar s-ad-ila sānatāt meɣ kāraḍāt tjuhawen.

²⁰ Inušāmān wi änmäšräynen, äxtəl-tān dat-älkānisāt iket-net, tāllāɣed a-wa dāɣ-änmäšräyān i-ad-āj a-wen tuksəda dāɣ-äddināt wi iyyāḍnen, uksāḍān əntāneḍ-dāɣ amišəl n-abākkad šund-wen-dāɣ.

21 Ettaräy däx-k fäll-Mässinäy d-ŶisaÄlmasex d-änjälösän wi ennəfrännən d-ad-tamaşaläd härätän-wi-däx s-iqqud, wär tän-täsnämajäräd, wär sär-sän täzmäzläyäd däx äddinät.

Isəmməterän n-Buləs

22 Wär täsrarädäd aswär n-ifassän-näk eᶑäf n-äwadəm wäl' iyyän i-ad-has-təjəd älhimmät, ijjəş älxidmät wa n-älkänisät; hekäyy, wär tihär d-äddinät ibäkkadän-näsän, ᶑayəm təttafäd iman-näk härkuk däx-təşədje.

23 Wär səss aman ᶑas, sass däx dehiyyän a əndərrän däx-aman n-läᶑnəb äxxiimärnen i-ad-käy-infəw a-wen däx-tanännäᶑat ta käy-rammäsät d-turhənnawen ti iyyädnen käy-jarräwnen.

24 Äddinät iyyäd, ibäkkadän-näsän, änifalälän harwa wär dd-əmmədälän isälan-näsän mäşän, iyyäd, tahajen wi-näsän eştarän hundäy har aşäl wa dd-e-əbboqqen dat-äddinät iket-näsän.

25 A-wen-däx däx a jan imärkedän wi tamaşalän äddinät, wär təhijin wär-ätwänhäyän, kunta däx wär-ätwänhäyän şik, wär mad-ähajən eştarän.

6

Səmyärnet eklan məssaw-sän

1 Älməssexitän wi äkkilätnen i-äwadəm, iwar-tän s-ad-əknan asəmyar n-məssaw-sän. Afäl jän a-wen, wär mad-isəkkufär äwadəm isəm n-Mässinäy, wär mad-aᶑəmän däx äddinät a-wa käwän-nəsaᶑra.

2 Wi s-mässi-sän älməssexitän a ämoosän, uday ad-unjəyän s-asəmyar-näsän fäl-a-s innin oharän dər-sän ämära temiᶑt ta n-tassayt d-ŶisaÄlmasex, iwar-tän s-ad-tajjän s-ənniyät älxidmät wa däx-tän-jän məssaw-sän ed wi tän-ässiixdämmen, imumənän irha Mässinäy a ämoosän.

Isälan n-älyulam wi n-bahu d-imärhan n-ehäre

3 Ənta-den-däy a-wa s-leed s-ad-t-sayred äddinät, samätaräd-tän dər-s. Əllan-t äddinät sayranen bahu wärän oher härät d-tidət n-mäjräd n-Emäli-nänäy ŶisaÄlmasex, wär əlkemän däx i-asəᶑär wa äddewän d-äddin-nänäy,

4 äddinät-en, äsidäryälän-tän ibərajän. Älzuhal tässiirhän tərha n-tamädaş d-amşəkki n-mäjräd a ämoosän. Ənta-den-däy a-wa dd-itiirəwän tismiten d-imşəwəllitän d-təkkufära d-tordawen läbasnen,

5 d-tamädaş wärät möddəw jer-äddinät s-təfray tayətə-näsän. Wär-essenän tidət, jan äddin äsaru s-əbbäᶑärän.

Tərha n-azrəf tokäyät ämaku, sajraw härät

6 Tidət lab a-s uᶑəf n-äddin itirəw-dd s-äwadəm ärrəzäy mäqqoorän afäl wär-əzoᶑ a-wa t-ikfä Mässinäy;

7 wär t-illa a dd-näwway a-s dd-nəjjäş äddunya-ta-däy, wär t-illa däx a-s näddobät aggay-net aşäl wa d-tät-nəjammäd.

8 A-wen-däy a fäl, kunta nəla a nəksa d-a nəlsa, igdäh-anäy a-wen-däy.

9 Äddinät wi wären ərha ar ad-əbbäᶑärän, ad-ətWirəmän s-a äjjeen, irməs-tän Iblis s-tändärbat n-derhanän äjjootnen läbasnen däx-wär-itidəw ar emeskel. Wär t-illa a sär-sän dd-işaşray a-wen-däy kunta wädden säbxas d-əlhəllak.

10 Tərha n-azrəf tokäyät ämaku, sajraw härät ed, ənta a-s ekew n-e d t-illäm älmäşşibät, oᶑän däx-s äddinät äjjootnen, änmäşräyän i-immun, oräwän-dd s-iman-näsän tidij n-tersəmmawen äjjootnen.

Isømmæterän wi ija Buləs i-Timoti iman-net

¹¹ Ämära, Timoti, käyy-i n-u-Mässinäx a-s ämmijrädäx: jawäd i-härätän-win-däx, ömmäx i-udəf n-äddin d-immun d-tazidert, uday i-a-wa käy-össäxräx iket-net, əbdəw iman-näk d-a-wa läbasän. Ettär iqqud d-älxädalät däx-tuksəda n-Mässinäx, əttəf immun d-tärha d-tumast n-awadəm äzedän.

¹² Əknəs amjār wa ufän däx-imjārän ihälän ebre n-äddin i-ad-təjrəwäd tämudre ta täxlälät s-käy-dd-ixrä Mässinäx. Äj isälan-win-däx käyy-däx i-ad-sətbətäd immun dat-tijuhawen äjjootnen.

¹³ Ämära, əfrađäx fälla-k dat-Mässinäx-i ihakkän tämudre i-härät iket-net d-ŸisaÄlmasex-i äjjəyhän däx-isälan n-tihusay n-a-wa ämoos dat-gəfär, Bunəs Bilatəs.

¹⁴ Agəz iman-näk däx-älxib iket-net d-a xəramän iket-net, əttəf iman-näk däx-təşədje härkuk i-ad-togazäd a-wa fälla-k ifräđ Mässinäx har aşäl wa däx-dd-mad-infiləl Ämänokal-nänäx Ÿisa Älmasex.

¹⁵ Aşäl-en, ad-hanäx-t dd-isuxəl Mässinäx-i t-illän jənnəj härät iket-net, ənta-i xur-t-təlla tənoflayt ta n-tidət, ənta-i n-Emäli n-imänokalän, ənta-i n-Emäli n-imälan,

¹⁶ ənta xas a ixlälän, wär fälla-s la tamättant tärna, izzax däx-ännur s-wär hanäx-t-illa äggađ-net fäl təmxäre d-tihusay-net, wär t-illa ere s-käla t-inhäy, wär-ilkem dağ ere äddoben ahänay-net; umaset semxar d-tärna, i n-Mässinäx härkuk. Amin!

A-wa iwarän imärrəzäxän

¹⁷ Ämära, änn i-imärrəzäxän n-äddunya-ta-däx, ad-əjən ənniyät, wär däckälnet iman-näsän, wär täjjänet fella-näsän däx-ärrəzäx-näsän ed a ijän-däx, ilkam ad-imdəw, änn-ak, əjənet ättäma-näsän däx-Mässinäx-i hanäx-ihakkän härät iket-net s-tənoflayt i-tənoflayt-nänäx.

¹⁸ Änn'-asän, ad-əjən imärkedän i-ad-ärzäxän däx-imärkedän, uzannet d-äddinät wi iyyäđnen təla-näsän, əjənet isuf janen s-ulh irđan s-a-wen.

¹⁹ Afäl jän a-wen, ad-ətwärän i-iman-näsän däx-äddunya ta dd-malät ärrəzäx n-imärkedän, əjrəwän dağ tämudre ta n-tidət täxlälät.

Ajilal n-mäjräd

²⁰ Ya Timoti, əkən udəf n-a-wa käy-issäxläf Mässinäx, əşləy i-iməjridän wi əglänen fäll-iba n-äddin, əbdəw d-anməntaş n-mäjräd d-äddinät wi s-älmät əssanän, a-s ija a-wen, wär t-illa a əssanän.

²¹ Äddinät iyyäđ, ija xur-sän a-s äzizäbben musnät, ere tənähäyäd ija a-wen, a-di, äbas ohar härät d-immun.

Ähuuläx-käwän-in, oyyey-käwän d-ännuxmät n-Mässinäx. Amin!

Täkarðe ta sänatät iktäb Bulös i-Timoti

Äšajəš

¹ A-wa näkk, Bulös, wa n-änammašul n-ŸisaÄlmasex dāx-erhet n-Mässināx. Enta a hi-äswärän iji n-isälan n-tämudre ta s-ijjāš ärkāwāl n-ad-tät-äkf i-dägg-adəm dāx-idəm n-Ÿisa Älmasex.

² Ähuulāx-kāy-in Timoti kāyy-i n-rure-x dāx-äddin ökney tārha. Ikf'-ik Abba Mässināx d-Emäli-nänāx Ÿisa Älmasex ännuymät, tähanint d-älxer.

Isəmməterän wi ijä Bulös i-Timoti

³ E-d dälāx Mässināx-dāx jer-ehäd wälä ašäl, ad-kāy-dd-əktox, umayāx-as dāx-tössəba-nāk, äxbədāx-t s-ulh mällän šund a-wa jän imärawän-in ibda.

⁴ E-d dd-əktox imettawän-nāk-dāx, ad-hi-tānx tenere-nāk, söddärhönāx ahānay-nāk i-ad-äknāx tedāwit.

⁵ Kittəwāx dāx tidət n-immun-nāk, immun təttaf s-tizarät ma-s n-mak Lāwwisa hakd-dāx ma-k Anisa, ökkasāx dāx äššāk a-s təttafäd-t kāyy dāx-ašäl-i-dāx.

⁶ A-wen-dāx a fäl dāx-k ärhey, ad-dd-sudəred isuf n-Mässināx wi hak-ija dāx-ännuymät-net, ašäl wa d-kāy-äswärāx ifassän-in, dälāx-ak Mässināx

⁷ fäl-a-s, Unfas Šäddijän wa hanāx-ikfä Mässināx, wär hanāx-itəjj iməjjejdän, änn-ak, ikf'-anāx-t i-ad-hanāx-äkf tärna, d-tārha d-tanhaqt dāx-iman-nänāx.

⁸ Wär täkrakädäd tumast n-tajuhe n-Emäli-nänāx, wär täkrakädäd dāx a-wa s-ämoosāx u-takärmüt ihan tišəm dāx-tössəba-net, änn-ak, nahret s-tärna n-Mässināx ayāna wa hannāyāx dāx-tössəba n-Älənžil.

⁹ Mässināx a hanāx-iḡlāsän, iḡr'-anāx s-tihusay s-iman-net wädden dāx-tössəba n-imärkedän nämešäl, änn-ak, dāx-tössəba n-a-wa issəbdäd dāx-erhet-net d-dāx-tössəba n-ännuymät wa hānāx-ikfä dāx-idəm n-ŸisaÄlmasex härwa wär dd-täxlek äddunya.

¹⁰ Ännuymät-wen-dāx, äsnäfaläl-t-dd ämära ass n-Ämaḡlas-nänāx Ÿisa Älmasex-i iddāšän tärna n-tamättant, ässässämāymāx-dd fälla-nāx tämudre ta täḡlälät šäddijät s-itäjj Älənžil isälan-net.

¹¹ Dāx-tössəba n-Älənžil-en-dāx a fäl hi-dd-iḡrā Mässināx s-iman-net, ij'-ahi ämaway n-isälan-net d-änammašul d-älḡalim

¹² dāx-tössəba-net a fäl hannāyāx tersəmmawen-ti-dāx, mäšan, hakd a-wen-dāx, wär hi-äskärakäd a-wen ed əssanāx ere wa s-ömānāx, ökkasāx dāx äššāk a-s ila tärna s-ogāz a-wa hi-issäḡlāf iket-net hundāx har ašäl wa n-tebädde.

¹³ Äkən udəf n-tifer ti n-tidət kāy-əssäḡrāx, umaset a-s əntänäteḡ a ännihädnen dāx-tämudre-nāk, mašäl-tänät dāx-a-s tänät-täsidāwäd d-immun d-tārha-i dd-tirəw tassaxt d-ŸisaÄlmasex s-äwadəm.

¹⁴ Taḡälift-nāk a-wa ähuusken kāy-issäḡlāf Mässināx, agəz-t s-tärna n-Unfas Šäddijän wa dāx-nāx izzāḡän.

¹⁵ Təssanäd a-s äddinät wi n-teje ta n-Azya, jārän-ah'-in iket-dāx-näsän hullan Fižilus d-Hirminus.

¹⁶ Daläy Emäli d-ad-aḍen tähanint i-ehän wa n-Unizifur, issəsmäḍ ulh-in dāy-älwäqqān äjjootnen, wär has-ämoos daḡ a-wa s-əheḡ tišəm dāy-takärmüt takrakid̄t.

¹⁷ A-s dd-oseḡ aḡrəm wa n-Roma, immäḡ-t iket-net, wär-ässunfa har hi-ijrāw.

¹⁸ Ettaräy dāy-Emäli ad-has-aḍen tähanint ašäl wa n-tebädde, төssanäd käyy iman-näk a-s inf'-ahi s-a äjjeen dāy-aḡrəm wa n-Ifäsus.

2

Tumast n-änaxdim iyradän

¹ Ḡas, käyy-i n-rure-ḡ dāy-äddin, səşşuhət iman-näk härkuk dāy-ännuḡmät wa ihän ḠisaÄlmasex.

² A-wa käy-əssäḡrāḡ dat-tijuhawen äjjootnen, säḡr'-e käyy-dāy i-imumənän n-imaydalän äddoobätnen əntäned-dāḡ, ad-t-säḡrən i-iyyäd.

³ Aläh d-əssärdasi ifranän n-Ḡisa Älmasex, əḍkəl käyy-dāy šund a-wa jeḡ folät-näk dāy-tersəmmawen ti inhäy.

⁴ Əssärdasi ya, e-d irha ad-ijrəz i-əlxəkum wa t-ijän dāy-əlyəškär, ad-äbas izinəzjumət dāy-tämudre ta wärät tämoos ta n-əlyəškär afäl išwär ijjäš ejhän ikkan edäḡg n-akənnas.

⁵ U-ašəšrah, wär mad-inžāx ar s-ad-ilkam i-färəḍän wi fäll-igla ašəšrah iket-dāy-näsän.

⁶ Änäsdamu wa osäsän dāy-älxidmät ḡas a madän-aləy ašəkrəš-net s-tizarät.

⁷ Zənnəzjumət hullan hullan dāy-härätän-win-dāy hak-ənnəḡ ed, ad-käy-äkf Emäli turhajät n-afäham-näsän iket-dāy-näsän.

⁸ Ḡayəm kittəwäd ḠisaÄlmasex wa n-ahäya n-ännäbi Dawəd dd-issənkär Mässinäḡ jer-inəmmuttan s-əmmək wa s-tän-innä Älənžil-i xaṭṭäbäḡ.

⁹ Dāy-təssəba n-Älənžil-en-dāy a fäl hannäyäḡ älyizabät har dd-äqqäläḡ heḡ ämära-dāy tišəm šund änäsjafa mäšan, hakd a-wen-dāy-dāḡ, mäjräd n-Mässinäḡ ənta, wär-ihä tišəm.

¹⁰ A-wen-dāḡ a fäl əşbaräḡ härät iket-net dāy-təssəba n-äddinät wi äsnäfrän Mässinäḡ dāy-ittus n-ad-ənmiwäḍän əntäned-dāḡ d-əlyəllas wa ihäk Ḡisa Älmasex d-älxurmät wa iḡlälän dār-äddew.

¹¹ A-wa mäjräd änihäjjän:

«Ḡisa Älmasex, afäl tamättant ta ija, nohär-tät dār-s, adiš, ad-dār-s nahär daḡ tanäkra ta dd-ija jer-inəmmuttan.

¹² Afäl nəşbär dāḡ-a-wa hanäḡ-irammäsän, ad-dār-s nahär tömmənukəla mäšan, afäl t-näkkuddäl, ad-hanäḡ-ikkuddəl ənta-dāḡ.

¹³ Afäl wär näḡdel näkkäned, ənta iḡdal härkuk ed wär-äddobät ad-iqqəl ḍarät tənna-net.»

Isəmmäqqq dāy-isälan n-akuddəl n-immun

¹⁴ Härätän-wi-dāḡ a-s led s-ad tän-dd-siktəwäd i-äddinät härkuk, əttär dāy-sän dāy-idəm n-Mässinäḡ ad-əbḍəwän d-anməntaš n-tifer ed wär t-illa ad-dd-išašray a-wen kunta wädden əlhəllak n-äddinät wi has-sajadnen.

¹⁵ Käyy, äj a-wa täddobed iket-net i-ad-dd-təbdədäd dat-Mässinäḡ tämoosäd ähaləs has-ijrazän dd-ässimdän ämašal-wa dāḡ-t-ija, umas

ānaxdim wār-āskārakāḍ ālxidmāt wa iha, ānaxdim hin-isasawāḍān s-iqqud, mājrād wa āmoosān tidēt.

¹⁶ Jiwəḍ i-idāwānnitān wi əšlāyñen i-āddin dd-wären šəšrəy hārāt, wi wār-əšlenāt ar taxxalen-tin-dāḡ, iba n-āddin ḡas a dd-e-itidəwān fälla-sān.

¹⁷ Iməjridān-nāsān olāhān ḡas d-abuyəs ijjašān, itihraw. Ālžāmayāt n-āddināt-win-dāḡ, ih'-e, Himnayus d-Filitus,

¹⁸ jān anməjjaj d-tidēt wa-dāḡ fāl, jannen tanākra jer-inəmmuttan, āru d-təja; əmmək-wen-dāḡ a-s takkāsān āddināt iyyāḍ dāḡ-immun

¹⁹ māšan, āssas wa s-išwār issəns'-e Māssināḡ, intam dāḡ-edāgg-net. Ēntāneḍ da išəkkelān n-akātab wi t-wārnen:

«Emāli, izzay āddināt-net»,

iktab fälla-s daḡ a-s:

«Ere innān a-s il'-e Emāli, adiš, isənnəməjjajet iman-net d-iba n-iqqud.»

²⁰ Ehān āhuusken māqqorān, wādden han-t ikassān n-orāḡ d-i n-azrəf, han-t daḡ iyyāḍ əknanen s-ahəšk d-i əknanen dāḡ-tālaḡt. Ikassān wi n-orāḡ d-wi n-azrəf, i n-išilan wi n-imjora, wi n-ahəšk d-tālaḡt, i n-imənsiwān wi n-hak ašāl.

²¹ Afāl itṭāf āwadəm isālan-wi-dāḡ s-iket tān-jeḡ, iššəšdāj iman-net, ad-umas šund ākoss ilan ālqim, ākoss šāddijān, itwar māssi-s i-ašāl wa n-imjora. Ākoss-en, infa māssi-s ed āddoobāt ad-sār-s ixdəm a-wa olāḡān iket-net.

²² Jiwəḍ i-derhanān wi tisəsnen ere əndārrān, əmmāḡ i-iqqud d-immun d-tārha d-āḡafyāt d-āddināt iket-nāsān wi ḡabbādnen Emāli s-ulh šāddijān,

²³ sənnəməjjəj iman-nāk d-mātlofāt d-taxxalen wären dd-itirəw a sāl ikənnasān jer-āddināt.

²⁴ Akli n-Emāli, umaset emārḡ, wādden eməkkənnəs, umaset ere āddooben əsəḡər n-āddināt, ere išmārān ināllābāsān;

²⁵ iwar-t s-ad-itajj i-āddināt wi t-āḍḍukrātñen ālwižabān āhuuskātñen ed iha miši s-ad-tān-ākf Māssināḡ turhajāt n-ad-səmməskəlān erk əzzənəf wa hān, utabān, əzzəyān tidēt,

²⁶ dihen, ad-tān-dd-əqqəlān iman-nāsān, ad-ābas āllilān erhet n-Iblis, isiḍəw-tān dāḡ-tānḍārbaten-net.

3

Išmal n-ajilal n-āddunya

¹ Timoti, əlməd a-s dāḡ-išilan-wi-dāḡ n-ajilal n-āddunya, əlkamān āzzāmanān sāmumnen,

² ad-ānnāhāḍ munkāzi dāḡ-āddināt, əjən azrəf amidi, səffənnəyān, ijještān əttəkəbru, səkkufārān, umasān inəbbudar; ad-ābas tān-ha tāmayit, ad-ābas āssimḡārān a-wa ila Māssināḡ,

³ ad-ābas tān-ha tārha wāla tāhanint, ad-ijatnāt tižmiten dāḡ-sān, ad-əməšāršārān, ikwalān ulhawān-nāsān, əksənān a-wa olāḡān,

⁴ ad-umasān imayḍarān d-imənhaj āzziwāt əttəkəbru wa tān-āsidārḡālān, səmmidəwān izəjraz n-iman-nāsān uhən Māssināḡ,

⁵ ad-sakñen āddināt əlmāt a-s əṭṭafān āddin māšan, hakd a-wen-dāḡ, unjayān s-a-wa ihakkān āddin āššahāt-net. Sallād-ahi, āddināt-win-dāḡ, ajəj-tān.

⁶ Iyyāḍ dāḡ-sān, wār tān-išla ar tikawt jer-ihānan i-ad-səswədən s-tāzude n-iləs tiḍedən wären əla tayətte s-wār-intem immun-nāsnāt, tənḡay daḡ təmudre-nāsnāt, wār t-illa erk derhan ḍarāt wār-ošelnāt,

⁷ ärhanät härkuk almud mäšan, indar-asnät fäw, ad-əlmədnät wäla ad-ənnufləynät dəḡ-musnät n-tidət.

⁸ Emmək-wa-dəḡ s-ämyānnan Yanis d-Yinbris tidət i-ännäbi Mosa, əmmək-wen-dəḡ dəḡ a-s tattārān meddən-en-dəḡ asəbbəggu n-tidət. Meddən-en, tayətte-nāsān, təfraq, wär-ibded immun-nāsān fäll-härät

⁹ mäšan, wär mad-əkkən ijəj ed ad-ənhəyān äddinät iket-nāsān əbbuddəl wa dəḡ-oḡān, oškān s-əmmək wa s-ənhəyān äddinät iket-nāsān ibda išk wa ijā Yanis d-Yinbris.

Antum wa iwārān Timoti dəḡ-mäjräd n-Mässinäḡ

¹⁰ Käyy, tärḡaläd a-wa käy-əssäḡrəḡ, wär has-təšleyäd siha wäla siha, tətäläläd tämudre-nin, təssanäd härätān wi s-ännuyäḡ iji-nāsān d-immun-in d-tazidert-in d-tārha-nin d-akuyəd dəḡ-tazidert,

¹¹ täjjəyhäd i-älḡizabät d-tersəmmawen ti hi-ärmäsnen dəḡ-aḡrəm wa n-Intyuš, d-wa n-Ikanyun, d-wa n-Listra. Təssanäd a-s hak iyyān dəḡ-idəgga-wın-dəḡ, ənhəyäḡ dəḡ-s äḡizabät mäšan, ikkäs-ahi-dd dəḡ-sān Emäli iket-dəḡ-nāsān.

¹² Əlmədnet äddinät wi ärhānen uḡəf n-äddin i-ad-sətbətān tassayt-nāsān d-Ḳisa Älmasex a-s ad-ənhəyān äḡizabät

¹³ mäšan, äddinät wi n-inälläbāsān n-inəsbuha, ad-äsetān härkuk dəḡ-tälläbäst d-ahälak, saswadān, tinməsəswidān dəḡ əntāneḡ jer-ıman-nāsān.

¹⁴ Käyy, agəz iman-näk, əkən uḡəf n-a-wa täḡred, təfləsäd a-s ädduuttät ed təssanäd ere wa hak-t-issäḡrān.

¹⁵ Əlkəttabān wi šäddijnen täḡred härwa mədriyäd, əntāneḡ a äddobätnen ad-käy-səwrən sārho wa ihakkān əḡəllas s-immun s-ḲisaÄlmasex.

¹⁶ Əlkəttabān, iket-dəḡ-nāsān, Mässinäḡ a tän-dd-äzzäbben s-tārna n-Unfas-net i-ad-tän-ha tənfa, toläs, dəḡ-isālan n-teḡäre d-asəbbəggu d-asəmmäqq d-asəssiḡəd i-ad-əlmədān äddinät iqqud dat-Mässinäḡ,

¹⁷ udabät u-Mässinäḡ amišəl n-e d t-illām emärked ijrazān i-Mässinäḡ.

4

Iji n-isālan n-mäjräd n-Mässinäḡ

¹ Əttärəḡ dəḡ-k dəḡ-idəm n-Mässinäḡ d-idəm n-ḲisaÄlmasex-i s-ənta a madān-išrəḡ äddinät wi əddārnen hakd wi ämmutnen d-dəḡ-idəm n-ašäl wa n-uḡəl-net d-idəm n-Təmmənəya-net:

² xattāb mäjräd n-Mässinäḡ, äj a-wen s-älwäqq iket-net jer-təjrawäd sār-s wäla; səssiḡəd, äḡtəl, səmmətār äddinät. Sədəw a-wa säḡred d-tazidert tēmdat.

³ Wär t-ih' äššäk a-s ilkam äzzāman d-äbas əšmārān äddinät i-asjəd i-tijəttewen n-teḡäre ta n-tidət tädduttet, änn-ak, ad-ilalān izəjraz n-ıman-nāsān, əkfən iman-nāsān äḡulam s-takārkarān timəzzujen-nāsān, jannen-asān a hasān-ıjrazān,

⁴ ad-əttubbun timəzzujen-nāsān, usafān tinfusen tidət

⁵ mäšan, käyy, əkrəš älxal dəḡ-härät iket-net, əšmār i-älḡizabät, äj ämašal wa n-amällänžal,† səllənžət äddinät, äj a-wa käy-iwārān s-sārho.

Ajilal n-mäjräd

† 4:5 4:5 — Isəm n-awadəm wa ikkäläf Mässinäḡ dəḡ-älkänisät d-älxuḡbät n-Älənžil. — Afäl əjjətān a hasān-itawānnen: Imällänžalän.

⁶ Däx-a-wa hi-dd-iqqälän näkk, ässağät n-tekle-nin, ohäz-dd, älwäqq wa d-leş s-ad-äkfäy tämudre-nin i-ad-tumas takute i-Mässinäş, iwwäd-dd.

⁷ Änmänşäş däx-amjär wa ufän däş-imjärän, əssəmdäş temäşejt ta heş, əttäfäş immun;

⁸ ämära, iqqäl-ahi älhäk n-tärənnawt ta jeş, älhäk-en, a t-ämoosän, korona, a-wen, takənbüt n-əlxəllas ta n-oräş hi-mad-äkf Emäli wa n-eməşşerräş oğädän aşäl wa n-tebädde, wädden daş näkk şas a-s tät-mad-äkf, ad-tät-äkf i-e d t-illäm ere iknan tärha n-aşäl-wen-däş dd-e-infiləl Ÿisa.

⁹ Ass-ahi-dd şik

¹⁰ fäl-a-s Dimas, ijär-ah'-in fäl tärha n-wälät-äddunya, ikk' aşrəm wa n-Täslonika. Kribus ənta, ikkä teje ta n-Gälasya, Titus ikkä ta n-Dälmasya.

¹¹ Wär dd-äqqima şur-i a säl Luqa. Idaw-dd d-Marqəs afäl dd-gilləwäd fäl-a-s ämişatäräş sār-s hullan i-ad-hi-ilal däş-ämaşäl wa heş.

¹² Äşmaşäläş Tuşik s-aşrəm wa n-İfäsus,

¹³ afäl dd-gilləwäd, əmmär-ahi-dd abärnuş wa oyyeş şur-Qarfäs däş-aşrəm wa n-Tärwas, əmmär-ahi-dd däş-əlkəttabän-in, hullan wi n-ilämawän.

¹⁴ Älxadəer wa n-ənhäd, wär hi-oyya härät, ijräw-as Emäli älhäk n-a-wa ämeşäl.

¹⁵ Hekäyy! Äj'-as ənniyät käyy-däş ed ikna eket hullan däş-akənnas n-a-wa nəsaşra.

¹⁶ Däş-tebädde-nin ta täzzarät dat-äşşäreş, wär t-illa fäw ere hi-idhalän, häläş iman-in, järän-ah'-in äddinät iket-däş-näsän. Əttaräş däş-Mässinäş, ad-wär hasän-ittef a-wen.

¹⁷ Kud-däş järän-ah'-in äddinät, idhäl-ahi Emäli, ikf'-ahi äşşahät, äsdabät-ahi ad-äxtebäş isälan-net i-inəzzulam,† ikkäs-ahi-dd däş-emm n-ahär.

¹⁸ Ənta daş a hi-e-agoşän däş-e d t-illäm äşşar, ixləs-ahi i-ad-əjjəşäş Təmmənəya-net däş-işənnawän, wär hi-äkränkarät eşş. Äqqamet-as älxurmät härkuk. Amin!

Tihulawen

¹⁹ Tähuuläd-ah'-in Briska d-Akilas d-ehän wa n-Unizifur.

²⁰ İraštan, äqqiim-in däş-aşrəm wa n-Kurənta, oyyeş-in Trufim ärhiin däş-aşrəm wa n-Milati,

²¹ ass-ahi-dd şik. Ähuul-käy-in İbbulu d-Badi d-Linus d-Klodya d-ayətma-k däş-äddin iket-däş-näsän.

²² Äqqima Emäli d-ənniyät-näk, ikf'-iwän ännuymät-net. Amin!

† 4:17 4:17 — Şur käl-Älyähud, ere wärän ämoos ägg-Älyähud s-aläşäl meş a fäl tiwsaten ti iyyädnen iket-näsnät, ti n-inəzzulam. — Aşl-i-däş, änäzzalim, äkafär (ere wärän issen s-Mässinäş).

Tăkarđe ta iktăb Buləs i-Titus

Ăşajəş

¹ A-wa năkk, Buləs wa n-akli n-Măssinăx, d-ănămmaşul n-ŶisaĂlmasex. Măssinăx a hi-dd-iyrăn s-iman-net i-ad-əlmədăn wi əsnăfrăn immun sār-s, əzzəyăn tidət-net, ətţəfăn tāmudre tādđiinăt,

² əjrən ätţăma n-tāmudre ta tăxlălăt s-ijjăş Măssinăx-i wărăn irəzz dăx-tənna-net ărkăwăl-net, hărwa wăr dd-tăxlek äddunya.

³ Tosă-dd tăqqăn ta issəbdăd i-a-wen xas, ăşmaşăl-ahi i-ad-ăxtəbăx a-wa s-ăru sār-s omăr Măssinăx-i n-Ămaylas-nănăx dăx-măjrăd-net.

⁴ A-wen-dăx a sār-i dd-orăwăn, ad-hak-in-əktəbăx kăyy Titus-i n-alyad-in itbătăn dăx-immun wa nohăr. Ăhuulăx-kăy-in, əttarăx s-Măssinăx-i n-Abba-nănăx d-Ŷisa Ălmasex-i n-Ămaylas-nănăx a kăy-ikfăn ännuymăt d-ălxe.

A-wa dăr-ăsmătăr Buləs Titus

⁵ Äzzăman wa d-kăy-in-oyyey dăx-ăkall wa n-Kritus, ăsmătărăx-kăy d-ad-hin-səmdəwăd a-wa hin-ăqqiimăn dăx-əşşăxəlăn n-ălkănisăt, sənnəfrənăd jer-imumənăn dăx-hak axrəm, inuşămăn jănen ənniyăt i-ălkănisăt s-əmmək wa s-kăy-omărăx s-a-wen.

⁶ Ənney-ak, ănuşăm, umaset ere wăr-iwer uđlem wăl' iyyăn, ăhaləs n-iiyăt tamădt, umasnet aratăn-net imumənăn wăren ămoos inəbbudar.

⁷ Ănuşăm ijan ənniyăt i-ălkănisăt, wăr-ufa ad-t-iwar uđlem ed ənta a issăxlăf Măssinăx tamətte-net. Wăr-itumaset anăkfor, eməkkenzăr, emăşăw n-asməd, eməkkennəs, wăr-isădărhanet terşe n-ehăre s-taxărbənit,

⁸ umaset ere ih' amăjaru, isəmmidəwet amişəl n-a-wa olăxăn, umaset emăssărho, ere oxadăn, itţəfet tāmudre şăddijăt, ănnăhădet dăx-iman-net.

⁹ Intəmet hullan dăx-udəf n-măjrăd n-Măssinăx-i wăr-ih' ăşşăk s-əmmək wa s-ătwwăsăxra aşăl äzzarăn i-ad-udabăt ənta-dăx asəmmətăr n-ăddinăt dăx-isălan n-tijəttewen ti n-texăre ta n-tidət tădduttet, isəbbuggət inăməşrayăn.

Imăsăyran n-bahu

¹⁰ Inăməşrayăn ya, hekăyy! Əllan-t s-əjut jer-ălmăssexităn wi n-kăl-Ălyăhud, wăr səjədăn i-a-wa hasăn-itawănnen, ăsijătăn măjrăd wărăn infa hărăt d-tikărras n-ăddinăt.

¹¹ Səssudəf-tăn imawăn-năsăn făl-a-s, şinməşrəyăn tihusay n-timəzzay n-ihănan əmdanen, saxren a wărăn il' əmmək i-ad-ăbbăxărăn s-taxărbənit.

¹² Təgla tanfust dăx-isălan-năsăn har innă făw iyyăn dăx-wi jăn ănnăbităn-năsăn:

«Onin kăl-Kritus-i wăren oşel ar dăx-bahu, iket n-iwăxsan, wăr kəttəwăm ar a jăm dăx tisatten-năwăn uhən-dăx wăr kăla tăynăm.»

¹³ Ijmad-t ăşşăk a-s a-wa fälla-săn ătwwănnăn, tidət. Dăx-təssəba n-a-wen-dăx a făl ărheş fälla-k a-s i dăx-săn tənăyăd ifrax, ăxtəl-t i-ad-itbət immun-net.

14 Wār läkkämnet i-tinfusen n-käl-Älyähud ti n-ibda wāla alkum i-älḡadatān n-äddināt wi ənkarñnen tidət, ässofān bahu tidət.

15 Äwadəm wa s-šäddij ulh-net, šäddij-as daḡ härät iket-net; māšan äddināt wi n-inämäšrayān s-ämmiḡäsān ulhawān-nāsān, wār t-illa a data-sān šäddiijān ed ənnyāt-nāsān hakd-däḡ ammas n-ulhawān-nāsān, ämmiḡäs.

16 Jannen s-imawān-nāsān, əzzayān Mässiñäḡ a-s ija a-wen, tikəddulān-t s-imojjan-nāsān, äsikärakəḡān, iməffelləḡān n-imānkarān wār t-illa fāw a olaḡān s-äddoben amišəl-net.

2

Tämudre ta tänihäjjät d-tuksəḡa n-Mässiñäḡ

1 Däḡ-a-wa käy-dd-iqqälān käyy Titus, wār säḡra äddināt ar tidət n-tijəttewen n-teḡäre ta n-tidət tädduttet.

2 Änn i-imḡarān, ad-ännähäḡān däḡ-iman-nāsān, nəhöjjənet d-semḡar, jarrāhān, šäddij immun-nāsān, ärhan äddināt, əşbarān.

3 Änn i-timḡaren, ad-əjənāt šund a-wen-däḡ, wār tänāt-itäjjäšet ännämima, wār säsakaynet däḡ-tesäse n-asməd, umasnet tinəsdebbären n-a-wa oläḡān;

4 səmmətärnet tiḡeḡen ti mäḡdroynen s-iket ädobännāt d-tārha n-meddən-näsnāt d-aratān-näsnāt,

5 səlmədnet-tänāt taḡimit təştarāt däḡ-ihānan-näsnāt, d-iba n-tikra i-meddən-näsnāt, d-uḡəf n-ihānan-näsnāt s-sārho, d-milḡaw d-asrəs n-iman dat-meddən-näsnāt i-udaḡ ad-ijrəw äwadəm äsarū, s-oḡām mäjräd n-Mässiñäḡ däḡ-isālan n-adubən.

6 Änn šund a-wen-däḡ i-imawaḡān, səmmətär-tān d-ad-tān-iwar sārho däḡ-härät iket-net.

7 Käyy daḡ-i n-ämizär-nāsān, umas-asān däḡ-a-wa täjjäd ere hasān-təha tətḡəläl, saḡrā äddināt tijəttewen ti n-teḡäre ta n-tidət tädduttet s-ulh šäddiijān, nəhöjj d-semḡar,

8 tajj mäjräd oḡadān wār ha tamḡənnant i-ad-əkrukəḡān imiksānān, iba-hasān taşləlt s-hanäḡ-oḡāmān.

9 Eklan, änn'-asān: sajadāt härkuk i-məssaw-wān, tajjät-asān a-wa fälla-wān ärhān, wār hasān-täşmäşäkkem mäjräd,

10 wār däḡ-sān tikərät härät, əfləsnet-kāwān härkuk i-ad-səḡarān äddināt a-wa innä Mässiñäḡ-i n-Ämaḡlas-nānāḡ.

Tädarfit ta dd-äsnäfaläl Mässiñäḡ

11 Ännuḡmät wa iḡallāsān, äsnäfaläl-t-dd Mässiñäḡ i-e d t-illām äḡḡ-adəm.

12 Ännuḡmät-net en-däḡ a hanäḡ-isälmadān a-s, iwar-anäḡ ad-nəbḡəw d-iba n-äddin d-azzal ḡarāt wälät äddunya, nəḡḡəfet däḡ-äddunya-ta-däḡ, tämudre täddiināt, toḡadāt däḡ-sārho.

13 A-wen-däḡ a hanäḡ-iwarān iket-di dd-itis älḡer wa mäqqārān s-nəjār äḡḡāma-net, a t-ämoosān: uḡəl n-ḲisaÄlmaseḡ-i n-Mässiñäḡ wa mäqqārān ilān älḡurmät, ənta a-s Ämaḡlas-nānāḡ.

14 Ənta-en-däḡ a ikfān iman-net, inḡäl ašni-net, ämmut däḡ-idäḡḡan-nānāḡ i-ad-hanäḡ-dd-ikkəs däḡ-e d t-illām iba n-iqqud, iššəşḡäḡ-anäḡ, ij'-anäḡ tamətḡe-net təḡḡazāt hak aşäl däḡ-iji n-imärkedān.

¹⁵ Isälan-wi-däx, səmmətär sär-sän äddinät, säxər-asän-tän, täxtöläd-tän sär-sän s-əmmək wa s-t-e-äj ere äzzarän i-äddinät, wär käy-iläkkähet äwadəm.

3

Asjød i-käl-əlxəkum

¹ Səktəw-dd imumənän a-s iwar-tän ad-sajadän i-imizärän n-äkall d-käl-əlxəkum-net, mašälnet a-wa fälla-sän ätiwärhän, əjənet hak ašäl fäl amišəl n-a-wa oläxän.

² Wär tižəmnet äwadəm wäl' iyyän, wär kännäset, umasnet dägg-älɣafyät s-äzedän ulhawän-näsän i-äddinät iket-näsän.

³ Wär hin-təttəwäm a-s ibda, näkkäneḍ-däx käla nämoos älžuhal s-wär t-illa a ässimɣärän, nänimäšräy i-Mässinäx, noška, wär t-illa erk derhan d-Iblis s-wädden ännihäḍ däx-näx, wär hanäx-išla ar tälläbäst jer-iman-nänäx d-derhan n-a ila äwadəm wär nəla.

⁴ Mäšan, ašäl wa dd-äsnäfaläl Mässinäx-i n-Ämaɣlas-nänäx miɣaw-net d-tärha-net i-dägg-adəm, iɣläs-anäx däx-äššarän-win-däx.

⁵ Iɣläs-anäx, wädden a-s innin ill'-e a oɣadän nämesäl, änn-ak, iɣläs-anäx däx-təssəba n-təmɣäre n-təhanint-net, iššəšdäj-anäx s-tärna n-Unfas Šäddijän i-ad-numas äddinät äynaynen; ikf'-anäx tämudre täynayät.

⁶ Mässinäx a fälla-näx-dd-äzzäbben Unfas Šäddijän s-tənoflayt däx-idəm n-Ämaɣlas-nänäx, ɣisaÄlmasex.

⁷ A-wen, ij'-e däx-ännuymät-net i-ad-numas s-tärna-net äddinät data-s lanen idəm, numas iməkkusa-net wi äsjär ättäma n-tämudre ta täɣläläti s-nəjər ättäma-net.

⁸ A-wa mäjräd änihäjjän, ärheex daɣ ad-t-sənniləsäd hullan i-äddinät i-ad-sär-s əssanän, ədgəzän wi n-imumənän däx-iji n-imärkedän, əntaden-däx a-wa ähusken infän dägg-adəm iket-näsän s-härät.

⁹ Hekäyy! Wär tänmäntäšäd mäjräd d-äwadəm wäl' iyyän ed wär t-illa a infa a-wen. Äyy fälla-k abäraj däx-ättarexän d-härät n-iməjridän wären əzley d-taxxalen, wär täsjätäd mäjräd d-amsiwi-net wärän oher härät däx-isälan n-alämär wa n-ännäbi Mosa, wär t-illa a-s infa a-wen-däx, əšləy-as, mälayäxna ɣas.

¹⁰ E-d tənähäyäd ere änimäšräyän, itattärän bädḍo-bädḍo jer-äddinät, äj'-as aɣätal wa äzzarän, təjəd-as daɣ wa s-əssin. Afäl unjäy s-asjød-hak, səssijəj-t iman-näk

¹¹ ed təssanäd a-s äwadəm šund-wen, äbas təha tuksəḍa n-Mässinäx ulh-net, imməntäl i-iman-net, oräw-dd sär-sän əlhəllak.

Ajilal n-mäjräd

¹² Afäl sär-k-in äšmašäläx Artimas meɣ Tušik, wär täjj a fäl wär hi-dd-tosed, äqɣaläx-ak däx-aɣrəm wa n-Nikabolis ed dihen-däx ad-kittəwäx ad-səssikəyäx tajrəst.

¹³ Ədhəl Zenas wa n-änabdid ənta d-Äbbäloš, udaɣ faw ad-əmyutärän s-härät däx-asikəl-näsän.

¹⁴ Wär-änhäjja ad-ämoosän imumənän, äddinät s-äqɣurän ifassän-näsän, əlmədnet iji n-a-wa oläxän i-ad-ijjəš ärramät tämudre-näsän dat-Mässinäx.

¹⁵ Ähuulän-käy-in äddinät wi ɣur-i t-əllänen iket-däx-näsän, tähuuläd-in daɣ imärhan-nänäx wi dər-nohär äddin iket-näsän.

Issänsa Mässinäx fälla-wän ännuymät iket-däx-näwän. Amin!

Täkarde ta iktäb Bulös i-Fälyamon

Äšajəš

¹ A-wa näkk, Bulös, wa ihän takärmüt däx-tössəba n-ŸisaÄlmasex d-äñña Timoti i-Fälyamon wa n-eməššerək-nänäx nəkna tärha.

² Nəktab-ak-in käyy d-älkänisät ta täžžammaxät däx-ehän-näk, nähuul-in Afya ta n-wälätma-näx däx-äddin d-Arsib wa n-amidi-nänäx däx-amjär wa nəha.

³ Ähuuläx-käwän-in iket-näwän, əttaräx daḡ s-Mässinäx-i n-Abba-nänäx d-Emäli ŸisaÄlmasex a käwän-ikfän ännuymät d-älxer.

Tämayit n-Bulös däx-isälan n-Fälyamon

⁴ E-d däläx Mässinäx-däx, ad-käy-dd-əktoḡ, ad-has-tumayäx däx-tössəba-näk.

⁵ Əjjäšän-ahi isälan n-tärha ta jed i-iməššeddəjän iket-däx-näsän d-immun-näk s-ŸisaÄlmasex.

⁶ Tattäräx s-Mässinäx ad-umas immun wa hanäx-ässiirtäyän näkk d-käyy a ih' älfäyda, ihakkän musnät n-a-wa s-näddoobät ad-t-näxdəm i-Älmasex.

⁷ Əkneey tedäwit, äñña-x däx-äddin, olwan iman-in däx-tössəba n-tärha ta käy-hät s-ənta a-s tössəsmäḡäd ulhawän n-iməššeddəjän.

A-wa irha Bulös däx-Fälyamon

⁸ Ämära, kud-däx däx-tössəba n-a-wa hanäx-osaxän, əjrawäx turhajät ḡur-Älmasex n-ad-fälla-k əfräḡäx a-wa mad-təjəd,

⁹ äsoofäx ad-ḡur-k əttaräx idəm däx-tössəba n-tärha ta n-jere-näx, näkk Bulös-i n-amḡar s-ašäl-i-däx, heḡ takärmüt däx-tössəba n-Ÿisa Älmasex.

¹⁰ Äsimätäräx-käy d-alyaḡ, Unažəm† wa dd-äwwäyäx s-immun s-ŸisaÄlmasex däx-takärmüt-ta-däx heḡ.

¹¹ Tidət, ibda, wär hak-t-iha härät mäšan ašäl-i-däx, ih'-ahi-t härät näkk hakd käyy.

¹² Näkk a sār-k-t-in-ässiglän, wär t-əzleyäx d-iman-in,

¹³ äsdärhänäx ad-ḡur-i äqḡayəm i-ad-hi-idhəl däx-edägg-näk näkk-i ihän takärmüt däx-tössəba n-Älənžil,

¹⁴ mäšan, wär-ärheḡ ad-äjäx a-s wär tärḡed, wär-ärheḡ ad-umas älxer-näk a käy-ähhuuššälän, äsoofäx, ad-dd-ifal ulh-näk.

¹⁵ Iha miši s-ajmuḡ wa käy-dd-ija har ija härät n-äzzäman, i n-atwitas n-ad-käy-in-iqqəl härkuk,

¹⁶ wädden šund akli, imäl jənnəj-a-wen, ämoos ämära, äñña-näx nəkna tärha däx-äddin. Tidət-däx a-s jeey-as tärha təmdat mäšan, käyy a iwar ad-has-təjəd tärha tojjarät ta has-jeḡ ed ämära-däx, ämoos akli-näk, ämoos daḡ älməssexi.

¹⁷ Ÿas kunta tətḡafäd-ahi däx-edägg n-äñña-k däx-äddin har əjud-i, səbbärrək-t s-əmmək wa s-hi mad-səbbärrəkäd.

¹⁸ Kunta ill'-e-t a hak-iḡsad, wäla ill'-e a t-tärwasäd, näkk a tiḡmanän.

† 1:10 1:10 Unažəm däx-Tälyunanit, älmäḡna-net: Wär infa härät.

¹⁹ Zəjjəzz hullan edəgg-wa-dəx dəx-təkarde-ta-dəx, nəkk iman-in Buləs a t-iktəbän s-əfuss-in. Ədmanəx-ak dəx a-s nəkk a hak-madän-izəl fälla-s, wär-əmçatərəx dəx s-ad-käy-dd-səktoç a-s käyy iman-nək, leeç-käy, iwar-käy əlxəçq-in ed nəkk-i-dəx a ija Məssinəx əssəbab wa käy-dd-əwwäyän s-təməzzuyt n-ŸisaÄlmaseç.

²⁰ Ÿas, əŋçə-ç, əttarəx dəx-k ad-hi-təjəd idəm dəx-təssəba n-Eməli. Afəl-hi jed a-wen ad-səsmədäd ulh-in dəx-təssəba n-Älmaseç.

²¹ Əflasəx a-s ad-hi-səjədəd, a-wen-dəx a fəl hak-in-əktəbəx, əkkasəx dəx əşşək a-s ad-hi-təjəd a ojərən a-wa dəx-k tattərəx.

²² Dərət-a-wen, səmmujnət-ah'-in edəgg dəx-əzzubbəç afəl kəwän-in-oseç ed jarəx ətçəma n-ad-hin-ətwəyyəç dəx-təssəba n-tittar-nəwän.

Tihulawen

²³ Ähuul-käy-in Ibbafraç wa n-amidi-nin dər-oharəx takərmüt dəx-təssəba n-ŸisaÄlmaseç.

²⁴ Ähuulän-käy-in dəx imidiwän-in Marçəs d-Aristarəç d-Dimas d-Luça.

²⁵ Ähuuləç-kəwän-in, əttarəx dəx-Eməli ŸisaÄlmaseç ad-əj ənnuçmət-net dəx-ənniyət-nəwän. Amin!

Täkarde ta n-Yäbranitän

Yisa a ija Mässinäy enommejräd-net

¹ Mässinäy ibda, wär t-illa äzzäman d-älmäxna s-wädden immöjrad däx-i-imärawän-nänäx s-imawän n-ännäbitän

² mäšan, däx-äzzämanän-wi-däx n-ajilal n-äddunya, Rure-s a-s immöjrad. Rure-s en-däx a ija amäkkasu n-härät iket-net, s-tärna-net önta-en-däx a-s dd-ixläk äddunya.

³ Ænta a-s ännur n-älxurmät n-Mässinäy, äñifäqqa d-Mässinäy däx-härät iket-net. Tärna n-mäjräd-net a-s iṭṭaf, ihäl a-wa ihän äddunya iket-net. Ænta a ijräwän i-dägg-adəm əmmək s-šaddijän däx-tilušawen n-abäkkad, təzzar ikk' išənnawän, äqqima dihen daw-aḡil n-Mässinäy-i n-ämänokal ilän tärna iket-net.

Yisa, ojar änjälosän

⁴ Rure-s n-Mässinäy, ojar änjälosän; təmyäre n-tifut-i tän-ija a fäl ijräw isəm ojarän wa-näsän.

⁵ Ændek ḡas däx-änjälosän-i s-käla has-ätwännä?

«Käyy a-s Rure-ḡ,
ḡur-ašäl-i-däx, näkk a-s Abba-näk.» Wär t-illa!
Ændek daḡ-i s-käla has-ätwännä?

«Ad-hak-umasäy Abba,
tumasäd Rure-ḡ.» Wär t-illa!

⁶ Mäšan, Rure-s n-Mässinäy-i n-teḡäfädde, ašäl wa t-dd-äšmašäl s-äddunya, innä:

«Ärkäḡnet data-s änjälosän n-Mässinäy iket-däx-näsän.»

⁷ Ämära, däx a-wa dd-iqqälän änjälosän, önta da a-wa fälla-sän innä Mässinäy:

«Änjälosän, inəmmušal-in, eklan-nin;
jan armuḡ wa ja täšikwält,
olähän d-efew ähijäljälän.»

⁸ Mäšan, Rure-s n-Mässinäy önta, inn'-as:

«Käyy a-s Mässinäy,
təmmənukəla-näk, täḡlal;
wi hənən Təmmənəya-näk,
täxkamäd fälla-sän s-iqqud;

⁹ ijräz-ak a-wa oḡädän,
wär səggəḡäd däx-a-wa läbasän.

A-wen-däx a fäl käy-äsnäfrän Mässinäy-i n-Mässi-k,
ikn'-ik asəddəwi,
äsof käyy imidiwän-näk.»

¹⁰ Oläs daḡ innä Mässinäy däx-isälan n-Rure-s:

«Emäli, s-aläšäl dat-härät iket-net,
käyy ad-dd-ibnän äkall,
ifassän-näk a-s dd-täxläkäd išənnawän.

¹¹ Išənnawän d-äkall,
ilkam ad-tän-iba,
iyyən-käy-dd hed edägg-näk;
ilkam ad-əjən amənd wa n-ebärdäy

¹² taḡhəd-tän-in šund abärnuš,

sömmeskäläd-tän-dd šund temäslit
isamäskal äwadəm,
mäšan, käyy, wär tēmiskiläd,
hed edägg-näk,
täxlal tayrəst-näk.»

¹³ Ǝndek ɣas dəɣ-änjälös-i s-käla has-innä Mässinäh a olähän d-a-wa innä i-Rure-s a-s has-innä:

«Ǝyyäw, ɣayəm daw-aɣil-in
hundäh har käy-äkfäh tärna fäll-išənja-näk,
äjäh-tän isökkukal dawa-k.»

¹⁴ Ak, änjälösän-i-däh fäh ma äqqalän? Ajän wädden unfasän ija Mässinäh inəmmušal has-äxdammen išamašal i-ad-ahähän tinahäxen i-äddinät wi s-irha Mässinäh ad-tän-iɣləs dəɣ-ibäkkadän-näsän?

2

Təmxäre d-tihusay n-əlxəllas wa ikfä Mässinäh dägg-adəm

¹ A-wen-däh a fäl əlxəllas wa hanäh-ikfa Mässinäh, nəjləyet dəɣ-s i-ad-wär hanäh-itəzəwit emänän wa n-tanməšrayt sār-näh dd-e-arəwän əlhəllak.

² Däh-äzzäman hin-okayän, məjräd wa jän änjälösän i-imärəwän-nänäh, itbät, wi dəɣ-sän änmäšräynen, hakd wi unjäynen s-asjəd i-məjräd-wen-däh, änmänhäyän d-iman-näsän s-a-wa dār-ogdäh a-wa äɣšädän.

³ Əlxəllas wa hanäh-ikfa Mässinäh, Emäli iman-net a sār-näh dd-äzzarän, ij'-anäh isälan n-təmxäre-net. Ɖara-s, äsdätten-anäh-t inəmmušal wi äjjihänen i-a-wa innä. Ak əlxəllas ogdähän d-a-wen-däh, afäl has-in-näšbäššäd, ma t-illan dəɣ hanäh-e-iɣləsän dəɣ-äššar wa ilkamän?

⁴ Äddinät wi hanäh-äjjihänen s-əlxəllas-wen-däh, äsdättät Mässinäh a-wa ənnän s-ijitän n-Mässinäh d-ännuyän n-härätän ässuksädnen wi ämešälän, ij'-asän dəɣ Unfas Šaddijän isuf wi itäj i-äddinät dəɣ-erhet-net.

⁵ Ǝnhəywät! Äddunya ta dd-malät s-hawän-nəha isälan-net, dägg-adəm a dəɣ-s-e-izarän wädden änjälösän.

⁶ Isälan n-a-wen-däh a dəɣ-innä əlkəttab n-Mässinäh dəɣ-edägg iyyän: «Mässinäh! Ak ägg-adəm-i-däh, ma ämoos, kittəwäd-t-dd?

Ak ma iqqal rure-s n-Adəm, ɖanäd-t?

⁷ Tidət-däh a-s jed-t daw-änjälösän

i-härät n-äzzäman dəruusän,
təkfəd-t əlxurmät d-semyar,

⁸ jed-t jənnəj-härät iket-net.»

Däh-tärna ta ikfa Mässinäh i-ägg-adəm fäll-härät iket-net, wär t-illa a hin-oyya s-wädden ij'-e jənnəj-s mäšan, hakd a-wen-däh, nəhannäh a-s ämära-däh, wädden härät iket-net a fäll-ila tärna, härät ilkamän a-wen.

⁹ Ƴisa, ämära-däh, ij'-e Mässinäh i-härät n-äzzäman dəruusän daw-änjälösän i-ad-ämmät dəɣ-ännuyämät n-Mässinäh dəɣ-təssəba n-ibäkkadän n-äddinät iket-däh-näsän. A-wen-däh a fäl ašäl-i-däh, ij'-as Mässinäh əlxurmät d-semyar əlhäk.

¹⁰ Wär t-illa a t-illan s-wädden Mässinäh a t-iṭṭafän s-emel. Ǝnta a irhän ad-inhöy Ƴisa tersəmmawen, imdəw-dd sār-s semyar iket-net, umasän äddinät äjjootnen aratän n-Mässinäh, əjrəwän əlxurmät ed təxläs-tän tärna n-Ƴisa-i

11 iššəšdäjän dagg-adəm dāx-ibäkkadän-näsän, ohär dār-sän Abba. A-wen-dāx a fäl wär tən-ässajär iman-net, iglä har tən-iḡarr s-isəm: «Ayətma-ḡ.»

12 Təssəba n-a-wen-dāx a fäl innä Ḣisa i-Mässināḡ, iktab a-wen dāx-əlkəttab, innä:

«Mässināḡ! Ad-ājāḡ isälan-näk i-ayətma-ḡ, Amələḡ-kāy dāx-ammās n-idäggan wi dāx-tažammaḡän.»

13 Oläs day innä:

«Äsifälläḡ fäll-Mässināḡ»,
təzzar ässewäd fäll-a-wen:
«Mässināḡ, tamətte ta hi-təkfed,
näkk d-ənta da, näžžimmāḡ data-k.»

14 Ḣisa, əlxəllās n-dagg-adəm a-s dd-osa, a-wen-dāx a fäl ənta-dāx, ämoos-dd ägg-adəm. Osä-dd, ämmut; tamättant-net-en-dāx a t-təkfät ašäl fäll-Iblis-i ännihädän dāx-tamättant,

15 ikkäs-dd äddinät iket-näsän dāx-əkkəlu wa dāx-tän-ja tuksəda n-tamättant.

16 Ḣisa, wädden änjälosän a-s dd-osa i-ad-hasän-ahāḡ tinahäḡen, ihäyawän n-ännäbi Ibrahim a-s dd-osa.

17 A-wen-dāx a fäl ämoos-as tähaššilt, ad-dd-umas ere olähän d-ayətma-s dāx-härät iket-net, umas U-tikutawen wa mäqqārän s-ha tähanint ulh-net, ämašäl a-wa fälla-s irha Mässināḡ i-ad-əjrəwän ḡur-Mässināḡ tenäšše n-ibäkkadän-näsän.

18 Ḣisa, ittär Iblis a-wa dāx he-āj iżžurrəb-t, idgəz-t hullan mäšan, indäras ad t-isidəw. A-wen-dāx a-s ašäl-i-dāx, äddoobät ad-ahāḡ tinahäḡen i-wi itizärrub Iblis.

3

Ḣisa, ojar ännäbi Mosa

1 Təssəba n-a-wen-dāx a fäl, ayətma-ḡ, käwänəḡ-i dd-iḡrā Mässināḡ s-iman-net, ij'-iwän iməššeddəjän, zəjjəzzät tämudre ta ittäf Ḣisa, ḡaymät t-dd-kittəwäm, ənta-i n-ännämmašul d-U-tikutawen mäqqārän hanāḡ-itajjän isälan n-tijəttewen ti fäll-igla immun-nänāḡ.

2 Äsnäfrän-t Mässināḡ, iydal dāx-älxidmät wa t-issäḡläf s-əmmək wa s-ibda, iydal ännäbi Mosa dāx-ehän-net.

3 Mäšan, semḡar wa dār-änihäḡja Ḣisa, ojärnät tisenen-net wa n-Mosa s-a äjjeen ed ere wa idäyän ehän, ojärnät tisenen-net ehän wa idäy.

4 A-wen älmāḡna-net a-s, ehän, a ämoos-dāx, ägg-adəm n-älbänna ḡas a t-idäyän mäšan, Mässināḡ ənta, wär t-illa a t-illan s-wädden ənta a t-idäyän.

5 Ännäbi Mosa, akli n-Mässināḡ, ənta a äsnäfrän i-ad-izar i-tamətte dāx-älxidmät wa ija dāx-ehän n-Mässināḡ; a innä Mässināḡ-dāx, ənta a iwar ad-t-in-isəssiwäd tamətte.

6 Mäšan Älmaseḡ ənta, äzzär-t Mässināḡ dāx-ehän-net, ij'-e jənnəj-härät iket-net ed ənta a-s Rure-s. Ašäl-i-dāx, näkkänəḡ a-s ehän n-Mässināḡ-wen-dāx a nəkkäs wär nəja äššäk dāx-immun-nänāḡ, äsihäläyläy-anāḡ ättäma wa hanāḡ-äsjär.

7 Isälan n-a-wen-dāx a dāx-imməjräd Unfas Šäddijän a-s innä:
«Ašäl-i-dāx, afäl təsläm i-mäjräd dd-ifalän Mässināḡ,

8 wär has-täḡäräm ulhawän-näwän
šund a-wa jän imärawän-näwän-i

hi-jänen tømmez n-tihäyyen dāḡ-tanəzruft.

⁹ Äzzāman-en orāmān-ahi imārawān-nāwān,
kud-dāḡ wār t-illa iji n-Māssināḡ
s-wādden jey-t data-sān har əkkozāt timərwen n-awātay.

¹⁰ Ijjāš-ahi fälla-sān aḡkār, ənney-asān:
«Efrayān ulhawān-nāwān hahi,
tabarāt ta s-āyelāḡ, ad-tāt-tärməsām, tunjäyām sār-s.»

¹¹ A-wen-dāḡ a fāl, a-wa dāḡ hi-ija aḡkār-nāsān,
hāḡāḡ-asān kud ilkam
ad-əjjašān ākall wa dāḡ-hasān-kittəwāḡ i-tāsonfat.»

Ejlyāt dāḡ-immun-nāwān

¹² Ayətma-ḡ, ājāt ənniyāt i-iman-nāwān; wār-itātājrawet wāl' iyyān dāḡ-
wān s-lābas wāla-i s-āqqr ulh-net, igdal-as a-wen-dāḡ asjed i-təнна n-
Māssināḡ-i iddarān.

¹³ Māssināḡ a innā: «Ašāl-i-dāḡ», a-wen-dāḡ a fāl hak iyyān dāḡ-wān,
āqgaymet hak ašāl isamatār amidi-net i-ad-wār-āsyār wāl' iyyān dāḡ-wān
ulh-net, itidəw dāḡ-abākkaḡ.

¹⁴ Ädduuttāt āmāra a-s nāmeedāw d-Älmaseḡ a nəkkās nəjlay dāḡ-
alkum-has s-əmmək wa s-sār-s nomān ašāl äzzarān.

¹⁵ Inn'-anāḡ əlkəttab n-Māssināḡ:
«*<Ašāl-i-dāḡ,*
afāl təslām i-mājrad dd-ifalān Māssināḡ,
wār has-tāsyārām ulhawān-nāwān
šund a-wa jān imārawān-nāwān ibda
a-s has-änmäšräyān.»

¹⁶ Ämāra, ma āmoosān äddināt-win-dāḡ əslānen i-mājrad n-Emāli māšan
änmäšräyān-as? Wār t-illa a āmoosān ar tamətte-tədi-dāḡ dd-izzəzjār
ännābi Mosa ākall wa n-Miḡra.

¹⁷ Mi fäll t-ijjāš aḡkār har ijā əkkozāt timərwen n-awātay? Äddināt wi
di-dāḡ ofānen abākkaḡ s-ašāl-i-dāḡ, āba-tān, ənsānāt tifəkwen-nāsān dāḡ-
tanəzruft.

¹⁸ Mi s-ihā Māssināḡ ti-net a-s ihāḡ innā: «Wār-ilkem ad-əjjašān ākall wa
dāḡ-hasān-kittəwāḡ i-tāsonfat?» Äddināt-wi-dāḡ fälla-s äffulāgnen, a-s
ihā ti-nāsān.

¹⁹ A-wa isalmad-anāḡ a-s äddināt-en, tāḡart n-ulhawān-nāsān a hasān-
igdalān ad-əjješān ākall wa n-tāsonfat.

4

Tāsonfat ta ihakk Māssināḡ

¹ Māssināḡ iman-net a hanāḡ-ijjāšān ārkāwāl n-a-s ilkam ad-ḡur-s
nəjrəw tāsonfat, adiš nəjet ənniyāt i-iman-nānāḡ; wār kāwān-itājjāšet
wāl' iyyān inkazān i-iman-net uješ n-ākall-wen-dāḡ n-tāsonfat.

² Älənzil-wa-dāḡ s-nəsla a-s əslān imārawān-nānāḡ māšan, wār tān-infa
s-hārāt, āsjādān-asān māšan wār sār-s omenān i-ad-tān-infəw s-hārāt.

³ Nəzlay dār-sān nəkkāneḡ-i omānnen s-ḡisa ed nəjjāš tāsonfat ta
hanāḡ-ikittəw Māssināḡ a-s innā i-imārawān-nānāḡ ibda: «Ijjāš-ahi fälla-
sān aḡkār, hāḡāḡ-asān a-s wār-ilkem ad-əjjašān ākall wa dāḡ-hasān-
kittəwāḡ i-tāsonfat.» Wen-mājrad, a-s t-ija Māssināḡ, ixlak-dd a-wa t-illān
iket-net.

⁴ Ill'-e edāgg dāḡ-əlkəttab n-Māssināḡ innān fäll-ašāl-wen-dāḡ n-əssa:
«Ašāl wa s-əssa,

ässunfa Mässinäx däx-a-wa t-išlän iket-net.»

⁵ Ätwännä daḡ a-s:

«Äkall wa s-hasän-əjjäšäx ärkäwäl-net,
wär däḡ-sän ilkem ad-t-əjjašan i-täsonfat.»

⁶ Äddinät wi äzzarnen s-mäsällät n-Älənžil, wär əjješan täsonfat-net ed unjäyän s-asjəd-has. Mäšan, wär hin-ikkəs a-wen a-s əllan-t iyyäd he-ijjəšnen täsonfat-ten-däḡ.

⁷ A-wen-däḡ a fäl issəbdäd Mässinäx ašäl iyyän daḡ s-ijä isəm: «Ašäl-i-däḡ.» Okäy äzzäman-wen-däḡ s-a äjjeen, oläs daḡ mäjräd-wen-däḡ atwənn s-əmm n-ännäbi Dawəd, ätwänn'-anäx, innä Mässinäx:

«Afäl təsläm i-mäjräd dd-ifalän Mässinäx ašäl-i-däḡ,
wär has-täşḡäräm ulhawän-näwän.»

⁸ Äkall wa s-ijjäš Mässinäx ärkäwäl-net i-käl-ibda, ənnar ijraw Yešwa i-tamətte-net uješ-net i-ad-däḡ-s sunf, wär-itəmḡutor Mässinäx s-ad-äj isälan n-ašäl n-täsonfat ilkamän.

⁹ Täsonfat šund-ten-däḡ a təlkamät däḡ-tamətte ta n-Mässinäx.

¹⁰ Äwadəm wa ijjäšan täsonfat ta dd-ijä Mässinäx, ad-ijrəw täsonfat däḡ-a-wa t-išlän iket-net šund əmmək wa s-ässunfa Mässinäx däḡ-a-wa t-išlän ənta iman-net.

¹¹ A-wen-däḡ a fäl, rurədät-anäx uješ n-täsonfat-ten-däḡ, wär hanäḡ-itäjjäšet äwadəm wäl' iyyän hin-oḡan fäl-a-s innin unjäy s-asjəd i-a-wa innä Mässinäx šund a-wa jän imärəwän-nänäx ibda.

¹² Mäjräd n-Mässinäx, ihakk tämudre, ila tärna, ojar təkoba n-əssin imawän əmsädnen amsud, ibiddəw iman d-unfas, itakk jer-izəmmuz d-axäräbba; wär t-illa derhan wäla anəzjum ihan ägg-adəm s-wädden ihannäy-t, issan sār-s.

¹³ Wär t-illa fäw a ihan äddunya idrajän i-Mässinäx. Wär t-illa a dd-ixlakän s-wädden izzaf data-s, ənta-en-däḡ daḡ a-s ilkam a data-s dd-nəbdəd iket-däḡ-nänäx, iffukkär-dd a-wa nämešäl iket-net.

Yisa a-s U-tikutawen wa mäqqärän

¹⁴ Šamad, wär t-ih' äššäk a-s nəla U-tikutawen ijan təmḡäre-ten-däḡ, iräs išənnawän, ikkä wa däḡ-sän-in-illan, ämoos-anäx änadbid ḡur-Mässinäx, a-wen a t-ämoosän Yisa-i n-Rure-s n-Mässinäx, adiš, näknet uḡəf n-tijəttewen n-immun-nänäx.

¹⁵ U-tikutawen wa mäqqärän nəla, wädden-i s-wär ha tähanint ulh-net wäla-i wärän äddobät ad-hanäḡ-idhəl däḡ-iba n-äşşahät-nänäx. Äžžurräb-t Iblis s-əmmək wa s-hanäḡ-itizärrub däḡ-härät iket-net mäšan, wär t-illa abäkkad ämešäl.

¹⁶ Wär hanäḡ-isärməḡet härät, nahəzet-in tasäqqaymut n-Mässinäx ta n-ännuḡmät s-ənniyät ozjan i-ad-hanäḡ-aḡən tähanint, äkf'-anäḡ ännuḡmät, ilal-anäḡ älwäqq wa d-nämḡatär s-tidət-däḡ s-a-wen.

5

¹ U-tikutawen wa mäqqärän, jer-tamətte ta n-käl-Işrayil a däḡ-dd-itanäfran, isäxdəm-t Mässinäx, umas änadbid n-dägg-adəm jere-sän d-Mässinäx. A-wa ihakk ägg-adəm i-Mässinäx, hakd tikutawen ti itäjj i-Mässinäx, u-tikutawen a iwar ad-ikət a-wen i-Mässinäx i-tenäšše n-ibäkkadän.

² U-tikutawen wa mäqqärän, äddobät ad-aḡən tähanint i-wi əzhälnen i-a-wa innä alämär d-wi has-tinməşriynen ed ənta iman-net ägg-adəm šund əntəneḡ.

³ A-wen-däx a fäl t-iwar ənta iman-net ad-ikkəs takute fäll-iman-net i-ibäkkadän s-tizarät s-əmmək wa s-itəkkat fäll-äddinät wi iyyädnen i-ad-əjrəwän tenäšše.

⁴ Wär t-illa äwadəm äddooben ad-dd-iggəd xas, äj iman-net u-tikutawen wa mäqqārän, ed Mässinäx a dd-iyarän äwadəm s-a-wen, s-əmmək wa s-dd-iyra ibda Harun s-iman-net.

⁵ Älmasex daḡ, wär dd-igged xas, ijä iman-net ämänokal n-käl-tikutawen, Mässinäx a t-ikfän turhajät-ten-däx ed iyr'-e-hi-dd, inn'-as:

«Käyy a-s Rure-x,
xur ašäl-i-däx,

näkk a-s Abba-näk.»

⁶ Oläs daḡ innä Mässinäx däx-edägg iyyän däx-əlkəttab:

«Tumast-näk n-u-tikutawen wa mäqqārän,
täxlal ed təkam i-ta n-Mälkässäddiq.»

⁷ Äzzäman wa ikkäs Yisa fäll-ärori n-äkall-i-däx, ikkas äššäk n-a-s Mässinäx ila tärna s-t-iyläs-dd däx-tamättant; a-wen-däx a fäl ijəynän Mässinäx, ittär däx-s älhimmät s-äššahät, iyläs-t Mässinäx, iqbäl tittar-net ed äsräs iman-net data-s.

⁸ Yisa, tidət, Rure-s n-Mässinäx a ämoos mäšan a-wen wär fälla-s in-iwwey ahänay n-aḡāna.

⁹ Šamad ämešäl a-wa fälla-s irha Mässinäx iket-net ad-ijrəw turhajät n-ad-umas i-äddinät wi has-sajadnen Ämaylas wa tän-ihakkän əlxəllas ixlälän.

¹⁰ Mässinäx a t-ijän U-tikutawen wa mäqqārän ilkamän i-tumast ta n-Mälkässäddiq.

Ehel n-s-data däx-immun

¹¹ Ayətma! Ill'-e a äjjeen s-närha ad-hawän-tän-nänn däx-isälan-wi-däx mäšan wär hanäx-lämmiḡ asəssəjrah-nəwän ed wär-irmeḡ ujreh-nəwän.

¹² Käwäneḡ-i s-ašäl-i-däx, änihäjjä s-arü d-tämoosäm imusänän saḡranen, nəhannäy a-s härwa-däx tämiḡatäräm s-ere käwän-issäḡrän tijəttewen ti äzzarnen n-mäjräd n-Mässinäx. Tolähäm härwa d-aratän tattädnen, wär täddobem tetäte n-imənsiwän äzzaynen.

¹³ Äwadəm ya itattädän, amärkəs a ämoos; amärkəs daḡ, təssanäm a-s wär t-illa a ijarah däx-tämudre bäršəy ad-ilməd a-wa oḡädän.

¹⁴ Imənsiwän wi äzzaynen, äddinät äḡradnen lanen tayətte s-əbḡän a-wa oläḡän d-a-wa läbasän a tän-tattänen.

6

¹ A-wen-däx a fäl tijəttewen ti äzzarnen, räqqisnen fäll-nätt teḡäre däx-isälan n-Älmasex, nakəyet-tänät s-a-wa hanäx-itajjän meddən äḡradnen. Tijəttewen-en-hi, a tänät-ämoosän: tätubt däx-timašalen ti wären ənfa härät, immun s-Mässinäx,

² itwəsəlmiḡän däx-aman, isälan n-asəwär n-ifassän iḡäfawän n-äddinät i-ad-däx-sän ijän älbāraka, tanäkra jer-inəmmuttan d-isälan n-ašäl wa n-tebädde.

³ Ämära, nähəlet data-näḡ; a-wen-däx daḡ a he-näj kunta irḡä Mässinäx.

Udaḡät i-anməšri

⁴ Ämära, äddinät wi s-ora ännur n-mäjräd n-Mässinäx tiḡtawen-näsän, äkräbben tiḡudawen ti ihäkk Mässinäx, osäḡän d-Unfas Šäddijän,

⁵ äžžorräben täzude ta ija mäjräd n-Mässinäx, əlmädän s-təmyäre n-addunya ta dd-malät,

⁶ mäšan hakd a-wen-däx iket-net, əqqälän dəra-s, ođän dəx-erk imojjan-näsän wi n-ibda, a-di, əbas hasän-t-təlla təmujrizt tän-dd-siɣulät Ālmasex ed a-wa jän, wär-izley d-a-s atwəsləb əynayän a tājjan i-Rure-s n-Mässinäx, tājjan-t isədsa dat-əddunya iket-net.

⁷ Ākall, wädden, e-d t-iwät əjəna har dəx-s əddomät əwadəm härät, ad-dd-isədwəl teyəšše tənfat əddinät wi t-əjyäknen mäšan, Mässinäx ad-dd-izizəbben ərräxmät-net fäll-əkall-en.

⁸ Afäl wär dd-isədwəl əkall-en ar isənnanän d-tabəŋŋənt, adiš, wär-infa härät, wär has-in-əqqima ar ad-t-ilxən Mässinäx, isəntəs terk teyəšše ta dd-issədwäl.

⁹ Ayətma-i nəkna tərha, a hawän-ija mäjräd wa hawän-nətəjj dəx-täkmo-dəx, insa ənniyät-nänəx dəx-isəlan-nəwän, wär nəkkes ättäma, ed nəssan a-s ašrut wa oləxän a waräm, ənta-den-dəx dəx ašrut wa ih' əlxəllas.

¹⁰ Mässinäx, oɣad dəx-a-wa itəjj iket-net, wär hin-ittəwa a-wa kəwän-išlän d-tərha ta jəm i-iməššeddəjan; a-wen jəm-t, ənta-den-dəx dəx a-wa kəwän-išlän har ašäl-i-dəx.

¹¹ Derhan-nänəx hawän da: Ədgəzät dəx-a-wa həm härkuk i-ad-kəwän-əkf Mässinäx a-wa ih' ättäma-nəwän imda.

¹² Äyyät fälla-wän sendad, tələlət immun d-akuyəd wa jän əddinät wi omännen s-Mässinäx s-ijjəš ərkəwäl n-ad-tän-əkf a-wa s-hasän-innä.

Ərkəwäl wa ijjəš Mässinäx i-imumənän a iha ättäma wa n-tidət

¹³ Äzzəman wa d-ijjəš Mässinäx ərkəwäl i-ənnəbi Ibrahim, inhäy a-s wär t-illa ere t-illan jənnəj-s s-has-ihəd ɣas, ihəd-as s-iman wi-net, inn'-as:

¹⁴ «Ibrahim, hədəx-ak a-s ad-dəx-k əjəx əlbərəkə, tətəy əzzurəyät-nək.»

¹⁵ A-wa innä Mässinäx i-Ibrahim, äzzəydər-as, iqqäl-as, ijrəw-t dəx.

¹⁶ Dəgg-adəm äzzəman-en, e-d itəhhəd əwadəm i-iyyän, ad-əjən tahuđe s-ere tän-ojərən; tahuđe dəx ten-dəx a he-tumasät əddimmana n-ərkəwäl wa ənməjjəšän.

¹⁷ A-wen-dəx a fäl Mässinäx iman-net, irha ad-isəkən iməkkusa wi təkka tənfa n-ərkəwäl wa hasän-ijjəš, issəlməd a-s wär-ilkem ad-irza dəx-tənnanet, a-wa innä, ad-əj.

¹⁸ Əllan-t əssin ijitän s-wär-ilkem ad-sär-sän iqqal Mässinäx wəla ad-əbbuggät a-wa innä: ərkəwäl wa ijjəš d-təhuđe ta əssewəd fäll-a-wen i-ad-isədduttət ərkəwäl-en.

A-wen-dəx a fäl nəkkəneđ-i əjrəwnen tinahəxən ɣur-Mässinäx, mäjräd-wa-dəx, əsikoyəd-anəx s-əššahät i-ad-nəjrəw ättäma wa hanəx-əsjər Mässinäx.

¹⁹ Ättäma dəx wa-hi, oläh d-asəmdi wa əšsohen n-ti n-əho, intam dəx-uhawän-nänəx, wär-ijənn bahu. A-wen-dəx a fäl ərido wa ibdən edəgg wa šəddijän d-wa iknän təšədje dəx-əhän n-əmudd wa məqqārən, əmer'-anəx əməra i-ad-nəjjəš har ammas-net.

²⁰ Edəgg-en-hi, äzzar-anəx sər-s ɣisa, əmoos U-tikutawen wa məqqārən ixlälän, ilkamän i-tumast ta n-Məlkəssəddiq.

7

Tumast ta n-ɣisa, tənifəqqa d-ta n-Məlkəssəddiq

¹ Mälkässäddiq, ənta a-s kälä ämoos ämänokal n-ayrəm wa n-Saləm, ənta a-s u-tikutawen n-Mässinäx-i iknän aḍkul. Däx-əzzäman-net ad-ijäd Ibrahim imänokalän n-ikallän iyyäd, irz'-en-dd. Älwäqq wa dd-iqqäl Ibrahim ifal-dd akənnas, ilkäḍ-as Mälkässäddiq, ittär-as däx-Mässinäx a däx-s ijän älbäräka.

² Däx-a-wen-däx ad-t-ikfa Ibrahim tämukäst n-a-wa ila däx-ehäre. Mälkässäddiq, älmäxna n-isəm-net: «Ämänokal n-iqqud»; ayrəm daḡ wa n-Saləm-i fäll-äminakal, älmäxna-net: «Ämänokal n-älxer.»

³ Mälkässäddiq, wär hanäx-jen əlkəttabän isälan n-abba-net wälä anna-net wälä ättarex-net; wär-ätwässän əmmək wa s-iwa wälä əmmək wa s-ijmäd äddunya, ätiwässän xas a-s oläh d-Rure-s n-Mässinäx ed tumast-net i-u-tikutawen, täxlal.

⁴ Ähaləs-i-däx, tidət-däx a-s i mäqqärän. Təmyäre-net a dd-toräwät a-s wälä Ibrahim-i n-amxar n-amäzzaḡ, ikkäs-as tämukäst n-a-wa dd-ohäx däx-akənnas iket-net.

⁵ Dägg-Lewi-i n-käl-tikutawen, innä alämär wa n-ännäbi Mosa, əntäneḍ a he-rammäsnen timukäsen n-tamətte ta n-käl-Işrayil-i n-temiḍt-näsän kud-däx iket-däx-näsän ijəllan n-Ibrahim a dd-əzjarän.

⁶ Mälkässäddiq ənta, kud-däx, wär-ih' ättarex wa dd-itran tumast n-u-tikutawen, irmäs däx-Ibrahim-i s-ijjäs Mässinäx ärkäwäl, tämukäst, oläs daḡ qarät-a-wen, ittär däx-Mässinäx a ijän älbäräka däx-Ibrahim.

⁷ Wär t-ih' äššäk a-wen a-s äwadəm wa ojärän, a itajjän älbäräka däx-wa ojär.

⁸ Dägg-Lewi i-n-käl-tikutawen, tidət, əntäneḍ a rammäsnen timukäsen mäšan dägg-adəm xas a ämoosän fäll-la tamättant tärna, a-s ija a-wen, Mälkässäddiq-i irmäsän tämukäst fäll-Ibrahim, ənnän-anäx əlkəttabän a-s iddar härkuk.

⁹ Näddoobät fäw ämära-däx ad-nänn a-s dägg-Lewi-i rammäsnen tämukäst, əntäneḍ iman-näsän, əkkasän-tät i-Mälkässäddiq ed ikkäs-as-tät Ibrahim-i tän-dd-äshäyāwän.

¹⁰ A-wen, ma t-ijän? Ij'-e a-wa s-a-s itäj j a-wen-däx, iha Lewi tiktukar n-ti-s Ibrahim äzzäman wa d-ämmoqqäs d-Mälkässäddiq.

Yisa, ojär Lewi wa n-U-tikutawen

¹¹ Alämär wa ikfä Mässinäx tamətte ta n-käl-Işrayil, tikutawen ti täjjän käl-Lewi-i n-käl-tikutawen, a fäl igla. Ənnär əjrawnät tikutawen-tin-däx tenäšše n-ibäkkadän, iket-di, wär-itəmyutor Mässinäx s-asəssiwi n-u-tikutawen iyyän dār-sän izlayän ijan alädäb wa n-Mälkässäddiq, änn-ak, ad-äqqayəm-wen-däx ilkämän i-Lewi-i dd-ijmädän alädäb wa n-Harun.

¹² Ämära, šämad imməskäl älxal wa n-käl-tikutawen, adiš, ähhuššäl daḡ ad-ämmäskäl alämär wa tän-dd-iqqälän.

¹³ Emäli-i s-hawän-nəha ti-net, isälan-net hakd-däx tawset ta dd-izjär, wär tät-iha ere s-kälä iqqäl u-tikutawen; wär t-illa ere ihan temiḍt-net s-kälä äshaha aḍutän wi n-tikutawen däx-edägg wa däx-raqqänät.

¹⁴ Ädduuttät a-s Emäli-nänäx, tawset ta n-Yähuda ad-dd-izjär. Äzzäman daḡ wa d-imməjräd ännäbi Mosa däx-isälan n-käl-tikutawen, wär dd-iḍkel isälan n-tawset ta n-Yähuda.

Yisa, u-tikutawen wa mäqqärän ixlälän

¹⁵ Tumast n-Yisa i-u-tikutawen, tämoos a iglan fäll-tumast ta n-Mälkässäddiq; ässiitbät a-wen a-s ənta d-Lewi, wär-olehän.

¹⁶ Tumast-net i-u-tikutawen, wädden erhet n-ägg-adəm a tät-dd-oräwän; ijräw-tät s-äššahät n-tämudre-net ta täxlälät.

17 Äjjöyha Mässinäy däx-isälan-net däx-өлкөттab a-s innä:
«Ad-käy-äjäx u-tikutawen ixlälän
iglan fäll-tumast ta n-Mälkässäddiq.»

18 Alämär wa dd-äzzarän, izjār-in ed wār-ila tärna s-ixlās äddinät däx-
ibäkkadän-näsän, wār t-illa älfäyda t-ihan.

19 Alämär wa n-ännäbi Mosa, indär-as ad-sär-näx dd-isəmdəw təšədje,
a-wen-däx a fäl ämära, nəkräš ättäma ufän wa hanäx-äsjär alämär. Ğnta-
den-däx a-wa hanäx-ikfän turhajät d-ad-nənmihäz d-Mässinäy.

20 Darät-a-wen daḡ, Mässinäy iman-net a ihädän n-a-s ad-umas Ḡisa u-
tikutawen wa mäqqārän. Tahuḡe šund ten-däx, wār t-illa u-tikutawen
s-käla has-tät-ija.

21 A-wen-däx a fäl ašäl wa d-ämoos Ḡisa u-tikutawen, ihäd-as Mässinäy,
inn'-as: «Näkk Emäli a ihädän, a-wa ənnex daḡ wār-ilkem ad-sär-s
äqqaläx: ad-tumasäd u-tikutawen ixlälän.»

22 Ämära, Ḡisa a-s tasətbət n-tassayt ta nəja d-Mässinäy, ənta a hanäx
idmänän ärkäwäl n-tassayt ufän wa n-ibda.

23 Käl-tikutawen, əjjətän, nəssan a-s wār tän-iha-i ähojän däx-tumast
n-u-tikutawen, ed təgdal-asän tamättant a-wen.

24 Ḡisa ənta, iddar härkuk. A-wen-däx a fäl tumast-net i-u-tikutawen,
wār-ilkem ad-t-təjmaḡ täylal.

25 A-wen-däx a fäl äddinät wi jänen Ḡisa əssəbab n-tassayt-näsän d-
Mässinäy, ila tärna s-tän-dd-ixlās däx-e d t-illäm abäkkad ed härkuk iddar,
itəddal-asän daḡ Mässinäy.

26 Ijmaḡ-t äššäk a-s ämänokal n-käl-tikutawen šund-wen-däx a-s
nämiḡatär itəmmälän jere-näx d-Mässinäy. Ḡisa, äddoobät a-wen ed
šäddiij, wār t-illa iššaki t-iwarän, wār-il' älyib, ibḡ'-e Mässinäy d-
inäsäkkadän, idkäl-t s-diha dd-əmdän išənnawän.

27 Wār-ämḡatär daḡ šund a-wa jän käl-tikutawen wi iyyädnen-i s-ämoos
färəḡ ad-təkkatän fäll-ibäkkadän-näsän hak ašäl təzzar, əkətän fäll-wi n-
tamətte. Ḡisa ənta, ikf'-iman-net s-iiyät, takute ta ija təgdäh härkuk, äbas
təlkam daḡ tiyyät säl ten-däx.

28 Äddinät wi ija Ättäwrät wa n-ännäbi Mosa käl-tikutawen wi
mäqqornen, han-tän äddinät rəkkəmnen mäšan, mäjräd wa ija Mässinäy
a-s ihäd darät a-s dd-äzzäbbät alämär, mäjräd-wen-däx a-s əssəbab wa dd-
oräwän a-s ämoos Rure-s n-Mässinäy u-tikutawen wa mäqqārän ixlälän
s-wār t-illa älyib t-iwarän.

8

*Isälan n-Ḡisa, U-tikutawen wa mäqqārän d-ärkäwäl n-tassayt wa
äynayän*

1 Ämära, edägg-wa-däx, äknät-t ujreh, ila tənfa: «U-tikutawen wa
mäqqārän nəla, wār t-illa a dār-änifäqqa; äqqiima däx-išənnawän daw-
axil n-Mässinäy i-ilän tärna.»

2 Ämašal wa t-iwarän, itajj'-e däx-edägg wa šäddijän ihän ehän n-ämudd
wa mäqqārän n-tidət, wen ənta, Emäli a t-idäyän, wädden dägg-adəm.

3 Käl-tikutawen wi mäqqornen, äsmänakäl-tän Mässinäy i-ad-hakkän,
təkkatän fäll-iman wi-näsän; a-wen-däx daḡ a fäl u-tikutawen wa
mäqqārän nəla, ähhuuššäl-as ənta-däx ad-ikət härät i-Mässinäy.

4 Ğnnär iwar Ḡisa ärori n-äkall, iket-di, wār-itumas u-tikutawen ed fäll-
ärori n-äkall-i, əllan-t äddinät wi tajjänen a-wen s-əmmək wa s-t-ifräd
alämär

⁵ mäšan äddinät-en, a-wa tän-išlän, taliwen n-a-wa dār-olähän išənnawän a ämoos fäl-a-s ännäbi Mosa iman-net, a-s has-innä Mässinäx ad-idəy ehäket wa šaddijän n-tämoqqest, inn'-as:

«Əqqən ehäket olähän d-wa käy-əssəknäx fäll-tadəxt.»

⁶ Ämašal wa ufän izləyän d-wen-däx, ijrāw-t Ƴisa, fäl-a-s, ämoos ämära, änaiddid n-ärkäwäl n-tassaxt ufän wa äzzarän.

⁷ Ənnär wär-ih' älxib ärkäwäl n-tassaxt wa äzzarän, wär-itəməskil ijješ-dd iyyän äynayän edägg-net.

⁸ Äsmäqqa Mässinäx fäll-tamətə-net, inn'-as:

«Əlkamän išilan däx-e-äjäx d-ehän wa n-käl-Işrayil d-ehän wa n-käl-Yähuda ärkäwäl n-tassaxt äynayän.

⁹ Ärkäwäl izlayän d-wa jeḡ d-täy-sän

ašäl wa tän-dd-ärmäsäx s-äfuss,

əzzəzjārāx-tän-dd Mişra.

Jeḡ dār-sän ärkäwäl-wen-däx mäšan, ärfädän-t;

jän a-wen ḡas, əšläyāx-asän.

¹⁰ Afäl okäyän äzzäman,

ad-ahärāx ärkäwäl d-ehän wa n-Işrayil;

ärkäwäl-en, ənta da a-wa fäll-ibdäd:

ad-äjäx tijəttewen n-alämärän-in däx tiyətwen-näsän,

əktəbäx-tänät fäll-ulhawän-näsän,

umasäx Mässinäx-i n-Mässi-sän, umasän tamətə-nin.»

¹¹ Ad-äbas-tän-iha wäl' iyyän ämiḡatärän s-ad-isäḡär ägg-äkall-net, wäla i-he-innən i-änḡa-s: «Uksad Emäli» fäl-a-s ad-hi-əzzəyän iket-däx-näsän, ḡur-wa əndärrän har tawəḡäd wa wäššärän;

¹² ad-hasän-in-änšäx älxibän-näsän iket-däx-näsän, itawäx-in day ibäkkadan-näsän iket-däx-näsän.

¹³ A-wen-däx ija Mässinäx a ässiilmädän a-s ärkäwäl n-tassaxt wa äynayän ufa wa ärewän ed wäššar. Härät-i-däx day, e-d wäššar, išwar t-in-äba.

9

Tassaxt ta täynayät t-təllät jer-imumənän d-Mässinäx

¹ Ärkäwäl wa äzzarän, ila alämärän-net tiḡədnen tamətə däx-isälan n-älxibadät d-edägg wa s-irha Mässinäx ad-t-täḡbəd tamətə däx-s.

² Edägg n-älxibadät äzzäman-en, a has-itawännən: ehäket wa n-tämuqqest. Ehäket-en, ija sänatät tizunawen: täzune ta s-itizar äwadəm, isəm-net: edägg wa šaddijän. Ənsanät däx-s tisəskar n-imämmälän əzwaynen d-tasəskärt tiyyät fäll-ənsanät tijəlwen n-tikutawen i-Mässinäx.

³ Illa-hin i-edägg-en, ill'-e ärido wa s-əssin ḡarät t-illa edägg wa s-itawänna: Wa iknän təšədje.

⁴ Insa äkoss n-oräx wa däx-räqq matälxer ta n-älxibadät. Däx-ammäs n-edägg wa iknän təšədje, tənša takbat ta n-ärkäwälän n-tassaxt s-ilsa oräx ifäyyän-net. Takbat-en n-ärkäwäl, ənta a iha äkoss n-oräx wa iha mana,† talimmizt n-Mässinäx ta dd-äzzäbbät fäll-käl-Işrayil äzzäman wa d-əzzäḡän tanəzruft. Tənša däx-s tāborit ta dd-tənšärät s-käla tät-itḡäf Harun d-isəllumän n-tihun wi fäll-iktab a-wa innä Mässinäx.

⁵ Jənnəj-takbat-en, äššiiwärän əssin änjəlosän n-älxurmät janen tele s-afrewän-näsän i-ahär n-takbat ta n-ärkäwäl. A-wen a isalmadän tamətə

† 9:4 9:4 A-wa isəm n-amənsi wa dd-äzzäbbät Mässinäx fäll-käl-Işrayil äzzäman wa d-hän tanəzruft. Itawänn'-as däx-Tälyunanit: Mana; itawänn'-as däx-Tämasäxt: Taləmmizt n-Mässinäx.

s-älxurmät n-Mässinäx d-emel-net. Ashär n-takbat n-ärkäwäl en-däx a fäll inaqqäl ašni n-tikutawen i-tenäšše n-ibäkkadän-näsän. Mašan, wär hawän-e-əjjəšäx asiḍən n-härätän wi hānen edägg-en ämära.

⁶ Emmək-wen-däx a-s ənsan härätän däx-ehäket wa n-tämuqqest. Edägg wa äzzarän, tajjäšan-t käl-tikutawen hak ašäl i-ad-əjən älxidmät-näsän

⁷ mašan edägg wa iknän təšədje, u-tikutawen wa mäqqārän xas a ilan s-ujəš-net iyyän n-ašäl däx-awätay, wär has-t-illa daḡ ujəš n-edägg-en ar s-ad-ässinxäl ašni däx-təssəba n-ibäkkadän wi-net hakd-däx däx-təssəba n-inməšriyän wi s-wär totes tamətte amišəl-näsän.

⁸ Enta den-däx daḡ əmmək wa s-hanäx-isalmaq Unfas Šaddijän a-s däx-äzzāman-en a ikkäs ehäket n-tämuqqest-wen-däx ill'-e, wär tämera tabarät s-edägg wa iknän təšədje.

⁹ Ämoos a-wen tele dd-tässiktät äzzāman-wa-däx nəha, isalmaq-anäx a-wen a-s äddinät wi sänxalnen ašni wäla wi tajjänen tikutawen ti iyyäḍnen, wär hasän-ijrew a-wen iba n-iššaki n-iman-näsän wäla təšədje n-ulhawän.

¹⁰ Älxibadät-näsän, insa fäll-älxadatän n-dägg-adəm har ašäl wa d-isimtəttəy Mässinäx härät iket-net. Älxadatän-en, ənsan fäll-älwällatän d-isälan n-a-wa s-ila äwadəm s-ad-t-äks d-a-wa s-ila s-ad-t-isəw.

Ašəšdaj wa itäjj ašni n-Ÿisa i-ägg-adəm

¹¹ Iгла a-wen-däx s-əmmək-en-däx har dd-osa äzzāman wa d-äsmättäy Mässinäx talxa, išräy-dd a äynayän. Osä-dd Älmasex, ənta a-s ämänokal n-käl-tikutawen wa hanäx-ijräwän a-wa s-hanäx-ijjäš Mässinäx ärkäwäl-net, ənta a ijjäšan ehän n-ämudd wa ojärän ufän wa äzzarän ikräs ägg-adəm; wen-hi, wär t-la daḡ äddunya-ta-däx dd-tätwäxläkät.

¹² Ehän-en-hi, iyyän n-ujəš a has-ija Älmasex, wär t-ijješ s-ašni n-išulay wäla iwdesän, ašni-net ənta iman-net a inxälän i-ad-hanäx-išəšdəj, nəjrəw tenäšše n-ibäkkadän təmdat.

¹³ Äddinät wi änmäšräynen, təšədje ta fälla-sän ifräd alämär, ašni n-išulay d-iwdesän d-iməkkärora n-iwan a fälla-sän inaqqälän i-ad-išdajän däx-ibäkkadän-näsän,

¹⁴ äb' ätṭäma n-ämära-i s-ašni n-Älmasex-i ojärän a-wen a hanäx-išəšdəjän däx-ibäkkadän-nänäx. Tärna n-Unfas Šaddijän-i ixlälän a t-ikfän tädabit ta s-ikf' iman-net, ämoos takute wär iwer älxib. Ašni-net ənta-en-däx a äddooben ad-hanäx-ikkəs däx-iššaki n-iman-nänäx d-erk imojjan wi wär hanäx-iha a säl tamättant, nudabät älxidmät i-Mässinäx-i iddärän.

¹⁵ A-wen-däx a fäl ärkäwäl n-tassaḡt wa äynayän, Ÿisa a ämmun i-ad-umas änadid-nänäx dat-Mässinäx i-ad-iḡləs dägg-adəm däx-ibäkkadän wi ämešälän däx-ärkäwäl wa äzzarän, əmmək-wen-däx a-s ikfa Mässinäx äddinät wi dd-iḡrä d-wi s-ijjäš ärkäwäl turhajät n-ad-əjrəwän xur-Mässinäx täkasit täxlälät.

¹⁶ Ämära, isälan n-täkasit a nəha. Täkasit ya, nəssan a-s wär t-illa əmmək s-täzun ar s-ad-iba äwadəm wa itətwəkusun təzzar dihen, ad-e-tuzan s-a-wa innä.

¹⁷ Älmäxna n-a-wen a-s a ikk' äwadəm iddar, wär dd-idəkkəl iyyän isälan n-əlkənnaš wa n-täkasit, har t-iba təzzar.

¹⁸ A-wen-däx a fäl ärkäwäl n-tassaḡt wa äzzarän, wär t-illa a infa däx-äzzāman-net ar s-ašni wa sänxälän äddinät.

¹⁹ Äzzäman wa n-ännäbi Mosa, iffəssär i-tamətte tijəttewen n-alämär n-Mässināx təzzar idkäl ašni n-iwdesän d-išulax d-älxärer wa šəggäxän, issärtäy a-wen-däx iket-net d-aman, təzzar änfäsnäfäs sär-s s-tisiḏsedən əlkəttab wa n-alämär hakd tamətte iket-net.

²⁰ Innä i-tamətte ḏarät-a-wen: «Ēnta da ašni n-ärkäwäl n-tassaḡt ta ḏär-wän ija Mässināx i-ad-tumasäm tamətte-nin.»

²¹ Änfäsnäfäs ḏax Mosa ḏarät-a-wen ehäket wa n-tämuqgest d-ikassän wi n-älyibadät iket-näsän s-ašni.

²² Ašni, izzəwät a t-illan wär-išəšdəj, a ikka ḏax ašni wär-inxel, wär t-təlla tenäšše n-ibäkkadän.

Takute ta ija Yisa, wär t-illa a ḏär-tänifäqqa

²³ Härätän-wi-däx dd-nokäy iket-däx-näsän, taliwen a ämoosän äñifäqqänen d-härätän wi hänen išənnawän, a-wa ihän ehän wa n-tämuqgest, ašni a t-išašdajän, əmmək-wen-däx ḏax a-s härätän wi hänen išənnawän, ämiḡatärän əntänəḏ-däx s-ad-tän-šəšdəj takute tojarät ta jät fäll-ārori n-äkall.

²⁴ Älmasex, wädden ehän n-ämudd ḏayän ifassän n-dägg-adəm äñifäqqän d-wa ihän išənnawän a ijjäš, änn-ak, ehän n-ämudd wa n-tiḏət ihän išənnawän a ijjäš i-ad-umas äñabdidi-nänäx dat-Mässināx.

²⁵ Yur-käl-Älyähud, U-tikutawen wa mäqqārän, wär has-t-illa ar iyyän n-ujəš ḏax-awätay i-edägg wa iknän təšəḏje-i s-a-s t-itajjäš ḏax, äwway ašni mäšan, Älmasex, wär-ämḡatär s-ad-itajjäš dihen hak awätay; iyyän n-ujəš a has-ija, iknä-dd əššəxəl.

²⁶ Ēnnar wär ija a-wen, adiš, ad-dd-tənta äddunya har ašäl-i-däx, wär has-təgdeh tiyyät tamättant; adiš, ähhuuššäl-as ad-wär t-itəffil ayäna mäšan Älmasex, ḏax-ajilal n-äddunya-i-däx, iyyän n-ass ḡas a dd-ijä, ikfä iman-net, ämoos takute ta jarräwät tenäšše n-ibäkkadän.

²⁷ Dägg-adəm, tiyyät tamättant a hasän-täqqalät, ḏara-s tebädde dat-Mässināx.

²⁸ Däx-isälan n-a-wen-däx a fäl, Älmasex, ikf' iman-net s-iiyät i-ad-dd-ikkəs dägg-adəm äjjootnen ḏax-ibäkkadän, wär ḏax-s təlkem tiyyät sältən-däx. Ilkam ḏax-s ad-dd-äj ass wa s-əssin mäšan äsihe-wa, wädden ḏax-isälan n-tenäšše n-ibäkkadän, äddinät wi has-äqqälnen a-s dd-e-ass i-ad-tän-iḡləs.

10

Ašni n-Yisa, ojär wa n-irəzzejän

¹ Ämära, härätän-wi hanäx-issəkna Mässināx ḏax-alämär-net, taliwen äñifäqqänen d-tiḏət a ämoosän. Wär hanäx-sənnəfliyän ḏax-ujreh n-a-wa ḏär-olähän. A-wen-däx a fäl äddinät wi järnen ätṭäma-näsän ḏax-a-wa innä alämär, indär-as ad-tän-äj äddinät äḡradnen ed hak awätay-däx, sanalasän tikutawen-tin-däx.

² Tikutawen-tin-däx əšlänen äddinät, ənnar jarräwnät tenäšše n-ibäkkadän i-äddinät s-iiyät, iket-di, iba-tänät-in; ad-äbas tänät-sanalasän; ad-äbas əššakän äddinät iman-näsän abäkkad.

³ Mäšan tikutawen-en-hi, hak awätay-däx, siktunät-dd tamətte ibäkkadän-net

⁴ fäl-a-s, wär t-illa əmmək fäw s-hin-omäs ašni, jer-wa n-iwdesän wäla wa n-išulax, ibäkkadän n-äddinät.

⁵ A-wen-däx a fäl Älmasex, a-s dd-ijjäš äddunya, innä i-Mässināx;

«Wär hak-təjrəz takute ta jät s-ašni wäla ta wärät ja sär-s,
mäšan təkfed-ahi taḡəssa s-äddoobəḡ ad-tät-äktäḡ.

⁶ Wär hak-əjreznät tikutawen ti räqqänen
har tänät-akš efew,
wäla ti jarräwnen tenäšše n-abäkkad.»

⁷ Ənhäyāḡ a-wen ḡas ənnəḡ:
«Mässināḡ, näkk da!
Osey-dd i-ad-äjäy erhet-näk.»

⁸ Innä Ḣisa darät-a-wen:

«Wär hak-təjrəz takute ta jät s-ašni wäla ta wärät ja sär-s,
wär hak-əjreznät tikutawen ti räqqänen
har tänät-akš efew,
wäla ti jarräwnen tenäšše n-abäkkad.»

Ənta-den-däḡ a-wa innä Ḣisa kud-däḡ ill'-e a-wa ifräḡ Mässināḡ däḡ-isälan
n-tikutawen.

⁹ Oläs day Ḣisa innä:

«Mässināḡ, näkk da!
Osey-dd i-ad-äjäy erhet-näk.»

Ikkäs-in Ḣisa s-a-wen-däḡ əlyibadät wa äzzarän, iššəšräy t-dd i äynayän.

¹⁰ Däḡ-erhet n-Mässināḡ a däḡ-hanāḡ-iššəšdäj Älmasex s-iyiyät, iššəšdäj-
anāḡ s-iman-net wi ija takute.

¹¹ Käl-tikutawen iket-näsän, iqḡal-asän äššil hak ašäl ad-əbdadän
ḡarräsän i-tikutawen ti s-käla tänät-jän oläsän wären šəšdij däḡ-
ibäkkadän.

¹² Mäšan Ḣisa ənta, ikfa taḡəssa-net s-iyiyät, ämoos takute ta takkäsät
ibäkkadän, äqqima darät-a-wen härkuk daw-aḡil n-Mässināḡ,

¹³ iqḡal dihen i-ad-ətwəjjən išənja-net iket-näsän daw-iḡarän-net.

¹⁴ Ikfa tiyyät takute, təgdäh harkuk i-äddinät wi iššəšdaj.

¹⁵ A-wen-däḡ a hanāḡ-äsdättät Unfas Šäddijän fäl-a-s innä Emäli s-
tizarät:

¹⁶ «Ənta da arkawäl-in n-tassaḡt wa dār-sän mad-ahäräḡ darät išilan-
win-däḡ:

«Afäl tän-əkfeḡ färeḡdän-in,
ad-tän-əktəbäḡ fäll-ulhawän-näsän
d-ənniyätän-näsän.» »

¹⁷ Inna day darät-a-wen:

«Ad-äbas dd-ḡakkäläḡ
isälan n-ibäkkadän-näsän,
itawäḡ-in s-iyiyät tinməšriyen-näsän.»

¹⁸ Tenäšše ya, e-d ja, ad-äbas təlcam takute n-ašni tiyyät däḡ-təssəba n-
abäkkad.

Isəmmäqq d-isəmməterän

¹⁹ Ayətma-ḡ, ämoos-anāḡ ašni n-Ḣisa takute tətbatät s-ənta a hanāḡ-torät
emm n-ehän wa n-Mässināḡ wa iknän təšədje,

²⁰ or'-anāḡ tabarät täynayät ha tämudre t-təllat darät ärido, a-wen a
t-ämoosän taḡəssa-net.

²¹ Ämära, nəla U-tikutawen ifranän ixkämän fäll-ehän n-Mässināḡ.

²² Ḣas nahəzet-t-dd s-ulhawän äduuttänen d-immun imdan, däḡ-a-
s ärridän ulhawän-nawän däḡ-inəzjam wi läbasnen, ärridnät tiḡəswen-
nawän däḡ-aman šäddijnen, wär t-illa faw a däḡ-nəššak iman-nänāḡ.

²³ Wär nətäqqälet s-darät, wär nəsisumet dəḡ-isālan n-äṭṭāma-nānāḡ ed ere wa hanāḡ-ijjāšān ārkāwāl-wen-dāḡ, emārkāwāl, wār-irāzz dəḡ-tənnanet.

²⁴ Nənməjjət ənniyät jer-iman-nānāḡ, nənməsəmmətāret tārha jer-iman-nānāḡ d-imārkedān.

²⁵ Wār nəzājjet ālzāmaḡāt wa nəha s-ālyibadät n-Mässināḡ šund a-wa tājjān iyyād, ānn-ak, nəmsəkkuyədet jer-iman-nānāḡ, hullan āmāra-dāḡ d-nəhannāy a-s dd-ohāz ašāl wa n-uḡəl n-Emāli.

²⁶ Afāl nofa abākkaḡ dəḡ-erhet n-iman-nānāḡ ḡarät a-s nəlmad tidət iket-net, ābas t-təlla takute tāddoobet ad-hin-taməs abākkaḡ-nānāḡ,

²⁷ ad-ābas-hanāḡ-in-āqqim ḡas ar asəmmoqqəl i-āššāreḡa wa dd-imalān d-efew wa āhjäljälān he-iksən ināmāšrayān.

²⁸ Təssanām a-s e-d ānmāšrāy āwadəm i-Āṭṭawrät ta n-Mosa, wār has-t-təlla tāhanint, igdāh ḡas ad-dd əzjārnät sānatät tijuḡawen meḡ kāraḡāt i-ad-āmmät ālwaqq-wen-dāḡ.

²⁹ Emmək-wen-dāḡ ḡay a-s, āwadəm wa āfkālfākālān Rure-s n-Mässināḡ, āsmāḡrāy-t meḡ āsbānnān ašni-net wa hanāḡ-iššəšdājān, sār-nāḡ dd-orāwān ārkāwāl n-tassayt d-Mässināḡ, meḡ ḡay, wār-issəfrār Unfas wa n-ānnuḡmät, ajān wādden āwadəm-wen-dāḡ, ānihājja d-tisnant tojārät, ta dār-ānihājja wa ānmāšrāyān i-a-wa innā alāmār wa n-ānnābi Mosa.

³⁰ Nākkāneḡ, nəzzay wa innān:

«Eḡa, i-nin, ukəs n-ālxār, ḡur-i.»

Inna ḡay:

«Emāli a-s ilkam ad-išrāy tamətə-net.»

³¹ Asuksāḡ ija eḡḡādāl dəḡ-ifassān n-Mässināḡ-i iddārān.

Akuyəd dəḡ-immun

³² Ēktəwāt-dd a-s ibda, kāla təzzāḡām tihay, təbbəlānām dəḡ-a-wa āmoosān immun-nāwān, tənḡāyām aḡāna,

³³ əkwārān-kāwān āddinät, āqquzāben-kāwān, jān-kāwān isəḡsa dat-tamətə; āddinät wi tənḡāyām hannāyān aḡāna-wen-dāḡ, tāwwāḡām-asān timudda.

³⁴ Wi hānen tikārmuten dəḡ-təssəba n-ḡisa, tānḡ'-iwān tāhanint-nāsān, ohāḡān dəḡ-wān isənja a-wa təṭṭāfām, māšan, wār-ifneḡ a-wen tisrawt-nāwān s-Mässināḡ ed təkkašām āššāk a-s a-wa ihān ifassān-nāwān, ufa a-wen-dāḡ iket-net ed iḡlal.

³⁵ A-wa fāl tāsifāllām, āknät-t uḡəf ed əjjətān imraš-net.

³⁶ Hārwa-dāḡ, əšmārät dəḡ-amisəl n-erhet n-Mässināḡ, afāl jān a-wen, ad-sār-wān dd-isāḡsəl Mässināḡ ārkāwāl wa hawān-ijjāš.

³⁷ Innā əlkəttab n-Mässināḡ a-s:

«A ənḡārrān, a ənḡārrān ḡas a hin-āqqimān ass-dd wa s-ātwānnā ilkam ad-dd-ass, os'-iwān fāw!

³⁸ Āddinät wi oḡādnen dəḡ-zābo-nin, ad-hasān-ijrəw immun-nāsān tānudre ta n-tidət māšan wi əšlāynen i-zābo-en, wār-ilkem ad-hi-ijraz ālxal-nāsān.»

³⁹ Nākkāneḡ, wār nəha āddinät wi šallāynen, hakkānen iman-nāsān i-əlhəllak, ānn-ak, nəha wi tāṭṭāfnen immun i-ad-tān-iḡləs Mässināḡ.

11

Isālan n-immun d-imumənān wi n-ibda

¹ Immun, älmäyna-net a-s a-wa dāḡ-ijär äwadəm äṭṭāma, ad-has-umas šund a-s insa data-s; meḡ daḡ, a-wa-dāḡ wār-ihənnəy s-tiṭṭawen-net, ad-has-umas šund äsiḡälälāk dāḡ-s.

² Immun-wen-dāḡ a ikfän imḡarän-nänāḡ idəm ḡur-Mässināḡ.

³ Immun a hanāḡ-issəflāsän a-s äddunya-ta-dāḡ, mäjrād n-Mässināḡ a has-dd-issəbābän. A-wen-dāḡ a fäl a-wa nəhannāy dāḡ-äddunya, wār dd-izjer a ilan mänhoy.

⁴ Immun a ijrāwän i-Xābālla ad-āj i-Mässināḡ takute tufāt ta n-āṅṅa-s, Kayin. Təssəba n-immun-net-en-dāḡ a fäl t-ässidän Mässināḡ dāḡ-äddinät wi oḡädnen, iqbäl takute-net. Tidət, Xābālla, äru t-äba māšan, har ašäl-i-dāḡ, ixatṭāb-anāḡ s-immun-net.

⁵ Immun a-s əssəbab wa fäl immədkäl Inuk s-išənnawän har əjud-i iddar. Wār t-oles äwadəm ahänay ed, idkäl-t Mässināḡ. Dat-amədkəl-net, Mässināḡ iman-net a innän, ijraz-as Inuk.

⁶ Immun, wār t-illa iba-net ed ere t-wārän ila, wār t-ill' əmmək fāw s-ijrāz i-Mässināḡ. A-wen-dāḡ a fäl ere wa irhän anmihaz d-Mässināḡ, ämoos-as immun färəḡ, ifləs a-s Mässināḡ ill'-e, ənta daḡ a ḡur-t-əllan imraš i-wi has-tammāḡnen.

⁷ Immun a ikfän Nox tafləst s-Mässināḡ a-s has-ijä isälan n-a-wa dd-imalän wār ihənnəy. Tuksəda-net i-Mässināḡ a sār-s dd-orāwän ad-ikən turāft n-aman ta mäqqārät dāḡ-e-iḡləs ənta d-ejädäš-net. Immun-net ad-dd-äsfäkkārän terk timaşalen n-tamətte, äḡḡin dāḡ-äddinät wi oḡädnen, ämoos ya älcəllä n-äddunya, äsoḡ'-et dāḡ-äššareḡa wa n-Mässināḡ.

⁸ Immun a dd-orāwän akiwən wa ija Ibrahim i-Mässināḡ a-s t-iyrä, ibdäd, ikk' äkall wa s-has-innä ad-t-ikus iket-di d-ilämmäd ma tämoos tamdujt ta ih' äkall-wen-dāḡ.

⁹ Immun a t-äzozäḡän dāḡ-ihəktan šund amäjar dāḡ-äkall wa s-has-ijjäš Mässināḡ ärkāwäl-net. Taməzzuḡt-ten-dāḡ ijä, a ijä Isxaqq d-Yaqub-i dār-s ohärnen tākasit n-ärkāwäl wa has-ijjäš Mässināḡ.

¹⁰ A-wen, ma t-ijän? Ij'-e a-wa s-ij' Ibrahim ənniyät-net dāḡ-aḡrəm wa n-tidət s-intäm ässas-net, s-Mässināḡ iman-net a t-dd-iknän dāḡ-anəzjum-net, ibn'-e-dd ənta iman-net.

¹¹ Immun daḡ a ijrāwän i-Saräta kud-dāḡ wäššar, tämoos teməjjejrut ad-təkrəš ənniyät, təkrəš ihäyawän ed tomän a-s Mässināḡ-i has-ijjäšän ärkāwäl, wār-iräzz dāḡ-tənna-net.

¹² Immun a ijrāwän i-Ibrahim šamad wäššar, wār has-in-äqqima ar tamättant, ad-ikrəš ihäyawän janen əjut wa jän etran d-tiblalen n-äkall dāḡ-asälim n-ejärewwa wa səmmän, wār t-illa ere äddooben asiḡən-näsän.

¹³ Äddinät-wi-dāḡ, äba-tän əṭṭafän immun iket-dāḡ-näsän härwa wār-əjrewän ärkāwäl wa hasän-ijjäš Mässināḡ māšan, wār sār-sän izley d-a-s t-ənhayän, əlläfän-as dāḡ-ijəj, əddəwen, əlmädän a-s əntäneḡ imäjarän n-iməssukal a ämoosän fäll-ärori n-äkall-i-dāḡ.

¹⁴ Əntäneḡ-i äddoobätnen tənna n-a-wen-dāḡ, salmadän-anāḡ a-s äkall äynayän a-s əmmaḡän ed,

¹⁵ ənnar jan tārha n-härät dāḡ-äkall wa dd-fälän, iket-di, əqqəlän-t ḡas

¹⁶ māšan, wār jen a-wen ed äkall ufän wa dd-fälän a-s əmmaḡän; a-wen a t-ämoosän, äkall ihan išənnawän. Ənniyät-wen-dāḡ əṭṭafän a fäl hasän-irḡa Mässināḡ, wār t-äskärakäd a-wa s-t-jän-t Mässi-sän ed, əntäneḡ a-s idäy aḡrəm wa hasän-itwār.

¹⁷ Immun a ijrāwän i-Ibrahim ašäl wa t-oyäs Mässināḡ i-ad-has-ikət Isxaqq, rure-s wa n-iyyän t-ikfä. Mässināḡ a t-omärän s-ad-āj a-wen, a-s ija a-wen, dat-a-wen, ijjäš-as ärkāwäl, inn'-as:

18 «Isxaqq a he-isötöyөн өzzuröyät ta he-iwär isөm-näk s-hak-өjjäšäy ärkäwäl-net.»

19 Ijä Ibrahim a-wa has-innä Mässinäy ed ikkas äššäk a-s kud-däy äba Isxaqq, ila Mässinäy tärna s-t-dd-issөnkär jer-inөmmuttan. Enta-dendäy a-wa ämoosän өssөbab wa fäl t-dd-äsoxäl Mässinäy rure-s iket-di d-t-itөkkat Ibrahim ed inhäy Mässinäy a-s wär unjäy s-a-wa s-has-innä. Ämoos a-wen, tangalt n-a ilkamän.

20 Immun a ijräwän i-Isxaqq ad-ittär däy-Mässinäy a ijän älbäräka däy-mөddana-s, Yaqub d-Iso, däy-iwөtyan wi өlkämnen.

21 Immun a ijräwän i-Yaqub ässağät wa d-ijammäd äddunya ad-dd-isөhhөtөл s-täborit-net, irkäy, tözzar ittär däy-Mässinäy a ijän älbäräka däy-hak iyyän däy-mөddana-s n-Yusөf-i n-rure-s.

22 Immun a ijräwän i-Yusөf a-s dd-tohäz tamättant-net ad-älläğät i-käl-Işrayil s-ilkam ad-өzjärän äkall wa n-Mişra, omär-tän s-ad-hin-өmmärän iğäsän n-tafөkka-net s-äkall wa өkkän afäl t-äba.

23 Immun a ijräwän i-imärawän n-Mosa ad-t-өffärän har kärağ orän çarät tiwit-net ed өnhäyän tihusay ti ija rure-sän, wär tän-issärmäy älhäm n-Firğäwna-i dd-izzөzjärän alämär däy-isälan n-tamättant n-aratän wi neyyan n-käl-Işrayil.

24 Immun a ijräwän i-Mosa šamad ämoos ähalөs ad-unjöy s-ad-itawäğrä s-isөm: rure-s n-elle-s n-Firğäwna,

25 äsof ad-ahär ağäna d-tamөtte n-Mässinäy, uhөн tämudre jer-inämäşrayän däy-tänoflayt wärät la usreyän.

26 Inhäy a-s ufa ağäna wa ohar äwadөm d-Älmasөx uhөн ärräxmät n-Mişra fäl-a-s, өnniyät-net, ij'-e däy-imraš wi dd-malөnen wädden däy-a-wa t-illän data-s.

27 Immun-net a has-ijräwän ad-wär has-tөgdөл tuksөçä n-ämänokal efel n-Mişra, ikna tebädde fäll-iman-net däy-a-wa iha, ikyad ças däy-Mässinäy-i wärän itөtwөnhөy.

28 Immun a has-ijräwän ad-ikөt Faşka ta dd-saktet azäjor n-käl-Işrayil i-өkkөлü, omär-tän s-ad-sөwөрөн ašni n-işğal imawän n-ihänan-näsän i-ad-wär-iğөššөd änjälos wa ittäfän tamättant härät i-tiğäffaddiwen-näsän.

29 Immun a ijräwän i-käl-Işrayil ad-äresän ejärew wa sömmän šäggäğän, өjläyän-t šund äkall äçqurän a fäll-ärjašän; a-s өttärän käl-Mişra ad-өjlөyän ejärew çarät-a-wen, ämlämmälät-dd fälla-sän, өksän-tän aman.

30 Immun a ijräwän i-käl-Işrayil asiçөw n-äğalla wa ifräjän ağrөm wa n-Žärriko šamad jan өssa išilan tiğlöyğөлөyän-t.

31 Immun a ijräwän i-Rahab ta n-tälkäxbat ad-wär toher tamättant d-inämäşrayän wi n-äkall-net, өnta a täsmäjaret inaramän wi dd-äzzarnen i-ad-zөjjөzzөн ağrөm wa tözzäy.

32 Ma säl a-wen? Iket iyyän däy s-äddoobeğ ad-hawän-dd-өçkөлäy isälan-net, mäšan hannäyäy a-s osäs-ahi-dd älwäçç. Ennäw wädden a-wen, siwөлäy-awän däy Žädyon d-Bäräyka d-Samsun d-Yäfti d-Dawөd d-Sumäyla d-ännäbitän wi iyyäçnen.

33 Immun-näsän a tän-ikfän ašäl fäll-өddөwөлän өmdanen, äržän-tän; өkfän iman-näsän iqqud, өnhäyän tisөtbat n-ärkäwälän wi hasän-ijjäs Mässinäy, ätwäjärän-in iyyäç däy-sän i-ehran mäšan, äğläsän-dd däy-sän;

34 ännunnäzen iyyäç däy-sän däy-efew mäšan, wär tän-issärğa; iyyäç, äğläsän-dd däy-imawän n-tikobawen; ijmäç äşşahät iyyäç däy-sän

māšan, iqqäl-tän-dd. Iyyäḍ ḗbbäräḍän dāḡ-amjār har data-sān ošālān ajhanān wi dd-jādnen ākall-nāsān.

³⁵ Tiḍeḍen tiyyäḍ, issənkar-asnāt-dd Māssināḡ äddināt-nāsnāt āba, āšḡarrawen iyyäḍ dāḡ-sān māšan, wār-ḗtterān ad-āḡlōsān iman-nāsān dāḡ-a-wen, āssofān tamāttant i-ad-dd-alōsān tanākra ḡur-Māssināḡ.

³⁶ Jān äddināt iyyäḍ dāḡ-sān tekāškāšt, āslālān iyyäḍ dāḡ-sān tiwit s-ebärtāk, jān tišōm dāḡ-iiyyäḍ, jārān-in iyyäḍ dāḡ-takārmūt.

³⁷ Iyyäḍ, ānḡān-tān s-sāmmājori n-tihun, iyyäḍ kāškāši a-s tān-ḗblājān, jān iman n-iiyyäḍ s-tākoba; tānudre-nāsān iket-net, jān-tāt dāḡ-amtēnjār, wār-ḗlsen a sāl ilāmawān n-tihatten d-ulli; ḗnhāyān iyyäḍ ḗllāqqu lābasān, āqquzāben-tān äddināt, āsmāḍrāyān-tān.

³⁸ Han a-wen-dāḡ iket-net, a-s ija a-wen, wār tānhājja äddunya-ta-dāḡ fāw d-ad-tēnhōy äddināt janen milḡaw-wa-dāḡ; iyyäḍ dāḡ-sān, āwwāyān tinariwen, ḗzzāḡān iḍaḡān d-isḗlwan d-unan.

³⁹ Äddināt-wi-dāḡ, ijrāw-asān immun-nāsān idōm dat-Māssināḡ kud-dāḡ, ārkāwāl wa hasān-ijjāš, wār sār-sān dd-ixsel.

⁴⁰ A-wen, ma t-ijān? Adiš fāl-a-s innin itwar'-anāḡ Māssināḡ iket-nānāḡ a ufān a-wen, irha ad-dār-sān nēmzōyyōt ujōš n-ārkāwāl-wen-dāḡ hasān-ijjāš.

12

Yisa Ālmasex a-s ālmital i-imumēnān

¹ Āmāra, nākkāneḍ-i-hi, šāmad āzzar-anāḡ ālžāmaḡāt n-imumēnān ijan ḗjut-wen-dāḡ, adiš, nōbḍōwet d-e d t-illām a äddoben ad-hanāḡ-umas āzūk dāḡ-akuyōḍ dāḡ-immun, nārsiyet-in fālla-nāḡ e d t-illām abākkāḍ hanāḡ-iltayān, nōrurōdet āmašal wa hanāḡ-issāḡlāf Māssināḡ, nōšmāret dāḡ-a-wa nōhannāy.

² Nājet asāwad-nānāḡ iket-net dāḡ-Yisa-i s-ḗnta a-s ekew n-immun-nānāḡ, ḗnta a has-itḡafān tānudre har ašāl wa dd-e-iqqōl. Yisa, oyy'-in tedāwit ta ila, ātwāšlāb fāll-tajōttewt, iqbāl ad-āj tamāttant tāsikārakāḍāt. A-wen-dāḡ a fāl ašāl-i-dāḡ, āqqiima daw-aḡil n-Māssināḡ.

³ Zōnōzjumōtāt ḡas dāḡ-Yisa, tōktum-dd ḗmmōk wa s-t-ḗnkārān ināsbākkāḍān d-aḡāna wa inhāy māšan, išmār i-a-wen-dāḡ iket-net, dihen wār fālla-wān-e-tāmmāt taḡōssa-nāwān, wār-e ismaḍ ašni-nāwān.

Ere kāy-irhan a kāy-isasaḡadān

⁴ Akōnnas wa hām d-abākkāḍ, wār sār-wān dd-iwwey hārwa tamāttant,

⁵ tōttōwām-in a-s Emāli, asōmmōtār wa itājā abba i-ara-net a hawān-ija, ḗnta a innān:

«Alyad-in, wār kāy-isāḡafet asōnnōmōnhōy

wa kāy-itājā Emāli d-iman-nāk,

wār kāy-izāzzākānzaret asōnnōmhōl wa hak-itājā,

⁶ ed Emāli, isasaḡad ere irha,

ara wa dd-ija s-iman-net a isinmōnhōy d-iman-net.»

⁷ Īsmārāt dāḡ-tisnant ta s-Māssināḡ a tāt-dd-orāwān sār-wān ed ḗnta asōnnōmōnhōy kāwān-ija d-iman-nāwān dāḡ, itḡaf-kāwān šund amārāw d-aratān-net, i n-ad-taḡōḍām. ḍarāt-a-wen daḡ, ḗndek ḡas ara wa wār-ināqq ti-s?

⁸ Afāl wār kāwān-isōnnōmōnhōy Māssināḡ d-iman-nāwān s-ḗmmōk wa s-isinmōnhōy aratān-net iket-nāsān d-iman-nāsān, adiš wādden aratān-net a tāmoosām, ikzewān a tāmoosām.

9 Ektewät-dd abbatän-nänäx-i hanäx-tadäbbarnen, wädden naqqän-anäx mäšan ajän a-wen a hin-ikkasän semxar wa hasän-nəja? Änihäjja a-s ojar semxar wa nəja Abba-nänäx-i ihän isənnawän wa tän-nəja ed ənta tämudre ta täylälät a hanäx-ihakk.

10 Abbatän-nänäx, tadjän däx-näx tiwit wären təhijj s-əmmək wa s-ärhän a-wen mäšan, Mässinäx ənta, asənnəmənhəy hanäx-ija d-iman-nänäx däx, i n-tənfa-nänäx i-ad-nišdaj s-əmmək wa s-šaddij ənta iman-net.

11 Äduuttät a-s tiwit, a ämoosnät-däx, wär-ämoosnät əssəbab n-tedäwit i-ere wa itämätten, änn-ak tekenzart a sār-näx dd-tirəwnät mäšan afäl ijräh äwadəm äddälil wa fäll-itamättat, usreyän-net, älxer d-tämudre toxadät.

12 A-wen-däx a fäl, äjät äşşahät däx-ifassän-näwän, təkkesäm tisas däx-ifaddän-näwän, təhələm s-data,

13 ärjəşät däx-zäbo wa oğädän i-ad-əşşuhun idarän n-wi jänen ađar däx-immun-näsän.

Wär täsboṭṭäläm ännuymät n-Mässinäx

14 Ämlet-t älxer jere-wän d-äddinät, tişdajäm ed ere wäran šaddij, wär-ilkem ad-inhay Emäli.

15 Nəməssənät härät jer-iman-näwän i-ad-wär dd-inəttəş wäl' iyyän däx-wän iman-net däx-ännuymät n-Mässinäx, wär toyyem təsəmmə naşşär-dd däx-ulhawän-näwän, tumas-awän əssəbab n-ikənnasän d-tagärşät jer-äddinät,

16 wär käwän-itäjjäšet enämmäqäs wäla äkafär šund a-wa ija Iso-i äsmälkäwän tumast-net n-amäqqar telleyt,

17 təssanäm a-s darät-a-wen, ihall, itattär däx-ti-s ad-has-ittär, äj däx-s älbäraka i-ad-t-ikus mäšan, unjäy-as s-a-wen, ämmujräz a-wa ija kud-däx wär t-illa a sār-s dd-ässişäl a-wen.

Ärkäwäl n-tassayt wa ärəwän d-wa äynayän

18 Käl-Işrayil äzzäman-wen-däx d-əzzäxän tanəzruft, ärheey ad-käwän-səssəjrähäx a-s tassayt ta jäm d-Emäli YisaÄlmasex, wär toleh d-ta s-käla tät-jän əntəneq däx-tanəzruft. Däx-äzzäman-näsän, əzzağän edes i-tađayt s-ere irhän edes-net däx-ad-tät-idəs, tađayt-en, iraqq däx-s efew, äğlaynät-tät tijäräken käwalnen d-tihay d-ađu äşşoohen. A-wen iket-net, wär fälla-wän ija käwəneq,

19 wär təslem i-täsinsäxt ta n-eməsli äşşoohen d-eməsli wa ässuksädän s-əslän hasän-ijän asärmağ wa däx fäl härän timəzzujen-näsän i-ad-äbas has-sallän.

20 İssärmäx-tän hullan a-wa s-ätwänna: «Ere idäsän tađayt-däx, jer-ämudär wäl' ägg-adəm, ämmätet s-sämmäjori n-tihun.»

21 A-wa ənhäyän, ij'-asän asärmağ-wa-däx fäl ännäbi Mosa-i hasän-äzzarän, ija tarəmmeyt ta-däx fäl dd-iha ğas äşikäqkäd.

22 Käwəneq, wär fälla-wän ija a-wa tän-irmäsän ed tađayt ta n-Sayon s-dd-mäläm edes-has, ağrəm wa n-Mässinäx, a-wen a t-ämoosän, Yärussälam ta n-isənnawän däx-əzzäxän afdän fäll-afdən n-änjälösän əzhanen,

23 təjjäşäm älžämağät n-tiğaffaddiwen s-əktabän ismawän-näsənät däx-isənnawän; aşäl-i, tohäzäm-dd Mässinäx i-işarräxän äddinät iket-däx-näsän, tärtäyäm däx-ıyyän n-edägg d-iman n-imumənän wi hin-äwwäqnen dihad izzax Mässinäx. Əntəneq-en-hi, aşäl-i-däx, wär t-illa älğib tän-iwarän.

²⁴ Tärtäyäm d-Ŷisa-i ämoosän änadid n-ärkäwäl n-tassayt wa äynayän, imäl jere-näx d-Mässinäx, infäs-kāwän s-ašni-net wa iknän mijraw n-wa n-Xäbälla.

²⁵ Äjät önnyät, wär täzmäzzäjäm iman-nāwän i-ere wa hawän-ämmijrädän. Käl-Işrayil wi unjäynen s-asjed-has, äsoḏä-dd fälla-sän älmäşşibät, ɣas, šamad ənta-den-däx a-wa tän-ijrāwän, əndek əmmək wa s-e-näyləs näkkäneḏ afäl nunjäy s-asjed i-Mässinäx-i hanäx-ämmijrädän däx-işənnawän.

²⁶ Äzzāman-en, ij' emäsli n-Mässinäx əşşuhu wa däx fäl äşşäkəḏkəḏ äkall, mäšan ämära, ijjäš Mässinäx ärkäwäl däx-innä: «Äsihe wa dd-imalän, wädden äkall ɣas a he-iškəḏkəḏän, işənnawän iman-näsän ad-əškəḏkəḏän.»

²⁷ Ma ämoos älmäxna n-«äsihe wa dd-imalän»? A-wen a hanäx-ikkasän däx-tayḏart n-a-s äddunya-ta-däx d-a-wa tät-ihän iket-net, ilkam ad-iškəḏkəḏ, iba-t i-ad-wär dd-itäximəy ar a-wa iknän antum, wärän itənhəynəhəy.

²⁸ Šamad Təmmənəya ta däx-näx təlkamät, ja antum ogdahän d-a-wen-däx, adiş numayet i-Mässinäx, naməlet-t s-a-wa has-ijrāzän däx-semɣar d-tuksəḏa-net.

²⁹ He kāwäneḏ! Mässinäx-i hanäx-ilän, oläh d-efew itattän.

13

Isəmməterän i-imumənän

¹ Nəmərhät jer-iman-nāwän šund äñḡatän.

² Ijjəšet-kāwän aməjaru, wär hin-təşlelām fäl a-wen; wi ijjäš aməjaru, däx-äzzāman hin-okayän, äsməjaren änjəlosän däx-a wär-əssenän.

³ ɣaymät kittəwäm äddinät wi hānen tikarmuten šund ɣas a-s toharäm dār-sän takārmüt-ten-däx. ɣaymät daɣ kittəwäm wi irammäs älyizabät šund a-s tiɣəswen-nāwän a irmas älyizabät-wen-däx.

⁴ Səmyārät adubən, tənhirəjəm däx-təşəḏje. Wär itikəret ähaləs i-hāne-s, wär tikəret daɣ taməḏt i-ähaləs-net ed asəmməḏəs n-iman-näsän a-wen. Hewät! Mässinäx, ässiilkäm däx-iməzzəna d-iməkkərukaḏ.

⁵ Wär təggəḏet tārha n-azrəf d-önnyätän-nāwän, wär täzoḏäm a-wa lām ed Mässinäx, innä:

«Wär kāy-e-əžxələx,
wär kāy-e-äyyäx d-iman-nāk.»

⁶ A-wen-däx a fäl wär nəkkəs äṭṭāma, nəkoyäd, nəddobät fāw ad-nänn däx-härät iket-net:

«Emäli a-s ämadhal-in, ma äksuḏäx?

Ma s-äddobät ad-hi-t-iḡşəḏ ägg-adəm?»

Asjed i-imizārän

⁷ Əktəwät-dd imizārän-nāwän wi n-ibda kāwän-in-ässawəḏnen məjräd n-Mässinäx, əṭṭəfät a-wa dd-oyyän, tättäläläm immun-näsän.

⁸ ɣisaÄlmasex, a-wa ämoos əḏəşel, ämoos-t ašäl-i-däx, ämoos-t daɣ härkuk.

⁹ Säjdät, wär toyjem äddinät šişkin-kāwän s-älmät teɣäre täynayät wärät toher härät d-məjräd n-Mässinäx. Səşşuhətät ulhawän-nāwän däx-ännuxmät n-Mässinäx. A-wen, uf'-awän asəşşuhu n-iman-nāwän däx-uḏəf n-iba n-tetäte n-imənsiwän s-äddinät wi əṭṭäfnen iba n-tetäte-näsän, wär t-illa ad-dd-äşşişräy a-wen sār-sän.

¹⁰ Yur-näy näkkäneḏ-i n-käl-Älyähud, käl-tikutawen wi çarräsnen i-tikutawen däx-ehäket n-tämoqqest, wär hasän-t-tëlla tetäte n-a-wa s-äçräsän.

¹¹ Taçsiwen ti s-itiwöy U-tikutawen wa mäqqärän ašni-näsnät s-edägg wa iknän tēšödje i-ad-ətwönšön ibäkkadän n-tamötte, asäry a titwöjjin isan-näsnät däx-edägg hin-äššinkäšan fäll-amäzzaç.

¹² A-wen-däx a fäl Yisa, inçäl ašni-net illa-hin i-açrəm sihen i-ad-išöşdöj tamötte däx-ibäkkadän.

¹³ Ämära, näkkäneḏ-däx, nөлkөmet-as s-edägg-en-däx, nahäret dār-s өmmädri wa inhäy.

¹⁴ Ädunya-ta-däx, wär däx-s nөla açrəm içlalän, änn-ak, açrəm wa ilkämän, ufän a çarät nošal.

¹⁵ Näkfet s-isөm wa n-Yisa i-Mässinäç hak ašäl tömmalen äçbadnen isөm-net. Takute-nänäç has-den-däx.

¹⁶ Wär hin-tөttөwäm tanmөdhalt d-anmөkkas n-tämäçatert jer-iman-näwän ed өntänäteḏ-den-däx tikutawen ti өjräçnen i-Mässinäç.

Älxer wa ihän amišөл n-a-wa innä Mässinäç

¹⁷ Säjdät i-a-wa hawän-jannen imizärän-näwän, çaymät-hasän bälluhäm ed өntäneḏ a däx-ässiḏmän Mässinäç iman-näwän, ilkam daç ad-tän-isөstөн d-isälan n-iman-näwän. Afäl hasän-sajadäm, ad-hawän-өjөн өnniyät s-iman äsriwnen, wär-e çөkkөnzärän. Afäl wär jem a-wen, käwäneḏ a ikma.

¹⁸ Ettärät-anäç-in däx-Mässinäç. Däx-a-wa hanäç-dd-iqqälän, wär t-illa a däx-nөššak iman-nänäç. Wär t-illa a näsidärhän ar tekle däx-iqqud däç-härät iket-net.

¹⁹ Ettärät-ah'-in hullan däç-Mässinäç i-ad-hin-өtwөyyäç, äçqөлäç-käwän-in šik.

Ajilal n-mäjräd

²⁰ Daläç Mässinäç-i n-Mässi-s n-älxer, daläç-t өnta-i dd-issөnkärän jer-inөmmuttan Amäçan-nänäç wa mäqqärän Emäli Yisa-i s-hanäç-ikfä ašni-net ärkäwäl n-tassaçt täynayät d-Mässinäç.

²¹ Idhäl-käwän Mässinäç iket-däç-näwän i-ad-tudabem amišөл n-a-wa oläçän iket-net, tamašaläm erhet-net, төjөm härkuk a has-ijrazän däç-isөm n-Yisa Älmasex-i äniihäjjän d-semçar härkuk. Amin!

²² Ayөtma! Wär-өtteräç ad-hawän-šөššөjreç mäjräd däç-isөmmөterän-wi-däç hawän-in-өktäbäç i-ad-wär käwän-kөmmun iman.

²³ Elmөdät a-s äñña-näç däç-äddin Timoti, ätwäyy-dd; os'-ahi-dd ças, näddew-in sär-wän.

²⁴ Tähuuläm-anäç-in imizärän-näwän d-imөššөddөjän iket-däç-näsän. Ähuulän-käwän-in ayөtma-wän wi n-imumөнän өzzäçnen İtali.

²⁵ Issөnsa Mässinäç ännuçmät-net fälla-wän iket-däç-näwän. Amin!

Tăkarde ta iktăb Yaqub

Ăşajəş

¹ A-wa năkk Yaqub wa n-akli n-Măssinăx d-Emăli ŸisaĂlmasex hin-ăhuulăn mărăwăt tiwsaten d-sănatăt ti əmmăhăşnen jer-ikallăn.

Utăr n-immun d-sărho dăx-Măssinăx

² Ayətma-x, ärheey dăx-wăn a-s talxa kăwăn-tărmăsăt-dăx, a tămoos-dăx, tumaset-awăn əssəbab n-tedăwit

³ ed ädduuttăt a-s tissust tənăyăm dăx-təssəba n-immun-năwăn dăx, ad-săr-wăn dd-arəw a-wen əşşəmurăt,

⁴ măşan, wăr-e äj a-wen ar s-ad-təşbarăm hullan i-ad-tumasăm meddən əmdanen s-wăr t-illa a dăx-şaxşadăn.

⁵ Wa dăx-wăn wăr-iwer sărho, ittăret-t dăx-Măssinăx-i ihakkăn äddinăt iket-năsăn bännan wăla imoqqan, ad-t-ijrəw;

⁶ măşan ittăret s-immun dăx-wăr ij' äşşäk wăl' iyyăn fäl-a-s ere ijan äşşäk dăx-a-wa ittăr dăx-Măssinăx, wăr-izley d-tinăzzămären n-əjärew wa səmmăn äzziwăt ađu, itaggäd dăr-snăt siha d-siha.

⁷ Wa ijan a-wen, wăr-itəjjaret ättăma n-ad-ijrəw hărăt xur-Emăli

⁸ ed əwadəm şund-wen, animăntăş, ija əssin ulhawăn, wăr t-illa a dăx-itbat.

Ărrəzăx wa ilăn idəm dat-Măssinăx

⁹ Ere dăx-wăn lăqqəwăn-dăx ijrəzet-as a-wen ed dat-Măssinăx, irzax

¹⁰ măşan wa dăx-wăn irzăxăn, ijrəzet-as əllăqqu-net dat-Măssinăx ed ənta hakd ehäre-net togdăh təxrəst-năsăn d-ta n-tăboyt-i

¹¹ s-e-d tădwăylăl tăfukt, tăkkus, ad-săry teyəşşe, tətərkət-in təboyt-net, iba-hin asmăxmăx n-tihusay-net. Aləsu şund-wen-dăx a hin-mad-äj ere əsifăllăn fäll-ehäre-net ənta hakd a-wa itamaşal.

Isəswidăn n-ăddunya i-ăgg-adəm

¹² Təndəđ i-əwadəm wa išmărăn dăx-talxa fälla-s dd-tăzzubbet-dăx ed afäl tăt-dd-izjăr, ad-t-ăkf Emăli, korona, a-wen, takənbut n-təmmənukəla ta s-ijjăş ärkăwăl-net i-wi t-ărhanen, a-wen, a t-ămoosăn tămudre ta tăylălăt.

¹³ I dăx-wăn ätwarămăn, wăr-ijănnət Măssinăx a hi-orămăn fäl-a-s Măssinăx wăr-itətwirəm s-a lăbasăn, wăr săr-s itirəm dăx əwadəm wăl' iyyăn,

¹⁴ änn-ak, hak əwadəm-dăx erk derhan-net a has-itumasăn sărmas wa t-inattăşăn, isiđəw-t dăx-erk əmmək,

¹⁵ đarăt-a-wen, e-d əssakăy erk derhan dăx-əwadəm, ad-săr-s dd-arəw abăkkad; abăkkad dăx ənta, e-d dd-imda s-əwadəm, ad-săr-s dd-arəw tamăttant dat-Măssinăx.

¹⁶ Ayətma-x wi əkney tărha, wăr səsədăt iman-năwăn.

¹⁷ Wăr t-əllen isuf olaşnen wăla-i əfrannen s-wădden išənnawăn a dd-falăn xur-Măssinăx-i n-Abba dd-ixlăkăn e d-t-illăm ännur, ənta-i wărăn itəməşkil, wăr-oleh d-tele-i timtəttiyăt.

¹⁸ Ənta a hanăx-dd-ixlăkăn dăx-erhet-net s-tărna n-măjrăd-net-i ädduutten i-ad-numas tişăffaddiwen n-a-wa dd-ixlăk.

Asjed i-Mäjräd n-Mässinäx d-amisäl n-a-wa oläxän

¹⁹ Ayətma-i əkney tərha, säjdät: əttařx dāx-hak iyyän dāx-wän, ad-äsijät asjed, wär-äroräd mäjräd, wär-issärmäd adkär

²⁰ fäl-a-s ere s-irmäd adkär-net, wär-itəmişəl iqqud wa n-erhet n-Mässinäx.

²¹ A-wen-dāx a fäl əbdəwät iman-nāwän d-a-wa kəwän-isamädasän d-älxalän wi kəwän-salbasnen, täqbəläm s-ənniyät äzedän mäjräd n-Mässinäx wa issəntäm dāx-ulhawän-nāwän äddooben ad-kəwän-işləs dāx-temse.

²² Umasät äddinät tamaşalnen mäjräd n-Mässinäx wädden äddinät has-sajadnen, ƣas saswadäm iman-nāwän s-erk inəzjam

²³ fäl-a-s ere isajadän i-mäjräd wär t-itəmişəl, oläh ƣas d-ere ikyädän iman-net dāx-tiset,

²⁴ ifäl-tät ƣas ittəw'-in älwäqq-wen-dāx a-wa dār-oläh, äqqima wär-äsmättäy talxa fäll-iman-net;

²⁵ mäşan äwadəm wa äjjunfän dāx-alämär wa ifränän n-Mässinäx, alämär wa isadärfen, ittäf a-wa s-t-omär, tənədə-as.

²⁶ Ere ordän a-s äddiin, a-s ija a-wen, wär-innähäd dāx-iləs-net, iman-net ƣas a itakärras; äddin-net, wär t-illa

²⁷ fäl-a-s dat-Abba Mässinäx, äddin wa n-tidət wär-iwer älşib, a t-ämoosän: uđəf n-ijuhelän, tadhəlt n-tinudäfen dāx-timşutar-näsnät d-ad-wär käy-äsmädäs a-wa fäll-təgl' äddunya.

2*Iba n-azəmmäzli jer-äddinät*

¹ Kəwäned-i n-ayətma-x omännen s-Emäli-nänäx ƴisaÄlmasex-i ilän älxurmät, wär täzmäzläyäm äddinät.

² Näjet älmital n-a-s kunta ijjäş-dd ähaləs ilan ehäre, əmdan issəkađ-net s-tidhoten n-oräx, äzzizmäy, älžämaşät-nāwän, a-s ija a-wen daş, ijjäş-t-dd iyyän n-taläqqe;

³ kunta dāx-a-wen, təjrähäm-in wa iknän azəzmi, təggädäm-dd sār-s, tənnäm-as: «Mändam, ärhuj-ak, ƣayəm diha, nufləy»; a-s ija a-wen, wa n-taläqqe ənta, tənnäm-as: «Jäy, käyy əbdəd-in sidi-dāx meş əyyäw ƣayəm daw-idarän-nänäx»,

⁴ afäl jäm a-wen, wädden ənta-den-dāx a-wa isälmadän s-azəmmäzli wa tinməjjim jer-iman-nāwän, tinməşreşäm jer-iman-nāwän s-erk inəzjam.

⁵ Ayətma-i əkney tərha, säjdät-ahi: äddinät wi s-şur-äddunya läqqəwän, əntäned a-s irzäx Mässinäx immun-näsän, ij'-en iməkkusa n-Təmmənəya ta s-ijjäş ärkəwäl-net i-wi t-ärhanen.

⁶ ƴas mafäl lakkähäm tiläqqiwen? Ajän wädden käl-ehäre-i-dāx tässimşäräm a kəwän-äşihänşarädnen, şikkun-awän s-äşşäreşa?

⁷ Ajän wädden əntäned a jänen isəm wa ähusken kawän-ikfa Mässinäx tekäşkäşt.

⁸ Innä əlkəttab n-Mässinäx:

«Äj i-änhəraj-näk tərha ta-dāx jed i-iman-näk»,
ənta-den-dāx alämär wa n-Təmmənəya n-Mässinäx, ere t-əmeşälän, əmeşäl tihusay.

⁹ Əlmədät a-s afäl täzmäzläyäm äddinät, ad-tifum abäkkəđ, abäkkəđ day ere t-ofän, ad-t-isəwär alämär uđlem, idđan dāx-inämäşrayän.

¹⁰ Ädduuttät a-s ere əmeşälän a-wa innä alämär iket-net har änmäşräy i-tajəttewt-net tiyyät, a-di alämär iket-net a-s änmäşräy.

11 Fäl-a-s Mässināx-i innän:

«Wär jed əzzəna»,

ənta daḡ a innän:

«Wär jed iman»,

ḡas kunta kāyy täqqimäd wär jed əzzəna uhən-däḡ, jed iman, a-di härät iyyän, tänimäšräyäd härwa i-alämär.

12 ḡas tajjät iməjridän d-timašalen n-əddinät əssannen s-alämär wa isadärfen a-s ilkam ad-tän-išräḡ;

13 äššäreḡa daḡ wen, ašäl wa d-e-äj, wär däḡ-s-e-tətwidən tähanint i-ere wa s-käla wär tät-oden i-əddinät ed ere wa s-oḡän Mässināḡ tähanint, wär t-issärmäḡ äššäreḡa-net.

A-wa dd-itirəw immun wa n-tidət s-əgg-adəm

14 Ayətma-ḡ, ak ma s-infa ägg-adəm, ad-itabəraj s-oman s-Mässināḡ, a-s ija a-wen, wär ila imärkedän əsidättätnen a-wen? Ak ajän orda s-ad-t-iḡləs immun-wen-däḡ?

15 Kunta lam wälätma-wän meḡ äñḡa-wän ḡälulän, älluz,

16 ma s-infa a dd-iggəd ḡas iyyän däḡ-wän, änn'-asän: «Iḡläs-kəwän Mässināḡ däḡ-esəmeḡ d-laz, təḡläm däḡ-älxer»? A-s ija a-wen, tənsam fäll-ehäre, məšan, wär t-illa a-s tän-tədhaläd däḡ-a-wa s-əmiḡatärnät tiḡəswen-nəsän.

17 Emmək-wen-däḡ daḡ a-s immun s-Mässināḡ wärän dd-itirəw s-əwadəm imärkedän, ämmut.

18 Iha miši a-s əməra, ad-hi-änn iyyän däḡ-wän: «Käyy led immun məšan wär-əddew d-imärkedän, a-s ija a-wen, näkk, leeḡ-tän.» Wa däḡ-wän ordän a-wen, ənneḡ-as: «Səkən-ahi a-wa əssitbätän immun wärän əddew d-imärkedän, ad-hak-sətbətäḡ näkk immun-in s-imärkedän-in.

19 Ak täsitəḡräfäd a-s Mässināḡ iyyän? Ikna, məšan, əlməd a-s alšinän däḡ-omanän s-a-wen, äšiškädkäḡ-tän.

20 Əyyaa, kāyy-i n-älžahil wär ih' älfäyda, äyy-ahi ad-käy-səfhəmäḡ, a-s immun warän əddew d-imärkedän, wär t-illa a infa.»

21 Ajän wädden amḡar-nänäḡ Ibrahim, ašäl wa d-iqbäl ad-ikət i-Mässināḡ rure-s Isxaqq, təmašalt-ten-däḡ ija, a t-ikfän idəm data-s?

22 Wädden hannäyäd a-s immun əddeew härkuk d-imärkedän wi t-satbatnen!

23 Ənta-den-däḡ a-wa isatbatän a-wa innä əlkəttab a-s innä:

«Omän Ibrahim s-Mässināḡ,

a-wen-däḡ a t-ikfan idəm ḡur-s,

iwär-t isəm: Amidi n-Mässināḡ.»

24 Wädden, hannäyäm a-s ägg-adəm, imärkedän ad-t-hakkänen idəm dat-Mässināḡ wädden immun ästikän.

25 Emmək-wen-däḡ daḡ a-s təkräš Rahab ta n-tälkäxbat idəm dat-Mässināḡ; təja təmašalt təhuusket ašäl wa d-təffär inaramän wi n-käl-Işrayil dd-oyäsnen äkall-net, təffär-tän, təj'-asän daḡ äddäbara tän-issəjmädän äkall härwa wär tän-irmes əlxəkum n-äkall-en.

26 Səjdät: əmmək-wa-däḡ s-taḡəssa wär hen iman, tämmut, əmmək-wen-däḡ daḡ a-s immun wärän ila imärkedän, ämmut.

3

Nännähədet däḡ-ilsawän-nänäḡ

¹ Ayətma, wär käwän-täjjäšnet älgulam äjjootnen fäl-a-s näkkäneḍ-i n-älgulam, ilkam dəḡ-näḡ äššäreḡa ojārən wa n-äddinät wi iyyäḍnen tösəmme.

² Wär hanäḡ-iha ere s-wädden išaḡšad dəḡ-mäjräd mäšan, wa äddoben dəḡ-näḡ, ad-äqqayəm wär-išäḡšid dəḡ-mäjräd, ähaləs imdan ännihäḍän dəḡ-iman-net a ämoos.

³ Tənhayäm a-s afäl ija äwadəm aḡäba dəḡ-emm n-ebäje, ad-t-oḡad, ännihäḍ dəḡ-taḡəssa-net iket-net,

⁴ zənnəzjumətät dəḡ-əd-tin-äho, a dār-togdäh tiyyät təməḡäre d-a dār-ogdäh aḍu wa tāt-imahhālän, härät n-taḡäya əndärrät a-s tāt-oḡad wa tāt-äššešälän, itannäḍ-tät siha s-irha.

⁵ A-wen-dəḡ dəḡ a dār-oläh iləs, mətki mäšan, itabäraj s-a äjjeen, temäntäst əndärrät mäšan, ənta-da-dəḡ he-səntəsät äroj imdan.

⁶ İləs dəḡ, oläh d-efew, wär t-illa əzzənəf n-tälläbäst t-dd-wärät təffil, iha tisläḍ-nänäḡ, isamälsa fäll-taḡəssa-nänäḡ iket-net, ässintäs fälla-näḡ efew wa n-zohännäma, ässintäs dəḡ tämudre-nänäḡ.

⁷ Wär t-illa əzzənəf n-tawäqqast wäla n-igḍaḍ wäla n-iḡlulam wäla n-imudārən wi n-aman s-wädden itinən, ässenän-t dəḡ ägg-adəm

⁸ mäšan, iləs, wär t-illa ere äddoben ad-t-isinən, tagäršät a ämoos, ihäräynän-net, ässäm dd-wär-išärrəy äwadəm, härkuk ḡas ämiḡälḡäl.

⁹ İləs a-s nətiməl Abba-nänäḡ Emäli, ənta dəḡ a-s nəsarar tilḡant dägg-adəm-i dd-ixläk Mässinäḡ dəḡ-milhaw-net.

¹⁰ Emm iyyän, zəjjärnät-dd tittar ti oläḡnen hakd ti läbasnen. Ayətma, wär-itäjjət dəḡ-wän a-wen.

¹¹ Ak käla tənhayäm terəst s-dd-zazjar tiḡ-net aman äzednen di äkosämnen?

¹² Ayətma-ḡ, äjän ahəšk n-ašar, təggarän-t aratän n-əzzäytun meḡ ahəšk n-läḡnəb, təggarän-t aratän n-ašar? Terəst dəḡ täkosämät, wär tāt-dd-e-əzjārən aman äzednen.

Särho wa n-tidət

¹³ Əndek dəḡ-wän wa n-emässärho, ilän tayətte? Adiš, isäknet a-wen s-älxal-net d-imärkedän dəḡ-wär-itter aḍkul n-iman-net ed a-wen-dəḡ a-s ašämöl wa n-särho.

¹⁴ Mäšan, kunta käwäneḍ ässiismämnät tismiten ulhawän-näwän, täsidäwäm a-wen d-asəgdah n-iman-näwän d-äddinät, wär jem a-wen abäraj, wär jem bahu tidət

¹⁵ fäl-a-s, särho-wen, wädden Mässinäḡ-i ihän išənnawän a dd-ifal, i n-äddunya-i-dəḡ, i n-ere ilkamän i-derhan n-iman-net d-Iblis

¹⁶ fäl-a-s edägg meḡ ulh ässiismämnät tismiten d-asəgdah n-iman, änimahäz d-amšəndaw d-e d t-illäm erk ämašal.

¹⁷ Särho wa dd-ifälän Mässinäḡ, äzizär təšədje, iqqal ägg-älxer, olaḡ, išmär, təh'-e tähanint, äsijät imärkedän wär henät timudda wäla təlmənuḡäḡa.

¹⁸ Äddinät wi ədḡaznen dəḡ-umäḡ n-älḡafyät, saḡsalän-dd s-iman-näsän dəḡ-älḡafyät, timaşalen hasän-əjrawnen idəm ḡur-Mässinäḡ.

4

Tiyyät-i-dəḡ Mässinäḡ meḡ Iblis

¹ Əndek siha s-dd-han imjārən d-ikənnasän wi käwän-hänen? Äjän wädden erk derhanän wi təggasnen dəḡ-ulhawän-näwän?

² Sadārhanäm a äjjeen wär jārrewäm, wär t-jārrewäm ed tämoosäm išənja n-imäjjan n-iman s-iha munkäzi ulhawän-näsän, täsidäwäm a-wen

d-amjār d-akənnas. Wār jārrowäm a-wa tattäräm däx-Mässinäx ed tājäm-as erk utär

³ meḡ daḡ a-wa tattäräm wār t-jārrowäm ed a-s t-tattäräm, tattäräm-t s-erk ənniyät däx-wār kəttəwäm ḡas ar tänoflayt n-iman-nāwän.

⁴ Iməzzəna yaden! Ajän wār təssenäm a-s tārha n-a-wa fäll-təgl' äddunya, isakaḡ d-Mässinäx? Ere daḡ wa ijän äddunya tamidit, ij'-iman-net, ašanjo n-Mässinäx.

⁵ Ajän täḡeläm a-wa innä əlkəttab, bännan a fäl tän-innä: «Osamäḡ fäll-unfas wa jeḡ däx-ulhawän-nāwän, wār-əqbeläḡ fäw oharäḡ-tän d-iyyän.» Mäjräd-wen-däḡ, Mässinäx a t-ijän.

⁶ Mäšan a-wen iket-net, ojar-t ännuḡmät wa hanäḡ-ihakk. Inn'-anäḡ əlkəttab:

«Mässinäx, ikfär i-wi äkkubrätnen, ihakk ännuḡmät i-wi data-s sarasnen iman-näsän.»

⁷ Särəsät iman-nāwän dat-Mässinäx, əkfärät i-Iblis ad-kāwän-ajəj.

⁸ Zihəzät-dd iman-nāwän Mässinäx, ad-kāwän-dd-ahəz. Ya inäsbäkkadän, šəsdəjät ifassän-nāwän, šəsdəjät ulhawän-nāwän kāwäned-i jänen äššäk däx-a-wa häm.

⁹ Səlläqqəwät iman-nāwän, isnanät, tətəfäm iba, šursəm; tumaset taḡəzza-nāwän uḡəf n-iba, təjəm tedäwit-nāwän, tisanat.

¹⁰ Särəsät iman-nāwän dat-Emäli i-ad-kāwän-idkəl.

Äyyät fälla-wän anmizəm jer-iman-nāwän

¹¹ Ayətma-ḡ, wār tänmažämäm jer-iman-nāwän. Ere itizəmən äñḡas, isawar-t uḡlem, alämär a itizəm, isawar-t uḡlem; alämär ya, wār-täddobed ad-fälla-k ila tārha n-ämašal, sawaräd-t daḡ uḡlem.

¹² Mässinäx ḡas a-s älwakil d-älqalli, inaqḡ, isidur. Käyy-š, ma täqqaläd, sawaräd uḡlem änhäraj-näk?

Särəsät iman-nāwän dat-Mässinäx

¹³ Darät-a-wen daḡ, kāwäned-i jännanen: ašäl-i meḡ ašəkka, ad-nässakäl s-aḡrəm mändam, näj'-in däḡ-s awätay n-mamäla däḡ-närbäx.

¹⁴ Xäxx-däḡ, iməskay, ajän təssanäm a-wa hawän-itwār ašəkka? Ajän kāwäned fäw, ma täqqal tämudre-nāwän? Ajän wädden, wār tämoosäm ar tahälähälayt äwway aḡu s-e-d dd-təzjār, šik-däḡ a-s hin-layyäm.

¹⁵ A äniihäjjän, ad-tənnəm: kunta irḡa Emäli s-a-wen, kunta nəddar näḡlas, ad-näj a-wa d-a-wa.

¹⁶ Mäšan ämära-däḡ, wār t-illa a kawän-išlan säl ibärajän sär-wän dd-orawän erk inəzjam-nāwän, əlmədät a-s abäraj šund-wen-däḡ, wār-oleḡ.

¹⁷ Əkkasäḡ-kāwän däḡ-taḡdärt a-s ere issanän a-wa ihä emärked, äqqima-däḡ, wār t-ija, ofa abäkkad.

5

Käl-ehäre, wār täsfälläm fäll-ehäre-nāwän

¹ Äywa, kāwäned-i n-käl-ehäre, älhät, šursəm däḡ-təssəba n-älmäššibatän wi fälla-wän dd-madän-iḡəw.

² Ehäre-nāwän wa irkähän, tattänät-t tiwəkkawen, isəlsa-nāwän, tatt'-en temedhe;

³ təkša tenekt ta s-ilkam ad-fälla-wän täjjäyh, säry tiḡəswen-nāwän šund temse, oräḡ-nāwän d-ažrəf-nāwän ed täsbäkänäm i-iman-nāwän ehäre n-tikunen däḡ-išilan-wi-däḡ s-əntäned a-s wi n-ajilal n-äddunya.

⁴ Ænhøywät inaxdimän wi dd-omädnen išekraš-näwän, öntäneḍ-da-däx s-təkšam älxaqq n-tide-näsän, äsikälälän ämära hundäx har täwwäḍ tekälelt-näsän timəzzujen n-Emäli n-ajhanän wi n-išənnawän.

⁵ Fäll-ärori n-äkall-i-däx, täsnäfläyäm iman-näwän däx-izəjraz d-tizudawen ti n-ulh d-tiṭṭawen, təknam tewwant, tətəwäm-in ašäl wa ilkäman,

⁶ täswäräm imayḍalän uḍlem, jam iman-näsän, wär t-illa a hawän-äxšadän.

Tazidert

⁷ Ayətma-ḡ, a ikkä Emäli-däx wär dd-iqqel, təjjəšet-käwän tazidert. Zəjjəzzät ḡas änasdamu, äziḡäydär, iqqal i-ašäl wa d-mad-ärḡ ašəkrəš-net. Tazidert ta t-təhät ašäl wa d-wätän ijənnawän wi äzzarnen, önta daḡ a t-hat a-s mad-əwətən wi əšräyenen.

⁸ Əṭṭəfät käwäneḍ-däx tazidert-ten-däx, səşşuhum ulhawän-näwän, təjbəsäm ed Emäli išwar dd-iqqal.

⁹ Ärheḡ däx-wän ayətma-ḡ, ad-wär ijənn wäl' iyyän-däx a läbasän fäll-amidi-net fäl-a-s älqallı wa ojarän išwar dd-osa, os'-iwän fäw.

¹⁰ Tälälät ayətma tazidert ta käwän-sahalät s-data däx-tisnant šund a-wa jän ännäbitän-i hawän-jänen isälan n-Emäli.

¹¹ A-wen-däx a fäl nəjanna: tənḍəḍ i-wi däx-wän hälnen iman-näsän. Wädden təslam äşşabarät wa ija Äyyuba däx-tisnant ta t-tärmäsät, təssanäm daḡ s-uşreyän wi t-ikfa Emäli ed Emäli, miḡaw-net d-tāhanint-net, wär len eket.

¹² Ärheḡ däx-wän ayətma-ḡ, dat-härät iket-net, ad-wär tähhiḍäm s-išənnawän wäla äkall wäla s-härät wäl' iyyän. Umaset öyya-näwän, öyya i-a wa ämoosän tidət, umaset daḡ äbo-näwän, äbo i-a-wa ämoosän bahu i-ad-dd-wär-isiḍəw Mässinäx äşşäreḡa-net fälla-wän.

Tänfo ta hät tamädilt n-Mässinäx

¹³ Ak ozar iyyän däx-wän? Adiš idəlet Mässinäx. Ak äsriiw iyyän däx-wän? Adiš, awəyet tömmal i-Mässinäx.

¹⁴ Ak ikna iyyän däx-wän turhəna? Adiš, äḡret-dd inušämän n-älkänisät, ədəlnet-as Mässinäx, əşwəynet-as s-əzzäyt s-isəm n-Emäli.

¹⁵ Afäl has-dälän Mässinäx s-ulhawän sār-s omannen, ad-iḡləs äwadəmen, ijrəw älafu. Kunta ämarhin, turhəna-net, abäkkad a sār-s tät-dd-orawän, ad-has-t-in-änš Mässinäx.

¹⁶ Nəmənsät a-wa ikkān jere-wän, täqqimäm hak iyyän itəddal Mässinäx i-amidi-net i-ad-t-izuzəy fäl-a-s tamädilt n-ere ilan idəm dat-Mässinäx, la tädabit, təkna təla n-tənfa.

¹⁷ Wädden, təslam isälan n-ännäbi Үəli,† wär dār-s nəzley, ägg-adəm dār-näx olähän a ämoos, mäšan ija i-Mässinäx tamädilt däx-ijlay i-ad-wär iwet ajəna, ij' ajəna käraḍ iwətyan d-säḍis oran, wär-iwet;

¹⁸ tokäy täqqän-ten ḡas, idäl Mässinäx i-ad-iwət ajəna, iks' äkall.

¹⁹ Ayətma-ḡ, afäl däx-wän änmäşräy iyyän i-tidət har t-dd-äsoḡäl däx-s iyyän,

²⁰ əlmədät a-s ere dd-äsoḡälän anämäşray tabarät ta öyya, ad-t-iḡləs Mässinäx däx-tamättant, änš-as-in əjut n-ibäkkadän-net.

† 5:17 5:17 A-wa ännäbi dd-äzzarän i-Үisa, äloläy däx-isälan-net əssayät timad n-awätay dat-tiwit-net.

Təkarde ta təzzarət iktəb Bətrus

Əşajəş

¹ A-wa näkk Bətrus wa n-änammaşul n-ŶisaĀlmasex hin-iktabän i-imumənän-wi əsnəfrän Məssinəx əmmähəşnen jer-ikallän wi n-Bəntu, Gälasya, Kafadusya, Azya d-Bitinya.

² Abba Məssinəx iman-net, dəx-təlluləya-net, a-s əru d-kəwän-əsnəfrän, ikrəş-kəwän s-tərna n-Unfas-net, izləy-kəwän-dd jer-timəttawen i-ad-tamaşaləm erhet n-ŶisaĀlmasex-i kəwän-işşəşdäjän s-aşni-net.

Əhuuləx-kəwän-in, əttarəx s-Məssinəx, ad-kəwän-isənnəfləy dəx-ənnuymət d-əlxe.

Əttəma wa məqqārən əynayän əsjər Məssinəx imumənän

³ Naməlet Məssinəx-i n-Abba n-Eməli-nənəx ŶisaĀlmasex. Təmyərə n-təhanint-net a dəx-dd-issənkər Ŷisa Ālmasex jer-inəmmuttan, ikf'-anəx dəx-təssəba-net təmudre təynayət, əsdəttət dəx əttəma wa hanəx-əsjər

⁴ i-ad-nəjrəw təkasit ta hət isənnawän itwər Məssinəx i-tamətte-net. Təkasit-en, hawän-itwər dəx-əlžənnət, wər xəşşəd, wər tət-isəmədis hərət, wər-inəxxəs ənnur-net.

⁵ Məssinəx iman-net, dəx-təssəba n-immun wa sər-s jəm a kəwän-e-agəzän s-tərna-net i-ad-təjrəwəm əlxəllas wa hawän-itwər dd-e-infiləlän əşəl wa d-e-təmdəw əddunya-ta-dəx.

⁶ Ənta-den-dəx əssəbab n-tedəwit ta jəm kud-dəx iramməs-kəwän, əməra-dəx, əlyizabət əjjeen kəwän-əssikmən iman məşən, a-wa səmmən kəwän-irməsən, wər-e əhaj irmas-kəwän.

⁷ Əlyizabət-en, əddəlil-net, i n-ad-itbat ekew n-immun-nəwän-i ilən əlqin ufən wəla orəx. Orəx iman-net, wər-ixləl, efew a dəx-t-itajj əwadəm i-ad-işdəj. Əmmək-wen-dəx dəx a-s kəwəned, afəl wədden ad-inşəş immun-nəwän s-əlyizabət i-ad-əttəlməd a-wa dər-ogdäh immun-nəwän. Afəl tidət-dəx a-s itbat immun-nəwän, əşəl wa dd-e-iqqəl ŶisaĀlmasex, a data-s təkrəşəm təmmal d-əlxurmət d-semxar.

⁸ Ŷisa, tərham-t kud-dəx wər kəla t-tənhəyäm s-tiştawen-nəwän, tomanəm sər-s dəx kud-dəx har əməra-dəx, wər t-tənhəyäm. A-wen-dəx a fəl əssəbab n-tedəwit-nəwän, ija dəx-təmyərə s-wər t-illa məjrəd t-əssiifhəmən.

⁹ Dəwətət ed əlxəllas a-s maruşət wa kəwän-e-əkf Ŷisa ed tomanəm sər-s.

¹⁰ Əlxəllas wa kəwän-ikfə Məssinəx, əru d-əssəwəlän ənnəbitən dəx-isəlan-net, əmməxən hullan i-ad-əjrähən tisəxlay-net, wər t-illa əlkəttab wər-əsfəykən i-a-wen,

¹¹ wər t-illa a-s wədden jən-t i-ad-əlmədən əzzəman d-hərətən wi maden-əj dəx-a-wa hasən-dd-əsnəfaləl Unfas n-Ālmasex-i izzəxən dəx-uhawän-nəsən. Ənta-en-dəx a tən-issəlmədən a-s Ālmasex, ad-inhəy tersəmmawen, təzzar ijjeş əlxurmət.

¹² Ənnəbitən-en, issəlməd-tən Məssinəx a-s əlxəllas wa s-xaştəbən isəlan-net, wədden əzzəman wa hən a dəx-dd-e-infiləl, ənn-ək, inn'-əsən, i nəwän kəwəned-i s-əxtəbən inəmmuşal isəlan n-Ələnzil s-tərna

n-Unfas Şaddijän-wa dd-ifälän isənnawän. Älənžil-i-hi, wäla änjälosän äsidärhänän ajunf däx-s mäšan, wär-əjrewän turhajät n-a-wen.

Tämudre täksuudät Mässinäx

¹³ Təssəba n-a-wen-däx a fäl, äsimätäräx-käwän d-ad-täqqayməm təjbasäm, xaymät jam ənniyät, äjät ättäma-näwän iket-net däx-a-wa käwän-e-äkf YisaÄlmasex ašäl wa dd-e-infiləl.

¹⁴ Mašälät a-wa fälla-wän irha Mässinäx, wär təkemäm i-erk derhanän wi n-ibda tamašäläm däx-älžahalät,

¹⁵ änn-ak, təkəmet təşədje n-tämudre-näwän i-ta n-Mässinäx ed ənta-i käwän-dd-iğrən s-iman-net, şaddij.

¹⁶ Mässinäx iman-net a innän däx-mäjräd-net:
«İşdajät ed näkk şaddijäx.»

¹⁷ Şämad däx-tittar-näwän, çarräm Mässinäx s-isəm «Abba», adiš təjjəšet tuksəda-net ulhawän-näwän, a təkka təddaräm tämoosäm iməjarän fäll-əröri n-äkall-i-däx. Ənta, wär-äznämäzläy äddinät, ilkam, ad-işräx hak əwadəm s-a-wa has-jän imojjan-net.

¹⁸ Təssanäm a-s wädden härätän wären ənfa härät şund azrəf meç oräx a-s käwän-dd-ikkäs Mässinäx däx-terk tämudre ta dd-təträm,

¹⁹ änn-ak ašni ilan älqim, ašni n-Älmasex-i ämmun şund Ašəxol şaddijän s-wär t-illa älğib t-iwarän a-s käwän-iğläs.

²⁰ Äru, iket-di fäw dd-xalläk äddunya, äsnäfrän-t Mässinäx i-a-wen-däx. Ašäl-i-hi, a-wen s-äru t-iktäb Mässinäx, äsnäfaläl-t-dd däx-təssəba-näwän däx-işilan-wi-däx n-ajilal.

²¹ Ənta-en-däx a dd-oräwän immun-näwän s-Mässinäx ed issənkär-t-dd däx-tamättant, ikf'-e älxurmät däx-ittus n-ad-əns immun-näwän d-ättäma-näwän fäll-Mässinäx.

²² Ašäl-i, şämad, tämešäläm tidət, adiš, şaddijäm. Oräw-dd sär-wän a-wen tärha jer-iman-näwän wär təha təlmənufäxa. Nəmährhät härwa jer-iman-näwän s-ulh imdan

²³ ed tämudre ta täynayät käwän-ikfa Mässinäx, wädden abbatän-näwän wi n-äddunya-ta-däx s-a ijän däx-ilkam ad-tän-iba a hawän-tät-ikfän; mäjräd wa iğlälä n-Mässinäx-i ihakkän tämudre a-s əssəbab-net

²⁴ fäl-a-s innä əlkəttab n-Mässinäx a-s:

«Amäskoy ägg-adəm, wär-iğley d-teyəşşe,
tayrəst-net, wär təzley d-ta n-täboyt.

Teyəşşe tiçar, täboyt ad-tidəw, tiçar-in ənta-däx

²⁵ mäšan, mäjräd n-Emäli ənta, iğlal.»

Äywa, mäjräd-wen-däx a hawän-ätwäjän a-s təsläm i-isälan n-Älənžil.

2

Tamətə ta ila Mässinäx: tamətə təddarät, şaddij

¹ Ənhəywät, əbdəwät d-tälläbäst a tämoos-däx, əbdəwät d-amsud d-təlmənufäxa d-əmmunšax d-tizmit jer-iman-näwän.

² Alähät d-imärkäsän s-härkuk ärhan taçədt, ənsəyät käwəneç-däx axx wa wär-inxes härät ämoos mäjräd n-Mässinäx i-ad-käwän-isəşşuhət, tədwələm däx-immun, təğləsäm ed innä əlkəttab n-Mässinäx:

³ «Käwəneç, täkräbbem täzude ta ija alkum i-Emäli.»

⁴ Zəzzihəzät-dd iman-näwän Emäli ed iddar. Ənta a-s təhünt ta n-açmār lät älqim hakkät ašşahät i-ehän, unjäyän sär-s dägğ-adəm mäšan, äsnäfrän-tät Mässinäx ed inhäy a-s ənta a tufät.

⁵ Ämära, käwäneḏ-däḡ, tämoosäm šund tihun əddarnen warnen təhünt-ten-däḡ, umasät šund ehän wa šəddijän izzäḡ Mässinäḡ, tämoosäm šund käl-tikutawen-net äššiišdäj t-əkfanen iman-näsän i-ad-tamašaläm erhet-net, ḡabbädäm-t däḡ-idəm n-a-wa hawän-ämoos ḡisa Älmaseḡ. Ənta-den-däḡ takute ta käwän-warät i-ad-təkrəšäm idəm dat-Mässinäḡ.

⁶ Däḡ-isälan n-a-wen-däḡ a däḡ-innä əlkəttab, innä Mässinäḡ:

«Äsnäfränäḡ təhünt n-aḡmär

ta təfränät lät əlqim

däḡ-ayrəm wa n-Sayon.

Ənta a he-sänsäḡ s-tizarät i-ad-tumas ässas.

Ere fälla-s issəntämän immun-net-däḡ,

wär-iha miši n-ad-ilkam ad-ämmujrəz.»

⁷ Käwäneḏ-i sār-s omännen, ad-tətwəsəmyḡaräm məšan äddinät wi has-äḡärnen ulhawän-näsän, iktab a-s:

«Təhünt-ta hin-järän əlbännatän,

a-s dd-təšräy tanfust,

ənta a təqqälät ta n-aḡmär n-ässas n-ehän iket-net.»

⁸ Ätwänn'-anäḡ daḡ a-s:

«Təhünt, a hasän-irassälän, tidəwän.»

Rassäl-asän ed unjäyän omänän s-məjräd n-Mässinäḡ, ənta-den-däḡ tetewärt-näsän, a-wen-däḡ a dār-äniihəjjän.

⁹ Məšan käwäneḏ-i n-imumənän, ij'-iwän Mässinäḡ tamətte äsinäfrän i-iman-net, tämoosäm ejhän n-käl-tikutawen fäll-äminakäl, əddəwəl šəddijän, tamətte äsidärfät; ikkäs-käwän-dd Mässinäḡ iman-net däḡ-tihay, ij'-iwän däḡ-ännur-net wa ähusken i-ad-tiimələm dat-äddinät təmḡäre d-tihusay n-ijitän-net.

¹⁰ Ibda, wär hem tamətte-net məšan, ašäl-i, tämoosäm tamətte n-Mässinäḡ; ibda, wär hem wi s-oḡän təhanint məšan ašäl-i, oḡän-awän-tät.

Äyyät fälla-wän a-wa läbasän

¹¹ Ayətma-ḡ-i əkneḡ tärha, iməjarän d-iməhhujjaj a tämoosäm fäll-ärori n-əkall-wa-däḡ; a-wen-däḡ a fäl, əttaräḡ däḡ-wän ad-təyyəm erk derhanän wi n-ibda käwän-saknasnen d-tumast-nəwän ta təynayät.

¹² Əttəfät əlxal olaxän jer-inəzzulam† i-ad-səbbugətnät tihusay n-tämudre-nəwän a-wa-däḡ käwän-sawarän uḡlem n-a-s erk äddinät a tämoosäm, afäl tamašaläm a-wa olaxän data-sän, ad-hasän-umas a-wen ännur i-ad-səmyḡarän Mässinäḡ ašäl wa hasän-dd-e-infiləl.

Asjəd i-a-wa omär əlxəkum

¹³ Təssəba n-a-wen-däḡ hawän-iqqäl Emäli a fäl məšälät a-wa fälla-wän irha əlxəkum iket-net, sərəsät iman-nəwän dat-ämənokal n-əkall ed ənta a ixkamän fäll-härät iket-net,

¹⁴ sərəsät iman-nəwän dat-ḡəfär wa ija ämänokal n-əkall jənnəj-wän ed ənta a t-ikfän tärna ta s-iḡattäs äššäreḡa, isawar uḡlem iməsdäḡwa, itiməl wi tamašalnen a-wa olaxän.

¹⁵ Erhet n-Mässinäḡ, itbat: məšälät a-wa olaxän i-ad-səssusəmäm erk äddinät wi əzhälnen wären əla tayətte.

† 2:12 2:12 — ḡur-käl-Älyähud, ere wärän ämoos ägg-Älyähud s-aläsäl meḡ ere wärän ilkem i-äddin-näsän, iket-net, änəzzalim a ämoos. A-wen-däḡ a fäl tiwsaten ti iyyäḡnen iket-näsän, ti n-inəzzulam. — Ašäl-i-däḡ, änəzzalim, äkafär (ere wärän issen s-Mässinäḡ).

¹⁶ Tidət-dəy a-s lam iman-nəwän məşan, wär täjjät a-wen əsarı i-ad-tamaşaləm təlləbəst, ənn-ak, a täjjəm-dəy, əjät-t dəy-a-s kittəwəm a-s eklan n-Məssinəy a təmoosəm.

¹⁷ Səmyərət əddinət iket-nəsən, ərhət ayətma-wän dəy-əddin, uksadət Məssinəy, səmyərət əmənokal n-əkall.

İsəmməterən i-ad-nəttəf təmudre ta ittəf Əlmasex

¹⁸ Eklan! Sərəsət iman-nəwän dəy-tuksəda n-Məssinəy daw-məssaw-wän, uksadət, səmyərəm wi dəy-sən oləynen, əzednen, hakd-dəy wi s-izzəwət əlxal-nəsən.

¹⁹ İrhuj-awän afəl əlyizabət wa hannəyäm amişəl n-erhet n-Məssinəy a t-dd-orəwän sər-wän wədden əddərora.

²⁰ Əndek isəm wa-ihən əbbərəd dd-oraw əddərora? Wər t-illa. Məşan, kunta əlyizabət-wa hannəyäm, tuksəda n-Məssinəy a sər-wän-t-dd-orəwän, adiş, irhuj-awän ed a-wen-dəy a he-isiwədən idəm-nəwän dat-Məssinəy.

²¹ Əlyizabət şund-wen-dəy a-s kəwän-dd-ixrə Məssinəy ed Əlmasex ənta-dəy, inhəy əlyizabət, oyy'-awän-dd s-a-wen-dəy əlmital i-ad-təttəläləm.

²² «Əlmasex, wər kəla ofa abəkkaç, wər kəla innə bahu»,

²³ ətwərbəç məşan, wər-irbed;

inhəy tersəmmawen məşan

wər kəla dd-təzjər terk tettert emm-net,

ənn-ak, əsoxəl talxa-net Məssinəy-i işarrəxən s-iqqud.

²⁴ Əlmasex iman-net

a irdən s-ad-inhəy ağanə dəy-taxəssa-net,

ətwəşləb fəll-tajəttewt, əmmut

i-ad-ıqkəl fəll-iman-net ibəkkaçən-nənəy,

i-ad-numas şund inəmmuttan

dəy-isəlan wi n-ibəkkaçən,

nəjrəw təmudre təynayət,

nəttəf təmudre toxadət dat-Məssinəy.

Əllubbəç hullan dəy-taxəssa-net

i-ad-təzzəyäm dəy-turhənnə-nəwän

²⁵ fəl-a-s ibda, kəla təmoosəm şund tihatten

əssujjalnen məşan əməra,

təqqäləm-dd Amədan wa idmənen iman-nəwän.

3

Timtər i-tiçeden d-medden

¹ Tiçeden! Sərəset hak iyyət dəy-kmət iman-net dat-əhaləs-net, wər hasən-təşjətmət məjrəd, dihen, kunta ih'-ikmət ti s-wər-irçə əhaləs-net s-məjrəd n-Məssinəy, ad-t-dd-awəynət sər-s tihusay n-əlxal-nəkmət.

² Afəl jəmät a-wen, ad-ənhəyən d-iman-nəsən təşədje n-təmudre nəkmət d-səmyar wa hasən-jəmät dəy-tuksəda n-Məssinəy.

³ Wər toşelmət çarət tihusay-ti lənen mənhoy d-isəhhəska d-isəssəkna wi jənen s-izəban d-izərkan n-azrəf d-orəy d-isəlsa wi lənen əlqim,

⁴ ənn-ak, səhhəskətmət ammas n-ulhawän-nəkmət, tihusay-tin-dəy a lanen əlqim ixlalən dat-Məssinəy, tin-dəy a dd-tirəwnen təzude d-ənniyət ozjan.

⁵ Tihusay-tin-däx a-s käla hasnät-tammäxnät timəššeddəjen ti n-ibda järnen ätṭāma-nāsnät däx-Mässinäx, əsijādnät i-meddən-nāsnät.

⁶ A-wen-däx a-s käla t-ja Sarāta-i s-fäl təmṭāre n-semṭar-i-däx təja i-Ibrahim, təglä fāw har t-ṭarr s-isəm: məssi-ḡ. Äywa, əsāl-i-hi, kāmāteḍ, Sarāta-en-däx a-s təmoosmät ešše-s afäl tamašalmät a-wa oläxän däx-a-s, wār toyyemät härät wäl' iyyän iggad d-ənniyät-nākmät.

⁷ Meddən! Əssenät hullan däx-tiḍeden-nāwän, wār hin-təttəwäm a-s tiḍeden ya, rəkkəmnät fälla-wän, səbbəlälät-tānät ed timəkkusa a əmoosnät dār-wän ogdähnen däx-tāzunt ta hawän-ija Mässinäx ännuymət-net, äjät a-wen i-ad-wār-itəmmil fāw härät inṭayän tittar-nāwän dat-Mässinäx.

Təhanint ta s-ənihäjja a-s ha ulhawän n-əlməssexitän

⁸ Darät-a-wen daḡ, ahärät iyyän n-ənniyät däx-härät iket-net, aret hak iyyän däx-wän ulh-net i-amidi-net jer-iman-nāwän šund a-wa täjjän ayətma, nəmidənät təhanint, isərəset hak iyyän däx-wän iman-net dat-amidi-net,

⁹ wār zəlām təlläbäst s-təlläbäst, wār zəlām tarəbbeḍt s-tarəbbeḍt. E-d hawän-iḡšād əwadəm härät, ännät-as: «Irəš-ak Mässinäx.» A-wen-däx a-s käwän-dd-iḡrə Mässinäx s-iman-net i-ad-təkusəm marušät wa hawän-itwār.

¹⁰ İktab däx-əlkəttab n-Mässinäx a-s:
«Əwadəm wa irhän təmudre iwar sārho d-tayrəst,
agəzet iləs-net däx-tənna n-a läbasän,
agəzet idlay-net däx-tənna n-bahu.»

¹¹ Jawəḍät i-təlläbäst, məšälät a-wa oläxän,
äməlet əlxer d-uḍəf-net härkuk jere-wän d-əddinät,

¹² fäl-a-s tiṭṭawen n-Eməli ənsanät fäll-wi data-s lanen idəm,
isajad i-tittar-nāsän məšan,
inəlläbäsän əntəneḍ, ikfār-asän.

Ahənay n-əlyizabät fäl a-wa oläxän wədden a-wa läbasän

¹³ Mi hawän-e-iḡšədän härät afäl amišəl n-a-wa oläxän a däx-tədgazəm?

¹⁴ Təndəd-awän afäl erk əmmək wa hannäyäm, amišəl n-a olaḡän a sār-wän-t-dd orāwän. Wār käwän-sərmaḡnet dəgg-adəm, wār təggädnet d-ənniyätän-nāwän.

¹⁵ İxkəmet Əlmasex däx-ulhawän-nāwän, ənta a-s Eməli. Ätṭāma wa käwän-əsjar Mässinäx, ḡaymət härkuk təsidəwäm i-ad-t-səsləm s-tazidert i-ere käwän-əssistänän däx-isəlan-net.

¹⁶ A-wen, äjät-t s-tāzude təddeewät d-uksaḍ, wār-immalet a däx-təššakām iman-nāwän, dihen, ad-səbbəggum əddinät wi fälla-wän jannänen bahu fäl-a-s innin il'-iwän Əlmasex. Ətṭəfät əlxal olaḡän däx-härät iket-net i-ad-əkrukəḍän imiksänän-nāwän.

¹⁷ Kunta Mässinäx a dd-ifal a-wen, ufa erk əmmək irmäsän əwadəm däx-a-s t-išla a olaḡän uhən-i t-irmäsän däx-a-s t-išla a läbasän.

¹⁸ Ənhəywät, Əlmasex, inhäy ayəna, ämmut s-iyyət i-ibəkkaḍän n-dəgg-adəm; wār t-illa uḍlem tiwarän məšan, ämmut däx-təssəba n-inəsbəkkaḍän i-ad-tän-iṭənnəmāzəl d-Mässinäx. Tidət-däx a-s ämmut däx-tayəssa-net, məšan, əsoḡäl-t-dd Unfas Šəddijän unfas-net s-tārna-net, issənkar-t-dd jer-inəmmuttan.

¹⁹ S-tārna n-Unfas-en-däx a-s iḡṭəb isəlan n-Ələnzil i-əddinät-wi s-ašäl-i-däx han əlaxärät;

²⁰ äddinät-en, izzəydär Mässinəx fälla-sän a ikka ännäbi Nox ikarräs turäft n-aman ta mäqqärät mäšan hakd a-wen-dəx, əşxärän-as ulhawän-näsän har fälla-sän dd-ođän aman wi n-đuf, əksän-tän iket-dəx-näsän, wär dəx-sän dd-iyles a səl əttam äddinät.

²¹ Salläm, aman-win-dəx fälla-sän-dd əffäyenen, ämoosän tele n-atwəsəlmaç-nəwän dəx-aman. A-wen-dəx a-s ašäl-i-dəx, wa irdän s-atwəsəlmaç, asətbət a itajj n-a-s tidət-dəx a-s iyläs-t Mässinəx. Əlxəllas-en, wädden ašəşdaj n-tağəssa s-aman a sār-wän t-dd-orəwän, änn-ak, əjjəluçət dəx-alkum i-Mässinəx s-iman šəddijnen, wär-ih' əššək. A-wen əssəbab-net ƳisaÄlmasex-i dd-inkärän jer-inəmmuttan

²² təzzar, ikkə išənnawän, ixkäm dəx-sän daw-açil n-Mässinəx. Ašäl-i, Älmasex a daw-t-əllan änjəlosän d-imänokalän d-iməşşuha wi əzzəyenen išənnawän.

4

Əlxənät abäkkad dəx-tämudre ta täynayät təjrəwäm

¹ Ƴas šämäd Älmasex iman-net inhäy açaña dəx-tağəssa-net mäšan hakd a-wen-dəx, izzəydär, adiş, äjät käwəneđ-dəx fäll-a-wen ed əwadəm wa ihannəyän əlxizabät fäll-təssəba n-Älmasex, asəlmäd a itajj a-wen, a-s ənta-i-dəx, tidət-dəx a-s ibda d-abäkkad.

² A təkäm təddaräm dəx-tağəssa-ta-dəx, wär tättälälät erk derhanän-wi fäll-təgl' äddunya, änn-ak, məşälät erhet n-Mässinəx.

³ Igdäh-awän a-wa-dəx təkäsäm dəx-iba n-tuksəda n-Mässinəx a-s tämoosäm inəzzulam.† Äzzäman-en, wär təmişiläm ar asəmmädəs n-iman-nəwän, erk derhanän, tesäse n-asməd, tansit, iba n-asəgdah, əlxibadät n-əşşänämän d-a-wa olähän d-a-wen.

⁴ Ašäl-i, tämudre-nəwän, tämoos täqqän n-eçäf i-äddinät wi s-käla dər-wän ohärän tämudre-ten-dəx ed təbđäm d-a-wa đarät oşalän əntəneđ härwa, a t-ämoosän: asəmmädəs n-iman, asəssiki, təkkufera.

⁵ Ilkam ad-tän-işrəx Mässinəx, ənta-en-dəx a-s ilkam, ad-işrəx äddinät iket-dəx-näsän jer-wi äba hakd-dəx wi əddärnen.

⁶ A-wen-dəx a fäl wi äba s-ätwəjjän isälan n-älxer, ätwəşrəçän dəx-isälan n-a-wa əmeşälän fäll-ərori n-äkall ed a-wen-dəx a iqqalän i-dəgg-adəm iket-dəx-näsän. Ašäl-i, əddarän iket-dəx-näsän dat-Mässinəx s-tärna n-Unfas Šəddijän.

Tädabit ta ikfa Mässinəx imumənän

⁷ Ayətma, sämdo n-härät iket-net, ohəz-dd. Iwäret-kəwän sərho, äjät ənniyät i-iman-nəwän, ağızət iman-nəwän. Wär käwän-in-işəşlalet härät wäl' iyyän i-ad-tudabem tamädilt n-Mässinəx.

⁸ Zəzrät tərha təmdat jer-iman-nəwän i-härät iket-net fäl-a-s, tərha, timəs-in ibäkkadän äjjootnen.

⁹ Ijjəşet-kəwän aməjaru wärän ija s-ažəžžənyəl n-tiçtawen wäla abjənçən.

¹⁰ Tädabit ta käwän-ikfa Mässinəx dəx-ännuçmät-net, wär tät-inäkkəzet wäl' iyyän dəx-wän i-amidi-net, məşälät a-wen i-ad-tumasäm iməđanän əfrannen n-a-wa käwän-issäçläf Mässinəx.

† **4:3 4:3** — Ƴur-käl-Älyähud, ere wärän ämoos ägg-Älyähud s-aləşäl meç ere wärän ilkem i-äddin-näsän, iket-net, änäzzalim a ämoos. A-wen-dəx a fäl tiwsaten ti iyyäçnen iket-näsät, ti n-inəzzulam. — Ašäl-i-dəx, änäzzalim, äkafär (ere wärän issen s-Mässinəx).

11 Wa ikfä Mässinäx musnät n-mäjräd, ämmäjrädet s-a-wa innä Mässinäx, wa ijrāwän s-ad-ixdöm i-imidiwän-net, ixdəmet s-ässhähät wa t-ikfä Mässinäx. Səmyärät Mässinäx dəx-idöm n-ŸisaÄlmasex dəx-härät iket-net, ənta a ənihäjjan d-älxurmät ixlälän d-tanhaqt täylälät. Amin!

Tämudre täddiinät täddeew day d-älyizabät

12 Ayətma wi əkney tärha, wär täqqännet irrumän wi hannäyäm olähnen d-tuköse n-tahəst ixfawän-näwän, wär teyalät irmas-käwän a-wärän ənhäjja,

13 änn-ak, umaset-awän a-wen əssəbab n-tedäwit ed a-wa käwän-irmasän, käla irmäs Älmasex. Däwätät ämära-dəx dər-s tohäräm tersəmmawen-tin-dəx i-ad-timyar tedäwit-näwän ašäl wa dd-e-infiləl Älmasex dəx-älxurmät-net.

14 Təndəđ-awän afäl käwän-rabbəđän äddinät dəx-təssəba n-a-s il'-iwän Älmasex, təndəđ-awän ed dihen, a käwän-irmäsän-dəx, ad-fälla-wän isäns Mässinäx Unfas-net wa ilän älxurmät.

15 Wär käwän-itäjjäšet ere ihannäyän ayäna fäl-a-s innin ija iman n-əwadəm, wäla okar, wäla ija erk härät, wäla ijjaš isälan t-dd-wären iqqel.

16 Kunta ih'-iwän ere ititwəxəzzəben fäl-a-s innin älməssexi a ämoos, wär has-itumaset a-wen asakor, änn-ak umaset-aş a-wen əssəbab n-təmayit i-Mässinäx n-a-s t-iwar isəm-wen-dəx n-älməssexi.

17 Ässärexa n-Mässinäx wa ilkämän, issəntä; tamətte-net day a-s issəntä. Adiš šamad näkkəned-i-dəx a-s issəntä Mässinäx, əndek isälan n-wi unjäynen omanän s-Älənžil n-Mässinäx? Ma dəx-sän ilkamän?

18 Iktab a-s:

«Kunta wäla wa n-əmaydal, šärnaş d-e-ixləs, adiš, ma innä wa n-enälläbäs d-wa n-anəsbäkkad?»

19 A-wa-dəx a fäl ere dəx-wän ihannäyän ayäna-dəx dəx-təssəba n-amışəl n-erhet n-Mässinäx, isəxləfet iman-net Ämaxlak-i n-Ämaydal, wärän irəzz dəx-tənna-net. Wär käwän-işäləšet iji n-a-wa oləxän.

5

A-wa iwärän inušämän n-älkänisät

1 Inušämän, näkk-i n-ənuşäm äjjəyhän i-tersəmmawen ti inhäy Älmasex, käwäned a-s əssewäləy ämära. A əndərrän xas a hin-əqqimän iqqəl-dd ənta iman-net, itwənhəy älxurmät-net, ahärəx-t dər-s.

2 Ənta da a-wa dər-käwän-əsimätärəx: taşəlift-näwän tahrut n-imumənän ta käwän-issəxləf Mässinäx, äjät-as taməđint ta mad-äj aməđan i-tahrut-net, wär has-jem taməđint käwän-tähhuuşšälät, änn-ak, umaset-awän a-wen a jam d-iman-näwän dəx-erhet n-Mässinäx. Wär jem a-wen əssəbab n-akəraš n-ehäre wärän xälal, änn-ak, ədgəzät dəx-a-wen s-ulhawän əmdanen s-iqqud.

3 Wär tətteräm tanäya n-errawän n-imumənän wi käwän-issəxləf Mässinäx, änn-ak, umasät-asän ere hasän-ha tətəläl.

4 Dihen, afäl ašäl wa dd-änfaläl Ämänokal n-iməđanän wa məqqärän, ad-käwän-əkf, korona, a-wen, takənbut n-təmmənukəla ta s-wär t-illa a inaxxäsän ini-net. Ənta-den-dəx marušät-näwän.

5 Käwäned dəx-i n-imawađän, səmyärät inušämän-näwän, sərəsät iman-näwän jer-iman-näwän ed iktab a-s:

«Mässinäx ikfär i-äddinät wi iha əttəkəbru maşän, wi data-s sarasnen iman-näsän, ihakk'-en ännuxmät.»

Isəmməterän i-imumənän

⁶ Särəsät iman-nəwän daw-tärna n-äfuss n-Mässinäx i-ad-kəwän-ıdkəl dəx-aşäl wa issəbdäd i-a-wen,

⁷ sänsät fälla-s inəzjam-nəwän iket-dəx-nəsän ed ənta a kəwän-ıdmanän.

⁸ Äjät ənniyät, xaymät tokayäm. He kəwəneđ! Wər toyyem Iblis-i n-əmakşar-nəwän əşşisläl-kəwän-in, oläh xas d-ahär inijəwän, or' emm, əxiläyğäläy, itammäy i-ere fäll-ođa, ilməz-t-in.

⁹ Əkfärät-as, səşşuhətät immun-nəwän s-Mässinäx ed təssanäm a-s tersəmmawen ti kəwän-ramməsnen əməra-dəx, ərmasnät dəx ayətma-wän dəx-əddin səl kəwəneđ fäll-əröri n-əkall-i-dəx.

¹⁰ Älyizabät wa kəwän-irmasän, wər-e-əhaj irmas-kəwän ed Mässinäx-i n-Məssi-s n-ənnuymät-i kəwän-dd-iğrən s-iman-net, iğr'-iwän-dd i-ad-där-s tärtəyäm dəx-əlxurmät-net wa iğlälän dəx-idəm n-ğisaÄlmasex. Təssəba n-a-wen-dəx a fäl ənta iman-net a kəwän-e-işəşdəjən, isəbdəd immun-nəwän fäll-əssas intämän.

¹¹ Tumaset tärna härkuk ti-net. Amin!

Ajilal n-məjräd

¹² Silwan wa n-əñña-x n-əmaydal a əssəktəbəx tifer-ti-dəx i-ad-kəwän-səmmətärəx, təkuyədäm dəx-a-wa həm, təlmədäm a-s ənnuymät n-Mässinäx wa dər-kəwän-osəx d-iman-net, tidət.

¹³ Tähuul-kəwän-in əlkənisät-ta əsnəfrän Mässinäx hət əkall wa n-Babilun, əhuul-kəwän-in dəx Marqəs-i n-rure-x dəx-əddin.

¹⁴ Nəməjjät jer-iman-nəwän isofan n-tərha təmdat. Kəwəneđ-i ila Älmasex, ikf'-iwän Mässinäx əlxer-net iket-dəx-nəwän. Amin!

Təkarde ta s-sənatət iktəb Bətrus

Əşjəş

¹ A-wa nəkk Simyon Bətrus wa n-akli d-ənəmmaşul n-ŶisaĀlmasex hin-iktabən i-imumənən wi ikfa Ŷisa Ālmasex-i n-Mässinəx d-Āmaçlas-nənəx immun ilan əlqim, omənən sər-s, noman sər-s nəkkəneç-dəx.

² Āhuuləx-kəwən-in, əsnədfəs fälla-wən Mässinəx d-Eməli-nənəx Ŷisa Ālmasex ənnuçmət d-əlxeç dəx-təssəba n-muzəyət wa n-tidət t-jəm.

Tirhujen ti lən əlməssexitən

³ Mässinəx, dəx-tərna-net, wər t-illa a-wa-dəx hanəx-ihakkən təmudre ta n-tidət təddiinət dəx-tuksəda-net s-wədden, ikf'-anəx-t. Issəlməd-anəx s-Eməli-i hanəx-dd-ixrən s-iman-net i-ad-hanəx-əkf dəx-ənnur-net d-əlخال-net.

⁴ Təssəba n-ənnur d-əlخال-wen-dəx a fəl hanəx-əssahər d-iman-net, ijjəş-anəx ərkəwələn n-nefran əjjootnen lanen əlqim i-ad-nəbdəw d-erk derhanən wi fəll-təgl' əddunya sər-s dd-tirəwnen əlhəllək, nəttəf əlخال wa-net.

⁵ A-wen-dəx a fəl kəwən-əsimətərx d-ad-təjəm tədabit-nəwən iket-net i-ad-siwədam fəll-immun-nəwən əmişəl n-a-wa oləxən, siwədam fəll-əmişəl n-a-wa oləxən muzəyət n-Mässinəx; siwədam fəll-muzəyət n-Mässinəx, tanhaçt dəx-iman-nəwən,

⁶ siwədam fəll-tanhaçt dəx-iman-nəwən, ehel n-iman-nəwən dəx-əlxizabət; siwədam fəll-ehel n-iman-nəwən dəx-əlxizabət təmudre təddiinət,

⁷ siwədam fəll-təmudre təddiinət, ənmərh jer-iman-nəwən şund ənçatən, siwədam fəll-ənmərh jer-iman-nəwən şund ənçatən, tərha təmdət.

⁸ Afəl tamaşaləm tihusay-tin-dəx s-əjut, wər-e tumasəm əddinət wəren dd-səxsəl hərət, ənn-ək, ad-ijjəş əlbəraka tassaxt-nəwən d-Eməli-nənəx ŶisaĀlmasex, təkənəm-t muzəyət.

⁹ Wa wərən itəmmişil tihusay-tin-dəx, ilmədet a-s wər-izley d-adərxal d-asəffənəwnaw, ittəw'-in əşəşdaj wa t-ija Mässinəx dəx-ibəkkəçən-net wi n-ibda.

¹⁰ Ayətma-x, şəmad Mässinəx iman-net a kəwən-əsnəfrənən, əjləyət hullan dəx-alkum-has i-ad-itbat nəfran d-teçərə ta kəwən-dd-ija s-iman-net. Afəl təmudre-ten-dəx a tətçafəm, wər-e təjjərtəççäləm.

¹¹ Əmmək-wen-dəx dəx a dəx-hawən-e-ikən Mässinəx arr n-imawən n-Təmmənəya ta təxlələt dəx-ixkəm Eməli-nənəx d-Āmaçlas-nənəx ŶisaĀlmasex.

A-wa innə Bətrus dəx-taməttant-net

¹² Hərətən-wi-dəx, siktoç-awən-tən-dd dəx-a-s, əssənəx a-s tən-təssənəm, tətçafəm dəx tidət məşən hakd a-wen-dəx, indər-ahi fəw ad-wər hawən-tən-dd-əssəçtəx.

¹³ İja çur-i a-s a əkkəsəç əddarəx, iwar-ahi, ad-hawən-tən-dd siktoç i-ad-jam ənniyət

¹⁴ ed əssənəx a-s əşəl-in, ohəç-dd. İşwar əzjarəx əddunya-ta-dəx, əj a-wen s-əmmək wa s-əru hi-t-dd-əsnəfaləl Eməli-nənəx ŶisaĀlmasex.

¹⁵ A-wen-dəx a fäl ärhey iket-di d-itəjj a-wen, ad-kəwän-dd-siktoy härätän-win-dəx i-ad-fälla-sän jam wəla dərät taməttant-in.

Tajuhe ta ija Bətrus d-ännəbitän wi iyyədən

¹⁶ Isəlan wi hawän-in-nəja fäll-ass n-Eməli-nənəx YisaƏlmasex, wədden a insan fäll-tinfusen dd-nəsinəxənbäl wəla dd-nəsihəskət dəx-iyəfawän-nənəx. Aa fəw! Tihusay n-a-wa hawän-nəjanna, a nənhay s-tiṭtawen-nənəx,

¹⁷ nəjjəyh i-semxar d-əlxurmət wa t-ikfa Abba Məssinəx-i n-Məssi-s n-tihusay d-əlxurmət, nəbdad a-s dd-ijməḍ eməsli n-Məssinəx işənnawän innə:

«A-wa Rure-x wa n-iyyən əkney tərha, ənta xas a dəx-əsriwän iman-in.»

¹⁸ Eməsli-en s-nəsla dd-ifälän işənnawän, nəsl'-as əsäl d-nəddew d-Yisa fäll-tadəxt ta šəddijət.

¹⁹ A-wen-dəx a fäl, a-wa ənnən ənnəbitän, nəflas-t, əfləsət-t kəwəneḍ-dəx i-ad-kəwän-infəw s-a əjjeen ed ad-hin-ikkəs tihay fäll-ulhawän-nəwän s-əmmək wa s-hin-takkəs tefətelt tərmasət tihay, imləwləw edəgg, işəsdəj ənnur wa n-Əlmasex ulhawän-nəwän šund tatrit ta n-tifawt dd-təsiməqqet.

²⁰ Əlmədət dat-härät iket-net a-s məjrəd wa jän ənnəbitän, wər t-illa dəx-əlkəttab n-Məssinəx ere əddooben ad-t-əffəssər s-a-wa dd-ikkəs dəx-eyəf-net xas

²¹ fäl-a-s, wər t-illa ənnəbi n-Məssinəx dd-iggadän xas ittər tənna n-a-wər-innə Məssinəx, ed məjrəd wa jän ənnəbitän dəx-isəlan n-Məssinəx, tərna n-Unfas Šəddijän a tən-dd-intəjən s-tənna-net iket-net.

2

He kəwəneḍ iməsəxran wi n-bahu!

(Hudd 4-13)

¹ Dəx-əzzəman hin-okayän, kəla hən ənnəbitän n-bahu iyyəḍ tamətte ta n-kəl-İşrayil s-əmmək wa s-əsäl-i-dəx, han-kəwän iməsəxran n-bahu iyyəḍ tikəddulnen Məssinəx-i n-əmənokal wa məqqārən tən-ixləsən. Əkkəzzu a-s dd-silmumusən iman-nəsən jere-wän, tiləqqad a-s saswadän əddinət i-ad-tən-šənnəməşrəyän. Imojjan-nəsən a tən-e-awəyənən šik s-əlhəllak.

² Ad-hasən-əlkəmən əddinət əjjootnen dəx-asəmməḍəş wa təjjän i-iman-nəsən, səssəkkufərən-tən i-ad-əşləyən i-tabarət n-Məssinəx ta n-tidət.

³ Iməkkorras-win-dəx, ad-əttərən əşəwad-nəwän s-tinfusen əglanan s-azrəf, dd-əkkəsən dəx-iyəfawän-nəsən i-ad-suməmən a-wa ləm. Əru d-issəbdəd Məssinəx əlhəllak-nəsən, wər-e əhaj dəx wər-ija a-wen.

⁴ Əkkəsəx-kəwän dəx-təxdərt: Məssinəx, wər-inxa tiṭtawen-net fäll-ənjələsən wi ənməşrəynen, ənn-ak, ija dəx-sən tişəm təzzar ijər-tən-in s-iyyəḍ dəx-tihay ti n-žohənnəma i-ad-əqqələn dihen i-əşşərəxa wa ilkəmən.

⁵ Əddinət dəx wi n-ibda ənməşrəynen i-Məssinəx dəx-əzzəman wa n-Nox, wər tən-oyya Məssinəx s-əmmək-wen-dəx. Əsməqqəs-dd fälla-sən aman wi n-ḍuf dd-fälən işənnawän d-əkall, əksən-tən. Wər dəx-sən dd-iyles ar Nox d-əddinət n-kəl-ehən əssa. İnəy Məssinəx a-s əzzəman-wen-dəx, Nox-en-dəx xas a oxadän data-s, ixəttəb iqqud s-Məssinəx.

⁶ Oləs dəx Məssinəx, ələhas n-iyərman wi n-Sodoma d-Gomora, issəntəs-tən, ij'-en əzəd fäl təmşərə n-anməşri-i-dəx jän i-ad-umas a-wen əlmital i-inəməşrayən iket-dəx-nəsən.

7-8 İlhäs-tän Mässinäy iket-däx-näsän, wär dd-oyya ar Lut-i n-ämaydal. Jän käl-iḡärman-en-däx asəssiki okäyän ämaku. İhannäy Lut, isall hak ašäl i-xorəzzəma wa tän-išlän, äsniinän iman-net fäl təmxäre n-tälläbäst-i-däx jän käl-iḡärman-en-däx.

9 İsälan-win-däx, salmadän-anäx a-s äddinät wi äddiinnen, a jän däx-älḡizabät-däx, ad-tän-dd-iḡləs Emäli däx-s, məšan, inämäšrayän əntäned, ašäl wa ilkämän, itwar-asän äššäreḡa ässuuksädän.

10 Təlkam tissant n-äššäreḡa n-Mässinäy hullan däx-äddinät wi wären əlkem ar i-derhan n-iman-näsän wa tän-isamədasän.

İmäsäḡran n-bahu-win-däx, wär-ərhen ad-fälla-sän ixkəm Emäli, əflasän iman-näsän, həlän, wär tän-issärmäx asəkkufär n-a-wa ässimḡar Mässinäy däx-išənnawän

11 s-wälä ənjälosän iman-näsän-i ojärnen imäsäḡran n-bahu-win-däx tärna hakd-däx äššahät, wär helän ad-ənnən a läbasän wärän il' əmmək dat-Emäli.

12 Äddinät-wi-däx, wär-əzleyän d-taḡsiwen wären la tayette, wären əgla ar fäll a-wa hannäynät, irməs-tänät-dd əwadəm, iḡrəs-asnät. Sikuforän i-a-wa s-wär-əssenän härät, erk imojjan-näsän a-s ilkam ad-tän-əjən däx-härät.

13 Əlkamnät timzäl n-iba n-iqqud-näsän. A-wa äskärakädän tamašalän, tarähut a-s t-tajjän, samədasän, samədrayän iman-näsän. İšl'-en a-wen-däx, uhən-däx, tažämmayän däx-imjora-nəwän, däx-utär n-ad-kəwän-səkkərukədän.

14 Wär t-təlla tamədt s-wädden lan-as ənniyät, ənsayän amišəl n-abəkkaḡ, taqqänän tändərbaten i-äddinät wi wären əssen a han, šinməšriyän-tän; ošalän härkuk däx-umäx i-azrəf s-täkkärzəzzäl, a-di, iməlyan dat-Mässinäy.

15 Əzjərän tabarät ta toḡädät, əššəškän iman-näsän. Ässofän alkum i-adəriš n-Balam ägg Baḡor-i ijän a wärän itətwəjj a-wa-däx has-ija utär n-azrəf wärän xälal.

16 İḡtäl-t Mässinäy däx-anməšri wa ija. İgla fəw har has-imməjrad s-tešədt. Tešədt ya, wär təməjrid məšan ašäl-en, s-tärna n-Mässinäy, tässewäl-as šund ägg-adəm i-ad-wär-itəjj ännäbi Balam əbbuddəl wa s-ikittəw iji-net.

17 İmäsäḡran n-bahu-win-däx däx-hawän-əssewäläx, wär t-illa a ənfan. Olähän ḡas d-terəst s-əqqurän aman-net, olähän d-tijäräken äzziwät aḡu, šik-däx a-s jammädnat mänhoy. Təlkam däx-sän tissant səmmät däx-tihay ti n-ələxärät.

18 Äzizädän ilsawän-näsän kud-däx taxxalen ḡas a jannen, šinməšriyän äddinät wi s-iket dd-əzjərän ifassän n-äddinät s-ihənnin-däx bahu a-s əlkamän, tattärän ad-tän-səswədän.

19 Tajjän-asän ärkəwäl n-ad-tän-səddärfen s-bahu, a-s ija a-wen, əntäned iman-näsän äkkilen i-derhanän-näsän wi tän-äzziwätnen s-əlhəllak. Äywa, hak ägg-adəm, äkkilät i-a-wa fälla-s ilän tärna.

Iba n-uyəl s-ḡara

20 Äddinät wi omännen s-Emäli-nänäx d-Ämaylas-nänäx ḡisaÄlmasex, əḡläsän, a-wen, wär t-ih' äššäk. Təssəba n-a-wen-däx äməra, a fäl äbas samədasän iman-näsän s-a-wa fäll-təgla äddunya. Məšan ere wa oyyän iman-net ḡarät-a-wen təkraš fälla-s äddunya ašäl, ad-umas a-s talḡa-net ta təšräyät, təššäm-as ta täzzarät.

²¹ Ere wa ilmädän a-wa ämoosän tabarät ta n-iqqud təzzar oyy'-et i-ad-inməşrəy i-alämär wa šaddijän issəbdäd Mässinäx, äwadəm-en, iššäm-as-in ad-wär-issen fäll-tabarät-ten-däx härwa däx-tizaräten

²² ed ija xas a-wa innä ozz, wa innän:

«Iqqäl edi ebsan-net»,

mex wa innän:

«Ärrid-dd əlxənžär, iqqäl tärbäbbäz-net.»

3

Işmal n-uşəl n-Ÿisa Älmasex

¹ Ayətma-x-i əkneş tärha, təkərde-nin ta s-sänatät hawän-in-əktäbäx a-wa. A-wa hawän-in-əktäbäx däx-snät iket-net, i n-ad-käwän-säxräx, səmmətäräx-käwän i-ad-təkrəşəm tayətte ta ihäkk Mässinäx.

² Wär hin-təttəwäm a-wa hawän-ənnän ännäbitän wi n-iməşšeddəjän d-färədən wi käwän-ikfa Emäli d-Ämaşlas s-hawän-jän inəmmuşal-näwän isälan-näsän.

³ Härät wa äzzarän s-ärheş ad-sär-s tössanäm, ənta da: däx-ajilal n-äddunya-ta-däx, ad-tät-dd-əjjəşän äddinät käwän-janen isədsa, wär tän-işla ar alkum i-tärha n-iman-näsän.

⁴ Ad käwän-dd-asən, ənnən-awän: «Eyyaa, wädden a ija a-wa-däx, jannem-anäx a-s ikf'-iwän Ÿisa ärkäwäl n-a-s imal-dd. Əndek-t ya ämära!» Jannen-awän: «Xur-imärawän-nänäx wi n-ibda, har aşäl-i-däx, älxal wa s-dd-täxläk äddunya, ənta a ha har ämära-däx, wär t-illa a däx-s ifalän edägg-net.»

⁵ Jannen a-wen-däx mäşan, otasän tetäwit n-a-s tärna n-mäjräd n-Mässinäx a-s dd-ixläk išənnawän d-äkall, ibda äkall d-aman, ibnä-dd äkall s-aman-en-däx,

⁶ əmmək-wen-däx a-s hin-omäs Mässinäx a-wa iwärän ärori n-äkall iket-net däx-äzzäman wa n-anji wa n-şuf.

⁷ Aşäl-i daş, s-tärna n-mäjräd-net en-däx a-s ittaf išənnawän d-äkall i-efew wa hasän-iqqalän aşäl wa ilkämän. Aşäl-en-hi, a-s aşäl wa n-äşşärexa wa n-tidət d-tinmənhian inämäşrayän d-iman-näsän.

⁸ Ayətma-x-i əkneş tärha, wär-ärheş ad-təzhaläm fäll-härät iyyän: dat-Emäli, aşäl iyyän, wär-izley d-efäd n-awätay, efäd n-awätay daş data-s, wär-izley d-iyyan n-aşäl.

⁹ Ma äsihälän wi däx-wän jännanen a-s Emäli, irza däx-tənna-net, ähoj'-in fälla-näx? A-wen wädden a ijan. Emäli, azəzzidär fälla-näx xas a ija, wär-irha ad-ihlək wäl' iyyän däx-näx, änn-ak a irha, ad-utabän äddinät iket-däx-näsän.

¹⁰ Aşäl wa n-Emäli, ad-dd-aj ejädäl wa itäjj emäkräd fäll-äwadəm. Aşäl-en, išənnawän d-a-wa tän-ihän, ad-əjən anbäräqqəs ässuüksädän, ihjəlşəl efew fäll-ärori n-äkall iket-net, ilyəm-in s-iyyät, ad-äbas t-illa a t-illan.

Sädəwät i-ass n-Älmasex

¹¹ Şamad härätän-win-däx, ilkam ad-tän-in-iba s-əmmək-wen-däx, adiş, əttəfat tämudre šaddijät täddiinät,

¹² täqqələm i-aşäl wa n-Mässinäx, särmədam-t fäw ed işwar-dd-osa. Aşäl-en, a-wa ihän išənnawän, ad-intəs iket-net, ilyəm-in a-wa iwärän ärori n-äkall.

¹³ Mässinäx, ijjäş-anäx ärkäwäl n-ad-dd-izəzzubbət išənnawän äynaynen d-äkall äynayän-hanäx, ənta-den-däx a-wa iha ättäma-nänäx, näqqal-as ed dihen, wär t-illa a şäl iqqud.

Kuyədät dəx-alkum i-Älmasex

¹⁴ Ayətma-ğ-i ökney tərha, iket-di d-tajjān hārātān-win-dəx, äjät a-wa täddobem iket-net i-ad-kāwān-dd-agəz Ƴisa, šaddiijām, wār t-illa älxiib kāwān-iwarān, imal-t dəx älxer jere-wān d-Mässināx.

¹⁵ Elmədät a-s äşşabarāt wa kāwān-ija Emāli, i n-ad-täxləsām. A-wen, äru d-hawān-t-in-iktāb Buləs-i n-änḡa-nāx nəkna tərha, s-sārho wa t-ikfa Mässināx.

¹⁶ A-wen-dəx dəx a itajj dəx-tikarḡiwen-net iket-nāsnät ti-dəx ässewāl dəx-isālan-win-dəx. Tidət dəx a-s, a-wa ikattāb, han-t idäggan s-wār räqqis ujhre-nāsān. A-wen-dəx a fāl məjrād-en itajj, e-d t-ärmāsān erk äddinät əzhalnen wāren əssen a hān, ad-safraḡān älmāḡna-net ed a-wen-dəx a tajjān i-a-wa ätwānnān dəx-əlkəttabān wi iyyäḡnen. Ənta-den-dəx əmmək wa s-dd-tirəwān əlhəllak fäll-iman-nāsān.

¹⁷ Ayətma-ğ-i ökney tərha, nākk ya ḡas, əkkāsāḡ-kāwān dəx-tayḡdārt: agəzāt iman-nāwān, wār toyjem erk äddinät-win-dəx, äšinämäşrāyān-kāwān dəx-erk älخال wa hān, takkāsān-kāwān dəx-edägg-wa dəx-kāwān-issəntām Mässināx.

¹⁸ Ədwəlät, təhələm s-data dəx-ännuxmət d-muzəyāt n-Äməḡlas-nānāx ƳisaÄlmasex. Ənta a äniihäjjān d-älxurmät aşäl-i-dəx har amäḡlol! Amin!

Tăkarđe ta tăzzarăt iktăb Exya

Ŷisa a-s Măjrăd wa isidurăn

¹ Wa t-illăn a-s wăr t-illa a t-illan ihakkăn tămudre ta tăŷlălăt, nəsł'-as s-timəzzujen-nănăŷ, nənhay-t s-tiŧtawen-nănăŷ, năzjăzz'-e, nəđăs-t s-ifassăn-nănăŷ.

² Tămudre-ten-dăŷ, tănfalăl-anăŷ-dd, nənăŷ-tăt, nămoos tjuhawen-net i-ad-hawăn-năj isălan-net, təlmədăm a-s tămudre ta tăŷlălăt s-kăla t-təlla ŷur-Abba, ăsnăfalăl-anăŷ-tăt-dd.

³ A-wa nənăŷ d-a-wa s-nəsłă, nəsıŷul'-awăn-t i-ad-tahərəm dăr-năŷ kăwăneđ-dăŷ tassaxt ta nohăr d-Abba d-Rure-sŶisaĂlmasex.

⁴ A-wen-dăŷ a săr-năŷ dd-orăwăn derhan n-ad-hawăn-in-nəktəb tăkarđe-ta-dăŷ i-ad-tumas tedăwit-nănăŷ, tedăwit təmdat.

Măssinăŷ ănnur a ămoos.

⁵ Ɛntăneđ da isălan wi s-nəsłă ŷur-Ŷisa Ălmasex hawăn-nəsıŷul: Măssinăŷ, ănnur, wăr t-illa a osax d-tihay.

⁶ Afăl nənna nosax dăr-s uhən-dăŷ năllil tihay, inəsbuha wăren oher hărăt d-tidət a nămoos.

⁷ Măšan, afăl nărjaš dăŷ-ănnur s-əmmək wa s-dăŷ-s izzăŷ ənta iman-net, dihen ad-tətəbət tassaxt ta n-jere-năŷ năkkăneđ-i n-imumənăn, išəšdəj-anăŷ daŷ ašni n-Rure-s, Ŷisa, dăŷ-e d t-illăm abăkkađ.

⁸ Afăl nənna wăr hanăŷ-werăn ibăkkađăn, iman-nănăŷ ŷas a nəsaswad, wăr nənna tidət.

⁹ Măssinăŷ, iŷdal, oŷad: afăl săr-s dd-năsfăkkăr ibăkkađăn-nănăŷ, ad-hanăŷ-tăn-in-ănš, išəšdəj-anăŷ dăŷ-e d t-illăm iba n-iqqud.

¹⁰ Afăl nənna wăr kăla-nămešăl abăkkađ, ad-năj Măssinăŷ ănăsbahu ed wăla a-wa innă dăŷ-măjrăd-net, năsibăggăt-t.

2

Ŷisa Ălmasex a-s ănabdid-nănăŷ

¹ Ilyadăn-in, isălan-wi-dăŷ, kattăbăŷ-awăn-tăn-in i-ad-wăr həkəkəm iman-năwăn abăkkađ. Kunta daŷ ođa iyyăn dăŷ-wăn dăŷ-abăkkađ, nəla ănabdid ŷur-Abba, a t-ămoosăn ŶisaĂlmasex-i oŷadăn wăr-iwer abăkkađ.

² Ɛnta a ikfăn iman-net i-ad-hanăŷ-umas takute ta hanăŷ-jarrăwăt tenăšše n-ibăkkađăn-nănăŷ; a-wen wădden năkkăneđ ŷas a-s t-ija, ij'-e i-kăl-ăddunya təmda.

Amišəl n-a-wa innă Măssinăŷ

³ Ašămol n-təməzzuyt-nănăŷ i-Măssinăŷ, a t-ămoosăn amišəl-nănăŷ i-fărəđăn-net.

⁴ Ere innăn izzay Măssinăŷ uhən-dăŷ wăr iŧtef alămărăn-net, anăsbahu wărăn oher hărăt d-tidət a ămoos,

⁵ măšan, ăwadəm wa itamašalăn tənna n-Măssinăŷ, təmdă-dd tărha n-Măssinăŷ s-ulh-net, ənta-den-dăŷ a-wa isalmadăn a-s nosax d-Măssinăŷ.

⁶ Ere innăn osax d-Măssinăŷ hărăt, adiš, iŧtefet amišəl n-erhet n-Măssinăŷ s-əmmək wa s-t-ămešăl Ŷisa.

7 Imärhan-in, wädden isälan n-alämär äynayän a fäl hawän-in-kattäbäx, änn-ak, alämär s-äru-däx, xur-eyäf n-härät iket-net, ill'-e; alämär-en, a t-ämoosän, mäjräd n-Mässinäx wa s-äru d-has-tösläm.

8 Hakd a-wen-däx, a-wen, wär hin-ikkes a-s alämär wa hawän-in-kattäbäx, alämär äynayän a ämoos. Alämär, s-tidöt-net, äsnäfaläl-tät-dd Yisa, täsnäfaläläm-tät-dd däx käwäneḍ fäl-a-s tihay, tilömnät-in, ad-dd-itimlowlöw ännur wa n-tidöt däx-edägg-näsnät.

9 Ere innän önta izzaḡ däx-ännur wa n-Mässinäx, a-s ija a-wen, okäḍ d-äñña-s däx-äddin, äwadöm-en, iha tihay härwa.

10 Ere wa irhän äñña-s däx-äddin, ih' ännur, wär t-dd-e-ifäl a-s äšnämäšräy äñña-s, isiḍöw-t däx-abäkkäḍ

11 mäšan, ere okäḍän d-äñña-s däx-äddin, iha tihay, irjaš däx-tihay, wär-issen e-s ikka ed, ärmasnät-t tihay.

12 Ilyadän-in, isälan-wi-däx, kattäbäx-awän-tän-in ed ibäkkäḍän-näwän, inš'-awän-tän-in Mässinäx däx-idöm n-isöm n-Yisa.

13 Käwäneḍ-i n-abbatän däx-äddin, kattäbäx-awän-in ed təzzayäm Wa t-illän härwa wär t-illa a t-illan, kattäbäx-awän käwäneḍ-i n-imawaḍän ed, təkrašäm ašäl fall-Iblis-i n-Anämsod.

14 Kattäbäx-awän-in käwäneḍ-i n-aratän-in däx-äddin ed, təzzayäm Abba.

Ɛktabäx-awän käwäneḍ-i n-abbatän ed təzzayäm Wa t-illän härwa wär t-illa a t-illan, öktabäx-awän-in käwäneḍ-i n-imawaḍän ed, iməşsuha öṭṭafnen s-särho mäjräd n-Mässinäx däx-ulhawän-näsän a tämoosäm, təkrašäm ašäl fäll-Iblis-i n-Anämsod.

Tuksəḍa n-Mässinäx, wär tidaw d-tärha n-wälät-äddunya

15 Wär tärhem äddunya wäla a-wa la äddunya. Ere irhan äddunya, wär ha tärha n-Abba ulh-net

16 fäl-a-s, a-wa la äddunya iket-net, jer-öttökəbru wa n-derhanän wi läbasnen n-tayəssa wäla öttökəbru wa n-derhanän wi n-tittawen d-aḍkul n-iman däx-öttökəbru wa dd-tirəw terše n-wälät äddunya, wädden Abba a dd-ifal, äddunya a dd-ifal.

17 Tidöt önta da: äddunya, ilkam iba-net önta d-izəjraz-net mäšan, äwadöm wa itamašalän erhet n-Mässinäx, iylal.

Imiksänän n-Älmasex

18 Ilyadän-in, ajilal n-äddunya a nəha. Wädden tösalam a-s ilkam Äddäžžal† wa n-ämiksän n-Älmasex? Ärheey ad-käwän-səlməḍäx härwa ämära-däx, a-s osän-dd äddäžžalän n-imiksänän n-Älmasex äjjootnen. Ɛnta-den-däx ašämöl wa hanäx-isalmadän a-s ajilal n-äddunya a nəha.

19 Äddäžžalän n-imiksänän n-Älmasex-en, a-s t-əllan jere-näx wär t-illa a-s hanäx-han ed, önnär ämoosän härät däx-näx, wär hanäx-həkkön iroriyawän-näsän. Ašäl-i, fälän-anäx i-ad-dd-infilöl a-s iket-näsän, wär-ämoosän härät däx-näx.

20 Käwäneḍ iket-näwän, tössanäm a-wa ämoosän tidöt ed ikf'-iwän Wa n-Eməššeddöj, Unfas Šäddijän.

† 2:18 2:18 Ämakšar, ašanjo d-eməkkənəs n-Älmasex.

²¹ Ƴas, akātab wa hawān-in-jeḡ, wār hawān-t-in-jeḡ dāḡ-təssəba n-a-s innin wār təssenām tidət, təssanām-tāt, təssanām daḡ a-s wār t-illa əmmək s-dd-izjār bahu tidət.

²² Ak äddäžžal-wa-dāḡ n-ämiksän n-Älmasex-i-dāḡ fāw, mi t-ämoosän? Adiš ämoos-t ere wa innän a-s Ƴisa wadden ənta a-s Älmasex, ənta-den-dāḡ äddäžžal n-Älmasex wa wārän irḡa s-Abba wāla Rure-s.

²³ Ere wa wārän irḡa a-s Ƴisa, Rure-s n-Mässināḡ, wār-irḡa daḡ s-Abba; ere wa iqbälän Rure-s n-Mässināḡ, iqbal daḡ Abba.

²⁴ Kāwāneḡ, a-wa s-təslām ašäl äzzarän d-tomänäm s-ƳisaÄlmasex dāḡ-uhawān-nāwän, əṭṭəfāt-t. Afäl təṭṭäfäm dāḡ-uhawān-nāwän a-wa s-təslām ašäl äzzarän d-tomänäm s-Ƴisa, ad-tətbət tassayt-nāwän d-Rure-s n-Mässināḡ hakd Abba.

²⁵ Ənta da ärkāwāl wa hanāḡ-ijjāš Älmasex, inn'-anāḡ: «Näkk, hakkāḡ-kāwän tāmudre ta täxlälät.»

²⁶ Ƴas, akātab wa hawān-in-jeḡ, i n-ad-kāwän-səmmətäräḡ d-ad-təjəm ənniyät i-äddinät-wi tattärnen ašəšk-nāwän,

²⁷ səktəwäḡ-kāwän-dd daḡ a-s, Älmasex, issänḡäl Unfas-net fälla-wän. Ƴas, šāmad iha Unfas-net ulhawān-nāwän, adiš wār tämyātäräm s-ad-kāwän-isäḡär äwadəm wäl' iyyän, änn-ak Unfas-en-dāḡ a kāwän-madän-isäḡär härät iket-net. A-wa isayra daḡ ənta, ädduuttät a-s wār t-ihā bahu, ḡas, mašälät a-wa kāwän-issäḡra Unfas dāḡ-isälan n-tartit-nāwän d-Älmasex.

²⁸ Ämära-hi ilyadän-in, ḡaymät tosaḡäm d-Älmasex i-ad nudabät tebädde data-s ašäl wa dd-mad-infiləl ed ad-hanāḡ-ijrəw nəṭṭaf immun, dihen, wār mad-nəmmujrəz, wār mad-nəkrukäḡ.

²⁹ Šāmad təssanām a-s Älmasex oḡad, adiš, əlmədät daḡ a-s ere itamašälän a oḡadän iket-net, ara n-Mässināḡ a ämoos.

3

A-wa dār-oläh älxal n-äddinät əzzäynen Mässināḡ

¹ Ənhəywät ḡas təmyäre n-tärha ta hanāḡ-ija Abba, tärha ta t-täwwäyät har hanāḡ-ija isəm: «Aratän-nin,» ənta-den-dāḡ daḡ a-wa nämoos. A-wen-dāḡ a fäl wār hanāḡ-fəhhəmän käl-äddunya ed wār-əzzeyän Mässināḡ.

² Imärhan-in, tidət-dāḡ a-s aratän n-Mässināḡ a nämoos ämära-dāḡ, māšan, a-wa s-ilkam ad-t-numas, wār dd-änfaläl härwa; nəssan ḡas a-s ašäl wa dd-mad-iqqəl Ƴisa, ad-där-s naläh ed ad-t-nənhəy ənta iman-net s-älxal wa iha ämära-dāḡ.

³ Ere ijärän äṭṭama n-a-wen-dāḡ-dāḡ, adiš, išəsdəjet iman-net s-əmmək wa s-Ƴisa iman-net, šäddij.

Iba n-ihuk n-iman-net i-abäkkäḡ, färəḡ

⁴ Ere itamašälän abäkkäḡ, ilmədət a-s änimäšräy i-alämär n-Mässināḡ ed abäkkäḡ, tanməšrayt i-alämär n-Mässināḡ.

⁵ Təssanām daḡ a-s ƳisaÄlmasex, osä-dd i-ad-ikkəs ibäkkäḡän fäll-äddinät, ənta, wār t-illa abäkkäḡ t-iwarän.

⁶ A-wen-dāḡ a fäl ere osəḡän d-Ƴisa härät-dāḡ, adiš, ibdəwet d-abäkkäḡ fäl-a-s ere wārän izzey Ƴisa, wār t-illa a ijrah dāḡ-isälan-net, a ihakkän iman-net abäkkäḡ.

⁷ Ilyadän-in, wār kāwän-išinməšrəyet äwadəm wäl' iyyän. Ere itamašälän iqqud, oḡad ed Älmasex-i s-ilkäm, oḡad,

⁸ māšan, äwadəm ikfan iman-net abäkkəḍ, Iblis a t-ilän, Iblis daḡ, ənta a äzzarän s-abäkkəḍ. Rure-s n-Mässinäḡ, ʔisa, osä-dd i-ad-išäḡsəd fäll-Iblis a-wa itamašal.

⁹ Äwadəm, e-d ämoos ara n-Mässinäḡ, ad-äbas olwa daḡ-abäkkəḍ ed ikf'-e Mässinäḡ tärna-net, ad-äbas ikfa iman-net abäkkəḍ ed ara n-Mässinäḡ a ämoos.

¹⁰ Ənta-den-daḡ a-wa ibḍän aratan wi n-Mässinäḡ d-wi n-Iblis. Ere wärän itəjj a oḡadän meḡ ere wärän irha äŋŋa-s daḡ-äddin iket-net, a-di, wär-ämoos ara n-Mässinäḡ.

¹¹ Isälan wi fälla-näḡ dd-äzzubbätnen härwa s-tizarät, ätwänn'-anäḡ daḡ-sän: «Nəmārhet jer-iman-näwän.»

¹² Wär nətilähet d-Kayin-i daḡ-innäḡ Iblis har ij'-iman n-äŋŋa-s. Mafäl ij'-iman-net? Ij'-iman-net fäl-a-s ənta Kayin, imojjan-net iläbasnen, a-s ija a-wen wi n-äŋŋa-s, i oḡadnen.

Tärha ta tänihäjjät jer-äŋŋatän

¹³ Ayətma-ḡ, mikḍaw wa dār-wän jän käl-äddunya, wär-itäqqänet iḡäfawän-näwän.

¹⁴ Näkkäneḍ, nəssan a-s nənkär-dd daḡ-tamättant, nəjjäš tämudre. Tämudre-en, ašämol-net, tärha-ta nəja i-ayətma-näḡ daḡ-äddin. Ere wärän irha ayətma-s daḡ-äddin, enəmmettən härwa a ämoos.

¹⁵ Ere okäḍän d-äŋŋa-s daḡ-äddin iket-net, emäjj n-iman a ämoos, təssanäm a-s wär t-illa emäjj n-iman ijrawän tämudre ta täḡlälät.

¹⁶ ʔisaÄlmasex, ikfä tämudre-net daḡ-təssəba-nänäḡ. A-wen daḡ a fäl, näkkäneḍ-daḡ, iwar-anäḡ ad-näkf tämudre-nänäḡ i-ayətma-näḡ daḡ-äddin.

¹⁷ Afäl inhäy ähaləs n-amärrəzäḡ äŋŋa-s daḡ-äddin ämiḡatärän, wär has-oḍen tähanint, əndek əmmək wa s-mad-änn ha tärha n-Mässinäḡ ulh-net.

¹⁸ Ilyadän-in, wär bäddädet tärha-nänäḡ ḡur-mäjräd d-täzude n-iləs ḡas, tumaset tärha-nänäḡ, tärha n-tidət ässiitbätän imojjan-nänäḡ.

¹⁹ Əmmək-wen-daḡ a-s mad-nəlməd a-s təl'-anäḡ tidət, əmmək-wen-daḡ daḡ a-s mad-ismaḍän ulhawän-nänäḡ dat-Mässinäḡ

²⁰ fäl-a-s, kunta sawärän-anäḡ ulhawän-nänäḡ uḍlem, Mässinäḡ ojar ulhawän-nänäḡ, wär t-illa daḡ a has-idrajän.

²¹ Imärhan-in, kunta wär hanäḡ-äswärän ulhawän-nänäḡ uḍlem, adiš, wär t-illa a hanäḡ-madän-isärmäḡ dat-Mässinäḡ,

²² dihen ad-daḡ-s nəttär-daḡ, ad-hanäḡ-t-äkf ed nətṭaf alämärän-net, nətamašal a-wa irha.

²³ Mässinäḡ, ənta da a-wa fälla-näḡ ifräd: namənet s-Rure-s ʔisaÄlmasex, nənmārhet jer-iman-nänäḡ s-əmmək wa s-fälla-näḡ-t ifräd Älmasex.

²⁴ Ere wa itamašalän alämärän n-Mässinäḡ, osay d-Mässinäḡ, osay dār-s daḡ Mässinäḡ; Unfas Šäddijän wa hanäḡ-ikfa a hanäḡ-isalmadän a-s nosay d-Mässinäḡ.

4

Bahu, wär-itäqqəl tidət

¹ Imärhan-in, he käwäneḍ! Wädden ere dd-iggädän inn'-awän Mässinäḡ ad-t-dd-äšimašälän, təfləsäm-t. Arəmət-tän iket-daḡ-näsän təzzar, təssənäm tayətte-näsän Mässinäḡ a dd-təfal meḡ a dd-əkkašän ḡas

däx-iḡāfawān-nāsān. A-wen, janney-awān-t i-ad-təlmədām a-s äddunya-ta-däḡ, əbsayān däḡ-s ännābitān n-bahu äjjootnen.

² Ēnta da tamātart ta kāwān-madāt-səlməd a-s äddināt-en, Unfas Šāddijān n-Mässināḡ a tən-ihan meḡ: e d t-illām āwadəm äjjəyhān a-s ḲisaĀlmaseḡ osā-dd äddunya däḡ-taḡəssa n-ägg-adəm, Unfas n-Mässināḡ a t-ihan,

³ māšan, āwadəm iket-net äkkuddälān ass n-Ḳisa Ālmaseḡ i-äddunya iqqal ägg-adəm, wār t-ihā Unfas n-Mässināḡ, Unfas wa n-äddāžžal a t-ihan. Äddāžžal n-Ālmaseḡ-en, təslām a-s imal-dd, ässiilmädäḡ-kāwān āmāra a-s ijjāš-dd äddunya.

⁴ Kāwāneḡ-i n-ilyaḡān-in, Mässināḡ a kāwān-ilān, təkrašām daḡ tārna fäll-ännābitān wi n-bahu fäl-a-s Unfas wa kāwān-ihān irna Unfas wa ihān käl-äddunya.

⁵ Ännābitān-en n-bahu, mājrad wa n-äddunya a tājjan, täsijād-asān daḡ äddunya ed, terše a tən-təja

⁶ māšan, näkkāneḡ Mässināḡ a hanāḡ-ilān. Ere wa äksudān Mässināḡ, ad-hanāḡ-isəjəd, ere wa wārān äksuḡ Mässināḡ, wār hanāḡ-mad-isəjəd. A-wen-däḡ a hanāḡ-isalmaidān Unfas wa ilkamān i-tidət d-Unfas wa išənməšrəyān äddināt.

Mässināḡ, emārh

⁷ Imārhan-in, nənmārhet jer-iman-nānāḡ ed tārha Mässināḡ a dd-təfāl, ere wa s-təha tārha ulh-net, ara n-Mässināḡ t-izzayān a āmoos,

⁸ ere wa s-wār ha tārha ulh-net, wār izzey Mässināḡ ed Mässināḡ emārh.

⁹ Ēnta da əmmək wa s-hanāḡ-dd-äsnāfalāl Mässināḡ tārha ta hanāḡ-ija: äšmašāl-dd Rure-s wa n-iyyān s-äddunya i-ad-hanāḡ-umas əssəbab n-tämudre.

¹⁰ Ēnta da a-wa äsidätten tārha ta hanāḡ-ija Mässināḡ: wädden näkkāneḡ a t-ärhānen s-tizarāt, ənta a hanāḡ-irhān s-tizarāt ed äšmašāl-dd sār-nāḡ Rure-s i-ad-umas takute hanāḡ-madāt-təjrəw tenāšše n-ibäkkāḡān-nānāḡ.

¹¹ Imārhan-in, šāmad Mässināḡ, ij'-anāḡ tārha togdāhāt d-a-wen-däḡ, adiš, näkkāneḡ-däḡ, iwar-anāḡ ad-nənmārḡ jer-iman-nānāḡ.

¹² Wār t-illa ere s-kāla inhāy Mässināḡ māšan, afäl nānmārha jer-iman-nānāḡ, ad-dd-iddək ulhawān-nānāḡ, isənnəfiləl daḡ tārha-net däḡ-nāḡ s-əmmək itbatān.

¹³ Unfas Šāddijān wa hanāḡ-ikfa Mässināḡ, ənta a hanāḡ-isalmaidān a-s nosaḡ d-Mässināḡ, osəḡ daḡ dār-nāḡ.

¹⁴ Mässināḡ, äšmašāl-dd Rure-s i-ad-umas Āmaḡlas n-äddunya. Āmoos a-wen a nənhay s-tiṡṡawen-nānāḡ, nətilḡut daḡ sār-s.

¹⁵ Ere äjjəyhān a-s Ḳisa Rure-s n-Mässināḡ, osəḡ d-Mässināḡ, osəḡ dār-s daḡ Mässināḡ.

¹⁶ Näkkāneḡ, nəflas tārha ta hanāḡ-ija Mässināḡ ed, Mässināḡ emārh. Ere āmoosān emārḡ iket-net, osəḡ d-Mässināḡ, osəḡ dār-s daḡ Mässināḡ.

¹⁷ Afäl tətbat tārha-nānāḡ i-Mässināḡ däḡ-ulhawān-nānāḡ, wār-mad-nārmāḡ ašāl wa ilkāmān fäl-a-s, ad-nāj däḡ-äddunya-ta-däḡ tämudre tolāhāt d-ta däḡ-s ija Ḳisa.

¹⁸ Tārha d-tuksəḡa, wār tidawnāt ed, tārha, wār təyy edägg i-tuksəḡa. Ḳas, ere s-wār ha ar tuksəḡa ulh-net, a-di tārha a wārāt ha ulh-net ed, tuksəḡa wār təjj ar däḡ-təssəba n-tisnant təlkamāt.

¹⁹ Näkkāneḡ, ha tārha ulhawān-nānāḡ ed, Mässināḡ a hanāḡ-irhān s-tizarāt.

²⁰ Ere innän: ärheḡ Mässināḡ, a-s ija a-wen äššunjät äñḡa-s dāḡ-äddin, a-di anäsbahu a ämoos fäl-a-s käyy, kunta äñḡa-k wa t-illän dat-tiṭṭawen-nāk, hannäyäd-t, wär t-tärhed, ma isalmadän s-tärha-nāk i-Mässināḡ-i wär hennöyäd?

²¹ Alämär wa hanāḡ-dd-oyyā ḢisaÄlmasex, änta da: «Ere innän irha Mässināḡ, adiš ärhet daḡ äñḡa-s dāḡ-äddin.»

5

Isälan n-immun wa wär-iḡa äššäk

¹ Ere omänän a-s Ḣisa a-s Älmasex, ara n-Mässināḡ a ämoos, ere irhän amāraw adiš ad-ärh daḡ aratan-net.

² Änta da a-wa hanāḡ-isalmadän a-s närha aratan n-Mässināḡ: tärha ta n-Mässināḡ d-amisäl n-alämärän-net.

³ Ere innän irha Mässināḡ, adiš, ämašlet daḡ alämärän-net; alämärän-net daḡ, wär sär-nāḡ jen ezäwe-wen-dāḡ.

⁴ E d t-illäm ara n-Mässināḡ, ässiynäy, äddoobät ad-ikröš ašäl fäll-äddunya. Immun-nänāḡ a hanāḡ-ikfän tärna-ten-dāḡ fäll-äddunya.

⁵ Äddunya-ta-dāḡ, mi fälla-s madän-ikröš ašäl kunta wädden ere wa omänän s-Ḣisa wa n-Rure-s n-Mässināḡ?

⁶ Ḣisa, änta a dd-äšmašäl Mässināḡ s-äddunya i-ad-itwəsəlmāḡ dāḡ-aman, inḡäl ašni-net, ämoos takute. Wär dd-ijješ äddunya i-ad-itwəsəlmāḡ ḡas, ijjäš-tät-dd i-ad-itwəsəlmāḡ dāḡ-aman, inḡäl ašni-net i-ad-umas takute. A-wen, tajuhe hanāḡ-ija Unfas Šäddijän-i wärän ijönn a säl tidöt.

⁷ Ämära, käradät tjuhawen a ässitbätnen a-wa ämoos Ḣisa:

⁸ Unfas n-Mässināḡ, aman-wi-dāḡ ätwäsəlmāḡ d-ašni-net wa inḡälän a-s ämmut. Tjuhawen-tin-dāḡ, tikkäräden, iyyän n-emm a oharnät dāḡ-a-wa ämoos Ḣisa.

⁹ Änta-den-dāḡ tajuhe ta ija Mässināḡ fäll-Rure-s. Tajuhe ta n-Mässināḡ, tojär ta n-dägg-adəm-i s-hanāḡ-räqqis ad-tän-nəfləs.

¹⁰ Ere omänän s-Rure-s n-Mässināḡ dāḡ, ad-isətbət tajuhe-ten-dāḡ mäšan ere wa wärän omen s-tajuhe n-Mässināḡ, ija Mässināḡ anäsbahu ed, wär-omen s-tajuhe-ta ija Mässināḡ fäll-Rure-s Ḣisa.

¹¹ Tajuhe-en, ätwänn'-anāḡ dāḡ-s a-s: Mässināḡ, ikf'-anāḡ tämudre ta täḡlälät. Tämdre-en, ikf'-anāḡ-tät dāḡ-idəm n-Rure-s,

¹² ere omänän s-Rure-s n-Mässināḡ, ijraw tämdre-ten-dāḡ, ere wärän sär-s omen wär tät-mad-ijrəw.

Ättäma wa hanāḡ-äsjar Ḣisa Älmasex

¹³ Isälan-wi-dāḡ hawän-in-əktäbāḡ dāḡ-täkarde-ta-dāḡ, əktäbāḡ-awän-tän-in i-ad-käwän-səlmədāḡ käwäned-i omännen s-Rure-s n-Mässināḡ Ḣisa a-s təjrawäm tämdre ta täḡlälät.

¹⁴ Fella-nänāḡ ḡur-Mässināḡ, änta da: Nössan a-s Mässināḡ, äsijäd-anāḡ, afäl a-wa dāḡ-s nətattär, wär-änmäšräy i-erhet-net.

¹⁵ Šämad nəflas a-s äsijäd-anāḡ, e-d t-nədäl-dāḡ, adiš, nəflas a-s a dāḡ-s nəttär-dāḡ, ad-hanāḡ-t-äj.

¹⁶ Ere dāḡ-wän inhäyän äñḡa-s dāḡ-äddin har ämešäl abäkkad wärän išəkš temse, ittäret-as dāḡ-Mässināḡ i-ad-has-änš, ad-has-änš. A-wen, önneḡ-tän fäll-ibäkkadän wi wären šəkš temse fäl-a-s, ill'-e abäkkad išaksen temse; wen, wär hawän-jönneḡ ad-tədöləm Mässināḡ dāḡ-təssəba-net.

¹⁷ Iba n-iqqud, abäkkad mäšan, əllan-t ibäkkadän wären šəkš temse.

¹⁸ Nəssan a-s ara n-Məssinəx, wär ihəkk iman-net abäkkəđ ed, oğaz-t Rure-s n-Məssinəx i-ad-fälla-s wär-ikreš Iblis-i n-Anəmsod ašäl.

¹⁹ Näkkəneđ, nəssan a-s Məssinəx a hanəx-ilän, nəssan dağ a-s äddunya-ta-dəx ikeť-ťet, ännihəđ dəx-s Iblis.

²⁰ Nəssan a-s Rure-s n-Məssinəx, osä-dd äddunya, ikf'-anəx tayətte-ta hanəx-madät-suksəđ Məssinəx wa s-ənta xas d-Rure-s ƳisaĀlmasex a-s əssəbab n-tassaxť ta dər-s nəja. Ənta a-s Məssinəx, ənta a ihakkän tāmudre ta təxlälät.

²¹ Ilyadən-in, agəzät iman-nəwän dəx-əlyibadät n-əššanəmən a ämoosän-dəx. Amin!

Täkarde ta s-sänatät iktäb Exya

Äšajəš

¹ A-wa näkk wa n-änušäm hin-iktabän i-Kərya ta äsnäfrän Mässinäx ənta d-aratän-net wi s-tärha ta n-tidət a hasän-jeḡ, wädden daḡ näkk ḡas a hasän-ijan tärha-ten-däḡ, irh'-en daḡ e d t-illäm ere issanän fäll-tidət ta dd-fälät Mässinäx.

² Tärha a-wen jat fäll-tidət ta häť ulhawän-nänäḡ, wär-ilkem daḡ ad-tän-təzjar.

³ Ähuuläḡ-käwän-in, əttaräḡ däḡ-Abba Mässinäx d-Rure-s, ḡisaÄlmasex, a käwän-ikfän ännuḡmät, tähanint d-älxer i-ad-näqqayəm nəṭṭaf tidət-net d-tärha-net.

Tämudre täsidäwät tidət d-tärha

⁴ Äsidäwät-ahi hullan ahänay wa jeḡ n-a-s häřät däḡ-aratän-näm, əlkamän i-tidət s-əmmək wa s-hanäḡ-äsmätär Abba d-a-wen.

⁵ Ämära temärhit-in Kərya, ənta da a-wa däḡ-m ärheḡ: wär ham-in-kəttəbäḡ alämär äynayän, alämär wa ham-in-kattäbäḡ, äru d-fälla-näḡ t-dd-äzzäbbät Mässinäx, inn'-anäḡ: «Nəmərhät jer-iman-näwän.»

⁶ Tärha, amišel n-a-wa innä Mässinäx, alämär daḡ wen-däḡ, äru d-has-təsläm, äddälil-net daḡ, i n-ad-tənmärhəm jer-iman-näwän.

Iməkkerrəsän wi hänen äddunya

⁷ Äddunya-ta-däḡ, əjjäšän-tät-dd iməkkorras äjjootnen wären əqbel a-s ḡisaÄlmasex, ijjäš-dd äddunya daḡ-taḡəssa n-ägg-adəm. Ere s-təsled ijanna a-wen-däḡ, təlmədäd a-s eməkkerrəs d-äddäžžal n-Älmasex a ämoos.

⁸ He käwäned! Wär-itäbäytalet älxidmät wa nəja jere-wän, änn-ak, əhəlät s-data däḡ-a-wa s-tomänäm i-ad-təjrəwäm marušät-net.

⁹ Ere änmäšräyän i-tənna n-Älmasex, unjäy iṭṭaf teḡäre-net, əlmədät a-s änimäšräy i-Mässinäx mäšan, ere wa itämašalän tənna-net, iṭṭaf teḡäre-net, osay d-Abba, osay daḡ d-Rure-s.

¹⁰ Ere käwän-in-osän s-wädden teḡäre-ten-däḡ n-ḡisa a iwway, wär has-torem ehän-näwän bäršey ad-där-s tahərəm isofan i-ad-täqqəsäm i-a-wa ijanna.

¹¹ Ere has-orän ehän-net, ad-där-s itinməjj isofan, ad-där-s ahär ibäkkadän-net.

¹² Ill'-e a äjjeen s-ärheḡ ad-hawän-t-in-əktəbäḡ mäšan, wär-äddobey ad-hawän-t-in-səssiwəḡäḡ s-älkaḡ d-täddäwät. Jaräḡ äṭṭäma n-ad-käwän-in-asäḡ, ämmäjrädäḡ-awän näkk iman-in, umas-anäḡ a-wen-däḡ iket-net əssəḡab n-tedäwit təmdat.

¹³ Ähuulän-käm-in möddana-s n-wälätma-m däḡ-äddin ta n-diha-däḡ äsnäfrän Mässinäx. Amin!

Täkarde ta s-käradät iktäb Exya

Äsajəš

¹ A-wa näkk wa n-änušäm hin-iktabän i-Gayəs wa s-tärha ta n-tidət a has-jey.

² Emärh-in, ətтарəy dəy-Mässinəy ad-dəy-k wär-ija härät, aläh ässexät-näk d-äššahät wa s-itəhhal immun-näk s-data.

³ Äsdawät-ahi hullan ass wa hi-dd-jän ayətma-y dəy-äddin käy-dd-falnen, omälän-ahi iket-dəy-näsän iqqud wa jed dəy-tidət d-alkum wa jed i-tidət.

⁴ Äywa, näkk, wär t-illa a sär-i irnan tedawit n-ad-salləy a-s aratan-in dəy-äddin, əjlayän s-iqqud dəy-alkum i-tidət.

Tihusay n-tämudre n-Gayəs

⁵ Emärh-in, ijraz-ahi hullan a-wa ähusken täjjäd i-imumənän iket-dəy-näsän har tawədäd wi n-iməjarän käy-in-tammärnen,

⁶ äjjəyhän iket-näsän dat-älkänisät-ta-dəy-nänəy a-s äwadəm irhan äddinät a tämoosäd. Ärheey dəy-k ad-hasän-tilaläd härkuk i-ad-udaben asikəl ässimyarän isəm n-Mässinəy

⁷ fäl-a-s, asikəl wa hän, isəm wa n-Älmasey a dəy-t-han, unjäyän faw s-ad-ärməsän tadhəlt dd-falät inəzzulam.†

⁸ Iwar-anəy näkkäned-i n-imumənän ad-nədhəl meddön šund-win-dəy i-ad-där-sän nohar älxidmət näkkäned-dəy i-ad-tənfəš tidət n-Mässinəy fäll-ärori n-äkall.

Iba n-sərho n-Dəyutrif

⁹ Käla hin-əktäbəy täkarde jəzzuulät i-älkänisät-nəwän mäšan, igdäl Dutrif-i irhän täzert dəy-härät iket-net asjed i-a-wa jänney,

¹⁰ ässiilmädəy-käy a-s afäl hin-osey, ad-älläyey i-äddinät iket-dəy-näsän tälläbäst ta itamašal d-tizmit ta hanəy-itäj d-bahutän-wi hanəy-isawär. Təzzar dəy, wär təmdä tälläbäst-net dihen yas, äsewäd fäll-a-wen iba n-asəbbärrək n-imumənän-wi hin-tammärnen dihen, igdal dəy i-imumənän-wi äboknen i-a-wen ad-tän-səbbärrəkän, dəy-a-s dəy-sän isaməhad, ijann'-asän: «Ere tän-äsəbbärrəkän, ad-t-əkkəsəy dəy-älkänisät.»

¹¹ Emärh-in, täläw a-wa oləyän wädden a-wa läbasän. Ere itamašalän a oləyän iket-net, u-Mässinəy a ämoos mäšan, ere itamašalän a läbasän, wär-issen s-Mässinəy.

Sərho wa iwärän Dimitrus

¹² Dəy-isälän n-Dimitrus, äjjəyhän äddinät iket-näsän fäll-milyaw-net, ilkam i-tidət, äsidättätnät timaşalen-net iqqud-net i-tidət ta n-Mässinəy. Näkkäned dəy, näjjəyha a-s oxad, təssanäd dəy käyy a-s tajuhe-nänəy, tidət.

Ajilal n-məjrad

† **1:7 1:7** — Yur-käl-Älyähud, ere wärän ämoos ägg-Älyähud s-aləšäl mey ere wärän ilkem i-äddin-näsän, iket-net, änəzzalim a ämoos. A-wen-dəy a fäl tiwsaten ti iyyädnen iket-näsän, ti n-inəzzulam. — Ašäl-i-dəy, änəzzalim, äkafär (ere wärän issen s-Mässinəy).

¹³ Ärheey ad-hak-ännäy härätän äjjootnen mäšan, wär-ärheey ad-hak-tän-äjäy s-täddäwat d-aḡānib

¹⁴ fäl-a-s, jaräy äṭṭāma n-ad-käy-in-asäy šik, ədwənnəy dār-k näkk iman-in.

¹⁵ Täqqimä-dd dəḡ-älxer. Ähuulän-käy-in imidiwän-näk, təhuuläd-in dəḡ imidiwän-nänäy s-iyyän iyyän.

Täkarde ta iktäb Hudd

Äšajəš

¹ A-wa näkk, Hudd, wa n-akli n-ŸisaÄlmasex n-änŸa-s n-Yäqub hin-iktabän i-äddinät wi dd-iŸrä MässinäŸ-i n-Abba s-iman-net, irh'-en, ogaŸ-tän däŸ-təssəba n-Ÿisa Älmasex.

² Äsnädfäs fälla-wän MässinäŸ tähanint d-tenäšše d-älxer d-tärha-net.

Inəsbuha

³ Imärhan-in, äsdärhänäŸ hullan ad-hawän-in-əktəbäŸ däŸ-isälan n-immun wa nohär, a-wen-däŸ a fäl hi-iqqäl äššil ad-hawän-in-əktəbäŸ täkarde-ta-däŸ i-ad-käwän-səmmətäräŸ i-ad-tənmänŸəm däŸ-təssəba n-immun wa dd-äzzäbbät MässinäŸ s-iyŸät fäll-iməššeddeŸän.

(2 BəŸrus 2:1-17)

⁴ EktäbäŸ-awän-in fäl-a-s, əjjäšän-käwän-dd meddən n-ilämamasän n-inälläbäsän fäll-wär təssenäm s-äru d-ässewälän əlkəttabän däŸ-äššäreŸa wa däŸ-sän ilkamän, safrayän älmäŸna n-ännuŸmät n-MässinäŸ i-ad-hasän-ijrəw a-wen äsaru fäl äsmäđäsän iman-näsän, əmmək-wen-däŸ a-s äkkuddälän ŸisaÄlmasex-i n-Emäli n-Ämakraš-nänäŸ.

⁵ Kud-däŸ əssanäŸ a-s a-wa-däŸ hawän-ässewäläŸ, təknam-t musnät, ärheəŸ ad-käwän-dd-səktoŸ əmmək wa s-dd-iŸläs Emäli tamətte ta n-käl-Išrayil däŸ-äkall wa n-Mišra, wi unjäynen omänän sār-s, đarät-a-wen, inŸ'-en kərəf.

⁶ Ektəwät-dd daŸ änjälosän wi dd-əzjärnen idäggan-näsän, ad-tattärän tärna tojərät ta əjräwän, ogaŸ-tän MässinäŸ däŸ-tihay ti n-ider ässuksäđnen, han tišəm äŸlalnen, äqqalän i-ašäl wa ilkamän mäqqärän.

⁷ Ektəwät-dd daŸ aŸrəm wa n-Sodoma d-wa n-Gomora d-iŸärman wi n-edes-hasän, əkfän imuzäŸän-näsän iman-näsän i-əlkäxbu, jan tanməšrayt togdähät d-ten-däŸ jän änjälosän-win-däŸ, ad-tajjän idubnawän d-a-wärän il' əmmək, äzzäbbät-dd MässinäŸ fälla-sän tisanant n-efew iŸlalän. A-wa tän-ijräwän, älmital a ämoos s-hanäŸ-ikkas MässinäŸ däŸ-taŸđärt.

⁸ Ilämamasän-winnin-däŸ s-hawän-janneŸ, əntäned-däŸ a-wen-däŸ a tamašälän; iməhhurja əlwayän derhanän-näsän, samäđäsän iman-näsän, sifəŸtun däŸ-tärna n-Emäli d-änjälosän wi ikfa älxurmät.

⁹ Wen-härät wäla Mikaylu-i n-änjälos mäqqärän wär t-ija ed ašäl wa d-iknäs d-Iblis d-tinməšəkkin tafəkka n-ännäbi Mosa, wär t-ikwer Mikaylu, inn'-as Ÿas: «OyyeŸ-käy s-MässinäŸ.»

¹⁰ Mäšan, ilämamasän wi s-hawän-janneŸ, wär tän-išla ar tigəggar n-a-wa s-əžhalän, sikuforän. A-wa əssänän, wär t-əssenän ar s-ulhawän-näsän šund taŸsiwen, a-wen-däŸ daŸ a sār-sän dd-oräwän əlhəllak.

¹¹ Iməškay, jän tabarät ta ija Kayin, täšnämäšräy-tän tärha n-azrəf šund a-wa ija Balam, ođä-dd fälla-sän älmäššibät däŸ-təssəba n-a wa s-äffullägän šund a-wa ija Äkori.

¹² Tämoos tähadra-näsän däŸ-imjora-näwän a äsikärakäđän fäl-a-s ed tän-əjjäšän wär t-illa a äheräkken hasän-igdalän täzähhawt däŸ-wär kəttəwän ar iman-näsän. Olähän d-tijäräken wär hen aman äwway ađu,

olähän d-ihøskan wären tiirəw kud-däx s-äzzäman n-a-wen, olähän ɣas d-ihøskan ämmutnen ihønnin-däx s-afäl hin-øttølbäyän, ad-øjən tamättant ta s-sänatät.

¹³ Änifäqqän d-tinäzzämären n-ējərew äššohätnen, wär tän-išla ar ejer data-sän n-täkuffe n-ijitän-näsän wi äsikarakäðnen. Olähän d-etran n-imøššoraj, itwar-asän Mässinäx edägg härkuk däx-ehäð wa ojarän täkkäwält däx-ihäðan.

¹⁴ Äru fälla-sän äloläy Inuk wa n-ahäya n-Adəm wa s-øssa a-s innä:
«Enhøywät Emäli,
imal-dd ønta d-timərwen n-afdän
n-änjälosän-net wi šäddijnen»

¹⁵ i-ad-išräx dägg-adəm iket-näsän, änx s-äššäreɣa-net e d t-illäm anäsbäkkäð däx-tøssøba n-e d t-illäm erk iji jan däx-øffulløg wa jän fäll-Mässinäx d-e d t-illäm mäjräd läbasän jan äddinät-ønnin-däx s-wär t-illa a däx-ässimɣärän Mässinäx.

¹⁶ Meddøn-win-däx, härkuk økmän-tän iman-näsän, saläqqawän iman-näsän i-ad-hasän-aðənän äddinät tähanint, wär-ølkemän ar i-derhanän n-iman-näsän, wär tän-išla ar abørej dat-äddinät d-tømmal n-äddinät i-ad-däx-sän dd-økkøsän härat.

Ässas n-immun

¹⁷ Imärhan-in, käwäneð, wär jem a-wen, ɣaymät kittøwäm a-wa s-äru d-hawän-t-ønnän inømmušal n-Emäli-nänäx ɣisaÄlmasex a-s hawän-jannen:

¹⁸ «Däx-ajilal n-äddunya ad-dd-asøn äddinät wären ølkem ar i-derhanän n-iman-näsän käwän-jänen isøðsa.»

¹⁹ Täbøðdawt ɣas a dd-tirøwän jer-äddinät, wär-ølkemän ɣas ar i-a-wa hannäyän, wär t-illa a oharän d-Unfas n-Mässinäx.

²⁰ Käwäneð-i n-imärhan-in, ɣaymät binnøwäm käwäneð iman-näwän tämudre-näwän fäll-äddin-näwän wa šäddijän, tajjäm älhimmät s-tärna ta n-Unfas Šäddijän.

²¹ Søntømat iman-näwän däx-tärha n-Mässinäx däx-a-s täqqaläm i-ad-käwän-äkf Emäli-nänäx ɣisa Älmasex däx-tähanint-net tämudre ta täxlälät.

²² Aðənät tähanint i-äddinät wi jänen ulhawän øssin,

²³ iyyäð däx-sän, täddoobem ad-tän-dd-tøntøšøm däx-temse, täxløsäm-tän; wi iyyäðnen, aðənät-asän tähanint, tähanint tärtayät d-tuksøða. Udaɣät fäw i-anmøðas där-sän kud-däx anmøðas d-isølsa-näsän wi äsmäðäsän s-erk imojjan-näsän.

Tømmal i-Mässinäx

²⁴ I-Wa äddooben ad-käwän-agøz däx-e d t-illäm iba n-iqqud, isøbdød-dd-käwän däx-älxurmät n-idəm-net wär käwän-iwer älyib, tøknam tedäwit,

²⁵ i-Mässinäx-i s-ønta ɣas a t-illan, ønta-i n-Ämaylas-nänäx däx-idəm n-ɣisaÄlmasex wa n-Emäli-nänäx, älxurmät d-tømyäre d-tärna d-älxikmät härkuk däx-äzzämanän iket-näsän jer-wi økäynen wi n-ämära-däx hakd wi dd-malønen. Amin!

Tänäfalilt

Äšajəš

¹ A-wa tänäfalilt ta dd-äsnäfaläl Mässinäx i-ŶisaÄlmasex i-ad-isəlməd eklan-net isälan n-härätän wi s-išwar jan. Däx-təssəba n-a-wen-däx a fäl sär-i dd-äšmasäl Älmasex änjəlos-net, näkk Exya-i n-akli-net, i-ad-hi-isəlməd s-isälan-win-däx näkk-däx.

² A-wa s-äjjəyhäx iket-net, ənhäyäx-t, ämoosän mäjräd n-Mässinäx d-tidət ta hi-dd-äsnäfaläl Ŷisa Älmasex a hawän-siᶅuläx diha-däx.

³ Ere iᶅrən əlkəttab-i-däx däx-iktäb a-wa t-illän d-a-wa ilkämän, äšjäd i-a-wa däx-ässewäl, ad-itamašal a-wa innä, tənᶅəᶅ-as ed a ənᶅärrän ᶅas a hin-äqqimän i-ad-itbət a-wa innä.

Derhan n-Exya i-imumənan

⁴ A-wa näkk Exya, hin-iktabän i-älkänisäten ti n-əssayät hänen teje ta n-Azya. Ähuuläx-kāwän-in, ikf'-iwän Mässinäx-i dd-äzzarän, ill'-e, ilkam, ännuᶅmät d-älxer. Daläx unfasän wi n-əssa t-əllänen dat-tasäqqaymut n-Mässinäx ta n-təmmənukəla däx-ad-kāwän-äkf ännuᶅmät d-älxer.

⁵ Ikf'-iwän daᶅ ŶisaÄlmasex-i n-ämaᶅdal n-emäjjäyh n-tidət dd-äzzarän tanäkra däx-tamättant, ənta-i n-Ämänokal n-a-wa t-illän däx-imänokalän iwarän ärori n-äkall, ännuᶅmät d-älxer.

Ənta a hanäx-irhan, äsdärfät-anäx däx-ibäkkadän-nänäx s-ašni-net wa inᶅälän a-s ämmut däx-təssəba-nänäx.

⁶ Ənta a hanäx-ijän tawset n-käl-tikutawen, ij'-anäx däx-Təmmənəya-net i-ad-näxdəm i-Mässinäx-i n-Abba-net. Umaset älxurmät d-tärna, i-net härkuk! Amin!

⁷ Ənheywät-ak, imal-dd, äddeew d-tijäräken!

Ad-t-tənhəy e d t-təlläm tiᶅᶅ,

wäla äddinät wi däjnen tajəzzelt-net s-ajor.

Ad-šoršənät tiwsaten n-äddunya iket-däx-näsnät,

əlhənät däx-təssəba-net.

A-wen, ad-äj, wär t-iha äššäk. Amin!

⁸ Innä Emäli Mässinäx-i ilän tärna iket-net: « <Näkk a-s Tizarät, näkk a-s Tilkamät>,† ənta a dd-äzzarän, ill'-e, ilkam.»

A-wa dd-äsnäfaläl Mässinäx i-Exya

⁹ A-wa näkk, Exya wa n-əᶅᶅa-wän däx-äddin dār-wän oharän tizzurt d-Təmmənəya ta n-Mässinäx d-tebädde däx-älᶅizabät däx-təssəba n-Ŷisa. Äzzäman wa d-əttärmäsäx, ämewäyäx, əjjäšäx takärmüt däx-awtəl wa n-Batmus däx-təssəba n-iqqud wa jeᶅ däx-iji n-isälan n-mäjräd n-Mässinäx d-tajuhe ta täjjäx fäll-Ŷisa.

¹⁰ Ašäl iyyän n-älxad-i n-ašäl wa n-Emäli, irmäs-ahi Unfas Šäddijän, əsleᶅ i-emäsli-i-däx äššoohen hi-olähän d-i n-täsinsäᶅt ᶅar'-i

¹¹ hi-innän: «Əktəb a-wa hännäyäd däx-əlkəttab, səssiwəᶅäd-t-in älkänisäten ti n-əssayät n-teje ta n-Azya hänen iᶅärman wi n-Ifäsus d-Smirna d-Birᶅamus d-Təyatir d-Sardas d-Filadäfyä d-Läwdisa.»

¹² Äšnäšlämäx ᶅar'-i i-ad-ənhəyäx ere wa hi-ässewälän. Əkyädäx, ənhäyäx əssayät tiᶅtəl n-oräx

† 1:8 1:8 Däx-Tälyunanit, itawänna i-Tizarät: Älfa, itawänna i-Tilkamät: Omega.

¹³ jer-ibdad ere olähän d-ägg-adəm. Ilsa emäls has-t-illan ğur-ıdarän, ijbäs s-taməntəka n-oräx.

¹⁴ Jan amzadän-net təmölle n-tikunen, olähän ğas d-täduft wär-inxes härät, izajjär-dd ännur olähän d-imämmälän n-efew tiṭṭawen-net.

¹⁵ Jan ıdarän-net asmäxmäx wa itäjj daroğ täššiišdäj tahəst təzzar izzəzzəwät-t äwadəm; oläh eməsli-net d-i n-aman n-anji ošalnen s-äššahät.

¹⁶ İṭṭaf əssa etran dāx-äfuss-net wa n-ağil, təzjar-dd tākoba s-əmsädän imawän-net issənän emm-net, ija idəm-net asmäxmäx wa täjj tafukt n-tarähut.

¹⁷ Ənhäyäx-t ğas, heğ-dd ođeğ daw-ıdarän-net šund ämmuğ mäšan, äswär-ahi äfuss-net wa n-ağil, inn'-ahi: «Wär tärmeğäd, näkk a-s Tizarät, näkk a-s Tilkamät,†

¹⁸ näkk a-s wa iddarän. Tidət, ənhäyäx tamättant mäšan, näkk-da ämära, əddaräx amäxlol. Näkk a itṭafän asäyar wa n-tamättant hakd-däx wa n-älaxärät.

¹⁹ A tənhäyäd-däx, jer-a-wa ijän d-a-wa itajjän d-a-wa ilkämän, əktəb-t iket-däx-net.

²⁰ Etran wi n-əssa hannäyäd dāx-äfuss-in wa n-ağil d-əssayät tiftəl n-oräx ti hannäyäd, əddaraj mäšan älmäğna-n-a-wen da: etran, əntäneđ a-s änjälosän n-älkänisäten ti n-əssayät; tiftəl ti n-əssayät, əntänäteđ a-s älkänisäten ti n-əssayät.»

2

Täkarđe ta təkät älkänisät ta n-İfäsus

¹ Inn'-ahi Ƴisa:

«Əktəb i-änjəlos n-älkänisät ta hät ayrəm wa n-İfäsus, änn'-as:

‹Inn'-ak wa itṭafän əssa etran dāx-äfuss-net wa n-ağil, irjäšan jer-əssayät tiftəl ti n-oräx:

² Wär hi-ədrejnät timaşalen-näk wälä tiluyyağ-näk wälä tebädde-näk härkuk dāx-a-wa hed. Əssanäx a-s wär təşberäd erk äddinät; äddinät-wi jannänen s-bahu a-s əntäneđ inəmmušal-in a ämoosän uhən-däx wär ämoosän a-wen, torämäd-tän, täsfäkkäräd-dd a-s inəsbuha a ämoosän iket-däx-näsän.

³ Əssanäx a-s təbdadäd härkuk dāx-a-wa hed, tənhäyäd ağana dāx-təssəba n-isəm-in mäšan, təşbäräd, wär käy-ikkes a-wen dāx-a-wa hed.

⁴ Hakd a-wen-däx, ikm'-ahi fälla-k härät iyyän: tärha tədi-hi täzzarät s-käla hi-tät-jed, äbas-hi-tät-jed, täqqäläd sär-s.

⁵ A-wen-däx a fäl, əktəw-dd adwəyləl wa s-käla t-jed dāx-dd-tođed, tutabäd, täqqäläd-in timaşalen-näk ti n-ibda. Afäl wär jed a-wen, he-käyy! Maläx-käy-in; afäl käy-in-ogäzäx wär tätubäd, ad-əkkəsäx tefätelt-näk dāx-edägg-net.

⁶ A-wen, wär hin-ikkes a-s, ijraz-ahi fälla-k mikdaw wa jed d-timaşalen n-käl-Nikula-i dār-jed mikdaw wa dār-sän jeğ.

⁷ Ere ilän timəzzujen-däx s-islä, isäjdət i-mäjräd wa itäjj Unfas Šaddijän i-älkänisäten.

Wa ikräšan tärna fäll-Iblis d-tändərbaten-net, ad-t-šäksäx aratan n-ahəşk wa n-tämudre ihän älzännät n-Mässinäx.» »

Täkarđe ta təkät älkänisät ta n-Smirna

⁸ Ätwänn'-ahi darät-a-wen:

† 1:17 1:17 Däx-Tälyunanit, itawänna i-Tizarät: Älfa, itawänna i-Tilkamät: Omega.

«Ἐκτέβ i-änjālos n-ālkānisāt ta hāt aḡrēm wa n-Smirna, ānn'-as:
 <Inn'-ak wa n-Tizarāt d-Tilkamāt,† wa āmmun, iddār-dd,
 9 ḡssanāḡ ḡmmək wa s-tātwarāmād d-əllāqqu-nāk māšan hakd a-wen-dāḡ, kāyy a-s āgg-ehāre wa n-tidət. Ḥssanāḡ fäll-tällābāsen-ti kāy-sawarān āddināt wi jannānen s-bahu a-s dāgg-Iṡrayil a āmoosān, a-s ija a-wen, wār āmoosān ḡas ar ehān n-āddin n-inaxbadān n-Iblis.
 10 Wār kāy-isārmayət ālyizabāt wa kāy-mad-səknən. Ad-āj Iblis i ājjootnen dāḡ-wān dāḡ-takārmūt i-ad-tān-iḡzurrəb s-a-wen-dāḡ, təjəm māraw išilan titwəḡzurrībām dāḡ-təssəba n-āddin-nāwān. Kāyy, ḡṡṡəf immun kud-dāḡ hak-t tamāttant a-wen. Afāl dd-təzjārād a-wen, ad-hak-ājāḡ ālhāk, takənbut ta n-tāmudre tāḡlālāt.
 11 Ere ilān timəḡzujen-dāḡ s-islā, isājdet i-mājrād wa itājj Unfas Šāddijān n-Māssināḡ i-ālkānisātān.
 Wa ikrāšan ašāl fäll-Iblis d-tāndārbaaten-net, wār-iha miši n-ad-inhəy tamāttant ta s-sānatāt.> »

Tākarḡe ta təkāt ālkānisāt ta n-Biryamus

12 Ätwānn'-ahi daḡ:
 «Ἐκτέβ i-änjālos n-ālkānisāt ta hāt aḡrēm wa n-Biryamus, ānn'-as:
 <Inn'-ak Wa itṡāfān tākoba ta s-əmsādān imawān-net issənān:
 13 Ḥssanāḡ diha d-təzzāḡād, dihen-dāḡ ad-təkkās təmmənukəla n-Iblis ifəklan-net. Intibbas wa n-āmaksad-in n-āmaydal-in, ḡur-wān di-dāḡ d-izzāḡ Iblis ad-t-āba. Hakd a-wen-dāḡ, tāqqimād-dd kāyy, tosaḡād dār-i, wār tākkuddälād immun-nāk.
 14 Māšan, ill'-e a əndārrān hi-ikman fälla-k: əllan-t ḡur-k āddināt ḡṡafnen tayətte ta n-Balam-i ittārān ad-āj āddābara i-Balak i-ad-əkšən kāl-Iṡrayil isan n-taḡsiwen āmoosnen takute i-āṡṡānāmān, əkfān iman-nāsān i-iba n-tākrakidṡ, ad-zinnun ḡarāt-a-wen.
 15 Ḥllan-t daḡ ḡur-k āddināt s-əjraznāt timašalen ti n-inəṡṡulab wi n-Nikula.
 16 A-wen-dāḡ a fāl, utab iket-di d-kāy-in-tisāḡ əknəsāḡ erk āddināt wi kāwān-hānen s-tākoba ta hāt emm-in.
 17 Ere ilān timəḡzujen-dāḡ s-islā, isājdet i-mājrād wa itājj Unfas Šāddijān i-ālkānisāten.
 Wa ikrāšan ašāl fäll-Iblis d-tāndārbaaten-net, ad-t-ākfāḡ mana,† a-wen, amənsi n-taləmmiḡt wārān ätwāzzāy, ākfāḡ-t tazḡədt mällāt fäll-iktāb isəm āynayān s-wār t-illa ere t-issanān sāl ere wa ijrāwān tazḡədt-ten-dāḡ.> »

Tākarḡe ta təkāt ālkānisāt ta n-Təyatir

18 «Ἐκτέβ i-änjālos n-ālkānisāt ta hāt aḡrēm wa n-Təyatir, ānn'-as:
 <Inn'-ak Wa s-itawānna Rure-s n-Māssināḡ s-olāhnāt tiṡṡawen-net d-efew āhijäljälān s-āsimāḡmāḡān idarān-net šund daroḡ āzziizzāwen:
 19 Ḥssanāḡ fäll-timašalen-nāk d-tārha ta jed i-āddināt d-iqqud wa jed dāḡ-immun sār-i d-əmmək wa s-tədhälād tilāqqiwen d-tebādde n-hārkuk ta jed dāḡ-a-wa hed. Ḥssanāḡ a-s timašalen-nāk ti n-ašāl-i-dāḡ, ojärnāt ti n-ibda
 20 māšan, ikm'-ahi fälla-k a-wa-s tāqbälād i-tamāḡt ta-s isəm-net Yizabil jānnet s-bahu tānnābit n-Māssināḡ tajjāt isālan-net a tāmoos,

† 2:8 2:8 Dāḡ-Tālyunanit, itawānna i-Tizarāt: Ālfa, itawānna i-Tilkamāt: Omega. † 2:17 2:17 A-wa amənsi wa dd-āzzābbāt Māssināḡ fäll-kāl-Iṡrayil āzzāman wa d-hān tanəzruft. Itawānn'-as dāḡ Tālyunanit: Mana; itawānn'-as dāḡ-Tāmašāḡt: Taləmmiḡt n-Māssināḡ.

taqqäl i-inaxdimän-in əssəbab n-tanməşrayt ed jarrāw-asän s-bahu dəḡ-asəssäḡär-net, tetäte n-isän n-taxsiwen ämoosnen takute i-äşşänämän, ad-zinnun ɗarät-a-wen.

²¹ Ǝkfəḡ-tät äzzäman dəḡ-tätub məšan tunjäy təbɗa d-əlkäxbu-net.

²² Dəḡ-təssəba n-a-wen-dəḡ a fäl tät-mad-äjräḡ fäll-isəftay s-tisnant. Afäl day wär-ätubän imidiwän-net wi dār-tärtäy dəḡ-əlkäxbu, afäl wär-oyyen amişel n-a-wa hasän-janna, ad-tän-säknäḡ aḡāna ässuuksäɗän iket-dəḡ-näsän.

²³ Siwəɗäḡ fäll-a-wen-dəḡ iket-net tenäḡe n-aratän-net kərəf. Afäl ija a-wen, ad-əlmədnät älkänisäten iket-näsnät a-s näkk, näkk a issanän a-wa dəḡ-zinəzjumun dəgg-adəm d-a-wa sadārhanän. Hak äwadəm, ad-has-äjäḡ älhäk wa dār-änihäjjän ijitän-net.

²⁴ Ǝnneḡ i-äddinät wi iyyäɗnen hänen älkänisät ta n-aḡrəm wa n-Təyatir, wären əlkem i-a-wa jänn tamäɗt ənnin-dəḡ, wär-əlmədnän a-wa s itawänna härätän wi n-Iblis ättunkälnen, wär käwän-äswäräḡ uɗlem wäl' iyyän.

²⁵ Äknät asəmməgəggi dəḡ-immun wa tətṭäfäm har käwän-in-asäḡ.

²⁶ Wi n-imärnan ällilnen erhet-in har ašäl wa ilkämän, ad-tän-səmmənukələḡ fäll-tiwsaten,

²⁷⁻²⁸ äkfäḡ-tän təmmənukəla ta hi-ikfa Abba-nin, səmmənukələḡ-tän fäll-tiwsaten,

əɗnən-tänät s-äşşahät,

əjən-asnät atäḡtäḡ wa itäjj äwadəm i-aḡäsis irazḡ.

Wa irnän, ad-t-äkfäḡ tatrīt ta n-emäḡär.

²⁹ Ere ilän timəzzujen-dəḡ s-isola, isäjdət i-a-wa ijänna Unfas Šäddijän i-älkänisäten!> »

3

Täkarɗe ta təkät älkänisät ta n-Sardas

¹ «Ǝktəb täkarɗe i-änjəlos n-älkänisät ta n-Sardas, tənnəd-as:

‹Inn'-ak Wa ilän əssa unfasän wi n-Mässinäḡ d-əssa etran: Ǝssanäḡ fäll-timaşalen-näk, təseyäläd äddinät a-s təddaräd a-s ija a-wen, tämmuud.

² Äj ənniyät, sudār-dd a-wa dəḡ-k dd-äqqimän iket-di d-hin-itamättat ənta-dəḡ fäl-a-s, əjrähäḡ-in a-s imojjan-näk, wär tän-iha-i ilan idəm dat-Mässinäḡ.

³ Ǝktəw-dd a-wa tätwäsäḡräd d-əmmək wa s-has-təsled, təmaşäläd a-wa hak-ätwännän, tutabäd. Afäl wär jed ənniyät, ad-käy-in-äydäräḡ šund emäkräd s-älwäqq d-wär-iha mişi n-ad-jed fäll-a-wen.

⁴ Məšan han-käwän iyyäd dəḡ-Sardas di-dəḡ wären äsmäɗäs imälsan-näsän. Win-hi, ad-əjən isəlsa mällolnen, idawän dār-i ed änihäjjän d-a-wen.

⁵ Wa ikräşän ašäl fäll-Iblis d-tändärbaten-net, ad-t-sälsäḡ ənta-dəḡ isəlsa mällolnen, wär hin-e-aməsäḡ isəm-net dəḡ-əlkəttab wa n-tämudre, äjjayhäḡ day dat-Abba-nin d-änjəlosän-net a-s äwadəm-en, i-nin.

⁶ Ere ilän timəzzujen-dəḡ s-islä, isäjdət i-mäjräd wa itäjj Unfas Šäddijän i-älkänisäten!> »

Täkarɗe ta təkät älkänisät ta n-Filadälfya

⁷ «Ǝktəb i-änjəlos n-älkänisät ta n-Filadälfya, änn'-as:

‹Inn'-ak Wa šäddijän, ädduutten, itṭafän äsäyar n-Təmmənəya ta n-ämänokal Dawəd, ənneḡ: Äwadəm wa s-oreḡ ashär, wär t-illa ere

äddoben aḡfal-net-has, wa s-t-äḡfäläḡ daḡ, wär t-illa ere s-ilkam ad-has-t-ora.

⁸ Ḥssanäḡ fäll-timašalen-näk, əssanäḡ a-s wär təkned əḡḡuhu mäšan hakd a-wen-däḡ, tətṭafäd mäjräd-in, wär täkkuddäläd isəm-in. A-wen-däḡ a fäl data-k oreḡ ashär s-wär t-illa ere äddoben ad-t-iḡfəl.

⁹ Ḥnhöy, ad-käy-äkfäḡ ašäl fäll-ehän n-äddin wa n-Iblis ijännən s-bahu a-s ənta a han dägġ-Älyähud wi n-tidət. Äddinät-en-hi, ad-hak-tän-in-sukäḡ, ärkäḡän data-k, səmḡärän-käy, isəlməd-tän a-wen s-tärha ta hak-jeḡ.

¹⁰ Käyy, tətṭafäd mäjräd-in, təbdadäd härkuk däḡ a-wa hed, a-wen-däḡ a fäl ad-käy-aġəzäḡ näkk-däḡ däḡ-ässaxät wa n-tisnant ilkämän däḡ-äddunya iket-net i-ad-ətwəžžurrəbän dägġ-adəm iket-näsän.

¹¹ Maläḡ-in šik, əhəl iman-näk däḡ-immun wa tətṭafäd i-ad-wär däḡ-k itihäḡ äwadəm wäl' iyyän takənbut ta n-təmmənukəla.

¹² Wa ikräšan ašäl fäll-Iblis d-tändärbaten-net, ad-t-äjäḡ tämankayt däḡ-ehän n-ämudd wa mäqqärän n-Mässi-ḡ, Mässinäḡ, wär-ilkem ad-t-izjar. Äwadəm-en-hi, ad-fälla-s əktəbäḡ isəm n-Mässi-ḡ, Mässinäḡ, d-isəm n-aḡrəm-net wa mäqqärän, a-wen, Yärussälam ta täynayät dd-e-təflət isənnawän. Äwadəm-wen-däḡ, ad-fälla-s əktəbäḡ isəm-in wa äynayän.

¹³ Ere ilän timəžžujen-däḡ s-islä, isäjdət i-mäjräd wa itäjġ Unfas Šaddijän i-älkänisäten!> »

Täkarde ta təkät älkänisät ta n-Läwdisa

¹⁴ «Ämära, əktəb i-änjəlos n-älkänisät ta n-Läwdisa, änn'-as:

<A-wa näkk wa s-itawänna: Amin. Näkk a-s emäjġäyh n-Mässinäḡ wa n-ämaydal, näkk a dd-äzzarän i-härät iket-net.

¹⁵ Ḥnexḡ: əssanäḡ fäll-timašalen-näk, əssanäḡ a-s wär sämmeḡäd, wär täkkusäd; tiyyät-i-däḡ, ismaḡ meḡ daḡ ukas, ad-hak-in-iššəm a-wen

¹⁶ mäšan šamad, tällimḡayed, wär täkkusäd, wär sämmeḡäd, ad-käy-in-äbsäḡ.

¹⁷ Janned: Näkk-i-däḡ, äbbiḡäräḡ, wär t-illa fäw a hin-oḡanäḡ. Janned a-wen-däḡ a-s ija a-wen, wär tessenäm a-s aḡäna a hed. Amäskoy käyy, läqqəwäd, därḡaläd, ḡäluläd.

¹⁸ Äyy-ahi ad-käy-sənnəmhələḡ: žänš fäll-i oräḡ äššišdäj efew i-ad-tətbət terše-näk i-ehäre; žänš fäll-i isəlsa mällolnen i-ad-təštäräd; žänš fäll-i tidrəbba n-asäfar wa n-tittawen, səssəfäräd i-ad-təkned ahänay.

¹⁹ Ḥlməd a-s näkk, ere ärheḡ a sasaxadäḡ, ḡattäläḡ-t i-ad-ilməd s-a-wen. A-wen-däḡ a fäl utab, tukasäd däḡ-alkum-hahi.

²⁰ Səjəd! Näkk da ibdädän dat-emm n-ehän, takäwkawäḡ-t: ere hi-islän, or'-ahi, ad-fälla-s əjjəšäḡ, ahäräḡ där-s, ahär där-i.

²¹ Wa ikräšan tärna fäll-Iblis d-tändärbaten-net, ad-t-äkfäḡ turhajät n-ad-där-s ənḡəymäḡ fäll-tasäqqaymut-in ta n-təmmənukəla, s-əmmək-wa-däḡ s-näkk iman-in, əkräšäḡ fälla-s tärna ḡas, äḡaymäḡ d-Abba-nin fäll-tasäqqaymut-net ta n-təmmənukəla.

²² Ere ilän timəžžujen-däḡ s-islä, isäjdət i-mäjräd wa itäjġ Unfas Šaddijän i-älkänisäten!> »

4

A-wa dd-änfalälän däḡ-isənnawän

¹ Darät härätän-wi-däx, əkyädäx, ənhäyäx dəx-išənnawän ashär ämerän. Inn'-ahi emäsli-wənnin s-əsley hi-olähän d-täsinsäxt: «Awən-dd, ad-käy-säknäx ämära härätän wi əlkammen.»

² İdkäl-ahi Unfas Şaddijän älwäqq-wen-däx s-išənnawän, ənhäyäx dihen tasäqqaymut n-təmmənukəla fäll-äqqim äwadəm.

³ Äwadəm-en, ij' asmäxmäx wa tajjänät tihun n-tilällaten ti s-itawänna žasəb d-sarədwan. Tasäqqaymut-net ta n-təmmənukəla, äxiläyğäläy-tät azännäzzal ijan tihusay olähnen d-ti n-tekädäyt ta n-tasämäxmayt s-itawänna žimrud.

⁴ Ənhäyäx dəx a-s tasäqqaymut-ənnin, äxiläyğäläynät-tät sənätät timərwen n-tasäqqaymut n-təmmənukəla d-əkkozät fäll-äqqimän sənätät timərwen n-amyar d-əkkoz ässimlälnen, jan iket-däx-näsän, koronatän, a-wen, tikənbuten n-oräx.

⁵ Tasäqqaymut tənnin täzzarät, zajjārän-tät-dd essamän d-imäslan d-ejjajän, ärganät data-s əssayät tiftəl ti äşşiwwärnen əssa unfasän wi n-Mässinäx.

⁶ Tasäqqaymut-ənnin-däx dəx, ill'-e data-s a olähän d-əjärew wa səmmän s-dd-ässikta älmäxna-net təşədje ta n-täşoka. Tasäqqaymut, han-tät əkkoz härätän əddärnen änimäxläynen ammas-net. Härätän-en-hi, ämoos data-sän hakd-däx dəra-sän, tiğrurəjen.

⁷ Härätän-win-däx əddärnen, wa äzzarän dəx-sän, han-t ifäqqän n-ahär; wa s-əssin, han-t ifäqqän n-esej; wa s-kärađ, oläh idəm-net d-i n-äwadəm; wa s-əkkoz, oläh d-əjäft illayän.

⁸ Härätän ənnin n-əkkoz əddärnen, hak iyyän dəx-sän ila säđis afrewän əlsanät tiğtawen dəx-ammas hakd-däx dəx-afälla. Ehäđ d-aşäl, əğğafän əsahäx jannen:

«Emäli Mässinäx,
käyy-i ilän tärna iket-net,
käyy-i t-illän, tölled-t, təlcamäd:
Şaddijäd, şaddijäd, şaddijäd!»

⁹ E-d jän əkkoz härätän-win-däx əddärnen əsahäx-ənnin-däx-däx, timələn älxurmät, samyarän, tumayän i-ere wa s-ənta a iğlalän äqqimän fäll-tasäqqaymut ta n-təmmənukəla,

¹⁰ ad-ärkäxän imyarän wi n-sənätät timərwen d-əkkoz dat-wa äqqimän dəx-tasäqqaymut ta n-təmmənukəla s-ənta a iğlalän, aməlän-t, əkkəsän tikənbuten-näsän ti n-təmmənukəla, äjrən-tänät dat-tasäqqaymut, ənnən:

¹¹ «Emäli-nänäx, Mässinäx!
Täniihäjjäd d-älxurmät
d-semyar d-tärna
ed käyy a dd-ixläkän härät iket-net;
ijjäş-dd a-wen ənniyät-näk ɣas, jed-t.»

5

Aşəxol n-Mässinäx

¹ Ənhäyäx darät-a-wen dəx-äfuss wa n-aɣil n-ere wa äqqimän fäll-tasäqqaymut ta n-təmmənukəla əlkəttab warän ikätəbän fäll-idmawän-net issənän, warän-t dəx əssa izəzla has-əgdalnen amer.

² Oläsəx dəx ahänay n-änjəlos dəx-wi n-imärnan, ibdad, ijanna s-afälla: «Mi äddoben, änihäjjä d-ad-ärz izəzla-wi-däx n-əssa, arr əlkəttab-wa-däx?»

³ Äbä-dd äwadəm däḡ-išənnawän d-äkall d-ider n-äkall äddooben arr-net, äba-dd wäla ere äddooben asəjarah däḡ-ammās-net.

⁴ Ənhäyäḡ a-s äbä-dd äwadəm orän əlkəttab-ənnin-däḡ, wäla i issejrahän däḡ-s, ḡas ad-sakäläläḡ.

⁵ Älwäqq-wen-däḡ ad-hi-innä iyyän däḡ-imḡarän: «Susəm, wär təlhəd! Ənhəy-t-ak ägg-Yähuda wa n-ahär n-ahäya n-ännäbi Dawəd, ikräš tärna, äddoobät teräzze n-izəzla wi n-əssa, arr əlkəttab.»

⁶ Ənhäyäḡ älwäqq-wen Ašəḡol ibdadän däḡ-tasäqqaymut ta n-təmmənukəla änimäḡläyän härätän wi n-əkkoḡ əddärnen d-imḡarän wi n-sänatät timərwen d-əkkoḡ. Ašəḡol-i-hi, s-tənnəd iḡras, ila əssa iskawän d-əssayät tiṭṭawen. Tiṭṭawen-tin-däḡ a-s əssa unfasän wi dd-äšmašäl Mässinäḡ fäll-ärori n-äkall iket-net.

⁷ Irjäš-dd Ašəḡol har dd-osa ere wa äqqimän fäll-tasäqqaymut ta n-təmmənukəla, irmäs fälla-s əlkəttab wa iṭṭäf s-äfuss-net wa n-aḡil.

Ätwamäl Ašəḡol n-Mässinäḡ

⁸ Irmäs əlkəttab-ənnin-däḡ ḡas, ärkäḡän härätän wi n-əkkoḡ d-imḡarän wi n-sänatät timərwen d-əkkoḡ dat-Ašəḡol, ad-t-timəlän, ḡabbädän-t. Hak iyyän däḡ-sän iṭṭaf tehärdänt d-alkas n-oräḡ iḡkarän əḡənfärän. Alkasän-ənnin n-oräḡ d-isəkkurora wi əḡnäyän, ämmittälän tittar n-äḡyibadät n-iməšseddəjan n-Mässinäḡ.

⁹ Äwwayän äsahäḡ äynayän däḡ-jannen:

«Ärhuj-ak ad-tärməsäd əlkəttab,
tärzəd izəzla wi n-əssa t-härnen
ed tämmud, jed iman-näk takute,
täsdärfed s-ašni-näk tamətte s-ämära, ikräš-tät Mässinäḡ.
Tamətte daḡ, han äddinät
n-e d t-təlläm tawset,
d-e d t-illäm awal,
d-e d t-təlläm tumast
d-e d t-illäm əddəwəl iwarän ärori n-äkall.

¹⁰ Jed-tän älzämaḡät n-käl-tikutawen ixdamän i-Mässinäḡ,
jed-tän däḡ-Təmmənəya-näk
i-ad-äxkəmän fäll-äkall.»

¹¹ Oläsäḡ daḡ akäyad, əsleḡ i-eməsli n-änjəlosän əknanen əjut, afdän fäll-timərwen n-afdən. Äḡiläyḡäläyän tasäqqaymut ta n-təmmənukəla d-härätän wi n-əkkoḡ əddärnen d-imḡarän wi n-sänatät timərwen d-əkkoḡ.

¹² Əḡkälän iməslan-näsän, ad-jannen s-afälla:

«Ašəḡol wa iḡräsän i-ad-umas takute,
tärhuj-as tärna d-ärrəzäḡ d-särho d-äššahät
d-semḡar d-älxurmät d-təmmal.»

¹³ Əsleḡ daḡ i-a-wa dd-ixläkän iket-däḡ-net jer-a-wa ihän išənnawän d-a-wa iwärän ärori n-äkall d-a-wa t-illän daw-äkall d-a-wa ihän ejärew wa səmmän, a-wa dd-ätwäxläkän iket-net, išənnawän d-äkall, a-wen-däḡ iket-net, irmas äsahäḡ, ijanna:

«Tärhuj təmmal d-semḡar
d-älxurmät d-tärna täḡlalät
i-ere wa äqqimän fäll-tasäqqaymut
ta n-təmmənukəla d-Ašəḡol.»

¹⁴ Təmdä taswəlt-ten-däḡ ḡas, əssəgdälän härätän wi n-əkkoḡ əddärnen, ənnän: «Amin!» Ärkäḡän imḡarän əntänəḡ-däḡ ässaḡät-wen, ad-ḡabbädän.

6

Ämer n-izəzla wi n-sädis

¹ Oläsäx, əkyädäx; ənhäyäx Ašəxol a-s irza azəzlo wa əzzarən däx-wi n-əssa härnen əlkəttab. Əsleχ i-yyän däx-härätän wi n-əkkoz əddärnen a-s idkäl emäsli-net šund ejjaj, innä: «Hyäw!»

² Innä a-wen χas, əkyädäx; ənhäyäx ebäje mällän inay əwadəm ittafän əssäm, tätwäkf'-e korona, a-wen, takənbu n-təmmənukəla. Əwadəm-en, emärn, iglä daχ i-ad-ärn.

³ Irza Ašəxol azəzlo wa s-əssin ihärän əlkəttab χas, əsleχ i-wa s-əssin däx-härätän wi n-əkkoz əddärnen a-s innä: «Hyäw!»

⁴ Ənhäyäx əmära ebäje šəggäxän dd-imalän, ijrəw əhaləs wa t-inäyän tädabit n-ad-ikkəs əlχafyät fäll-əröri n-əkall i-ad-ənməlhəsän äddinät jer-iman-näsän; ənta-i-hi, ijrəw təkoba šejreet.

⁵ Irzä Ašəxol azəzlo wa n-kərađ χas, əsleχ i-wa s-kərađ däx-härätän wi n-əkkoz əddärnen a-s innä: «Hyäw!» Əkyädäx, ənhäyäx ebäje kəwälän inay əwadəm ittafän əlmizan däx-əfuss-net.

⁶ Əsleχ i-emäsli dd-ifalän jer-härätän wi n-əkkoz har innä: «Kelu n-əlkäma-i, əlqim-net ašäl n-əlxidmət n-əwadəm meχ kərađ kelutän n-tärruza mäšan, wär təfnežäd härät däx-əzzäyt wäla däx-asməd wa n-ləχnəb.»

⁷ Irzä Ašəxol azəzlo wa n-əkkoz iχfälän əlkəttab χas, əsleχ i-härät wa s-əkkoz iddärän a-s innä: «Hyäw!»

⁸ Əkyädäx, ənhäyäx ebäje dalen inay ere iwar isəm: «Tamättant», əsiläl əlaxärät d-a-wa t-ihän däx-əddinät iket-net. Əjrəwän tärna fäll-təzune n-əkall ta n-əkkozät i-ad-ənχən imuzäxän-net s-təkoba d-laž d-turhənnawen ti läbasnen tamälsanen d-tiwäχsen.

⁹ Irzä Ašəxol azəzlo wa n-səmmos χas, ənhäyäx däx-išənnawän, daw-tasəskärt ta fäll-χarräsnät taχsiwen ti n-tikutawen däx-ehän n-əmudd wa mäqqärän, iman n-əddinät wi äba däx-təssəba n-mäjräd n-Mässinäχ d-ajəyh däx-s i-əddinät.

¹⁰ Ədkälän iman-en-hi iməslan-näsän s-afälla, ənnän: «Emäli-nänäχ wa šəddijän, äddutten, ma s-təqqaläd, tarəd əššərəχa wa n-jere-näχ d-imuzäxän n-əkall? Ma s-təqqaläd təšəjed däx-sän eχa n-asənχal wa jän i-ašni-nänäχ?»

¹¹ Ijrəw hak iyyän däx-sän emäls mällän, ätwänn'-asän ad-sunfən əzzäman əndärrän əšbärän har dd-əmdəwän ayətma-sän d-imidiwän-näsän wi dər-oharän əlxidmət länen s-ad-där-sän alähän əssəbab n-tamättant.

¹² Ənhäyäx dərät-a-wen Ašəxol a-s irzä azəzlo wa n-sädis iχfälän əlkəttab χas, ijä-dd əkall əškädkäđ-i-däx əssuksädän, kəwal täfukt šund aläššo, šəggaχ ewär iket-net šund ašni,

¹³ jän-dd etran fäll-əkall aftəktək wa dd-täjjän aratän n-ašar dihad täniwwəšwəš ađu əššoohen.

¹⁴ Olämän-in išənnawän šund əlkəttab itidh əwadəm, əhonän idaxän d-iwtəlän.

¹⁵ Ənkärän imuzäxän n-əkall iket-näsän, jer-wi n-imänokalän, hakd wi n-käl-eket d-wi n-imänokalän n-əlyəskär d-wi n-imärrəzäxän d-käl-əššahät, wär-əzleyän wi n-eklan d-wi n-ilällan, əffärän iket-däx-näsän däx-iχäyan d-itəqqän n-idaxän.

¹⁶ Saχären, jannen i-idaxän d-isəwlan: «Ađəwät-dd fälla-näχ i-ad-wär hanäχ-ihənnəy əmänokal wa əqqimän fäll-tasəqqaymut ta n-təmmənukəla, ənjärät-anäχ iket-di d-fälla-näχ isiđəw ađkär n-Ašəxol

17 ed ašäl wa mäqqārän d-itakkäs älxär, osä-dd. Mi dāḡ-s-e-iyłösän?»

7

Käl-Išrayil wi n-temeđe d-əkkozät timərwen d-əkkoz n-efäđ iwär ešwäl

¹ Darät-a-wen, ənhäyāḡ əkkoz änjälosän s-hak iyyän dāḡ-sän dāḡ, ibdad dāḡ-iywät dāḡ-tisdas n-əkall ti n-əkkozät. Hak iyyän ännihäd dāḡ-iywän dāḡ-ađutän wi n-əkkoz i-ad-wär-äsraräj wäl' iyyän dāḡ-sän fäll-əkall wäla fäll-əjärew wäla fall-ihəškan.

² Ənhäyāḡ daḡ änjälos iyyän har dd-ifäl emäynäj iṭṭaf azäzlo n-Mässināḡ-i iddarän. Assewäl s-afälla i-əkkoz änjälosän wi əjräwnen turhajät n-ad-əbxəsän əkall d-əjärew wa səmmän, inn'-asän:

³ «Tazidert, wär jem säbxas dāḡ-əkall wäla dāḡ-ijərwan wäla dāḡ-ihəškan har näj ešwäl fäll-timme n-eklan n-Mässināḡ iket-dāḡ-näsän.»

⁴ Əsleḡ älwäqq-wen i-a-wa dār-ogdähän äddinät wi iwär azäzlo n-Mässināḡ: temeđe d-əkkozät timərwen d-əkkoz n-efäđ† n-äwadəm dd-əzjarnen tiwsaten n-Išrayil iket-dāḡ-näsnät:

⁵ Märaw d-əssin n-efäđ n-äwadəm,† əzjarän-dd tawset ta n-Yähuda; märaw d-əssin n-efäđ n-äwadəm, əzjarän-dd tawset ta n-Rubin; märaw d-əssin n-efäđ n-äwadəm, əzjarän-dd tawset ta n-Gad;

⁶ märaw d-əssin n-efäđ n-äwadəm, əzjarän-dd tawset ta n-Azir; märaw d-əssin n-efäđ n-äwadəm, əzjarän-dd tawset ta n-Naftali; märaw d-əssin n-efäđ n-äwadəm, əzjarän-dd tawset ta n-Mänasa;

⁷ märaw d-əssin n-efäđ n-äwadəm, əzjarän-dd tawset ta n-Simyön; märaw d-əssin n-efäđ n-äwadəm, əzjarän-dd tawset ta n-Lewi; märaw d-əssin n-efäđ n-äwadəm, əzjarän-dd tawset ta n-Isakar;

⁸ märaw d-əssin n-efäđ n-äwadəm, əzjarän-dd tawset ta n-Zabilon; märaw d-əssin n-efäđ n-äwadəm, əzjarän-dd tawset ta n-Yusəf; märaw d-əssin n-efäđ n-äwadəm, əzjarän-dd tawset ta n-Bänyamin.

Tänäfalilt n-iməššeddəjän wi hänen älzännät

⁹ Ənhäyāḡ daḡ darät-a-wen, tamətte n-äddinät-i-dāḡ täjjet s-wär t-illa ere äddooben asiđən-net. Tamətte-ənnin-dāḡ, han-tät äddinät n-e d t-illäm əddəwəl d-e d t-təlläm tawset d-e d t-təlläm tamətte d-e d t-illäm awal. Əbdadän dat-tasäqqaymut ta n-Təmmənəya d-dat-Ašəḡol, ässiimlälän, əṭṭafän iləktan n-tišday.

¹⁰ Əzzajän iməslan-näsän s-afälla, jannen:

«Əlxəllas-nänāḡ, Mässināḡ-i äqqiimän fäll-tasäqqaymut ta n-təmmənukəla d-Ašəḡol a ḡur-t-illa.»

¹¹ Əbdädän änjälosän iket-näsän wi änimäḡläynen tasäqqaymut ta n-təmmənukəla d-imḡarän d-härätän wi n-əkkoz əddärnen, ärkāḡän dat-tasäqqaymut ta n-təmmənukəla, əssənsän timmawen-näsän fäll-əkall, ad-ḡabbädän Mässināḡ,

¹² jannen:

«Tidət-dāḡ a-s təmmal d-älxurmät d-särho d-tämāyit d-seḡyar d-tärna d-äššahät, i n-Mässināḡ härkuk! Amin.»

¹³ Issəstän-ahi iyyän dāḡ-imḡarän darät-a-wen, inn'-ahi: «Ma ämoosän äddinät-wi-dāḡ ässiimlälnen? Ənde s-dd-hän?»

14 Ænneḡ-as: «Mässi-ḡ, a-wen, käyy a t-issanän.» Inn'-ahi älwäqq-wen: «A-wa äddinät wi dd-toyyä täḡazzabit ta mäqqärät, ässerädän isəlsa-näsän, issəmläl-tän ašni wa n-Ašəḡol.

15 A-wen-däḡ a fäl əbdadän dat-tasäqqaymut ta n-təmmənukəla n-Mässinäḡ. Ehäḡ d-ašäl, ḡabbädän-t däḡ-ehän n-ämudd-net wa mäqqärän. Ere wa äqqiimän fäll-tasäqqaymut ta n-təmmənukəla däḡ-ehän-net, a tän-ogazän.

16 Wār-ilkem ad-ällozän, wäla ad-äffudän, wäla ad-tän-tässirḡa täfukt wäla a äkkusän a ämoos-däḡ

17 fäl-as Ašəḡol wa ihän ammas n-tasäqqaymut ta n-təmmənukəla, iman-net a tän-e-idənän, aḡəd-tän s-ersan wi n-aman əddärnen, irsəy-in Mässinäḡ e d t-illäm ämiṭṭ däḡ-tiṭṭawen-näsän.»

8

Emäsli n-tisinsäḡen ti n-əssayät

1 Irzä Ašəḡol azäzlo wa s-əssa ḡas, ässosäm a-wa ihän isənnawän iket-däḡ-net har fälla-s tokäy täzune n-ässaḡät.

2 Ænhäyāḡ ḡarät-a-wen əssa änjälosän wi əbdädnen dat-Mässinäḡ, ijrāw hak iyyän däḡ-sän täsinsäḡt tiyyät.

3 Osä-dd änjälos iyyän, ibdäd edes i-tasəskärt ta fäll-tajjänät tikutawen, itṭaf äkoss wa hän iməkkärora iknän däḡ-oräḡ. Ijrāw isəkkurora äjjootnen i-ad-tän-isədəw d-tittar n-tamətte ta n-iməššeddəjän n-Mässinäḡ, isäḡ a-wen-däḡ iket-net fäll-tasəskärt ta n-tikutawen n-oräḡ t-təllät dat-tasäqqaymut ta n-təmmənukəla, ässewäḡ-in daḡ fäll-a-wen tittar n-iməššeddəjän n-Mässinäḡ.

4 Ähohän iməkkurora, əlkämät-asän tittar n-iməššeddəjän n-Mässinäḡ.

5 İdkäl änjälos ḡarät-a-wen äkoss wa däḡ-raqqän əlḡənfärän, idkär-t däḡ-efew wa iwärän tasəskärt ta n-tikutawen təzzar, ibsäl-t-dd fäll-äkall, jän ejjajän älwäqq-wen-däḡ d-imäslan d-essamän, äškäḡkäḡ äkall.

Äshädän änjälosän wi n-əkkoḡ tisinsäḡen-näsän

6 Äsdawän ya änjälosän wi n-əssa əṭṭäfnen tisinsäḡen ti n-əssayät i-ashäd-näsnät.

7 Äshäd wa äzzarän täsinsäḡt-net, oḡän-dd ijdräšän äddewnen d-efew irtayän d-ašni fäll-äkall, intäs əttələt n-äkall d-əttələt n-ihəskan d-a-wa t-illän däḡ-teyəšše iket-net.

8 Äshäd änjälos wa s-əssin täsinsäḡt-net, ifäl-dd a olähän d-aḡay ähijäljälän isənnawän, oḡä-dd däḡ-ejärew. İqqäl əttələt n-ejärew wa səmmän ašni älwäqq-wen-däḡ.

9 Äba əttələt n-e d t-illäm ämudär ihan ejärew wa səmmän, ittäḡtäḡ əttələt n-a-wa ila ejärew däḡ-turfen.

10 Äshäd ḡarät-a-wen änjälos wa s-käraḡ täsinsäḡt-net, ifäl-dd atär mäqqärän ähijäljälän šund emämmäl isənnawän, oḡä-dd fäll-əttələt n-ijərwan d-ersan.

11 Atär-en, isəm-net: «Təsəmme.» Oḡä-dd ḡas, issəsmäm əttələt n-aman har tämmut təššəm n-äddinät iket-näsän wi tän-əswänen.

12 Äshäd änjälos wa s-əkkoḡ täsinsäḡt-net, təjjäš tewete əttələt n-täfukt d-əttələt n-ewär d-əttələt n-etran, ijmaḡ-tän əttələt n-ännur-näsän har äbas itimləwləw əttələt n-ehäd d-əttələt n-ašäl.

Iməskay äddinät iyyäd

¹³ Ǝkyädäy daɣ, əsley i-ejäft illayän däɣ-ijəj däɣ-älhäwa, idkal emäsli-net, ijanna: «Iməskay, Xäxx-däɣ, iməskay imuzäɣän n-äkall älwäqq wa d-e-sähəðän änjälosän wi n-kärað hin-äqqimmen tisinsäɣen-näsän!»

9

Äshäð änjälos wa s-səmmos täsinsäɣt-net

¹ Äshäð änjälos wa s-səmmos täsinsäɣt-net, ənhäyäɣ atär dd-ifalän išənnawän har dd-oðä föll-äkall, ätwäkf'-e asäyar n-anu wa wärän ila ider ihän äläxärät.

² Or' atär-ənnin anu-en, izjär-t-dd a olähän d-tahəst-i-däɣ tässuksäðät, issəkwäl äho wa dd-izjärän anu täfukt d-älhäwa.

³ Äho-ənnin-däɣ, təzjär-t-dd tašwält təlsät ärori n-äkall, tašwält-en, təjraw ässäm olähän d-wa ihän izurdam.

⁴ Təjräw tašwält-ənnin-däɣ alämär n-ad-wär ðes teyəšše wäla ihəskan wäla idommän, ätwänn'-as ɣas ad-äkk äššar-net dägg-adəm wi s-wär-iwer ešwäl wa n-Mässinäɣ timmawen-näsän.

⁵ Äddinät-en, wär təjrew tašwält turhajät n-tenäɣe-näsän, wär təjrew a säl turhajät n-aɣəzzəbu-näsän har fölla-sän takəy täqqän n-səmmos orän. Təsəmme n-tisnant n-älɣizabät-net toläh d-a-wa s-itifrey äwadəm äkiwättät ezerdəm.

⁶ Täqqän-ten-däɣ n-səmmos orän, ad-takəy tammäɣän dägg-adəm i-tamättant mäšan, wär tät-järrəwän, sadärhanän-tät mäšan, tifäqqut-asän.

⁷ Tašwält-ənnin, toläh d-ibəjwan äsidäwnen i-tikawt n-amjär, iɣäfawän-näsän, iwar-tän a olähän d-koronatän, a-wen, tikənbuten n-oräɣ, olähän idmawän-näsän d-wi n-dägg-adəm,

⁸ lan amzadän olähnen d-tišəkkað n-tiðeðen, lan daɣ isenän olähnen d-wi n-ehran.

⁹ Ijerjar-näsän, s-tənnəd, täzoli a tän-ilsan, emäsli n-afrewän-näsän, oläh d-turfen ti n-amjär tihubun ibəjwan əkkanen edägg n-amjär.

¹⁰ Lan tilänkäwen lanen teskärt šund ta n-izurdam, tilänkäwen-näsän en-däɣ a ih' ässäm wa s-tikwəttin dägg-adəm har äkəyən səmmos orän.

¹¹ Lan ämänokal wa ännihäðän däɣ-anu wa wärän ila ider ihän äläxärät s-ənta a-s änjälos wa n-älaxärät, isəm-net däɣ-Ÿäbranəyya: Abbädon; isəm-net däɣ-Tälyunanit: Abbolyon. Almäɣna n-isəm-net: Amahlak.

¹² Älmäššibät wa äzzarän okäy mäšan, əlkamän-as-dd əssin härwa.

Äshäð änjälos wa s-säðis täsinsäɣt-net

¹³ Äshäð änjälos wa s-säðis täsinsäɣt-net, əsley i-emäsli dd-ifalän tisəttuytay ti n-əkkožät n-tasəskärt n-oräɣ ta n-tikutawen t-təllät dat-Mässinäɣ.

¹⁴ Inn' emäsli-en i-änjälos wa s-säðis ittäfän täsinsäɣt: «Arr-in änjälosän wi n-əkkož əkräðnen edes i-ejärew wa mäqqärän s-isəm-net Ifräyti.»

¹⁵ Ämerän-dd änjälosän-win-däɣ n-əkkož ässaɣät-wen-däɣ n-ašäl-wen-däɣ n-ewär-wen-däɣ n-awätay-wen-däɣ i-ad-änɣən əttələt n-dägg-adəm ed a-wen-däɣ a-s ətwarän a ijä a-wa-däɣ.

¹⁶ Ätwänn'-ahi a-wa dər-ogdäh əɣəskär wa inäyän ibəjwan, oseɣt iwwäð sänatät timað n-ajjim n-äwadəm.

¹⁷ Ibəjwan-ənnin d-äddinät wi tän-näynen, ənta da əmmək wa s-hi-dd-änfalälän: imälsan-näsän, i n-täzoli šäggäɣät šund efew, i dalatnen šund tekädäyt ta n-telällit lät äłqim s-itawänna: Safir; ja täroxe ta itäj əlkäbrit.

Iḡāfawān n-ibəjwan, olāhān d-iḡāfawān n-ehran, izajjār-dd efew d-ihohan d-əlkābrit imawān-nāsān.

¹⁸ Ąlmāššibatān-winnin-dāḡ n-kāraḡ dd-zajjārnen imawān n-ibəjwan, efew d-āho d-əlkābrit, əlhāsān əttələt n-dāgg-adəmə

¹⁹ ed ibəjwan ənnin-dāḡ, āššar-nāsān, imawān-nāsān d-tilānkāwen-nāsān a iha fāl-a-s olāhnāt tilānkāwen-nāsān d-taššālen, lan iḡāfawān s-tiḡārrun dāgg-adəmə.

²⁰ Unjāy a-wa dd-āqqimān dāḡ-dāgg-adəmə wār-ānḡen ālmāššibatān-ənnin-dāḡ s-ad-ibḡəw d-āššānāmān wi əknān s-ifassān-nāsān, unjāyān s-ad-əbḡəwān d-āḡibadāt n-ālšinān d-āššānāmān wi əknān i-iman-nāsān s-orāḡ d-azrəf d-daroḡ d-tihun d-isāḡerān wāren āddobāt ahānay wāla māšāllāt wāla rājjoš.

²¹ Unjāyān dāḡ s-ad-əbḡəwān d-iji n-iman d-əkkəriku d-asəmmādəs n-iman d-tikra.

10

Tänäfalilt n-ānjālos wa iḡāfān əlkəttab wa n-ayātas n-āššāreḡa

¹ Olasāḡ dāḡ ahānay n-ānjālos n-emāššehi a-s dd-ifāl išənnawān təls'-e tejārəkt, iqqaal-as aḡānnāzḡal takənbət, olāh idəmə-net d-tāfukt, olāhān iḡarān-net d-timānkayen n-efew,

² iḡāf dāḡ-āfuss-net əlkəttab əntəkkān āmerān. Ibdād s-aḡār-net wa n-aḡil fāl-ejārew wa səmmān, ibdād s-wa n-tāšālje fāl-ākall.

³ Inḡāw teḡārit tolāhāt d-emāšli n-ahār inijjəwān. Ąšḡārāt ḡas, ākewānān-as imāslan n-ejjajān wi n-əssa.

⁴ Əttārāḡ ad-əktəbāḡ a-wa ənnān ḡas, əsleḡ i-emāšli dd-ifalān išənnawān a-s hi-innā: «Əštār a-wa ənnān ejjajān wi n-əssa, wār t-təktebād.»

⁵ Iḡkāl ḡarāt-a-wen ānjālos-wənnin ənhāyāḡ āsixātärtār fāl-ejārew d-ākall āfuss-net wa n-aḡil s-ebre n-išənnawān,

⁶ ihād s-Māššināḡ-i idḡarān dd-ixlākān išənnawān d-ākall d-ijərwan d-a-wa tān-ihān iket-net, innā: «Tāqqān, təmdā-dd.»

⁷ Afāl issəntā ānjālos wa s-əssa ewet n-tāsinsāḡt-net, ad-dd-imḡəw əddāraj n-Māššināḡ wa s-a ija a-wa-dāḡ iffar, dihen, ad-itbət a-wa ənnān ānnābitān-i n-eklan-net.

⁸ Ąssewāl-ahi dāḡ emāšli wa s-əsleḡ ifal-dd išənnawān, inn'-ahi: «Əḡləw, ārməs əlkəttab wa əntəkkān āmerān ihān āfuss n-ānjālos wa āsixātärtārān fāl-ākall d-ejārew.»

⁹ Ohāzāḡ-dd ānjālos i-ad-hi-ākf əlkəttab wa əntəkkān, inn'-ahi: «Ąrməs əlkəttab, təkšəd-t, ad-ismam dāḡ-tāsa-nāk māšan dāḡ-əmm-nāk, ad-alāh d-torawāt tāzude.»

¹⁰ Ąrmāsāḡ-dd əlkəttab dāḡ-āfuss n-ānjālos, əkšəḡ-t ḡas, ija dāḡ-əmm-in tāzude ta n-torawāt māšan, osa tāsa-nin ḡas, sāməm dāḡ-s.

¹¹ Ątwānn'-ahi ālwāqq-wen: «Səlməd hārwa timəttawen d-tiwsaten d-awalān d-imānokālān a-wa hasān-itwār Māššināḡ.»

11

Tijuhawen n-Māššināḡ ti n-sānatāt

¹ Darāt-a-wen, tātwākf'-ahi tezewt tolāhāt d-hārāt n-telāwāḡt ta n-eket, ātwānn'-ahi: «Əḡləw, əkət ehān n-āmudd wa māqqārān n-Māššināḡ d-tasəskārt ta n-tikutawen, siḡənād-dd a-wa dār-ogdāhān āddināt-wi dāḡ-s ḡabbādnen Māššināḡ

² māšan, äyy äyalla-net, wär t-ketäd ed øjrawän fölla-s inøzzulam† tärna, ad-øjen økkožät timørwen n-ewär d-øssin tikukulän ayxrem wa šaddijän.

³ Ad-hin-šəmmišöläx tjuhawen-nin ti n-sänatät ølsänen isølsa wi ilass ere ittafän iba, ad-øjen efäð n-ašäl d-sänatät timað d-säðisät timørwen siyulän isälan wi hasän-dd-ässawäy Mässinäx.

⁴ Tjuhawen-en n-sänatät, øntänäted a-s øzzäytunitän wi n-øssin d-tiftøl ti n-sänatät øbdäden dat-Emäli n-äkall.

⁵ E-d ittär äwadøm ad-hasän-iyxšød härät, ad-dd-izjär efew imawän-näsän ihläkän isønja-näsän, ømmøk-wen-däx a-s mad-ämmät äwadøm a ämoos itattärän ad-hasän-iyxšød härät.

⁶ Ejräwän turhajät n-ad-äxfälän isønnawän, øgdälän i-ajønna ad-iwæt a økkän tajjän isälan wi dd-äwwäyän xur-Mässinäx. Ejräwän däx turhajät n-ad-øjen aman ašni, zøzzubbun-dd föll-äkall ännuø n-älmäššibät iket-net, älwäqq d-äsdärhänän a-wen iket-net.

⁷ Afäl øssømdän d-asøssiwäð n-isälan wi dd-äwwäyän, ad-fälla-sän idøw awäxš wa dd-madän-izjär anu wa wärän ila ider ihän äläxärät, ärn'-en, äny'-en;

⁸ äqqaymønät-dd tiføkwen-näsän däx-tøfärre n-ayxrem wa däx-tažämmayän imøssorha-net, däx-edägg wa däx-ätwäšläb Emäli-näsän föll-tajøttewt. Ayxrem-en, ätiwäj'-as isøm n-ämadaø, itawänn'-as, Sodoma; itawänn'-as däx: Mišra.

⁹ Ad-økrøšan äddinät n-timøttawen iket-däx-näsnät d-tiwsaten-näsnät d-awalän-näsnät, d-øddøwälän-näsnät iket-näsän, kärað isilan d-täzune økyadän däx-sän, øgdälän-asän ad-änbälän.

¹⁰ Ad-äddäwen imuzäxän n-äkall hullan däx-tøssøba n-a-wa s-tän-äba, äd-øjen äzzähotän, ønmøkfen älhäkän jer-iman-näsän, föl-a-s ännäbitän-ønnin-däx n-øssin, øssøknän imuzäxän n-äkall ayäna hullan

¹¹ māšan, afäl okäyän kärað isilan d-täzune winnin-däx, ad-dd-iføl unfas n-tämudre n-Mässinäx ijješ ännäbitän-ønnin n-øssin, ønkärän-dd däx-tamättant, tärmøš tarømmeyt äddinät wi tän-hannäyten iket-näsän.»

¹² Eslän ännäbitän wi n-øssin i-emäsl i äšsohen hasän-innän däx-isønnawän: «Awønät-dd diha.» Tøðkäl-tän tejäräkt, økkän isønnawän, økyadän däx-sän isønja-näsän.

¹³ Äškädkäð äkall s-äššahät älwäqq-wen-däx, täzä täzune n-ayxrem ta s-märawät, ämmun øssa afdän n-äwadøm däx-äškødkäð-wønnin-däx; ärmäxän äddinät wi iyyäden, ad-samxarän Mässinäx-i ihän isønnawän.

¹⁴ Okäy älmäššibät wa s-øssin māšan, hewät! Os'-iwän föw wa s-kärað.

Äshäð änjälos täsinsäxt ta s-øssayät

¹⁵ Äshäð älwäqq-wen änjälos wa s-øssa täsinsäxt-net, jän imäslan äšsohätnen däx-isønnawän jännänen:

«Ämära-däx, tömmønukøla föll-äddunya, ti n-Emäli-nänäx Mässinäx d-Älmasex-net i-ad-immukøl härkuk.»

¹⁶ Eñkärän imxarän wi n-sänatät timørwen d-økkož föll-tisäqqima-näsän ti t-øllänen dat-Mässinäx, oðän data-s, ärkäxän data-s, äsðäsän timmawen-näsän äkall, ad-t-xabbädän,

¹⁷ jannen:

«Emäli Mässinäx-i ilän tärna,

† 11:2 11:2 — Xur-käl-Älyähud, ere wärän ämoos ägg-Älyähud s-aläsäl meø ere wärän ilkem i-äddin-näsän, iket-net, änäzzalim a ämoos. A-wen-däx a föl tiwsaten ti iyyäden iket-näsnät, ti n-inøzzulam. — Ašäl-i-däx, änäzzalim, äkafär (ere wärän issen s-Mässinäx).

käyy-i t-illän, tölled-t, tölkamäd,
nomal-käy ed tössätbätäd

tömmönuköla-näk s-tärna-näk.

¹⁸ Ibda, äddukren-käy öddöwölän wi n-inözzulam†

māšan, ašäl-i, adkär wa-näk,

a dd-madän-infiləl fälla-sän,

ašäl-näk wa dāḡ-šarräḡäd inömmuttan, osä-dd.

Iwwäd älwäqq wa dāḡ-mad-töjöd älhäk

i-eklan-näk-i n-ännäbitän

d-äddinät wi led n-imöššeddöjän-näk iket-dāḡ-näsän,

ässimḡarän-käy wi n-imöššuha hakd wi n-tiläqqiwen,

älwäqq wa n-aḡalak n-imahlakän n-äkall, osä-dd.»

¹⁹ Älwäqq-wen, ämerä-dd ehän n-ämudd n-Mässinäḡ wa mäqqārän dāḡ-išönnawän, ätwänḡäy dāḡ-s össöndöqq wa iḡa ölköttab n-ärkäwäl n-tassayt wa n-je-Mässinäḡ d-tamötte-net, jän essamän ḡarät-a-wen d-imäslan d-ejjajän; äškäḡkäḡ äkall, önfärän-dd ijdräšan šuharnen.

12

Tänäfalilt ta n-tamäḡt d-alyaḡ wi iknäš ämudär

¹ ḡarät-a-wen, tözjär-dd täkunt tässuksäḡät išönnawän. Ənhäyäḡ tamäḡt täḡnasät täfukt töbdad fäll-ewär, täsiwär märaw etran d-össin eḡäf-net, märaw etran d-össin öddasnen šund takönbut n-ämänokal eḡäf-net.

² Tamäḡt-önnin, la önniyät, tärmäs-tät tizzurt n-ajäräw n-eḡäf, täsikäläl a-wa dāḡ-has-ja tisanant.

³ Tänfäläl-dd täkunt tiyyät daḡ dāḡ-išönnawän, önhäyäḡ ämudär mäqqorän šäggäḡän han ifäqqän n-äḡata ilan össa iḡäfawän d-märaw iskawän, hak eḡäf-net-dāḡ, töwar-t takönbut n-tömmönuköla.

⁴ Ifräḡ-dd s-telänkäwt-net öttölöt n-etran wi hänen išönnawän, ijär-tänd-dd fäll-äkall. Ibdäd-dd ḡarät-a-wen dat-tamäḡt i-ad-hin-ilmöḡ ara-net afäl dd-iwä.

⁵ Tökräš tamäḡt alyad s-önta a madän-ixkəm s-tärna tolähät d-ta n-täzoli fäll-öddöwölän iket-näsän, iwä-dd alyad ḡas immöḡkäl älwäqq-wen-dāḡ, ämewäy s-Mässinäḡ d-tasäqqaymut ta n-tömmönuköla-net.

⁶ Tamäḡt önta, täjewäd s-tanäzruf-i-dāḡ has-itwär Mässinäḡ edägg dāḡ-mad-has-iḡtaf tenäfäkt har täj efäḡ n-ašäl d-sänatät timaḡ d-säḡisät timöwren.

⁷ Inkär ḡarät-a-wen amjär mäqqoorän dāḡ-išönnawän. Imäl-t amjär äšsoohen je-Mikaylu d-änjälösän wi has-ölkamnen d-ämudär wa hän ifäqqän n-äḡata d-änjälösän wi has-ölkamnen.

⁸ Ätwärna äḡata d-änjälösän wi has-ölkamnen, äbas hasän-t-tölla taḡimit dāḡ-išönnawän.

⁹ Ätwäjär-dd äḡata wa mäqqārän, ätwästäḡ-dd, izjär-dd išönnawän. Ənta a-s aššäl wa n-ibda s-itawänna Iblis meḡ Äššäyḡan-i n-emökkerrös n-äddunya tömda, ätwäjär-dd fäll-äkall önta d-änjälösän-net.

¹⁰ Əsley ḡarät-a-wen i-emäsli äšsoohen ijannen dāḡ-išönnawän:

«Ämära, ässaḡät wa n-ölyöllas, iwwäd-dd.

Mässinäḡ, äsnäfaläl-dd tärna-net d-Tömmönöya-net!

Əlxökum, ijjäš ifassän n-Älmasex-net

† 11:18 11:18 – ḡur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änäzzalim a ämoos. A-wen-dāḡ a fäl tiwsaten ti iyyäḡnen iket-näsän, ti n-inözzulam. — Ašäl-i-dāḡ, änäzzalim, äkafär (ere wärän issen s-Mässinäḡ).

fäl-a-s ere wa s-käla isaqlam ayətma-näx,
isaqlam-tän ehäð d-ašäl xur-Mässinäx,
ätwästäx-dd, äbas ih' isənnawän.

¹¹ Əkräšan fälla-s ayətma-näx tärna
däx-təssəba n-ašni wa n-Ašəxol
d-mäjräd n-Mässinäx wa däx-tajäyhen äddinät,
wär jen tärha n-härät däx-tämudre-näsän,
əqbälän tamättant däx-təssəba n-Ašəxol
d-däx-təssəba n-mäjräd n-Mässinäx.

¹² A-wen-däx a fäl isənnawän
d-imuzäxän-näsän, nufloyät!
Mäšan iməskay imuzäxän n-äkall d-əjärew wa səmmän
fäl-a-s Iblis, äzzubbät-in sär-wän,
ikn'-e aqkär ujəš ed issan
a-s a-wa has-in-aqqimän däx-älwäqq i jəzzulän.»

¹³ İlmäd ämudär wa hän ifäqqän n-äxata a-s ätwästäx-dd däx-isənnawän,
äträkkät-dd fäll-äkall xas, ästäxäynän tamäðt ta torawät alyad.

¹⁴ Mäšan təjraw tamäðt afrewän əssin n-əjäft mäqqoorän, təggäd sār-
sän här täwwäð edəgg wa has-itwārän däx-tanəzruft i-ad-däx-s təjrəw
tenäfäkt, tətweigəz däx-aššäl har təj dihen kərəð iwətyan d-təzune.

¹⁵ İnhäy aššäl a-s təbok tamäðt ad-t-təjmäd xas, ora emm-net, ijär-tät s-
ajəju n-aman ogdähän d-əjärew i-ad-tät-əkšən.

¹⁶ Mäšan, ohäx äkall tinahäyen i-tamäðt, ämerä-dd, ilməz-in aman wi-
ijär äxata tamäðt.

¹⁷ İkn' aqkär n-tamäðt ujəš n-äxata, iglä i-ad-iknəs a-wa dd-äqqimän däx-
aratän-net, a tän-ämoosän äddinät iket-näsän wi tamašalnen alämärän
n-Mässinäx tajäyhen däx-isälan n-Ÿisa.

¹⁸ Osä-dd äxata, ibdäd däx-asälim n-əjärew wa səmmän.

13

Tänäfalilt ta n-əssin imudärän

¹ Oläsäx, ənhäyäx ämudär iyyän ilan mərəw iskawän d-əssa ixfawän a-
s dd-izjər əjärew wa səmmän. Hak eɣäf, təwar-t takənbut n-təmmənukəla
tiyyät, hak idəm-däx, iktab fälla-s isəm əsikafärän.

² Ämudär wa ənhäyäx, oläh d-wašil; tihiw-net, šuharnät, emm-net,
oläh d-i n-ahär. İkf'-e äxata tärna-net, d-təmmənukəla-net d-tädabit
mäqqoorät.

³ Ämudär-ənnin, iyyän däx-ixfawän-net, ih'-e abuyəs däx-edəgg n-
əsənsax wärän itəzzəy məšan, izzäy. İqqäl-a-wen təkunt i-imuzäxän n-
äkall iket-näsän, əlkämän i-ämudär.

⁴ Ad-xabbäd äddunya iket-net äxata ed ənta a ikfän ämudär tärna.
Tärkäx tamətte iket-net dat-ämudär, ad-t-xabbäd, janna: «Mi ogdähän d-
ämudär, mi ihälän amjər dər-s?»

⁵ İjrəw ämudär turhajät n-ad-isəffəlyäx, isəkkufär har äj əkkozät
timərwen n-ewär d-əssin.

⁶ Ad-ijanna ämudär härätän läbasnen fäll-Mässinäx, igaggär isəm-net,
d-edəgg wa däx-izzäx d-a-wa izzäxän isənnawän iket-net.

⁷ İjrəw turhajät n-ad-iknəs iməšseddəjän, ärn'-en; ijärw tärna fäll-e d t-
təlläm tawset d-e d t-təlläm tamətte d-e d t-illäm awal d-e d t-illäm əddəwəl.

⁸ Ad-xabbädän imuzäxän n-äkall iket-näsän ämudär-ənnin, ixabbäd-
t e d t-illäm äwadəm s-wär-ikteb isəm-net xur-axälak n-äddunya däx-
əlkəttab n-tämudre n-Ašəxol wa ätwäxrasän.

⁹ Ere ilän timəzzujen s-islā, isäjdət:

¹⁰ «Ere wa s-inna Mässināx ad-ijjəš takärmüt, ad-tät-ijjəš, ere wa s-inna, ad-t-täks tākoba, ad-t-täks. A-wa ässaḡät s-hak eməššeddəj-däx, ibdədet fäll-iman-net däx-immun, ikuyədet.»

¹¹ Ənhäyäx dəy ämudär iyyän dd-izjarän äkall, il' iskawän əssin olähnen d-i n-ekrär mäšan isawal šund äḡata.

¹² Itamašal tädabit ta itamašal ämudär wa äzzarän iket-net däx-a-s äjjəyh ämudär wa äzzarän i-a-wen. Išahäššal äkall d-imuzäḡän-net ad-äḡbədän ämudär wa äzzarän äboyäšan däx-edägg n-äsənsəḡ s-izzäy äbuyəs-net.

¹³ Ämudär wa s-əssin, ija tikunen äjjootnen mäqqornen dat-äddinät, izizəbbut-dd wälā efew wa n-išənnawän fäll-äkall.

¹⁴ Išäšk käl-äkall s-tikunen ti-s äddobät ad-tänät-äj dat-ämudär wa äzzarän äboyäšan s-izzäy abuyəs-net. Issärd'-en s-ad-əjən äššanäm ässimḡarän ämudär wa äzzarän t-äsbayäšan s-tākoba mäšan, izzäy.

¹⁵ Ijräw ämudär wa s-əssin tädabit n-ad-äj iman däx-äššanäm wa olähän d-ämudär wa äzzarän i-ad-itamäjräd äššanäm-ənnin, isasänḡa äddinät iket-näsän wi t-wären əḡbed.

¹⁶ Äšhəššäl ämudär äddinät iket-näsän: wi mädroynen hakd-wi əššämnen, wi ärzäḡnen hakd wi läqqəwnen, wi n-ilällan hakd wi n-eklan, ad-tän-iwär əšwäl fäll-ifassän-näsän wi n-aḡil d-timmawen-näsän.

¹⁷ Äbas t-illa ere äddoben ad-izänš wälā ad-ittužžär afäl wär t-iwer əšwäl-wənnin-däx, əšwäl-wənnin dəy ənta a-s isəm n-ämudär meḡ ämaḡin wa änimähälän d-isəm-en.

¹⁸ Edägg-i, ämiḡatär äwadəm d-särho d-tayətəte i-ad-t-ijräh. Ere s-lämmed əḡäf-net iket-net, äddoobät ad-ijrəw älmäḡna n-ämaḡin wa n-ämudär ed ämaḡin-en, iha edägg n-isəm n-ägg-adəm. Ämaḡin-en-hi, ənta da: «Säḡisät timaḡ d-säḡisät timərwen d-säḡis.» Ənta-den-däx əšwäl n-ägg-adəm ḡur-Mässināx.

14

Ašəḡol d-əlyəllas wa ihäkk imumənän

¹ Oläsəḡ dəy akäyad ḡarät-a-wen, ənhäyäx Ašəḡol ibdad fäll-taḡəxt ta n-Sayon. Təbdad edes-has temədə d-əkkožät timərwen d-əkkož n-efäd n-äwadəm wi s-iktäb isəm-net d-isəm n-Abba fäll-timmawen-näsän.

² Əsleḡ i-eməsli dd-ifalän išənnawän; eməsli-en, oläh d-wa n-tinäzzämären n-əjärew wa səmmän, oläh ḡas d-əjjaj ijjäjän. Eməsli wa s-əsleḡ, oläh ḡas d-i n-tihärdänen watnen.

³ Täwway tamətəte-ten-däx təmmal täynayät dat-tasəqqaymut ta n-təmmənukəla d-härätän wi n-əkkož əddärnen d-dat-imḡarän. Təmmal-en, wär t-illa ere äddoben almud-net a säl äddinät-win-däx n-temədə d-əkkožät timərwen d-əkkož n-efäd dd-äsdärfät Mässināx däx-äddunya.

⁴ Äddinät-en-hi, wär-äsmäḡäsän iman-näsän s-tiḡedən, wär-əzzeyän tiḡedən. Əlkamän i-Ašəḡol e-s ikka-däx, äsdärfät-tän-dd jer-dägg-adəm i-ad-umasän wi ikräš Mässināx d-Ašəḡol s-tizarät.

⁵ Imawän n-äddinät-en, wär kälā tän-dd-izjär bahu, wär t-illa älyib tän-iwarän.

Tänäfalilt n-änjəlosän wi n-kärad

⁶ Oläsəḡ ḡarät-a-wen ahänay n-änjəlos iyyän dəy illayän däx-ijəj n-älhəwa, ənta a iṡṡafän Älənžil wa iḡlälän, isalänžat käl-äddunya iket-net,

e d t-illäm əddəwəl d-e d t-təlläm tawset d-e d t-illäm awal d-e d t-təlläm tamətte.

⁷ Änjälos-ənnin-hi, idkal eməsli-net, ijanna: «Uksaḍät Mässinäx, səmḡaräm-t fäl-a-s ašäl wa n-tebädde, osä-dd; aməlä-t ənta-i dd-ixläkän išənnawän d-äkall d-əjärew wa səmmän d-ersan.»

⁸ Änjälos-ənnin, išräy-t-dd iyyän, ijannen: «Babilun ta mäqqärät, toḍa, ya toḍa. Ənta-i təssəswät asməd n-əlkäxbu-net wa okäyän ämaku i-əddəwəlän iket-däx-näsän, toḍa ämära.»

⁹ Išräy-tän-dd änjälos wa s-käraḍ, idkäl eməsli-net, innä: «Afäl irkäx äwadəm dat-ämudär meḡ dat-ättaşwer-net, meḡ iwär-t ešwäl-net idəm-net meḡ äfuss-net,

¹⁰ ijmaḍ-t äššäk a-s ad-t-isəsəw Mässinäx əlxəmär n-aḍkär-net wär-iqqr härät wa mad-isänḡəl däx-alkas-net wa n-aḍkär. Äddinät-en, ad-əqquzzebən däx-əlkäbrit wa ähjäljälän dat-änjälosän wi šaddijnen d-dat-Ašäḡol.

¹¹ Äho n-efew wa tän-itixəzzəben, härkuk ḡas intas. Wär mad-sunfən sehäd wäla s-ašäl äddinät wi ärkäḡnen i-ämudär meḡ ättaşwer-net, d-ere iwar ešwäl n-isəm-net iket-net.»

¹² A-wa ässaḡät s-hak eməššeddəj-däx, ibdədet fäll-iman-net, ikuyədet däx-immun s-ḡisa, ämašäl alämärän n-Mässinäx.

¹³ Əsleḡ ḍarät-a-wen däx-išənnawän i-eməsli innän: «Əktəb: ḡur-ašäl-i-däx, tənḍəḍ i-wi äba äxdamän i-Emäli! Tidət a-wen, innä Unfas Šaddijän fäl-a-s ad-sunfən däx-älxidmət-näsän ed, əlkamän-asän imärkedän-näsän.»

Adkär n-Mässinäx

¹⁴ Əkyadäx härwa a-s ənhäyäx tejaräkt mällät; tejaräkt-en, äqqiima fälla-s ere olähän d-äwadəm ijan takənbut n-təmmənukəla n-oräx, iṭṭaf älgori imsädän däx-äfuss-net.

¹⁵ Izjär-dd änjälos iyyän daḡ ehän n-ämudd wa mäqqärän, idkäl eməsli-net s-afälla, innä i-wa äqqimän fäll-tejaräkt: «Säxdəm älgori-näk, aləy, fäl-a-s iwwäḍ-dd älwäqq n-a-wen ed äkall inḡa šund əttäḡam, äbas irha ar amili.»

¹⁶ Innä änjälos a-wen ḡas, ijär ähaləs wa äqqimän fäll-tejaräkt älgori-net fäll-äkall, oläy sär-s äkall iket-net šund ašəkrəš n-əttäḡam inḡan.

¹⁷ Oläs-dd daḡ änjälos iyyän azäjor n-ehän n-ämudd wa mäqqärän ihän išənnawän, ənta daḡ, iṭṭaf älgori imsädän.

¹⁸ Izjär-dd daḡ änjälos iyyän tasəskärt ta däx-naḡḡänät tikutawen, änjälos-en, ənta a-s wa n-efew; idkäl eməsli-net, innä i-änjälos wa iṭṭafän älgori wa imsädän: «Säxdəm älgori-näk wa imsädän, aləy sär-s iləktan n-läḡnəb n-äkall ed, aratan-net əḡḡän.»

¹⁹ Ijär änjälos älgori-net fäll-äkall, inkäḍ sär-s läḡnəb n-äkall iket-net, ijär-t däx-tebent-ta-däx izimməw i-ad-umas älmital n-aḍkär wa mäqqärän ihän Mässinäx.

²⁰ Tämewäy tebent, təzjär aḡrəm, izmä-dd däx-s läḡnəb, əzjärän-tät-dd injitän n-ašni; injitän-ənnin, timḡarän har əwwäḍän ixäban n-ibəjwan, əlsän däx-äkall a iwwäḍän kərəḍät timaḍ n-kelumetär.

15

Älmäššibatän

¹ Oläsäx daḡ ənhäyäx däx-išənnawän iji n-Mässinäx iyyän ijan təmḡäre d-tiḡsay n-tikunen. Ənhäyäx əssa änjälosän əṭṭafnen əssa älmäššibatän;

älmäššibatän-en, ɔntäneɖ a-s wi n-ajilal ed ɔntäneɖ a dd-maden-isəmdəw aɖkär n-Mässinäx.

² Ənhäyäx ɖarät-a-wen ejärew wa səmmän, oläh-ahi d-täšoka, ähiijäljäl s-efew. Ənhäyäx ɖax äddinät wi ɔkräšnen tärna fäll-ämudär d-ättaşwer-net d-ämaɖin n-isəm-net, əbdadän fäll-ejärew ənnin n-täšoka, əttaşfän tihärdänen ti s-təmmalän Mässinäx.

³ Ənzarän ässaɣät-wen-däx təmmal ta n-Mosa wa n-akli n-Mässinäx d-təmmal ta n-Ašəxol, jannen:

«Emäli Mässinäx-i ilän tärna iket-net,
wär t-illa a ojarän timaşalen-näk təmyäre wäla tihusay,
käyy a-s ämänokal n-äddunya təmda;
Ibaran-näk, oɣadän, ämoosän tidət iket-däx-näsän.

⁴ Mi ihälän ad-änn wär käy-äksud?

Änn, wär irh' asəmyar-näk?

Käyy a xur-dd-təmda təšəɖje.

Əddəwəlän iket-näsän ad-ärkäxän data-k
ed iqqud-näk, itbat.»

⁵ Oläsäx akäyad, ənhäyäx ehän n-ämudd d-ehäket wa n-ärkäwäl n-tassaɣt a-s dd-ämera däx-išənnawän.

⁶ Əzjarän-t-dd əssa änjälosän wi əttaşfnen əssa älmäššibatän, əlsan älxärir šäddijän mällän, äsimäxmäxän, əjbasän s-timəntəkawen n-oräx.

⁷ Ikfa iyyän däx härätän wi n-əkkəz əddärnen änjälosän ənnin n-əssa, əssa alkasän n-oräx əɖkärnen aɖkär n-Mässinäx-i s-härkuk iddar.

⁸ Ija a-wen xas, iɖkär ehän n-ämudd wa mäqqärän äho däx-təssəba n-älxurmät n-Mässinäx d-tärna-net, äbas äddoobät äwadəm wäl' iyyän uješ n-ehän n-ämudd wa mäqqärän har akəyən əssa älmäššibatän wi dd-äwwäyän änjälosän wi n-əssa.

16

Əssa älmäššibatän əlkamnen

¹ ɖarät a-wen-däx, oläsäx i-mäsällät n-eməsli äššoohen dd-ifalän ehän n-ämudd wa mäqqärän. Innä i-änjälosän wi n-əssa: «Äglät, sänxəlät fäll-äkall əssa alkasän wi əɖkärnen aɖkär n-Mässinäx.»

² Igl' änjälos wa äzzarän, issänxäl alkas-net fäll-äkall. Ija a-wen xas, əzjarnät-dd tikussawen sümümmen läbasnen äddinät wi iwär ešwäl n-ämudär, xabbädnen tele-net.

³ Issänxäl änjälos wa s-əssin alkas-net däx-ejärew wa səmmän. Ija a-wen xas, olähän aman n-ejärew d-ašni n-enəmmettən, ämmut a-wa-däx ihän ejärew wa səmmän iket-däx-net.

⁴ Igl' änjälos wa s-käraɖ, issänxäl alkas-net däx-ijərwan d-ersan wi n-aman, əqqälän aman-näsän ašni.

⁵ Əsleɣ älwäqq-wen i-änjälos wa ännihəɖän fäll-aman a-s innä:

«Käyy a oɣadän,

käyy a t-illan, tölled-t,

käyy a šäddijän ed äššärexa wa täxtäsäd, oɣad härkuk,

⁶ fäl-a-s däg-g-adəm, əssänxälän ašni n-iməššeddəjän d-ännäbitän. Ämära, təkfed-tän ašni i-ad-t-əswən ed a-wen-däx a dər-äniihäjjän.»

⁷ Oläsäx mäsällät n-eməsli dd-ifalän tasəskärt ta n-tikutawen hät ehän n-ämudd wa mäqqärän, innä: «Emäli Mässinäx-i ilän tärna iket-net, äššärexatän-näk, tidət, oɣadän iket-däx-näsän.»

⁸ Issänxäl darät-a-wen änjälos wa s-əkkoz alkas-net fäll-täfuht, tøjraw täfuht turhajät n-ad-sökkönönöwöt e d t-illäm ägg-adöm s-tuköse-net.

⁹ Ad-siknönönöwöt tuköse-i-däx mäqqärät dd-ja täfuht dägg-adöm. Hakd a-wen-däx, gaggärän dägg-adöm Mässinäx-i ittafan älmäşşibatän-en, unjäyän s-ad-utabän i-ad-sömyärän Mässinäx.

¹⁰ Issänxäl änjälos wa s-səmmos alkas-net fäll-tasäqqaymut n-təmmönukəla ta n-ämudär. Ija a-wen xas, jänät tihay fäll-lamu-net iket-net. Tärmäs tissant-i-däx mäqqärät dägg-adöm har dd-əqqälän xas təddadän ilsawän-näsän,

¹¹ gaggärän Mässinäx-i ihän išönnawän däx-tössəba n-tissant-näsän d-tikussawen ti sär-sän dd-oräw mäšan, hakd a-wen-däx, wär sär-sän dd-orew a-wen tätubt däx-erk imojjan-näsän.

¹² Issänxäl ämära änjälos wa s-sädis alkas-net fäll-əjärew wa mäqqärän s-itawänna Ifräyti; äqqur-in əjärew-en; əjräwän imänokalän wi dd-fälnen emäynäj zäbo, okäyän.

¹³ Darät-a-wen, ənhäyäx kärađ unfasän ämmiđäsnen olähnen d-ijäran dd-əzjarnen emm n-äxata d-emm n-ämudär d-emm n-ännäbi wa n-änäsba.

¹⁴ A-wen, unfasän n-alšinän wi tajjänen älmät a olähän d-ijitän n-Mässinäx; əkkän imänokalän n-äkall iket-net i-ad-tän dd-sədəwən i-aşäl wa n-amjär wa mäqqärän n-Mässinäx-i ilän tärna.

¹⁵ Innä Emäli: «Ənhəywät, äqqaläx-käwän-in şund emäkräđ; təndəđ i-ere wa ogäzän iman-net däx-uzəf, ad-irjəş wär tätwänhäy täkrakiđt-net.»

¹⁶ Äsdäwän-dd unfasän ənnin n-kärađ imänokalän n-äkall s-edägg wa s-itawänna däx-Ÿäbranəyya: «Ärmagidun.»

¹⁷ Issänxäl älwäqq-wen änjälos wa s-əssa alkas-net däx-älhəwa, ija a-wen xas, izjär-dd emäşli äşsoohen tasäqqaymut ta n-təmmönukəla hät ehän n-ämudd wa mäqqärän; innä emäşli-en: «A-wa ijän, ijä, isälan əmdän.»

¹⁸ Jän essamän d-imäşlan, d-əjjajän, ijä äkall aşkəđkəđ ässuksäđän s-a dd-iwär ägg-adöm ärori n-äkall-däx, wär käla ija-i dār-s olähän.

¹⁹ Ij' aŗrəm wa mäqqärän kärađät tirəzz, ođän iŗarman n-e d t-illäm əddəwəl; wär hin-ittəwa Mässinäx aŗrəm wa mäqqärän s-itawänna Bābilun; äşşodä-dd ađkär-net fäll-imuzäxän-net şund a-s asməd a əşwan käl-äkall-en, ikkäs däx-sän ənniyät. Issəw'-e ənta əlxəməŗ wa ihän alkas-net, a-wen a t-ämoosän, asməd n-ađkär-net wa ojarän.

²⁰ Əşän aman ikallän wi hänen iwtəlän, äbas t-illa a dd-äzzinjäzän;

²¹ ođän-dd ijidräşän şuharnen fäll-dägg-adöm, ad-sikuförän däx-tössəba n-älmäşşibat wa n-ijidräşän fäl-a-s älmäşşibat-en, ija təsəmmə n-tikunen.

17

Isälan n-tamäđt ta n-tälkäxbat d-ämudär

¹ Ija a-wen-däx xas, inn'-ahi iyyän däx-əssa änjälosän wi əttafnen əssa alkasän: «Əyyäw, ad-käy-säknäx äddäyyät wa he-iđəwän fäll-tälkäxbat ta mäqqärät. Tälkäxbat-i-hi, ənta a-s aŗrəm wa mäqqärän idäyän fäll-asälim n-əjärew wa səmmän.

² Tälkäxbat daŗ ta-däx, ohärän dār-s imänokalän n-äkall əlkäxbu-net, əşwän daŗ imuzäxän n-äkall iket-näsän däx-asməd n-əlkäxbu-net, ikkäs däx-sän a-wen ənniyät.»

³ Irmäs-ahi Unfas Šaddijän, izzəwät-ahi s-tenere tiyyät. Ənhäyäx dihen tamädt täqqimät fäll-ämudär šaggäxän fäll-əktabän ismawän gaggärnen Mässinäx, ila daḡ əssa iḡäfawän d-märaw iskawän.

⁴ Tamädt-ənnin ənta, təlsa isəlsa šaggaynen lanen əlqim, təsisahäx ašäl s-uḡnawän n-oräx d-tikädäyen ti n-tilällaten länen əlqim d-timäxwanen. Təttaf dəx-äfuss-net alkas n-oräx idkarän tilušawen d-a-wa xəramän dd-oraw a-wa təməšäl dəx-əlkäxbu-net.

⁵ Timme-net, iktab fälla-s isəm s-ättunkäl əlmäxna-net. Ənta da a-wa fälla-s iktäbän:

«A-wa Babilun
ta mäqqärät n-ma-s n-tälkäxbaten
d-tilušawen n-əddunya.»

⁶ Ənhäyäx a-s tamädt-i-däx, ikkäs dəx-s ašni n-iməššeddəjän d-tijuhawen n-ḡisa wa təswa ənniyät. Ənhäyäx tamädt ənnin ḡas, iqqän eḡäf-in.

⁷ Inn'-ahi ənjəlos əlwäqq-wen: «Ma iqqanän eḡäf-näk? Ad-hak-əlläḡey əlmäxna n-əddäraj n-tamädt d-ämudär wa näy ilän əssa iḡäfawän d-märaw iskawän.

⁸ Ämudär wa hannäyäd, kälä iddär mäšan, äbas iddar, ila s-ad-dd-izjär anu wa wärän ila ider ihän əlaxärät, ijješ edägg wa n-eheḡ-net. Äddinät wi s-wär-əktesbän ismawän-näsän dəx-əlkəttab wa n-tämudre ḡur-aləšäl n-əddunya afäl ənhäyän ämudär-ənnin-däx, ad-tän-tärməs təkunt fäl-a-s ämudär-i-hi, kälä iddär, ämmut mäšan, ilkam ad-dd-iddär daḡ.»

⁹ Edägg-wa-däx, änihäjja d-təla n-tayətə d-särho. Iḡäfawän n-ämudär wi n-əssa a-s əssayät tiḡayen ti fäll-täqqima tamädt,

¹⁰ əssa iḡäfawän-winnin-hi, əssa imänokalän; ämmun səmmos dəx-sän, iyyän dəx-sän ixkam härwa; wa s-əssa, wär dd-osa härwa mäšan, afäl dd-osa, wär-e äj ar əssaḡät əndärrän dəx-təmmənukəla.

¹¹ Ämudär wa s-kälä t-illa, äba, ənta a-s ämänokal wa s-əttam; ənta-i hi, eheḡ-net ḡas a-s oḡad.

¹² Märaw iskawän wi tənähäyäd, əntäneḡ a-s märaw imänokalän wären əney härwa mäšan, hak iyyän dəx-sän dəx, ad-äj äzzäman n-təmmənukəla əndärrän ənta d-ämudär

¹³ fäl-a-s märaw imänokalän-i-hi, oharän ittus, ärhan ad-säxdəmän äššahät-näsän d-əlxəkum-näsän i-ämudär.

¹⁴ Ad-əbdədän iket-däx-näsän, əknəsän Ašəḡol mäšan, ad-tän-ärn ed ənta a-s Emäli n-imälän d-Ämänokal n-imänokalän; ad-tän-ärn ənta d-wi dd-iḡra s-iman-net, əsnäfrän n-imayḡdalän.

¹⁵ Inn'-ahi ənjəlos daḡ: «Aman wi tənähäyäd təbdad tälkäxbat edeshasän, aman-en-däx a-s härät dəx-tumasen d-timəttawen tiyyäd d-əddəwəlän iyyäd d-awalän iyyäd.

¹⁶ Ämära, märaw iskawän wi tənähäyäd, ilkam ad-aḡənän aḡkär i-tälkäxbat əntäneḡ d-ämudär, ad-däx-s ahəḡän a-wa la iket-net, əzzəfän-tät, äḡrəsän-as, əkšən isan-net, säryən a-wa dd-ijläšän dəx-s

¹⁷ fäl-a-s ija Mässinäx dəx-ulhawän-näsän erhet n-ad-ämašälän ittus-net; ad-ännəfhämän fäl ad-särtəyän tədabit ta tän-təkfa təmmənukəla-näsän, äxdəmän sär-s erhet n-ämudär har itbət mäjräd n-Mässinäx iket-net.

¹⁸ Ḋarät-a-wen daḡ, tamädt ta tənähäyäd, ənta a-s ayḡrəm wa mäqqärän ännihädän dəx-imänokalän n-əkall iket-net.»

18

Ejädäl n-Babilun ta mäqqärät

¹ Ɖarät härätän-win-däx, ənhäyäx ənjəlos iyyän a-s dd-əzzubbät išənnawän. Ənjəlos-en, eməşsehi n-tikunen a əmoos, əsmäləwlaw s-ənnur-net əkall iket-net.

² İdkäl eməsli-net s-afälla, innä:

«Tođä, ya tođä,

Babilun ta məqqärät tođä!

Əbas təqqal əməra-däx ar edəgg əzzayän əlsinän,

tähala n-inəmmədəsän,

tähənzabbut n-igdađ wi əmmədəsnen

d-imudärän wi əmmidəsnen əsjäləlhäyenen.

³ Əddəwəlän iket-däx-nəsän a əswänen däx-asməd n-əlkəxbu-net wa wärän ila eket. İmənokalän n-əkall iket-net ohärän dər-s əlkəxbu-net. Ättužzar n-əkall iket-däx-nəsän, ärzəxän däx-ilalän-net wi s-wär t-illa a dər-olähän tihusay wəla nefran.»

⁴ Oləsəx dađ məsällät n-eməsli dd-ifalän išənnawän innän:

«Əddinät-in, əzjərät-dd ammas n-əxrəm-wa-däx

i-ad-wär dər-s toherəm ibəkkədən-net,

särtəyän-kəwän dər-s əlməşşibatän wi fälla-s e-ıdunen,

⁵ fäl-a-s ibəkkədən-net, timtulun har əwwədən išənnawän. Məssinəx dađ, wär hin-ittəwa erk imojjan-net.

⁶ Əjät-as a-wa tēja i-əddinät wi iyyədənen, əxşədät-as anədəfus n-a-wa təxşäd; sənnədəfəsät-as əşşahät n-alkas-net n-asməd wa təssəswə tamətte.

⁷ Səknät-tät əlyizabät d-ağəna ogdähnen d-əlxurmät d-tənoflayt ta təkfä iman-net ənta-i jənnət däx-iman-net: «Nəkk, təmənokalt a əmoosəx, wär heç mişi n-ad-iba əhaləs-in, wär-ilkem dađ ad-əqqaləx tənudəft.»

⁸ A-wen-däx a fäl əlməşşibatän wi has-ətwarənen, ad-fälla-s dd-əjən iyyän n-ejədəl däx-iyyän n-aşäl, tiđəw-dd fälla-s taməttant d-tähala d-laz, əks-et efew fäl-a-s Eməli-i tät-e-ısrəxän, ila tərna.»

⁹ Əlwəqq-wen, ad-əlhən imənokalän n-əkall wi dər-s ohärən əlkəxbu-net d-tənoflayt-net, ad-səkkələlän fälla-s afäl ənhäyän əho n-efew wa tät-itattän ikk' išənnawän,

¹⁰ ad-əbdədän iməmokalän-ənnin-däx ijəj fäl tüksəda n-ad-tän-irməs əlməşşibat wa ođän fäll-əxrəm. Əbdədän dihen, ad-jannen:

«Xəxx-däx, unhh xəxx-däx!

Axrəm-nənəx Babilun,

Babilun wa məqqärän əşsoohen,

a-wa şəxnet, əşşərəxa-net,

wär dd-okey iyyän n-əssağät.»

¹¹ Ättužzar n-əkall, ad-əlhən əntəneđ-däx, ətəfän iba n-əxrəm wa n-Babilun ed əbas t-illa ere izžənşän ilalän-nəsän.

¹² Orəx-nəsän d-azrəf d-tikədəyən ti n-tiləllaten d-timəxwanen d-əlxärerän-nəsän d-tabduyt ta şəggəğät təsməxməğät lät əlqim, d-e d t-illəm ənnux ihan isəyerän wi s-wär räqqis ajəraw-nəsän d-e d t-illəm ənnux n-tähore jat s-isənän n-elwan meç däx-ihəşkan n-ađutän meç däx-daroç meç däx-təzoli meç däx-əlhor

¹³ d-əlxənfärän d-izədəraz wi iyyədənen d-ađutän d-tələdət d-matəlxeer d-asməd d-əzzəyt d-əjel n-əlkəma d-iwan d-tihatten d-ibəjwan d-turfen ti n-amjər d-eklan d-wəla iman n-əddinät.

¹⁴ Ad-əj a-wen-däx iket-net, ad-itawənna däx-Babilun: «Xəxx, unhh, xəxx-däx! Härätän wi s-kəla tən-təkned tərha iket-nəsän əbə-tän fälla-m, ärrezəx-nəm d-tənoflayt iket-net, ad-t-iba fälla-m, wär-ilkem dađ ad-tən-tolasəd ajəraw.

¹⁵ Ättužžar day wi ärzäynen s-mamäla wa s-käla t-əjän däḡ-aḡrəm, ad-has-əbdadän däḡ-ijəj fäl tuksəda n-ad-fälla-sän idəw älmäššibät wa oḡän fäll-aḡrəm, ad-hallän, əṭṭafän iba.

¹⁶ Jannen:

<Xäxx-däḡ,
unhh, xäxx-däḡ,
aḡrəm-nänäḡ wa mäqqārän irza;
käla ilsa imälsan n-älxärir əknanen tələmḡe
d-mäšär ijan təšuxə ta täsmäḡmäḡät
iknan təla n-älqim,
ija uḡnawän n-oräḡ d-tikädäyen ti n-tilällaten
d-timäḡwanen.>

¹⁷ Ƴas ehäre ogdähän d-wa-däḡ iket-net, äsbät-t-in fälla-m iyyän n-ässaxät. Äddinät day iket-näsän wi šašalnen turfen ti n-aman d-iməssukal wi tiwəyən däḡ-turfen-näsän, d-wi xaddämnen däḡ-turfen-näsän d-wi əddarnen s-a-wa dd-izajjārän ejärew iket-net, əbdadän iket-näsän däḡ-ijəj,

¹⁸ əkyadän däḡ-äho n-aḡrəm wa däḡ-irḡa efew, jannen: <Wär käla t-imäl aḡrəm ogdähän d-wa-däḡ təmḡäre.>

¹⁹ Ad-sawarän äkall iḡäfawän-näsän, hallän, širšun, əṭṭafän iba, jannen:

<Xäxx,
unhh xäxx-däḡ Babilun!
Aḡrəm wa mäqqārän,
ärrəzäḡ-net a däḡ-razzäḡän
äddinät iket-näsän wi länen turfen
ärjäšnen fäll-ejärew mäšan,
a-wen-däḡ iket-net,
äsbät-in fälla-m iyyän n-ässaxät.>

²⁰ Ya käl-išənnawän, däwätät däḡ-təssəba n-a-wa s-Babilun, toḡä, təhläk. Täddäwätet tamətte ta n-iməššeddəjän n-Mässinäḡ d-inəmmušal d-ännäbitän fäl-a-s, iḡäl däḡ-s Mässinäḡ terwidəma ta käwän-təssəkna.»

²¹ Irmäs älwäqq-wen änjälos äššoohen təhünt ta mäqqārät tolähät d-ta fäll-itəzzad älkäma, ijär-tät-in däḡ-ejärew, innä:

«Əmmək-wa-däḡ
a-s hin-e-itwəjār aḡrəm
wa n-Babilun mäqqārän s-äššahät,
iba-t-in s-iyyät,
wär-ilkem ad-ätiwänhäy.

²² Wär-ilkem ad-däḡ-s ija emäsl
n-iməwatän n-tihärdänen d-imänzarän
d-iməwatän n-tiḡnab d-tisinsäyen.
Wär-ilkem, ad-dd-ätiwäjräw
däḡ-ammäs-näk, amähhäraw wäl' iyyän,
wär-ilkem ad-ḡur-k ätiwäsla
emäsl n-ere itəzzadän älkäma.

²³ Wär-ilkem ad-däḡ-s tärḡa tefätelt,
wäla ad-däḡ-s əndawän imazlayän eḡäri.
Ättužžar-näk, əntäneḡ a-s käla
ojärän ärrəzäḡ däḡ-äddunya,
təššəškäd timəttawen iket-näsnät
s-išäḡawän-näk.»

²⁴ Babilun ənta, a däḡ-inḡäl ašni n-ännäbitän
d-iməššeddəjän d-ašni n-äddinät iket-näsän

wi ätwäyräsnen fäll-ärori n-äkall.

19

Tärna ta ija Ašäxol d-azli wa ilkämän dāx-išənnawän

¹ Darät-a-wen-dāx, əsleχ i-eməsli əšsoohen dāx-išənnawän olähän d-i n-tamətte təknať əjut, jannet:

«Aleluya!

Aməlat Mässināχ,
əlxəllas d-semχar d-tärna,
i n-Mässināχ.

² Äššäreχatän-net, ädduutten, oχadän. Ässođa äššäreχatän-net fäll-tamədt ta n-tälkäxbat mäqqärät samađasät äddinät; äzzäl-tät taməttant n-inaxdimän-net.»

³ Tənnä tamətte-ənnin-dāx: «Aleluya! Aməlat Emäli fäl-a-s äho n-aχrəm wa mäqqärän irχän ähoha s-išənnawän härkuk, wär-ilkem ad-ämmikät.»

⁴ Imda a-wen χas, ärkäχän imχarän wi n-sänatät timərwen d-əkkoz d-härätän wi n-əkkoz əddärnen dat-Mässināχ-i äqqiimän fäll-tasäqqaymut ta n-təmmənukəla, äχbädän-t, jannen:

«Amin!

Aleluya!»

⁵ Innä eməsli dd-ifalän tasäqqaymut ta n-təmmənukəla darät-a-wen: «Aməlat Mässināχ iket-nāwän käwəneđ-i n-eklan-net; käwəneđ-i n-imaksadän-net, wi mäđroynen hakd wi əššämnen.»

⁶ Əsleχ darät-a-wen i-eməsli iyyän olähän d-i n-tamətte təknať əjut, eməsli-net, oläh d-i n-anji iknan təmχäre meχ d-ejjajän əknanen əşşuhu. Ənta da a-wa ijänna eməsli-en:

«Aleluya!

Aməlat Emäli
fäl-a-s Mässināχ-i n-Emäli-nänāχ,
ila tärna iket-net,
issətbät Təmmənəya-net.

⁷ Dəwätät-anāχ, əjrāznet-anāχ iman-nänāχ, nəsemχäret-t fäl-a-s, ämära-dāχ, azli wa n-Ašäxol a dd-iwwədän, hänne-s daχ täsidəw-as.

⁸ Təjrāw asälso n-azli izmayän dāχ-məšär n-älxärir iknan tələmđe, äsiimāχmäχ, šəddiij; məšär-ənnin n-älxärir, ənta a-s imärkedän wi ämešälän iməššeddəjän n-Mässināχ.»

⁹ Inn'-ahi ənjälos ämära ad-əktəbāχ: «Təndəđ i-äddinät wi dd-e-ətwäχrənen s-aməjaru wa he-ijən asäl wa n-azli n-Ašäxol.» Oläs daχ, inn'-ahi: «Mäjräd-wa-dāχ, Mässināχ iman-net a dd-ifal; wär t-ih' äššäk a-wen.»

¹⁰ Ärkäχāχ dat-ənjälos dāχ-ənniyät n-ad-t-äχbədäχ məšan, inn'-ahi: «Ahaa, wär jed a-di. Akli n-Mässināχ dər-k olähän a ämoosāχ näkk d-ayətma-k wi äχdälneñ i-tidət ta dd-äsnäfaläl Yisa. Äχbəd Mässināχ, wär hi-täχbedäd.»

Tidət daχ ta dd-äsnäfaläl Yisa, ənta a dd-ässawədän ännäbitän.

Tärna n-Älmaseχ

¹¹ Ənhäyāχ darät-a-wen išənnawän ämerän, izjār-tän-dd ebäje mällän. Inay-t ähaləs s-isəm-net: «Ämaχdal d-emän n-tidət.» Wär-iššärrāχ ar s-iqqud, wär-ikənnəs ar s-iqqud.

¹² Ähijäljälneñ tiťtawen-net šund efew; eχäf-net, warnät tikənbuten ti n-təmmənukəla, iktab fälla-s isəm s-ənta χas a t-issanän.

¹³ Ilsa abärnuš ilmaχän dāχ-ašni, isəm-net: «Mäjräd n-Mässināχ.»

¹⁴ Elkamän-as ɔlyəskärän wi n-išənnawän nayän ibəjwan mällolnen, ɔlsan timälsaten n-älxärir mällolnen, šaddijnen, əknanen tɔləmde.

¹⁵ Emm-net, təzjar-t-dd təkoba təmsädät s-ənta-en-däx a-s mad-iwət əddəwəlän, ärn'-en. Ad-fälla-sän ixkəm s-əşşahät olähän d-wa n-təzoli; ad-däx-sän dd-ikkəs Mässinäx-i ilän tärna iket-net ađkär-net wa mäqqärän s-əmmək wa s-ižimməw əwadəm ara n-läxnäb i-ad-däx-s dd-ikkəs aman-net.

¹⁶ Abärnuš-net d-tayma-net, iktab fälla-sän:

«AMÄNOKAL N-IMÄNOKALÄN,
EMÄLI N-IMÄLAN».

Elhəllak n-išənja

¹⁷ Ənhäyäx dərat-a-wen änjəlos ibdadän dəx-təfukt, əşxärät s-afälla i-igdađ iket-näsän wi taggädnen dəx-älhəwa wa ujejän, inn'-asän: «Idawät-dd i-aməjaru wa mäqqärän n-Mässinäx.

¹⁸ Əyyäwät, äksät isan n-imänokalän d-isän n-imizärän n-ɔlyəskär d-isän n-ɔlyəskär d-isän n-ibəjwan d-wi n-əddinät wi tän-näynen, isan n-əddinät a əmoosän-däx, wi n-iləllan hakd wi n-eklan, isan n-wi mədroynen hakd wi əşšämnen.»

¹⁹ Ənhäyäx əlwəqq-wen əmudär wa əzzarän d-imänokalän n-əkall d-ɔlyəskärän-näsän, əddewän-dd i-ad-əknəsän əhaləs wa inäyän ebəje d-ɔlyəskär-net.

²⁰ İttärmäs əmudär iman-net s-tizarät, ittärmäs-dd dəra-s ännäbi wa n-bahu ijan a olähän d-ijitän n-Mässinäx dat-əmudär i-ad sār-sän işəšk əddinät wi iwär azəzlo wa n-əmudär əxbädnen ättəşwer-net. Ətwəjār-in əmudär d-ännäbi wa n-bahu dəx-tebänxəwt n-əlkəbrit əhijäljälän.

²¹ Tənxa təkoba ta dd-təzjərät emm n-əhaləs wa inäyän ebəje ɔlyəskär-näsän iket-net, əyyəwänän igdađ dərat-a-wen dəx-timəxsa-näsän.

20

Efəđ n-awätay wa n-Təmmənəya

¹ Ənhäyäx dərat-a-wen änjəlos iyyän dd-ifalän işənnawän ittaf dəx-əfuss-net asəyar n-anu wa wärän ila ider ihän žohännäma d-esässär əzzayän.

² İrmäs-dd əyata wa mäqqärän, a-wen əşşäl wa n-ibda s-ənta a-s İblis d-Əşşäytan, ikräd-t i-ad-əj efəđ n-awätay ikrad

³ təzzar, ijär-t-in dəx-anu wa wärän ila ider ihän žohännäma, ättubbät-t-in fälla-s i-ad-əbas ilkam ad-əşşiška əyata əddəwəlän har akəy efəđ n-awätay-ənnin-däx təzzar, əmar-dd i-härät n-əzzäman əndərrän.

⁴ Dərat-a-wen, ənhäyäx tisəqqima n-təmmənukəla, əjrəwän əddinät wi fälla-snät əqqimnen turhajät n-ad-əxtəsän əşşərəxa. Ənhäyäx dəx iman n-əddinät wi s-hin-əttəfräsän ixfawän-näsän dəx-təssəba n-immun wa jän s-tidət ta dd-əsnəfaläl Yisa d-təna ta n-Mässinäx. Wār-əxbedän əmudär, wəla əşşänəm-net, wār-iwer dəx azəzlo-net timmawen-näsän wəla ifassän-näsän. Ənkärän-dd dəx inəmmuttan, ohärän d-Əlmasex Təmmənəya har okəy efəđ n-awätay.

⁵ Wār dd-ənkərän inəmmuttan wi iyyädnen har okəy efəđ n-awätay-wənnin-däx. Wi s-dd-ənkärän iman-näsän jer-inəmmuttan, jän-dd s-a-wen-däx tanəkra ta s-itawänna ta təzzarät.

⁶ Təndəd i-əddinät wi hənən tanəkra-ten-däx təzzarät. İşşəşdəj-tän Mässinäx, ikräş-tän, ad-əbas fälla-sän la taməttant ta s-sənətät tärna;

ad-umasän käl-tikutawen i-Mässinäx d-Älmasex, ahөрөн d-Älmasex Tөmmөнөya дәx-efäđ n-awätay-wen-däx.

Ilhөllak n-Iblis d-ajhanän-net

⁷ Afäl okäy efäđ n-awätay-wen-däx, ad-dd-ämar Iblis, izjär-dd takärmüt-net;

⁸ dihen, ad-iglөw i-ad-äkkärräs өddөwөлän wi wärnen täkost n-äkall. Eddөwөлän-en-hi, isөm-näsän: Žuž d-Mäxžuž. Ad-tän-dd-isөdөw iket-näsän i-amjär har өjön өjut-wa-däx jänät tiblalen n-äkall ti өnsanen дәx-tarrayt n-өjärew wa sömmän,

⁹ өlsän ärori n-äkall iket-net, wätän-dd afäraj i-imөššeddөjän n-Mässinäx d-aхrөm wa ikna tärho. Han a-wen-däx a-s dd-ifäl efew isөnnawän, ilhäs-tän, issärxa ajhanän n-өddөwөлän wi has-өlkämnen.

¹⁰ Älwäqq-wen, ittärmäs Iblis-i isäsken tamөtte, ätwäjär-in дәx-tebänyäwt n-өlkäbrit tähijäljälät ta ih' ämudär d-ännäbi wa n-bahu; ad-tirkөtrөkitän dihen ehäđ d-ašäl.

Ašäl wa n-tebädde

¹¹ Enhäyäx darät-a-wen tasäqqaymut n-tөmmөнukөla mäqqärät mällät d-ere wa fälla-s äqqiimän, äffoqqen-as isөnnawän d-äkall, wär-olesän atwөnhөy.

¹² Enhäyäx day inөmmuttan wi mädroynen hakd wi өššämnen өbdadän iket-däx-näsän dat-tasäqqaymut ta n-tөmmөнukөla, ämerän өlkөttabän, ämera day өlkөttab iyyän s-edes, өlkөttab-en, өnta a-s өlkөttab wa n-tämudre. Ätwäšräxän inөmmuttan s-iyyän-iyyän s-a-wa ämešälän iktabän дәx-өlkөttabän.

¹³ Ibsä-dd өjärew wa sömmän äddinät wi ikša, täsoxäl-dd tamättant d-älaxärät a-wa hin-өlmäzän дәx-äddinät, ätwäšräxän iket-näsän s-iyyän-iyyän s-a-wa ämešälän.

¹⁴ Tөttärmäs-dd tamättant d-älaxärät, ätwäjärän-in дәx-ebäny wa n-efew. Tamättant-ten-däx tiwөyät äwadөm s-edägg-wen-däx a-s tamättant ta s-sänatät.

¹⁵ Ere s-wär-ittөjräw isөm-net дәx-өlkөttab wa n-tämudre iket-net, ätwäjär-in дәx-ebäny wa n-efew.

21

Išөnnawän äynaynen, äkall äynayän

¹ Enhäyäx darät-a-wen isөnnawän äynaynen d-äkall äynayän. Äb' isөnnawän wi äräwnen, äba day äkall wa äräwän, äb'-in day өjärew wa sömmän.

² Enhäyäx darät-a-wen aхrөm wa äynayän šäddijän n-Yärussälam dd-äzizäbbät Mässinäx, ifal-dd isөnnawän. Aхrөm wa өnhäyäx, äsisahäx ašäl šund tämazlayt dd-tөzlayät s-ähalөs-net.

³ Esley älwäqq-wen i-emäsli äšsoohen dd-ifalän tasäqqaymut ta n-Tөmmөнөya, innä: «Edägg wa n-Mässinäx šäddijän a-wa; Mässinäx, izzäx-dd ämära tamөtte, mäł-dd tamөzzuyt n-Mässinäx jer-tamөtte-net.

⁴ Ad-hin-irsөy imөttawän-näsän, iba tamättant, iba uđөf n-iba; iba tahäla; iba tissant fäl-a-s, ädduuttät a-s a-wa n-ibda äräwän, ibbөdäy, ijөwäy.»

⁵ Innä älwäqq-wen wa äqqiimän fäll-tasäqqaymut ta n-tөmmөнukөla: «Ämära, härät iket-net, ad-iynay.» Inn'-ahi darät-a-wen: «Ektөb a-wen ed mäjräd-wa-däx, oxad, ädduuttät.»

6 Oläs day, inn'ahi: «Isälan, ömdän! Näkk a-s Tizarät, näkk a-s Tilkamät,† näkk a-s Sānto, näkk a-s Sāmdo; ere äffudän-däx, ad-t-säswäx bännan däx-aman n-erəs wi hakkänen tämudre ta n-tidət.

7 Ere irnän-däx, ad-has-äjäx älhäk wa n-ad-has-umasäx Mässinäx, umas rure-x

8 mäšan, däx-isälan n-imöjjiwad d-wi wären la älxal d-wi n-imökkərukad d-imäjjan n-iman d-inämašrayän d-imäššäxawän d-imäššanämän, öntäneđ, edägg-näsän zöhännäma, a-wen tebänxawt ta n-ölkäbrit s-härkuk ähijäljäl; önta-den-däx a-wa ämoosän: tamättant ta s-sānatät.»

Yārussālam ta täynayät

9 Inn'ahi iyyän däx-änjālosän wi n-össa s-kāla öttāfän össa alkalasän wi öđkärnen össa älmäššibatän wi öšräynen: «Hyäw, ad-käy-säknäx tämazlayt ta n-hänne-s n-Ašäxol.»

10 Irmäs-ahi Unfas Šaddijän, izzəwät-ahi änjālos s-afälla n-ađax iknan ađkul, issəkn'-ahi Yārussālam ta täynayät, šaddijät dd-äzzäbbät Mässinäx təfal-dd išənnawän,

11 äsisämäxmäx-tät ännur n-Mässinäx, ja asmäxmäx wa täjj tamäxwant däx-ti n-tilällaten, šund tekädäyt ta n-žasəb s-täddobed ad-sär-s tənheyäd iman-näk šund täšoka.

12 Änhäyäx äxalla-net ikna təššəjrət, ila märawät tishar d-sānatät, hak emm-däx, oğaz-t änjālos iyyän. Tishar-ənnin, öktabän fälla-snät ismawän n-märawät tiwsaten d-sānatät ti n-Išrayil.

13 Hak tamdujt-däx, ənnađnät sär-s kərađät tishar: kərađät s-emäynäj, kərađät s-afälla, kərađät s-ajus, kərađät s-atāram.

14 Äxalla-i-hi, ässas-net, iday s-märawät tihun d-sānatät s-hak iyyät-däx, iktab fälla-s isəm n-iyän däx-inəmmušal wi n-märaw d-össin n-Ašäxol.

15 İttaf änjālos wa hi-imməjrädän taskət n-oräx s-itəkkat ayxəm d-tishar-net d-äxalla-net.

16 Ayxəm-ənnin, ärribäx, oğdähän išrutän-net iket-däx-näsän. İkät änjālos ayxəm s-täborit-net, os'-e, išrutän-net ikkəzän, oğdähän, hak iyyän däx-sän ikat əssin afdän n-kelumetar d-sānatät timađ d-sānatät timərwən, a-wen-däx day a dər-togdäh tebädde-net.

17 İkät day äxalla, os'-e tebädde-net, teməde n-axil d-ökkozät timərwən d-ökkoz s-taskət ta s-itəkkat.

18 Äxalla, ikna s-tähunt ta n-telällit s-itawänna žasəb, ayxəm iman-net iday s-oräx šaddijän, oräx-en day, äddoobät äwadəm ad-sär-s inhöy iman-net šund täšoka fäl asmäxmäx-i-däx ija.

19 Tihun ti n-ässas n-äxalla n-ayxəm, ədlajnät s-ännux n-tihun ti n-tilällaten länen äłqim iket-näsnät: tähunt ta täzzarät, təkna däx-tähunt ta n-telällit s-itawänna žasəb; ta s-sānatät, təkna däx-ta s-itawänna safir; ta s-kərađät təkna däx-ta s-itawänna zakkät; ta s-ökkozät, təkna däx-ta s-itawänna amərod;

20 ta s-səmmosät, təkna däx-ta s-itawänna onikəs; ta s-sädisät, təkna däx-ta s-itawänna sarədwän; ta s-əssayät, təkna däx-ta s-itawänna kərzolit; ta s-əttamät, təkna däx-ta s-itawänna beril; ta s-təzzayät, təkna däx-ta s-itawänna tobaz; ta s-märawät, təkna däx-ta s-itawänna, kərizobəraz; ta s-märawät d-iyät, təkna däx-ta s-itawänna, tirkəwaz; ta s-märawät d-sānatät, təkna däx-ta s-itawänna, amatist.

† 21:6 21:6 Däx-Tälyunanit, itawänna i-Tizarät: Älfa, itawänna i-Tilkamät: Omega.

21 Hak tashärt-däx-tin-däx n-märawät d-sänatät, tamäywant; hak tashärt-däx, tēddas s-ännuḡ n-tamäywant iyyän. Tišarriten n-aḡrēm-wa-däx, əknanät s-oräḡ s-äddoobät äwadəm ad-sär-s inhöy iman-net šund täšoka.

22 Aḡrēm-i-hi, wär däx-s ənheyäḡ ehän n-ämudd wa mäqqārän fäl-a-s Emäli Mässinäḡ-i ilän tärna iket-net d-Ašäḡol a-s ehän n-ämudd-net.

23 Wär-ämḡatär aḡrēm s-täfukt wäla s-ewär i-ad-sär-sän inhöy äwadəm fäl-a-s, äsimäläwläw-t älxurmät n-Mässinäḡ. Ašäḡol iman-net a-s, tefätelt-net.

24 Ännur-net a-s ärjašän əddəwəlän, Mässinäḡ a-s dd-tiwöyän sär-s imänokalän tirəzzaḡ-näsän d-semḡar-näsän.

25 Tishar n-aḡrēm, ad-ämēränät ašäl iket-net, wär-ilkem fäw ad-äḡfalnät ed, wär-ilkem ad-fälla-s ija ehäḍ.

26 Ad-sär-s dd-awöyän əddəwəlän a-wa län ähusken d-tirəzzaḡ-näsän d-semḡar-näsän

27 mäšan, aḡrēm-i-däx, wär t-dd-e-ijjəš enämmäḍäs wäla ere əšlanät tilušawen wäla änäsbaḡ; wär t-dd-e-ijjəš ḡas ar äddinät wi s-əktäbän ismawän-näsän däx-əlkəttab wa n-tämudre-i s-ənta a-s əlkəttab wa n-Ašäḡol.

22

1 Darät-a-wen-däx, issəkn'-ahi daḡ änjälos ejärew n-aman wi n-tämudre, a-wen aman šaddiijnen, äsimäḡmäḡän šund täšoka. Ejärew-wa-däx, iffay-dd däx-tasäqqaymut ta n-təmmənukəla n-Mässinäḡ d-Ašäḡol.

2 Injay s-edägg n-aḡrēm wa däx-tazämmaḡän äddinät. Hak asälim n-ejärew-en, idwal fälla-s ahəšk wa n-tämudre itirəwän märaw ihändäggan däx-awätay d-əssin, hak ewär-däx, ija tirwe täynayät. Ifärketän-net a isasäfarän i-äddunya, təzzöy.

3 Aḡrēm-wa-däx, wär-ilkem ad-däx-s ättijräw ere äsibännän Mässinäḡ. Tasäqqaymut n-təmmənukəla n-Mässinäḡ d-Ašäḡol a ihan aḡrēm-ənnin-däx; aḡrēm-en-däx daḡ, a däx-t-e-ḡabbädän eklan-net,

4 ənhöyän idəm-net ed iktab isəm-net fäll-timmawen-näsän.

5 Wär-ilkem ad-däx-s ij' ehäḍ, wär-ilkem ad-ämḡatär äwadəm s-efew n-tefätelt, wäla s-ännur n-täfukt fäl-a-s, ad-fälla-sän isəssəməḡmäḡ Emäli Mässinäḡ ännur-net, əṭṭəfän Təmmənöya härkuk.

Təmmənöya n-Älmasex ta täylälät

6 Oläs daḡ änjälos, inn'-ahi: «Isälan-wi-däx, ädduutten, änihäjjän d-tafləst. Emäli Mässinäḡ-i isamäjrädän ännäbitän, ənta a dd-äšmašälän änjälos-net i-ad-älläḡät i-eklan-net a-wa s-išwar ija.»

7 Ḳisa, innä: «A əndärrän ḡas, oseḡ-käwän. Təndəd i-ere wa äqqiimän äsijäd i-härätän wi s-ənnän ännäbitän, əktäbän-tän däx-əlkəttab-wa-däx.»

8 Ämära-hi, näkk Exya, härätän-wi-däx, əsleḡ-asän, ənhäyäḡ-tän. Darät a-s tän-ənhayäḡ, d-a-s hasän-əsleḡ, ärkäḡäḡ dat-änjälos wa hi-tän-issəknän i-ad-t-äḡbədäḡ

9 mäšan, inn'-ahi: «Ahaa! Wär jed a-di, näkk akli šund käyy a ämoosäḡ, näkk d-ayətma-k wi n-ännäbitän d-ere omanän s-mäjräd n-əlkəttab-i-däx iket-net, Mässinäḡ ḡas a-s käy-iwar äḡyibadät-net.»

10 Inn'-ahi ḍarät-a-wen: «Wär төfferäd iməjridän wi issəlmäd Mässinäḡ inəmmušal-net, əktäbän-tän däx-əlkəttab-wa-däx ed a-wa däx-əsəwälän, išwar ija.

11 Wa wärän itəjj a olayän, änn'-as ad-isiwəð däx-tälläbäst; wa n-enämmädäs, ihølet s-data däx-asəmmädəs n-iman-net, wa oḡädän, isiwədet däx-iqqud-net, wa šaddijän, isiwədet däx-təšədje-net.»

12 Inn'-ahi Ḡisa: «A əndärrän ḡas, oseḡ-käwän, äwwayäḡ i-hak äwadəm älhäk n-a-wa has-jän imojjan-net.

13 Näkk a-s Tizarät, näkk a-s Tišrayät,† heḡ eḡäf, heḡ ajilal, näkk a-s Sānto, näkk a-s Sämdo.»

14 Təndəð i-äddinät wi əššəšdäjnen isəlsa-näsän, ikf'-en a-wen turhajät n-ad-əkšən ara n-ahəšk wa n-tämudre d-turhajät n-ujəš s-imawän n-aḡrəm-wa-däḡ

15 mäšan, imässäxärän d-inəmmušal n-əlkäxbu d-imäjjan n-iman d-imäššanämän† d-inəsbuha, xāram-asän aḡrəm-en.

16 Näkk a-wa Ḡisa; näkk a hin-äšmašälän änjälos-in sār-wän i-ad-hawändd-isənnəfiləl härätän-wi-däḡ däḡ-älkänisäten. Näkk a-wa Ḡisa wa nahäya n-Dawəd s-ätwänna ilkam ad-ixkəm, näkk a-s tatrit ta n-tifawt tismäḡmiḡät.»

17 A-wen-däḡ a fäl, Unfas Šaddijän hakd-däḡ tämazlayt əṭṭafän iyyän n-əmm, jannen: «Ḣyyäw!» Ännet daḡ wa isällän i-isälan-wi-däḡ: «Ḣyyäw!» Ere äffudän-däḡ, aset-dd; ere irhän aman əddärnen-däḡ, ilkəwet, äswet däḡ-sän bännan.

Ajilal n-mäjräd

18 Näkk Exya, älleyeḡ i-äddinät iket-näsän wi əslänen i-härätän wi s-innä Mässinäḡ i-inəmmušal-net, əktäbän-tän däḡ-əlkəttab-i-däḡ. Əkkasäḡ-käwän däḡ-taḡdärt: isälan-wi-däḡ, ere fälla-sän ässewädän härät, ilmədet a-s ad-isiwəð Mässinäḡ fäll-a-wa has-ikittəw älmäššibatän wi s-ätwäjjan isälan-näsän däḡ-əlkəttab-wa-däḡ.

19 Afäl daḡ ikkäs äwadəm härät däḡ-iməjridän-wi-däḡ s-ätwänna i-inəmmušal ad-tän-əktəbän, əktäbän-tän däḡ-əlkəttab-wa-däḡ, ad-iqqəl Mässinäḡ s-əjadär wa has-ija däḡ-ahəšk wa n-tämudre d-aḡrəm wa šaddijän s-isiḡul əlkəttab-wa-däḡ isälan-net.

20 Ere wa s-ənta a ḡur-t-təlla tidət n-härätän-wi-däḡ iket-näsän, ənta a innän: «A əndärrän ḡas, oseḡ-käwän.» Amin! Emäli Ḡisa, əqqəl-dd.

21 Issənsä fälla-wän Emäli Ḡisa ännuḡmät iket-däḡ-näwän. Amin!

† 22:13 22:13 Däḡ-Tälyunanit, itawänna i-Tizarät: Älfa, itawänna i-Tilkamät: Omega. † 22:15 22:15 Imäššanämän (emäššanäm): Äddinät wi ḡabbädnen äššanämän.